

Bible. N.T. Choctaw. 1871 Wright

PM

874

355

1871

SOA

THE

# NEW TESTAMENT

OF

OUR LORD AND SAVIOUR JESUS CHRIST

TRANSLATED INTO

THE CHOCTAW LANGUAGE.

---

PIN

CHITOKAKA PI OKCHALINCHI CHISVS KLAIST

IN TESTAMENT HIMONA,

CHAHTA ANUMPA ATOSHOWA HOKE.

---

NEW YORK:

AMERICAN BIBLE SOCIETY,

INSTITUTED IN THE YEAR MDCCCXVI.

---

1871.

bach

# CONTENTS.

Mablu .....	Page. 5
Mak .....	109
Luk .....	174
Chan .....	286
Apostel isht Anumpa .....	369
Loman .....	467
I. Kolinhljan .....	513
II. Kolinhljan .....	557
Kaleshan .....	586
Efeshan .....	601
Filippian .....	615
Koloshan .....	625
I. Hlessalonian .....	635
II. Hlessalonian .....	644
I. Timohli .....	649
II. Timohli .....	662
Titus .....	671
Filemon .....	677
Heblu .....	680
Chemis .....	713
I. Pita .....	725
II. Pita .....	738
I. Chan .....	746
II. Chan .....	758
III. Chan .....	760
Chute .....	762
Nan Otvi .....	766

4th Edition.





PM 874  
.B55  
1871  
BAE

## UBANUMPA MAHLU

UT HOLISSOCHI TOK.

### CHAPTER I.

Chisvs Klaist a haknip imma isht ai in tikba vhleha, 1. 18 Shulom-bish Holitopa yak osh ik yohmi ai ahni pulla na, Chisvs vt ohoyo himita hatak haleli keyu Meli hohchifo mako im ai vtta.

1. EBLAHAM isht ai unchululi, Lewi a Ushi, Chisvs Klaist vtta tok isht annoa holisso hoke.

2. Eblaham vt Aisaak a tobachi tok; atuk o Aisaak vt Chekob a tobachi tok; atuk o Chekob vt Chutas micha itibapishi vhleha aiena ka tobachi tok;

3. Atuk o Chutas vt Fales, micha Sala aiena ka Tama ya a tobachi tok; atuk o Fales vt Eslom a tobachi tok; atuk o Eslom vt Elam a tobachi tok;

4. Atuk o Elam vt Aminatab a tobachi tok; atuk o Aminatab vt Naason a tobachi tok; atuk o Naason vt Salmon a tobachi tok;

5. Atuk o Salmon vt Boas a Lakab a a tobachi tok; atuk o Boas vt Obet a Luti a a tobachi tok; atuk o Obet vt Chessi a tobachi tok;

6. Atuk o Chessi vt miko Lewi a tobachi tok; atuk o miko Lewi vt Solomon a Ulias tekchi a tok a a tobachi tok;

7. Atuk o Solomon vt Loboam a tobachi tok; atuk o Loboam vt Abia ya tobachi tok; atuk o Abia vt Esa ya tobachi tok;

8. Atuk o Esa vt Chosafat a tobachi tok; atuk o Chosafat vt Cholam a tobachi tok; atuk o Cholam vt Osias a tobachi tok;

9. Atuk o Osias vt Choahlam a tobachi tok; atuk o Choahlam vt Akas a tobachi tok; atuk o Akas vt Esekias a tobachi tok;

10. Atuk o Esekias vt Manasses a tobachi tok; atuk o Manasses vt Amon a tobachi tok; atuk o Amon vt Chosaias a tobachi tok;

11. Atuk o okla ha Babulon ishtia hosi foka ma, Chosaias vt Chekonias micha itibapishi vhleha aiena ka tobachi tok;

12. Atuk o okla ha Babulon ishtona haya, Chekonias vt Salahliel a tobachi tok; atuk o Salahliel vt Solobabel a tobachi tok.

13. Atuk o Solobabel vt Abivt a tobachi tok; atuk o Abivt vt Eliakim a tobachi tok; atuk o Eliakim vt Aso ya tobachi tok;

14. Atuk o Aso vt Satok a tobachi tok; atuk o Satok vt Akim a tobachi tok; atuk o Akim vt Elivt a tobachi tok;

15. Atuk o Elivt vt Eleasa ya tobachi tok; atuk o Eleasa vt Mattan a tobachi tok; atuk o Mattan vt Chekob a tobachi tok;

16. Atuk o Chekob vt Meli, yummak o Chisvs vt a tobt vtta tuk osh Klaist hohchifo ka, i hatak Chosef a tobachi tok.

17. Yohmi hatok o Eblaham a ai vhlit it ai unchululit mihinti kv̄t Lewi a ant ai vhli kv̄t moma kv̄t it ai unchululi auah ushta hoke: yohmikma Lewi a ai vhlit mihinti kv̄t okla ha Babulon ishtia tok a ant ai vhli kv̄t it ai unchululi auah ushta hoke; yohmikma okla ha Babulon ishtona tok a ai vhlit mihinti kv̄t Klaist a ant ai vhli kv̄t it ai unchululi auah ushta hoke.

18. Chisvs Klaist vttahpi ka ilvppak osh a yakohmi tok; ishki Meli vt Chosef a im vhlpoa tok vt, ik it im ono kisha ho, Shilombish Holitopa ya vlla i shali tuk osh otvni tok.

19. Yohmi ma i hatak Chosef vt hatak achukma hatuk osh, nana vhlpisa vt onvtula hi a ik ahno mvt, lumvt kan-cha hi vt im anukfila tok.

20. Yohmi kia ilvppa puta ka anukfihinli tuk osh holh-pokuna ma, Chihowa im enchil vt ant i haiaka cha, Chosef Lewi ushi chia ma! chi tekchi Meli a ishi ik chi nukwiyo kashke; Shilombish Holitopa ak atuk mak o yvmmak okvt toba hosh afoyuka hoka.

21. Yohmi ka vlla-nakni o sholikma, hohchifo ha Chisvs ish hochifa hi oke; yvmmak osh im okla talaia ai im ashv-chika puta ma ai i hlakoficha hi oka, achi tok.

22, 23. Chihowa hvt hopaii ya isht ai anumpulit, Oho-yo himita hatak haleli keyu hosh <sup>hohchifo</sup> chakalit vlla nakni o shola he; mikma hohchifo ha Immanuel, yvmmt tosho-wak mvt, Chihowa hvt piba foka, achi mak o okla hochifa hi oke, achi tok mak o ont ai ahla chi ho, ilvppa moma kvv yvm mohmi tok.

24. Yohmi ma Chosef vt nusi tuk vt okcha mvt, Chihowa im enchil vt ai i miha tuk mak o yvmohmi mvt, tekchi a ilauei tok.

25. Yohmi kia ik it apoto kisha ho, vlla-nakni ishi ahpi kvv sholi tok: mihma hohchifo ha Chisvs hochifo tok.

## CHAPTA II.

Fochik in tikba hika ho hatak hopoyuksa vhleha hvt hvshi akochaka imma mintit Chelusalem a vla cha, 11; vloSi Chisvs a aiokpvchi, 14 micha i yakni a falamvt ilhkoli. 15 Chosef vt Echip ia chi ka enchil osh im anoli. 16 Helot vt Chisvs a hot vbi bvna; vlla chipota moma Behlehem a ai vbi. 23 Chosef vt Chutea yakni falamvt ia chi ka enchil osh im anoli no Nasalet ak o ont ai anta.

1. CHISVS vt Helot miko ai ahanta nitak o Chutea yakni Behlehem tmaha ha ai vtta ma hatak hopoyuksa vhleha hvt hvshi akochaka imma mintit Chelusalem a ai vla mvt,

2. Chu okla i miko vtta tuk mvt katimak o ituyula cho? i fochik a hvshi akochaka imma ya il a pihisa tuk osh aiokpvchit il itvnowa hatuk oke, achi tok.

3. Miko Helot vt ilvppa puta ka haklo mvt, Chelusalem okla moma aiena kvv komunta tok.



4. Micha na holitompa isht asha pehlichî puta, micha okla nan i holissochi vhleha moma ka itahobit taiyahli mvt, kanima yo Klaist vt ai vttâ hinla hatuk a im a ponaklo tok.

5, 6. Mihma Chutea yakni Behlehem ak oke; hopaii holissochi kvt, Behlehem chia Chuta yakni ish talaia hokvt Chutea i miko vhleha aiasa ka moma chik a lauwo ho keyushke; chishno ak o miko vt chi atoba hosh vm okla Islâel oka ish pehlichâ he mak oke, achi tok oka, okla im achi tok.

7. Yohmi ma Helot vt hatak hopoyuksa vhleha ha lumvt pit hoyo cha, kaniohmi fehna kash o fochik vt haiaka tuk a achukmalit im a ponaklo tok.

8. Micha Behlehem a pit tihleli mvt, Oh ia cha, vloşi atukma achukmalit hvsh hoyashke; atuk osh hvsh ahayuchikmvt, anonti ant hvs svm anoli na vno mvt irt ont ai okpvchi li ak inlashke, achi tok.

9. Mihma miko a haklot in taha mvt, okla ilhkoli tok; yohmi ma fochik hvshi akochaka imma a pihisa tuk ash o itikba takalit mahaya mvt, vloşi ai itola ka paknaka ya ont takali tok.

10. Fochik a okla pisa mvt, nayukpa aiahli fehna mak osh okla na yukpa tok.

11. Micha aboha okla ont abeha mvt, vloşi, micha ishki Meli aiena ka pisa mvt, aka hlipkvchit, yvmmak ash o okla aiokpvchi tok; micha im vlbihpo a tiwichi mvt, yvmmak ash o tvli-holisso-lakna, micha flakinsen, mikmvt mvh aiena ho okla habenvchi tok.

12. Mihmvt holhpokuna ho falamvt Helot a okla ik im ono ka hi a, Chihowa hvî i miha hatuk o, hina inla ho vltot i yakni atuk akinli ho okla ilhkoli tok.

13. Mihma ai ilhkolit taha ma, Chosef vt holhpokuna ho, Chihowa im enchil vt ant i haiaka mvt, Tani cha, vloşi mikmvt ishki aiena ka ishit malelit Echip a ish ona cha, yvmmak o ish ahanta tuk o, anumpa ishit chim aya lashke; Helot vt vloşi a vbi bvmvt hoyâ chi hoka, achi tok.

14. Mihma tani mvt, vloşi micha ishki aiena kash ninak o pehlichî cha, Echip a ia tok.

15. Chihowa hvî hopaii isht ai anumpulit, Echip ak o



svso ha a hoyo li tuk, achi tok a ont ai ahla chi ka, yvm-mak o ahashwa na Helot vt illi tok.

16. Yohmi ma Helot ash osh, hatak hopoyuksa vhleha hvt ik ahobalo ho pisa mvt, anukhobela fehna cha, pit on tihlelit, vlla chipunta Behlehem, micha auet a bilika maya kvf afvmmi tuklo ai vhlit ola minti, hatak hopoyuksa vhleha ha achukmalit im aponaklo tok vt pit ai it vlhpesa ka, mominchit vbit tahli tok.

17, 18. Yvmohmi hoka Chelemaias hopaii vt anumpo-honlit, Lama ya a yaiya, micha nishkin okchi minti, mikmvt nukhaklo chinto, Lechel vt im vlla vhleha hvt iiksho hatuk oka ishit yahaya mvt, hopohla hi a ik ahno ka, takali na haiyaklo tok oke, achi tok a ont ai ahli tok.

19, 20. Yohmi tok Kia Helot vt illi haya, Chihowa im en-chil vt, Chosef vt holhpokuna ho Echip a im a haiaka mvt, Tani cha, vloſi micha ishki aiena ka pehlichy cha, Israel okla i yakni a ish iashke; vloſi im ilhfiopak a hoyo tok vt illi hoka, achi tok.

21. Yohmi ma tani mvt, vloſi micha ishki aiena kash peh-lichy cha, Israel okla i yakni a vla tok.

22. Yohmi kia Akelavs vt iki vlhtobvt Chutea ya i miko na haklo mvt, yvmma ona nukshopa tok: yohmi nana kia holhpokuna ka Chihowa hvt nana i miha hatuk oka, fullo-tvt Kalili i kaniohmi ho ona tok.

23. Yohmi ka hopaii vhleha hvt anumpulit, Yvmmak okvt Nasalet hatak vtta hohchifa hi oke, achi tok a ont ai ahla chi ka, tmaha Nasalet hohchifo ho ona cha, ahanta tok.

CHAPTER III.

Chan Baptist vt vba anumpa ha Chutea yakni haiaka isht anumpo-honli, mihmvt baptismohonchi, 1. 13 Chisvs vt Chan ak o im a baptismo; mihma Shilombish Holitopa yvt vba mintit onvtula.

1. NITAK yvmma foka ma Chan Baptist vt Chutea yakni haiaka ya vbanumpa isht ai anumpohonlit aya tok;

2. Mihmvt, Uba apehlichika yvt olanloſi vla hoka, hvsh ilekostininchashke, ahanchi tok.

3. Ilvppak o hopai Esaias vt isht anumpulit, Achufa hosh yakni haiaka ya ai anumpohonlit, Chihowa ataya hi a apoksiachit, i hina puta ka hvsh apissvlehashke, ahancha hi oke, achi tok mak oka.

4. Mihmvt Chan yvmmak okvt im anchi yvt Kamel hishi yosh toba ma, na-hakshup chuhlafa vskufvchi yo vskufaiyachi tok; mihmvt im ilhpak vt hawa micha foi-bila aiena kak a tok.

5. Yohmi ma Chelusalem, micha Chutea pit a moma, mikmvt Chatan auet a bilika yakni moma ka asht a kohchvt ivt;

6. Yvmmak ash o im ai onvt, nan im aiashvchika puta ilanolit, Chatan a ai im a baptismo tok.

7. Yohmi kia Falisi vhleha mikmvt Satusi vhleha aiena kvt laua hosh im a baptismot ai vla na pisa mvt, yvmmak ash o, Sinti chilita isht-atiaka hvchia ma! na palvmmi mihinti ka hvsh i hlakofa hi okvno kvt hosh hvchim anoli tuk oh cho?

8. Yohmi hokvt ilekostininchi ai itvlhpesa mak o vnit hvsh wayashke;

9. Michu, Eblaham ak osh piki oka, acha hi okvno hvch ik il anukfillo kashke; Chihowa hvv tvli yak aiasha ka Eblaham im vlla ya chi ka ai ikba hinla hoke, hvchim achi lishke.

10. Yohmikma himak ak kia iskifa yvt iti puta akishtvla ya itonla hoke; yohmi hatuk o iti yvt vni achukma ho vnit waya keyu kvt moyumvt chayvt akakoha cha, luak pit itokaha chatuk oke.

11. Vno yokvto hvsh ilekostinincha chi mak o; oka ya ishit hvchi baptismochi li ho mvhlishe; yohmi kia auet siakayvt mihinti hokvto vno a shaiyahli, yvmma i shulush a isht im aya hi o si ahoba keyu hoke; yvmmak osh Shilombish Holitopa, micha luak aiena mak o ishit hvchi baptismocha hi oke.

12. Yvmmak osh i nan-isht-mvshahchi yvt ibbak a foyuka; yohmi hokvt i nan-anihichi yatuk ma achukmalit kashofit tahli cha, onush atuk ma kanchak a pit ashacha hi oke;

yohmi kia hakhlopish okvno luak moshola hi keyu mak o ishit hukma hi oke, im achi tok.

13. Yohmi ma Chisvs vt Kalili a vttvt minti hosh Chan a im a baptisma chi hosh Chatan a ai im ona tok.

14. Yohmi kia Chan vt yvmmak ash o im alvmmi mvt, Uno ak osh chishno a chim a baptismo la he si vlhpiesa ka, anonti vno ak o is svm vla cho? achi tok.

15. Mihma Chisvs vt afalamинchi mvt, Himak okvno yakohma hi oka ish ahnashke: ai yakohmi hosh nana ai vlhpiesa puta ka mominchit il aiahlicha he pim vlhpesa hoke, im achi tok. Yohmi ma vlhpesa, im ahni tok.

16. Yohmi na Chisvs vt baptismo mak inli hosh oka ya ai vttvt kocha ia tok; yohmi ma vba shutik vt auet in tiwa tok; mihma Chihowa imi Shilombish vt pvchi yoshuba chiyuhmi hosh aka mihintit, yvmmak ash o ant o binili tok.

17. Yohmi ma vba shutik a auet ai anuhumpa kvт, Ilvp-pak osh svso a holitopa yo ilvppak o nan isht a sai yukpa mak oke, achi tok.

CHAPTA IV.

Shilomish osh Chisvs a ilauelit yakni haiaka isht ona: mihma nitak pokoli ushta ka nahullochi; micha Setan ak osh imomaka pisa: enchil-vhleha hvт ant nan isht im anta, 1. 12 Kapenavm a Chisvs vt ai anta: mihmvt ile kostinича he isht anumpohonli tok. 18 Pita, Antilu, Chemis, Chan aiena kvт nan im aiithvna ya chi ho, Chisvs vt atokolechi. 23 Chisvs vt Kalili yakni a nan im abrchit a hlopullit, abeka puta atuk ma hlakofihинchi.

1. YUMOHMI ma Setan vt imomaka pisa chi ka, Shilombish vt Chisvs a yakni haiaka isht ia tok.

2. Atuk o yvmmak ash osh ik impo hosh nitak pokoli ushta cha ninak pokoli ushta aiena ho anta tuk osh, misha pila mvno hohehvfo tok.

3. Mihma imomaka pisa yash osh im vla mvt, Chihowa Ushi chia ho kmvt, tvli yak maya kvт pvсka toba chi ka i mihā, im achi tok.

4. Yohmi kia yvmmak ash osh afalamинchi mvt, Hatak vt pvсka yak bano ho ai okchaya he keyu; amba anumpa



moyuma kv̄t Chihowa itih akohonchā kak a hi ̲, holisso tok oke, achi tok.

5. Yohmi ma Setan ash osh ilaue<sup>lit</sup> tvmaha holitopa ya ont isht chukowa cha, tempel wishakchi y̲ ont ̲ hilechi tok.

6. Mihmvt, Chihowa Ushi chia hokmvt, aka pit ish ile pilashke; chi apesahancha ch̲i ka im enchil v̲hleha ha atohna na ibbak a isht v̲ba takalihinchif chisht aya na nitak kaniohmi kia chiyi ya tv̲li isht chik ai isso ka hi a, holisso tok oka, im achi tok.

7. Mihma Chisvs ash osh, Chitokaka Chin Chihowa hoka imomaka chik peso kashke, achi kv̄t holisso tok ak inli hoke, im achi tok.

8. Mihma anonti Setan ash osh ilaue<sup>lit</sup> nv̲nih chaha fehna h̲o isht oiya cha, yakni apelichika moma, mikmvt nan-isht-im-aholitopa aiena ka pit pisachi tok;

9. Mihmvt, Aka hlipiv̲t is si aiokpv̲chi hokma, ilv̲ppa moma ka chima lashke, im achi tok.

10. Mihma Chisvs ash osh, Setan vt kanima iashke: chin Chitokaka Chihowa hak ̲ ish ai okpahanchikmvt, yvmmak illa h̲o ish im antiashke, achi kv̄t holisso hoka, im achi tok.

11. Yohmi ma Setan ash osh i filv̲mmi ma, enchil osh ai v̲la cha, okla ant nan isht im anta tok.

12. Yvmohmi tuk ̲ Chisvs vt, Chan vt aboha kv̲llo foka na haklo mvt, Kalili a ia tok.

13. Atuk osh Nasalet a issvt ia mvt, Kapenavm yvmmv̲t Sabulon yakni, micha Neftalim yakni aiena ont ai v̲hli okhv̲ta lapalika ak ̲ ont ahanta tok.

14, 15, 16. Yakohmi kv̄t hopaii Esaias anumpulit, Sabulon yakni, micha Neftalim yakni okhv̲ta lapalika, Chatan misha, Chentail okla i Kalili vt aiokhlileka asha tuk vt tohwikeli chinto pisa tuk; mihma isht aiilli yakni, micha isht-aiilli i ho-shontika maya tuk a tohwikeli hv̲t i kohev̲vt takalishke, achi tok a ont aiahla he mak a tok.

17. Yv̲mma foka aiv̲h<sup>lit</sup> mihinti ma, Chisvs vt v̲ba isht anumpulit, Oh ilekostin<sup>in</sup>chi; v̲ba apelichika yvt olanlosi v̲la hoka, ahanchit ishtia tok.



18. Atuk osh Chisvs vt Kalili okhvta lapalika nowvt aya tuk osh, itibapishi tuklo, Saimon Pita hohchifo, anonti nakfish Antilu itatuklot nvni-hokli atuk osh nvni-isht-hokli a okhvta pit okvchi hosh ashwa na pisa tok.

19. Mihmvt yvmmak ash o, Hvs siakaiyashke, mikma hatak hokli o hvch ikbi lashke, im achi tok.

20. Yohmi ma mih makinli ho i nvni-isht-hokli a issa cha, yvmmak ash o iakaiyvt okla tok.

21. Mihma yvmmak ash vttvt ia hosh aya mvt, anonti itibapishi tuklo inla, Sebate ushi Chemis, micha nakfish Chan itatuklo kvv iki Sebate a apihvt nvni-isht-hokli a apoksia hosh peni alhto na pisa tok; micha pit i howa tok.

22. Yohmi ma mih makinli ho peni, micha iki aiena kash o issvt, yvmmak o iakaiyvt okla tok.

23. Mihma Chisvs vt Kalili a mominchit ayvt, i sinakak puta ka nan ai im avchit, apchlichika isht anumpa hanta ya isht anumpohonli; micha okla hvv abeka, micha haknip ik in chukmo im asha tuk a mominchit hlakofihinchit tok.

24. Mihma isht annoa kvv Silia moma ka ont hlopulli tok; mihma okla hvv abeka ilaiyuka puta isht issikkopa hatuk; micha nan isht-ahullo okpulo ai i foka hatuk; mihmvt tasimbo yatuk; micha palsi isht abeka yatuk moyuma ka okla isht im ai ona tok; mihma yvmmak ash hlakofolichi tok.

25. Yohmi ma okla chinto Kalili minti, mikmvt Tekapolis minti, mikmvt Chelusalem minti, mikmvt Chutea minti, mikmvt Chatan misha minti aiena kvv iakaiya tok.

CHAPTER V.

Chisvs vt nvni chaha ya ai anumpuli. Yohmi kvv kvna hosh nan isht ilaiyukpa anoli, 11. 13. Klaist i yimmi vhleha hvv yakni i hvpi: 14 yakni a im a tohwikelika; tmaha yosh nvni ai o talaia ka chohmi; 15 pva ha chohmi. 17 Chihowa i nanvlhpisa ya Chisvs vt aighlichia chi hosh vla. Kaniohmi hosh nanvlhpisa isht hannali ka kobvffi ka anoli. 27 Kaniohmi hosh nanvlhpisa isht untuklo ka kobvffi ka anoli. 33 Anumpa kvvlo isht ile onochi im olvbbi. 38 Nukchintot nana ik achukmo ka a pim ahleka he pi miha. 43, pin tvnvp puta ka il i hulla he; 45 mikmvt nan ai ahla he pim anukfila he aiena ka pi miha.

1. YOHMI ma okla chito ka pisvt, nvnih chaha yo pit oiya tok ; atuk osh ont binili ma, nan im ai ithvna vhleha hvt im ai ona tok.

2. Mihma itih ha wakvmmi cha, yvmmak ash im abvchi mvt,

3. Chukvsh ilbvsha vhleha yokvto vba apehlichika yak osh immi hokvt nayukpvshke.

4. Nanukhaklo vhleha yokvto hopohla hi okvt nayukpvshke.

5. Anukhobela iksho vhleha yokvto yakni a isha he vlpesa hokvt nayukpvshke.

6. Ahopoyuksaka aiahni vhleha hvt hochahafu, itukshihila aiena hokvto, kaiya hi okvt nayukpvshke.

7. Nan i nukhaklo vhleha yokvto ilap ma i nukhaklo na pisa hi okvt nayukpvshke.

8. Chukvsh kashofa vhleha yokvto Chihowa ya pisa hi okvt nayukpvshke.

9. It i nanaiyvchi vhleha, yvmmak okvto Chihowa ushi hohchifa hi okvt, nayukpvshke.

10. Ahopoyuksaka pulla hatuk mak o isht i palvmmi vhleha yokvto, vba apehlichika yvt immi hokvt nayukpvshke.

11. Uno atuk pulla mak o hatak puta kv isht hvchi yopulvt, hvchi ilbvshachit, ahli keyu kia nana okpulo ilaiyuka puta ka isht hvchi mihahanchikma, na hvchi yukpvshke.

12. Nayukpvt hvchi yukpa fenashke : isht hvchim vlhtoba hi vt chinto hosh vba ya asha hoka ; hopaii vhleha hvchin tikba aiasha ka yakohmichit ilbvshachi tok mak oka.

13. Yakni i hvpi hvchia hoke ; yohmi kia hvpi hvt homi kv i kvnia hokmvt, nanta hak o isht a homa hinla cho ? yvmmak okvt himmakma nana ho isht ai vlpiesa he keyu ; amba kocha pit hlaya na hatak puta iyi yosh avhlihinja he ak o pulla hoke.

14. Yakni in tohwikeli hvchia hoke. Tvmaha chito yosh nvnih chaha ai on talaia hokvt luma he keyushke.

15. Mikma hatak vt pva ha pvalikmvt, tanchi isht vlpisa nutaka yo talali chatuk keyu ; amba pva ai-o-hikia yo ai o



hilechi chatuk; yohmikma aboha anukaka maya ka mominchit tohwikelichi chatuk oke.

16. Hvchi p<sub>u</sub>la hv<sub>t</sub> hatak puta itikba y<sub>a</sub> ik a tom<sub>m</sub>i pulla na inla a<sub>s</sub>ha kv<sub>t</sub> nana hvsh akaniohmi hochukma puta ka pisa cha, Iki vba binili ka holitoblashke.

17. Nan vlhpisa, micha hopaii puta im anumpa aiena ha tok a okpvnit aya li tuk a, ik hvchim ahobo kashke; okp<sub>v</sub>ni la hi osh aya li tuk keyu; amba aiahlich<sub>i</sub> la he mak a tok.

18. Ahli mak o hvchi miha lishke, Yakni, mikmvt vba shutik aiena hokvto ont ik ai iksho kia, vba nan vlhpisa yvt moma ont ik a lauwo achvfona nana kia a kaniohmit aiokpuloka iksho mak osh, momvt ont aiahla he mak oke.

19. Yohmi hoka kvna hosh vba nan vlhpisa ik a lauwo iltpa puta ka achvfona ka kobvffi cha, hatak puta kv<sub>t</sub> ai yv-miheha chi h<sub>o</sub> im avvchi hokmvt, vba apehlichika aiasha ka moma ik a lauwo hohchifa he; amba kvna hosh mihma holitobli cha, inla ma isht im avvchi hokvto, mihi yosh vba apehlichika ya chito ont a hohchifa hi oke.

20. Hvchi aivlhpiesa kv<sub>t</sub> na-holissochi vhleha, micha Falisi vhleha aiena ka i shahli h<sub>o</sub> keyukmvt, nana hosh a kaniohmi kak o vba apehlichika y<sub>a</sub> ont hvsh chukowa he keyu hoke, hvchim achi lishke.

21. Nitak tikba aiasha kv<sub>t</sub>, Kvna kia ish bi na: kvna hosh inla vbi hokvt nan vlhpisa y<sub>o</sub> isht im ahleka<sub>s</sub>hke; achi tok a hvsh haklo chatuk.

22. Amba vno vto, Kvna hosh nana hosh a kaniohmi keyu h<sub>o</sub>, itibapishi h<sub>a</sub> i nukkilli hokmvt, nan vlhpisa y<sub>o</sub> isht im ahleka<sub>s</sub>hke: mikma kvna hosh itibapishi h<sub>a</sub>, Ik chi ahobo, im achi hokmvt, nan vlhpisa kv<sub>l</sub>lo i shahli h<sub>o</sub> isht im ahleka he: amba kvna hosh, Im anukfila iksho chia hoka, im achi hokvto aiokpuloka luak o ont isht im ahleka hi oke.

23. Yohmi hoka vba chi nan-isht-aiokpvchi y<sub>a</sub> ieshit alta y<sub>a</sub> ish ona kv<sub>t</sub>, ish itibapishi h<sub>a</sub> nana ish i kaniohmi tuk a a<sub>s</sub>ha ka ish ithaiyana hokmvt;

24. Vba chi nan-isht-aiokpvchi ash alta itikba y<sub>o</sub> ish bohli cha, ivt tikba ish itibapishi ak o ont ish it i nanaiya ha yosh, vltv, vba chi nan-isht-aiokpvchi ash pit isht ish aiokpvchashke.

25. Nan v<sup>h</sup>lpisa chi onochi yatuk ma a<sup>h</sup>ev<sup>h</sup>t ish maya takla kak osh, tu<sup>h</sup>sh<sup>h</sup>vt ish it ibai ach<sup>h</sup>v<sup>h</sup>fashke; keyukma ni-tak kaniohmi kash inli h<sup>o</sup> nan v<sup>h</sup>lpisa chi onochi yash osh chisht nan apesa ibbak a chi fohkikma, anonti nan-apesa yash osh nanv<sup>h</sup>lhtoka ibbak a chi fohki na aboha kv<sup>l</sup>lo ya ish fohka he mak oke.

26. Ahli mak o chi miha lishke, Ont ishtaiyopi fehna ka atobbit ish kaiyanchi h<sup>o</sup> keyukm<sup>h</sup>vt, kaniohmi kak osh y<sup>u</sup>m-mak atuk a ish kohcha he keyu mak a hi oke.

27. Nitak tikba aiasha kv<sup>t</sup>, Hvsh it in lumaka ná; achi tok a hvsh h<sup>h</sup>aklo chatuk.

28. Amba vno vto, Kvna hosh ohoyo ha i nukpvli hosh pisa hokvt, chukvsh anukaka ya isht in lumaka mashko hoke, hvchim achi lishke.

29. Micha chi nishkin isht impak-imma yvt chi ibetv<sup>h</sup>blich<sup>h</sup>i hokma, halv<sup>h</sup>lit kohchit ish kanchashke: chi nana ach<sup>h</sup>v<sup>h</sup>fona hosh okpulo kia, chi haknip vt momvt aiokpuloka ik aiyo ka he ak osh chim v<sup>h</sup>lpesa hoke.

30. Mikmvt chibbak isht impak-imma yvt chi ibetv<sup>h</sup>blich<sup>h</sup>i hokma, bvshlit tv<sup>h</sup>plit ish kanchashke; chi nana ach<sup>h</sup>v<sup>h</sup>fona hosh okpulo kia, chi haknip vt momvt aiokpuloka ik aiyo ka he ak osh chim v<sup>h</sup>lpesa hoke.

31. Kvna hosh tekchi a kanchikmvt, it i kvnia holisso ha imashke; achi tok a takalishke.

32. Amba vno vto, Kvna hosh tekchi vt lumaka tuk o keyu h<sup>o</sup> kanchikmvt, hau<sup>i</sup> ikbicha he: yohmikma kanchi haya kvna hosh itauwayakmvt, hau<sup>i</sup> toba mak a hi oke, hvchim achi lishke.

33. Micha anonti, nitak tikba aiasha kv<sup>t</sup>, Anumpa kv<sup>l</sup>lo ish ile onochi tuk vt chik kobvffo kashke: amba anumpa kv<sup>l</sup>lo ish ile onochi tuk okvt Chitokaka ya ish im aiahlich<sup>h</sup>a hi oke; achi tok a hvsh h<sup>h</sup>aklo chatuk.

34. Amba vno vto, Anumpa kv<sup>l</sup>lo chik ile onochi kv<sup>h</sup>mohmashke; vba shutik ak kia pit isht chik ai a miho kashke; yvmmak okvt Chihowa im aiasha mak oka:

35. Mikmvt yakni vt iyi im ai-o-heli mak oka, yvmma isht chik ai a miho kashke; anonti Chelusalem a isht chik ai a



miho kashke; yummak okvt Miko chito in tumaha chito yoka:

36. Micha chi noshkobo ak kia isht chik ai a miho kashke; chi pashi achufa kia ish tohbichikmá, ish lusachikmá, nana he keyu hokvt:

37. Amba chim anumpa hvt Ome, ome; Keyu, keyu; achi aiena kak ashke: ilvppak o nana kv̄t ont atampa hokvt o nana ik vlhpeso mak o a minti hoke, hvchim achi lishke.

38. Nishkin atuk ma, nishkin makinlashke, mikmvt noti atuk ma, noti makinlashke; achi tok a hvsh haklo chatuk:

39. Amba vno vto, Nan ik vlhpeso ka chik i sanalo kashke; amba kvna hosh chitisopi isht impakimma ya issokma, in tvnvp ma pit ish i weli makinlashke.

40. Micha hatak nana kia nan vlhpisa chi onochi cha, chim ilefoka ya chim ai ishikma, chim anchi ma ik ishi, ish im ahni akinlashke.

41. Micha kvna kia awant ivt kowi achufa ka ish ona pulla hi a chim ahnikma, awant ivt tuklo ho ish onashke.

42. Nana chim asilhhakma, ish imashke: mikmvt chim a pota bvna hoka, chik i shanaiyo kashke.

43. Chin <sup>house-meat</sup>chukapanta hatak a ish i hullo cha, chin tvnvp okvno ish i nukkillashke; achi tok a hvsh haklo chatuk.

44. Amba vno vto, Hvchin tvnvp vhleha ha hvsh i hullo cha, nana okpuloka hvchim anukfillit miha aiena ka, nana achukma ho im ahnit hvsh mihashke; hvchi nukkilli ma ai achukma hi o isht hvsh i yvmohmikmvt, hvchi kanimachit, hvchi ilbvshachikma, vba isht hvsh anumpohonlashke.

45. Yakohmi hosh hvch Iki vba binili ka im vlla hvchia hi oke: yummak okvt i hvshi atuk ma nan ik vlhpeso, micha na-hochukma aiena ka i kohchihinchikmvt, kocha umba ka nan-aiagli hochukma, mikmvt nan ik ahlo aiena ka auet i piliinla chatuk oka.

46. Hvchishno a hvch i hullo ho hvsh i hullo hokvt, nanta hosh isht hvchim vltoba ho? pvblikan vhleha ak kia yummak okvno yohmi akinli chatuk keyu?

47. Micha hvsh itibapishi vhleha ak bano ho hvsh aiokpvchi hokmvt, inla asha ka nantak o isht i shahlichi hosh

huchi yvmohmi hō ? pūblikan vhlēha ak kia yohmi ak inli chatuk keyu ?

48. Yohmi hoka aiahli huchi achukma kv̄t, hvch Iki vba binili kv̄t aiahli achukma kak inli hō hvsh chiyuhmashke, hvchim achi lishke.

## CHAPTA VI.

Chisvs vt nv̄nih chaha ai anumpuli tuk vt a moma. Yohmi kv̄t na habenvchi, 1, 5 anumpa ilbvshvt asilhha, 14 nan ai-ashvchi puta ka i kashofa he, 16 na hollochi aiena ka isht anumpuli, na pim ilayak kanima yō il a boyula hi a pim anoli, 24 i shahli ha tuklochit il ai okpv̄cha he keyu ka miha, 25 yakni paknaka nana a kaniohmi ka ai isht im anukfilvt isht ik ilbvsho hosh, 33 amba Chihowa apēhlichika yak o na tikba e hoyā hi a miha.

1. AHAH! hvsh aiahnit na hvsh habenvchi kv̄t, huchi pisa chī ka, hatak puta itikba yō hvch ik a yvmihcho kashke; yvmmak keyukmvt hvch Iki vba binili ka im a hvchim vlhtoba hi o keyu hoke.

2. Yohmi ka na hvsh habenvchi kv̄t, isht-pufa ya chi tikba yō ai olachit, nan-ilahobi vhlēha hokvto hatak puta kak o im a holitopa chī hosh sinakak anukaka, micha ai itvnowa puta ka a yvmohmi chatuk oka, hvch ik chohmo kashke: ahli mak o hvchim achi lishke, yvmmak okvto im vlhtomba chatuk oke.

3. Amba nana ish habenvchi hokmvt, chibbak isht impakimma yvt nana kaniohmi ka, chibbak vlhfv̄beka yvt akostinicha hi a chik im ahno kashke.

4. Yohmi na nanish habenvchi ka a lumakashke; yohmikma Chiki aluma ka a pisa yvt ilap inli hosh otv̄nichī achukma hosh chim atobba hi oke.

5. Micha vba pit ish anumpuli hokvt, nan-ilahobi vhlēha hokvno chik chohmo kashke; yvmmak okvto, hatak vt pisa chī ka, sinakak anukaka, ai itvnowa ai itai okhv̄nkvchi aiena kak o hiohm̄ayvt vba pit anumpuli kak osh im achukma chatuk oka; ahli mak o hvchim achi lishke, yvmmak okvto im vlhtomba chatuk oke.

6. Amba chishno vba pit ish anumpula chi hokvto, chim abohushi pit ish chukowa cha, okhissa ya pit ish akvmmik-mvt, Chiki ai-alumaka ai ahanta yatuk ma pit ish im asilh-hashke; yohmikma Chiki alumaka apisa yvt otvniichi achukma hosh chim atobba hi oke.

7. Yohmi kia vba pit hvsh anumpuli hokvt it vlbilit mih-  
iha kv, oklushi nan ik ithano ak okvno hvch ik chohmo  
kashke; yvmmak okvto anumpuli fehna kak o, hakla hinla,  
im ahoba cha tuk oka.

8. Yohmi hoka yvmmak oka hvch ik holbo-kashke; nana  
a hvchi bvnna puta hokvt hvch ik im asilhho kisha kak inli  
ho, hvch Iki vt ithana hoke.

9. Yohmi hoka yakohmichi hosh vba hvsh anumpu-  
lashke: Piki vba ish binili ma! Chi hohchifo hv holo-  
pashke.

10. Ish apelihchika yvt vlashke. Nana ish ai ahni ka  
yakni pakna ya a yohmi kv, vba yakni a yohmi mak o  
chiyuhmashke.

11. Himak nitak ilhpak pim ai vlhpesa kako ish pi  
ipetashke.

12. Mikmvt nana il aheka puta ish pi kashofi kv, pish-  
no vt nana pim aheka puta il i kashofi chatuk a ish chiyuh-  
michashke.

13. Mikmvt anukpvlika yoka ik ia chik pim aiahno hosh,  
amba nan-okpulo a ish pi a hlakofihinchashke: Apehli-  
chika, mikmvt nan-isht-aiahli, micha isht aholitopa aiena  
kv chimmi a bilia yoke. Amen.

14. Hatak nan ai ashvchika puta ka hvsh i kashofi  
hokma, hvch Iki vba binili kv hvchishno ma hvchi kashofa  
hinla ak inli hoka.

15. Amba hvchishno vt hatak nan ai ashvchika puta ka  
hvsh i kashofi keyu hokma, hvch Iki vba binili kak kia na  
hvchim ai ashvchika puta ka hvch i kashofa he keyu  
loke.

16. Yohmikmvt anonti, nana hvsh hullochi kv nashuka  
ilapissa, nan ilahobi vhleha hoka hvch ik chohmo kashke;  
yvmmak okvto na hullochi kv hatak puta im otvna chi



kvt, nashuka ya ilapissachi chatuk oka. Ahli mak o hvchi miha lishke, yvmmak okvto im vltomba hoke.

17. Amba chishno vto nan ish hullochikmvt, chi noshkobo ish ahvmmi cha, chi nashuka ma ish achifashke.

18. Yohmi cha hatak puta kano na hullochi ho chik i holbo hosh, amba ai alumaka ai ahanta Chiki ak illa ho ish im otvnashke; yohmikma Chiki ai alumaka a pisa yatuk mvt, otvnichi achukma hosh chim atobba he mak oke.

19. Hvchim ilayak puta ka yakni paknaka nanilayak shushi, micha na-lakna aiena kvt ai okpvni chatuk, micha hukopa puta yvt tiwit isht chukowvt a hukopa ya hvchik ai atahlo kashke.

20. Amba hvchim ilayak puta ka vba yakni nanilayak shushi, micha na-lakna aiena kia ai okpvni keyu, mikma hukopa puta kia tiwit isht chukowvt a hukopa keyu ak o hvsh ai atahlashke.

21. Kanima yo hvchim ilayak vt itonla hokma, hvchi chukvsh ak kia mihi yo pit takanla hinla ak inli hoka.

22. Haknip a i pva hvv nishkin ak oke. Yohmi hatuk o chi nishkin vt achukma hokma, chi liaknip vt momvt tohwikelit alotowa hinla hoke.

23. Amba chi nishkin vt ik achukmo hokma, chi haknip momvt okhlilit alotowa he. Yohmi ka tohwikeli chi foyuka, yvmmak atuk vt ont okhlieli hokma, okhlili yvm-mvt chinto fehna nana mak ahinla keyu?

24. Hatak nana kia i shahli ha tuklochit holitobla he keyu; achvfalit i nukkilli cha, achvfa yak o holitobla hinla; keyukmvt achvfalit pit halanli cha, achvfa yak o kanimancha hinla hoke. Chihowa micha Mammon it aieninchit hvsh holitobla he keyushke.

25. Yohmi hoka hvchi ai okchaya hi a nana ho hvsh pa he, micha nana ho hvsh ishka he aiena; mikmvt hvchi haknip ma nana ho hvsh fohka hi a anukfillit isht hvch ik ilbvsho kashke, hvchim achi lishke. Ilhfopak vt ilhpak a i shahlikma, anonti haknip vt nafohka ya i shahli ho keyu cho?

26. Hushi vba itvnova ho ho pesa: yvmmak okvt nana



ho hokchi keyu, anonti vmot, kanchak kia pit ashachi ho keyu; yohmi kia vba hvch Iki vt yvmma ipehinta hoke. Holitopa kvv yvmma hvsh i shahli fehna ho keyu?

27. Hvsh katima kak osh anukfihinlit isht ilbvsha kvv hvchi chaha ka kubit achvfa kia hvsh il achakala hinla cho?

28. Micha nanta katiohmi ho na fohka ya anukfihinlit isht hvsh ilbvsha cho? Na pakanli hochukma lilli oktak aiasha kvv kaniohmit offo hoka anukfihinlit ho pesa: yvm-mak okvv toksvlit a hoyvbi keyu, anonti nana ho shvnni keyushke.

29. Yohmi ak inli kia Solomon ak kia nan-isht im a holitopa moma isht a shema kvv ilvppa achvfona kia chohmi tok keyu, hvchim achi lishke.

30. Yohmi ka hvshuk himak nitak ano oktak aiasha tuk osh onna ha apalvska vlpita chi kia, Chihowa hvv she-mvchi kvv yvmihchi kvvto, hvchishno a i shahlichu hosh ik hvchi shemacho ka hinla cho? na yimmi fehna keyu hvchia ma!

31. Yohmi hoka anukfihinlit isht ilbvshvv, Nantak o e pa chi? mikvvv nantak o iloh ishka chi ho? micha nantak o ehv fohka chi cho? hvch ik achv kashke.

32. Ilvppa puta kak o okla nan ik ithano vhleha hvv hoyv chatuk oka; ilvppa moma ka a hvchi bvna hokvvv vba hvch Iki vt ithana hoka.

33. Amba Chihowa apelihika, micha nan isht im ai vlvpiesa aiena kak o tikba hvsh hoyashke; yohmikma ilvppa moyuma kvv hvchim aiena he mak oke.

34. Yohmi hoka onna ha ya hi a nana pit anukfihinlit isht hvch ik ilbvshv kashke; onna ha yokvv ilapo inli nan isht il ai anukfihinlit isht ilbvsha hi oka. Nana ik ai achukmo itonla kak osh nitak oka im vlvpesa hoke.

CHAPTA VII.

Nvnh chaha Chisvs vt anumpuli tok osh a moma; yohmi kvv himakfokalehit inla ya na mihacha chi ka imolvbi, 1; 6 micha nana kvv holitompv hokvvv offi puta, keyukvvv shukha aiena ka pit ik in blatapo ka he miha, 7 anumpa ilbvsha ishit asilhha

ka miha, 13 okhissa iskvtnosi, micha hina ik pvrtho, mikmvt okhissa chito, micha hina pvrtha isht anumpuli. 15 Hopai ilahobi ya ahah! im ahna he, 21 vbanumpa haklo illa he keyu, amba im antia he; 24 tvli chito chuka yvt ai itvbana chatuk a chohmi; mikma kvna hoh kia i yinmi keyu hokvt chuka yvt shinuk o ai itvbana chatuk a chohma hi a miha.

1. HUCHISHNO a nana ik hvch i mihacho ka chi ka, inla ya nana hvch ik mihacho kashke.

2. Kanimihchit inla ya nana mihachi hosh hvsh mihachi tuk ma, hvchishno ma isht hvch i mihacha he; mikmvt isht vlhpisa nana ho isht hvsh apesa tuk mvt, hvchishno mvt isht hvchim vlhpisa he akinli hoka.

3. Micha nanta katiohmi ho na hishonluk iskvtnosi kvt ish itibapishi nishkin a foka na ish pisa ho kak osh, anonti iti chito yvt chi nishkin ak inli foka kano chik akostinicho cho?

4. Micha katiohmi ho iti chito yvt chishno chi nishkin ak inli ho foka ka, ish itibapishi ha, Na-hishonluk iskvtnosi ka chi nishkin a ai ishit ak kohchi, ish im acha hinla cho?

5. Nan ilahobi chia hoka, chishno chi nishkin ak o tikba iti chito a ish a kohchashke; yohmikmak osh ish pisa achukma cha na hishonluk iskvtnosi ka ish itibapishi nishkin a foka tuk a ish a kohcha hinla hoke.

6. Nana kvt holitempa hokvno ofi puta ma pit hvch ik imokmvt, anonti hvch i na holitopa puta hatuk ma shukha itikba ya hvch ik ashacho kashke; yvmmak keyukma yvmmak ash o iyi isht a hvhlichhi cha, anonti filemvt hvchishno ash o hvchi okpvna hinla hoke.

7. Hvsh asilhhakma, hvch ima he; hvsh hoyokmvt, hvsh ahayucha he; hvsh sokohakma, hvchin tiwa he oke.

8. Asilhha aiyuka hokvto ishi bano hoke: mikma kvna hosh hoyo hokvto, ahayuchi hoke; mikma kvna hosh sokoha hokvno, in tiwa pulla hi oke.

9. Yohmi ka hatak hvsh katima kak osh, ushi osh pvska im asilhha ka, tvli yo isht ima hinla ho?

10. Keyukmvt nvni yo asilhhakma, sinti yo isht ima hinla cho?

11. Yohmi ka nan ik ai vlhpeso hvchia kia hvchim vlla ya na hochukma isht ima kvt hvchimponna chatuk a, im asilhha hoka hvch Iki vba binili kvt na hochukma isht ima kvt i shahlichu ik fehno ka hinla ho?

12. Yohmi hoka nan-okluha ka hatak puta kvt hvchim a yvmohma hi a hvsh aiahni hosh, mih mak o hvsh ai i yvmohmi mak inlashke: ilvppak o nan vlhpisa, micha hopaii puta aiena kvt miha hoka.

13. Okhissa iskvtinosi ak o hvsh ai abehashke; okhissa yvt chito cha, hina mvt putha hosh aiokpuloka ya ona hatuk o, yvmma ai abeha kvt laua hoke.

14. Okhissa yvt iskvtinosi cha, hina mvt ik putho hosh ai okchaya ya ona hatuk o, ik lauwo hosh yvmmak oka ahayuchi hoke.

15. Hopaii ilahobi vhleha chukfulhpoba i na fohka fohka hosh hvchim ai vla kia, anyakaka yokvto nashoba isikopa vhleha mak oka, ahah! hvsh im ahnashke.

16. Ilap vni kak o isht hvsh akostininchi pulla hi oke. Hatak vt kvti hak o paki a ai vmo chatuk o? micha fik a shumvti ak o ai vmo chatuk oh cho?

17. Yvmmak inli ho chohmit iti hochukma moma kvt vni hochukma ho vni chatuk; amba iti okpulo yokvto vni yvt okpulo yo vni chatuk.

18. Iti achukma yvt vni okpulo yo vna he keyukma, anonti iti okpulo vt vni achukma ho vna he keyushke:

19. Iti vt vni achukma ho vni keyu hokvto momvt chayvt akakoha cha, luak itokaha chatuk oke.

20. Yohmi hoka ilap vni ak o isht hvsh akostininchi pulla hi oke.

21. Chitokaka ma! Chitokaka ma! vm achi kak osh momvt vba yakni a chukowa hi o keyushke; amba Aki vba binili nan aiahni ka yvmohmi tuk mak a hi oke.

22. Nitak yvmma fehnakma Chitokaka ma! Chitokaka ma! chi hohchifo ha nan isht anumpulit, chi hohchifo ha nan-ishtahullo okpulo puta isht kocha welit, anonti chi hohchifo ha na fehna lawa ka isht il a yvmihchi tok keyu cho? vm achi kvt laua hi oke.



23. Yohmikma otv nichit, Nitak nana ashq hvch ithana li tuk keyu, nan ik vllhpeso yohmi hvchia hvt a flvmmitt misha oh ia chá, im achi la hi oke.

24. Yohmi hoka kva hosh vm anumpa ilvppa puta hatuk ma haklo cha, mihma yvmohmi ka, hatak hopoyuksa yosh tvli paknaka yō in chuka a talali tok a it apesa lashke.

25. Yohmi tuk o umba hatuk mvt aka ituyula na okchitot vla ma, anonti mahli hvt mahli cha, chuka yvmmak ash ai ihiso ka, tvli paknaka yō ai itvbana hatuk okvt, ik akamo ki tok.

26. Yohmikma kva hosh vm anumpa ilvppa puta hatuk ma haklo cha, mihma ik yvmohmo hokvto, hatak ik hopoyukso yosh in chuka ya shinuk paknaka yō a talali tok a it vllhpisashke.

27. Yvmohmi tuk o umba hatuk mvt aka ituyula na okchitot vla ma, anonti mahli hvt mahli cha, chuka yvmmak ash' ai ihiso ma, akama tok; micha okpuloka kv ai ahli tok oke, ahanchi tok.

28. Atuk o yakohmi tok; Chisvs vt ilvppa ahanchit ont in taiyaha ma, nan isht im avvchi tuk a okla hvt anukhlakancha tok.

29. Im ai vllhpesa mak osh nana im avvchi tok; amba na holissochi vhleha hokvno ik chohmo ki tok.

## CHAPTA VIII.

Chisvs vt leposi vbi ya hlakofichi, 1. 5 Mikmvt sintuliyv in tishu ha hlakofichi. 14 Chisvs vt Pita tekchi ishki, micha inla aiena ka hlakofichi. 18 Mahli chito ya yokovvchi. 23 Mich a kaniohmi hosh il iakaya he pim anoli: 28, nan isht ahullo okpulo vhleha ha Chisvs vt kōcha weli ma; nan isht ahullo okpulō vhleha hash osh shukha laua ya iba chukowa.

1. ATUK osh nvni chaha ya vttvt akowa ma, okla chinto kv iakāiya tok.

2. Mihma leposi vbi yosh vlv ant aiokpvchi mvt, Chitokaka ma! vllhpesa ish ahni hokmvt, is sa kashofa hinlvshke, achi tok.

3. Mihma Chisvs vt ibbak a pit weli cha, potoli mvt, Vlhpesa ahni lishke; chi kashofashke, achi tok. Yohmi ma leplosi yash osh ashalika i kashofa tok.

4. Yohmi ma Chisvs vt, Ahah! ish ahni cha, hatak nana kia chik im anolo kashke; amba okla isht im otvna chi ka, Moses nana apesa tok vba isht aiokpvechi a isht ivt, na holi-tompa isht asha ak o ont ish ile haiakachashke, im achi tok.

5. Atuk osh Chisvs vt Kapenavm a ont chukowa ma, sintuliyv vt mintit im vla tok.

6. Micha im asilhvvt, Chitokaka ma! an tishu hvvt palsi isht abeka hosh issikkopa fehna kvvt chuka ya itonlvshke, achi tok.

7. Mihma Chisvs vt, Ia lish ont hlakofichi lashke, im achi tok.

8. Mihma sintuliyv ash osh afalaminchi mvt, Chitokaka ma! vm aboha ya ant ish chukowa he si vlhpesa keyu hoke; amba anumpa illa ho ish anumpuli kia, an tishu hatuk mvt hlakofa hinlvshke.

9. Ŭno yokvt hatak tvshka chipota vhleha pehlichit i shahli nutaka ahanta chatuk sia hoke; yohmi kvvt ilvppak atuk ma, Ia, im achi likma, ia hoke: mikmvt inla ho, Minti, achi likma, minti hoke: mikmvt an tishu ha, Ilvppa yakoh-michi, im achi likma, yvmihchi chatuk oke.

10. Chisvs vt yvmma haklo kvvt nukhlakancha mvt, apihvvt aya kash o, Ahli mak o hvchi miha lishke; Israel okla ak oh kia nayimmi chinto yakohmi ka ak a pesoshke.

11. Yohmi ka, Hvshi akochaka, mikmvt hvshi a opiaka aiena ka a minti kvvt laua hosh vba apehlichika ya ai vlvvt Eblaham, micha Aisaak, mikmvt Chekob aiena ka ant ai itv-pehvt binohla hi oke, hvchim achi lishke.

12. Yohmi ka ilvppa apehlichika im vlla yatuk okvno kocha aiokhlilika ka pit kampila he; yvmmak oka a yahayvt noti ma ahampa hi oke, im achi tok.

13. Mihmvt Chisvs vt sintuliyv ash o, Ish iashke: yoh-mikma isht a chi yimmi hatuk oka, mih mak osh a chi yvmohmashke, im achi tok. Mihma in tishu hatuk vt hvshi kanvlli vlhpisa mih mak inli ho hlakofi tok.

14. Atuk o Chisvs vt Pita in chuka ya ont chukowa mvt, yvmma tekchi a ishki vt yvnhvt abeka hosh itonla na pisa tok.

15. Mihmvt ibbak a pit potoli ma, yvnha kvt shipvchi tok: mihma yvmmak ash osh wakaya mvt, nan isht im vtta tok.

16. Atuk o opivt taha ma nan isht ahullo okpulo ai i foka puta kvt laua ho isht im ai ona tok; yohmi ma shilombish okpulo puta kash im anumpa hak o isht kocha weli mvt; abeka yatuk a mominchit hlakofichi tok.

17. Yvmmvt hopaii Esaias vt anumpulit, ilap ak inli hosh nan isht ik pi ai iksitopo puta ka pim ai ishit, nan isht pi abeka a puta ma isht pi kanchishke, achi tok a ont ai ahla chi mak a tok.

18. Yohmi ma okla chito fehna kvt apehvt ai asha na Chisvs vt pisa mvt, misha in tvnnvp ak o ilhkola hinla ka miha tok.

19. Mihma na holissochi achvfa hosh vla mvt, Nan ithv-nanchi ma! kanima yo chik aya kia, chiakaiya la chi mak oke, im achi tok.

20. Mihma Chisvs ash osh, Chula puta kvt chiluk vt im ashakma, vba hushi puta kvt vlhpichik vt im asha hoke; amba Hatak Ushi okvto noshkobo ha kanima a bohla hi vt ik im iiksho hoke, im achi tok.

21. Mihma nan im ai ithvna vhleha hash osh achvvt, Chitokaka ma! vmmona kano ivt, aki a ont hohpi la hi a, vlhpesa is svm ahnashke, im achi tok.

22. Yohmi kia Chisvs ash osh, Is siakaiyashke; yohmik-ma illi ak osh ilap bika illi yokvno hohpashke, im achi tok.

23. Mihmvt peni chukowa ma, nan im ai ithvna vhleha hvv iakaiya tok.

24. Atuk o mahli kvllo fehna kvt okhvta ha a tobvvt kocha ma, peni ash o oka banvtha kvt isht ompohomo tok; yohmi kia yvmmak ashot nusi hosh itonla tok.

25. Mihma nan im ai ithvna vhleha hvv im ai vlvvt ant okchvli mvt Chitokaka ma! ish pi okchalinchashke; pilli mak oke, achi tok.



26. Mihma yummak ash o, Na-yimmi fehna keyu hvchia ma! na katihmi ho hvchi nukshopa cho? im achi tok. Micha tani mvt, mahli mikmvt okhvta aiena kash im alvm-mi tok; mihma yokopa ai ahlit. talaia tok.

27. Yohmi ma hatak ash osh okla nukhlakancha mvt, Ilvppvt hatak katiohmi hatuk okak o, mahli micha okhvta aiena hokak kia im antia cho? im achi tok:

28. Atuk o misha in tvnnvp Kekesenēs yakni a ona ma, nan isht ahullo okpulo ai i foka kvt tuklo hosh anuksho-munta fehna hatuk o, hatak nana kia yumma imma ka ont ia he keyu chatuk o, hatak illi aiasha ya ashvvt kohchvt minti hosh ont afama tok.

29. Mihmvt tahpvlvt okla mvt, Chisvs, Chihowa Ushi chia hvv nanta ho isht ish pi ahalaia cho? ik ai ono kisha ho, ish pilbvshacha chi hosh ilvppa ish la hoh cho? achit okla tok.

30. Yohmi ma shukha laua kvt impa hosh auct i hopaki ka ai asha tok.

31. Yohmi hatuk o nan isht ahullo okpulo vhleha hash osh im asilhha mvt, Ish pi kocha weli hokmvt, ivt shukha laua ya ont il abeha he ak o ish pim ahnashke, achi tok.

32. Mihma, Hvsh iashke, im achi tok; mihma kocha wiha mvt, shukha laua yash o, ont abeha tok; mihma shukha laua yash osh momvt yihlepa fehvt okhvta sakti chaha yo pit ai oka kahvt ok ai illit taha tok.

33. Mihma apesvchi vhleha hatuk vt yihlepvt, ilhkolit tmaha ona cha, nana ka mominchit anoli tok; micha nan isht ahullo okpulo ai i foka tuk vt nana im a kaniohmi tuk a aieninchit anoli tok.

34. Yohmi ma tmaha hash osh momvt Chisvs a afamvt ilhkoli tok; atuk osh yummak ash o okla pisa mvt, i yakni a a kohchvt aya hinla ka okla im asilhha tok.

## CHAPTER IX.

Chisvs vt palsi isht abeka ya hlakofichi, 1. 9 Chisvs vt Mahlu i howa; micha Falisi vhleha ha Mahlu im ai impa asha mvt ai it im anumpuli. Chisvs vt Chan nan im ai ithvna vhleha na hullochi imma ka isht anumpuli. 18 Chisvs vt na pehlichu ushetik vt illi tuk a okchalinchit tanichi: micha ohoyo hvt issish umbokafa isht abeka tuk a hlakofichi. 27 Michu hatak nishkin lva tuklo ho i fatummi. 32 Chisvs vt hatak ik anumpulo nan-isht ahullo okpulo ai i foka yatuk a im achukmali: mikmvt okla puta kash i nukhaklo.

1. YOHMI ma yvmmak ash osh peni o pit chukowa mvt, pit tanvbli cha, ilap in tmaha ak inli ho ona tok.

2. Mihma hatak vt palsi isht abeka hosh potvlhpo pakna itonla ho okla isht im vla tok; mihma Chisvs vt okla na yimmi ka pisa mvt, palsi isht abeka ash o, Svso ma! chi yukpashke; na chim ai-ashvchika puta kvv chi kashofa hoke, im achi tok.

3. Yohmi ma na holissochi vhleha kaniohmi kvv, Hatak ilvppv nan ik ahobalot anumpulishke, chukvsh anukaka okla ahni tok.

4. Yohmi ma Chisvs vt okla im anukfila ha ithana hatuk osh, Nanta katiohmi ho hvchi chukvsh a nan okpulo ishit hvsh anukfilli cho?

5. Na chim ai ashvchika puta kvv chi kashofa hoke, achi kak okma, keyukmvt, Tani cha nowa, achi kak okma, kati-mampo kak osh ahchiba kvv ik lauwo'cho?

6. Yohmi kia Hatak Ushi yvt yakni paknaka anta kvv nan ai ashvchika puta ka kashofa hi vt im ai vlhpesa hatuk a, hvsh akostinincha chi kak oka, palsi isht abeka ash o, Tanit chi potvlhpo ishi cha, chi chuka ish iashke, im achi tok.

7. Mihma yvmmak ash osh tani cha in chuka ia tok.

8. Yohmi ma okla chinto kvv pisa mvt, nukhlakanhvt, hatak a nan-isht im ai ahli yohmi ka ima tok Chihowa ash o ai okpahanchi tok.

9. Mihma Chisvs vt yvmmak ash vttvt ia mvt, hatak vt Mahlu hohchifo hosh, tvli holisso ai itahoba ya binili ho ont

pisa tok; mihmvt yvmmak ash o, Is siakaiyashke, im achi tok; mihma wakaya mvt iakaiya tok.

10. Atuk o yakohmi tok; Chisvs vt impa hosh aboha anuka asha ma, pvblikan vhleha, mihmvt nan ashvchi vhleha aiena kvt laua hosh ai vlvvt yvmmak ash, micha nan im ai ithvna aiena ka ant takla binohli tok.

11. Mihma Falisi vhleha hvt pisa mvt, yvmma nan im ai ithvna vhleha hash o, Katiohmi ho nan hvch ithvnanchi vt pvblikan, micha nan ashvchi vhleha aiena ka it ibai impa cho? im achi tok.

12. Yohmi kia Chisvs vt yvmma haklo mvt, Haknip im achukma hokano alikchi a ai im ai vlhpiesa keyu chatuk, amba abeka yok mak oh chatuk oke.

13. Ūba isht-ai okpvchi ak okano ak aiahno; amba nan i nukhaklo ak o aiokpanchi li hoke, achi yvmmak osh nana hokma, ont oh ithvna'; hopoyuksa vhleha ak o hoyot aya li ha tok keyu; amba nan ashvchi vhleha hvt ile kostinincha chi mak a tok oke, im achi tok.

14. Yohmi ma Chan nan im ai ithvna vhleha hvt im ai vla mvt, Katiohmi ho pishno, micha Falisi vhleha il aiena kvto nukhaklot nan e hullochi fehna ma, amba nan chim ai ithvna vhleha hvt nukhaklot nan ik hullocho cho? achi tok.

15. Mihma Chisvs vt, Hatak himona ohoyo itauwaya tuk vt takla anta moma ka i kanomi vhleha hvt nukhakla hinla cho? yohmi kia hatak himona ohoyo itauwaya tuk ash ant im ai isha he nitak vt ai ona he; yohmikmak o okla hvt nukhaklot na hullocha hi oke.

16. Hatak nana kia anchi sipokni a nantvna hlilafa himona ya lapalichi chatuk keyu; vlhkvtā lapali kash osh anchi ash hlilvfit ishikma, i shahlit hlilafvt okpulo chatuk oke.

17. Mikma hatak puta kvt oka-paki himona ya shukcha sipokni yo apitta chatuk keyu; yvmmak keyukma shukcha yvt mitahli na oka-paki yvt hlayakma, shukcha yvto okpulo chatuk; amba oka paki himona ya shukcha himona yo apit-takmak o, tuklot nan ik okpulo chatuk oke, im achi tok.

18. Ilvppa puta ka isht im anumpulik fehna, hatak na



pehlichy achvfa hosh vla cha, ant aiokpvchi mvt, Himonasi ak kia svso-tek vt illi mak osh itonlvshke: yohmi kia minti cha, chibbak ant isht ish-umbitepa hokma, okchaya hinla hoke, achi tok.

19. Mihma Chisvs vt wakaya cha, iakaiyvt ia ma, nan im ai ithvna vhleha aiena kvv yohmi ak inli tok.

20. Yvmohmi tuk o ohoyo hvv issish umbokafa isht abeka tok afvmmi auah tuklo hosh, yvmmak ash im ashaka ya mayvt ona cha, im anchi aposhokvchi a pit potoli tok.

21. Im anchi ak illa ho ak potoli kia, sa hlakofa hinlvshke, ahnit im anukfila hatuk osh.

22. Yohmi kia Chisvs vt filemvt yvmmak ash o pisa mvt, Svso-tek ma! na chi yukpa achukmashke; na chi yimmi pulla hosh chi hlakofichi hoke, achi tok. Mihma hvshi kanvlli vlvhvisa yvmma fehna ho ohoyo yvmmak ash osh hlakofi tok.

23. Mihma Chisvs vt hatak na-pehlichy in chuka yash ona cha, oskula olachy vhleha, micha okla yaiya aiena ka ont pisa mvt,

24. Oh iti kanvlli; ohoyo himita yvt illi keyu hoka, amba nusi hoke, im achi tok. Mihma isht yopulvt okla i yukpa tok.

25. Yohmi kia okla hvv kocha wihvt taha ma, pit chukowa cha, ibbak a ont halvlli ma, ohoyo himita yash osh tani tok.

26. Yohmi ma ilvppak atuk vt annovt yakni yvmma moma hlopulli tok.

27. Atuk o Chisvs vt yvmmak ash vttvt ia ma, hatak lvpa tuklo kvv iakaiyvt avvt, tahpahanlvv, Lewi ushi chia ma! ish pi nukhaklashke, ahanchy tok.

28. Mihma yvmmak ash osh aboha ont chukowa ma, hatak lvpa atuk vt im onvt okla tok: mihma Chisvs vt, Ilvppa yakohmichi la hinla ka hvchi yimmi cho? im achi ma, Yau, Chitokaka ma! im achit okla tok.

29. Yohmi ma nishkin a pit potoli mvt, Na hvchi yimmi tuk pulla mak osh isht a hvchim vlvhpeshake, achi tok.

30. Mihma nishkin vt i fatumvt okla tok? yohmi ma

Chisvs vt kvllochi fehna hosh i mihvt, Ahah! hvsh ahni na hatak nana kia ik akostinincho kashke, achi tok.

31. Yohmi tuk kia itiachi mvt, yummak ash o yakni yumma mominchit ai im annowachi tok.

32. Yummvt a kohcha ma, hatak ik anumpolo nan isht ahullo okpulo ai i foka ho okla isht im vla tok.

33. Atuk o nan-isht ahullo okpulo yash osh a kohcha ma, ik anumpolo yash osh anumpuli tok: yohmi ma okla laua yash osh nukhlakancha mvt, Himonna kia Israel okla ha a yakohmi na kvna hosh pisa chatuk keyushke, achi tok.

34. Yohmi kia Falisi vhleha hash osh, Ilvppvt nan-isht ahullo okpulo puta ka nan-isht ahullo okpulo i miko yak o isht kocha weli hoke, achi tok.

35. Yohmi ma Chisvs vt tmaha moma, micha tmahushi puta aiena ka mominchit ayvt, i sinakak puta kak o nan im ai abahanchi, mihmvt vba apehlichika isht anumpa hanta isht anumpohonli, mihmvt abeka moma ka hlakofihinchit, haknip ik in chukmo okla im asha tuk a mominchit hlakofihinchi tok.

36. Yohmi tuk kia okla laua yash osh hoyvbli cha, it a fimimvt aiasha, chukfulhpoba yosh apesvchi ik im iksho ho, chohmi na pisa hatuk osh i nukhaklo tok.

37. Yohmi mvt nan im ai ithvna vhleha hash o, Na-hoya hi okvto laua ho mvhli, amba toksvli vhleha hak osh ik lauwashke.

38. Yohmi hoka na-hoya hi okvt Chitokaka immi hoka nan im ahoya hi a toksvli vhleha ha auet tihlela chi ka, hvsh im asilhashke, im achi tok.

## CHAPTA X.

Chisvs vt nan im ai ithvna auah tuklo kvv vbanumpa ha isht anumponla chi ka, micha na fehna puta ka ai yvmohma chi aiena ka kanompit tihleli, 1. 5 Micha nana ka ithvnanchi. 40 Micha Chisvs a holitobli kvv nan isht il ai yukpa he miha.

1. YUMOHMI tuk osh nan im ai ithvna auah tuklo kash o itahqbit tahli mvt, nana im ai ahlit, nan-isht ahullo

okpulo puta imaiyvt, yummak atuk ma kocha welit abeka ilaiyuka puta, micha haknip ik in chukmo ilaiyuka moma hlakoficha hi a im apesa tok.

2. Yohmi ka vbanumpeshi auah tuklo hohchifo kvt yakohmi kak oke: vmmona Saimon atuk osh Pita hohchifo tok; mihma itibapishi Antilu ak a tok; Sebeta ushi, Chemis ak osh, nakfish Chan itatuklo tok:

3. Mihma Filip, micha Bahlolomu; Tamas, mikmvt pvblikan hatak Mahlu; Alfevs ushi Chemis, micha Lebevs osh hohchifo apunta kvt Tatevs a tok.

4. Mihma Kenan hatak Saimon, micha Chutas Iskaliot ak atuk osh yumma haksichi tok ak inli ka aiena tok.

5. Auah tuklo ilvppak o Chisvs vt pit tihleli mvt, nan im apesvt, Chentail aiasha pilla hokvno hvch ik aiyo kashke, mikmvt Samalia okla in tmaha ha ont hvch ik chukowo kashke.

6. Amba Israel in chuka-chvfa chukfvlhpoba tumoa pulla kak o hvsh im ai onashke.

7. Micha ia hosh hvsh itvnowa kvt, vba isht anumpohonlit, Uba apehlichika yvt olanlosi vlvshke, hvsh ahan-chashke.

8. Mikmvt abeka ya hlakofichit, leplosi vbi puta ka kashofit, illi puta ka tanichit, nan-isht ahullo okpulo puta ma hvsh kocha welashke: pilla ho hvsh habena hatuk okvt, pilla ho hvsh imashke.

9. Hvchi shukcha atuk ma tvli holisso lakna, micha tvli hvta, mikmvt tvli lakna nana kia fohkit hvch ik ieshokmvt;

10. Anonti nowvt hvsh aya hokvt bahta kia, ilefoka lumbo tuklochit, shulush aiena ma tuklochit, tvbi nana kia hvch ik iesho kashke; hatak toksvli yvt ilhpita he ak o vlhpesa hoka.

11. Micha tmaha, keyukmvt tmaha chito yokma nana ho ont hvsh chukowa chi kvt, kvna hosh vlhpesa kvt yumma anta ka, hvsh ponaklashke; micha yummak o hvsh asha tuk osh a kohchvt hvsh iashke.

12. Micha chuka yo ont hvsh chukowakmvt, hvsh ai okpvchashke.



13. Yohmikma chuka yatuk mvt vlhpesa hokma, na yukpa he hvsh im ahni tuk a onvtulashke: amba vlhpesa keyu hokmvno, na yukpa he hvsh im ahni tuk a hvchi falamashke.

14. Micha kvna kia ik hvchi aiokpacho, micha hvchim anumpa ma haponakla he keyukma, chuka yokmá, tmaha hokmá, nana hatuk a hvsh a kohchakmvt, hituk tohbi hvch iyi asha hatuk ma hvsh tahtulashke.

15. Ahli mak o hvchi miha lishke, Nan-vlhpisa chinto nitak okvno Sotom, micha Komola aiena kvv im ahleka hoh kia, pit im vlhpisa kvv tmaha yvmmak a tok a i shahla hi oke.

16. Inta! chukvvlhpoba yo chohmichi hosh nashoba itintakla pit tihleli lishke; yohmi hoka kostini kvv sinti ak o hvsh chiyuhmi cha, nuktaiyala mvt pvchi-yoshuba ak o hvsh itilauashke.

17. Yohmi kia hatak puta ka ahah! hvsh im ahnashke: yvmmak okvv ishit nan apesa vhleha ibbak a hvchi fohokikma, i sinakak puta ka a hvchi fahama he mak oke.

18. Micha na pehlichu vhleha, mikmvt miko puta, Chen-tail okla aiena ka, na hvsh im ai atokola chi ka, vno pulla hatuk mak o yvma puta ka itikba hvch isht ohona hi oke.

19. Yohmi kia hvch isht ohona ka, kanimihchit, micha nana ho hvsh anumpula he aiena kvv hvch ik anukfillo kashke: nana ho hvsh anumpula hi a hvshi kanvlli vlhpisa yvmmak inli ho hvchi anukfohka hi oka.

20. Hvchishno ak osh hvsh anumpula hi o keyu, amba hvch Iki imi Shilombish yvmmak osh a hvchi anumpula hi oka.

21. Mikma itibapishi hatuk vt itibapishi ha illi issakma, anonti iki atuk vt vlla ya illi issa he: yohmikma vlla puta kvv iki ishki aiena hatuk ma i nukkilli cha, illi issa hi oke.

22. Mikma sa hohchifo pulla hatuk mak o momvt hvchi nukkilli he: yohmi kia kvna hosh achunanchit mahayvt ai vhli ka ona hok mak osh okchaya hi oke.

23. Yohmi kia tmaha chito ilvppa a hvch issikko-

palikma, yihlepvt inla yo hvsh onashke. Ahli mak o hvchi miha lishke, Israel okla in tvmaha puta ka hvch ik hlopullo kisha ho, Hatak Ushi yvt vla li oke.

24. Nan-ithvna yvt nan-ithvnanchi ya imaiya keyukma, anonti tishu hvt i shahli ha imaiya ho keyu chatuk.

25. Nan-ithvna yvt nan-ithvnanchi ya itilaikma, anonti tishu hvt i shahli hatuk ma itilaikmak osh im vlhpesa hoke. Chuka-chvfa pehlichika ya Beelsevub okla hochifo tuk vt in chuka-chvfa ya i shahlichu kvt katiohmichi hosh hochifa hinla cho?

26. Yohmi hoka yvmmak oka hvch ik i nukshopo kashke. Nana kvt ompoholmo tuk osh ik otano ka hi vt iksho ma, anonti nana kvt luma tuk osh ik annowo ka hi vt iksho hoka.

27. Nana ka okhlilika yo a hvchim anoli li ka a tohwi-kelika yo hvsh ai anolashke: micha nana ka haksobish tikelichi hosh hvsh haklo kvt, yvmmak ash aboha pakna yo hvsh ai anolashke.

28. Mikmvt haknip a vbi kia, shilombish a illichu he keyu yvmmak okvno hvch ik i nukshopo kashke: amba shilombish micha haknip it aieninchit aiokpuloka ai ilbv-shala hinla kak pulla ho hvsh i nukshopashke.

29. Hushi chipunta yvt tuklokmvt sint achvfa iklvna itatuklo vlhtoba chatuk keyu? mikma yvmmt, hvch Iki vt ahni keyukma, achvfona kia aka itula hi o keyu hoke.

30. Amba pashi hvchi noshkobo o hikia kak kia momvt holhtinvt taha yoke.

31. Yohmi hoka ik hvchi nukshopo kashke; holitopa kvt hushi chipunta laua kia hvsh i shahli hoke.

32. Yohmi hoka kvna hosh hatak puta itikba ya si ai ahninchu tuk ma, vno ak kia ilapa Aki vba binili ka itikba ya ai ahninchu la hi oke.

33. Amba kvna hosh hatak puta itikba ya ik si ai ahnincho tuk ma, vno ak kia ilapa Aki vba binili ka itikba ya ak ai ahnincho ka hi oke.

34. Yakni pakna ya nanaiya yo bohliit aya li tok ik

huchim ahobo kashke: nanaiya y<sub>o</sub> a bohli<sub>t</sub> aya li tok keyu, amba bvshpo falaia ak a tok.

35. Hatak a iki ik it im vlhpesachot, ushetik a ishki ik it im a vlhpesachot, ipok atuk ma ipokni a ik it im vlhpesachot aya li ha tok.

36. Mikma hatak in twnv putā kv<sub>t</sub> ilap in chukachvfa ash inla hi oke.

37. Kvna hosh iki yokmá, keyukmvt ishki yokmá, nana h<sub>o</sub> i hullo kv<sub>t</sub> vno a im i shahli hokvt, vmmi ha he vlhpesa keyu hoke: mikmvt ushi yokmá, keyukmvt ushetik okmá, nana h<sub>o</sub> holitobli kv<sub>t</sub> vno a im i shahli hokvt, vmmi ha he vlhpesa keyu mak inli hoke.

38. Yohmikma kvna hosh im iti-taiyukhvna ya sholi cha, siakaiya keyu hokvt, vmmi ha he vlhpesa keyu mak oke.

39. Kvna hosh im ilhfiopek a ahayuchi tuk mvt i kvnia he: mikma kvna hosh vno pulla hatuk mak o im ilhfiopek vt i kvnia hokmvt, ahayucha he mak oke.

40. Kvna hosh hvchi aiokpvchi hokvt, vno a si aiokpvchikma; anonti kvna hosh vno a si aiokpvchi kv<sub>t</sub>, auet sa kanchi tok ma aiokpvchi hoke.

41. Kvna hosh hopaii ya hopaii atuk mak o aiokpvchi hokvt, hopaii im ai vlhtoba mak o isha he: yohmikma kvna hosh hatak ahli achukma ka, ahli achukma atuk mak o, aiokpvchi hokvt, hatak ahli achukma im ai vlhtoba mak o isha hi oke.

42. Mihma kvna hosh chipota vhleha ilvppa achvfona kia, nan ithvna yatuk mak o ishka chi ka oka kapvssa isht-ishko achvfa illa h<sub>o</sub> ipeta kia, yvmmvt kaniohmit nan-vlhtoba hv<sub>t</sub> i hlakofa he keyu, ahli mak o hvchim achi lishke, achi tok.

CHAPTA XI.

Chisvs vt vba isht anumpohonli kv<sub>t</sub> a moma; Chan a pit ponaklo tuk a Chisvs vt afalaminchit im anoli, 1, 7 micha, Chan Baptist a aiahli<sub>t</sub> isht anumpuli. 20 Chisvs vt tmaha kanimi ka na palvmi kv<sub>t</sub> onvtula chi ka anoli, yvmmak oka na felna lauā ka ai yv-



mihinchi tuk kia, okla ik ile kostinincho hoka. 25 Chisvs vt Chiho-wa pit aiokpvchi mvt, Iki vt nan okluha ka ibbak ifoyuki tuk a achi: 28 mikmvt a foha chi kvt hoyvbli puta kvt im ai ona chi ka i miha.

1. ATUK o yakohmi tok; Chisvs vt nan im ai ithvna auah tuklo kash nan im apesvt in taiyaha mvt, in tvmaha puta ka nan ai ithvnanchi, micha vba isht anumpuli aiena chi hosh yvmma vttvt ia tok.

2. Atuk o Klaist vt nan-isht-anta puta ka Chan vt aboha kvlo anukaka ya a haklo mvt, nan im ai ithvna vhleha tuklo ho pit tihleli tok.

3. Mihmvt yvmmak ash o, Chishno ak osh aya he tok mak o chia hokma, ak chu? inla yo e hoyokma, nanta chi cho? pit im achi tok.

4. Mihma Chisvs vt a falaminchi mvt, Anonti hvsh ia cha nana ka hvsh haklo, micha hvsh pisa aiena tuk vt Chan a ont hvsh im anolashke.

5. Lupa yvt hopokoyo ma, imomokpulo yvt nowa; leplosi vbi okla hv i kashofa; mikma ik haponaklo yvt haponaklo; illi tuk vt tani; mihma ilbvsha puta ka vbanumpa hv isht im anuhumpvshke.

6. Yohmi ka kvna hosh vno a ik si ai ibetvblokmt, na yukpa he mak oke.

7. Mihma itiachi ma, Chisvs vt okla laua ya im anumpulit ishtia mvt, Chan ak o miha hosh, Nanta ho hvsh pisa chi hosh yakni haiaka ya hvsh ilhkoli tok o? Kushak vt mahli na faiokvchi kak atuk o?

8. Amba nanta ho pisvt hvsh ilhkoli tok o? Hatak nafohka lapushki fohka kak atuk o? nafohka lapushki abelkvchi hokvto miko in chuka puta kak o aiasha hoke.

6. Amba nanta ho pisvt hvsh ilhkoli tok o? Hopaii atuk o? ahli, yohmi ka hopaii ak kia imaiya hoke, hvchim achi lishke.

10. Um anumpeshi ya chi tikba chvffichi li hoka, mihi yosh chi hina ya tikbanli apoksiacha chi hoke, achit isht holisso tok a ilvppak osh mih mak oke.

11. Ahli mak o hvchim achi lishke, Ohoyo ho a tobt

aiasha ka itintakla hikia kvt Chan Baptist a imaiya chatuk keyushke : yohmi nana kia moma ik lauwo hosh vba apehlichika ya anta kvt, yvmma imaiya hoke.

12. Yohmi ma Chan Baptist vt ahanta nitak atuk a ai vhlit mihinti ka, vba apehlichika ya ishi bvna kvt achilita fehna, yohmikma achilita puta kvt onvtulvt ihishi na himakvshke.

13. Hopaii vhleha moma micha vba nan vlhpisa aiena kvt na tikbanli anoli kvt, Chan ak o ant im ai vhli hoka.

14. Michi hvchi yimma hinla hokma, ilvppak osh vla he tok Elias mak oke.

15. Kvna hosh isht, haponakla he haksobish vt i hinlik-mvt, haklashke.

16. Amba himak okla aiasha ilvppak okvno nantak o itapesa la chi cho? Ulla yosh ilhpak a kanchi yo binohmaya hosh ilap bika iti howvt,

17. Oskula ha e hvchim olachi ka, hvch ik hehloshke; e hvchi yaiya ka, hvch ik yaiyoshke, achi ho itilauishke.

18. Chan vt ik impo, micha nan ik ishko aiena hosh aya ma, Yvmma nan-isht ahullo okpulo il ai eshi hoke, okla achishke.

19. Hatak Ushi yvt ihmipa, mikmvt nan ihishko aienvt aya ma, Yakeh ! hatak isikopa, oka-paki ishko shahli, pvl-likan micha nan ashvchi vhleha aiena ka i kana yoke, achishke : yohmi kia Ahopoyuksa yokvto im vlla vhleha ha isht im a holitopa hoke, im achi tok.

20. Yohmi mvt tvnaha na-fehna ka a yvmihinchi fehna tuk puta kash, okla ilekostininchi keyu hatuk o, nan isht a mihachit ishtia tok.

21. Kolasin ma ! na chi palvmmi mak oke : Betsaita ma ! na chi palvmmi mak oke ; na-fehna puta kvt hvchishno ya hvchim a yvmohmi tuk vt Taia, micha Saiton aiena ka a yvmohmi ha tok okma, hopaki kash inli ho na pashi tvnna anchit hituk chubbi banot mayvt ilekostinincha he a tok oke.

22. Yohmi kia nan vlhpisa chinto nitak okvno Taia micha Saiton aiena kvt im ahleka hoh kia pit im vlhpisa kvt hvchishno yokvno i shahla hi oke, hvchim achi lishke.

23. Yohmikma Kapenavm chia shutik ak o ont ish talaia

tuk vt, aki vt ai okpuloka mak o ish ona hi oke: na-fehna puta kv̄t chishno ya chim a yvmohmi tuk vt Sotom a a yvmohmi ha tok okma, himak nitak ak kia talaia hi a tok oka.

24. Yohmi kia nan v̄lhpisa nitak okvno Sotom yakni vt im ahleka hoh kia, pit im v̄lhpisa kv̄t, chishno yokvno i shahla hi oke, hv̄chim achi lishke, achi tok.

25. Nitak yv̄mma fehna ma Chisvs vt anumpuli mvt, Aki, shutik micha yakni aiena in Chitokaka ma! na yakohmi puta ka na kostini, micha nan ithana aiena kvno ish in luhmi tuk osh, v̄losi puta h̄o ish im otv̄nichi hoka, yak oke, chim aiahni lishke.

26. V̄lhpesashke, Aki ma! yv̄mmak osh chim v̄lhpiesa hatuk oka, achi tok.

27. Aki vt nan okluha ka sv̄bbak fohkishke: yohmi ka Ushi ya hatak nana kia ik ithano h̄o, amba Iki ak banoshke; mikma Iki a hatak nana kia ik ithano h̄o, Ushi ak illa, micha Ushi ak osh kv̄na h̄o im otv̄nichi hok mak bano hoke.

28. Toksv̄lit ahantvt hoyv̄bli, micha shapoh i weki puta hv̄chia mvt, momvt hvs sv̄m ai v̄la na hv̄chi fohv̄chi lashke.

29. V̄m ikonla abana yak o isht hv̄sh il abanali cha, vno ak o hvs sv̄m ai ithv̄nashke: vno ak osh chukv̄sh yohbi, micha chukv̄sh akanlosi aiena sia hoka: yohmik mak osh hv̄chi shilombish puta a foha hi a hv̄sh ahayucha he mak oke.

30. V̄m ikonla abana ya il abanali ka im v̄lhpiesa, micha a shapoh hv̄t shohv̄la hoke, im achi tok.

## CHAPTA XII.

Nan im ai ithv̄na v̄hleha hash osh nitak hullo yo onush a hleh̄lit v̄pa tuk a, v̄lhpesa, Chisvs vt im ahni, 1. 9 Chisvs vt ibbak bv̄shi yatuk a achukmali tuk o, Falisi v̄hleha hv̄t v̄bi bv̄nna. 22 Shilombish okpulo ai i foka tuk a Chisvs vt hlakofichi; 31 mihmvt Shilombish Holitopa ya ik ahobalot anumpuli kv̄t i kashofa he keyu miha. 38 Falasi v̄hleha hv̄t Klaist a nan-isht-atokowa im a hoyo. 46 Kv̄na hosh Klaist a i kanomi hoka isht annoa.



1. NITAK yumma foka ma Chisus vt nitak hullo nitak o osapa hlopullit aya ma, nan im ai ithvna vhleha hvt hohchvfo hatuk osh, onush a hlehli cha, vpv't ishtia tok.

2. Yohmi kia Falisi vhleha hvt pisa mvt, Yakeh! nana ka nitak hullo nitak a a yohma he vlhpesa keyu ka, na chim ai ithvna vhleha hvt yohmishke, im achi tok.

3. Yohmi kia yummak ash osh, Lewi micha apehvt aya tok aiena kvt hohchvfo mvt, kaniohmi tok,

4. Chihowa im aboha hatuk a ont chukowa cha, pvska otvni yummak oka ilap vt, micha apehvt aya tok aiena kvt vpa he ai im vlhpesa keyu, amba naholitompa isht asha ak illa hatuk a vpa tok a, holisso ha hvch ik ai it im anumpulo chatuk oh cho?

5. Yummak keyukmvt na-holitompa isht asha vhleha hvt nitak hullo nitak puta ma tempel anukaka ya nitak hullo a kobahafi kvt ashvchi ha tok keyu ka vba nan vlhpisa holisso ha hvch ik ai it im anumpulo chatuk oh cho?

6. Yohmi kia, Achvfa hosh tempel a imaiya kvt ilvppa anta hoke, hvchim achi lishke.

7. Yohmi kia, Uba isht-aiokpvchi ya ak ahnincho, amba nan i nukhaklo ak o ai okpanchi li hoke, achi ilvppak osh nana ho miha hatuk a hvsh akostininchi hatuk okmvt, ashvchi keyu ka anumpa hvsh onocha he tuk keyu chishke.

8. Hatak Ushi yvt nitak hullo ak kia in Chitokaka ak inli hoka, im achi tok.

9. Mich a yummak ash vttvt ia mvt, yumma i sinakak ak o ont chukowa tok.

10. Yohmi ma hatak vt ibbak shulla yosh asha tok. Yohmi ma ilvppak ash o nan vlhpisa onocha chi hosh okla im ponaklot, Nitak hullo nitak a na hlakoficha he vlhpesa cho? achi tok.

11. Yohmi ma yummak ash osh, Hatak hvchi katima kak osh chukfulhpoba yvt achvfa hosh im anta tuk vt, nitak hullo nitak o yakni kula pit itula ka, pit halvllit ik kohcho ka hinla cho?

12. Yohmi ka hatak vt holitopa kvt chukfulhpoba ya katiohmi ho isht i shahli ho? Yohmi hoka nitak hullo

nitak a nana achukma ka yohma he vllhpesa hoke, im achi tok.

13. Yohmi mvt hatak ash o, Chibbak a chisemochi, im achi tok. Mihma chisemochi tok: yohmi ma falamvt achukmvt taha mvt, in tnnvp akinli ho chohmi tok.

14. Yohmi ma Falisi vhleha hvt kocha wiha mvt, kani-mihchit vba he vt isht it im anumpulit maya tok.

15. Yohmi kia Chisvs vt ilvppa akostininchi mvt, yvm-mak ash a kohchvt knia tok: mihma okla chito hvt iakai-ya ma, yvmmak ash o mominchit hlakofichi tok.

16. Yohmi mvt ilap a okla ik otvnincho ka hi a kvlllochit i miha tok.

17, 18. Yohmi ma, hopaii Esaias vt anumpohonli mvt, An tishu hano ai atokoli li tuk o holitopa, sa shilombish vt isht ai yukpa fehna ka ho pesa: ilvppak o vmi Shilombish o onochi likma, yvmmak osh Chentail okla ha vba nan vllhpisa ya im otvnicha hi oke.

19. Yvmmak okvt ik it im paknokmvt, anonti ik tahpvlo ka he; mikma tmaha ai itahoba 'puta ka im anumpa ha hatak nana kia a haiyakla he a keyu ka he.

20. Kushak kushkoa kia ik tilohlecho ka he, mikmvt pva i honnula lua shobulli ka ik mosholicho hosh, vba nan vllhpisa ya fihimit isht imaiyacha he.

21. Yohmikma Chentail vhleha hvt yvmma hohchifo ho anukchieta he, achi tok a ont ai aiahli tok mak oke.

22. Yvmma foka ma achvfa hosh nan-isht ahullo okpulo ai i foka hosh lva, micha ik anumpolo aiena ho isht im vla tok: yohmi ma yvmmak ash o hlakofichi na lva micha ik anumpolo aiena tuk vt anumpuli, micha pisa aiena tok.

23. Mihma okla hvt momvt nukhlakanha mvt, Ilvppvt Lewi ushi ash keyu ho? achi tok.

24. Yohmi kia Falisi vhleha hvt haklo mvt, Hatak ilvppvt nan-isht-ahullo okpulo a kocha weli ho keyu, amba nanisht-ahullo okpulo i miko Beelsebvba o isht kohchi hoke, achi tok.

25. Mihma okla im anukfila ha Chisvs vt akostininchi hatuk osh, Apehlichika puta kvv it a kashapvt ilap bika it i sanali hokvt, ont ai okpulo kvv taha chatuk: anonti tmaha



chito, keyukmvt chuka puta kvt it a kashapvt ilap bika it i sanali hokvt, talaia he keyu hoke.

26. Yohmi hoka Setan osh Setan a kohchi hokmvt, ilap o inli il i sanali hoke; yohmi ka katiohmi hosh im apehlichika yvt talaia hinla cho?

27. Micha vno vt Beelsebvb ak o nan-isht-ahullo okpulo a ishit kocha weli li hokma, kvt hak o hvchim vlla vt yvmma ishit kocha weli chatuk oh cho? yohmi hoka yvmmak osh na hvchim apesa yashke.

28. Amba vno yvt nan-isht-ahullo okpulo a Chihowa imi Shilombish o ishit kocha weli li hokma, yohmi hokmvo Chihowa apehlichika yvt hvchim vla mak oke.

29. Keyukmvt katiohmi hosh achvfa kvt hatak hlampko in chuka ya ont chukowa cha, im ilayak a wehpula hinla? hatak hlampko ak o tikba takehi ha yo keyukmvt; amba yvmmak okmvt in chuka ya wehpula hinla hoke.

30. Kvna hosh vno a svbafohka keyu kvt, a sanali hoke; mikma kvna hosh svba hoyo keyukmvt, na fimmi yoke.

31. Yohmi hoka, Hatak vt nan im ai ashvchika il aiyuka moma, micha Chihowa ik ahobalot anumpuli moma kvt i kashofa he; amba Shilombish Holitopa yo ik ahobalot anumpuli tuk okvto hatak vt ik i kashofa ka hi oke.

32. Micha kvna hosh Hatak Ushi ak o na mihachit anumpuli tuk okvto i kashofa he: amba Shilombish Holitopa ak o na mihachit anumpuli tuk okvto yakni ilvppak inli, micha yakni inla mihinti aiena ka ai i kashofa he keyu hoke.

33. Iti vt achukma ho hvsh ikbi hokma, vni ak kia achukma he: keyukmvt iti vt okpulo yo hvsh ikbi hokma, vni ak kia okpula he: iti vt ilap vni ak inli ho isht otvni chatuk oka.

34. Sinti chilita isht-ai-unchululi hvchia ma! ai vlhpiesa keyu hvchia kvt, katiohmi hosh nana achukma puta ka hvsh anumpula hinla cho? chukvsh a alotowak mak o, itih hvtkohchit miha chatuk oka.

35. Chukvsh anukaka ya na holitopa kvt asha kak o, hatak achukma kvt nana achukma puta ka a yvmohmi chatuk: mikma chukvsh anukaka ya nana ik achukmo kvt asha



kak o, hatak ik vlhpeso kvt nana ik achukmo puta ka a yvmohmi chatuk oke.

36. Yohmi kia anumpa ik vlhpeso puta hatak vt anum-puli tuk okmvt, nan vlhpisa nitak okvno yvmmak atuk a nan isht il anola hi oke, hvchim achi lishke.

37. Chishno chim anumpa atuk ak o isht chi ai vlhpiesa he: mikmvt chishno chim anumpa atuk ak o nan isht chim vlhpisa hi oke,

38. Yvmma foka ma na holissochi vhleha kaniohmi, mi-cha Falisi vhleha aiena kvt anumpuli mvt, Nan ithvnanchi ma! nan-isht-atokowa e chi pisa hinlvshke, achi tok.

39. Yohmi kia afalaminchi mvt, Nan ik vlhpieso, mi-cha haui aiena okla hash osh nan-isht atokowa ya okla hoyo: yohmi kia nan-isht-atokowa nana hosh in takala he keyu, amba hopaii Chonas nan-isht-im atokowa ak illa hi oke.

40. Chonas vt nitak tuchina micha ninak tuchina aiena ho nuni chito ikfoka anukaka ya foka tok a; yvmmak inli ho chohmit Hatak Ushi vt nitak tuchina micha ninak tuchi-na aiena ho yakni chukvsh anukaka yatuk ma foyuka hi oke.

41. Nana vlhpisa chinto nitak okvno Ninefeh hatak vt okla ilvppa ai apihvt hieli cha, anumpa onocha hi oke; yvmmak okvt Chonas vt vbanumpa isht anumpohonli ma, okla ilekostininchi tok okvt; atuk o Chonas a imaiya mak osh ilvppa ahantvshke.

42. Nana vlhpisa chinto nitak okvno oka mahli ohoyo miko vt okla ilvppa awant hikia cha, anumpa onocha hi oke: yvmmak okvt yakni ont ai vhli pilla minti kvt Solomon isht im a hopoyuksaka ya haklot aya tok okvt: yohmi tok o himak a Solomon a imaiya mak osh ilvppa-ahantvshke.

43. Shilombish okpulo yvt hatak a akohchakmvt, afoha he hoyo kvt oka ik ai iksho puta ka hlopullit aya kia, ik ahayucho chatuk;

44. Yohmikmvt, An chuka ai vtta kohchvt a minti li kash osh falamvt ia lashke; achi tuk osh onakmvt, yvmmak

ash k<sub>v</sub>na iksho h<sub>o</sub>, pashpovt, shemvt taiyaha cha hikia h<sub>o</sub>, ont pisa hoke.

45. Yohmikmvt shilombish okpulo untuklo inla yvt ilap a i shahli h<sub>o</sub> ivt ont pehlichit v<sub>l</sub>a ma, yvmmak ash okla pit abeha cha ai asha chatuk; yohmikma hatak yvmmt ont ishtaiyopi kak o okpulo kv<sub>t</sub> vmmona tuk a i shahli chatuk oke. Yohmi ka yvmmak inli h<sub>o</sub> okla nan ik vlhpeso ilvpvt chiyuhma ch<sub>i</sub> hoke.

46. Okla h<sub>a</sub> im anumpuli kv<sub>t</sub> moma h<sub>o</sub>, ishki micha itibapishi vlheha aiena kv<sub>t</sub> it im anumpuli bnna hosh kocha ya hinli tok.

47. Yohmi ma achvvt, Yakeh! chishki micha ish itibapishi vlheha aiena kv<sub>t</sub> chit im anumpuli bnna hosh kocha ya hiohmayvshke, im achi tok.

48. Yohmi kia afalaminchi mvt, nan im anoli yash o, Hvshki ak osh kv<sub>t</sub>a h<sub>o</sub>? mikma itibapishi li vlheha ak osh kv<sub>t</sub>a hoh cho? im achi tok.

49. Mihmvt nan im aiithvna vlheha aiasha ka imma yo ibak a pit weli mvt, Hvshki, micha itibapishi li vlheha h<sub>a</sub> pisá;

50. K<sub>v</sub>na hosh Aki vba binili nan aiahni ka yvmohmikmvt, yvmmak osh itibapishi li, micha an tek, mikmvt hvshki aiena mak oke, achi tok.

CHAPTA XIII.

Na hokchi nan isht vlhpisa; mikma nana a kaniohmi kak o Chisvs vt nan isht vlhpisa h<sub>o</sub> isht ithvnanchi, 1. 18 Na hokchi nan isht vlhpisa h<sub>o</sub> otvnichi; 24 onush micha haiyukpulo ita tuklo ka isht vlhpisa, 31 mvstvt nihi; 33 micha nan isht shatvmmichi ita tuklo ka nan isht vlhpisa: micha na kaniohmi h<sub>o</sub> Chisvs vt nan isht vlhpisa bano h<sub>o</sub> isht anumpohonli. 36 Onush micha haiyukpulo ita tuklo nan-isht vlhpisa h<sub>o</sub> otvnichi; 44 na holitopa luma kv<sub>t</sub> itu-yula, 45 micha nan chumpa, 47 mikmvt n<sub>v</sub>ni isht hokli aiena ka nan isht vlhpisa; 53 Chisvs vt falamvt i yakni ak inli h<sub>o</sub> ona tuk o, okla hv<sub>t</sub> kanimanchi.

1. MIHMVT Chisvs vt nitak yvmmak inli ka aboha ya a kohchvt ia mvt, okhvta lapalika yo ont binili tok.



2. Yohmi ma okla laua fehna kv̄t ant im ai itahoba, yohmi ma peni yō pit chukowa cha binili tok; mihma okla laua yash osh momv̄t oka v̄hli h̄a hiohm̄aya tok.

3. Mihma nana laua ka nan isht apesa hosh isht im anumpohonli m̄vt, Inta! na hokch̄i v̄t na hokchit ia tok.

4. Atuk osh hokchi ma, na nihi kanimi kv̄t hina lapalika yō kaha tok; atuk o hushi puta kv̄t ant v̄p̄v̄t tahli tok.

5. Kanimi kv̄t tv̄li foka yakni āsha fehna keyu hō kaha tok; atuk osh yakni v̄t i suko keyu hatuk okv̄t, chekosi fehna offo tok;

6. Atuk o hv̄shi v̄t kohcha ma, anakshua tok; yohmi kv̄t hakshish v̄t ik im iksho hatuk okv̄t, bv̄shit taha tok.

7. Yohmi ma kanimi kv̄t kv̄ti foka yō kaha tok; atuk o kv̄ti v̄t offo m̄vt, olv̄bb̄it ishi tok.

8. Amba inla ka yv̄t o yakni achukma hō kaha: yohmi tuk m̄vt achv̄fa tuk kia kanimi kv̄t tahlepa achv̄fa; kanimi kv̄t pokoli hanali; kanimi kv̄t pokoli tuchina aiena hō vn̄it waya tok oke.

9. Kv̄na hosh isht haponakla he haksobish v̄t i hinlikm̄vt, haklashke, achi tok.

10. Mihma nan im ai ithv̄na v̄hleha hv̄t im ai ona m̄vt, Nanta katiohmi hō nan isht v̄lh̄pisa hō isht ish im anum̄puli cho? im achi tok.

11. Mihma afalaminchi m̄vt, Hv̄chishno yokv̄to nan ik otano v̄ba apehlichika ahalaya puta ka hv̄sh ithana hi okv̄t hv̄chim v̄lh̄pisa ha tok; amba yummak okv̄to im v̄lh̄pisa keyu hoka.

12. Kv̄na hosh ishikma, mihi yō ima he; mikma in laua kv̄t i shahla hi oke: amba kv̄na hosh ishi keyuk mv̄no, ishi tuk ash kia im ai isha hi oka.

13. Okla pih̄isa hokak osh, pisa keyu; mikm̄vt hah̄aklo hokak osh, haklo keyu; micha akostininchi keyu aiena hatuk; yohmi kak o nan isht v̄lh̄pisa hō isht im anum̄puli li hoke.

14. Mihma Esaias v̄t nana tikbanli anoli kv̄t, Hah̄aklo hokv̄no hv̄sh haklo kia, hv̄ch ik akostinincho ka he; mikm̄vt pih̄isa hokv̄no hv̄sh pisa kia, hv̄ch ik ithano ka he.



15. Okla ilvppa chukvsh atuk mvt nvt taiyaha, mihma haksobish a isht haponahaklo kv in takobi mvt, nishkin atuk ma okla okhishtvshke; yvmmak keyukmvt nitak kani-ohmi kia nishkin atuk ma isht pisvt, haksobish a isht haklo cha, chukvsh ma isht akostininchi ilekostininchi na hlakofichi la hinla kak o, yohmi achi tok a okla ilvppak o ont isht aiahli hoke.

16. Amba hvchi nishkin okvto pisa; mikma hvchi haksobish atuk mvt haklo aiena hokvt na yukpvshke.

17. Ahli mak o hvchi miha lishke, Hopaii yvt lawa, micha hatak hochukma aiena kv nana hvsh pisa ka pisa bvna tok kia, okla ik peso tok; micha nana hvsh haklo ka haklo bvna tok kia, ik haklo tok oke, achi tok.

18. Yohmi hoka na hokchi isht vlhpisa hatuk ma hvsh haklashke.

19. Kvna kia apehlichika isht anumpa ha haklo cha, ik akostinincho, yohmik ma nan okpulo yosh vlt, chukvsh anykaka nana im a holokchi tuk ash yichiffit ishit kanchi chatuk. Ilvppak osh hina lapalika yo na nihi ai ishi tok mak oke.

20. Amba tvli foka yo na nihi ai ishi tok okvto vba anumpa ha haklo mvt, na yukvt ashalika ishi kak oke.

21. Yohmi kia hakshish vt im a toba keyu hatuk osh, imoma na hopaki keyu chatuk; vba anumpa pulla hatuk mak o isht issikkopali, micha isht hofahyali aienakma, chekosi mak inli ho ibetvbli chatuk.

22. Mikma kvti foka yo na nihi ai ishi kak kia vbanumpa ha haklo kak oke; yohmi tuk o yakni ilvppak inli nana ai anushkunna, micha nan in laua bvna kv isht ashvchi aiena kv vbanumpa hatuk ma ai olvbbit ishi na ik vno toba kak oke.

23. Amba yakni achukma yo na nihi ai ishi vto vbanumpa ha haklo mvt, akostininchi kak oke: micha yvmmak ash osh vnkmvt, achvfa tuk kia kanimi kv tahlepa achvfa, kanimi kv pokoli hannali, kanimi kv pokoli tuchina, yohmi hosh isht waya hoke, achi tok.

24. Mihmvt nan-isht vlhpisa inla yo in takalichit yak

ahanchi mvt, Ūba apehlichī ka yvt hatak osh im osapa ya na nihi achukma hō hokchi tok a holba hoke.

25. Yohmi tuk kia hatak puta kv̄t nusi hosh maya takla ma, in tv̄np vt v̄la cha, onush ash haiyukpulo yō ant a hokchichi cha, kv̄nia tok.

26. Yohmi tuk o offot vpi toba cha, waya ma, haiyukpulo ak kia otvni tok.

27. Yohmi ma'chuka-chvfa pehlichī in tishu v̄hleha hash osh ona cha, Pī shahli ma! na nihi achukma yō chim osapa ya ish a hokchi tok keyu hō? katiahmi hō anonti haiyukpulo vt asha cho? im achi tok.

28. Mihma, Tv̄np osh ilv̄ppa yvmihchi tok, im achi ma; tishu v̄hleha hash osh, Yohmi ka ivt yvmmak atuk ma ont aiov̄t il itahoba hi a, ish ahni cho? im achi tok.

29. Yohmi kia yvmmak ash osh, Keyu; yvmmak keyukma haiyukpulo a aiov̄t hv̄sh itahobi takla kv̄t, onush a aieninchit hv̄sh lobba hinla hoke.

30. Itapihv̄t hiohmayvt av̄sha onashke: atuk o av̄sha onak mak o na-bv̄shli v̄hleha hā, Haiyukpulo ak o tikba aiov̄t itahobit hv̄sh sitohli cha, hv̄sh hukmashke; yohmik-mvt onush ak okv̄no a kanchak ak o pit hv̄sh ai itahobashke, im achi lashke, achi tok.

31. Nan-isht v̄lh̄pisa inla yō in takalichi mvt, Ūba apehlichika yvt mv̄stv̄t nihi achv̄fa hō hatak vt ishi cha, im osapa ya hokchi tok a holba;

32. Yvmmak okvt iskitini kv̄t na nihi moma ka ik lauwo ho mv̄hli; yohmi kia offot hofantikmvt, haiyukpulo puta ka moma imaiya cha, iti o toba; yohmi na v̄ba hushi puta kv̄t naksish atuk ma ant a binohli chatuk oke, achi tok.

33. Anonti nan isht v̄lh̄pisa inla yō isht im anumpuli mvt, Ūba apehlichika yvt pv̄ska shatv̄mmichi yō ohoyo hv̄t ishi cha, tanchi pv̄shi v̄lh̄pisa tuchina hō ibafohki tuk o, momvt shatv̄mmi tuk a, holba hoke, achi tok.

34. Ilv̄ppa puta ka nan isht v̄lh̄pisa bano hō Chisvs vt okla laua yatuk ma isht im anumpohonli tok.

35. Hopaii vt anumpuli mvt, Nan-isht v̄lh̄pisa hō sv̄tih hā isht anumpohonli lashke; yakni toba tok taiyakla ka na lu-



ma asha chatuk puta ka anohonli lashke, achi tok a ont aiahla chi ka, nan-isht vlhpisa ho keyukma im anumpuli tok keyushke.

36. Yohmi mvt Chisvs vt okla laia ya kanompit tihleli mvt, aboha ont chukowa tok; mihma nan im ai ithvna vhleha hvt im ai ona mvt, Haiyukpulo osapa anuka asha tok nan-isht vlhpisa ka achukmalit ish pim anolashke.

37. Mihma afalaminchi mvt, Na nihi achukma yo hokchi kvt Hatak Ushi ak oke.

38. Osapa vt yakni moma kak oke: nihi achukma yvt vba apehlichika im vlla ak oke; amba haiyukpulo vto nan okpulo im vlla ak oke.

39. Tvuv vt yvmma hokchi tok vt Setan ak oke: avsha ona kvt yakni ont im ishtaiyopi kak a he; mikma na bushli vhleha hvt enchil vhleha ak oke.

40. Yohmi ka haiyukpulo yvt itahoba cha, luak isht hollokmi chatuk a, yakni ilvppvt ont im ishtaiyopikmvt, yvmmak inli ho chiyuhma hi oke.

41. Hatak Ushi vt im enchil vhleha ha atohonokma, na yoshubi, micha nan ik vlhpeso yohmi vhleha aiena ka mominchit im apehlichika atuk ma ai ishit kocha wela he;

42. Mikmvt yvmmak atuk ma tvli a bila luak chinto ho pit ai ashacha he: yohmikma yaiya micha noti ahampa aiena hosh yvmmak oka aiasha hi oke.

43. Yohmikma hopoyuksa vhleha hokvt shohpakali kvt, hvshi ak o chiyuhmi hosh Iki im apehlichika atuk ma aiasha hi oke. Kvna hosh isht haponakla he haksobish vt i hinlikmvt, haklashke.

44. Anonti, Vba apehlichika yvt na holitompa luma hosh osapa anuka itonla tuk o, hatak vt yvmmak ash o ahayuchi cha, luhmi mvt, na yukpa fehna hatuk osh ia mvt, nana im asha tuk vt mominchit kanchi cha, osapa yvmmak ash o chumpa kak o chohmi hoke.

45, 46. Anonti, Vba apehlichika yvt hatak nan chumpa yosh tvli holitompa hochukma hoyot ahanta; yohmi tuk osh tvli holitompa achvfa kvt vlhtoba chinto ahayuchi mvt, ivt



nana im asha tuk vt mominchit ont kanchi cha, chumpa kak o chohmi hoke.

47. Anonti, Uba apehlichika yvt nuni-isht hokli yo oklvta okvchi na ilaiyuka puta pehli;

48. Atuk o alota ma, okla halvllit oka vhli isht ona mvt, aka binohli cha, hochukma ka aiovvt nan aivlbeha pit apitta mvt, amba okpulo yvno kampila kak o chohmi hoke.

49. Yakni vt ont im ishtaiyopikma yvmmak inli ho chiyuhma he; enchil vhleha hvt kohchvt ayakmvt, hatak haksi vhleha hvt hopoyuksa vhleha ha ibvlhto tuk a filamohlicha he:

50. Mikmvt yvmmak ash o tvli a bila luak chito ka pit ito-ashacha he; yohmikma yahaya, micha noti ahampa aiena hosh yvmmak oka aiasha hi oke, im achi tok.

51. Mihmvt Chisvs ash osh, Ilvppa puta ka mominchit hvsh akostininchi cho? im achi ma, Yau, Chitokaka ma! okla im achi tok.

52. Yohmi ma, Na holissochi aiyyuka vba apehlichika isht im vlvvchi kvv, hatak chuka-chvfa pehlichi yosh nan im aia-sha ya nana kvv himona, micha hopaki aiena ho ai ishit kohchi ka chomi hoke, im achi tok.

53. Atuk o yakohmi tok; Chisvs vt nan isht vlhpisa ilvppa puta ka ont taiyali mvt, kohchvt ia tok.

54. Atuk osh ilap i yakni ak inli ka vla mvt, i sinakak a nan ai im abahanchi; yohmi ma okla nukhlakanacha mvt, Hatak ilvppvt nan ithana, micha na fehna aiena ka yvmih-chi kvv, katimak o ai im vlhtaha tok oh cho?

55. Ilvppvt chuka ikbi ya ushi keyu? ishki vt Meli hoh-chifo keyu? mikma itibapishi vhleha mvt Chemis, micha Choses, mikmvt Saimon micha Chutas aiena kak keyu?

56. Mihma in tek vhleha hvt momvt hvpi takla maya keyu? Yohmi ka hatak ilvppvt katimak o nan ilvppa mo-ma ka ai im vlhtaha tok oh cho? achi tok.

57. Mihmvt yvmmak ash o okla isht ai ibetvbli tok. Yohmi kia Chisvs vt, Hopaii vt ik holitopo keyu hosh ahanta kia, ilap i yakni ak inli, micha ilap in chuka kak illa hoh chatuk oke, im achi tok.

58. Yohmi mvt okla nan ik i yimmo hatuk mak o yvm-mak atuk ma na fehna ka lauachit a yvmihchi tok keyushke.

CHAPTA XIV.

Chan Baptist vt nan ai ahli fehna hatuk osh Helot a nan i miha hosh aboha kvllo pit fohka, 1, 3 micha noshkobo tupa tok. 13 Chisvs vt paska lumbo tahlapi, micha nvni tuklo aiena ho hatak tahlepa sipokni tahlapi ho ipeta tok. 22 Chisvs vt vba pit anumpula chi hosh nvni chaha pit oiya; atuk osh ninak a mahli fehna ma okhvtu paknaka a nowvt nan im ai ithvna vhleha ha im ia; micha Pita yvt oka kvnia he tuk a okchalinchi. 34 Chisvs vt Kenesalet ona mvt, abeka puta tuk a hlakofichi.

1. YOHMI ma nitak yvmma foka ma, miko Helot vt Chisvs vt annohowa ka, haklo tok.

2. Mihmvt in tishu vhleha hash o, Ilvppvt Chan Baptist mak oke; illi tuk vt falamvt tanishke: yohmi hatuk o na fehna puta kvv yvmmak atuk ma ai isht il otvnihinchishke, im achi tok.

3. Helot vt itibapishi Filip a tekchi Helotias ak atuk pulla mak o, Chan a hoklit, ishit takchi cha, aboha kvllo ya fohki tuk a tok.

4. Chan vt, Yvmmak oka ish itauwaya he chim vhpesa keyushke, im achi hatuk o.

5. Yohmi kak o yvmma vbi bvna kia, okla laua yak o i nukshopa tok: yvmmak oka hopaii, okla ahni hatuk oka.

6. Yohmi tuk kia Helot vt ai vta tok nitak a holitoblit maya ma, Helotias ushetik vt itikba ya a hihla ma, Helot vt yukpa tok.

7. Yohmi kak osh anumpa kvllo isht ai il onochi hosh nana ho asilhha hokma, ima hi vt miha tok.

8. Mihma ishki vt tikbanli i miha hatuk oka, Chan Baptist noshkobo vt amphvta chito fohka ho, ilvppak fehna ant is si ai vmashke, achi tok.

9. Mihma miko vt nukhaklo tok; yohmi nana kia anumpa kvllo atuk pulla, micha okla ibai-impvt maya tuk aiena hatuk mak o, yvmmak atuk ma ima hi a apesa tok.

10. Micha pit atohno na aboha kullo anukaka yak o Chan noshkobo ya a tvpli tok.

11. Mihma yumma noshkobo hvt amphvta chito fohka ho isht vla cha, ohoyo himita yash ima tok; mihma yummak ash osh ishki a isht im ona tok.

12. Yohmi ma nan im ai ithvna vhleha hvt haknip a ont ishi cha, holpi mvt, ivt Chisvs a ont im anoli tok.

13. Chisvs ash osh haklo mvt, nan im ai ithvna vhleha bano ho ai itapihvt yumma vttvt ia kvv, peni vlhtot yakni haiaka yo ilhkoli tok; atuk o okla hvt yummak ash haklo mvt, aka itvnowa hosh tmaha puta ka ashvt okla pit iakai-ya tok.

14. Atuk o Chisvs vt koheha cha, okla laua ya pisa mvt, i nukhaklo fehna cha, abeka im asha tuk a hlakofichi tok.

15. Atuk o opivt taha <sup>their side</sup> ma, nan im ai ithvna vhleha hash osh im ai vla mvt, Ilvppak okvt yakni haiaka yoke; mikma himak a shoba hosit tashvshke; okla laua ya pit ish tihleli na tmahushi taloha ka ilhpak vpa chi kvv okla a chum-pashke, achi tok.

16. Yohmi kia Chisvs ash osh, Okla ik aiyo mak kia, impa chi ka hvsh ipetashke.

17. Yohmi ma, Pvska tahlapi, micha nvni tuklo aiena illa hosh ilvppa pim ashvshke, okla im achi tok.

18. Mihma, Ilvppak o isht oh vm vla, achi tok.

19. Mihmvt okla laua yvt aka hvshuk ai om binohla chi ka apesa tok; mihmvt pvska tahlapi cha nvni tuklo aiena kash o ishi cha, vba pit vba-chakali mvt, ai okpvehi cha tushahlichit, pvska yash o nan im ai ithvna vhleha ha ima na nan im ai ithvna vhleha hash osh okla laua ya pit ipeta tok.

20. Mihma okla momvt impvt kaiya tok; mihma boshulli atampvt asha ka kishi alota auah-tuklo ho okla ishi tok.

21. Yohmi ka okla impa tuk vt, ohoyo vlla aiena kvto asha ho, hatak tahlepa sipokni tahlapi foka tok.

22. Yohmi ma mih mak inli ho Chisvs vt ilapvt okla laua ya tishelichi taklakma, nan im ai ithvna vhleha hvt peni pit abeha cha, tikba misha tvnrvp a ilhkola chi ka i miha tok.



23. Micha okla laua yash tishelichit tahli mvt, vba pit anumpula chi hosh ilap illvt nvni chaha y<sub>o</sub> pit oiya tok : atuk osh opivt taha ma ilap bano hosh yvmma anta tok.

24. Amba peni vto okhvta iklvna ya, mahli ak osh a sanali hatuk o, oka banvtha ka takakanlit aya tok.

25. Atuk o ninak isht vlpisa ont isht ai ushtak fehna, Chisvs vt okhvta ha a nowvt ayvt im ona tok.

26. Mihma okhvta a nohovvt aya na nan im ai ithvna vhleha hvt pit pisvt, komunta mvt, Shilup oke, achi tok ; mihmvt nukshopa cha, tahpva tok.

27. Yohmi kia Chisvs ash osh ashalinka pit im anumpulit, Hvchi nuktanla achukmashke ; vno ash sia hoke ; ik hvchi nukshopo kashke, achi tok.

28. Mihma Pita yvt afalaminchi mvt, Chitokaka ma ! chishno ash chia hokmvt, oka ya a nowvt mayvt chim ona la hi a is sa mihashke, im achi tok.

29. Mihma, Minti, achi tok. Yohmi ma Pita yvt peni ash pit akowa mvt, oka ya a nowvt Chisvs a im ia tok.

30. Yohmi tuk kia mahli hvt kvllo fehna ho pisa mvt, nukshopa tok ; micha oka kvnivt ishtia mvt, tahpvlvt, Chitokaka ma ! si okchalinchí, achi tok.

31. Yohmi ma Chisvs vt ashalika ibbak a pit welit halvlli mvt, Na yimmi fehna keyu chia ma ! nanta katiohmi ho chi anuktuklo tuk oh cho ! im achi tok.

32. Atuk o peni a ant vlhto ma, mahli hvt yokopa tok.

33. Yohmi ma peni anukaka maya tuk ash osh yvmmak oka ant aiokpahanchi mvt, Chishno ak osh Chihowa Ushi a chia ho mvhlshke, achi tok.

34. Atuk o yvmmak ash o hlopulli mvt, Kenesalet yakni o okla ona tok.

35. Yohmi ma hatak yvmma asha tuk vt yvmmak ash o akostininchi mvt, inla tohnot yakni yvmma fullota ka mominchit pit tihleli na abeka yatuk vt momvt ai im ona tok.

36. Mihma im anchi aposhokvchi ak illa kia okla potola hinla ka im asilhha tok ; yohmi ma laua kvv kanihmi hosh potoli tuk okvt hlakofi aiahli tok.

## CHAPTA XV.

Chisvs vt na holissochi vhleha micha Falisi vhleha aiena kv̄t anumpa kochanli i nan v̄lhpisa puta kak o ahninchī kv̄t, Chihowa i nan v̄lhpisa puta ka i shahlichī ka nan i miha tok, 1: 11 micha nana puta nana hosh hatak a okpaiyani kv̄t ashā ka anoli. 21 Chisvs vt Kenan ohoyo hō ushetik a hlakofichi, 30 micha okla laua kv̄t im ona na hlakofihinchī tok; 32 micha pvska lumbo untuklo, micha n̄vni chipunta kanomosi aiena hō hatak tahlepa sipokni ushta ka ipeta.

1. YUMOHMI ma na holissochi vhleha, micha Falisi vhleha aiena kv̄t, Chelusalem minti hosh Chisvs a im ai v̄la mvt,

2. Nanta katiohmi hō na chim ai ithvna vhleha kv̄t hatak tikba vhleha anumpa kochanli isht i nana v̄lhpisa ha tok a kobvffi cho? okla-ibbak achifa keyu hosh pvska v̄pa kv̄t, achi tok,

3. Yohmi kia yvmmak ash osh afalaminchi mvt, Nanta katiohmi hō hvchishno mvt, Chihowa i nan v̄lhpisa ya anumpa kochanli chī nana v̄lhpisa ka isht hvsh kobvffi cho?

4. Chihowa yvt apihisa kv̄t, Chiki micha chishki aiena ka ish holitoblashke; yohmikma, Kvna hosh iki okmá, keyukmvt ishki okmá, nana hō na mihachikmvt, illi mak o illashke, achi tok oka.

5. Amba hvchishno vt, Kvna kia iki, keyukmvt ishki okma nana kash o v̄m isht ish aiyukpa he tuk a, Ūba-isht aiokpv̄chi oke, im achi: yohmi cha iki okmá, ishki okmá, nana ka ik holitoblo kia nan ik i kanihmo ka hi oke, hvsh achi.

6. Yohmi hosh Chihowa i nana v̄lhpisa ya anumpa kochanli chī nana v̄lhpisa ya isht hvsh ai okpv̄nichishke.

7. Nan-ilahobi hvchia ma! Esaias vt tikbanli nan isht hvchi anohonli hosh,

8. Okla ilvppvt itih hokvno a bilikasi isht v̄la mvt, itiv̄lbi ma ishit sa holitoblishke; yohmi kia chukvsh okvto auct a hopakishke.



9. Nana abvchi kvt hatak i nana vlhpisa yo ithananchi hokvt, nana vlhpesa keyut okla si aiokpahanchishke, achi tok, im achi tok.

10. Yohmi mvt okla laua yash o itahobi cha, Haklot, hvsh ithaiyanashke ;

11. Nana kvt itih ha pit chukowa kak osh hatak a okpni ho keyu : amba nana hvt itih ha a kolicha, ilvppak osh hatak a okpni hoke, im achi tok.

12. Yohmi ma nan im ai ithvna vhleha hash osh im ai ona cha, Falisi vhleha hvt anumpa ilvppa haklot issa mvt, ik im vhpieso tuk a ish akostininchi cho ? achi tok.

13. Yohmi kia yvmmak ash osh afalaminchi mvt, Na holokchi moma kvt Aki vba binili hosh hokchi tok keyu hokvno, tehvt taha hi oke.

14. Ant ik maya, lpa yosh lpa pehlich i okla hoke : yohmi ka lpa yosh lpa ya ilauei kvt tuklot yakni kula ya pit kaha hi bano hoke, achi tok.

15. Yohmi ma Pita yvt afalaminchi mvt, Nan isht vlhpisa ilvppa achukmalit pim anoli, achi tok.

16. Mihma Chisvs ash osh, Hvchishno ak kia nana ik akostinincho kvt hvchi moma hato ?

17. Nana kvt itih ha fohka cha ia kvt takoba ya ont fohka tuk osh, anonti ont kohcha chatuk a, hvch ik akostinincho moma cho ?

18. Amba nana puta kvt itih ha akohcha hokvto chukvsh ak o a minti ; micha yvmmak osh hatak a okpni chatuk oke.

19. Chukvsh ak o im anukfila okpulo puta, hatak bika vbi, haui toba, ohoyo ik im iksho micha hatak ik im iksho it i lumaka puta, hukopa, anumpa ik ahlo isht atokoli, Chihowa ik ahobalot anumpuli puta kvt a toba hoka.

20. Ilvppa puta kak osh hatak a okpni hoke ; amba ibbak ik ahchifo yo isht impa hokvno hatak a okpni keyu hoke, achi tok.

21. Yohmi ma Chisvs vt yvmmak ash vttvt ia mvt, Taia micha Saiton aiena yakni i kaniohmi ho ona tok.

22. Mihma Kenan ohoyo hosh yvmmak inli ho vttvt aya



tuk vt vla cha in tahpvla mvt, Chitokaka Lewi ushi chia ma! is sa nukh<sup>h</sup>aklashke; svso-tek vt nan-isht-ahullo okpulo ai i foka isht issikkopa fehna hoke, achi tok.

23. Yohmi kia ilap vt anumpa achvfa kia isht ik im afalaminch<sup>o</sup> ki tok. Yohmi ma nan im ai ithvna vhleha hash osh ona cha, Tahpv<sup>l</sup>vt hvp iakaiya ka, kanompit ish chvffi-chashke, achit im asilhha tok.

24. Yohmi kia yvmmak ash osh afalaminch<sup>i</sup> mvt, Inla yokvno im aya li ha tok keyu; amba chukfv<sup>l</sup>hpoba tvmoa Israel in chuka-chvfa ak a tok oke, achi tok.

25. Yohmi ma ohoyo hash osh mintit ant aiokpvchi mvt, Chitokaka ma! si apelv<sup>h</sup>ch<sup>i</sup>, achi tok.

26. Yohmi kia afalaminch<sup>i</sup> mvt, Ulla im pvska ya ishi cha, ofi puta ka pit ipeta he vlhpesa keyu hoke, achi tok.

27. Mihma yvmmak ash osh, Ahlishke, Chitokaka ma! yohmi kia ofi puta kv<sup>t</sup> boshulli osh im pushnayo im ai-imp<sup>a</sup> a chilofa kvno vpa hoke, achi tok.

28. Yohmi ma Chisvs vt afalaminch<sup>i</sup> mvt, Ohoyo ma! na chi yimmi kv<sup>t</sup> chintoshke; chishno ish ai ahni tuk fehna mak o chim ai yvmohmashke, im achi tok. Mihma hvshi kanvlli vlhpisa yvmmak fehna h<sup>o</sup> ushetik atuk vt hlakofi tok.

29. Yohmi ma Chisvs vt yvmmak ash vttvt ia mvt, Kalili okhvta bilika y<sup>o</sup> ona tok; mihmvt nv<sup>n</sup>ih chaha y<sup>o</sup> pit oiya cha, yvmmak o binili tok.

30. Mihma okla chinto fehna kv<sup>t</sup> hanali okpulo, ik hoponayo, ik anumpolo, imomokpulo puta, mikmvt inla mvt laua h<sup>o</sup> il ai ish<sup>i</sup>t im ai ona mvt, Chisvs iyi ituma ya ont ashachi tok; mihma yvmmak ash o hlakofichi tok.

31. Yohmi na okla laua kv<sup>t</sup>, ik anumpolo atuk vt anum-puli, imomokpulo atuk vt hlakofi, hanali okpulo atuk vt nowa, ik hoponayo atuk vt pisa aiena h<sup>o</sup> okla pisa mvt, nukhlakan<sup>a</sup>cha tok; micha Israel in Chihowa ak o okla aiokpahanchi tok.

32. Yohmi ma Chisvs vt nan im ai ithvna vhleha hash o hoyo cha, Okla laua si ap<sup>e</sup>hvt may<sup>a</sup> na himak nitak tuchina ka nana vpa hi vt ik im iksho hatuk o, i sa nukh<sup>h</sup>akloshke; yohmi hatuk osh nan ik po moma hokvno tishelichi la he

keyu, yummak keyukma takla ya okla tikamba hinla hoka, im achi tok.

33. Mihma nan im ai ithvna vhleha hash osh, Yakni haiaka ya katimak o pvska laua ka il ahayuchi na okla chinto yohmi fehna kvt kaiya hinla cho? im achi tok.

34. Mihma Chisvs ash osh, Pvska yvt katohmi ho hvsh ishi ho? im achi tok. Mihma, Untuklo, micha nuni chi-punta kanomosi hosh aiena, im achi tok.

35. Yohmi ma okla laua yvt aka binohla hi a apesa tok.

36. Mihmvt pvska untuklo, micha nuni aiena kash o ishi cha, vba isht aiokpvchi mvt, tushtoli cha, nan im ai ithvna vhleha ha ima na nan im ai ithvna vhleha hash osh okla laua ya ipeta tok.

37. Mihma momvt okla impvt, kaiya tok: mihma bo-shulli atampvt asha ka kishi alota untuklo ho okla ishi tok.

38. Mihma okla impa tuk vt, ohoyo vlla aiena hokvto asha ho, hatak tahlepa sipokni ushta tok.

39. Mihma okla laua yash o tishelichi mvt, peni fohka cha, ivt Maktala yakni a ona tok.

CHAPTA XVI.

Falisi vhleha hvt, Chisvs vt nan isht atokowa ya vba ya ai im otvni-cha hi a ahni, 1; 6 micha nan im ai ithvna vhleha hvt, Falisi vhleha hvt nana ithvnanchi ka i nuktahlvt ahah! ahna he i miha tok. 13 Pita yvt Chisvs a Chihowa okchaya Ushi, aiahnit yimmi kvt miha. 21 Chisvs vt iti-taiyukhvna ai illa he, atuk mvt nitak ont atuchinakma falamvt tana he aiena kvt tikbanli anoli; 24 anonti Chisvs a im antia vhleha hvt okla ile kaiyanchi, mikmvt tikba na yukpa ai im vlhtoba he takanli kak o isht ai ilbvsha he mak o achi.

1. **F**ALISI vhleha micha Satusi okla aiena kvt ai vla cha, yummak ash o imomaka pisa hosh nan isht atokowa ya vba ya auet ai im otvnicha hinla ka, im ahni-tok.

2. Mihma afalaminchi mvt opiaka yokma, Shutik vt humma hoka, kocha yvt achukma chishke, hvsh achi.

3. Mikmvt onnahnli yokma, Shutik vt humma cha hosh-

ontichi fehna hokvt, kocha yvt okpula chishke, hvsh achi. Nan ilahobi hvchia ma! shutik pisa yosh kaniohmi hokvno hvsh akostininchi kv, anonti himak nitak isht ai vlpisa kvno hvch ik akostinincho ka hinla cho?

4. Hatak haksi micha haui aiena okla ash osh nan isht atokowa ya pisa ka ahnishke: yohmi kia nan-isht atokowa nana hosh im otvna he keyu; amba hopaii Chonas a nan-isht im atokowa kak illa hi oke, im achi tok. Mihmvt yummak ash o issvt ia tok.

5. Atuk o nan im ai ithvna vhleha hv misha in tvnnvp a ona mvt, pvska okla isha he tuk vt imihaksi tuk a tok.

6. Yohmi ma Chisvs ash osh, Falisi vhleha, micha Satusi vhleha aiena im pvska isht-shatvmmi ya i nuktahtvt ahah! hvsh aiahnashke, im achi tok.

7. Yohmi ma yummak ash osh, Pvska kil esho kak oka, achit ilap bika it im anumpulit maya tok.

8. Mihma Chisvs vt yummak ash o akostininchi mvt, Na yimmi fehna keyu hvchia ma! na katihmi ho pvska ya isht hvch ik ayo ke tuk ak osh isht it im anumpulit hvsh maya cho?

9, 10. Pvska tahlapi ho tahlepa sipokni tahlapi tuk a, kishi kanohmi ho hvsh ishi tok vt, micha pvska yvt untuklo ho, tahlepa sipokni ushta tuk a, kishi kanohmi ho hvsh ishi tok aiena kv; hvch ik ithanot hvch ik akostinincho moma ho?

11. Katiohmi ho Falisi vhleha, micha Satusi vhleha aien. im pvska isht-shatvmmi ya ahah! hvsh aiahna he, yummvt pvska imma yo isht hvch im anumpuli li tuk keyu ka hvch ik akostinincho cho? im achi tok.

12. Yohmi ma pvska isht-shatvmmi hak o ahah! im ahna hi o i miha hatuk keyu; amba Falisi vhleha, mikmvt Satusi vhleha aiena nan-isht ai ithvnanchi ak atuk a okla akostininchi tok.

13. Atuk o Chisvs vt Sesalea Fillippi yakni a ona mvt, nan im ai ithvna vhleha im ponaklot, Hatak vto, Hatak Ushi sia ha, kvta ho si achi cho? achi tok.

14. Mihma, Kanimi kvto, Chan Baptist chia ho mihakma;



kanimi kvto, Elias; mikma inlaka yvto Chelemaias; keyuk-mvt hopaii a tok achvfona mak o chia ho miha hoke, achi tok.

15. Mihma, Amba hvchishno vto kvta ho hvs si achi cho? im achi tok.

16. Mihma Saimon Pita yvt afalamинchi mvt, Chihowa okchaya Ushi, Klaist chia mak oke, achi tok.

17. Mihma Chisvs vt afalamинchi mvt, Saimon Ba Chona chia hvt na chi yukpvshke: nipi micha issish aiena hosh yvmma chim otvnichi ho keyu hoka, amba Aki vba binili kak oke.

18. Yohmi ma anonti, Chishno vt Pita chia, yohmi ka tvli ilvppak o an chvch atuk ma ai ikbit hilechi la hi oke: yohmikma aiokpuloka okhissa puta kvv yvmmak atuk ma ik imaiyacho ka he mak oke.

19. Micha vba apehlichika ishit-tiwa puta ka chishno ak o chima lashke: mikma nana ho yakni paknaka ya ish a takehi hoka, vba yakni ma a talakcha he: mikmvt nana ho yakni paknaka ya ish ai i hotofi hoka vba yakni ma ai i hotofa he mak oke, chim achi li akinlishke, achi tok.

20. Yohmi mvt ilap ak osh Chisvs Klaist mak atuk a hatak nana kia okla ik im anolo ka hi a, nan im ai ithvna vhleha hash kvllochit i miha tok.

21. Nitak yvmma ai vhlit maya kak o Chisvs vt ilapvt Chelusalem a ona cha, hatak hochitoka vhleha, micha na holitompa isht asha pehlichu vhleha, na holissochi vhleha aiena ka nan isht im ai ilbvsha in laua he, micha illichu tuk ma, nitak ont atuchinakma falamvt tana he aiena ka nan im ai ithvna vhleha ha im anolit ishtia tok.

22. Yohmi ma Pita yvt ilauehit ishi cha, im alvmminchit ishtia mvt, Na yakohmi kvv chi mishemashke, Chitokaka ma! ilvppak okvt a chi yvmohma he keyu hoke, achi tok.

23. Yohmi kia yvmmak ash osh filema mvt, Pita yash o, Setan chia hvt vm ashaka yo ish hikiashke; chishno ak osh is si ataklvmmichishke: nana kvv Chihowa ya ahalaya kak o ish ahninchu keyu, amba nana kvv hatak o ahalaya hok mak bano hoka, im achi tok.

24. Yohmi mvt nitak yvmma foka ma Chisvs vt nan im ai ithvna, vhleha hash o, Hatak nana hosh siakaiya bvna hokmvt, ile kaiyanchi cha, im iti-taiyukhvna ya sholi hosh siakaiyashke.

25. Kvna kia ilap im ilhfiopak a okchalinchu bvna hokvto, i kvnia hi oke: yohmikma kvna kia vno pulla hatuk mak o im ilhfiopak vt isht i kvnia hoh kia, ahayucha hi oke.

26. Hatak vt yakni a ai ila mominchi hosh ahanta na ilap imi shilombish ash osh i kvnia hokma, nanta ho ai-isht il aiyukpa hinla cho? yvmmak keyukmvt hatak vt nanta ak o ilap shilombish a isht atobba hinla cho?

27. Hatak Ushi vt enchil vhleha ha pehlichu cha, Iki isht aholitopaka ya il aieshi hosh aya hi oka; yohmikmak osh hatak moma ka ilap nana akaniohmi tok aiyuka mak o isht im atobba hi oke.

28. Ahli mak o hvchim achi lishke, Ilvppa hiohmaya kvtkanimi kvtk ik illo hosh ahanta cha, Hatak Ushi vt im apehlichika il aieshit minti ka, pisa hi vt asha hoke, im achi tok.

## CHAPTER XVII.

Chisvs vt inlv toba, micha Moses Elias ita tuklo kvtk im vla na it im anumpuli, 1. 14. Chisvs vt nvni chaha vttvt akowa mvt, haiochichi tuk a hlakofichi; 22 micha illa he atuk mvt falamvt tana he tikbanlit anoli. 24 Chisvs vt tvli holisso holitopa ka tempel a nan isht im ai atahla chi ho ima tok.

1. YUMOHMI tuk o nitak hannali ont ia ma, Chisvs vt Pita, Chemis, mikmvt itibapishi Chan aiena ka ilap bano ho pehlichu cha, <sup>(a om. unch. oin)</sup> nvni chaha yo pit oiya tok.

2. Mihmvt itikba ya ai inla tobtv hikia tok; mihma nashuka yvt shohpakali kvtk hvshi ak o chiyuhmi ma, im anchi vt tohbi kvtk tommi hak o itilauv tok.

3. Yohmi ma Moses micha Elias itatuklo hosh yvmmak ash ant it im anumpuli hosh im otvni tok.

4. Yohmi ma, Pita yvt anumpuli mut, Chitokaka ma! ilvppa il asha kvtk pim achukmvshke; vlvpsa ish ahni hok-

ma, ilvppa vlhtipo tuchina ka il ai ikbashke; achvfa kv̄t chishno ak ɔ chimmi hokma, anonti achvfa kv̄t Moses ak ɔ immi hokma, anonti achvfa kv̄t Elias ak ɔ immi hashke, Chisvs a im achi tok

5. Yvmmvt anumpohonli moma hɔ, hoshonti tohbi kv̄t ant ɔ hoshontikachi tok; mihma anumpa hoshontika auet a kocha kv̄t, Ilvppak osh Svso a holitopa yɔ, nan-isht a sai yukpa fehna hoke; hvsh i haponaklashke, achi tok.

6. Mihma nan ithvna vhleha hash osh haklo mvt, hlipvt kaha cha, okla nukshopa fehna tok.

7. Mihma Chisvs vt vlvt ant tebli mvt, Ho tani; ik hvchi nukshopa kashke, achi tok.

8. Yohmi ma okla vba chakali mvt, hatak nana kia ik peso, amba Chisvs ak illa tok.

9. Yvmohmi tuk ɔ <sup>(the mountain)</sup> nuni chaha ya asht akowvt okla minti ma, Chisvs vt yvmmak ash ɔ nan i mihvt, Nana hvsh pisa tuk vt hatak nana kia hvch ik im anolo mak ɔ, Hatak Ushi vt illit falamvt tani hayashke, achi tok.

10. Mihma nan im ai ithana vhleha hv̄t im ponaklot, Yohmi ka katiohmi hɔ na holissochi vhleha hv̄t, Elias ak osh tikba vla pulla he, okla achi cho? achi tok.

11. Mihma Chisvs vt afalaminchi mvt, Elias ak osh tikba vla cha, nan okluha ka falaminchit achukmalit taiyahla he tuk ɔ mvhli:

12. Yohmi ka Elias vt himonasi ak kia vla mashko hoke; mihma yvmma okla ik ithano cha, amba nana hɔ okla ahni tuk mvt, yvmmak atuk ma i yvmihchi tok; yohmi ka Hatak Ushi ak kia mih mak ɔ, chiyuhmit im ai issikkopa chi hoke, hvchim achi lishke, achi tok.

13. Yohmi ma Chan Baptist ak ɔ yvmmvt isht anumpuli hatuk a nan ithvna vhleha hv̄t akostininchi tok.

14. Atuk ɔ okla laua aiasha kash vlvt taha ma, hatak achvfa hosh im vla cha, ant i hvchukbihlept hikia mvt,

15. Chitokaka ma! svso ha ish i nukhaklashke: yvmmak okvt haiochi atuk osh himonna luak a itatohonla fehna, mikmvt oka ma himonna oka itohonla fehna aiena hatuk osh issikkopa fehna hoke.



16. Yohmi ho nan chim aiithvna<sup>a</sup>vhleha ha isht im vla li tuk a, okla hlakoficha he keyu tuk oke, achi tok.

17. Mihma Chisvs vt afalaminchi mvt, Na yimmi iksho, micha na shanaiya fehna okla hvchia ma! hvchi takla ahanta li katiohmi foka chi cho? nana ka isht ak hvchi ahno ho katiohmi foka chi cho? Ilvppak o isht hvs svm vlashke, achi tok.

18. Mihmvt Chisvs vt nan-isht ahullo okpulo ya im alvm-mi ma, yvmmak ash a kohcha tok; yohmi ma vlla yash osh hvshi kanvlli vlhpisa mih makinli ho hlakofi tok.

19. Yvmohmi tuk o Chisvs vt ilap bano ma, nan ithvna vhleha hvt im ona cha, Katiohmi ho pishno vto yvma e kohcha he keyu tuk oh cho? achi tok.

20. Mihma Chisvs vt, Nan ik hvchi yimmo kak atuk oka; ahli mak o hvchim achi lishke: Na yimmi kvv mustvt nihi achvfa yak o chohmi hosh hvchi nukfoka hatuk okmvt, nvni chaha ilvppa, Ilvppak atuk ma a kanvllit yvmmak o ish onashke, hvsh im achi hoka, yvmmvt kanvlla hinla hoke: mikma nana hosh hvchi na fehna hi vt iksho ka hinla hoke.

21. Yohmi kia ilvppa chohmi hokvt vba pit anumpuli, micha nahullochi aiena kak o keyukma kohcha chatuk keyushke, im achi tok.

22. Atuk osh Kalili a okla maya ho, Hatak Ushi a ishit okla ibbak a fohka chi hoke.

23. Yohmikma yvmmak ash o okla vbi tuk ma, anonti nitak ont atuchinakma falamvt tana hi oke, Chisvs vt im achi tok. Yohmi ma okla nukhaklo fehna tok.

24. Yvmohmi tuk o Kapenavm a okla ai vla ma, vba isht ai okpvchi tvli holisso a sholi vhleha hvt Pita ya im ona mvt, Na hvch ithvnanchi vt vba isht aiokpvchi tvli holisso a bohli chatuk keyu ho? achi tok.

25. Mihma yvmmak ash osh, Ahli; achi tok. Mich a aboha ya ont chukowa ma, Chisvs vt tikbanli. Saimon vt katiohmi ish ahni cho? miko vhleha yakni pakna aiasha kvv ilap im vlla yak okma, keyukmut hatak inla yak okma, nanta ho vlhpoyak i nan vlhpisa tvli holisso, micha nosh-

kobo chumpa tvi holisso, aiena ka im a hoyo chatuk o? achi tok.

26. Pita yash osh, Hatak inla vhleha ha, im achi tok. Mihma Chisvs vt, Yohmikma im vlla yokvto yvmma ik aha-laiyo ho tumvshke.

27. Yohmi kia kil ibetvblecho ka chi ka, ivt okhvta ona cha, nuni isht-vlbi ya pit okvchi; atuk osh nuni tikba koh-cha ho ish. ishashke: micha itakha ya ish wakvmmikmvt, tvi holisso tushafa kvf foka na ish pisa chi hoke; yvmmak o ish ishi cha, vno, micha chishno, il ita tuklo isht vltoba mak o yvmma ont ish imashke, im achi tok.

CHAPTA XVIII.

Chisvs vt pim anukfila hvt akanlosa he, 1, 7 micha ilap i yimmi ahh vhleha hoka e shitelema he keyu ka pi miha: 12 anonti i yimmi vhleha ha i hullo kvf isht anoli mak osh chukvvlhpoba kvnia isht apesvt anumpuli: 15 micha itibapishi iksa ibafohka yatuk osh nana ka pim okvni hokma, il i kanihoma hi oka pi miha: 20 anonti kvna hoh kia i hohchifo ha kanima yo ai it afana ka ai ibafoka hi vt achi. 21 Chisvs vt hafak okvt nana ka ai iti kanihomi hokvt, peh iti kashofa he tuk nan isht apesa hosh anumpuli.

1. YOHMI ma yvmmak fehna akinli ka nan ithvna vhleha hvt Chisvs a im ai vla mvt, Kvta hosh vba apehlichika ya ibafoka kvf moma i shahli cho? achi tok.

2. Mihma Chisvs vt vlla iskitini o i howa cha, yvmmak ash intinlakla ya hilechi tok.

3. Mihmvt, Ahli ho hvchim achi lishke; Inlvf toba cha, vlla chipunta yo chiyuhmi ho keyukmvt, vba apehlichika ya hvsh chukova he keyu hoke.

4. Yohmi hoka kvna hosh ile akanlosichi kvf vlla iskitini ilvppak o chiyuhmi hokmvt, mihi yosh vba apehlichika ya ibafoka kvf moma i shahla hi oke.

5. Mikma kvna hosh vno a hohchifo hatuk mak o vlla ilvppa chohmi achvfa ka ahninchhi hokmvt, vno ak o ahninchhi hoke.

6. Amba kvna hosh a yimmi chipunta yakohmi achvfona

kia ibetvblichi hokmvt, yvmmak ash o ilap ak o tvli tanchi botoli osh ikunla ya atakanli ho, okhvta ahofobi fehna yo ai oka illi hok mak osh im vllhpiesa he tuk mak a hi oke.

7. Nan-isht-ai ibetvbli ak pulla tok mak o yakni vt nan i palvmmi hoke: nana ai ibetvbli okakanto kaniohmi kia ik takalo ka wa: yohmi kia hatak nana ho ai ibetvbli vt isht a tobtv minti hatuk okvno i palvmmi mak oke.

8. Yohmi hoka chibbak okmá, chiyi yokmá, nana hosh chi ibetvblichi hokma, hokofit ish kanchashke; hanali okpulo, keyukmvt imomokpulo yokmá, nana hosh ai okchaya ya ont ish chukowa kak osh ibbak vt tuklo, keyukmvt iyi yvt tuklo, kanima hosh luak ataha iksho ma ish itokvnia he tuk a chim i shahla hi oke.

9. Mikmvt chi nishkin vt chi ibetvblichi hokma, kohchit ish kanchashke; nishkin vt im achvfa hosh aiokchaya ya ont ish chukowa hok mak osh nishkin tuklo hosh aiokpulo-ka luak a ish itokvnia he tuk a chim i shahla hi oke.

10. Ahah! aiahnit chipota vhleha ilvppa achvfona kia hvch ik kanimancho kashke: yvmmak oka im enchil vhleha vba yakni aiasha kv, Aki vba binili ka nashuka ya pisa na bilia lioke, hvchim achi lishke.

11. Hatak Ushi vt okpulot taha yak o okchalinya chi hosh aya hatuk oke.

12. Katiohmi hvsh ahni cho? Hatak vt chukvllhpoba tahlepa achvfa hosh im asha tuk osh, achvfonvt yoshubvt kvnia ka, pokoli chakkali akocha chakkali kash ashachi cha, ivt yoshubvt kvnia tuk a hoyot, nvnihi foka ya hikikia chatuk keyu cho?

13. Atuk osh ahayucha he yoba tuk osh yohmi hokmvt, achvfa yvmma isht a na yukpa kv, yoshubvt ik tvmo ke tuk pokoli chakkali akocha chakkali ka im i shahli chatuk oke, ahli mak o hvchim achi lishke.

14. Yohmi ka chipota vhleha ilvppa achvfona kia okpulot taha hi a, hvch Iki vba binili kv ik ahno kv, yvmmak inli ho chiyuhmi hoka.

15. Yohmi ka ish itibapishi hv nana ka chim ashvchi hokma, ivt chishno, micha ilap hvsh ita tuklo bano ho nana



ai ashvchi tuk a ish im anolashke: chi haponaklo hokma, ish itibapishi hatuk a falaminchit ish im aiyubacha he mak oke.

16. Amba chi haponakla he keyu, yohmi hok mvno, himmakma achvfá, keyukmvt tuklokma, nana ho pehlinchit ish ia na nan anoli tuklo, keyukmvt tuchinakmá nana itih ho anumpa puta mvt isht ai ahlashke.

17. Yohmikma yvmmak atuk ma i haponakla he keyukma, chvch a ish im anolashke: yohmi kia chvch atuk ma i haponakla he keyu hokmvt, yvmmak atuk mvt Chentail hatak, micha pvblikan aiena mak o chim ai itilauashke.

18. Ahli mak o hvchim achi lishke, Nana ho yakni pakna ya hvsh a takchi hoka, vba yakni ma a talakcha he; mikmvt nana ho yakni pakna ya hvsh ai i hotofi hoka, vba yakni ma ai i hotofa he mak oke.

19. Anonti hvsh tuklo hosh nana ka asilhha he imma ho yakni pakna ya hvsh ai it im achvfa hokma, Aki vba binili kvv ai im aiahlichha he mak oke, hvchim achi lishke.

20. Kanimá yo tuklokma, tuchinakma, nana hosh sa hohchifo ha isht ai itvnaha hoka, yvmma ai iklvna hikia li hoka, achi tok.

21. Yohmi ma Pita yvt im ona mvt, Chitokaka ma! itibapishi li hvv katohmi ha yo vm ashvchi ka, i kashofi la hinla cho? untuklo haya hi o? achi tok.

22. Mihma Chisvs vt, Untuklo ha ya hi o ak chim achoshke: amba, Pokoli untuklo bat untukla hi oke, chim achi lishke, im achi tok.

23. Yohmi hoka vba avehlichika yvt miko yosh in tishu vhleha ha aheka i hotihvvt pisa bvna ho chohmi hoke.

24. Atuk osh i hotihvvt ishtia ma, achvfa hosh talent tahlepa sipokni pokoli hosh aheka im asha tuk o, ilauevit im vla tok.

25. Yohmi kia isht atobba hi vt ik im iksho hatuk o, i shahli hash osh yvmvvt, tekchi, micha im vlla vhleha, mikmvt nan im asha tuk moma aiena kvv kvnia na aheka yvt vlvtoha hinla ka apesa tok.

26. Yohmi hatuk o tishu hash osh aka hlipia cha,

aiokpahanchi mvt, Chitokaka ma! is svmi svlaha hokma, mominchit chim atobbi lashke, achi tok.

27. Yohmi ma tishu yvmma i shahli yatuk vt i nukhaklo cha, i hotofi mvt, aheka atuk a i kashofi tok.

28. Yohmi tuk kia tishu yvmmak ash inli kvt kohchvt ia mvt, tishu ilapa ai itilau i vt achvfa hosh, aheka iskvli tahlepa achvfa hosh in takanli hatuk a ont pisa tok: mihmvt yvmmak ash o hoklit ishi cha, nuktihliffi mvt, Aheka chin takali kvt is svm atobbashke, achi tok.

29. Mihma tishu itilau i yatuk ash osh iyi ituma aka ya hlipia cha, Is svmi svlaha hokma, mominchit chim atobbi lashke, achit im asilhha tok.

30. Yohmi kia vlhpesa ik ahno ki tok: amba aheka ya atobbi pulla chi mak o, yvmmak ash o aboha kvllo pit fohki tok.

31. Yohmi ma tishu bika vhleha hvt nana kvt yvmohmi na pisa mvt, okla nukhaklo fehna cha, i vt nana a kaniohmi tuk a mominchit i shahli ha okla ont im anoli tok.

32. Yohmi tok a i shahli hatuk vt yvmmak ash o pit hoyo cha, Tishu haksi chia ma! chishno vt is svm aiahni ma, aheka yvmma mominchit chi kashofi li tuk.

33. Yohmi ka chishno ak kia tishu chi bika ya ish i nukhaklo kvt, vno vt chi nukhaklo li tuk a, ish chiyuhma he tuk keyu cho? im achi tok.

34. Mihmvt i shahli hatuk vt anukhobela mvt, aheka in takanli tuk vt, mominchit atobbi pulla chi mak o, issikkopali vhleha ha im issa tok.

35. Yohmi ka hvhchishno hvhsh moma kvt hvhsh itibapishi nana ai ashvhchi ya hvhchi chvkvsh ak o isht hvhsh i kashofi keyukma, yvmmak inli ho ohmichit Aki vba binili kvt hvhchi yvmihcha he akinli hoke, achi tok.

## CHAPTA XIX.

Falisi vhleha hvt Chisvs a nan im ponaklo ma, Chisvs vt afalaminchi mvt, a hatak vt tekchi iti kvnia ka ik vlhpeso ka miha, 3. 13 Chisvs vt vlla chipunta hoka ibbak a onochi cha, vba isht anum-



puli. 16 Chisvs a hatak himita yosh, Nantak o katiohmi li kak osh ai okchayvt bilia yoka ona la hinla cho? im achi ma, Chisvs vt isht im anumpuli: 23 nan in laua yvt ai okchaya yoka palvmmi ho chukowa he achi: 27 anonti ilap i yimmi ahli vhleha ha yukpala hi vt miha.

1. ATUK o yakohmi tok; Chisvs vt ilvppa puta ka abanchit tahli mvt, Kalili a vttvt ivt, Chatan misha Chutea yakni ai vhli ho ona tok.

2. Mihma okla chito yvt iakaiya tuk o, yvmmak o a hlakofohliehi tok.

3. Mihma Falisi vhleha hak kia im ai vla cha, yvmmak ash o imomaka pisa hosh, Nana hosh a kaniohmi mak inli ho hatak vt tekchi a kancha hi vt im ai vlhpesa hoh cho? im achi tok.

4. Mihma yvmmak ash osh afalaminchi mvt, Ummona hokvno yvmma ikbi hokvt, nakni micha tek itatuklo ho ikbi tok.

5. Mihmvt, Ilvppa pulla hatuk mak o hatak vt iki micha ishki aiena ka issa cha, tekchi ak o it asitia hi oke: yohmikma tuklo yvmmak atuk vt haknip achvfa hi oke; achi tok holisso ha hvch ik it im anumpulo chatuk oh cho?

6. Yohmi hoka yvmmak okvt himmakma tuklo mak a hi o keyu, amba haknip achvfa hoke. Yohmi hoka Chihowa hosh nana ka ita halvlliehi ha ya, hatak vt ik iti filvmmieho kashke, im achi tok.

7. Mihma okla hash osh, Yohmi ka katiohmi ho iti kvnia holisso ha ima cha, ohoyo ha kancha hi a, Moses vt apesa tok oh cho? im achi tok.

8. Mihma, Hvchi chukvsh vt kullo pulla hatuk mak o, hvchi tekchi hvsh kancha hi a, Moses vt hvchim ahni tok: amba vmmona a mihinti kvno yohmi tok keyushke.

9. Yokmi kia vno vt, Kvna hosh tekchi a inla itinlumaka tuk keyu ho, kanchi cha, inla itauwaya hokmvt, haui toba mak oke: mikma ohoyo kanchi tuk ash o kvna hosh itauwayakmvt, haui toba hoke, hvchim achi lishke, im achi tok.

10. Mihma nan im ai ithvna vhleha hash osh, Hatak vt



tekchi a isht im a yakohma hinlakma, itauwaya ka achukma keyushke, im achi tok.

11. Yohmi ma yummak ash osh, Hatak moma kv̄t anum-pa ilv̄ppa aiokpv̄cha he keyu, amba kv̄na hō isht ai im vlhp̄e-sa ak illa hinla hoke.

12. Kanimi kv̄t ishki ikfoka anuka ak inli hō yohmi hosh atobvt v̄tta tuk yunvk vt aśha; mikma kanimi kv̄to hatak osh yunvk ikbi tok o, yunvk vt aśha: yohmi ma kanimi kv̄to v̄ba apehlichika pulla hatuk mak o, ilap inli hosh yunvk il ikbi tok vt, yunvk vt aśha hoka. Kv̄na hosh ilv̄ppa aiokpv̄cha hinlakmvt aiokpv̄chi mak inlashke, im achi tok.

13. Yumma foka ma yummak atukma ibbak a v̄lla chi-punta ya isht umbitepa cha, v̄ba pit anumpula chi ka isht in ai v̄la tok: mihma nan ithv̄na v̄hleha hv̄t okla h̄a im alv̄mmin chi tok.

14. Yohmi kia Chisvs vt, V̄lla chipunta yvt v̄m v̄la hi a hv̄sh im ahni cha, hv̄ch ik im alammo kashke: ilv̄ppa chiyuhmi kak osh v̄ba apehlichika mak oka, achi tok.

15. Mihmvt yummak ash o ibbak a isht umbitepvt tahli mvt, yummak ash a kohev̄t ia tok.

16. Yohmi tuk o achv̄fa hosh ayvt ona mvt, Nan ithv̄nan-chi achukma ma! ai okchayvt bilia yoka pisa la hi v̄to nana achukma nanta hak o yvmohmi la hinla cho? im achi tok.

17. Mihma yummak ash osh, Katiohmi hō achukma is si achi cho? achukma kv̄t iksho hō amba achv̄fa illa, yvmmv̄t Chihowa ak oke: yohmi kia ai okchaya yoka ont ish chukowa he ish ahni hokmvt, nan vlhp̄isa puta mak o ish holitoblashke, im achi tok.

18. Mihma, Katima kak o? im achi ma, Chisus vt, Kv̄na kia chik bo kashke, Chik itinlumako kashke, Chik h̄ukopo kashke, Anumpa ik ahlo isht atokolit chik anto kashke.

19. Chiki micha chishki aiena ka ish holitoblashke: mikmvt, Chin chukapanta hatak a ish holitobli kv̄t, chishno akinli ka chim itilauashke, achi tok.

20. Hatak himita yash osh, V̄lla sa tomba mak inli hosh nana ilv̄ppa moma ka holitoblit isht mihinti li tok mak oke: nanta hosh ik sv̄m ono moma cho? im achi tok.

21. Mihma Chisvs vt, Aiahli kak o ish ahni hokmvt, ia cha nan chim asha ka kampilvt, ilbusha vhleha ha ish i hopelashke; yohmikmvt na holitompa kvvba yakni ya chin tonla he mak oke: mikmvt ish la cha, ant is siakai-yashke, im achi tok.

22. Yohmi kia hatak himita yash osh anumpa yvmma haklo mvt, nan in laua fehna hatuk okvt, nukhlaklo fehna hosh kanvllit ia tok.

23. Yohmi ma Chisvs vt nan im ai ithvna vhleha hash o, Ahli mak o hvchi miha lishke, Hatak nan in laua yvt vba apehlichika ya palvmmi ho chukowa hi oke.

24. Mikma anonti, Kamel vt chofak ushi nishkin a hlo-pulli ka palvmmi kvv, hatak nan in laua yoshi Chihowa apehlichika pit chukowa hokvno, ik lauwo ka he hvchim achi lishke, achi tok.

25. Mihma nan im ai ithvna vhleha hvv okla haklo mvt, nukhlakancha fehna tok: mihmvt, Yohmikma kvvta hosh okchaya hinla cho? achi tok.

26. Yohmi kia Chisvs vt yvmmak ash o atokolit pisa mvt, Hatak okmvno ilvppvt yohma he keyu, amba Chihowa hokmvno nan okluha kvv yohma he bano hoke, im achi tok.

27. Yohmi ma Pita yvt afalaminchi mvt, Yakeh! pishno vt mominchit il issa cha, e chiakaiya tuk; yohmi kvv nanta hak o il isha chi cho? im achi tok.

28. Mihma Chisvs vt, Ahli mak o hvchi miha lishke; Si apehvt hvsh itvnova tuk vt, nan okluha kvv himonvt tobak-ma, Hatak Ushi yvt im aholitopaka ya aiasha holitopa ai om binilikma hvchishno ak kia aiasha holitopa auah tuklo ka hvsh a chieyvt, Islael oklushi auah tuklo ka na hvchim apesa hi oke.

29. Yohmikma chuka puta, mikmvt itibapishi vhleha, micha in tek vhleha, keyukmvt iki okma, ishki okma, tekchi okma, keyukmvt vlla yokma, yakni okma, nana ho sa hoh-chifo pulla hatuk mak o issvt aya tuk vt momvt yvmmak atuk a ohmi tahlepa achvfa ka pisa tuk mvt, anonti ai okchayvt bilia ma iesha he mak oke.

30. Yohmi kia tikba tuk vt ont ishtaiyopa hi vt lauakma, anonti ishtaiyopi atuk vt tikba hi vt asha hi oke.

## CHAPTER XX.

Na pilesa vhleha hvt nitak achvfa ka hvshi kanvlli vllhpisa ilaiyuka ho pakvpi a holokchi ilhkoli tok nan isht vllhpisa. Nan isht vllhpisa ilvppak o Chisvs vt ilap im antia vhleha aiahli ka ai ilaiyukachit im atobba hi vt ai isht apesa, 1. 17 Chisvs vt anonti illa chi kvt tikbanlit anoli; 20 mihma Sebeta ushi ishki vt Chisvs a nan im asillha, mihma afalaminchit i miha. 30 Chisvs vt hatak lva tuklo ho hopokoyochi.

1. UBA apelihchika yvt, hatak chuka-chvfa pehlich osh i pakvpi aholokchi a toksva chi ka, tohna chi hosh onnahinli fehna ia ho, chohmi hoka.

2. Atuk osh yvmmak ash osh ilhtohno vhleha ha nitak achvfa ka iskvli achvfa chi ho it im apesa cha, pakvpi aholokchi a pit tihleli tok.

3. Atuk osh hvshi kanvlli vllhpisa ont atuchina foka ho kohchvt aya mvt, inla yvt nan-isht vtta ik im iksho hosh ilhpak a kanchi a hiohmaya na pisa tok,

4. Mihmvt yvmmak ash o, Hvchishno ak kia pakvpi aholokchi a pit hvsh abehashke; atukma kaniohmi kak osh ai vllhpesakma, hvch ima lashke, im achi na okla ilhkoli tok.

5. Atuk o anonti hvshi kanvlli vllhpisa isht hannali, mikmvt ont isht chakkali aiena ka kohchvt aya mvt, yvmmak ash inli ho chohmichi tok.

6. Atuk osh hvshi kanvlli vllhpisa isht auah achvfa foka ho kohchvt ia mvt, anonti inla yvt nan-isht vtta ik im iksho hosh hiohmaya na pisa cha, Katiohmi ho nan isht vtta ik hvchim iksho hosh hvsh hiohmaya na shoyubi cho? im achi tok.

7. Mihma yvmmak ash osh, Amba hatak nana kia nan ik pi tohno kvo, im achi tok: mihma yvmmak ash o, Hvchishno ak kia pakvpi aholokchi a pit hvsh abeha ak inlashke; atuk ma kaniohmi kak osh ai vllhpiesakma, mih mak o hvsh ishashke, im achi tok.



8. Yvmohmi tuk o ont opivt taha ma, pakvpi aholokchi in talaia atuk ash osh nan im apesvchi ash<sub>o</sub>, Na pilesa vhleha ha i howa cha, vlhtoba ha imá: ishtaiyopi tuk ak o ai ishtia hosh tikba tuk a ont ish tahlashke, im achi tok.

9. Atuk o hvshi kanvlli vlhpisa ont isht auah achvfa foka ho tohno tuk ash o okla ai vla mvt, hatak achvfa kvv iskvli achvfa aiyuka ho ishi tok.

10. Amba tikba tuk vto ai vla mvt, i shahli ho okla isha chi kvv im ahoba tok: atuk o yvmmak ash kia hatak achvfa kvv iskvli achvfa aiyuka ho ishi tok.

11. Micha yvmma okla ishit tahl mvt, chukachvfa pehlich hatak ash o nanumachit maya mvt,

12. Ishtaiyopi tuk yakohmi kvto hvshi kanvlli vlhpisa achvfa illa ho toksvli tuk a pishno nitak lvshpa ho toksvli kvvlo ka isht il ahanta tuk a, ish pi ai itilauechishke, achi tok.

13. Yohmi kia afalaminchi mvt, achvfa ho, A kana ma! nan ik vlhpeso nana ho a chi yvmohmi li keyushke: chishno vt iskvli achvfa hi o il it im apesa tuk keyu?

14. Chimmi mak o ish ishi cha, ish iashke: ishtaiyopi tuk ilvppak kia chishno a it ilauechit ima la chi hoke.

15. Vno vmmi hatuk vt vno nana aiahni li hosh kanimihchi la hi vt vm vlhpesa keyu? vno ak osh si achukma kak o, chi nishkin vt ik vlhpeso hoh cho? achi tok.

16. Yohmi ka yvmmak inli ho chiyuhmit ishtaiyopi tuk vt tikbakma, tikba tuk vt ishtaiyopa hi oke; im annoa hokvto laua; amba vlhtoka kak osh achafoa hoka, achi tok.

17. Atuk osh Chisvs vt Chelusalem a ia hosh aya mvt, takla ya nan im ai ithvna vhleha auah tuklo kash pehlichit naksika isht ona mvt,

18. Inta! Chelusalem a, iloh ivshke; yohmi ka Hatak Ushi ishit na holitompa isht asha pehlich vhleha, mikmvt na holissochi vhleha aiena ka ibbak fohkikma, yvmmak ash osh illa hi a okla im apesa chi hoke.

19. Yohmikma yvmmak atuk ma ishit yopula chi, micha fvmmi, mikmvt ititaiyukhvna ahonvlichit vbi aiena chi

mak o, Chentail okla ha ibbak fohka chi hoke: yohmi tuk kia nitak ont atuchinakma falamvt tana chi hoke, im achi tok.

20. Yohmi ma Sebate ushi vhleha ishki osh ushi a pehlinchit im ona cha, aiokpahanchi kv̄t, nana achvfa ho im asilhha tok.

21. Mihma ohoyo hash o, Nanta hak o ish aiahni hoh cho? im achi ma, yvmmak ash osh, Svso tuklo ilvppvt ish apelihika ya achvft chibbak isht-impakimma ya ont a binilikma, anonti achvfa kv̄t vlhfvbekimma ya asha hi a ish im apesashke, im achi tok.

22. Yohmi kia Chisvs vt afalaminchi mvt, Nana ho hvsh asilhha hokvt hvsh akostinichi keyushke. Hvchishno vt isht-ishko ai ishko la chi, yvma hvsh ai ishka hinla cho? anonti baptismo isht a sa baptismo ka isht hvchi baptisma hinla cho? im achi ma, yvmmak ash osh, Pi yvmohma hinla hoke, im achi tok.

23. Mihma yvmmak ash o, Um isht-ishko yoka hvsh ai ishka chi ho mvhli; mikmvt baptismo isht a sa baptismo ka isht hvchi baptisma chi ho mvhli hoke; yohmi kia svbbak ishtimpakimma, micha vlhfvbekimma aiena aiasha hokvno vno yosh ima la hi o keyu, amba Aki vt kv̄na ho im atahli tok mak illa hi oke, achi tok.

24. Yohmi ma pokoli kash osh haklo mvt, itibapishi tuklo kash o isht ik i yukpo fehna tok.

25. Yohmi kia Chisvs vt yvmmak ash o i howa mvt, Chentail miko vhleha hv̄t ai i shahlit pehlich chatuk, mikma i hochitoka vhleha hv̄t nana im ai vlhpesa hatuk osh im ai yvmihchi chatuk a hvsh ithaiyanvshke.

26. Amba hvchishno yokvno ai yvmohma he keyushke: amba kv̄na hosh ai i shahlit hvch itintakla ya anta bv̄na hokmvt, yvmmak osh hvchin tishu hashke.

27. Mikma kv̄na hosh holitopa i shahli bv̄na hosh hvchi itintakla ahantakmvt, yvmmak osh nan isht hvchim vta yashke.

28. Hatak Ushi vt ilapo ak o nan isht im vta chi ho aya ha tok keyu: amba nan isht vta chi, mikmvt laua ho ilap



im ilhfiopak a isht chumpa chi aiena hosh aya tok a, mih mak o hvsh chiyuhmashke, achi tok.

29. Yohmi ma Cheliko a asht ilhkoli ma, okla laua fehna kvv yvmmak ash o iakaiya tok.

30. Atuk o hatak lupa tuklo kvv hina lapalika yo chiya tuk osh, Chisvs vt ont ia ho haklo mvt, pit tahpvlvt, Chitokaka Lewi ushi chia ma! ish pi nukhaklashke, achi tok.

31. Yohmi ma okla laua yash osh, yvmmvv nukchinta chi ka, im alvmmi tok; yohmi kia yvmmak o i shahlichit tahpvlvt, Ish pi nukhaklashke, Chitokaka Lewi ushi chia ma! achi tok.

32. Mihma Chisvs vt lumvt hikia cha, yvmmak ash o pit i howa mvt, Nanta hak o a hvchi katimichi la he a hvsh aiahni cho? achi ma,

33. Pi nishkin vt fatuma he ak oke, Chitokaka ma! im achit okla tok.

34. Yohmi ma Chisvs vt i nukhaklo cha, nishkin ash pit potoli tok: yohmi ma mih mak inli ho nishkin ashot fala-mvt pisa ma, yvmmak ash o iakaiyvt okla tok.

CHAPTA XXI.

Chisvs vt kanihmi hosh Chelusalem a chukowa, 1; 12 anonti nachumpa vhleha, micha na-kanchi vhleha aiena ka tempel a a kocha weli. 18 Micha iti vlhpoba fik achi nan ik vno a brshit illa he im ahni; mikmvt na yimmi micha anumpa ilvrsha anumpuli aiena ka nan isht im aiahli ka ya-pim anoli. 23 Kanimi kvv nan isht ai vlhpesa nana ho isht ai yvmohmi hatuk a a ponaklo tuk kia, yvmmak ash o Chisvs vt im a tvblich, 28 micha hatak ushi tuklo, 33 micha na-pilesa vhleha pakvpi a holokchi i pota tuk nan isht apesa hosh Chu okla nan im ai ashvchi a isht otrnichi.

1. YUMOHMI tuk o Chelusalem pit bilika okla onvt Alif nvnih Betfachi ak o ai ona ma, Chisvs vt nan ithvna tuklo ho pit tihleli tok.

2. Mihmvt, Tvmahushi hvchi chapaka auct talaia ka hvsh onashke; yokmikmvt mih mak inli ho issuba hakso-bish falaia ushi ilauei kvv asinta ho hvsh pisa chi hoke: yvmma hvsh i hotofi cha, isht hvs svm vlashke.



3. Micha kvna kia nana ka hvchim achi hokma, Chitoka-ka yak osh bvna hatuk oke, hvsh im achashke: yohmikma mih mak inli ho auct pila chi hoke, im achi tok.

4, 5. Hopaii vt anumpohonlit, Saion ushetik a, yakeh! chi miko chukvsh yohbi achukma, issuba haksobish falaia a toba tok issubushi haksobish falaia yo om binili hosh ayvt chim vlvshke, hvsh im achashke, achi tok a ont aiahla chi mak o ilvppa moma kvv a yakohmi tok.

6. Mihma nan ithvna yash osh itiachi mvt, Chisvs vt i miha tuk mak o ont yvmohmit okla tok.

7. Micha issuba haksobish falaia, mikmvt ushi aiena kash o isht vla ma, im ilefoka ya om pullit tahli cha, yvmmak ash o okla om binilichi tok.

8. Yohmi ma okla chinto fehna hosh hina ya im anchi a okla pulli tok; kanimi mvto iti naksish o vmot hina ya pulli tok.

9. Yohmi ma okla chito tikba itvnowa tuk, mikmvt iakai-ya aiena kash osh, tahpvvt, Lewi Ushi a Hosanna im ahanchashke. Chitokaka i hohchifo ho il ai eshi hosh aya hokvt holitopa mak oke. Shutik tvbokaka fehna ma, Hosanna ai ahanchashke, achi tok.

10. Atuk o Chelusalem a ant chukowa ma, tvmaha hash osh momvt nukhlakanacha mvt, Ilvppvt kvta hoh cho? achi tok.

11. Mihma okla laua yash osh, Ilvppak osh Kalili yakni Nasalet a i hopaii Chisvs mak oke, achi tok.

12. Yohmi ma Chisvs vt ivt Chihowa in tempel a ont chukowa mvt, tempel anukaka ya nana a kanchi, micha a chumpa aiena maya tuk ash mominchit kocha pit tihleli mvt, ai impa tvli holisso ai itatoba puta, mikmvt pvchi vlpoba akanchi abinohli aiena kash halvllit filemohlit kinahli-chi tok.

13. Mihmvt, Um aboha hvv vba pit ai anumpuli chuka yo hohchifa he, achi hosh holisso tok; yohmi kia hvchish-no vto na-hukopa vhleha in chuka yo hvsh ikbishke, im achi tok.

14. Mihma lvpa, micha hanali okpulo puta kvv tempel anukaka ya im ai vla ma, yvmmak oka hlakofichi tok.

15. Mihma na holitompa isht asha pehlich i vhleha, mi-cha na holissochi okla aiena kv̄t, yvmm̄vt na fehna puta ka yvmihchi, mikma tempel anukaka ya vlla vt Lewi Ushi a Hosanna im ahanchashke, achi aiena ka pisa mvt, okla isht ik i yukpo fehna tok.

16. Mihm̄vt yvmmak ash o, Ilvppvt nana achit maya ka ish haklo cho? im achi tok; Mihma Chisvs vt, Yau, vlōsi mikm̄vt pishi puta itih h̄a Chihowa hv̄t a holitopa he ish apesa tok achi holisso ka, himonna kia hv̄ch ik it im anum-pulo chatuk oh cho? im achi tok.

17. Mihm̄vt yvmmak ash o issvt tm̄maha a kohchvt ia mvt, Betani a ona cha, yvmmak o ont nusi tok.

18. Atuk osh onnahinli ma fal̄amvt tm̄maha ia hosh aya mvt, hohchvfo tok.

19. Micha fik vpi vt tikba ya hikia na pit pisa mvt, yvmmak ash o ona; yohmi kia nana kia takanli na ik ahayucho; amba hishi ak illa tok; mihm̄vt, Himak a pilla ma nitak nana vni yvt ik chi a tobo kashke, im achi tok. Mihma chekosi mak inli h̄o fik vpi vt bvshit taha tok.

20. Yohmi ma nan ithvna yvt pisa cha, okla okokko! aiahni mvt, Chekosi fehna h̄o fik vpi vt bvshit taha chá, achi tok.

21. Mihma Chisvs vt afalaminchi mvt, Ahli mak o hv̄chi miha lishke, Na yimmi kv̄t hv̄chi anukfoyuka, miha ik hv̄chi nukwiyo hokm̄vt, fik vpi nana a kanimihchi ilvppak bano h̄o hv̄sh yvmihcha hi o keyu, amba, Nv̄nih chaha ilvppa kanvllit ivt okhv̄ta hak o pit ish okvtulashke, hv̄sh im achi aienakma, yvmohma hinla hoke.

22. Micha hv̄chi yimmi hosh nan-okluha ka nana h̄o anumpa ilbvsha isht hv̄sh asilh̄a hokvt, hv̄sh isha hi oke, im achi tok.

23. Atuk osh tempel a ona cha, nan ithvnanchi hosh ahanta ma, na holitompa isht asha pehlich i vhleha, mikm̄vt okla i hochitoka vhleha aiena kv̄t im ai v̄la cha, Nan isht ai v̄lhpesa nanta mak o ilvppa puta ka isht ish yakohmichi cho? miha kv̄ta hosh nan isht ai v̄lhpesa ilvppa chima tok oh cho? achi tok.



24. Mihma Chisvs vt afalaminchi mvt, Uño ak kia nan achufa ka a hvchim asilhhvchi lashke; yvmmak o hvş svn anoli hokma, vno vt yvmmak inli hō chohmit nan isht ai vhpesa nana hō ilvppa puta ka ishit yakohmichi li hatuk vt hvchim anoli lashke.

25. Chan i baptismo vt katimak o a minti ha tok oh cho? vba yakni okmá, hatak okmá, nanta ha tok oh cho? im achi tok. Yohmi ma, Uba yak o minti ha tok: il achi hokma, Yohmi kak o katiohmi hō yvmma hvch ik i yimmo ke tok oh cho? pim acha hinlvshke.

26. Yohmi kia moma kvť Chan a hopaii o okla ahni hatuk oka, Hatak ak a tok: achi kvť okla hā il i nukshopvshke, achit ilap bika it im anumpulit maya tok.

27. Micha Chisvs ash o im afalaminchi mvt, Kil ithanoshke, im achi tok. Mihma yvmmak ash osh, Yohmi ka vno ak osh nan isht ai vhpesa nana hō ilvppa puta ka isht yakohmichi li hatuk vt ak hvchim anoloshke, achi tok.

28. Yohmi kia katiohmi hō hvsh ahni cho? <sup>or an certain</sup> Hatak achvia <sup>he</sup> hosh <sup>so it was</sup> ushi vt in tuklo tok; atuk osh tikba yash o, Svso ma! himak nitak a a pakvpi a holokechi a ont ish toksvlashke, ont im achi tok.

29. Mihma afalaminchi mvt, Yohmi la he ak ahnoshke, achi tok: yohmi tuk kia i himmakma inlanchit anukfilli cha, ia tok.

30. Yohmi mā anonti atukla kash yvmmak inli chohmi ka ont i miha tok. Mihma afalaminchi mvt, Ia lashke, a shahli ma! achi; yohmi tuk kia ik aiyo ki tok.

31. Tuklo yvmvť katimampo kak osh iki nan aiahni tuk a yvmohmi tok oh cho? im achi tok. Mihma, Tikba yatuk á, im achi tok. Mihma Chisvs vt, Ahli mak o hvchim achi lishke, Pvblikan vhleha, micha hauí puta kvť hvchi tikba Chihowa apehlichika ya pit abehiha hoke.

32. Chan vt ai vhpiesa ataya mak osh hvchim vla ka, yvmma hvch ik i yimmo tok: yohmi kia pvblikan vhleha, micha hauí puta kvťo i yimmi tok: mihma hvchishno vt yvmmak atuk ma hvsh pisa ha yvt, yvmma hvchi yimma hi vt i himmak a inlanchit hvch ik anukfillo tok, im achi tok.



33. Nan isht v<sub>h</sub>lpisa inla ka h<sub>h</sub>sh haklashke; Hatak chuka-ch<sub>h</sub>fa pehlich<sub>i</sub> ach<sub>h</sub>fa hosh pak<sub>v</sub>pi a hokchit tahli cha, k<sub>v</sub>ti apushi isht a holit<sub>v</sub>chit apakfobli m<sub>v</sub>t, oka-paki ai v<sub>h</sub>to a y<sub>v</sub>mma an<sub>u</sub>kaka y<sub>a</sub> a kulli cha, chuka chaha y<sub>a</sub> ikbit tahli m<sub>v</sub>t, hatak na pilesa v<sub>h</sub>leha h<sub>o</sub> pota cha, yakni hopaki h<sub>o</sub> ia tok.

34. Atuk osh nan v<sub>n</sub>i waya ai on<sub>a</sub>-hosi ma, y<sub>v</sub>mmak ash v<sub>n</sub>i waya ka ont isha ch<sub>i</sub> h<sub>o</sub>, in tishu v<sub>h</sub>leha h<sub>a</sub> hatak na pilesa v<sub>h</sub>leha hash pit in tihleli tok.

35. Atuk o hatak na pilesa v<sub>h</sub>leha h<sub>v</sub>t in tishu v<sub>h</sub>leha hash o hoklit ishi cha, ach<sub>h</sub>fa ka boli m<sub>v</sub>t, anonti ach<sub>h</sub>fa ka v<sub>b</sub>i cha, anonti ach<sub>h</sub>fa ka t<sub>v</sub>li isht boli tok.

36. Atuk o anonti inla laua k<sub>v</sub>t tikba atuk a i shahli h<sub>o</sub> pit tihleli tok: y<sub>v</sub>mmak ash kia y<sub>v</sub>mmak atuk mak inli h<sub>o</sub> okla itilauechi tok.

37. Yohmi kia ont ishtaiyopi fehna ma, S<sub>v</sub>so h<sub>a</sub> holitobla ch<sub>i</sub> hoke, achi m<sub>v</sub>t, ushi ak o pit i pila tok.

38. Yohmi tuk kia hatak na pilesa v<sub>h</sub>leha hash osh ushi ash o pisa m<sub>v</sub>t, il<sub>v</sub>ppak osh immi mak oke: kiloh v<sub>b</sub>i cha, immi yatuk a kiloh ai ishi, ilap bika it im achi tok.

39. Mihm<sub>v</sub>t y<sub>v</sub>mmak ash o okla it<sub>i</sub> hoklit pak<sub>v</sub>pi a holokchi a ishit a kohechi cha, v<sub>b</sub>i tok oke.

40. Yohmi ka pak<sub>v</sub>pi a holokchi immi atuk v<sub>t</sub> onak-m<sub>v</sub>t, hatak na pilesa v<sub>h</sub>leha y<sub>v</sub>mmak atuk a nanta hak o katimihech<sub>a</sub> hinla cho? im achi tok.

41. Yohmi ma, Hatak haksi v<sub>h</sub>leha y<sub>v</sub>mmak atuk ma issikkopalit t<sub>v</sub>moli cha, pak<sub>v</sub>pi a holokchi yash hatak na pilesa v<sub>h</sub>leha inla y<sub>v</sub>to ont ai v<sub>h</sub>lpiesakma na waya ka ih<sub>i</sub>ma he fehna h<sub>o</sub>, i pota he mak oke, im achi tok.

42. Mihma Chis<sub>v</sub>s v<sub>t</sub>, T<sub>v</sub>li y<sub>v</sub>mma chuk-ikbi v<sub>h</sub>leha h<sub>v</sub>t shitilema yash o, y<sub>v</sub>mmak ash fehna hosh chukbika nutaka in tola holitopa i shahli h<sub>o</sub> tob<sub>v</sub>shke: il<sub>v</sub>ppa Chihowa hosh y<sub>v</sub>mihchi h<sub>o</sub>, pi nishkin a i na fehn<sub>v</sub>shke, achi ka Baibil a himonna kia h<sub>v</sub>ch ik ai it im anumpulo chatuk oh cho?

43. Yohmi hoka Chihowa apehlichika y<sub>a</sub> mokofit h<sub>v</sub>ch<sub>i</sub>m ai ishi cha, y<sub>v</sub>mmak atuk ma isht a waya he fehna oklushi o ima he mak oke, h<sub>v</sub>ch<sub>i</sub>m achi lishke.

44. Micha kvna hosh tvli ilvppa onvtulakmvt, litoa he ; amba ilap ak osh kvna hō onvtula hokmvt, botolichit kan-cha hi oke, im achi tok.

45. Mihma na holitompa isht asha pehlichi vhleha micha Falisi vhleha aiena kvt, yvmmvt nan isht apesa ka haklot tahli mvt, yvmmvt ilap ak o isht anumpuli hatuk a okla akostininchi tok.

46. Yohmi kia yvmmak oka hopaii ak o okla ahni hatuk oka, yvmmak ash o iti hoklit ishi bvna tuk kia okla chito ak o i nukshopa tok.

## CHAPTA XXII.

Itauwayachi ai impa he tok ik itvnahe ki tok nan isht vlhpisa, 1 ; 12 ai itauwaya aya he i nafohka ya ik fohko hosh i palvmma he im vlhpisa ; 15 Chisvs vt Falisi vhleha, micha Helotian okla aiena kvt Sesa ya tvli holisso im itahobi ka vlhpesa chishba, ahnit i ponaklo, mihma Chisvs vt afalaminchit nana i miha. 23 Chisvs vt Satusi vhleha hvt illi yvt falamvt tana hi oka ik yimmo chatuk a isht anumpuli ; 34 nan vlhpisa chinto moma i shahli, 41 kaniohmi kak osh Klaist vt Lewi in Chitokaka yvt, anonti Lewi ushi ahinla ka, Chisvs vt a ponaklo.

1. **MIHMA** Chisvs vt anonti nan isht vlhpisa hō isht im anumpulit,

2. Ūba apehlichika vt hatak miko yosh ushi ohoyo itauwaya chi hō, impa im atahli hō chohmi hoke.

3. Micha im annoa tuk vhleha hā ont i howvt itauwaya ai impa ka isht vla chi hō, in tishu vhleha hā pit tihleli tok ; yohmi kia okla minta hi a ik ahno ki tok.

4. Mihma anonti tishu inla yo pit tihleli mvt, Inta ! an tvbokoli impa hā atahli lishke ; a wak-hobuk, micha nana vlhpitvt nia puta kvt illi ma, nan okluha kvt vllitahvshke ; itauwaya ai impa ka hvsh mintashke, achit im annoa tuk vhleha hā hvsh im anolashke, im achi tok.

5. Yohmi tok kia yvmmak ash o nan-isht ik ahno hosh kanima pit ilhkolit, achvft im osapa ia ma, anonti achvft im ai itatoba ia tok.

6. Yohmi ma akashampa kvto in tishu vhleha hatuk ash iti hoklit ishi cha, kanimanchi fehnvt, polaka okla illichitok.

7. Atuk o miko vt yvmmak ash o haklo mvt, anukshomunta fehna tok: mihmvt in tvshka chipota laua ka pit tihlelit, hatak vbi vhleha yvmmak ash o vbit tahli mvt, in tmaha ha hukmit tahli tok.

8. Yohmi mvt in tishu vhleha hash o, Itauwaya ai impa hamo vlhtahvshke; yohmi kia im annoa tuk vhleha hash osh ahalaia hi o keyu tuk oke.

9. Yohmi hoka hina ai itafamoa puta ka itvnowvt, laua kv kaniohmi ho hvsh pisakmvt, moyumvt itauwaya ai impa ka aya he hvsh im anolashke, im achi tok.

10. Yohmi ma tishu vhleha yvmmak ash osh ilhkoli mvt, hina ai itafamoa puta ka itvnowvt, okpulo, mikmvt hochukma aiena laua kv kaniohmi ho pisa mvt, mominchit hoyot itahobi tok: yohmi ma itauwaya ai impa yash osh im annoa tuk vhleha ha isht alotvt kvnia tok.

11. Atuk o im annoa tuk vhleha hash pisa chi hosh miko vt ant chukowa mvt, hatak vt ai itauwaya aya he i nafohka ya ik fohko hosh yvmma asha na pisa tok.

12. Micha yvmmak ash o, A kana ma! katiohmi ho ai itauwaya aya he i nafohka vt iksho ho ilvppa ant ish chukowa tuk oh cho? im achi tok. Mihma yvmmak ash osh nan ik acho ki tok.

13. Yohmi ma miko vt in tishu vhleha hash o, Ilvppa ibbak, mikmvt iyi aiena ka ho takchi cha, isht ivt kocha aiokhlilika ya ont hvsh kanchashke: yvmmak oka yahaya, mikmvt noti ahampa aiena mak osh aiasha hi oke, im achi tok.

14. Im annoa hokvto laua kia, amba vlhtoka kak osh achafoa hoka, achi tok.

15. Yvmma foka ma Falisi vhleha hv ilhkoli mvt, kanihmit yvmmak ash ilap im anumpa ho isht a yukacha hinla kv isht anumpulit maya tok.

16. Mihmvt ilap nan im ai ithvna vhleha ha, Helotian iksa ai itapeha ho pit in tihleli mvt, Nan ithvnanchi ma!



chishno vt aialli chia achukma chatuk; mikmt Chihowa i hina aialli mak o ish ithvnanchi chatuk, hatak nana kia nan isht ik chim ahobo chatuk; mikmt hatak vt chim it i shashohli keyu chatuk a il ithaiyanvshke.

17. Yohmi hokvt kaniohmi ho chim anukfila hokmt ish pim anolashke: noshkobo isht chumpa tvli holisso a Sesa yak o ima he ai vlhpesa hokma, keyukma, nanta cho? pit achi tok.

18. Yohmi kia yvmmt im anukfila ai vlhpesa keyu atuk a, Chisvs vt akostinichi mt, Katiohmi ho nan ilahobi vhleha hvchia hvt imomaka hvs sa pesa cho?

19. Noshkobo isht chumpa tvli holisso a ho ha haiakvchi, achi tok. Mihma iskvli achvfa ho okla isht im vla tok.

20. Mihma yvmmak ash o, Ilvppvt kvta hak o holvt toba ho, mikmt kvta ho a hohchifo ho? im achi ma,

21. Sesa yak oke, okla im achi tok. Yohmi ma yvmmak ash osh, Yohmi hoka nana kvv Sesa yak o immi hokma, Sesa yak o hvsh imashke: mikmt nana kvv Chihowa yak o immi hokmno, Chihowa yak ashke, im achi tok.

22. Yohmi ma okla haklo mt nukhlakanha cha, yvmmak ash o issvt, okla ilhkoli tok.

23. Mih nitak mak inli ka Satusi vhleha hvt, illi yvt falamt tana he keyu, achi chatuk osh im ai vla cha, ant i ponaklot,

24. Nan ithvnanchi ma! Hatak vt vlla yvt ik im iksho hosh illi hokma, nakfish vt tekchi atuk a itauwaya cha, itibapishi hatuk a vlla isht im ai ikbashke, Moses vt achi tok.

25. Yohmi tuk o itibapishi hvt untuklo hosh pitintakla ya maya tok: atuk o akni hash osh ohoyo itauwaya tuk osh illi tok: mihmt vlla yvt ik im iksho hatuk okvt, tekchi atuk a nakfish ak o im a tosholichi tok.

26. Atuk o atukla kak osh yohmi ak inli tuk o, anonti ont atuchina kvv mihinli ma, mahaya mt isht untuklo kash osh yohmi tok.

27. Atuk o ont ishtaiyopi fehna ma, ohoyo hash kia illi ak inli tok.

28. Yohmi ka ymma momvt okla itauwaya tok oka, illi yvt falamvt tani kano, untuklo ka katima mak o tekchi mak a hi oh cho? achi tok.

29. Mihma Chisvs vt afalaminchi mvt, Baibil, mikmvt Chihowa nan im aiahli aiena ka hvch ik ithano hatuk osh hvsh ashvchishke.

30. Illi yvt falamvt tani hokvt okla itauwaya he keyu mvt, anonti itauwaya he im vlhpisa he keyu, amba Chihowa im enchil vhleha vba aiasha kak o, chiyuhma hi oke.

31. Amba illi yvt falamvt tana he ymmak okvno, Chihowa hvv hvchim anumpohonli mvt,

32. Uno ak osh Eblaham in Chihowa sia, mikmvt Aisaak in Chihowa sia, micha Chekob aiena ka in Chihowa sia hoke, achi tok holisso ka hvch ik it im anumpolo chatuk oh cho? Chihowa hvv illi ak o in Chihowa keyu, amba okchaya ak oke, im achi tok.

33. Yohmi ma okla laua yvt ilvppa haklo mvt, nan isht ai ithvnanchi ka anukhlakancha tok.

34. Amba Falisi vhleha hokvto, ymmak ash osh Satusi vhleha ha nana acha he keyuchi tok a haklo mvt, okla itahoba tok.

35. Yohmi ma achvfa hosh ymmvt vba nan vlhpisa ithvnanchi yosh, imomaka pisa hosh nan i ponaklot.

36. Nan ithvnanchi ma! vba nan vlhpisa katima kak osh nan vlhpisa holitopa kvv moma i shahli cho? achi tok.

37. Mihma Chisvs vt, Chitokaka chin Chihowa hoka chi chukvsh a mominchit, mikmvt chi shilombish a mominchit, anonti chim anukfila ha mominchit isht ish holitoblashke;

38. Achi ilvppak osh nan vlhpisa in tikba, mikmvt moma i shahli mak oke.

39. Mikma atukla kvv ymmak inli ho chohmi hoke; Chin chuka-panta hatak a ish holitobli kvv chishno ak inli chim itilauashke, achi kak oke.

40. Nan vlhpisa tuklo ilvppak o nan vlhpisa moma, micha hopaii holissochi tok aiena kvv a shaiyahli hoke, im achi tok.

41. Falisi vhleha hvt itvnahvt chiya takla ma, Chisvs vt i ponaklot,

42. Klaist a katiohmi isht hvchim anukfila cho? yvmmvt kvta hak o ushi o? achi ma, Lewi ak o ushi oke, okla im achi tok.

43. Mihma yvmmak ash osh, Yohmi ka katiohmi ho Lewi vt Shilombish isht anukfoyuka mvt, yvmmak oka hochifo cha,

44. Chitokaka yvt an Chitokaka ya, Svbbak ishtimpak-imma ya ish binili na chin tvnvp vhleha chiyi ai o hikia yo ikbi lashke, im achi tok oh cho?

45. Yohmi ka Lewi vt yvmmak oka Chitokaka hochifo tok okma, anonti yvmmvt katiohmi hosh ushi ahinla cho? im achi tok.

46. Yohmi ma hatak nana hosh yvmmak ash o anumpa achvfa kia im afalamincha hinla kvv iksho ma, anonti nitak yvmma ai vhlit mihinti ka himmakma hatak nana kia ik nukwiyo hosh nan im ai asilhhvchi kvv iksho ki tok.

### CHAPTA XXIII.

Chisvs vt nan im ai ithvna vhleha hvt na holissochi micha Falisi aiena kvv nana isht ithvnanchi kvno im antia he, amba nana a kaniohmi yokvno okla ik-iakaiyo ka hi a im apesa, 1. 13 Chisvs vt na holissochi micha Falisi vhleha aiena kvv im a yvmohma he vllpesa hoka, na palvmmi kvv onvtula chi ka tikbanli anoli, 37 na palvmmi kvv ai imma tikeli ka ithana hatuk osh Chelusalem a Chisvs vt isht yaiya.

1. YUMMA foka ma Chisvs vt okla chinto; mikmvt ilap nan im ai ithvna vhleha aiena kash o im anumpuli mvt,

2. Na holissochi vhleha, micha Falisi vhleha aiena kvv Moses im aiasha ya chieyvshke.

3. Yohmi hoka nan oklyha puta ka nana ho hvsh holitobla hi a hvchi miha hokma, yvmmak atuk ma holitoblit a hvchi yvmohmashke: amba okla nana a kaniohmi hokvno hvch ik holbo kashke: yvmmak okvt anumpuli tuk kia yohmi keyu hoka.

4. Shapoh weki shali ka palvmma hinla ho takchit talli



cha, hatak puta tahchi ma onochi hoka : yohmi kia ilap ak inli kvto yvmmak oka ibbak ushi achvfona kia pit isht kanvlichia hi a okla ahni keyu hoke.

5. Amba nana a kaniohmi puta kv, hatak vt pisa chi kak o, yvmohmi hoke : i failaktili ya okla hopvkvlli mv, anonti im anchi aposhokvchi ma hofalohli chatuk,

6. Mikmv impa asha ka aiasha holitopa i shahli puta kak o im ai achukmakmv, anonti sinikak puta anukaka ma ai-o-minili holitopa i shahli puta kak o im ai achukma chatuk,

7. Mikmv ilhpak a kanchi ai it aiokpvchi, micha hatak puta kv Labai, Labai, im achi aiena kak o im ai achukma chatuk oke.

8. Yohmi kia hvchishno yokvto Labai ik hvchi hohchifo kashke ; hvch i shahli hvto achvfa, yvmmv Klaist ak oke. Yohmikma hvsh moyuma kvto itibapishi hvchia hoke.

9. Micha yakni paknaka ya hatak nana kia hvch iki hvch ik hohchifo kashke : achvfa hosh hvchi Iki okvto vba yak o binili hoka.

10. Micha i shahli vhleha ik hvchi hohchifo kashke : achvfa hosh hvch I shahli, yvmmv Klaist ak oke.

11. Amba kvna hosh moma i shahli kv hvch ibafoka hokmv, hvchin tishu mak a hi oke.

12. Mikma kvna hosh ilefehnvchi hokmv, aka ona he ; mikma ile akanlosechi hokmv, holitopa he oke, im achi tok.

13. Amba na holissochi vhleha, micha Falisi vhleha, nan ilahobi hvchia ma ! na hvchi palvmma he mak oke : vba apehlichika ya hatak inla puta ka hvsh im okhishta hokv : mikmv hvchishno vt yvmma pit hvch ik abeho mv, anonti pit abeha he tuk a, ant ik abeha hvch ik im ahnoshke.

14. Na holissochi vhleha, micha Falisi vhleha, nan ilahobi hvchia ma ! na hvchi palvmma he mak oke : ohoyo i hatak illi in chuka puta ka wehpulit hvsh tahli, mikmv peh ilahobi kv vba pit anumpuli hosh hvsh falaiachi hoka : yohmi hokv na palvmmi chito i shahli hosh hvchim vlhpisa hi oke.

15. Na holissochi vhleha, mikmv Falisi vhleha, nan ilahobi hvchia ma ! na hvchi palvmma he mak oke ; na hv-

chim ai ithvna achvfa kia ikbi hvchi bvna kv̄t, okhvta mi-  
cha yakni aiena ka hvsh vlhfullihinchi hoka: atuk o yvm-  
mak ash osh tobakma, anonti aiokpulōka im vlla fehna kv̄t  
lvchishno a cholimi tuklo ho hvsh ikbi hoke.

16. Kvna hosh anumpa kv̄llo a tempel ak o isht ai a miha  
hokvno nana keyu; amba kvna hosh tvli holisso lakna tem-  
pel anukaka asha kak o anumpa kv̄llo isht ai a miha hok-  
mvt, nan il aiahlich̄a he vlhpesa, hvsh achi, na pehlich̄i  
lvpa hvchia ma! na hvch̄i palvmma he mak oke.

17. Nan im anukfila iksho, micha lvpa aiena hvchia ho-  
ka, tvli holisso lakna yak okmá, keyukmvt tempel a tvli ho-  
lisso lakna yvt isht a holitopa kak okmá, nanta hosh i shahli  
ho?

18. Micha kvna hosh anumpa kv̄llo a alta yak o isht ai  
a miha hokvno nana keyu; amba kvna hosh vba pit isht  
aiokpv̄chi vt yvmma pakna onvtonla kak o, nan il aiahlich̄a  
he vlhpesa, hvsh achi.

19. Nan im anukfila iksho, micha lvpa aiena hvchia ma!  
vba pit isht aiokpv̄chi ak okmá, keyukmvt alta ya vba pit  
isht aiokpv̄chi vt isht a holitopa kak okmá, nanta hosh i  
shahli ho?

20. Yohmi hoka kvna hos̄i anumpa kv̄llo a alta yak o  
isht ai a miha hokmvt, yvmmak ash o, micha nana hosh  
yvmma onvtonla ka mominchit anumpa kv̄llo a isht ai a  
miha hoke.

21. Micha kvna hosh anumpa kv̄llo a tempel ak o isht ai  
a miha hokmvt, yvmmak ash o, micha yvmma anukaka ai  
asha aiena kak o anumpa kv̄llo a isht ai a miha hoke.

22. Yohmikma kvna hosh anumpa kv̄llo a vba yak o isht  
ai a miha hokmvt, Chihowa im aiasha, micha yvmma om bi-  
nili hatuk ma aieninchit anumpa kv̄llo a isht ai a miha hoke.

23. Na holissochi vhleha, micha Falisi vhleha, nan ilaho-  
bi hvchia ma! na hvch̄i palvmma he mak oke: mint, mik-  
mvt anise, micha kummin aiena kv̄t ont isht pokoli kash osh  
hvch̄i kvnia hoka; yohmi mvt nan vlhpisa kv̄llo i shahli,  
nana ai vlhpiesa, micha nana i nukhaklo, mikmvt na yimmi  
aiena hokvno hvsh a haksichishke: ilvppa puta hoka hvchi



yvmohma he vllhpesa hatuk, yohmikmvt yummak ash kia hvsh a haksicha he tuk keyu hoke.

24. Na pehlichu lpa ma! shushi ya hoiyvchit hvsh kohchi tuk osh, kamel okvno ishit hvsh nanvbli hoke.

25. Na holissochi vhleha, micha Falisi vhleha, nan ilahobi hvchia ma! na hvchi palvmma he mak oke: isht-ishko micha ampo aiena ka paknaka yokvno hvsh kashofi hoka; yohmi kia anukaka yokvto na wehpuli micha nan ik vllhpeso aiena hosh isht alotowa hoke.

26. Falisi lpa chia ma! isht-ishko ampo aiena ka anukaka yak o tikba ish kashofi ha yo, paknaka yokak heto kashofa mak inlashke.

27. Na holissochi vhleha, micha Falisi vhleha, nan ilahobi hvchia ma! na hvchi palvmma he mak oke: sepulka tohbit vltaha yak o hvsh chiyuhmi hoka; yummak okvt paknaka yokvto pisa ka aiokli fehna ho mvhli chatuk; yohmi kia anukaka yokvto hatak illi foni, micha nan liteha okpulo moma kvv isht alotowa chatuk oke.

28. Yohmi ka hvchishno ak kia paknanli vt vllhpiesa ho hatak a hvsh im ahoba; yohmi kia anukaka yokvto nan ilahobi, micha nan ik vllhpieso aiena bano hosh ishit hvchi alotowa kvv, yummak inli ho hvsh chiyuhmi hoke.

29. Na holissochi vhleha, micha Falisi vhleha, nan ilahobi hvchia ma! na hvchi palvmma he mak oke: hopaii vhleha, i sepulka ya hvsh im ikbi mvt, anonti hopoyuksa vhleha ha tok isht ithaiyana he sepulka ya hvsh aioklichi chatuk,

30. Mihmvt, Pin tikba vhleha aiasha nitak ak o il ashwa tok mak osh, hopaii puta im issish hlatvbli ka il ibatakla he tok keyu, hvsh achishke.

31. Yohmi hatuk osh hopaii puta vbi tok vhleha ha in chipota hvchia hatuk vt, hvchishno inli kak osh hvsh il ai atokolishke.

32. Yohmi hokvt hvchin tikba vhleha nan isht im vllhpisa ya hvsh alotolashke.

33. Sinti hvchia, sinti chilita isht unchululi hvchia hvv, katiohmi kak osh aiokpuloka ai ilbvsha he vllhpisa ya hvsh i hlakofa hinla cho?



34. Yohmi hoka, Yakeh! hopaii vhleha, micha hatak hopoyuksa vhleha, mikmvt na holissochi vhleha aiena ka pit hvchin tihleli lishke; yohmi ka kanimi ka hvsh ba he, mikmvt, iti-taiyukhvna hvsh a honahlichy aiena he; mikmvt kanimi ma hvchi sinakak puta hvsh a fvmmikmvt, hvsh ilbvshachi kvt tmaha puta ma isht hvsh aya hi oke.

35. Yohmi hokvt hvchishno ak o hopoyuksa puta im issish yakni pakna a hlatahampa tok, hatak hopoyuksa Ebel a im issish a tok ai vhlit mihintit, Sakalias, Balakias ushi, yvmma tempel, micha alta aiena itintakla ya hvsh ai vbi tok im issish ant ai vhli kvt, momvt hvchi onvtula hi oke.

36. Ahli mak o hvchim achi lishke, Ilvppa moyuma kak osh okla himonasi ilvppa asha ka onvtula he mak oke.

37. Chelusalem, Chelusalem, hopaii vhleha vbi, micha auet chi kanchi tuk ma tvli ishit boli chia ma! akaka yosh ushi vhleha ha sinahchi nuta ya pit ai itahobi chatuk mak o, chiyuhmit chim vlla vhleha ha itahombi la he ahni li tuk nana kia, hvchishno ak osh vlvhesa hvch ik aiahno hokvno.

38. Inta! hvchin chuka yvt hvchin chukillissvt taiyaha mak oke.

39. Himak a pilla ma, Hvs sa pisa chi keyu; amba, Chitokaka i hohchifo ho mihnti hokvt holitopa mak oke, hvsh acha chi hok mak a hi oke, hvchim achi lishke, im achi tok.

## CHAPTA XXIV.

Chisvs vt ishtaiyopi mak o tempel a a kohcha tuk osh, yvmmvt okpula he, tikbanli anoli: 3 micha ilap okvt mihintikma, nan isht atokowa kvt yvmohma he, micha na palvmmi kvt ibafoka he miha: 32 mikmvt nana a mihiha kvt ont aiahla hi oka, iti vlvpoba fik achi kvt hishi toba chi hosh bokobli chatuk a nan isht apesvt anumpuli: 42 micha ahah! ahnit im vlltaha he im apesa.

1. YUMOHMI mvt Chisvs vt kohcha mvt, tempel a issvt kanima ia tok: mihma nan im ai ithvna vhleha hv, tempel vt toba kvt kaniohmi puta ka pisacha chi hosh im ai vla tok.

2. Mihma Chisvs vt, Na yakohmi puta moma ka hvch ik

peso cho? ahli mak o hvchim achi lishke, Ilvppak oka tvli vt achvfona kia aka ik itolo ke tuk osh, it on tvlkanchit itonla kvk iksho ka hi oke, im achi tok.

3. Yvmohmi tuk o yvmmak ash osh nvnih chaha Alif paknaka ya asha ma, nan ithvna vhleha hvv lumvt im ai ona mvt, Nitak kaniohmikmak o nana kvv ai yakohma hi o, micha ish minta he, mikmvt yakni vt ont ai vhli aiena chi isht atokowa kvto nanta hi o? ish pim anolashke, achi tok.

4. Mihma Chisvs vt afalaminchii mvt, Ahah! hvsh aiahni na hatak nana kia ik hvchi yoshublecho kashke.

5. Lawa hosh sa hohchifo ha ishit hohchifo kvv itvnowa cha, Klaist sia hoke, acha hi oka; mikmvt lauachit yoshublichha he oka.

6. Yohmikma tvnvp asha, micha tvnvp asha he annoa aiena ka hvsh hakla hi oke: ahah! hvsh aiahni cha ik hvchi komunto kashke: ilvppa puta kvv moyumvt ont a yvmohmi pulla hi oka: yohmi kia ont ai ishtaiyopi kvno keyu kisha hi oke.

7. Okla achvfa kvv okla mak inli ka it amokvfa he, mikmvt apelhlichika achvfa kvv apelhlichika mak inli ka it amokvfa hi oka: yohmikma hohchvfo chinto, micha ililli puta, mikmvt yakni winakvchi aiena kvv yakni kaniohmi ka ai itulvt aya hi oke.

8. Ilvppa puta kak osh nanukhaklo ai ishtia vmmona mak oke.

9. Yohmikma hvch issikkopa chi ka hvch ishit okla ibbak hvchi fohki, mikmvt hvch illichha hi oke; micha sa hohchifo pulla hatuk mak o oklushi moyumvt hvchi nukkillla hi oke.

10. Yvmma fokakma ibetvbli kvv laua he, micha ilap bika atuk kia ishit okla ha im issa, micha ilap bika iti nukkillla hi oke.

11. Mikma hopaii ilahobi vt hiohli kvv laua cha, laua o yoshublichha hi oke.

12. Mikma nan ik vhpeso bieka hatuk mak o i hullo atuk vt kapvssvt taha kvv laua hi oke.

13. Yohmi kia kvna hosh achunanchit mahayvt ai vhli ka ona hok mak osh mihi yosh okchaya hi oke.

14. Yohmi ka vba apéhlichika isht anumpa hanta ilvppvt oklushi moyuma ka isht im ai atokowa he mak osh yakni mominchit ai annoa he: yvmohmi mak o ont ishtaiyopi kv̄t v̄la hi oke.

15. Yohmi hoka nan okpvni a i nukkilli v̄lhpesa ka hopaii Taniel vt isht anumpuli tok a, aholitopaka ya a hikia na hvsh pisa hokma, kv̄na hosh ilvppa it im anumpuli hokmvt, akostininchashke.

16. Yohmikma kv̄na hosh Chutea, ya maya tuk mvt, nv̄nih chaha puta ka pit ik o yihlepá;

17. Aboha pakna yo anta tuk vt akowvt, im aboha ya nana kia ont kohchit ik esho kashke;

18. Mikma osapa anuka yo anta tuk mvt, falamvt im ilefoka ya ont ik esho kashke.

19. Yohmikma nitak yv̄mma fehna ka kv̄na hosh v̄lla i foka hatuk, micha pishechi atuk aiena hokv̄to i palv̄mma he mak oke.

20. Yohmi kia hvsh yihlepa hi a hv̄shtula yokmá, keyukmvt nitak hullo nitak okmá, ik nano ka hi a vba pit hvsh asihhlashke.

21. Yv̄mma fehnakma na palv̄mmi kv̄t chintó fehna hosh takanla he, yakni vt toba v̄mmona tok ai v̄hlit mihintit himak a ai v̄la ka, yv̄mma chohmi kv̄t takali chatuk keyu, mikmvt himmakma nitak nana yv̄mma chohma he keyu ka hi oke.

22. Yohmi ka nitak yv̄mma chohmi ka ik falaiacho ho keyukma, hatak nana hosh okchaya he keyushke: yohmi kia nan v̄lhtoka v̄lheha ak pulla tuk mak o nitak yv̄mma puta kv̄t ik falaio ka hi oke.

23. Yvmohmikma hatak nana kia, Yakeh! ilvppa Klaist vt antv̄shke, achi; keyukmvt yv̄mma antv̄shke, hv̄chim achi hoh kia, ik hv̄chi yimmo kashke.

24. Klaist ilahobi v̄hleha, micha hopaii ilahobi v̄hleha aiena kv̄t hiohlit nan isht atokowa chinto puta, mikmvt na fehna puta aiena ka okla otv̄nichā he; yvmohmi cha; yv̄mmvt yohma hinlakma, nan v̄lhtoka, v̄hleha fehna atuk kia yoshublichā hi oke.



25. Yakeh! tikbanli hvchim anoli lishke.

26. Yohmi hoka, yakeh! yummvt yakni haiaka ya anta hoke, hvchim achi hoh kia, kohchvt hvch ik aiyo kashke: micha, yakeh! vba potvlhpo a lumaka yak o yummvt anta hoke, hvchim achi hoh kia, ik hvchi yimmo kashke.

27. Malvtha kvv hvshi akochaka imma yo a kohchakmvt, hvshi aiokvtula ya pit tohwikelichi chatuk oka, Hatak Ushi vt minti kak kia yummak inli ho chiyuhma hi oke.

28. Kanima yo nan illi vt itonla hokma, mihi yo ossi puta mvt ai itahomba hi oke.

29. Na palvmmi nitak yummak atuk a in chekosikma, hvshi vt okhlilikma, anonti hvshi ninak aya mvt ik tommo ka he: mikma fochik puta kvv vba ya asht aka fohopakma, nan isht aiahlika puta vba shutik ash osh faiokahancha hi oke.

30. Yvmma fokakma, Hatak Ushi a isht atokowa kvv vba ya auet a haiaka hi oke: yohmikma oklushi moma yakni paknaka aiasha kvv yahaya he, mikma Hatak Ushi vt nan isht aiahlika, micha isht a holitopaka chinto aiena ka il ai eshi hosh vba hoshonti anukaka ya mihinti na okla pisa hi oke.

31. Atuk ma yummak ash osh im enchil vhleha ha isht-pufa ola chinto ieshi ho tihlihinlikma, ilap atokoli tok vhleha ha a mahli ushta shutik ont ai vhli achvfa ka vhlit ivt in tvnnvp pit a fullota ka a hoyot itahohomba hi oke.

32. Yohmi ka fik vpi nan isht vlhpisa ka hvsh ai ithv-nashke. Yummak okvt hishi toba chi hosh bokoblit tahakma, tofa yvt olanlosi vla ka hvsh ithana chatuk:

33. Yohmi hokvt na yakohmi puta ka hvsh pisakmvt, ai vla hosi, okhissa ak kia ai itukonofa hoka, hvsh ithanashke.

34. Ahli mak o hvchim achi lishke. Himak a okla asha ilvppvt ont ik taho kisha ho, na yakohmi puta kvv ont aiahla chi hoke.

35. Vba shutik micha yakni aiena kvto ont ai iksho ka he, amba vno vm anumpa puta hatuk vto ont ai iksho ka he keyu hoke.

36. Yohmi ka nitak yummak a he, micha hvshi kanvlli

vlhpisa a he aiena hokvno, hatak nana hosh, mikmvt enchil puta vba aiasha mak osh pit ithana keyu hō, amba Aki ak bano hoke.

37. Yohmi ka Noah hvt ahanta nitak a kaniohmi tok ma, Hatak Ushi vt mihinti kak kia yvmmak inli hō chiyuhma hi oke.

38. Oka falama yvt ik aiyo kisha nitak foka ma, impa micha nan ishko, itauwaya mikmvt itauwaya he im vlhpisa aiena hosh aiasha na Noah hvt peni chukowa he nitak vt ona tok,

39. Yohmi ma ik ithano hosh okla aiasha na oka falama yvt vla cha, mominehit ishit kaiyanchi tok a, Hatak Ushi vt mihinti kak kia yvmmak inli hō chiyuhma hi oke.

40. Yvmma fokakma tuklo kvt osapa ya ashwa tuk ma; achvfa hō ai eshi na achvfa kvto anta he.

41. Ohoyo tuklo kvt nana a botoli a botoli hosh ashwa tuk ma; achvfa hō ai eshi na achvfa kvto anta hi oke.

42. Yohmi hoka hvchishno vt hvchin Chitokaka yvt ai vla he hvshi kanvlli vlhpisa ha hvsh ithana keyu kvt, okchvt hvsh hoyashke.

43. Yohmi kvt hatak chuka-chvfa pehlichi yatuk mvt hvshi kanvlli vlhpisa kaniohmi kak o na hukopa yvt aya hinla ka ithana hatuk okmvt, okcha pulla cha, im aboha yatuk mvt tiwa hi a ahna he tuk keyu, ilvppa hvsh ithanashke.

44. Yohmi hoka hvchishno ak kia hvchim vlhtashke: yvmmak a he hvch ik aiahno hvshi kanvlli vlhpisa takla kia, Hatak Ushi vt vla hi oke.

45. Yohmi ka kvta hak osh tishu aiahli, hopoyuksa achukma aiena tuk o, i shahli hvt ilap in chuka chvfa ya apesvchit ont ai vlhpiesakma ilhpak ipihinta chi ka, atokoli tok oh cho?

46. Yvmohmi hosh ahanta hō, i shahli hatuk vt vla cha ant pisa chi ka, tishu yvmmvvt na yukpa hi oke.

47. Ahli mak o hvchi miha lishke, Yvmmak atuk ma nana im asha ka moma apesvchi mak o ikba hi oke.

48. Yohmi tuk kia tishu ik vlhpeso yo kvto chukvsh



anukaka, A shahli hvt ai vla he tuk vt vbanvblichishke, achi;

49. Yohmi cha tishu bika vhleha hash o bolit ishtia, yohmi mvt ishkot haksi vhleha ha it ibai impvt ibai ishkot ahanta hokmuno;

50. Tishu yvmma i shahli hatuk vt, yvmmak ash osh vla chi ik ahno nitak, mikmvt ik akostinincho i hvshi kanvlli vlhpisa ho vla hi oke.

51. Yohmikmvt yvmmak ash o chanlit ita hokofi cha, nan ilahobi vhleha isht ai im vlhtoba mak o ibafohkit im apesa he: yvmmak oka yahaya micha noti ahampa aiena he mak oke.

CHAPTA XXV.

Chisvs vt nitak ishtaiyopi vla hi oka isht anumpuli: yohmi kvt, ohoyo himita hatak haleli keyu pokoli, 1: 14 micha talent aiena ka nan isht apesvt anumpuli. 31 Chisvs vt vla cha nana apesa hi okvt isht anumpuli.

1. **YUMMA** fokakma vba apelihchika yvt ohoyo himithoa hatak ik halelo pokoli hosh pvla sholit, hatak himona itauwaya chi ka afamvt ilhkoli tok o chohma he.

2. Mihmvt tahlapi hosh hopoyuksa yokma, anonti tahlapi kvtto ik hopoyukso ya tok.

3. Ik hopoyukso vhleha hatuk ash osh pvla ha okla ishi kia, bila yano okla ik esho ki tok.

4. Amba hopoyuksa hatuk okvto bila yvt aivlhto a abeha ho pvla ha aieninchit okla ishi tok.

5. Hatak himona ohoyo itauwaya chin tuk ash osh ile svlahachit anta no-nosilhhvt taha cha, okla nusi tok.

6. Atuk o ninak ont iklvna ma tahpahanla kvt, Inta! hatak himona ohoyo itauwaya chin tuk ash osh mintishke, ivt ont oh afamá, achi tok.

7. Yohmi ma ohoyo himithoa yvmmak ash osh momvt tanit i pvla ha okla aiiskiachi tok.

8. Mihma ik hopoyukso vhleha hash osh hopoyuksa  
*1. as for the oil, in distinction from the lamps.*



vhleha hash o, Pim pula hvt mosholi hoka, hvchi bila ya hvsh pipetashke, im achi tok.

9. Yohmi kia hopoyuksa vhleha ash osh afalamинchi mvt, Yohma he keyu; yummak keyukma, pishno micha hvchishno aiena ka hvpim ona he keyu hoka: amba ivt kanchi vhleha hak o ont hvsh in chumpa he, hvsh ahna he vhpesvshke, achi tok.

10. Atuk o chumpvt ilhkoli takla ma, hatak himona itauwaya chin tuk ash osh vla tok; mihma im vlhtaha tuk vhleha hash osh apihvt ai itauwaya ya pit abeha na okhissa yvt vlhkuma tok.

11. I himmak o anonti ohoyo himithoa kashapa kash osh ai vla mvt, Chitokaka ma! Chitokaka ma! ish pin tiwashke, achi tok.

12. Yohmi kia yummak ash osh afalamинchi mvt, Ahli mak o hvchim achi lishke, Hvch ithanali keyushke, achi tok.

13. Yohmi ka Hatak Ushi vt ai vla he nitak, mikmvt hvshi kanvlli vhpisa aiena hoka pit hvsh ithana keyu hokvt, okchvt hvsh hoyashke.

14. Uba ap ehlichika yvt, hatak osh yakni hopaki nowvt aya chi hosh in tishu vhleha ha itahobi cha, nana im asha tuk vt ibbak fohki tok o chohmi hoka.

15. Mihmvt achvfa ho talent tahlapi ho ima mvt, anonti achvfa ka tuklo ho ima, anonti achvfa ka achvfa ho ima tok; hatak vt kanimihcha hinla aiyuka ka ai vlhtokowa mak o ima tok; micha mih mak inli ho nowvt aya tok.

16. Yohmi ma talent tahlapi ishi tuk ash osh ia mvt, yummak ash o isht itatobvt, anonti talent tahlapi mak inli ka isht ikbi tok.

17. Mihma tuklo ho ishi tuk ash kia, yummak ash inli ho chohmit tuklo mak inli ka isht ahayuchi tok.

18. Amba achvfa ho ishi tuk okvto ia mvt, yakni o ont kulli cha, i shahli in tvli holisso atuk ash luhmi tok.

19. Atuk o hopakit taiyaha ma tishu vhleha yumma i shahli hash osh vla cha, yummak ash i hotinvt pisa tok.

20. Yohmi ma talent tahlapi ishi tuk ash osh, anonti

talent tahlapi mak inli ka aieninchit isht vla mvt, Chitokaka ma! yakeh! talent tahlapi hō is soma tok: yummak atuk a talent tahlapi mak inli ka isht ahayuchi li tuk oke, achi tok.

21. I shahli hash osh, Ulhpiessvshke, tishu aiahli achukma chia ma! nana kanomosi ka aiahli chi achukma hoka, nana lawa pehlichī a chikbi la chī hoke: chī shahli nan isht im ilaiyukpa ya ish chukowashke, im achi tok.

22. Mihma talent tuklo hō ishi tuk ash kia vla mvt, Chitokaka ma! yakeh! talent tuklo hō is soma tok: yummak atuk a talent tuklo mak inli ka isht ahayuchi li tuk oke, achi tok.

23. I shahli hash osh, Ulhpiessvshke, tishu aiahli achukma chia ma! nana kanomosi ka aiahli chia achukma hoka, nana lawa pehlichī a chikbi la chī hoke: chī shahli nan isht im ilaiyukpa ya ish chukowashke, im achi tok.

24. Yohmi ma talent achvfa hō ishi tuk ash osh vla mvt, Chitokaka ma! hatak palvmmi chia chatuk; chishno ak osh ish hokchi keyu kia, ish ai vmo chatuk; mikmvt chishno ak osh ish mvshlichī tuk keyu kia, ish pehli chatuk oke, chithanali tuk:

25. Yohmi hatuk osh sa nukshopa cha, irt chin talent a yakni anuka yō luhmi li tuk oke: yakeh! chimmi hatuk vt yak chin tonlvshke, achi tok.

26. Mihma i shahli hash osh afalaminchī mvt, Tishu haksi nan intakobi chia hvt, vno ak osh hokchi li tuk keyu kia ai vmo likmvt, anonti vno ak osh a mvshlichī li tuk keyu kia, a pehli li chatuk a, ish ithana;

27. Yohmi hokvt an tvli holisso a tvli holisso abohli ya ont ish bohla he tuk: yohmi tuk ma minti li kvv vmmi atuk micha ushi atuk a aieninchit ishi la hi atuk oke.

28. Yohmi hoka talent a oh im ai eshi cha, talent pokoli ishi kak o oh imá.

29. Kvna hosh ishi hok mak o ima na lauvt im aiasha hi oka: amba ik im iksho hatuk okvno ishi tuk ash kia, im ai isha he oke.

30. Mikmvt tishu ik ahobo yokvno kocha aiokhlilika mak



o pit hvsh kanchashke: yvmmak oka yahaya micha noti ahampa aiena mak a hi oke, im achi tok.

31. Hatak Ushi vt, enchil vhleha moma kvt apiha ho; ilap isht aholitopaka il ai ishit vla he, yohmikmvt im ai om binili holitopa yatuk ma om binila he oke.

32. Yohmikma itikba ya oklushi moma kvt ai itahoba he: yohmikma yvmmak ash osh yvmma <sup>single out</sup> achafolichit iti filamohlichhi kvt, chukfvlhpoba apesvchi vt chukfvlhpoba ya isi kosoma iti filamohlichhi chatuk mak o chiyuhma he.

33. Mikmvt chukfvlhpoba ya im ibbak isht-impak imma yak o ashachikmvt, amba isi kosoma yokvno vlhfvbekimma yo ashacha he.

34. Yohmikmvt Miko ash osh im ibbak isht-impak-imma asha kash o, Aki i holitopa hvchia ma! ho minti, vba apehlichika yakni vt ik tobo kisha mak o hvchim vlhtaha tok vt hvsh ai ahantashke.

35. Vno vt sa hohchvfo ma, ilhpak a hvs svpeta tok: sa tukshila ma, nana ho hvs svshkochechi tok: hatak ik ithano sia hatuk a, aboha ya ik chukowa, hvs svm aiahni tok:

36. Sa nipi bano ma, nana hvs sa fohkichi tok: si abeka ma, ant hvs sa pesa tok: vno vt aboha kvlllo fokā li ma, ant hvs sa nowa tok okvt, im acha he.

37. Yohmikma hopoyuksa vhleha hash osh im afalaminchi kvt, Chitokaka ma! katiohmi kash o chishno vt chi hohchvfo tuk a, e chi pisa cha nana e chipeta tok o? micha chi tukshila tuk a, nana e chishkochechi tok o?

38. Katiohmi kash o hatak ik ithano chia hatuk a e chi pisa cha, aboha ya ik chukowa, e chim aiahni tok o? mihmvt chi nipi bano tuk a, nana e chi fohkichi tok o?

39. Micha katiohmi kash o chi abeka, mihmvt aboha kvlllo ish fokā aiena tuk a, e chi pisa cha, a chi nowa tok oh cho? acha he.

40. Mikma Miko vt afalaminchikmvt Ahli mak o hvchi miha lishke, Itibapishi li vhleha yakohmi ka moma ik lauwo achvfo ka kaniohmi ho hvsh ai i yvmohmi tuk okvt, vno ak o hvs sa yvmohmi mak atuk oke, im acha hi oke.

41. Yohmikmvt ibbak vlhfvbeka imma asha tuk ash kia,



Issikkopa he vlhpesa hvchia hvt, a filvmmi luak ataha iksho, Setan micha imi shilombish okpulo vhleha aiena im vlhtaha tok mak o, hvsh ilhkolashke.

42. Uno vt sa hohchvfo ma, ilhpak nana kia hvch ik sapeto ki tok : sa tukshila ma, nana kia hvch ik svshkochecho ki tok ; hatak ik ithano sia hatuk a, aboha ya ik chukowa hvch ik svm ahno tok : si abeka, micha aboha kvllo foka li aiena ma, ant hvch ik sa nowo ki tok okvt, im acha he.

44. Yohmikma yvmmak ash kia afalaminchi kvt, Chitokaka ma ! katiohmi kash o chi hochaiyafo, mihmvt chi tukshila, micha hatak ik ithano chia, mihmvt chi nipi bano, chi abeka, mihmvt aboha kvllo ish foka aiena ka e chi pisa cha ke chi apelacho ke tuk oh cho ? acha hi oke.

45. Yohmikma yvmmak ash osh afalaminchikmvt, Ahli mak o hvchi miha lishke, Yakohmi ka moma ik lauwo achvfona kia kanihmi ka a hvch ik i yvmihecho tok mvt, vno ak o hvch ik sa yvmihecho tok mak oke, acha hi oke.

46. Yohmikma yakohmi kash osh ai issikkopa bilia mak o pit ilhkola he, amba hopoyuksa yokvto aiokchayvt bilia yo ia hi oke.

CHAPTA XXVI.

Na pehlich i vhleha hvt it afama cha, Chisvs a vba chi kvt isht anum-puli. 1. 6 Ohoyo hosh nan-ahama ya Chisvs noshkobo isht im a hvmmi. 14 Chutas Iskaliot vt Chisvs a tvli hvta pokoli tuchina ho ishit kanchi. 17 Chisvs vt nan im ai ithvna vhleha ha nan vban-vblit ontia it ibai impa ; 26 mihmvt opiaka na holitopa impa isht vlhpisa ka apesa, 30 mihmvt kohchvt nvni h chaha Alif a ona ; mihmvt Pita yvt ik ithano miha chi ka tikbanlit anoli. 36 Chisvs vt Ketsemane osapushi ont chukowa cha, vba pit anum-puli. Chutas Iskaliot vt hatak na-halupa sholi bieka ho pehlich i cha, Chisvs a ont ishi. 57 Okla hvt Chisvs a ishi mvt na holitompa isht asha pehlich i in chuka holitompa isht ona mvt, okla hash osh kalakshichit on tuftua. 69 Pita yvt in Chitokaka ya ik ithano il ahobi : yohmit ashvchi tok vt nukhaklo.

1. ATUK o yakohmi tok ; Chisvs vt anum-pa ilvppa moma ka ahanchit ont in taiyaha mvt, nan im ai ithvna vhleha hash o,

2. Nitak tuklokma vbanvblit-ontia impa hv̄t aśha chi, mikma Hatak Ushi vt iti-taiyukhvna ahonvhlvt illa chi mak o, ishit okla ibbak fohka chi ka hvsh ithaiyanvshke, im achi tok.

3. Yvmma foka ma na holitompa isht aśha pehlichi vhleha, mikmvt na holissochi vhleha, mikmvt okla ha i hochitoka vhleha aiena kv̄t na holitompa isht aśha pehlichi Kaiafas hohchifo ho im aboha holitopa ya ai itvna tok.

4. Mihmvt haksichi hosh Chisvs a okla ishi cha, vba hinla kv̄t it im anumpulit maya tok.

5. Yohmi kia, Impa chito aśha nitak ak o keyu ho, yvmmak keyukma okla hv̄t i sanali fehna hinla yoba ka achi tok.

6. Atuk o Chisvs vt Betani a Saimon leplosi vbi a tok in chuka ya aśha ma,

7. Ohoyo pash-ahama holitompa fehna alabasta itombu shi achvfa ho ishi kv̄t im ona mvt, impa hosh aśha ma, noshkobo a ont o fohobli tok.

8. Yohmi kia nan im ai ithvna vhleha hash osh pisa kv̄t, okla ik im vlhpeso fehna mvt, Katiohmi mak o ilvppvt yakohmit okpulo cho?

9. Pash-ahama ilvppvt lawa kia isht vlhtoba cha, ilbvsha vhleha ha i holhpela hinla tuk oka, achi tok.

10. Chisvs vt akostinichi mvt, Nanta katiohmi ho ohoyo ha hvsh ataklvmmichi cho? ilvppak okvt nan achukma mak o isht vm ai yvmihchi hoka.

11. Ilbvsha yokvto hvchim aśha bilia cha tuk: amba vno yokvto hvch ibatakla li bilia keyushke.

12. Pash-ahama ilvppa sa haknip a o fohobli hokvt, sa hollopa chi kak o vm atahli hosh yvmihchi hatuk oke.

13. Ahli mak o hvchi miha lishke, Yakni moma ka kanima fehna yo vbanumpa ilvppvt isht ai anuhumpakma, nana ka ohoyo ilvppvt yakohmichi tuk a yvmmak ash o isht ithaiyana hi a, anohowa hi oke, im achi tok.

14. Yvmma foka ma auah tuklo tuk ash achvfv̄t Chutas Iskaliot hohchifo hosh ivt na holitompa isht aśha pehlichi vhleha hash o im ona tok.

15. Mihmvt, Yvmmak oka ishit hvchim issa la chi ka nanta ho hvs suma hinla cho ? yvmmak ash o im achi tok. Mihma tvli hvta boshulli pokoli tuchina hi o okla i kahli tok.

16. Yohmi ma nitak yvmma ai vhlit mahaya ka yvmmak ash o kaniohmichit ishit im issa he akostinichi bahana tok.

17. Yohmi tuk o pvska ik shatvmmo vpa nitak vmmona ho nan ithvna vhleha hv Chisvs a im ai ona mvt, Ubanvblit-ont ia ish impa chi ka, katima yak o ont e chim ai atahla hi a ish ahni cho ? im achi tok.

18. Mihma yvmmak ash osh, Ivt tvmaha ha hvsh onak mvt, hatak yvmmak o hvsh im ona cha, Nan ithvnanchi vt, Nitak vt vm ai ona hosishke : chin chuka ak o nan vm ai ithvna vhleha ha pehlichit vbanvblit-ontia ya a holitobli la chi hoke, achi kano, hvsh im achashke, achi tok.

19. Yohmi ma nan ithvna vhleha hash osh, Chisvs vt ai im atokoli tuk mak o yvmohmi tok ; micha vbanvblit-ontia ya okla atahli tok.

20. Yohmi ma ont opivt taha ma, auah tuklo kash o pehlichia cha impa chi hosh binili tok.

21. Atuk osh okla impvt maya ma, Ahli mak o hvchi miha lishke, Hvsh achvfona kv svshit okla ha hvsh im issa chi hoke, achi tok.

22. Mihma okla nukhaklo fehna mvt, achvfaiyukvt momvt, Chitokaka ma ! vno ak oh cho ? im achi tok.

23. Mihma yvmmak ash osh afalaminchi mvt, Kvna hosh ampo a ibbak a pit svb ai okvchikmvt, mihi yosh svshit okla ha im issa chi mak oke.

24. Kaniohmit isht holihiso tok mak o Hatak Ushi vt a yvmohmi hoke : amba Hatak Ushi a ishit inla ya im issa hatak okvto i palvmma chi mak oke ; hatak yvmmak okvt ik tobo tok okmak osh im achukma hi atuk oke achi tok.

25. Yohmi ma ishit inla ya im issa Chutas ash osh afalaminchi mvt, A shali ma ! vno ak oh cho ? achi ma, Ahli, ish mihvshke, achi tok.

26. Mihmvt okla impa hosh maya ma, Chisvs vt pvska ya ishi cha, vba pit aiokpvchi mvt, tushahlichia cha, nan ithvna



vhleha hash o pit ima mvt, Ilvppvt sa haknip mak oke ;  
ishit oh vpá, achi tok.

27. Mihmvt isht-ishko ya ishi cha vba pit aiokpvchi mvt,  
yvmmak ash o pit ima mvt, Hvsh moma kvv hvsh ish-  
kashke.

28. Ilvppak okvt svssish nan isht vlvhisa himona, laua  
kvv nan ai ashvchika puta isht i kashofa he mak o, hlatapa  
hatuk oka.

29. Yohmi kia himak a pilla ma pakvpi vnit waya ilvppa  
ak ishko mak atuk osh himonvchit Aki apchlichika ya a  
hvch ibai ishko la he nitak mak a hi oke, hvchim achi lish-  
ke, achi tok.

30. Mihma vba isht taloa ya okla talovt issa mvt, okla  
kohchvt nvnih Alif a pit ilhkoli tok.

31. Yohmi ma Chisvs vt yvmmak ash o, Himak ninak a  
vno ak atuk mak o hvsh moma kvv hvch ibetvbla chi hoke.  
Chukvvlhpoba apesvchi a issot kanchi likma, chukvvlhpoba  
atuk vt itafimimpvt aya he, achi hosh holisso hatuk oka.

32. Yohmi kia falamvt tani li ha yokvto, hvchi tikba Ka-  
lili a ona la chi, im achi tok.

33. Pita yvt afalaminchi mvt, Moma kvv chishno ak atuk  
mak o isht ai ibetvbli kia, vno yokvto nitak nana si a ibetv-  
bla he keyushke, im achi tok.

34. Mihma Chisvs vt, Ahli mak o chi miha lishke, Himak  
ninak a akaka yvt ik olo kisha ho, hituchina ha chik svthano  
ka ish miha chi hoke, im achi tok.

35. Pita yash osh, Chi awant svlla chi ik nana kia, ak  
chithano miha la he keyushke, im achi tok. Mihma nan  
ithvna vhleha hvv momvt yvmmak inli ho miha tok.

36. Yvmma foka ma Chisvs vt yvmmak ash o pehlich  
cha, yakni Ketsemane hohchifo ho ona mvt, nan im ai ithv-  
na vhleha hash o, yvmma ivt ont vba pit anumpeli li takla  
ka, ilvppak inli ho hvsh chiyashke, im achi tok.

37. Mihmvt Pita, micha Sebete ushi tuklo aiena kvno  
pehlich cha ia tok ; mihmvt nukhaklo fehvvt i wekit kvnia  
tok.

38. Yohmi mvt yvmmak ash o, Sa shilombish vt nukhak-

lo fehna, illa he ak kia chiyuhmishke : ilvppak inli ho chiyvt hvs sub ai okchashke, im achi tok.

39. Mihmvt achakalit ivt misha ituma ona mvt, hlipivt itula cha, vba pit anumpuli mvt, Aki ma ! yohma hinla yoba hokma, isht-ishko ilvppvt a kanvllashke : yohmi kia vno ak osh ahni li kak keyu, amba chishno ish ahni kak ashke.

40. Mihmvt mintit nan ithvna aiasha kash o vla mvt, nusi hosh maya na ant pisa cha, Pita yash o, Hvs sub ai okcha na hvshi kanvlli achvfa ka ona hinla keyu mak oh cho ?

41. Okchvt vba pit hvsh anumpohonli cha, ayoshuba ya hvch ik iba chukowo kashke : shilombish okvto im vlhtaha ho mvhli, amba nipi ak osh tikambishke, im achi tok.

42. Anonti atukla ma ia cha, ont vba pit anumpuli mvt, Aki ma ! isht-ishko ilvppa ai ishko li ha yo keyukma, a kanvlla he keyu hokma, chishno nana ish aiahni ka yvmoh-mashke, achi tok.

43. Micha vla mvt, anonti nusi hosh maya na ant pisa tok : nishkin ak osh weki hatuk okvt.

44. Mihma anonti issvt ia mvt, ont atuchina ma vba pit anumpuli kv, anumpa yvmmak ash inli ho miha tok.

45. Yohmi mvt nan im ai ithvna aiasha kash o vla mvt, Himmak mak o mayvt nusit hvsh fohashke ; inta ! hvshi kanvlli vlhpisa hv ai ona mak oke ; yohmi ka Hatak Ushi a haksichit nan ashvchi vhleha ibbak sa fohka chi mak oke.

46. Ho tani, kiloh ilhkolí, yakeh ! sa haksichit okla ibbak sa fohka chi hokvt olanlosi vlvshke, im achi tok.

47. Mihma anumpohonli moma ho, auah tuklo atuk achvfa Chutas vt na holitompa isht asha pehlichí vhleha micha okla i hochitoka vhleha aiena im anumpa ho okla chinto bvshpo falaia puta, mikmvt iti tvptua aiena sholi ho, pehlichí cha vla tok.

48. Yohmi kv haksichit okla ibbak fohka chi, yvmmak okvt isht akostinincha hi a im anoli kv, Kvna ho ont i suksowa likma, yvmmak osh mih mak a chi hoke ; kvllochit hvsh ishashke, achi tok.

49. Mihmvt yvmmak ash osh Chisvs a im ona mvt, A shahli ma ! na chi yukpashke, achi mvt, i suksowa tok.

50. Mihma Chisvs vt, A kana hvt katiohmi hō ish la cho? im achi tok. Yohmi ma okla ai onvt Chisvs ash o itī hoklit ishi tok.

51. Yohmi ma Chisvs a apehvt aya tuk vt achvfa hosh ibbak atuk ma i bvshpo falaia ya pit ishit shufi mvt, na holitompa isht asha pehlichī in tishu hō isht fahamvt, haksobish a chanlit tvbli tok.

52. Yumma foka ma Chisvs ash osh, Chim bvshpo falaia a falaminchit afohka ya pit ish fohkashke: kvna hosh bvshpo falaia yo ishi hokvto, bvshpo falaia yo isht illa he bano hoka.

53. Himonasi ak kia Aki a pit im asilhha li hok ma, ashalika enchil vhleha lechvn auah tuklo atampa ka auet vma hinla ka ik chim ahobo cho?

54. Yohmi hokma katiohmi hosh yakohma hi a tok vt Baibil vt ont aiahla hinla cho? im achi tok.

55. Chisvs vt hvshi kanvlli vlhpisa yummak inli hō okla laua yash o, Hatak hukopa yo ayvt i kohcha hō chiyuhmit bvshpo falaia, mikmvt iti tvptua aiena sholi hosh hvs svsha chī kvv hvsh itvnowa cho? tempel anukaka ya nana ai ithv-nanchit nitak moma hvch itintakla binili li ka itī hoklit hvch ik sasho chatuk oke, im achi tok.

56. Yohmi kia hopaii vhleha hvt holissohonchi tok a ont aiahla chī mak o, ilvppa moma kvv yakohmi tok. Yohmi ma nan ithvna vhleha hatuk vt momvt yummak ash o issvt yihlepa tok.

57. Yohmi ma Chisvs a itī hoklit ishi tuk vhleha hash osh yummak ash o ilauelit ivt na holitompa isht asha pehlichī i shahli Kaiafas a isht im ona tok; yummak o na holissochi vhleha, mikmvt hochitoka vhleha aiena kvv ai itvnahtv maya hatuk oka.

58. Yohmi ma Pita yvt auet i mishemanchit pit iakaiyvt yahayvt na holitompa isht asha pehlichī i shahli im aboha holitopa hatuk ma ont chukowvt, ont ishtaiyopi ka pisa chī hosh tishu vhleha hā takla ont binili tok.

59. Mihma na holitompa isht asha pehlichī vhleha, micha hochitoka vhleha, mikmvt nan-apesa moyuma kvv Chisvs a



vba chi kv̄t, anumpa ik a<sub>h</sub>lo isht atokola hi a hoyot aiasha tok.

60. Yohmi kia ik ahayucho tok. Anumpa ik a<sub>h</sub>lo isht atokoli hokv̄to lauv̄t ai ahanla mv̄hli kia, ai v̄lhpesa hi a ik ahayucho tok. Ont ishtaiyopi ma anumpa ik a<sub>h</sub>lo isht atokoli vt tuklo hosh v̄la tok;

61. Mihmv̄t, Ilv̄ppvt Chihowa in tempel a okpv̄ni li tuk mv̄t, anonti nitak tuchinakma ikbit tahli la hinla hoka, achi kv̄no, achi tok.

62. Yohmi ma na holitompa isht a<sub>s</sub>ha pehlich̄i i shahli vt wakaya mv̄t, afalaminchit, Afalaminchit nana kia chik acho cho? nanta mak o yakohmit isht chi atokoli cho? im achi tok.

63. Yohmi kia Chisvs vt nana ik acho ki tok. Mihma na holitompa isht a<sub>s</sub>ha pehlich̄i i shahli vt anumpuli mv̄t, Chishno ak osh Klaist Chihowa Ushi chia hatuk okmv̄t, keyukma nana hatuk okmv̄t, ish pim anola he mak o Chihowa okchaya pulla ka isht a chim apesa lishke, im achi tok.

64. Mihma Chisvs vt, V̄lhpesa ish mihv̄shke: yohmi kia, Himak a pilla ma Hatak Ushi vt nan okluha im aiya im ibbak-ishtimpakimma ȳa binili, micha vba hoshonti anukaka minti aiena h̄o hv̄sh pisa hi oke, hv̄chim achi lishke, im achi tok.

65. Yohmi ma na holitompa isht a<sub>s</sub>ha pehlich̄i i shahli ash osh im ilefoka, im anchi aieninchit ita hlilv̄ffi mv̄t, Chihowa ik ahobalot anumpa h̄a anumpulishke; himmakma nan-isht ai atokowa katiohmi h̄o iloh abna hinla cho? inta! himak okv̄no Chihowa ik ahobalot anumpuli ka hv̄chishno vt hv̄sh hakloshke.

66. Katiohmi hv̄chim anukfila cho? achi ma, okla afalaminch̄i mv̄t, Illa he ak o v̄lhpesa hoke, achi tok.

67. Yohmi ma nashuka ȳa on tuftua ma, ibbak a bonulit isht isso tok, kanimi kv̄t ibbak a isht pasalich̄i mv̄t,

68. Klaist chia ma! kv̄na hosh chiss̄o hokma, akostininchit pir anol̄i, achi tok.

69. Yohmi ma Pita yv̄t aboha holitompa kocha ȳa asha

tok: mihma ohoyo himita yosh yummak ash o vla mvt, Chishno ak kia Chisvs Kalili vta ya awant ish aya kamo, achi tok.

70. Yohmi kia moma itikba yatuk ma ik ithano ilahobit, Nana ish miha hoka, ak akostininchoshke, achi tok.

71. Micha kohchvt ivt apishia ona ma, ohoyo himita inla yosh pisa mvt, ymma maya kash o, Ilvppak kia Chisvs Nasalet vta ya awant aya kamo, im achi tok.

72. Mihma anonti anumpa kvllo isht il onochit ik ithano ilahobit, Hatak ymma ithana li keyushke, achi tok.

73. Atuk o in chekosi ma bilikasi hiohmaya tuk ash osh ai vla mvt, Pita yash o, Chishno ak kia okla ymma ish ib ai achvfa yatuk o pullvshke; chim anumpa hvv chi otvnichi hoka, im achi tok.

74. Yohmi ma yummak ash osh, Hatak ymma ithana li keyushke, achit ik ahobalot anumpulit anumpa kvllo isht il onochit ishtia tok. Mihma chekosi mak inli ho akaka yvt ola tok.

75. Yohmi ma Pita yash osh, Akaka yvt ik olo kisha ho, hituchina ha chik svthano ish miha chi hoke, im achi tok, Chisvs im anumpa hash pit ithaiyana tok. Mihmvt kocha ia cha, yahaya fehna tok oke.

## CHAPTA XXVII.

Na holitompa isht asha pehlich vhleha hash osh Chisvs a Pailat Loman i miko ak o isht im ona, 1; 3 mihma Chutas Iskaliot vt ile nuksiteli. 19 Pailat tekchi vt Chisvs a nana ik kanimilicho hok bano im ahni; yohmi kia na holitompa isht asha vhleha hvv nan ahni kak o vhpesa im ahni cha, 26 Balabas ak o peh i hotofi mvt, Chisvs vto illa chi mak o miha. 27 Loman tvshka chipota vhleha vt Chisvs a ishi cha, kvv halupa yo noshkobo ha isht iachukolichi. 32 Tvshka chipota yvt Chisvs a ishit Kalkohla ona cha, im ilefoka yash na shoeli isht apesvt im ishi mvt, Chisvs ash iti-taiyukhvna ahonvhlchi ma; 50 Chisvs vt chitoli fehvvt tahpvla mvt, illit kvnia, illi ma na fehna kvv ai yvmohmi. 57 Chosef Alimahlea vta yak osh, Chisvs vt iti-taiyukhvna takali tuk a ishit akrchi, mi-cha hatak illi ai asha himona ilap immi ak inli ho fohkit bohli.

62 Na holitompa isht asha pehlichí vñleha hak osh asihñhla ma, Pailat vt trshka chipota ya atoinchi na Chisvs ahollopi a atoni.

1. ONT onñvt taha ma na holitompa isht asha pehlichí vñleha hvñt moma, micha okla i hochitoka vñleha aiena kvñt Chisvs a vba chí kvñt isht it im anumpulit maya tok.

2. Micha yvmmak ash o okla takchi mvt, ilaueñit isht ivñt, nahullo miko Pantivs Pailat ibbak a ont fohki tok.

3. Yvmma foka ma yvmma ishit okla ha im issa tuk Chutas ash osh yvmma illi issa na pisa mvt, inlvñt im anukñila cha, tvli hvñta boshulli pokoli tuchina kash o falaminchit na holitompa isht asha pehlichí vñleha micha hochitoka vñleha aiena ka isht om ona mvt,

4. Nan ashvñchi keyu issish o ishit okla ha im issa li ho-kvñt ashvñchi lishke, achi tok. Mihma, Yvmmvñt nanta isht pi ahalaia cho? yvmmak okvño chishno ak inli hosh ish pisashke, achi tok.

5. Mihma tvli hvñta boshulli a tempel anukaka ya pit fohobli cha, kocha ia mvt, ont ile nuksiteli tok.

6. Yohmi ma na holitompa isht asha pehlichí vñleha hash osh tvli hvñta boshulli ash ishi mvt, Tvli holisso ai itahoba holitopa ya pit fohka he vñhpesa keyu, issish o isht vñhtoba hatuk oka, achi tok.

7. Yohmi mvt okla isht im anumpulit maya cha, oklushi inla hatak puta ka a hollopa hi vt shuti-tvña im osapa yo isht chumpa tok.

8. Yvmohmi hatuk o osapa yvmmvñt, Osapa issish hohichifo tok vt himak nitak a moyuma hoke.

9. Yvmohmi ma hopaii Chelemaias vt anumpuli mvt, Is-lael ushi vñleha hvñt ai vñhtoba he okla apesa tok mak o ai vñhtoba he vñhpesa tuk vñhtoba tvli hvñta boshulli pokoli tuchina ka okla ishi tok.

10. Micha Chitokaka yvñt vñ apesa tok mak o, shuti-tvña atuk im osapa yo isht atobbi tok; achi tok a ont aiahli tok.

11. Mihma Chisvs vt nahullo miko itikba ya hikia tok; mihma nahullo miko vt yvmmak ash o i ponaklot, Chishno ak osh Chu okla ha i miko chia mak oh cho? achi



tok. Mihma Chisvs vt, Uhpesa ho ish mihvshke, im achi tok.

12. Atuk o na holitompa isht asha pehlichí vhleha, mik-mvt hochitoka vhleha aiena kv̄t nan isht mihachi ka, nanasi kia ilapvt afalaminchit ik miho ki tok.

13. Yohmi ma Pailat ash osh, Nana lawa ka isht a chi atokoli ka chik haklo ho tuma? im achi tok.

14. Yohmi ma yvmmak ash osh anumpa achvfa kia ik im afalamincho ki tok; yohmi hatuk o nahullo miko ash osh nukhlakancha fehna tok.

15. Micha vbanvblit ontia impa ashakma, kvna ho okla ahnikma, nahullo miko vt yukvt talakchi atuk a okla ha imi hotofi chatuk a tok.

16. Atuk o yvmma fehna ma annohowa fehna chatuk yukvt talakchit Balabas hohchifo hosh okla ha im anta tok.

17, 18. Yohmi hatuk o Pailat ash osh yvmma okla isht ik i yukpo kak osh ishit okla ha im issa hatuk a, ithana hatuk osh, okla itvnahvt taiyaha ma, Kvta mak o hvchim hotofi la he a hvsh aiahni cho? Balabas ak okmá, keyukmvt, Chisvs osh Klaist hohchifo kak okmá, katimampo kak a chi cho? im achi tok.

19. Mihmvt nan-apesa aiasha ya ont binili ma, tekchi vt pit im anolit, Yvmmak atuk mak o himak nitak a si holhpokunvt nana isht ik sv̄m ai achukmo kv̄t an laua hatuk oka, hatak ahli achukma yvmma nana chik kanihecho kashke, achi tok.

20. Yohmi kia na holitompa isht asha pehlichí vhleha, micha hochitoka vhleha aiena hokvto Balabas ak o okla asilhaha cha, Chisvs ak o vba chi ka, okla laua ya atohnochi tok.

21. Nahullo miko ash osh afalaminchi mvt, Tuklo ka katimampo hvchim i hotofi la hi a hvsh aiahni cho? im achi ma, Balabas ak o, okla achi tok.

22. Pailat ash osh, Yohmikmvt Chisvs osh Klaist hohchifo kvno, nanta hak o katimihchi la hinla cho? im achi ma, Iti-taiyukhvna yak o ahonvhlvt illashke, momvt okla achi tok.

23. Mihma nahullo miko ash osh, Katiohmi ho? nan okpulo nanta mak o yvmohmi tuk oh cho? achi tok, Yohmi

kia i shahlichit tahpvlvt, Iti-taiyukhvna yak o ahonvhlvt illashke, okla achi tok.

24. Pailat ash osh ilapvt na kanihma he keyu, amba ya-hapa kak osh i shahlit toba pulla hi a akostininchit mvt, oka kapvssa ya ishi cha, okla itikba ya ibbak ai achifa mvt, Hatak ahli achukma ilvppa im issish a isht si ahalaia keyu mak oke: hvchishno ak osh isht hvsh ashashke, im achi tok.

25. Yohmi ma okla momvt afalaminchit mvt, Im issish vt pishno, micha pim vlla aiena kak o onvtonlashke, im achi tok.

26. Yohmi ma yvmmak ash osh Balabas ak o okla ha imi hotofi tok: micha Chisvs ash o fvmmit issa mvt, iti-taiyukhvna ahonvhla chi mak o im issa tok.

27. Yvmma foka ma nahullo miko in, tvshka chipota vhleha hash osh Chisvs a ishtivt nana ai apesa yo isht ona mvt, tvshka chipota vhleha ha mominchit ont im itvnahli tok.

28. Mihmvt nafohka ya i shoeli cha tvshka chipota pehlichit i nafohka humma yo ishit fohkvchichi tok.

29. Micha kvti iachuka ho okla tenvt tahli mvt, noshkobo ha iachukolichit cha, anonti ibbak isht impakimma ya kushak o pit fohki tok: mihmvt itikba ya okla i hvchukbilhepa cha, isht yopulvt, Chu okla i miko ma! na chi yuk-pashke, achi tok.

30. Mihmvt yvmmak ash o okla on tuftua, micha kushak ash ishi cha, noshkobo ha isht boli aiena tok.

31. Mihmvt yvmmak ash o okla ishit yopulvt issa mvt, tvshka chipota i nafoka humma yash o i shufi cha, ilap i nafoka yash inli ho fohkvchichi mvt, iti-taiyukhvna ahonvhlichit chi hosh ilauelet ishtia tok.

32. Atuk osh okla ont kocha wiha fehna mvt, Saileni hatak Saimon hohchifo ho okla pisa tok: mihmvt im iti-taiyukhvna ya yvmmak osh shola he a okla atohnochi tok.

33. Atuk osh yakni Kalkohla hohchifo yvmmt, Noshkobo foni aiasha, achi mak o ona ma,

34. Yvmmak ash o ishka chi ka wineka yosh basunlvsh okchi yvt ibvlhto ho ipeta tok: mihma yvmmak ash o ish-kot pisa mvt, ishka he keyu ki tok.



35. Mihma yummak ash o iti-taiyukhvna okla ahonvhli-chi mvt, na shoeli o im ilefoka yatuk ash isht iti hopela tok; hopaii vt, anumpuli mvt, Um ilefoka yatuk puta ka okla iti hopela mvt, anonti vm ilefoka lumbo atuk a okla nan-isht a shoelishke, achi tok vt aiahla chi mak a tok.

36. Micha okla hash osh yummak o aka binohli cha, yummak ash atoni tok.

37. Mihmvt noshkobo paknaka anumpa onvtula holisso hvt, ILUPPAK. OSH CHISUS CHU OKLA I MIKO MAK OKE, achi ho takalichi tok.

38. Yohmi ma hatak hukopa tuklo hosh apihvt ititai-yukhvna ahonvhla tok; achvfa kvt ibbak isht impakimma yo takali ma, anonti achvft vlhfvbekimma yo takali tok.

39. Mihma yumma bilikasi ont ihiya kvt yummak ash o ik ahobalot pit i yuchunukli beka tok.

40. Mihmvt, Tempel a okpvi cha, anonti nitak tuchinak-ma ikbit tahli chia hvt, ish ile okchalinchashke, Chihowa a Ushi chia hokmvt, iti-taiyukhvna ya auet akowá, achi tok.

41. Na holitompa isht asha pehlichi vhleha ak kia na holissochi vhleha, micha hochitoka vhleha ai itapeha kvt yummak ash o ishit yopulvt,

42. Inla yokvno okchalinchichi hatuk okak osh, ilap inli kvto ile okchalinchichi he keyushke. Ilvppak osh Israel a i miko yatuk okmvt, himonasi ak o iti-taiyukhvna ya auet ik akowá, yohmikmak o iloh i yimmashke.

43. Chihowa ya anukcheto atuk oka, yummak osh i hullo hatuk okmvt, himonasi a ant ik hlakofichí; Chihowa Ushi sia hoke, achi hatuk oka achi tok.

44. Hatak hukopa tuklo yumma apihvt iti-taiyukhvna ahonvhla tuk kak kia ik ahobalo kvt, yummak inli ho, choh-michi tok.

45. Yohmi ma hvshi kanvlli vlhpisa ont isht hannalik fehna ai vhlit ivt, hvshi kanvlli vlhpisa isht chakkali ona ka, yakni moma ka ai okhlilit kvnia tok.

46. Yohmi ma hvshi kanvlli vlhpisa ont isht chakkali foka ma, Chisus vt chitoli fehna hosh tahpulvt, Eli, Eli, lama-sabakhiani? achi tok; yummvt an Chihowa ma! an



Chihowa ma! nanta katiohmi ho is sa kanchi cho? achi hoke.

47. Mihma ymma hiohmaya tuk vt kanimi kv̄t haklo mv̄t, Hatak iluppvt Elias a pit i howvshke, achi tok.

48. Mihma mih mak inli ho achvvt malelit ia mv̄t, na shatvmmi o ont ishi cha wineka alotoli mv̄t, kv̄shak o takalichi cha, yvmmak ash o ishka chi ka pit ipeta tok.

49. Mihma inla ka yash osh, Ik ashá, Elias vt okchalinchit aya hinlakmá, nanakmá, keho pesá, achi tok.

50. Mihma Chisvs vt atukla ma chitoli fehna hosh tahpula mv̄t, fiopissa tok.

51. Yohmi ma nantv̄nna tempel anukaka takali tuk vt paknaka ak o a hlilav̄t ia mv̄t, aka ont taha cha tuklo tok: mihma yakni vt winakahanchi ma, tv̄li hochito puta kv̄t bakahli tok.

52. Mihma hatak ahollopi puta kv̄t tiwa ma, vbanumpuli puta haknip mayvt nusi tuk vt lava kv̄t tani tok.

53. Atuk osh Chisvs vt illi tuk vt falamvt tani ma, ahollopi puta ka akohcha wihvt ia mv̄t, tmaha holitopa ya onvt lava ka i haiaka tok.

54. Sintulion micha apihvt mayvt Chisvs a apesvchi tuk aiena kash osh yakni winakvchi, mihmv̄t nana kv̄t ai yakohmi puta na pisa mv̄t, okla nukshopa fehna mv̄t, Iluppak okvt Chihowa ha Ushi yo mv̄hli tuk pullvshke, achi tok.

55. Yokmi ma ohoyo lava Chisvs a apehvt Kalili a asht, mintit ymma nan im atahli yatuk vt ymma maya cha, auet mishema ho pit pisa tok.

56. Ymma takla maya kv̄t, Meli Maktalene micha Meli, Chemis, mikmv̄t Choses aiena ishki, mikmv̄t Sebeta ushi vhleha ha ishki ak osh aiena tok.

57. Ont opiv̄t taiyaha ma hatak nan in lava Alimahlea v̄tta Chosef hohchifo hosh, yvmmak kia Chisvs a nan im ai ithvna ak inli tuk osh vla tok.

58. Micha ia mv̄t, Chisvs haknip a Pailat a ont im asilhba tok. Yohmi ma haknip atukma ima he a, Pailat vt miha tok.

59. Mihma Chosef vt haknip atuk a ishi mvt, yvm-mak ash o nantvna kashofa linen achukma ho a bonulli tok.

60. Mihmvt yvmmak ash o ilap i sepvka himona tvli chito yo a kulli hosh ikbi tuk osh ont fohki tok: mihmvt sepvka okhissa ash o tvli chito yo tonolichit pit isht akamali cha, ia tok.

61. Mihma Meli Maktalene, micha Meli achvfa itatuklo kvv sepvka i chapaka ya chiya tok.

62. Yohmi ma nana ai vlhtaha nitak atuk auet achakaya nitak o na holitompa isht asha pehlich i vhleha, micha Falisi vhleha aiena kvv Pailat a ant im ai itvnaha cha,

63. Pi shahli ma! na haksichi yvmvvt okchaya momvt ahanta mvt, Nitak ont atuchinakma falamvt tani la hi oke; achi tok a il ithaiyanvshke.

64. Yohmi hoka ish apesa na sepvka vt kvllot vlhkama na nitak atuchina ka onashke; yvmmak keyukma nan im ai ithvna vhleha hvv ninak a ai vlvv hukopvt ishit kvnia cha, Illi tuk vt falamvt tanishke, okla ha im acha hinla hoke: yohmikma ishtaiyopi ka isht haksi kak osh ik ai vlhpeso kvv vmmona tuk a i shahla hinla hoke, achi tok.

65. Mihma Pailat ash osh, Nan atoni vt hvchim ashvshke: oh ilhkoli cha, kanimihchit hvsh a kvullocha hinla kvv hvsh yvmihchashke, im achi tok.

66. Mihma ilhkoli mvt, tvli ash o in chunli cha, nan atoni a ashachit, sepvka ash a kvullochit kaiyanchi tok.

## CHAPTA XXVIII.

Nitak ont atuchina onnahinli fehna ohoyo tuklo kvv Chisvs ahollopi tuk a ona; yvmma enchil vt ai afama, 1; 2 micha Chisvs vt illi tuk vt falamvt tani tuk a, im anoli; mihmvt nan im ai ithvna vhleha ha ia cha, ont im anola chi ka i miha. 11 Kaniohmi hosh Chisvs ahollopi ya atonit aiasha tuk vt falamvt tvmaha chito ya ona cha, ahollopi nana a kaniohmi tuk a na holitompa isht asha pehlich i vhleha ha im anoli. 15 Chisvs vt nan im ai ithvna auah achvfa ka Kalili ak o ai i haiaka, 19 micha vbanumpa ha oklushi puta ka isht im anumpohonlit itvnohowa he a im apesa.



1. YUMOHMI tuk o nitak hullo vt ont taha tuk wék nitak vmmona chi hosh onnvt mihinti ma, Meli Maktalene, micha Meli achvfa itatuklo kv̄t sepuvka yash pisut aya hosh itonachi tok.

2. Yohmi ma yakni vt winakvchi fehna tok: Chitokaka im enchil osh vba mintit vla cha, tvli okhissa onvtula tuk a kanompit tonolichi cha, paknaka ya on asha ha tok,

3. Mihma haknip vt malvtha ak o chiyuhmi ma, im ilefoka yvt tohbi kv̄t okti pushi ak o chiyuhmi tok.

4. Mihma nan atoni vhleha hatuk vt yv̄mma i nukshopa kv̄t v̄vnihinchi mvt, illi yo chiyuhmi tok.

5. Yohmi ma enchil vt anumpuli mvt, ohoyo hash o, Ititaiyukhvna ahonvhlvt illi tuk Chisvs ak o hvsh hoyo ka hvchim ithanali hoka, ik hvchi nukshopo kashke.

6. Ilvppa ikshoshke; miha tuk okvt falamvt tani tuk oke. Mintit Chitokaka yvt ai itola tuk a ant ho pesá.

7. Micha tushpvt ivt, illi tuk vt falamvt tani cha, hvchi tikba Kalili a ia chi ka, yv̄mmak o ont hvsh a pisa chi hoke, nan im ai ithvna vhleha ha ont hvsh im anolashke: inta! hvchim anoli li mak oke, im achi tok.

8. Yohmi ma nukshopa, mikmvt nayukpa fehna aiena hosh sepuvka ya ashwt tushpvt itiachi tok; mihmvt nan im ai ithvna vhleha hatuk a anumpa isht im ona chi kv̄t tihlahaya tok.

9. Atuk o nan im ai ithvna vhleha ha im anolit ia hosh ayvt okla ma, Chisvs vt afama cha, Na hvchi yukpashke; achi tok. Mihma ivt yv̄mmak ash o iyi a ont halvli cha, aiokpahanchit okla tok.

10. Yohmi ma Chisvs ash osh, Ik hvchi nukshopo kashke: Oh ia cha, itibapishili vhleha ha ont hvsh im anolikma, Kalili a okla ai onvt yv̄mmak o a sa pesashke, im achi tok.

11. Yohmi na itiachi hosh ayvt okla ma, nan atoni vhleha hatuk kaniohmi kv̄t tv̄maha ha ona cha, nana kv̄t kaniohmi tuk a mominchit na holitompa isht asha pehlich vhleha ha im anoli tok.

12. Mihma yv̄mmak ash osh hochitoka vhleha ai itapihvt



itvnaha cha, it im anumpulit okla in taiyaha mvt, tvshka chipota vhleha hash o tvli holisso lawa ka ima cha,

13. Nan im ai ithvna vhleha hvť ninak o ai vla cha, nusi hosh e maya takla ma, ant hukopvt ishít kvnia tuk oke, hvsh achashke.

14. Yohmikma ilvppak atuk mvt nahullo miko haksobish a afohka hokma, yvmmak oka e hopohlvchi cha, e hvchi hlakofichashke, achi tok.

15. Yohmi ma tvli holisso ash o okla ishi mvt, nan im abvchi tok mak o okla ai yvmohmi tok: yvmohmi tok o anumpa ilvppvt himak nitak ak kia Chu okla itintakla ya ai annghoa hoke.

16. Yohmi ma nan ithvna auah achvfa kash osh Kalili a ilhkolit, nvnih chaha Chisvs vt ai im atokoli tok mak o ona tok.

17. Micha yvmmak ash o pisa mvt, okla ai okpahanchi tok: yohmi kia kanimi kvto anuktuklo tok.

18. Yohmi ma Chisvs vt vla cha, ant im anumpuli mvt, Uba yakni, micha yakni ilvppa aiena nan-isht im ai ahlika puta moma kvť vmmi toba hoke.

19. Yohmi hoka hvsh ilhkoli cha, oklushi moma ka nan ithvna ikbit, Iki, micha Ushi, mikmvt Shilombish Holitopa aiena ho isht a hochifochit hvsh baptismo honchashke:

20. Nan okluha ka nana ho hvchim apesa li tuk a holi-tobla he mak o hvsh im abahanchashke: yohmikma yakeh! vno vt hvchi awant aya li bilia ho, yakni vt ont ai vhla hi oke, achi tok oke. Amen.

# UBANUMPA MAK.

UT HOLISSOCHI TOK.

---

## CHAPTA I.

Chan Baptist vt vbanumpa isht anumpohonli 1; 9 Chan vt Chisvs a baptismochi; 12 atuk o yvmmak atuk a i himmak ma Setan vt Chisvs ash o imomaka pisa. 14 Chisvs vt Kalili a vbanumpa isht anumpohonli; 16 mihmvt Saimon, micha Antilu, mikmvt Chemis, micha Chan aiena ka nan im aiithvna toba chi ka i mihā. 23 Nitak hullo ya Chisvs vt nan ithvnanchi, micha shilombish okpulo kohchichi aiena mvt; 29 Pita tekchi ishki, 32 micha hatak abeka inla yvt laua ho hlakofichi; 35 Chisvs vt vba pit anumpula chi hosh onmvt ik taho kisha ho tani; 39 atuk osh i himmakma Kalili vbanumpa isht ai anumpuli, 40 leplosi vbi yo hlakofichi.

1. CHISVS Klaist Chihowa Ushi im vbanumpa ai ishtia  
*beginning* vmona kvt.

2. Yakeh! vm anumpeshi ya chi tikba chvffichi li hoka mihi yosh chi hina ya tikbanli apoksiacha hi oke.

3. Achvfa hosh yakni haiaka ya a pahaya kvt, Chitokaka ataya hi a apoksiachit i hina puta ka oh apissvlichí, ahan-chishke, achit hopaii vhleha i holisso ha a holisso tok ak o ai itilauí tok.

4. Chan vt yakni haiaka ya a baptismohonchi mvhli tok: mihmvt ai ashvchika puta ka isht a kashofa chi ka, ile kostoninchit baptisma hi a isht anumpohonli tok.

5. Yohmi ma Chutea yakni ai asha tuk, micha Chelusalem ai asha tuk aiena kvt, momvt yvmmak ash o im ai ona cha, nan im ai ashvchika puta ka il anohonlit, Chatan okhina yak o ai im a baptismo tok.

6. Mihmvt Chan vt kamel hishi nafohka fohka cha, na-

hakshup uskofvchi y<sub>o</sub> uskofaiyachi tok : mihmvt hawa, mi-  
cha foi-bila kowi anuka asha yak o vpa beka tok.

7. Mihmvt vbanumpa isht anumpohonli mvt, Ūno a a  
shahli fehna hosh auet siakaiyvt minti, yvmmak okvno vno  
vt i shulush isht-talakchi yak kia a hlipivt hotofi la he si  
ahoba keyu hoke.

8. Ūno vto oka y<sub>o</sub> isht hvchi baptismochi li mvhli hatuk ;  
amba yvmmak okvto Shilombish Holitopa y<sub>o</sub> isht hvchi  
baptismocha chi hoke, achi tok.

9. Atuk o nitak ymma foka ka yakohmi tok : Chisvs vt  
Nasalet Kalili talaia ka vttvt mintit vla cha, Chatan ak o  
Chan a ai im a baptismo tok.

10. Micha oka ya ai vttvt kocha ia mak inli h<sub>o</sub>, vba shu-  
tik vt auet tiwa na Shilombish Holitopa yvt puchi-yoshuba  
chiyuhmi hosh vba mintit yvmmak ash o ant o binili tok.

11. Yohmi ma vba ya anumpa hv auet takali kv,  
Chishno ak osh Svso a holitopa chia hoke ; chishno ak o  
nan-isht chi a sai yukpa hoke, achi tok.

12. Atuk o chekosi mak inli h<sub>o</sub> Shilombish Holitopa yvt  
yakni haiaka ya pit chvffichi tok.

13. Yohmi na yakni haiaka ymma nitak pokoli ushta h<sub>o</sub>  
ahanta na Setan vt imomaka pihisa tok ; mihma napoa ok-  
pulo puta ka itintakla ahanta tok ; mihma enchil vhleha  
hosh nan-isht im anta tok.

14. Chan vt aboha kvlllo fohka ha yo, Chisvs vt Kalili a  
vla cha, Chihowa apehlichika isht anumpa hanta ya isht  
anumpohonli tok.

15. Mihmvt, Nana kv ont aiahlit taha na Chihowa apeh-  
lichika yvt olanlosi vlvshke ; ile kostininchit, vbanumpa ha  
ho yimmí, ahanchi tok.

16. Atuk osh Kalili okhvta lapalika ya aya mvt, Saimon  
vt itibapishi Antilu itatuklot, nvni-hokli yatuk okvt, nvni-  
isht-hokli a okhvta pit okvchi hosh ahashwa na pisa tok.

17. Mihmvt Chisvs vt, Mintit vno ak o hvs si apeha na  
hatak hokli y<sub>o</sub> hvch ikbi lashke, im achi tok.

18. Yohmi ma mih-makinli h<sub>o</sub> i nvni-isht-hokli yash issa  
cha, iakaiyvt okla tok.



19. Mihma yummak atuk a ivt mishema ona mvt, Sebete ushi Chemis, micha itibapishi Chan itatuklo kak kia, peni anuka ya nvni-isht-hokli aiskiachi hosh chiya na pisa tok.

20. Mihmvt mih makinli ho yummak ash o pit i howa tok; mihma yummak ash osh iki Sebete vt hatak ilhtohno vhleha ho iba taklvt peni ash foka na issvt, pit iakaiyvt okla tok.

21. Atuk o Kapenavm ak o okla ai ona tok: atuk o chekosi ma nitak-hullo nitak o sinakak a ont chukowa cha, nana abahanchi tok.

22. Yohmi ma nan isht ai im avchi ka okla anukhlakan-cha tok: yummak okvt nana kvv ai im vhlpiesa hosh nana im abahanchi kia, na-holissochi vhleha yak okvno ik holbo ki tok.

23. Yohmi ma sinakak yvmma hatak vt shilombish okpulo ai i foka hosh asha tuk osh, tahpvlvt,

24. Ikikke! Chisvs Nasalet ai vtta chia ha nanta ho isht e chi ahalaia cho? kvna ho chia hoka chithana li, Chihowa i na-holitopa chia mak oke, achi tok.

25. Mihma Chisvs vt yummak ash im olvbbit, Nukchintot yvmma ish a kohchashke, im achi tok.

26. Mihma shilombish okpulo ash osh yummak ash o haiochechi cha, chitolit tahpvla mvt, yummak ash a kohcha tok.

27. Yohmi ma momvt, okokko! aiahni fehna; yohmi cha, Ilvppvt nanta mak osh yakohmi cho? ilvppak osh nan-isht avchi himona nanta mak oh cho? ai im vhlpiesa hosh yummak ash osh shilombish okpulo vhleha hak kia nan im apesa ma, im antivshke, achit okla it im a ponaklot maya tok.

28. Yohmi ma chekosi makinli ho yummak ash isht annoa kvv Kalili a folumpa yakni moma ka hlopulli tok.

29. Atuk o sinakak a ashvt a kohcha makinli hosh Chemis, Chan itatuklo ka ai it apihvt Saimon, micha Antilu itatuklo in chuka yo okla ont abeha tok.

30. Mihma Saimon tekchi ishki yvt-yvnha hosh itonla tuk o, ashalika yummak ash im anoli tok.

31. Mihma ona cha ibbak a halvllit, tanichi tok; mihma yvnha hash osh ashalika shipa na nan isht im vtta tok.

32. Atuk o ont opia hvshi vt okatula ma, haknip ik in chukmo puta, mihmvt nan-isht-ahullo okpulo ai i foka aiena tuk a, mominchit okla isht im ai vla tok.

33. Mihma tvmaha okla hash osh momvt okhissa ya ant ai itahoba tok.

34. Mihma haknip ik in chukmo ilaiyuka isht abeka tuk a laua ho hlakofichi mvt, nan-isht-ahullo okpulo mvt laua ho kocha weli tok: mihmvt nan-isht-ahullo okpulo yvt ilapa okla ithana hatuk o, ik anumpuli ik im ahno ki tok.

35. Atuk osh ont onnahnli, onnvt ik taho kisha pilla ho, tani cha, kohchvt-ivt haiaka ona cha, vba pit anumpuli tok.

36. Mihma Saimon, micha apeha tuk ash aiena kvv pit iakaiyvt ilhkoli tok.

37. Atuk osh yvmmak ash ont pisa mvt, Hatak momvt chi hoyoshke, okla im achi tok.

38. Mihma auet apanta tvmaha maya kak o kil ohona na yvmmak ma vba isht ai anumpohonli lashke, yvmmak a he mak osh aya li ha tok okvt, im achi tok.

39. Atuk osh Kalili fullota i sinakak puta ka vba isht ai anumpohonlit, nan-isht-ahullo okpulo puta ka kocha wihinli tok.

40. Mihma leplosi vbi yosh ayvt im ona cha, i hvchuk-bihlept im ilbvsha mvt, Ulhpesa ish ahni hokmvt, is sa kashofa hinlvshke, im achi tok.

41. Mihma Chisvs vt i nukhaklo cha, ibbak a pit welit, potoli mvt, Ulhpesa ahni lishke; chi kashofashke, im achi tok.

42. Mihma anumpulit ont issa makinli ho, leplosi ash ot ashalika i kvnia na yvmmak ash osh kashofa tok.

43. Mihma ik annoo ka hi a kvllochi fehna hosh yvmmak ash i mihvt taiyahli cha, ashalika kanima pit chvffichi;

44. Yohmi mvt ahah! aiahnit hatak kvna kia na chik im anolo kashke; amba chi hlakofi hokvt okla ha nan im atokowa chi ka, ia cha, na-holitompa-isht vtta yak o ont ish il imi haiakvchi cha, nana puta ka Moses vt apesa tok mak o ish yvmihchashke, im achi tok.



45. Yohmi tuk kia yummak ash osh ia mvt, anoli fehnvt, nana kash kanima moma ai im annoachi, yohmi na Chisvs vt himmakma ile haiakvchit ayvt tumaha ha chukowa he keyu hosh, amba kochvt yakni haiaka yak o vttvt aya tok: yohmi ma kanima moma a mintit im ai ohona tok.

CHAPTA II.

Chisvs vt hatak palsi isht abeka yo hlakofichi, 1 : 13 Chisvs vt Mahlu vt nan im ai ithvna toba chi ka i miha; 15 micha pvblikan vhleha mikmvt nan ashvchi vhleha aiena ibai impa ka nan isht mihachi ma kaniohmi ho yohmi hatuk vt anoli. 18 Mihmvt nan im aiithvna vhleha ha nan ik hullocho hoka nan isht mihachi; mihma yvmak ash osh ik yohmo kvv im ai vhpesa atuk a miha mvt; 23 nan im aiithvna vhleha ha nitak hullo kobvffi ho nan isht mihachit asha ma, yummak okvt nitak hullo kobvffi hatuk o keyu ka miha.

1. ATUK o nitak kanohmi ma, anonti Kapenavm a ont chukowa tok: mihma aboha anuka asha ka annoa tok.

2. Yohmi ma ashalika lavvt ant itahoba, yohmi na aiasha hi vt iksho ma, okhissa itikba yash kia a hikia hi vt iksho ki tok, mihma vbanumpa ha isht im anumpohonli tok.

3. Yohmi ma hatak vt palsi isht abeka ho ushtvt it i shoyulit, isht im vla tok.

4. Micha okla itakantvli ka, i bilika okla ona he keyu mvt, a hikia ka paknaka ya isht hulmo ya tiwi tok; atuk osh tiwit tahli mvt, palsi isht abeka yvt ai onvtola topa hash okla aka pit bohli tok.

5. Okla na yimmi ka Chisvs vt pisa mvt, palsi isht abeka atuk ash o Svso ma! na chim aiashvchika puta kvv chi ka shofa mak oke, im achi tok.

6. Yohmi kia na-holissochi vhleha kanimi kvv yumma binohmaya tuk vt, chukvsh anukaka isht anukfillit,

7. Na katihmi ho hatak ilvppvt yakohmichit Chihowa ik ahobalot anumpuli cho? Kvta hosh nan ai aiashvchika puta ka kashofa hinla ho? Chihowa ak illa keyu?

8. Mihma yakohmichit okla im anukfila ka Chisvs vt ilap chukvsh ak inli ka isht akostininchi mvt, ashalika, Na katih-



mi h<sub>o</sub> ilvppa puta ka hvchi chukvsh anukaka isht hvchim anukfila cho?

9. Palsi isht abeka atuk a, Na chim ai ashvchika puta kv<sub>t</sub> ch<sub>i</sub> kashofa hoke; im achi kak okmá, keyukmvt, Wá-kayvt, ch<sub>i</sub> potvlhpo a sholi cha, nowá, achi kak okmá, kati-ma kak osh ahchiba kv<sub>t</sub> ik lauwo cho?

10. Yohmi kia Hatak Ushi vt yakni paknaka nan aiashv-chika puta ka kashofa hi vt ai im vlhpiesa hatuk a hvsh akostinincha ch<sub>i</sub> kak o.

11. Palsi isht abeka yash o im anumpulit, Tanit, ch<sub>i</sub> potvlhpo a sholi cha, chin chuka ish iashke; chim achi lishke, im achi tok.

12. Mihma ashalika yvmmak ash ot tanit, potvlhpo ash sholi cha, okla momvt pisa na kohchvt ia tok: yohmi na momvt nukhlakancha mvt, Nitak nan ash ilvppa chohmi na e pisa chatuk keyushke, ahanchit Chihowa ya pit holitobli-chi tok,

13. Atuk o anonti kohchvt ia mvt, oklvta lapalika yo ona tok: mihma okla laua yvt momvt ant im ai itahoba na nan im abahanchi tok.

14. Atuk osh ont ia hosh aya mvt, Lefai Alfevs ushi vt tvli-holisso abohli a asha na pisa mvt, yvmmak ash o, Is siakaiyashke, im achi tok.

15. Atuk o yakohmi tok: Chisvs vt yvmma im aboha anuka ya impa hosh asha ma, pvblikan micha nan-ashvchi vhleha aiena kv<sub>t</sub> laua hosh Chisvs, micha nan im ai ithvna vhleha aiena ka takla binohmaya akinli tok: yvmmak okvt laua hatuk osh, okla apihvt aya tuk a tok.

16. Michá na-holissochi vhleha, micha Falisi vhleha aiena kv<sub>t</sub>, yvmmv<sub>t</sub> pvblikan vhleha, micha nan ashvchi vhleha aiena ka it ibai-impá na pisa mvt, nan im ai ithvna vhleha hash o, Katiohmi h<sub>o</sub> pvblikan vhleha, micha nan-ashvchi vhleha aiena kvno it ibai impvt nan it ibai ishko cho? im achi tok.

17. Mihma Chisvs vt haklo mvt, Haknip im achukma hokvto, alikchi a bvnna keyu, amba abeka kak oke: nan-ashvchi ik im iksho vhleha h<sub>o</sub> hohoyot aya li tok keyu,

amba, nan-ashvchi vhleha yosh ile kostinincha chī kak a tok, im achi tok.

18. Mihma Chan, micha Falisi vhleha aiena nan im ai ithvna vhleha hvt na hullohonchi beka tok: atuk osh ai vla mvt, Nanta katiohmi hō Chan micha Falisi vhleha aiena nan im ai ithvna vhleha hvt na hullohonchi ma, amba chishno na chim ai ithvna vhleha hvto nan ik hullocho cho? im achi tok.

19. Mihma Chisvs vt, Hatak himona ohoyo itauwaya tuk vt takla anta moma ka, i kanomi vhleha hvt nukhaklot na hullocha hinla cho? Hatak himona ohoyo itauwaya tuk vt im asha takla hokvt okla nahullocha he keyu hoke.

20. Yohmi kia hatak himona itauwaya yash ot ai i filvma he nitak vt ai ona he; yohmikmak o nitak yvmma fokakmuno okla nukhaklot nahullocha hi oke.

21. Hatak nana kia nantvna hlilafa himona ka anchi hlipa ya isht akvlli chatuk keyu: yvmmak keyukma, na hlilafa himona vllkvta atuk vt sipokni ash hlilvffi na i shahlit hlilavt okpulo hoke.

22. Mikma hatak nana kia oka-paki himona ya shukcha sipokni yo apitta chatuk keyu: yvmmak keyukma, oka-paki himona yash ot shukcha yash mitahlichī na hlayakma; shukcha yash ot okpula hinlvshke: amba oka-paki himona vt shukcha himona yo vllhpitta pullashke, im achi tok.

23. Atuk o yakohmi tok; nitak-hullo nitak o osapa hlopullit aya tok: mihma nan im ai ithvna vhleha hvt onush a hlinlit itvnova tok.

24. Mihma Falisi vhleha hvt, Yakeh! na-katihmi hō nitak-hullo nitak o nana kv̄t ai vllhpesa keyu ka, okla yvmohmi cho? im achi tok.

25. Mihma, Lewi vt ilap, micha apehvt aya tuk aiena kv̄t hohchvfo mvt, nana ka bvnna cha, a katiohmi tok:

26. Micha na holitompa isht v̄tta i shahli Abaiahla vt ahanta nitak a Chihowa im aboha ya pit chukowa cha, yvmma ai vpa he vllhpesa hatuk keyu, amba na-holitompa isht asha vhleha kak a he tuk a, pvska holitopa ya vpa mvt,

anonti apehvt aya tuk ma ipeta tok a himonna kia holisso hvch ik it im anumpulo chatuk oh cho? im achi tok.

27. Mihmvt nitak-hullo vt hatak ak o im vlhpisa a tok : hatak ak osh nitak-hullo ak o im vlhpisa tok keyushke.

28. Yohmi hoka, Hatak Ushi vt nitak hullo ak kia in Chitokaka yoke, im achi tok.

### CHAPTA III

Chisvs vt hatak ibbak shila hlakofichi, mihma yvmmak o Falisi vhleha hvt vbi brnna hatuk o Chisvs vt kochvt kvnia, 1; 10 mihma okla laua apehvt ilhkoli na lauachit hlakofichi. 13 Mihmvt anum-peshi auah tuklo ho atokoli. 20 Chisvs a i kanomi vhleha hvt tasimbo ho im ahoba, 22 mihma Falisi vhleha hvt Chisvs a ik ahobalot anumpuli; yohmi ma yvmma okla miha ka ahli keyu ka atokolit im anoli. 31 Krna hosh Chihowa nana aiahni puta ka yvmohmi hokvt Chisvs a i kanomi fehna mak oke.

1. ATUK osh anonti sinakak a ont chukowa ma, yvmma hatak vt ibbak shilvt illi yosh asha tok.

2. Mihma nitak-hullo nitak a hlakofichikma, nanakma, nan-vlhpisa onocha hi vt ahnit okla apesahanchi tok.

3. Mihma hatak ibbak shilvt illi yash o Iklvnaka ya wa-kayvt a hikia, im achi tok.

4. Mihmvt, Nitak-hullo nitak a nan achukma ho yvmohmi, keyukmvt achukma keyu ho yohmi kak okma; ilhfio-pak okchalinehi, keyukmvt vbi kak okma, nanta kak osh ai vlhpesa cho? im achi tok. Yohmi kia nan ik acho hosh maya tok.

5. Mihma okla chukvsh kullo ka isht nukhaklot, ik im vlhpiesot filemvt pisa mvt, hatak ash o, Chisemochi, im achi tok. Mihma chisemochi tok; yohmi ma ibbak ash osh falamvt hlakofit in tvnnvp ak inli ho chohmi tok.

6. Mihma Falisi vhleha hvt kocha wiha mvt, ashalika Helotian vhleha aiena kvv yvmmak ash vba hi vt isht it im anumpulit maya tok.

7. Yohmi kia Chisvs ash ot nan im ai ithvna vhleha hash



pehlichí cha, filvmmít okhvta ía tok: nuhma Kalili, micha Chutea aiena minti,

8. Micha Chelusalem minti, anonti Itumea, micha Chatan mish-tvnnvp minti, micha Taia, micha Saiton a fullota minti aiena okla chinto kv̄t nan aiyaka fehna ka yvmihchi h̄o okla haklo mvt, iakaiyvt okla chinto fehnvt im ai ona tok.

9. Mihma okla laua hokvt ik atehlefo ka chí kak o, peni vt im vltaha chí kv̄t, nan im ai ithvna vhleha h̄a i miha tok.

10. Lauachit hlakofichi hatuk; yohmi hatuk oka, nan i palummit aiasha atuk vt momvt yvmmak ash haleli bvnvt okla a hvhlihinchí tok.

11. Mihma shilombish okpulo puta kv̄t yvmmak ash pisa mvt, itikba aka hlipkv̄chi mvt, tahpahanlv̄t, Chishno ak osh Chihowa Ushi chia mak oke, achi tok.

12. Mihma yvmmak ash ot ilap a ik otvnincho ka chí ka, yvma kv̄llochit im apesa tok.

13. Mihmvt nv̄nih chaha yō ont oiya cha, kv̄na h̄o ilap aiahni hosh hoyo na, okla im ai ona tok.

14, 15. Mihma tohno na yvmv̄t ilapa apehvt aya cha, vbanumpa isht ahanta he; micha abeka puta hlakofichit, nan-isht-ahullo okpulo kocha wela he aiena kv̄t, ai im vlpesa chí ka auah tuklo h̄o atokoli tok.

16. Mihmvt Saimon atuk a Pita hochifo tok.

17. Mihmvt Sebate Ushi Chemis itibapishí Chan itatuklo, yvmmak ash o Boaneches hochifo, yvmv̄t Hiloha ushi, achi hoke.

18. Mikma Antilu, mikmvt Fillip, micha Bahlolomu, mikmvt Mahlu, micha Tamas, micha Alfevs ushi Chemis, mikmvt Tatevs, micha Kenan hatak Saimon aiena,

19. Mikmvt yvmmak ash ishit inla im issa tok Chutas Iskaliot vt aiena tok: mihma chuka chukowa tok.

20. Mihma okla laua yash osh anonti ant ai itahoba na ilhpak ak kia okla vpa he keyu ka chohmi tok.

21. Yohmi ma i kanomi vhleha hv̄t haklo mvt, Tasimbo hoke, achi cha, hokla chí hosh okla ilhkoli tok.

22. Atuk o na-holissochi vhleha Chelusalem minti tuk

ash osh, Beelsebub ak o il ai ishi hosh, nan-isht-ahullo okpulo puta ka isht kocha weli hoke, achi tok.

23. Yummak ash o hoyo mvt, nan-isht-vlhpisa ho anum-pulit, Katiohmi kak osh Setan vt Setan a kohcha hinla cho?

24. Micha apelihchika achvfa kvit it a kashapvt ilap ash inli it im i sanali hokmvt, apelihchi achvfa yummak atuk vt talaia he keyu hoke.

25. Mihma chuka achvfa vt it a kashapvt ilap ash inli it im i sanal kmvt, chuka achvfa yummvt talaia he keyushke.

26. Mikma Setan vt ilapo inlit it-a sanalit ahanta cha, it a kashapa hokmvt, kvllot hikia he keyu, amba ont iksho ka he bano hoke.

27. Hatak nana ak osh hatak hlampko in chuka ya ont chukowa cha, im ilayak puta ka wehpula he keyu: vmmona hak o hatak hlampko yak o takchi ho keyukmvt; amba yummak okmvt in chuka ya wehpula hinla hoke.

28. Ahli pulla ho hvchim achi lishke. Hatak puta nan im ai ashvehika yvt okluha, micha kaniohmit Chihowa ik ahobalot anumpuli a puta kvit i kashofa hi oke.

29. Amba kvna hosh Shilombish Holitopa yak o ik ahobalot anumpuli hokvto nitak nana i kashofa he iksho, amba issikkopvt bilia mak osh im vlhpisa hi oke, im achi tok.

30. Yummvt nan-isht-ahullo okpulo yo il ai ishi hoke, okla achi ha tok oka.

31. Yohmi ma itibapishi vhleha, micha ishki aiena kvit ai vla cha, kocha ya ont hiohmayvt, inla atohnot yummak ash pit hoyo tok.

32. Mihma okla laua vt a fuloblit binohmaya tok; yummak ash osh, Yakeh! chishki micha chitibapishi vhleha aiena kvit kocha hiohmaya hosh chi hoyoshke, im achi tok.

33. Mihma afalaminchit, Hvshki micha itibapishi li vhleha aiena kak osh kvta hoh cho? achi tok.

34. Mihmvt filemvt i bilikasi binohmaya kash pisa mvt, Hvshki micha itibapishi li vhleha aiena ka ho pesa.

35. Kvna hosh Chihowa nana aiahni ka yvmohmi hokmvt, yummak osh svtibapishi, micha an tek, mikmvt hvshki aiena mak oke, achi tok.

CHAPTA IV.

Na hokchi nan isht vlhpisa; mīcha kaniohmi kak o Chisvs vt nan isht vlhpisa hō isht anumpuli, 1; 14 na hokchi isht vlhpisa yvt ato-kowrt annoa. 21 Kṛna hosh Chihowa im anumpa ha ithana hok-vto, ai ithana kvt inla āsha ka im avrchā he tuk: 26 vbanumpa hanta hatak chukvsh a fohka hokvt na-nihi yakni a holokchi yvm-mak oka yakohmi hosh ahni keyu kia, offot māhayvt waya cha, vmo ona chatuk a chiyuhmi hoke: 30 mīcha mvstvt nihi ak o it vlhpisa akinli. 35 Chisvs vt kocha umba, mahli kvllo ka im anum-pulit yukobli.

1. ATUK osh anonti okhvta lapalika ya nan ai im avrchit ahanta tok; yohmi ma okla chinto fehna kv̄t im ai itahoba: yohmi na yvmmak ash ot peni yo pit chukowa cha, okhvta paknaka yo binili ma; okla laua yash ot okhvta alaka ak inli hō maya tok.

2. Mihma nana ka lauachit nan-isht vlhpisa hō isht im abahanchi tok: mihmvt nan isht im avrchi kv̄t;

3. Inta! ho haponakló; na-hokchi vt na-hokcha chī hosh ia tok oke.

4. Atuk o hokchi ma, yakohmi tok; kanimi kv̄t hina lapalika yo kaha tok; yohmi tuk o vba hushi puta kv̄t ant vpv̄t tahli tok.

5. Mihma kanimi kv̄t tvli foka yakni āsha fehna keyu hō kaha tok; atuk osh yakni vt i sūko keyu hatuk okvt, chekosi fehna offo tok.

6. Yohmi kia hvshi vt kohcha ma, anakshuv̄t hakshish vt iksho hatuk okvt, bv̄shit kv̄nia tok.

7. Mihma kanimi kv̄t kv̄ti foka yo kaha tok: atuk o kv̄ti vt offo cha, ai olvbi na ik wayo ki tok.

8. Mihma inlaka yvto yakni achukma yo kaha tuk osh, offot i shahlit māhayvt, vnit waya mvt, kanimi kv̄t pokoli tuchina ma, kanimi kv̄t pokoli hannali, anonti kanimi kv̄t tahlepa achvfa vnit waya tok.

9. Mihmvt, Kṛna hosh haksobish isht haponakla hi vt i hinlikmvt, haklashke, im achi tok.

10. Atuk o ilap banot āsha ma, yv̄mma aiasha tūk vt



auah tuklo kash it apeha cha, nan-isht vlhpisa hash im a ponaklo tok.

11, 12. Hvchishno ak okvto Chihowa apehlichika nan ik otano ka hvsh ithana hi vt a hvchim vlhpisa hoke; amba kocha maya kak okvno pisa hokvno pisa kia ik ithano ka he: haklo hokvno haklo kia ik akostinincho ka he mak o, ilvppa puta kvv nan-isht vlhpisa ho ai im vlhtaha hoke: yvmmak keyukma nitak kanima ka chukvsh vt inlvv toba cha, nan im ai ashvchika puta kvv i kashofa hinla hoke, im achi tok.

13. Mihmvt, Nan-isht vlhpisa ilvppa hvch ik ithano cho? mih kvvto katiohmi hosh nan-isht vlhpisa puta moma ka hvsh ithana hinla cho? im achi tok.

14. Na-hokchi vt vbanumpa hak o hokchi hoke.

15. Yohmikma kanima yo vbanumpa hvv a holokchikma, yakohmi kak osh ai itvnowa lapalika kaha mak oke: haklo tuk kia, chekosi mak inli ho Setan vt vlvv chukvsh im a holokchi tuk vbanumpa hash ishit kanchi hoke.

16. Yohmikma anonti, yakohmi kak osh tvli foka yakni a holokchi mak oke: yvmmak okv vbanumpa ha haklo mvt, ashalika na-yukpvv ai okpvchi hoke.

17. Yohmi kia ilap hakshish vt ik im iksho, yohmi hokv chekosi takla kak bano ho kvllot hiohmaya hoke: atuk mvt vbanumpa pulla hatuk mak o nan ilbvsha, keyukmvt na-palvmmi kvv ashakma, chekosi mak inli ho ibetvbli chatuk oke.

18. Mikma yakohmi kak osh kvvto foka yo a holokchi mak oke.

19. Vbanumpa ha haklo; yohmi tukmvt yakni ilvppa nan isht im anukfila, micha nan in laua bvna kvv isht ashvchi, mikmvt nana inla puta ai anushkunna aiena kvv ibai alota cha, vbanumpa hash ai olvbit ishi na ik vno toba kak oke.

20. Mikma yakohmi kak osh yakni achukma a holokchi mak oke; vbanumpa ha haklo mvt; yvmmak ash yimmi cha, vnit wayvt, kanimi kvv achvfa tuk vt pokoli tuchinakma; kanimi kvv pokoli hannali; anonti kanimi kvv tahlepa achvfa ona hoke, im achi tok.

21. Mihmvt, Pvla ha tanchi isht-vlhpisa nutaka, keyuk-

mtv topa nuta yokmá, nana hō talali cha, ai-ō hikia ik o hi-  
iecho ka hi o toba hō?

22. Nana kvt ik otano ka hi osh luma kvt ikshokma,  
anonti nana kvt ik haiako ka hi osh luma tuk vt iksho, amba  
haiaka he ak.ō bano hoke.

23. Hatak nana hosh haksobish isht haponakla hi vt i  
hinlikmtv, haklashke, im achi tok.

24. Mikmtv, Nana hvsh haklo kvt ahah! hvsh aiahnash-  
ke: nan-isht vlhpisa nana hō isht hvsh apesa tuk mvt, hv-  
chishno vt isht hvchim vlhpisa hi oke; mikma na haponaklo  
hvchia hoka i shahlit hvchim ibvlhta hi oke.

25. Kvna hosh ishi hokmtv, mihi yosh im ibvlhta he;  
mikma kvna hosh ik im iksho tuk ma, mihi yō ishi tuk ash  
kia im ai isha hi oke, im achi tok.

26. Mihmtv, Chihowa apehlichika yvt hatak osh na-nihi  
ō yakni anuka pit hokechi:

27. Yohmi cha ninak a nusit, nitak ma tahananikma, na-  
nihi ash ot offot hofantit taiyaha ka, yakohmi kak osh ik  
aiahno;

28. Yakni ak osh ilap inlit wayachi hoka: vmmona ka  
vpi atuk mvt, okshonli, yohmi ha mak osh waya chatuk.

29. Yohmi kia vni vt a lakna hokvno, ai-vmmo ona hatuk  
oka, ashalika isht-vmmo isht iba chukowa chatuk ak o chi-  
yuhmi hoke, achi tok.

30. Mihmtv Chihowa apehlichika ya nanta hak o ohmi-  
chit, nan-isht vlhpisa nanta mak o il ai itilauecha chi  
cho?

31. Mvstvt nihi yvmmak okvt yakni anuka a holokechi  
kvt, na-nihi yakni paknaka moma ka iskitini kvt ik lauwo;

32. Yohmi kia holokechi mvt, offot isht mahayvt, chito  
kvt haiyukpulo moma imaiya ma, naksish vt hochitot fila-  
mohli: yvmohmi na vba hushi puta kvt hoshontika nutaka  
a nusi ka chiyuhmi hoke.

33. Mihmtv ai akostinincha hinla ka, anumpa hash nan-  
isht vlhpisa yvma chohmi ka lauachit isht ai anurapohonli  
beka tok.

34. Amba nan-isht vlhpisa hō keyukmvno ik im anum-

pulo; micha ilapo banot maya hokma, nan im ai ithvna vhleha ha nana moma ka achukmalit im anoli beka tok.

35. Atuk osh nitak yummak atuk vt ont opivt taha ma, yummak ash o, Misha tennvp ak o pit keho hlopulli, im achi tok.

36. Mihma okla laua kash kanima pit yuhli mvt, yummak ash o peni fohka tuk vt moma na okla isht ia tok. Yohmi ma peni inla ak kia apehvt aya tok.

37. Atuk o mahli okpulo chinto kv̄t kocha: yohmi na oka banvtha kv̄t peni ash ai-issot pit vlhpihinta ma, polaka alota tok.

38. Mihma yummak ash osh nusi hosh peni asha ka pilla ho vlhpishi on itonla tok: atuk o okla ont okhevli mvt, Nan ithvnanchi ma! pilla chi ka nan-isht chik ahno cho? im achi tok.

39. Mihma wakaya cha, mahli hash im alvmm̄it okhvta hash, Nuktañlv̄t lumvt ish talaiashke, im achi tok. Mihma mahli hv̄t issa na yokopa achukmvt talaia tok.

40. Mihma, Na katihmi ho hv̄chi nukshopa fehna cho? na katihmi ho na-yimmi kv̄t ik hv̄chim iksho cho? im achi tok.

41. Yohmi ma okla nukshopa fehna mvt, Ilvppvt hatak katiohmi mak atuk a mahli, micha okhvta aiena kak kia im antia cho? im achit maya tok.

## CHAPTER V.

Chisvs vt nan-isht-abullo okpulo laua ho kohchichi, 1; 13 mikmvt shukha aya achvfa ho ont abeha chi ka im ahni. 25 Chisvs vt ia cha ushetik a ont hlakoficha chi ho Chailvs vt im asilhha: mihma ia tuk osh takla ya ohoyo issish ont ia isht abeka yo hlakofichi, 35 mihmvt Chailvs ushetik vt illi tuk a falaminchit tanichi.

1. **ATUK** osh okhvta hash mish tennvp pit tanvblit Katalenes yakni a okla ona tok.

2. Mihma yummak ash ot peni kolhev̄t ia kash o chekosi ma, hatak vt shilombish okpulo ai i foka hosh, yummak



okvt hatak illi aiasha ak o takla vttvt aya yosh hatak illi aiasha ya a kohchvt afama tok.

3. Yohmi ka yvmmak oka hatak nana hosh tvli itatakvoli yoka isht takcha hi o keyu tok.

4. Yvmmak okvt iyi isht talakchi, micha tvli itatakvoli aiena ka isht talahakchi kv, tvli itatakvoli ya hokohlichit, anonti iyi isht talakchi a kobahlihinch; yohmi hoka hatak nana hosh yvmmak oka kostininha he keyu ya tok.

5. Mihma ninak, nitak moma ka nvni hoka, micha hatak illi aiasha aiena kak o vttvt ayvt bilia cha, yahayvt tvli puta ka isht ile boli beka tok.

6. Yohmi tok kia Chisvs vt mishema ho minti na pit pisa mvt, malelit ont aiokpvchit,

7. Chitoli hosh anumpulit, Chisvs, Chihowa nana moma imaiya Ushi chia ka nanta ho vno vt isht chi ahalaia li cho? chik svlvshacho ka chi ka Chihowa pulla ho isht a chim apesa lishke, achi tok.

8. Yvmmak ash ot, Shilombish okpulo chia hvt hatak yvma ish a kohchashke, im achi ha tok.

9. Mihmvt i ponaklot, Chi hohchifo hvt nanta hoh cho? achi tok. Mihma afalaminch mvt, Pi laua hoka, sa hohchifo hvt Lechvn oke, achi tok.

10. Mihmvt yakni ashwa tuk ash a kohchit kanima pit ik tihlelo ka chi ka im asilhha fehna tok.

11. Yohmi ma yvma nvni hoka pit bilika ho shukha laua vt impa hosh maya tok.

12. Mihma nan-isht ahullo okpulo ash ot momvt im ilbvshvt, Shukha laua ak o pit ish pi on tihleli na yvmmak o ont il abehashke, achi tok.

13. Mihma Chisvs ash ot mih mak inli ho vlvhesa im ahni tok. Yohmi ma nan-isht ahullo okpulo vlvhesa hash ot a kohchvt ilhkoli mvt, shukha laua yash ont abeha tok: mihma shukha laua yash osh, yvmvt tahlepa sipokni tuklo foka tuk osh, yihlepa fehvt sakti chaha yo okhva ha pit ai oka kahvt oka ai illi tok.

14. Mihma shukha laua ya impvchit maya tuk ash ot yihlept, vmaha, micha haiaka asha tuk aiena ka ont okla

anoli tok: yohmi ma nana mak osh yvmohmi tuk okma pisa chi hosh ilhkoli tok.

15. Atuk osh Chisvs a okla im ai ona mvt, nan-isht-ahullo okpulo ai i fokvt Lechvn il ai eshi tuk ash ot nafohka fohka cha, im anukfila mvt achukma hosh asha na, okla pisa tok; mihmvt okla nukshopa tok.

16. Mihma okla pisa tuk ash ot nan-isht-ahullo okpulo ai i foka tuk vt im a kaniohmi hatuk; mihma shukha laua yvt a kaniohmi tuk aiena kash okla im anoli tok.

17. Mihma i yakni a kohchvt aya hinla ka, yvmmak ash o okla im asihhla tok.

18. Yohmi na peni a ont chukowa ma, nan-isht-ahullo okpulo ai i foka tuk ash osh awant aya hinla kv im asilhha tok.

19. Yohmi kia Chisvs vt vlhpesa ik im ahno hosh, amba, Chin chuka ia cha, Chitokaka yvt chi nukhaklo cha, na chinto fehna ka a chim ataiyahli tuk a chi kanomi vhleha ha ish im anolashke, im achi tok.

20. Mihma filvmmi ia mvt, na chinto-nana mak o Chisvs vt im a tahli tuk a Tekapolis a ai anohonli tok. Yohmi ma okla momvt nukhlakancha tok.

21. Mihma Chisvs ash ot peni fohka cha okhvt in tvn- nvp ash inli ho pit tanvbli ma, okla laua hosh im itahoba tok; mihma okhvt pit bilika ho anta tok.

22. Mihma sinakak apesvchi vhleha achvfa Chailvs hoh- chifo hosh vla cha, yvmmak ash ant pisa mvt, iyi ituma ya hlipvt,

23. Im ilbahasha fehnvt, Svso tek iskitini vt illi mak osh itonlvshke: ish ona cha, hlakofa he mak o chibbak a ont isht ish umbitepa hokbano chim ahni lishke: yohmikma okchaya he banoshke, im achi tok.

24. Mihma Chisvs vt awant ia tok: mihma okla laua kv a hahlihinchit apehvt aya tok.

25. Atuk o ohoyo achvfa hosh yvmvt issish ont ia vbi tok a afvmmi auah tuklo;

26. Yohmi hatuk o alikehi lawa ka nan isht i palvmmi ai im a pisvt, nana im asha tuk vt moma kampilvt tahli; yohmi

kvt achukma hi vt iksho, amba okpulo kvt i shaht ia bano tok.

27. Atuk osh Chisvs a haklo mvt, okla itakantvli ka asha ka imma yo ont chukowvt, im anchi ya ont potoli tok.

28. Yohmi kvt im anchi ak illa ho ont ak potoli kia, sa hlakofa hinla hoke, ahnit im anukfila hatuk osh.

29. Mihma issish a mitafa yash osh ashalika shipa tok: mihma ililli yvmmak atuk a a hlakofi kvt ilap haknip anuka ak inli ka isht akostininchi tok.

30. Mihma Chisvs ash osh isht-a-hlakofi vt im a kohcha kvt mih-makinli ho akostininchi hatuk osh, okla laua itin-takla ash a filemvt, Kvt hosh vm anchi ya potoli cho? achi tok.

31. Mihma nan im ai ithvna vlheha hvt, Okla laua hvt chi a kantvliit knia ka ish pisa kvt, Kvt hosh sa potoli cho? ish achi ha cha, im achi tok.

32. Mihma yvmma yvmihchi tuk ash o pisa bvna kvt filemoa tok.

33. Yohmi ma ohoyo hash osh nana kvt ai i kaniohmi tuk vt ithana hatuk osh, nukshopvt wvnihinchi hosh vlv, itikba ya ant hlipia mvt, ai ahli mak o im anoli tok.

34. Mihma yvmmak ash osh, Svso tek ma! na chi yimmi yak osh chi hlakofichi hoke; nuktaiyavt, micha ililli hatuk a ai i hlakofit ish ayashke, im achi tok.

35. Anumpuli kvt isht anta moma na kaniohmi kvt sinakak apesvchi in chuka minti hosh ai vla mvt, Chiso tek vt illishke; na katihmi ho nan-ithvnanchi a ish im ahchibali na himak a cho? achi tok.

36. Chisvs vt anumpa hvt anumpa na haklo makinli hosh, sinakak apesvchi ash o, Chi komunta na; amba na chi yimmi kak illashke, im achi tok.

37. Mihmvt-hatak nana kia apvhvt aya hi a ik ahno mvt, amba Pita, micha Chemis, mikmvt Chemis itibapishi Chan aiena kak illa tok.

38. Atuk osh sinakak apesvchi in chuka ash vla mvt, okla yahapa, micha nishkin okchi minti, mikmvt chitolit yaiya fehna aiena hosh maya na pisa;



39. Yohmi cha pit chukowa mvt, Na katihmi ho yakohmit yahapvt, yaiyvt hvsh aiasha cho? ohoyo himita vt illi ho keyu, amba nusi hoke, im achi tok.

40. Mihma ishit yopulvt olvli tok. Yohmi kia yvmmak ash o mominchit kocha welit tahli mvt, ohoyo himita iki micha ishki itatuklo, mikmvt apehvt aya tuk ash aiena ho pehlichu cha, kanima ohoyo himita vt ai itola kash pit chukowa tok.

41. Mihmvt ohoyo himita yash ibbak a ont halvlli mvt, Talihla kumi, im achi tok; yvmvt toshowa kv, Ohoyo himita ma! tani, chim achi lishke, achi hoke.

42. Yohmi ma ohoyo himita yash ot ashalika tani cha, nowa tok, vta tok afvmmi auah-tuklo hatuk okvt. Yohmi ma nukhlakancha chinto fehna okla nukhlakancha tok.

43. Yohmi ma yvmmak oka hatak nana kia ik akostinincho ka hi a i miha tok; mihmvt nanasi kia i hoyo na impa hinla ka miha tok.

## CHAPTER VI.

Chisvs vt vbanumpa isht anumpohonli: yohmi ma im ai okla achvfa yvt kanimanchi, 1. 7 Vbanumpa isht anumpula chi ka im anumpe-shi auahatuklo ka pit tihleli mvt, nan-isht-ahullo okpulo puta imaiya chi ka im apesa. 14 Helot vt Chan a abolia kylo fohki; atuk osh tekchi ash osh anukfohkichi ho, noshkobo tvbli tok. 30 Im anumpe-shi vhleha hv famvvt Chisvs a im ai ona; 34 Chisvs vt hatak tahlepa sipokni tahlapi ho nan im avrchit ahanta mvt, pvska lumbo tahlapi, micha nni tuklo aiena tuk a okla ha impvchi.

1. ATUK osh yvmmak ash vttvt ia mvt, ilap i yakni ash inli ho ona; yohmi ma nan im ai ithvna vhleha hv apihvt aya tok.

2 Atuk o nitak-hullo nitak ai ona ma, sinakak anukaka yo nana ai ithvnanchi tok; mihma yvma haklo mvt, lauvt nukhlakancha mvt, Katima yak o hatak ilvppvt na yakohmi ka ai ithaiyana tuk o? mikma isht a hopoyuksa ilvppvt nanta hokak osh yvmvt anukfohka tuk o, nafehna yakohmi puta kv ibbak atuk ma isht ai yvmohmi cho?

3. Ilvppvt Meli ushi, Chemis micha Choses, mikmvt Chuta anonti Saimon aiena ka itibapishi chuka ikbi yash keyu hō ? mikma in tek vhleha mvt ilvppa pi takla maya keyu hō ? achi tok. Mihmvt yummak ash o okla isht ai ibetvbli tok.

4. Yohmi kia Chisvs ash ot, Hopaii vt ik holitopo hosh ahanta keyu kia, amba ilap i yakni ak inli, micha i kanomi vhleha, mikmvt in chuka-chvfa aiena takla ahantak mak bano chatuk oke.

5. Mihmvt yummak oka na-fehna nana ka ik ai yvmihcho ka hi vt ahni tok: amba hatak abeka kaniohmi kak illa hō ibbak isht umbitepvt hlakofichi tok.

6. Mihmvt okla na yimma he keyu kak oka, okokko ! aiahni tok. Mihmvt tmahushi taloha ka fullokvchit ayvt nan-ithvnanchi tok.

7. Atuk osh auah-tuklo kash o hoyo cha, tuklo aiyyukachit kanima pit tihleli mvt, nan-isht-ahullo okpulo vhleha ha ai imaiya he mak o im apesa tok;

8. Mihmvt itvnowvt aya kvv nana kia isht ik ayo, amba tvbi ak illa he; bahta vt iksho; pvska mvt iksho; tvli holisso kia i shukcha ya ik foko ka he;

9. Amba shulush ak o honla he; mikmvt nafohka lumbo tuklochit ik fohko ka chi hō im apesa tok.

10. Mihmvt peh kanima yo aboha ya ont hvsh chukowakmvt, yummak o hvsh ai ahashwa tuk osh a kohchvt hvsh ayashke.

11. Mikma kvna kia ik hvchi aiokpacho, micha ik hvchi haponaklo aienakma, yummak ash a kohchvt hvsh iakmvt, nan-isht im atokoli mak o hvchi iyi pvtha nuta hituk tohbi asha ka hvsh tahtolashke. Ahli mak o hvchim achi lishke, Nan-vlhpisa chinto nitak ma Sotom micha Komola aiena kvto pit im vlhpisa kvv tmaha yummak atuk a i shahla hi oke im achi tok.

12. Mihma ilhkoli mvt, hatak puta kvv ile kostininha he ak o isht anumpohonli tok.

13. Michā nan-isht-ahullo okpulo a lauachit kocha weli mvt, anonti abeka yatuk ash lauachit bila isht a hvmmichit hlakofichi tok.

14. Mihma miko Helot vt yvmma pit haklo, (hohchifo kv̄t kanima annoa kv̄t a mominchi hatuk oka;) mihmvt, Chan Baptist vt illi tuk vt tani hoka: yohmi hatuk o na-fehna puta kv̄t yvmmak ash o ai isht il otvnihinchishke, achi tok.

15. Kanimi kv̄to, Elias ak oka, achi ma: kanimi kv̄t Hopaii oka: keyukmvt hopaii vhleha ha tok achvfona ma chohmi hoka, achi tok.

16. Yohmi kia Helot ash ot yvmma haklo mvt, Chan noshkobo tvbli li chash oka: illi tuk vt tani hoke, achi tok.

17. Helot vt itibapishi Filip a tekchi, Helotias ak atuk pulla mak o, ilap inlit pit on tihlelit, Chan a ishit takehi mvt, aboha kv̄llo fohki tok: yvmmak oka itauwaya tuk okvt.

18. Chan vt Helot a, Chitibapishi tekchi a ish itauawayā hi a chim v̄lhpesa keyu hoke, im achi tuk a tok.

19. Yohmi hatuk o Helotias vt yvmmak ash o i nukkilli cha, vbi ka ahni; yohmi kia na kanihma he keyu ki tok.

20. Helot vt Chan yvmmak okvt hatak ai v̄lhpiesa, micha ai ahli achukma hoka ithana hatuk osh, holitoblit nan ik i kanihmo ka hi a ahni tok; mihmvt yvmmak ash im a haponaklot, nana ka lauachit ai yvmohomi, mihmvt na yukpvt i haponaklo beka tok.

21. Atuk osh ont ai v̄lhpiesa nitak vt-ai ona ma, Helot vt ilap ai v̄tta tok nitak o i hochitoka vhleha, kv̄pitr̄ni hochito, mikmvt Kalili i holitompa vhleha aiena ka opiaka im pa im ikbi tok.

22. Atuk o Helotias yvmmak ash ushitek vt ant chukowa cha, hihla ma, Helot micha apehvt binohmaya tuk aiena kash ot na-yukpa ma, miko yash ot ohoyo himita ash, Peh nana ho ish ahni cha is sv̄m asilhhakma, chima lashke, im achi tok.

23. Mihmvt anumpa kv̄llo im isht il ai onochit peh nana ho is sv̄m asilhhakma, apehliechi li iklv̄nna hatuk ik nana kia, chima lashke, im achi tok.

24. Mihma yvmmak ash ot kohchvt ia mvt, ishki ash o,



Nanta hak o asilhha la chi cho? ont im achi ma, yummak ash osh, Chan Baptist noshkobo hak o', achi tok.

25. Mihma tushpvt chekosi makinli ho ont chukowvt, miko ash im ona mvt, Chekosi mak o, Chan Baptist noshkobo yosh ampo fohka ho, is soma he ak o ahni lishke, achit im asilhha tok.

26. Mihma miko ash ot nukhaklo fehna tok: yohmi kia ilap vt anumpa kvllo ikbi tuk pulla, micha apehvt binohmaya hatuk pulla mak o ik im ai ahlo ka hi a ik ahno ki tok.

27. Mihmvt miko ash ot ashalika nan-atoni pit chvffichi mvt, noshkobo ya isht vla hi a im apesa tok; mihma ia mvt, aboha kvllo anukaka akinli ho noshkobo ya ont a tvbli tok.

28. Mihmvt noshkobo hash ampo fohkit isht vla cha, ohoyo himita yash o ima na, ohoyo himita yash ot ishki a ont ima tok.

29. Yohmi ma nan im ai ithvna vhleha hash ot yvmma haklo mvt, okla ai vlvvt illi haknip ash ishit, hatak illi aiasha yo bohli tok.

30. Mihma anumpeshi vhleha hash ot Chisvs a ant im ai itahoba cha, nana ka a kaniohmi tuk, micha nan abvchi tuk puta ka mominchit im anoli tok.

31. Mihma yummak ash o, Hvchishno banot flvmmmit haiaka oh ia cha, chekosi takla ka mayvt ho fohá, im achi tok; lavvt ai áhanla ma, anonti ilhkohonli aiena hatuk o, peh maya cha impa kak kia impa he keyu ehohmi tok.

32. Mihma lumvt peni pit vlhto cha, a haiaka ka pit ilhkoli tok.

33. Mihma ilhkoli ka okla pisa ma, anonti ithana kvv lauua tok: micha tmaha puta ka a kohchvt aka itvnowa hosh yummak ash pit yihlepa tuk osh, yummak ash o imaiya cha, ont im itvnaha tok.

34. Atuk o Chisvs ash ot ont kohcha cha, okla lauua fehna ho pisa mvt, chukfulhpoba yosh apesvchi iksho ho itilauui hatuk o i nukhaklo tok: mihmvt himona nana ka lauachit im abvchit isht ia tok.

35. Atuk o nitak ash ot ont shohba hosi ma, nan im ai ithvna vhleha hash osh im ai ona mvt, Ilvppak okvt yakni haiaka, anonti nitak mvt shohbit mahayvshke.

36. Kanimā pit ish tihleli na yakni auet i bilika tvmahu-shi puta ka itvnowvt, nana vpa hi vt ik im iksho hatuk okvt, pvska okla chumpashke, im achi tok.

37. Mihma, afalaminchi mvt, Ilimpa ha oh ipetá, im achi tok. Mihma, Ivt pvska iskvli tahlepa tuklo ai vlbi o ont e chumpa cha, ilimpa ha il ipeta chi hoh cho? im achi tok.

38. Mihma, Pvska katohmi ho hvsh ishi ho? ont ho pe-sá, achi ma; okla pisa mvt, Tahlapī cha, nvni tuklo hosh aienrvshke, achi tok.

39. Mihma it a kvshkolit mominchit hvshuk okchaki ya ai o binohlicha chi ka, im apesa tok.

40. Mihma tahlepa achvfa, anonti pokoli tahhapi, yohmit it a kvshkovt binohli tok.

41. Mihma pvska tahlapi, micha nvni tuklo aiena kash o ishi cha, vba pit chakalit aiokpvchi mvt, pvska yash tushalichi cha, okla ha in talohla chi ho, nan im ai ithvna vhleha hash o ima tok: mihmvt nvni tuklo kash o okla mominchit in tushtuli tok.

42. Yohmi ma momvt impvt okla kaiya tok.

43. Mihma boshulli vt nvni pit aiena kvv kishi auah-tuklo ho ishi tok.

44. Yohmi ka pvska ya okla vpa tuk vt hatak tahlepa sipokni tahlapi foka tok.

45. Mihma ilap vto okla ha kanima pit tihlelit anta takla ma, nan im ai ithvna vhleha hash osh peni pit vlhto cha, tikba ivt mish tvnnvp Betsaita okla ona chi ka, mih makinli ho i miha tok.

46. Atuk osh okla hash kanima pit tihleli mvt, vba pit anumpula chi hosh nvni chaha yo pit oiya tok.

47. Atuk o ont opivt taha ma, peni ashot okhvta iklvna ya aya ma, ilap bano hosh haiaka ya anta tok.

48. Atuk o mahli ak osh a sanali hatuk o peni mofi kvllo fehvt aiasha na pit pisa tok: atuk osh ninak isht vlhpisa

ont ai ushta foka ho okhvta paknaka ya a nohowt, ayvt im ona, yohmi kv̄t ont ia hi a aiahni tok.

49. Yohmi kia yvmmvt okhvta paknaka ya a nohowt aya na okla pisa mvt, shilup atuk o okla im ahoba mvt, tah-pv̄la tok.

50. Momvt okla pisa hatuk osh komunta ha tok. Mihma ashalīka pit im anumpulit, Hv̄chi nuktanla achukmashke. Ūno ash sia hoke, hv̄chi nukshopa ná, im achi tok.

51. Mihmvt peni ash ont ibachukowa ma, mahli hash osh issa tok: mihma okla nukhlakancha atampa fehna mvt, okokko! aiahni tok.

52. Yohmi kv̄t okla ak osh chukv̄sh kv̄llo hatuk osh, pvska yatuk ash okla pit ik anukfillo kak a tok.

53. Atuk osh yvmmak ash pit tanv̄blit Kenesalet yakni a okla ai v̄la mvt, v̄hli ha ont ataiyv̄li tok.

54. Mihma peni ash okla a kocha wiha ma, mih makinli ho yvmmak ash okla pit ithana tok.

55. Mihmvt yihlepvt yakni auet a bilika ka mominchit hlopullit ayvt, abeka puta tuk ash topa onochit sholit, yvm-mak ash osh kanima yo anta na haklo mvt, isht itv̄nowa tok

56. Mihmvt tv̄mahushi, okmá, keyukmvt, tv̄maha chito yokmá, yakni kocha yokmá nana peh kanima yo ona hoka, abeka ya okla ai itv̄naha ya ashachi mvt, yvmmak ash o im ilefoka a aposhokv̄chi ak oh kia okla potola hinla ka, okla im asilhha tok: mihma yvmmak ash okla potonli aiyuka hokv̄to, momvt hlakofi tok.

## CHAPTA VII.

Chisvs nan im ai itv̄na v̄hleha hv̄t ibbak ik ahchifo hosh isht impa ka, Falisi v̄hleha hv̄t nan isht mihachi, 1; 8 mihma ilap ak osh anum-pa kochanli nan v̄lhpisa tikba in tonla cha, Chihowa i nan v̄lhpisa ha isht kobv̄ffi hatuk a Chisvs vt atokolit im anoli: 14 yohmi kv̄t nana hosh hatak chukv̄sh a a kocha ilv̄ppak osh hatak a okpv̄ni hoke, achi. 24 Chisvs vt Silofenisian ohoyo ushetk a hlakofichi mvt; 31 hatak vt ik haponaklo, micha anumpuli anuktuklot aiena tuk a, hlakofichi.



1. YOHMI ma Falisi vhleha, micha na-holissochi kanohmi Chelusalem minti tuk aiena kv̄t ant im ai itahoba tok.

2. Atuk osh nan im ai ithvna vhleha kanimi kv̄t, ibbak liteha yo, yvmmvt ibbak ik ahchifo kak o miha, pvska isht vpa hosh maya na pisa mvt, nan isht a mihachi tok.

3. Yohmi kv̄t Falisi vhleha, micha Chu okla moma aiena kv̄t in tikba vhleha nan im vlhpisa halanli fehna hatuk osh, achukmalit ibbak achifa ha yo keyukmvt, impa keyu beka tok.

4. Mihmvt ilhpak ai-itatoba mintit vla kv̄t, ibbak achifa ha yo keyukmvt, impa keyu beka tok. Micha nana inla ishtishko, micha ampo, mikmvt asonak lakna, anonti aiimpa achifa aiena ka a puta chohmi nan-isht-a hullocha he im vlhpisa tok vt lauvt asha hoke.

5. Yohmi mvt Falisi vhleha, micha na holissochi vhleha aiena kash osh, i ponaklot, Na katihmi ho na chim ai ithvna vhleha hv̄t pin tikba vhleha nan im vlhpisa ya ik halanlo hosh, amba ibbak vt ahchifa keyu ho pvska isht vpa cho? achi tok.

6. Mihma afalaminci mvt, Nan ilahobi hvchia ha vlhpisa ho tikbanli Esaias vt isht hvchi anohonli tuk vt, okla ilvppvt iti-vlbi yokvno isht sa holitobli kia, chukvsh okvto auet a hopakishke.

7. Yohmi kia nana avvchi kv̄t hatak i nan-vlhpisa yo ithvnanchi hokvt, nana vlhpesa hi o keyu ho okla si aiokpachanchishke, achit holissochi tok.

8. Yohmi kv̄t Chihowa i nan-vlhpisa hoka naksika pit hvsh bohli cha, hatak i nan-vlhpisa, ampo, micha ishtishko aiena achifa ho hvsh halanlishke; yohmikmvt nana yvmma ai itilau ka hvsh a yvmohmi kv̄t lauvshke, im achi tok.

9. Mihmvt hvchishno hvchi nan vlhpisa ya hvsh ai ahli-cha chi kv̄t, Chihowa i nan-vlhpisa ya aiahli hosh hvsh shiti-lemvshke.

10. Moses okvto, Chiki, micha chishki aiena ka ish holi-toblashke: yohmikma, Kvna hosh iki okma, keyukmvt ishki

okmá, nana hō shitlemvt na mihachikmvt, illi mak o illi pullashke, achi tok.

11. Yohmi kia hvchishno vto, Hatak vt iki, keyukmvt ishki okmá nana kash o vm isht ish ai yukpa he tuk a Kolban oke, yvmma achi hokmvt, vba-isht aiokpvchi isht, vlpisa hoke, achi mak okvt nan ik i kanihmo kashke, hvsh achi;

12. Yohmikmvt himmakma iki, ishki ita tuklo ka nana kia isht im vtta hi a hvch ik im ahnot,

13. Hvchin tikba vhleha i nan-vlpisa isht hvsh abvchi pulla hosh Chihowa im anumpa ha hvsh akshochishke; micha nana yvmma ai itilau ka a hvchi yvmohmi kv lau-vshke, im achi tok.

14. Micha okla hash mominchit hoyot itahobit taiyahli mvt, Hvsh moma kv hv sa haponaklot, hvsh akostinin-chashke.

15. Nana hak osh kocha mayvt hatak a itih fohka kv, okpvna hi vt ikshoshke: amba nana kv a kohcha hokvto, yvmmak osh hatak a okpvni hoke.

16. Hatak nana hosh haksobish isht haponakla hi vt i hinlikmvt, haklashke, im achi tok.

17. Atuk o okla aiasha kash vttvt aboha ont chukowa ma, nan im ai ithvna vhleha hash osh nan-isht vlpisa kash isht im a ponaklo tok:

18, 19. Mihma, Hvchishno ak kia na hvch ik akostinin-cho fehna akinli hō? peh nana hosh kocha mayvt hatak a itih fohka kv okpvna he keyu, chukvsh ak o pit chukowa hō keyu hokvt, amba takoba yak o ont chukowa tuk mak osh, anonti a hlopulli kv ilhpak moma ka ai it im vlpesvchi ka hvch ik akostinincho cho? achi tok.

20. Mihmvt, Nana kv hatak a a kohcha yvmmak osh hatak a okpvni hoke.

21. Hatak haknip anuka chukvsh ak o im anukfila okpulo, hau puta, ohoyo ik im iksho, micha hatak ik im iksho it in lumaka:

22. Hatak bika vbi, hukopa, inla nan im anushkunna, nan i nukkilli, haksichi, hau anukfohka, nishkin isht ik ai

vlhpeso, Chihowa ik ahobalo, ilefehnvchi, im anukfila iksho puta kv̄t a kohcha hoke.

23. Nan ik vlhpeso ilvppa puta moma kv̄t anukaka yak o asht kohcha hosh hatak a okp̄vni hoke, achi tok.

24. Mihmvt yvm̄mak ash asht wakaya mvt, ivt Taia micha Saiton aiena yakni vhli h̄a ona cha, aboha ont chukowa mvt, hatak nana kia ik akostin̄incho ka hi a ahni tok; yohmi kia kaniohmit luma he keyu ki tok.

25. Ohoyo hvt ushetik himita vt na shilombish okpulo ai i foka hatuk o, yvm̄mak ash pit haklo mvt, onvt iyi ituma ya hlipia tok oka.

26. Ohoyo hvt Klik osh Silofenisian im okla ai achvfa a tok: mihmvt ushetik a na-shilombish okpulo a ai ishit i kohcha hinla ka yvm̄mak ash o im asilhha tok.

27. Yohmi kia Chisvs vt, Ulla vhleha ak osh tikba kaiya ha yo; vlla vhleha i pvska ya ishi cha ofi puta ka pit i pila he vlhpesa keyu hoka, im achi tok.

28. Mihma afalaminchi mvt, Ahlishk̄e Chitokaka ma! yohmi kia ofi puta kv̄t ai impa nuta ya vlla vhleha im pvska boshulli yak o ai vpa chokvmo, im achi tok.

29. Mihma yvm̄mak ash o, Anumpa ilvppa pulla hatuk mak o ish iashke; chiso tek a nan-isht-ahullo okpulo vt a kohcha hoke, im achi tok.

30. Atuk o ilap in chuka yash ona mvt, nan-isht-ahullo. okpulo vt a kohcha tuk o, ushetik ash osh topa paknaka itonla na ont pisa tok.

31. Mihma anonti Taia micha Saiton itatuklo yakni ash issvt ia mvt, Tekapolis yakni a iklv̄nna hlopullit ayvt Kalili okhvta h̄a ona tok.

32. Mihma achvfa hosh ik haponaklo, micha anumpuli anuktuklo aiena hatuk o yvm̄mak ash isht im vla; yohmi mvt yvm̄mak ash o ibbak a isht umbitepa hinla ka, okla im asilhha tok.

33. Mihma yvm̄mak ash o okla laua ya a kohchit nak-sika isht ona cha, haksobish a ibbak ushi pit hiohlich̄i mvt, tofa cha, isunlvsh a pit halelich̄i tok.



34. Mihmvt, pit vba chakalit pisa mvt, hihvt, Effahlá, im achi tok: yvmmut ish tiwashke, achi hoke.

35. Mihma yvmmak ash osh ashalika haksobish vt wakama ma, anonti isunlvsh isht talakchi vt yuhapa na kohchi achukmvt anumpuli tok.

36. Yohmi ma hatak nana kia okla ik im anolo ka chi ka, im apesa tok. Yohmi kia i shahlichit im apesa kak o, anonti okla anoli kv̄t isht i shahli fehna tok.

37. Mihmvt nukhlakancha kv̄t atampa fehna mvt, Yvm-mak okvt nan okluha kv̄t vhpesa bano hō yvmihchishke: ik haponaklo atuk a haponaklochi mvt, anonti ik anumpulo atuk a anumpuli ikbishke, achi tok.

CHAPTA VIII.

Chisvs vt pvska lumbo untuklo, micha n̄ni chipunta kanomosi aiena tuk a hatak tahlepa sipokni ushta im̄p̄vchi, 1; 11 Falisi v̄hleha h̄a nan isht ai atokowa, ya i haiakv̄chi ik b̄vno; 14 mihma nan im ai ithvna v̄hleha hv̄t Falisi v̄hleha, micha Helot aiena i na-pvska ishit-shatv̄mmi a ahah! okla im ahna chi ka i miha. 22 Betsaita ya, hatak l̄pa yvt anta tuk o, Chisvs vt hoponayochi. 27 Pita yvt, Chishno ak osh Klaist chia mak oke, atokolit achi ma, Chisvs vt im aiokpanchi; ilap̄ ak o il im antia hosh ile kaiyanchit nana palv̄mmi puta ma e pihisa chi hokv̄to ik pi nukwaiyo ka hi a, Chisvs vt pim abahanchi.

1. NITAK yvmma foka ma okla hv̄t laua fehna, micha vpa hi vt nanasi kia ik im iksho ma, Chisvs ash osh nan im ai ithvna v̄hleha hash hoyo mvt,

2. Okla laua vt si apehvt maya na himak nitak tuchina ka nana vpa hi vt ik im iksho hatuk o, i sa nukhakloshke.

3. Yohmi kv̄t okla ik impo hō in chuka ya pit yuhli li hokma, kanimi kv̄t mishema hō minti hatuk okvt, takla tikamba hinlvshke, im achi tok.

4. Mihma nan im ai ithvna v̄hleha hash osh, Yakni haiaka ilv̄ppa katima yak o hatak vt pvska ya ai ishi hosh okla ilv̄ppa fihobla hinla hō? im achi tok.

5. Mihma i ponaklot, Pvska yvt katohmi, hō hv̄sh ishi hō? im achi ma, Untuklo, achi tok.

6. Mihma okla hvt binohla chī ka apesa tok; micha pvska untuklo kash ishi cha, vba pit aiokpvchi cha boshullichi mvt, okla ha itikba in talohla chī hō nan im ai ithvna vhleha hash ima ma, yvmmak ash osh okla hash itikba in talohli tok.

7. Micha nvni chipunta kanomosi ka okla isht aya tok; atuk o yvmmak ash o vba pit isht aiokpvchi mvt, yvmmak-ma itikba in talohla chī ka apesa tok.

8. Yohmi na okla impvt kaiya tok: mihma ilhpak boshulli atampvt asha ka kishi untuklo hō okla ishi tok.

9. Mihma okla impa tuk vt tahlepa sipokni ushta foka tuk a tok; yohmi ma okla hash kanima pit yuhli tok

10. Mihmvt ashalika nan im ai ithvna vhleha hash it apihvt peni pit fohkvt ia mvt, Talmanuhla yakni a kaniohmi hō ona tok.

11. Mihmi Falisi vhleha hvt ayvt ai vla cha, imomaka pisa hosh, nan isht ai atokowa vba minti ka okla ai im a hoyo hosh himona isht it im anumpulit aiasha tok.

12. Mihmi chitolit chukvsh ai anukaka hiha mvt, Na katihma hō hatak himonasi aiasha ilvppvt nan isht atokowa ya okla hoyo cho? Ahli mak o hvchim achi lishke, Hatak himonasi aiasha ilvppa nan-isht atokowa nana hosh in takala he keyu mak oke, im achi tok.

13. Mihmvt issvt ivt, peni ash o anonti chukowa mvt, mish-tvnnvp o ia tok.

14. Mihma nan im ai ithvna vhleha hvt pvska okla isha he tuk vt immihaksi, yohmi mvt peni a foka kvv pvska achvfa ka ont ia keyu hō okla isht aya tuk a tok.

15. Mihma yvmmak ash osh achukmalit nan i mihvt, Falisi vhleha i pvska isht-shatvmmi, micha Helot i pvska isht-shatvmmi aiena ka im il anuktahlvt ahah! ahnit hvsh pihisashke, achi tok.

16. Mihma ilap bika it im anumpulit, Pvska vt ik pim iksho kak oka, achi tok.

17. Mihma Chisvs vt akostininchi mvt, Na katihmi hō pvska vt ik hvchim iksho kak atuk a hvsh miha cho? hvch ik akostinincho, mikmvt hvch ik ithano aiena kvv moma ho? hvchi chukvsh vt kullo kvv moma ho tuma!

18. Hvechi nishkin vt asha kv̄t hvech ik peso cho? micha hvechi haksobish vt hinli kv̄t, hvech ik haponaklo hō? mikmvt hvech ik ithano cho?

19. Pvska tahlapi hō hatak tahlepa sipokni tahlapi ka in tushahlichī li ma, boshulli vt kishi alota katohmi hō hvsh ishi ha tok o? im achi ma, Auah-tukló, okla achi tok.

20. Anonti tahlepa sipokni ushta ma, untuklo tuk a a boshulli vt kishi alota katohmi hō hvsh ishi ha toko? achi ma, Untuklo, im achi tok.

21. Yohmi ma, Katiohmi hō na hvch ik akostinincho hoh cho? im achi tok.

22. Atuk osh Betsaita vla; yohmi ma hatak lva yō okla isht im ona mvt, yvmmak ash potola chī ka im asilhha tok.

23. Mihma hatak lva yash o ibbak a halvlli cha, tvmaha ha ishit kohcha; yohmi mvt nishkin a im on tofa cha, ibbak a isht umbitepa mvt, Nanasi kia ish pisa cho? achit i ponaklo tok.

24. Mihma vba chakali mvt, Hatak vt iti yak o chohmi hokak osh itvnowa hō pisa lishke, achi tok.

25. Yohmi ma anonti nishkin ash o ibbak isht umbitepa mvt, vba chakalichi tok: mihma hlakofi cha, hatak moma ka pisa achukma tok.

26. Mihma in chuka pit chvffichi mvt, Tvmaha ha ont chik chukowokmvt, anonti tvmaha asha ka achvfona kia chik im anolo kashke, achi tok.

27. Mihmvt Chisvs vt nan im ai ithvna vhleha ha ai itapehvt kohchvt ivt, tvmaha Sesalea Filippi ya ona tok: mihmvt takla ya nan im ai ithvna vhleha hash i ponaklot, Okla hvto kvta sia hō miha cho? im achi tok.

28. Mihma afalaminchi mvt, Chan Baptist; yohmi kia kanimi mvt, Elias ak o achi; kanimi kvto Hopaii vhleha ha tok achvfona mak oka, achi hoke, achi tok.

29. Mihma, Amba hvchishno vto kvta hō hvs si achi hō? im achi ma, Pita yvt afalaminchi mvt, Chishno ak osh Klaist chia mak oke, im achi tok.

30. Mihma yvmma hatak nana kia ik im anolo ka chī ka kvllochit i miha tok.



31. Mihmvt Hatak Ushi vt nan-isht ai ilbvsha in laua chi, micha hochitoka vhleha, mikmvt na-holitompa isht asha pehlichi vhleha, anonti na-holissochi vhleha aiena ka ai im a kvllakshit illa he; atuk mvt nitak atuchinakma anonti tana hi a isht im abvchit isht ia tok.

32. Mihmvt anumpa yvmmak ash o haiakvchit anumpo honli tok. Mihma Pita yvt halvli cha, im alvmmmit isht ia tok.

33. Yohmi ma yvmmak ash osh filemvt nan im ai ithvna vhleha hash pisa mvt, Pita yash im alvmmmit, Setan chia hvt vm ashaka yo ish hikiashke: chishno vto Chihowa ai im anukfila hano ish ahninchu keyu, amba hatak ai im anukfila yok mak oka, achi tok.

34. Mihmvt okla ha, micha ilap nan im ai ithvna vhleha aiena kash hoyot itvnahli mvt, Kvna hosh siakaiyvt aya chikmvt, ik ile holitoblot im ititaiyukhvna ma sholi cha, siakaiyashke.

35. Kvna hosh ilap im ilhfiopak a okchalinchi ka ahni hokvt i kvnia he; amba vno pulla, micha vbanumpa aiena pulla ho kvna hosh im ilhfiopak a kanchi hokvto, mihi yosh okchalincha hi oke.

36. Hatak vt yakni a mominchit immi ikbi hoh kia, anonti ilap im ishilombish ash osh i kvnia kv, nanta ho isht im ai achukma hinla cho?

37. Keyukmvt, hatak vt nanta hak o ilap shilombish a isht atobba hinla cho?

38. Yohmi hoka havi shahli, mikmvt nan-ashvchi fehna aiena aiasha ilvppa kvna kia vno, micha vm anumpa aiena ka ai i hofahya atukma, mihi yo Hatak Ushi vt Iki im aholitopa il ai ishit, enchil holitopa vhleha aiena pehlichit ayvt vlakmvt, i hofahya ak inla hi oke, im achi tok.

## CHAPTER IX.

Chisvs vt ngnih chaha oiyvt pakna ont hikia mvt inlv toba, 1; 11 mikmvt Elias vt vla he achi chatuk a, Chan Baptist ak osh mihmak atuk o anoli; 14 mihmvt hatak achvfa hosh shilombish ok-

pulo anukfohka kvt ik haponaklo, micha anumpula he keyu ka aiena tuk o hlakofichi; 30 mihmvt ititaiyukhvna a takalit illi tuk mvt, anonti falamvt tana hi vt atuklanchit anoli; 33 nan im ai ithvna vhleha hvt nafehna bvnvt asha ka, Chisvs vt nan isht i miha, 38 mihma kvna hosh nan isht ahullo okpulo ya ilap hohchifo ak o isht kocha weli hoka ik ataklvmo ka hi a i miha; 42 na yimmi im anukfila ik hochito puta yoshubli ka ai vlhpesa keyu ka miha.

1. **MIHMVT**, Ahli mak o hvchim achi lishke, Ilvppa hioh-maya ka kanimi kvt ik illo hosh Chihowa apehlichika yvt nan-isht ai ahlika ya ai it ishit vla na pisa chi kvt, asha hoke, im achi tok.

2. Atuk osh yvmmak atuk a nitak hannali ma, Chisvs vt Pita, micha Chemis, mikmvt Chan aiena ka yvmmak bano ho pehlichika cha nvni chaha yo pit oiya tok: mihmvt inlv tobvt itikba hikia tok.

3. Mihma im ilefoka yvt shohmalali tohbit kvnia kvt, okti pushi ak o chiyuhmi tok: yohmi hatuk o nantvna tohbichi nana ak osh i shahlichit tohbicha he keyu ki tok.

4. Mihma Elias, micha Moses itatuklo hosh ant i haiaka tok: mihmvt yvmmak ash osh Chisvs a it im anumpulit okla tok.

5. Yohmi ma Pita yash ot anumpuli mvt, Chisvs ash o, Pi shahli ma! ilvppa e maya kvt pim achukmvshke: yohmi ka vlhtipo tuchina kak o il ikbi na achvvt chimmi hokma, anonti achvvt Moses ak o immi hokma, anonti achvfa kvt Elias ak o immi hashke, im achi tok.

6. Yohmi ka okla nukshopa fehna hatuk o nana a miha ik ithano ha tok.

7. Yohmi ma hoshonti hvt ant im okhlilichi tok: mihma hoshonti anukaka ya auet anumpuli kvt, Ilvppak osh Svso a holitopa mak oke, hvsh i haponaklashke, achi tok.

8. Mihma ashalika filemvt okla hopokoyo kvt, hatak inla nana kia ik peso; amba Chisvs ash bano ho ai it apiha tok.

9. Atuk o nvni asht okla akowvt minti ma, nana ka okla pisa tuk vt hatak nana kia ik im anolo mak o, Hatak Ushi vt illi tuk vt tani ha ya hi a, i miha tok.

10. Atuk o anumpa yummak ash o ilap illvt okla ithanvt, Illi tuk osh tani kv̄t nanta hak oh chishba? ahnit ilap bika it im a ponaklot itvnowa tok.

11. Mihmvt im a ponaklot, Na katihmi hō na-holissochi v̄hleha hvt, Elias ak osh t̄ikba v̄la pulla he, okla achi cho? achi tok.

12. Mihma afalaminchi mvt, Ahli, Elias ak osh t̄ikba v̄la cha, nan-okluha ka ant falaminchit apoksiacha he; mikmvt̄ Hatak Ushi vt kaniohmit nana l̄awa ka isht ai ilbv̄sha he, micha nan isht ik ahobo ka he aiena ka isht a holisso hatuk oke.

13. Yohmi kia, Isht a holisso tok mak oka Elias vt v̄la ahli ho mv̄hli: yohmi na okla kanimihchi bv̄nna kv̄t yvm-mak ash o im ai yvmihchi tuk oke, hv̄chim achi lishke, im achi tok.

14. Atuk osh nan im ai ithvna v̄hleha aiasha ka ona mvt, okla chinto fehna kv̄t aiasha ma, anonti na-holissochi v̄hleha hvt yummak ash o nan im asilhhv̄chit m̄aya na ont pisa tok.

15. Mihma okla hvt yummak ash o pisa mvt, mih makinli hō okla nukhlakan̄cha fehnvt, yihlept̄ im ai onvt, okla aiok-pv̄chi tok.

16. Mihma na-holissochi v̄hleha hash o i ponaklot, Nanta mak o hv̄sh it im asilhhv̄chi hatuk o cho? achi tok.

17. Yohmi ma okla laua yash̄ osh achv̄vt̄ afalaminchi mvt, Nan-ithvn̄anchi ma! s̄uso hvt na-shilombish ik anum-pulo yō il ai eshi hatuk o ishit chim v̄la lishke.

18. Yohmi ka kanima yō ai ilhkolichikmvt, haiochichechi chatuk: mikma itukpokpokit noti ahampvt, chunnvt̄ taha chatuk; yohmi hō na chim ai ithvna v̄hleha h̄a yv̄mma kohcha ch̄i ka im anoli li tuk ak o, okla kohcha he keyu ke tuk oka, achi tok.

19. Mihma afalaminchi mvt, Na yimma he keyu isht-ai unchululi hv̄chia ma! hv̄chi takla ahanta l̄i katiohmi foka ch̄i cho? nana ka isht ak hv̄chi ahno hō katiohmi foka ch̄i cho? Isht h̄vs sv̄m v̄lashke, achi tok.

20. Mihma yummak ash o okla isht im ona tok: mihma yv̄mmak ash pisa ma, na-shilombish ash osh mih mak-inli



h<sub>o</sub> haiochichechi tok; mihma aka itula cha, shalali mvt itukpokpoki tok.

21. Mihma i<sub>ki</sub> ash o i panaklot, Katiohmi foka kash o ilvppvt ai yakohmi tok o? achi ma, Ulla tomba mak a tok.

22. Yohmi ka vbi b<sub>un</sub>na kv<sub>t</sub> luak, mikmvt oka aiena ka it a kanchi beka tuk oke: yohmi kia nana h<sub>o</sub> ish kanimihcha hinlakmvt, ish pi nuk<sub>k</sub>aklo cha, ish pi apelas<sub>h</sub>ke, achi tok.

23. Mihma Chisvs ash osh chi yimma hinla hok ma, nayimmi hokvno nan oklu<sub>h</sub>a kv<sub>t</sub> ai i yvmohma hinla hoke, im achi tok.

24. Mihma vlla ya i<sub>ki</sub> yash ot mih makinli n<sub>o</sub> nishkin okchi mihinti hosh chitolit, Chitokaka ma! sai yimmishke; nan-isht ik a sai yimmo ya is sv<sub>m</sub> apelvchashke, achi tok.

25. Mihma okla hv<sub>t</sub> yihlepvt ant ai itahoba ka, Chisvs vt pisa mvt, na-shilombish okpulo ash o im alv<sub>m</sub>mit, Na shilombish ik anumpulo, mikmvt ik haponaklo aiena chia hv<sub>t</sub> ilvppa ish a kohcha cha, mikmvt himmakma chik chukowo ka he mak o chim apesa lishke, im achi tok.

26. Mihma na-shilombish ash osh tahpvlvt, yvmmak ash o haiochichechi fehna cha, a kohcha tok: mihma yvmmak ash ot illi y<sub>o</sub> chohmi tok: yohmi hatuk o, Illishke, achi kv<sub>t</sub> laua tok.

27. Yokmi kia Chisvs ash osh ibbak a halvlli cha, tanichi ma; yvmmak ash ot wakaya tok.

28. Atuk o aboha ont chukowa ma, nan im ai ithvna v<sub>h</sub>leha hash ot ilap banot im a ponaklot, Na katihmi h<sub>o</sub> pishno vto yvmma e kohcha he k<sub>e</sub>yu ke tuk oh cho? achi tok.

29. Mihma, Ilvppa chohmi kv<sub>t</sub> nana h<sub>o</sub> isht kohcha hi vt iksho, amba vba pit anumpuli, micha na-hullochi aiena hok mak bano hoke.

30. Mihma yvmmak ash asht okla ilhkoli mvt, Kalili a okla hlopulli tok: mihma hatak nana kia akostinincha hi oka, ik ahno ki tok.

31. Yohmi kv<sub>t</sub> nan im ai ithvna v<sub>h</sub>leha h<sub>a</sub> nan im av<sub>h</sub>chi kv<sub>t</sub>, Hatak Ushi vt hatak puta ibbak a fohka hoka, okla

vba chi hoke: atukma illi ha ya tuk vt, nitak ont atuchinakma tana hi oke, im achi tok.

32. Yohmi kia anumpa yvmma okla ik akostinincho; yohmi mvt i ponaklo nukshopa tok.

33. Atuk o yvmmak ash ot Kapenavm a vla tok: mihmvt aboha anuka asha hosh i ponaklot, Takla ya hvchishno bika isht hvsh it im anumpuli kash osh nanta mak atuk o? achi tok.

34. Yohmi kia lumvt okla maya tok: yohmi kvv takla ya, Kvta hak osh moma i shahli ahanta chishba? ahnit ilap bika okla isht it im anumpuli tuk a tok.

35. Mihma binili mvt, auahtuklo kash o hoyo cha, Hatak nana hosh moma i shahli bvna hokmvt, mihi yosh moma ka ik lauwokmvt, anonti moma in tishu a hi oke, im achi tok.

36. Mihmvt vlla yo halvli cha, itintakla binilichi tok: atuk osh isht sholi mvt,

37. Kvna hosh sa hohchifo pulla hatuk mak o vlla ilvppa chohmi achvfona ka holitoblikmvt, vno ak o sa holitobli hoke: mikma kvna hosh vno a sa holitoblik mvt, vno ak o sa holitobli ho keyu, amba auct sa kanchi tok ak oke, im achi tok.

38. Mihma Chan vt afalaminehi mvt, Nan ithvnanchi ma! achvfa hosh chishno chi hohchifo ha nan-isht ahullo okpulo. puta isht kocha weli hosh anta ho e pisa ka, ik pibafohkoshke: yohmi ma il im alvmmi kano, ik pibafohko hoka, achi tok.

39. Yohmi kia Chisvs ash osh, Hvch ik im alammo kashke: hatak vt sa hohchifo pulla hatuk mak o na fehna ka isht ai yvmihchi hokvt vno a yvmmak fokalechit na sa mihacha hi vt iksho hoka.

40. Mikma kvna hosh hvvishno a hvv i sanali keyu hokvto, hvv-ibai achvfa hoke.

41. Klaist a immi hvchia hoka, kvna kia oka kapvssa isht-ishko achvfa ka hvsh ishka chi ho, vno sa hohchifo pulla hatuk mak o hvch ipeta hokmvt, isht vltoba ka i hlakofa he keyu, ahli mak o hvch im achi lishke.

42. Micha kva hosh a yimmi vhleha chipunta ilvppa achvona ma ibetvblichi hokmvt, ilapa ak o tanchi botoli tvli ak osh ikunla ya a takanli ho okhvta ha oka kvnia hokmak osh, im vlhpesa he tuk mak a hi oke.

43. Yohmi ka chibbak vt chi ibetvblichi hokma, chanlit ish hokofashke: imomokpulo yosh ai-okchaya ya ont ish chukowa hok mak osh, chim vlhpesa kvv chibbak vt tuklo hosh aiokpuloka, luak vt nitak nana moshola he keyu mak o, chi itvtula hi atuk a chim i shahli hoke.

44. Yvmmak oka i shushi yvt illi keyukma, anonti luak mvt nitak nana mosholi keyu hoke.

45. Mikmvt chiyi yvt chi ibetvblichi hokma, chanlit ish hokofashke: imomokpulo yosh ai-okchaya ya ont ish chukowa hok mak osh chim vlhpesa kvv, chiyi yvt tuklo hosh ai-okpuloka, luak vt nitak nana moshola he keyu mak o chi itvtula hi atuk a chim i shahli hoke.

46. Yvmmak oka i shushi yvt illi keyukma, anonti luak vt nitak nana mosholi keyu hoke.

47. Mikmvt chi nishkin vt chi ibetvblichi hokma, kohchit ish kanchashke: nishkin achvfa yosh Chihowa apchlichika ya ont ish chukowa hok mak osh chim vlhpesa kvv, chi nishkin vt tuklo hosh aiokpuloka luak a chi itvtula hi a chim i shahli hoke.

48. Yvmmak oka i shushi yvt illi keyukma, luak vt nitak nana mosholi keyu hoke.

49. Mikma moma kvv luak o isht ai yvmmi bano kvv, vba isht aiokpvchi vt hvpi isht ai ymma hi a ohma hi oka.

50. Hvpi vt achukma; yohmi kia hvpi vt homi kvv i kvnia hokma, nanta hak o isht hvsh homincha hinla cho? Hvpi a hvchishno inli il anit hvsh ieszikmvt, hvchishno bika ma hvsh it i nanaiya achukmashke, achi tok.

CHAPTA X.

Chisvs vt Chutea yak o nan im ai avchit anta, mihmvt it i kvnia holisso hak o Falisi vhleha ha isht it im anumpuli, 1; 13 vlla chipunta ya halvllit sholi. 17 Chisvs vt hatak himita nan in laua yo



aiokprchit imomaka pisa: 28 mikmvt kvna hosh ilap ak o holitobli pulla hosh nan okluha ka issvt aya tuk okvno im atobba hi vt miha: 32 ilap vt ititaiyukhrna a takalit illi tuk mvt anonti, falamvt tana hi vt himmakma Chisvs vt anoli: 35 Chemis Chan ita tuklo kvt Chisvs a nana im asilhha; mihma Chisvs vt ilap ma nana ho im achi mvt; 46 ik hoponayo Batimers a hoponayochi.

1. **MIHMA** yvmmak ash o asht wakayvt minti mvt, Chatan hlopullit mish-tvnnvp a ayvt Chutea yakni a vla tok: mihma okla hvt im ai italhoba na ai yakohmi yatuk okvt, anonti nan im avchit ahanta tok

2. Mihma Falisi vhleha hvt im ai vla mvt, imomaka pisa hosh, Hatak vt tekchi a kancha he vlhpesa hoh cho? achit i ponaklo tok.

3. Mihma yvmmak ash osh afalaminchi mvt, Moses vt nanta hak o hvchim apesa tok o? im achi tok.

4. Mihma, It i kvnia holisso hak o ikbi cha, kancha hi o Moses vt ahni tok, achi tok.

5. Mihmvt Chisvs vt afalaminchi mvt, Hvchishno hvchi chukvsh kello pulla kak o nan vlhpisa ilvppa hvchim ikbi tok.

6. Amba nan okluha toba vmmona ka Chihowa hvt nakni, tek ita tuklo ho ikbi tok.

7. Ilvppa pulla hatuk mak o hatak vt iki, micha ishki aiena ka issa cha, tekchi ak o asitia hi oke.

8. Yohmikmvt tuklo yvmmak atuk vt haknip achvfa li oke. Yohmi ha mvt i himmakma tuklo mak a hi o keyu, amba haknip achvfa hoke.

9. Yohmi hoka, Chihowa hvt nana ka it a halvllichhi ha ya, hatak nana kia ik it i filvmmicho kashke, im achi tok.

10. Atuk o aboha anukaka maya ho nan im ai ithvna vhleha hash osh anonti na mihi yash inli ho i ponaklo tok.

11. Mihma kvna hosh tekchi a kanchi cha, inla yo it auwaya hokmvt, haui tobtv yvmmak ash o isht ik vlhpisalo hoke.

12. Mikma ohoyo hvt i hatak a kanchi cha, inla yo auwaya hokmvt, haui toba hoke, im achi tok.

13. Mihma yvmmak ash ot potola chi ho vlla chipunta

ya okla isht im ai vla tok : atuk ak o nan im ai ithvna vhle-  
ha hvt nan isht ai vla yummak ash o im alvmini tok.

14. Yohmi kia Chisvs vt yumma pisa mvt, ik im vlhpieso  
fehna cha, Vlla chipunta yvt vm ai vla hi a hvsh ahni cha,  
hvch ik im alammo kashke : ilvppa chohmi kak osh Chiho-  
wa apelihchika mak oka.

15. Ahli mak o hvchim achi lishke, Kvna hosh vlla iski-  
tini ak o chiyuhmit Chihowa apelihchika ya aiokpvchi ho  
keyukmvt, yummak oka chukowa he keyu hoke, im achi  
tok.

16. Mihmvt yummak ash o ishit sholi cha, ibbak a isht  
umbitepa mvt, yukpali tok.

17. Mihmvt kohchvt ivt hina ont fohka ma, achvvt ma-  
lelit mintit ant i hvchukbihlepa mvt, Nan-ithvnanchi achuk-  
ma ma ! ai okchayvt bilia ya pisa la he vlhpesa kvto nanta  
hak o yvmohmi la chi cho ? achit i ponaklo tok.

18. Mihma Chisvs ash osh, Na katihmi ho achukma is si  
achi cho ? achukma vt iksho ; amba achvfa kak illa : yvm-  
mvt Chihowa ak oke.

19. Anumpa vlhpisa, Haui chik tobo kashke : Kvna kia  
chik bo kashke : Nana kia chik hukopo kashke : Anumpa  
ik ahlo isht atokolit chik ahanto kashke : Kvna kia chik  
haksicho kashke : Chiki, chishki aiena ka ish holitoblashke,  
achi puta ka ish ithanvshke, im achi tok.

20. Mihma afalaminchi mvt, Nan ithvnanchi ma ! vlla sa  
tomba kash inli hosh ilvppa puta ka holitoblit isht mihinti  
li tuk oke, im achi tok.

21. Yohmi ma Chisvs vt pisa kvv i hullo : mihmvt, Nana  
achvfa hosh ik chim onoshke ; ish ia cha, nana hosh chim  
ashakmvt, ish kampila cha, ilbvsha puta ka ish imashke :  
yohmik mak osh na holitompa kvv vba yakni ya chin tonla  
he mak oke : mikmvt mintit ititaiyukhvna ant ish eshi cha,  
is siakaiyashke, im achi tok.

22. Mihma yvmvt nan in laua fehna hatuk osh anumpa  
yumma haklo mvt, nukhaklot, kanima ia tok.

23. Mihma Chisvs vt filemvt hopokoyo mvt, nan im ai  
ithvna vhleha hash o, Na palvmmi nana kvv a fehna ho nan

in laua vhleha hvt Chihowa ap ehlichika ya chukowa hi oke, im achi tok.

24. Mihma nan ithvna vhleha hash osh anumpa yvmma achi ka okla nukhlakancha tok. Yohmi kia Chisvs ash ot anonti anumpuli mvt, Ulla vhleha ma! im ilayak ai anukchieto hosh ahanta kvto Chihowa ap ehlichika ya chukowa kvno palvmmi kv katiohmi fehna hoh chishba!

25. Kamel vt chofak ushi nishkin a hlopulli ka palvmmi kv, hatak nan in laua yosh Chihowa ap ehlichika chukowa ka ik lauwoshke, im achi tok.

26. Mihma okla nukhlakancha atampa fehna mvt, Yohmikma kvta hosh okchaya hinla cho? ilap bika it im achit maya tok

27. Mihma Chisvs vt atokolit pisa mvt, Hatak okmvno yohma he keyu kia, amba Chihowa hokvno ai yohmi hoke. Chihowa yak okmvno nan okluha kv ai ahli chatuk oka, achi tok.

28. Yohmi ma Pita vt, Yakeh! pishno vto mominchit il issa cha, e chiakaiya tuk oke, im achi tok.

29. Mihma Chisvs vt afalaminchi mvt, Ahli mak o hvchim achi lishke, Hatak nana hosh vno pulla, micha vbanumpa aiena hatuk mak o, in chuka, keyukmvt itibapishi vhleha, in tek puta, iki, ishki, keyukmvt tekchi, mikmvt vlla, micha yakni aiena ka issvt aya hokvto,

30. Mihi yosh okchaya takla kv chuka, itibapishi vhleha, micha in tek vhleha, mikmvt ishki, micha vlla, anonti yakni aiena kv mihi atuk a ohmi tahlepa achvfa ho pisa he; mikmvt nan ishtai i palvmmi mvt im aiena tukmvt, anonti yakni inlakma aiokchayvt bilia ya pisa hi oke.

31. Yohmi kia tikba yatuk vt ont ishtaiyopa hi vt lawakma, anonti ishtaiyopi atuk vt tikba ya hi vt lauvt asha hi oke, achi tok.

32. Mich a Chelusalem ilhkoli hosh hina vlhtot asht aya ma, Chisvs vt tikba hikv ia ma, okokko! okla ahni mvt, iakaiya kv nukshopvt okla itvnowa tok. Mihma auah-tuklo kash o i howa cha, ilap nana im a kaniohma chi kv im anolit,



33. Inta! Chelusalem a iloh ilhkolishke; yohmi ka Hatak Ushi vt na-holitompā isht aśha pehlichī vhleha, micha na-holissochi vhleha aiena ka ibbak fohka chī; mikma illa he anumpa onochi cha, Chentail okla hō ibbak fohka chī hoke.

34. Mikmvt yummak ash o okla ishit yopula, micha fvm-mi, mikmvt on tuftua aiena cha, okla vba chī hoke: atuk-ma nitak ont atuchinakma falamvt tana hi oke, achi tok.

35. Mihma Sebate ushi Chemis, micha Chan ita tuklo kvt im ona mvt, Nan-ithvnanchī ma! nana hō il ahnikma, ish pīm aiahlichī hokbano il ahnishke, achi tok.

36. Mihma, Nanta hak o hvchī yvmihchi la hi a hvsh ahni cho? im achi tok.

37. Chim a holitopa ya achvft chibbak isht impak-imma aśhakma, anonti achvft vlvfbekimma aśha hosh, e chiya hi ak o ik yohmi ish ahnashke, im achi tok.

38. Yohmi kia Chisvs ash osh, Nana hō hvsh asilhha hokvt hvsh akostininchi keyushke: isht-ishko vno vt ai ishko la chī ka hvsh ai ishka hinla cho? mikmvt baptismo a vno vt isht baptismo li ka hvchishno vt isht a hvchi baptisma hinla cho? im achi tok.

39. Mihma, Pi yvmohma hinlvshke, im achi tok. Mihma Chisvs ash osh, Isht-ishko vno vt ai ishko li ka hvsh ai ishkokmvt, anonti baptismo vno vt isht a baptismo li aiena ka isht a hvchi baptisma chī ho mvhli hoke.

40. Amba sabbak ishtimpak imma, micha vlvfbekimma aiena aśha hi okvno ima la hi o keyu; amba kvna hō im vltaha mak a he oke.

41. Mihma pokoli kash ot haklo mvt, Chemis, Chan ita tuklo kash okla isht ik i yukpo fehna tok.

42. Yohmi kia Chisvs vt yummak ash o hoyo cha, Chentail okla i miko vhleha hvt ai i shahlit pehlichī chatuk: mikma i hochitoka vhleha hvt nana kvt im a vlvpiesa mak osh okla ha i yvmihchi chatuk a hvsh ithaiyanvshke.

43. Yohmi kia hvchishno yokvto hvchi yvmohma he keyushke: amba hvchi kanima mvt i shahli bvna hosh hvchibafoka hokmvt, nan-isht hvchim vtta ya he.

44. Mikma hvchi kanima hosh moma i shahli hvchi bun-nakmvt, moma in tishu hvchia ha hi oke.

45. Hatak Ushi ak kia nan isht im vtta hi o, aya tok keyu : amba ilapo ak osh nan isht vtta he, anonti lawa kvv isht a hlakofa hi a ilap im ilhfiopak a isht atobba he mak a tok oke, im achi tok.

46. Mihma Cheliko a okla ai vla tok : atuk osh nan im ai ithvna vhleha, micha okla lawa fehna aiena ho pelichi cha Cheliko ash a kohchvt ia ma, Timevs ushi Batimevs lpa yvt hina lapalika yo a binilit nan asilhha tok.

47. Atuk osh ymmak ash ot Chisvs Nasalet minti yatuk o haklo mvt, tahpvlvt, Chisvs Lewi ushi chia hvv is sa nuk-haklashke, ahanchi tok.

48. Mihma nukchinta chi ka, i miha kvv laua tok : yohmi kia ymmak o i shahlichy fehvt tahpvlvt, Chisvs Lewi ushi ma ! is sa nukhaklashke, ahanchi tok.

49. Mihma Chisvs vt hikia cha, ymmak ash o hoyo hi a miha tok. Mihma hatak lpa yash o ont hoyot, Chi nuk-tanla achukmashke, auet chi hoyo hoke ; wakaya, im achi tok.

50. Mihma im anchi ash o kanima pit bohli mvt, waka-yvt, Chisvs a ima ona tok.

51. Mihma Chisvs vt afalaminchy mvt, Nanta mak o chi yvmihchi la hi a ish ahni cho ? im achi tok : mihma hatak lpa yash osh, A shahli ma ! hoponayo la hi a, im achi tok.

52. Mihma Chisvs ash ot, Ish iashke ; na chi yimmi hvv chi hlakofichi hoke, im achi tok. Mihma ashalika hoponayo mvt, hina fohkvv Chisvs a iakaiya tok.

## CHAPTA XI.

Chisvs vt issuba haksobish falaia himita om binili cha, Chelusalem ont chukowa, 1. 12 Fik vpi yo nitak nana ik ano ka hi a, Chisvs vt im apesa : 15 mihmvt nan-itatoba vhleha tempel anukaka asha tuk a kocha pit tihleli. 27 Kanimi kvv nan isht ai vhpesa nana ho isht ai yvmohmi hatuk a a ponaklo tuk kia, ymmak ash o Chisvs vt im a tvblichy.



1. **ATUK** osh Chelusalem bilika Betfachi, micha Betani ita tuklo, Alif nvnih fehna h<sub>o</sub> ai vla ma, nan im ai ithvna vhleha hash tuklochit tihleli tok.

2. Mihmvt, Ivt tvmahushi hvchi chapaka auet talaia ka hvsh onashke: yohmikmvt yvmma ont hvsh chukowa mih makinli hosh, issuba himita hatak vt ik om binilo kisha yvt asinta na hvsh pisa chi hoke: yvmma i hotofit isht hvsh lashke.

3. Yohmi ka hatak nana kia, Na katihmi h<sub>o</sub> ilvppa hvshi yvmihchi h<sub>o</sub>? hvchim achi hokma, Chitokaka yak osh bvna hatuk oke, hvsh achashke: yohmikma mih makinli h<sub>o</sub> auet pila chi hoke, im achi tok.

4. Mihma it iachi mvt, hina tuklot ant ai it afama h<sub>o</sub>, issuba himita yvt okhissa kocha ya asinta na ont pisvt okla cha, i hotofi tok.

5. Mihma yvmma hiohmaya tuk vt kanimi kv<sub>t</sub>, Nanta mak o hvsh katiohmi hosh issuba himita ya hvsh i hotofi cho? im achi tok.

6. Mihma Chisvs vt nan apesa tuk ash o i miha tok: mihma peh ik ilhkoli okla im ahni tok.

7. Mihma issuba himita yash o Chisvs a isht im vla cha, im anchi puta ka om pvlli na yvmmak ash osh o minili tok.

8. Mihma hina ya im anchi puta ka pvlli kv<sub>t</sub> laua ma, anonti kanimi kv<sub>t</sub> iti naksish o vmot hina ya pvlli tok.

9. Mihma tikba ilhkoli, micha pit iakaiya aiena tuk vt, chitoli hosh, Hosanna, Chitokaka i hohchifo il ai eshi hosh minti kv<sub>t</sub> holitopa mak oke.

10. Piki Lewi apelhichi vt Chitokaka i hohchifo il ai eshi hosh aya kv<sub>t</sub>, holitopashke; shutik tvbokaka fehna, Hosanna ai ahanchashke, achi tok.

11. Mihma Chisvs vt Chelusalem a ont chukowvt, tempel a ont chukowa tok: micha nana puta kash filemvt pisvt in taha, mihma opivt taha aiena hatuk o, auah-tuklo kash o pehlichy cha, pit kohchvt Betani a ia tok.

12. Atuk osh ont onna ho, Betani a asht okla minti na, yvmmak ash osh hohchvfo tok.

13. Michy fik vpi vt hishi asha hosh, mishema ka hikia



ho pit pisa tok; mihmvt yvmma nana kia ahayuchi li yōba hinla ká, ahni cha, ona tok; atuk osh ona mvt, fik vt a nuna ik ai ono kisha hatuk o, nana kia iksho ho, amba hishi ak bano na ont pisa tok.

14. Mihmvt Chisvs vt anumpuli mvt, Himak a pilla ma hatak nana kia vni isht ik chi ai vpo ho biliashke. Mihma nan im ai ithvna vhleha hv haklo tok.

15. Atuk osh Chelusalem a okla ai vla tok: mihma Chisvs vt tempel a pit chukowa mvt, tempel anukaka ya nana a kanchi, micha a chumpa aienvt maya tuk ash kocha pit yuhli mvt, anonti tvli holisso a bohli itatoba ai-impá, micha pvchi vhpoba kanchi vhleha im ai om-binili aiena tuk ash halvllit filemohlit kinahlichí tok.

16. Mihmvt hatak nana kia ai vlbeha ya tempel a isht hlopulla hi a ik im ahno ki tok.

17. Mihmvt nan im avchit, Ūm aboha ya oklushi moma kvvba pit ai anumpuli chuka hochifa hi oke, achi hosh holisso ho keyu? yohmi kia hvchishno yokvto na hukopa vhleha in chuka yo ish ikbishke, achi tok.

18. Mihma na-holissochi vhleha, micha na-holitompa isht asha pehlichí vhleha aiena kvv haklo mvt, okla ak osh momvt, yvmmvt nan isht im avchi ka ai im anukhlakancha hatuk o i komunta mvt, kanimihchit vbi ka ahni tok.

19. Atuk o opivt taha ma, tmaha hash a kōchvt ia tok.

20. Atuk o onnahinli ma, fik vpi ash ot ak-isht-vla pit vhlit bvshit kvnia tuk o pit pivt ont ilhkoli tok.

21. Mihma Pita vt pit anukfilli mvt, Yakeh! a shahli ma! fik ik ano ka hi o ish im apesa kash bvshit kvnivshke, im achi tok.

22. Mihma Chisvs vt afalaminchi mvt, Chihowa ak o hvsh i yimmashke.

23. Ahli pulla ho hvchim achi lishke, Kvna kia nvni chaha ilvppa, Kanvllit, okhvta hak o pit ish okvtulashke; im achi cha, chukvsh mvt anuktuklochi ik im iksho, amba nana ho miha tuk vt ont aiahla hi a yimmi hokmvt, im aiahla hi oke.

24. Yohmi hoka vba pit hvsh anumpulikmvt, hvsh asilhha

kvt hvsh isha hi vt hvchi yimmashke, yohmik mak osh hvchim aiahla hi oke.

25. Micha vba pit anumpulit hvsh hikiakmvt, nana a hvchi kaniohmi tuk ashakma, hvsh i kashofashke: yohmi na hvchishno na hvchim aiashvchika puta ka Iki vba binili kvt hvchi kashofi makinlashke.

26. Amba hvsh i kashofi keyu hokmvno, hvch Iki vba binili kvt hvchishno a na hvchim aiashvchika puta ka hvchi kashofa he keyu akinli hoke, im achi tok.

27. Atuk o anonti Chelusalem a okla ai vla tok: mihma yummak ash ot tempel anukaka ya nowvt hikikja ma, naholitompa isht-asha pehlich vhleha, micha naholissochi vhleha, mikmvt hatak hochitoka vhleha aiena kvt im ai vla tok.

28. Mihmvt, Nan isht ai vlhpesa mak o ilvppa puta ka ish yakohmichi cho? micha ilvppa puta ka ish yakomichi ka nan isht ai vlhpesa ka kvt hosh chim apesa tok oh cho? im achi tok.

29. Mihma Chisvs vt afalaminci mvt, Uno ak kia nana achvfa ka hvchi ponaklo likma, hvs svm anolashke; yohmikma, vno vt nan-isht-ai-vlhpesa kaniohmi ho ilvppa puta ka isht ai yakohmichi li hatuk vt hvchim anoli lashke.

30. Chan i baptismo vt vba yakni a minti hokma, keyukmvt hatak akinli hokma, nanta tuk oh cho? oh vm anoli, im achi tok.

31. Mihma ilap bika it im anumpohonlit, Vba yak a tok: il achi hokma, Yohmik mak o katiohmi ho hvch ik i yimmo tuk oh cho? acha hinla.

32. Amba, Hatak ak a tok; il achi hokma, achi mvt, okla moma kvt Chan a hopai fehna hoke, ahni hatuk o, okla hak o i nukshopa tok.

33. Mihmvt afalaminci mvt, Chisvs ash o, Il anola he keyushke, im achi tok. Mihma Chisvs vt afalaminci mvt, Uno vt nan isht ai vlhpesa kaniohmi ho ilvppa puta ka isht ai yakohmichi li tuk vt ak hvchim anoloshke, achi tok.



## CHAPTER XII.

Pak-vpi a holokchi yo hatak toksvli ai vlhpesa keyu vhleha i pota tok o isht vlhpisa, 1. 13 Falisi vhleha hvt Sesa tvli holisso im itahobi ak o Chisvs a isht i ponaklo ho, anumpa falama ima. 18 Satusi vhleha hvt hatak illi falamvt tana hi ak o, Chisvs a isht i a ponaklo ho, im anoli: 28 anumpa vlhpisa puta kvk kanima kak osh moma i shahli hatuk a Chisvs vt im anoli: 35 Klaist vt krna hak o ushi ahinla ka, ponaklo: micha nan im ai ithvna vhleha ha ahah! im ahna chi ka, i miha. 41 Ohoyo ilbvsha i hatak illi yosh mait tuklo ho tvli holisso abohli ya ont apitta ho, Chisvs vt im ahninchii.

1. MIHMUT nan-isht-vlhpisa ho isht im anumpulit ahanta mvt, Hatak osh pak-vpi aiasha ya hokechi cha, kvti apushi isht a holihtvchit apakfobli cha, oka-paki ai vlbeha ya kulli cha, chuka chaha yo ikbi mvt, hatak toksvli vhleha ho i pota cha, yakni hopaki ho ia tok.

2. Atuk osh waya he ai vlhpesa ma, pak-vpi aholokchi nana waya ka, hatak toksvli vhleha hash ot ipeta chi ho, hatak toksvli vhleha hash o tishu ha pit in chvffichi tok.

3. Atuk ak o yvmmak ash o okla it i hoklit boli cha, nana kia iksho ho pit chvffichi tok.

4. Mihma anonti tishu inla ho pit in chvffichi tok: atuk o yvmmak ash o tvli isht bolit, noshkobo ha mitvffit hofahyalichi fehna cha, okla pit chvffichi tok.

5. Mihma anonti inla ho pit chvffichi tok: mihma yvmmak ash o okla vbi tok: mihma inla yvt laua ho pit yuhli kash kia, pit aieninchit kanimi ka boli mvt, anonti kanimi ma vbi tok.

6. Yohmi hatuk o iso achvfa, i holitopa fehna yosh im anta moma mvt, Svso hokvno okla holitobla chi hoke, achi mvt, ishtaiyopi mak o yvmmak ma pit chvffichi tok.

7. Yohmi tuk kia hatak toksvli vhleha hash ot Ilvppak osh immi mak oke; inta! kiloh vbi na immi hatuk vt hv-pimmi hashke; it im achit maya tok.

8. Michi yvmmak ash o it i hoklit vbi cha, pakvpi a holokchi a ai ishit kocha pila tok oke.



9. Yohmi kvno, pak-vpi aholokchi immi atuk vto nanta hak o katiohma chi cho? Yummak ash ot vla cha, hatak toksvli vhleha hash o vbit tablikmvt, pakvpi a holokchi ash inla ho im issa chi hoke.

10, 11. Yohmi ka, Tvli yvmma chuk-ikbi vhleha hvt shiti-  
lema chash o, yvmvt chukbika nutaka in tola holitopa i shahli ho tobvshke. Ilvppa Chitokaka yvt yvmihchi ha tok o, hvpi nishkin a i na-fehvvshke, achi Holisso Holitopa ilvppa hvch ik it im anumpolo chatuk oh cho? im achi tok.

12. Mihma nana isht apesa hosh ilap ak o isht anumpuli tuk a okla ithana hatuk osh, yummak ash o hoklit ishi bvna hokak osh, okla ak o i nukshopa tok: mihmvt yummak ash o issvt filamohlit taha tok.

13. Mihmvt ilap im anumpa akinli ho isht ai isht kanv-pacha chi ka, Falisi vhleha kanimi, micha Helotian ikxa aiena ho pit on tihleli tok.

14. Atuk o yummak ash ot ai vla mvt, Nan-ithvnanchi ma! chishno yokvt aiahli chia, mikmvt hatak nana kia nan isht ik chim ahobo; hatak nashuka yak o ish pisa ho keyu hatuk okvt; amba Chihowa nana aiahni ak o aiahlit ish ithvnanchi chatuk a il ithaiyanvshke. Noshkobo isht chumpa tvli holisso ya Sesa yak o ima he ai vlhpesa hok-má, keyukmá, nanta cho?

15. Pi kvniakmá, ik pi kvniokmá nanta chi cho? im achi tok. Yohmi kia okla nan ilahobi ka ithvna hatuk osh, Na-katihmi ho vmomaka hvs sa pesa cho? iskvli isht hvs svm vla na pisa lashke, im achi tok.

16. Mihma okla isht im vla tok. Mihma, Ilvppvt kvta hak o holbvt toba ho, mikmvt kvta ho a hohchifo ho? im achi tok. Mihma Sesa yak oke, okla im achi tok.

17. Mihma Chisvs vt afalaminchí mvt, Nana puta kvv Sesa yak o immi hokma, Sesa yak o hvsh imashke; mikmvt nana puta kvv Chihowa ak o immi hokma Chihowa ak o hvsh imashke, im achi tok. Mihma okla i nukhlakancha tok.

18. Yohmi ma Satusi vhleha hvt, Illi yvt falamvt tana he keyu; achi mak osh im ai vla cha, i ponaklot,

19. Nan-ithvnanchi ma! Kuna hoh kia itibapishi hvt tekchi asha hosh vlla vt iksho ho illikma, itibapishi ash osh tekchi atuk a itauwaya cha, itibapishi im vlla ai ikba hi o, Moses vt holisso pim ikbi tok.

20. Atuk o itibapishi hvt untuklot asha tok; mihma akni ak osh tekchi asha tuk osh, vlla iksho ho illi tok.

21. Mihma iakaiya kash osh itauwaya tuk osh, anonti vlla vt iksho ho illi tok: mihma ont atuchina kvv mihinli tok.

22. Mihma untuklo kash osh okla itauwaya ka, vlla vt iksho ki tok: ont ishtaiyopi ma ohoyo hash kia illi tok.

23. Yohmi ka illi yvt falamvt tanikma, okla tanik muno, untuklo hosh itauwaya tok a yvma katima aiyukali mak o tekchi mak a hi oh cho?

24. Mihma Chisvs vt afalaminchi mvt, Holisso Holitopa, micha Chihowa nan isht im aiahli ka aiena ka hvch ik ithano hatuk osh hvsh ashvckhi ho keyu?

25. Illi tuk vt tani hokvto, okla ik itauwayokma, anonti auwaya he i bohli kia iksho ka hi oka; amba enchil vhleha vba yakni aiasha kak inli ho chiyuhma hi oke.

26. Mikma illi yvmmak okvto tana he ak o miha hosh Chihowa hvt bvfaa anuka a kaniohmit im anumpuli mvt, Uno ak osh Eblaham in Chihowa sia, mikmvt Aisaak in Chihowa siakmvt, anonti Chekob in Chihowa sia hoke, achi tok a Moses i holisso ha a hvch ik peso chatnk oh cho?

27. Yvmmak okvt illi ak o in Chihowa keyu, amba okchaya ak o in Chihowa yoke: yohmi hoka hvchishno ak osh hvsh ashvchi fehna hoke, im achi tok.

28. Mihma na-holissochi vhleha hvt achvvt vla cha, okla it im anumpulit maya ka haklot, yvmmak ash osh vlvpesa fehna isht i miha na akostinichi mvt, Nan-vlhpisa moma i shahli katima kak osh vmmona fehna hoh cho? achit i ponaklo tok.

29. Mihma Chisvs vt afalaminchit, Nan vlvhpisa moma i shahli vmmona fehna kvv, Israel vhleha ma! ho haklo, Chitokaka hvpin Chihowa vt Chitokaka achvfa hoke.

30. Micha Chitokaka chin Chihowa ya chi chukvsh a a



mominchit, chi shilombish a uhvlinchit, mikmut chim anukfila ha mominchit, anonti chim ishthlampko ma a mominchit isht ish holitoblashke, achi ilvppak osh nan-vlhpisa moma i shahli vmmona hoke.

31. Mikma atukla kvt yvmmak inli ho chohmi hoke, Chin chuka-panta hatak a ish holitobli kvt, chishno akinli ka chim itilauashke, achi hoke: nan vlhpisa inla vt ilvppa i shahli kvt ikshoshke, im achi tok.

32. Mihma na-holissochi ash ot, Vlhpesa nan-ithvnanchi ma! aiahli mak o ish mihvshke; Chihowa hvt achvfa; yohmi ka inla mut iksho ho yvmmak illvshke;

33. Mikma yvmmak ash o chukvsh a mominchit, im anukfila ha mominchit, anonti shilombish a mominchit, im isht-hlampko ma mominchit isht holitoblikmut, in chuka-panta hatak a holitobli kvt ilapa ai itilauechi kak osh vba isht aiokpvchi nana achvfa nipi vt momut lua puta ka, micha vba isht aiokpvchi aiena ka moma i shahlshke, im achi tok.

34. Mihma yvmmut vlhpesa fehna miha na Chisvs vt pisa mut, Chihowa apehlichika ya auet ish i hopaki keyushke, im achi tok. Mihma yvmmak ash i himmakma hatak nana kia ik nukwiyot nana ik im asilhho ki tok.

35. Mihma Chisvs vt tempel anukaka nan avchit ahanta mut, anumpulit, Katiohmi ho na-holissochi vhleha hvt Klaist vt Lewi a ushi achi cho?

36. Lewi vt ilapo inli kak kia Shilombish Holitopa pulla kak o Chitokaka yvt an Chitokaka ya, Svbbak ishtimpakimma ya ish binili na chin tvnvp vhleha ha chiyi ai-o-hikia ya ikbi lashke, im achi kvno, achi tok.

37. Yohmi kvt Lewi vt ilapo akinli kvt yvma Chitokaka hochifo tok; yohmi ka katiohmi kak osh yvmmut ushi yoh cho? achi tok. Mihma hatak holitomp keyu kvtto momut i haponaklo kvt na-yukpa tok.

38. Mihma nan isht ai im avchit ahanta kvt, Na-holissochi vhleha na-fohka hofaloha abehkvchit itvnowa kvt im achukma, micha ilhpak a kanchi ya ai it aiokpvchi aiena kak osh im achukma;



39. Mikmvt sinakak a aiasha holitopa i shahli, mikmvt impa chito asha ka aiasha holitopa i shahli aiena kak osh im achukma;

40. Micha ohoyo i hatak illi puta in chuka a wehpuli, mikmvt peh vbanumpuli ilahobi kv̄t anumpa ilbvsha falaia-chit itvnowa yoka, ahah! hvsh im ahnashke; yvmmak okvto nana palvmmi kv̄t i shahli hosh im vlhpisa hi oke, im achi tok.

41. Mihmvt Chisvs vt tvli holisso abohli i chapaka yo ashtv okla hv̄t tvli holisso tvli holisso a bohli pit apitta ka pisa tok. Mihma nan in laua atuk vt lauachit pit apitta kv̄t laua tok.

42. Mihma ohoyo i hatak illi ilbvsha achvfa hosh vla mvt, mait tuklo yvmmv̄t sint achvfa ik ono h̄o pit abehli tok.

43. Mihma nan im ai ithvna vhleha hash o hoyot, Ahli mak o hvchim achi lishke, Ohoyo i hatak illi ilbvsha ilvp-pak osh tvli holisso abohli pit apittv̄t aiasha ka moma i shahlichit fohkishke.

44. Moma kv̄to nan in laua im atampa hatuk osh okla bohli hatuk: amba yvmmv̄t ilbvsha yatuk vt ishi tuk vt mominchit pit bohli, isht okchaya he tuk ash kia mominchishke, im achi tok.

### CHAPTA XIII.

Tempel, micha Chelusalem aiena kv̄t aiokpulokv̄t taha hi a Chisvs vt tikbanli anoli: micha nana kv̄t ont ik a yakohmo takla ka, nana kv̄t isht ahoba kv̄t kaniohma he, 1; 14 micha na-palvmmi kv̄t a kaniohma he aiena ka anoli: 24 mihmvt ilapv̄t aya chikma a kaniohma he puta ka anoli. 28 Fik vpi ak o nan isht it apesa hosh nana kv̄t ai yakohma ch̄i ka, ai onv̄t mahaya hi a anoli: 32 nitak kaniohmi, hvshi kanv̄lli nana h̄o ai yakohma hi a, hatak nana hosh ithana keyu hatuk o, moma kv̄t il anuktahlv̄t vba pit anumpo-honlit im vltahv̄t maya ch̄i ka, miha.

1. MIHMVT tempel a a kohchv̄t iak fehna, nan im ai ithvna vhleha hv̄t achvfv̄t, Nan-ithvnanchi ma! tvli hochito

puta, micha chuka hochito puta aiena kvt a kaniohmi hosh yak aiasa ka, pisá, im achi tok.

2. Mihma Chisvs vt afalaminchí mvt, Chuka hochitoka yak hiohmaya ka ish pisa cho? tvli vt achvfa kia aka ik itulo ka hi vt it on tvlkanchit itonla kvt iksho hoke, im achi tok.

3. Atuk osh tempel in chapaka Alif nvni<sup>h</sup> paknaka ya asha ma, Pita, micha Chemis, mikmvt Chan, anonti Antilu aiena kvt lumvt i ponaklot,

4. Nitak katiohmik mak o ilvppa puta kvt yohma hi o, micha ilvppa puta kvt ont aiahla chikma, nanta hosh ai isht atokowa hi oh cho? ish pim anolashke, achi tok.

5. Mihma Chisvs vt afalaminchí mvt, Ahah! hvsh aiahni na hatak nana kia ik hvchi yoshublecho kashke.

6. Sa hohchifo isht hohchifo kvt itvnowa cha, Klaist sia mak oke, achi kvt laua he, micha lauachit yoshublichá hi oke.

7. Yohmikma tvnvp asha, micha tvnvp asha he annoa puta aiena ka hvsh haklokmt, ik hvchi komunto kashke: ilvppa puta kvt moyumvt ont a yvmohmi pulla hi oke; yohmi kia ont ai-vhli kvto ik ai ono kisha hoke.

8. Okla achvfa kvt okla makinli ka it amokvfa he, mikmvt apéhlichika achvfa kvt apéhlichika mak inli ka it amokvfa hi oka; yohmikma yakni ilaiyuka ka yakni vt a winakvcha he: mikma hohchvfo, micha okla ik it im ai achukmo aiena kvt takala hi oke: yakohmi kak osh nanukhaklo ai ishtia vmmona mak oke.

9. Yohmi kia ahah! hvsh il aiahnashke; okla hvch ishit nan apesa vhleha ibbak a hvchi fohka he: mikma sinakak anukaka ma a hvchi a bohova he: micha atokowa hvsh im anola chi ka, vno pulla hatuk mak o na pehlichí vhleha, micha miko puta aiena itikba ya hvch ishit ohona hi oke.

10. Yohmikma vbanumpa hak osh tikba eklushi moma ka isht ai im anuhumpa pulla hi oke

11. Amba okla hvch ishit, ivt okla ibbak a hvchi fohkikma, nana hvsh anumpula hi vt tikbanli hvch ik anukfillokmvt, anonti tikbanli anukfillit ik hvchim vltaho kashke:

amba hvshi kanvlli yvmma fehna ka nana hō hvchi nukfoh-kikma, yvmmak o hvsh anumpulashke: hvchishno ak osh hvsh anumpula hi o keyu, amba Shilombish Holitopa yak a hi oke.

12. Mikma itibapishi hatuk vt itibapishi hash illi issakma, anonti iki atuk vt iso ha illi issa he; mikma vlla vhleha hv*t* iki, ishki ita tuklo ka i nukkilli cha, illi issa hi oke.

13. Yohmikma vno pulla hatuk mak o hatak moma kv*t* hvchi nukkilli hi oke: yohmi kia kvna hosh aiahlit mahayvt ai v*h*li ka ona hok mak osh, mihi yosh okchaya hi oke.

14. Yohmi kia hopaii Taniel vt isht anumpuli tok nan-okvni a i nukkilli v*h*lpesa kv*t* a hikia he keyu kv*t* hikia na hvsh pisakmvt, (kvna hosh ilvppa it im anumpulikmvt akostininchashke,) yohmikma Chutea ya asha tuk mvt n*v*-nih chaha pit a yihlepushke.

15. Mikma kanima hosh aboha paknaka ahanta tuk mvt aboha ya akowa cha in chuka ya nana kia ai ishit kohcha chi kv*t*, ont ik chukowo kashke.

16. Yohmikma osapa anukaka yo anta tuk mvt, i nafohka ya isha chi kv*t*, falamvt ik aiyo kashke.

17. Yohmikma nitak yvmma foka ka kvna hosh vlla shanli hatuk, mikmvt vlla pishechi atuk aiena hokvto ai i palvmma he mak oke.

18. Micha hvsh*t*ula yo hvch ik yihlepo ka hi vt vba pit hvsh anumpohonlashke.

19. Nitak yvmma foka na-palvmmi kv*t* nana toba vmmona Chihowa hv*t* nan ikbi tok ai vhlit mihinti ka yvmma chohmi kv*t* iksho chatuk: mikmvt yvmma chohma he keyu ka hi oke.

20. Micha Chihowa yak osh nitak yvmma foka ka hokoh*l*ichi tuk o keyukma, hatak nana hosh okchaya he tuk keyushke: amba nan-v*l*htoka ilap vt atokoli tok pulla hatuk mak o nitak yvmma hokoh*l*ichi tok oke.

21. Micha yvmma fokakma hatak nana hosh, Yakeh! Klaist vt ilvppak o antvshke, keyukmvt yakeh! yvmma antvshke, hvchim achi hoh kia, ik hvchi yimmo kashke.

22. Klaist ilahobi vhleha, micha hopaii ilahobi vhleha



aiena tobrt hiohli kvt nan isht atokowa puta, micha nafehna puta aiena ka otvnihinchit, yohma he yobakma, nan-vlhtoka vhleha nana kia yoshublicha hi oke.

23. Yohmi kia yakeh! nan-okluha ka tikbanli hvchim anoli li tuk oke, ahah! hvsh aiahnashke.

24. Amba na-palvmmi yvmmak atuk a misha foka nitak okvno, hvshi vt okhlilikma, anonti hvshi ninak aya mvt ik tommo ka he.

25. Mikma vba fochik puta kvt aka fohopakma, vba shutik nana aiasha puta kvt winakvcha hi oke.

26. Yvmma fokakma, Hatak Ushi vt nan-isht-aiahluka chinto, micha isht a holitopaka chinto aiena ka il ai-eshi hosh hoshonti anukaka mihinti na okla pisa hi oke.

27. Yvmma fokakma yvmmak ash ot im enchil vhleha ha pit tihleli na ilap i nan-vlhtoka vhleha ha a mahli ushta yakni atahaka ya ai vhlit shutik ont ataha pit ai vhli ka a hoyot itahoba hi oke.

28. Inta! fik vpi nan isht vlhpisa ka hvsh ai ithvnashke; Yvmmak okvt hishi toba chi hosh bokoblit tahakma, toffa chi kvt olanlosi ka hvsh ithana hoke.

29. Yohmi hokvt hvchishno vt yvmmak o hvsh chiyuhmi; na-yakohmi puta kvt ont aiahli na hvsh pisakmvt, ai vla hosi, okhissa ak kia ai itukonofa hoka hvsh ithanashke.

30. Ahli mak o hvchim achi lishke, Himak a okla maya ilvppvt ont ik taho kisha ho, nana ilvppa puta kvt a yvmohma chi hoke.

31. Uba shutik, micha yakni aiena kvt ont ai iksho ka he, amba vm anumpa puta hatuk vto ont ai iksho ka he keyushke.

32. Yohmi kia nitak yvmmak a he, micha hvshi kanvlli isht vlhpisa yvmmak a he aiena hokvno, hatak nana hosh pit ithana keyu, enchil vhleha vba aiasha, mikmvt Ushi aiena kak kia pit ik ithano, amba Iki ak bano hoke.

33. Ahah! aiahnit okchvt vba pit hvsh anumpohonlashke: nitak ont ai vlhpesa hi a hvsh ithana keyu hoka.

34. Hatak Ushi vt hatak osh anowa hopaki ia hosh, in chuka issvt ia mvt, in tishu vhleha hash o chuka apesvchi

atokoli mvt, mominchit a toksvli aiyuka im apesa cha, okhissa atoni ash o ahah! ahnit okcha chi ka, im apesa tok o chohmi hoka.

35. Yohmi hoka ahah! ahnit hvchi okchashke: chuka chrfa pehlichi vt opiakmá, keyukmvt ninak iklvnna hokmá, akaka ohonla kak okmá, keyukmvt, onnahinli kak okmá nana ho vla hi a hvsh ithana keyu hokvt.

36. Yummak keyukma ashalika vla cha, nusi hosh hvsh maya na ant hvchi pesa hinla hoke.

37. Yohmi hoka nana ho hvchim achi li kvv moma kak o Ahah! ahnit hvchi okchashke, im achi li hoke, achi tok oke.

#### CHAPTA XIV.

Na-holitompa isht asha micha na-holissochi vhleha aiena kvv Chisvs a illicha chi kvv anumpa it im achvfa, 1: 3 micha ohoyo hosh paschi ahama Chisvs noshkobo yo o fohopli. 10 Chutas Iskaliot vt Chisvs a ishit okla ibbak a fohka chi kvv inla nan isht it im apesa. 12 Chisvs ak osh miha ho, nan im ai ithvna vhleha hvv vbanvblit ont ia isht-vllhpisa ha atahli: mihma Chisvs vt ibai impa hosh nahaksichi a atokolit biffibli; 22 mihmvt Chitokaka im ai-impvt asha hi a apesa; 27 nan im ai ithvna vhleha hvv issvt tvmoa he, 33 mikmvt Pita yvt ilapa ik ithano miha he puta ka Chisvs vt tikbanli anoli. 32 Chisvs vt Ketsemane a ont chukowa cha, vba pit anum-puli; micha nan i palvmmitt ahanta. 43 Chutas vt vla cha Chisvs a ant yukachit ishi ma, nan ai ithvna vhleha hvv issvt tamoa: 53 Chisvs a Kaiafas a okla isht im ona mvt, ik ahobalo fehna, mihmvt illi issa; 66 Pita yvt i shahli ha ik ithano miha tuk osh anonti fallamvt nukhaklo.

1. YUMMAK atuk o i nitak tuklo ma, vbanvblit ont ia, micha pvška ik shatvmmo aiena kvv asha tok: mihma naholitompa isht asha pehlichi vhleha, micha naholissochi okla aiena kvv yummak ash o kaniohmit haksichit okla ishi cha, vbi bvvvvt maya tok.

2. Yohmi kia, Impa holitopa maya nitak ano keyu kashke, yummak keyukma, okla hvv isht ik ai vllhpesot asha hinla hoke, okla achi tok.



3. Mihma yummak ash osh Betani tumaha Saimon leplo-si-vbi a tok in chuka yo impa hosh asha ma, ohoyo hvt spiknat nan-ahama toba ho alabasta kotobushi vlhto, holi-topa fehna ho ishi hosh vla tok: mihmvt kotobushi ash o koli mvt, yummak ash o noshkobo ha o fohopli tok.

4. Yohmi ma kanimi mvt chukvsh anukaka isht ik im vlhpeso fehna kvv asha tok; mihmvt, Na katielmi ho nan-ahama ilvppvt yakohmit okpulot knia cho?

5. Ilvppvt iskvli tahlepa tuchina atampa kia aivlbi cha, ilbvsha vhleha ha i holhpela hinla tuk oka, achi tok. Mihmvt ohoyo hash o okla nan isht mihachi tok.

6. Mihma Chisvs vt, Ik ashá, nanta katielmi ho hvsh achibvchi hosh? nana achukma fehna mak o a si ai yvmihchi hoke.

7. Yohmi hoka ilbvsha yak okvto hvchim asha bilia chatuk: yohmi hokvt yummak okvno peh nitak kaniohmi ho hvchishno hvsh ahnikmvt, nana achukma ka hvsh i yvmihcha hinla hoke; amba vno vto hvchi takla anta li bilia keyushke.

8. Ilvppak ashot nana ka ai yvmihcha hinla kvto yvmihchi hoke: sa nipi vt hollopa chi ka, tikbanli ahvmma chi hosh vla ha tuk oke.

9. Ahli mak o hvchim achi lishke: Ubanumpa ilvppvt yakni moma ka kanima fehna ho ai anuhumpakma, nana ai yakohmichi tuk ilvppak ash kia yummak ash o isht ithaiyana hi a, anohowa hi oke, achi tok.

10. Mihma auah-tuklo kash achvvt Chutas Iskaliot vt yummak ash o ishit na-holitompa isht asha pehlichei vhleha ibbak fohka chi hosh im ona tok.

11. Mihma yvmma okla haklo mvt, na-yukpa mvt, tvli holisso ima he apesa tok. Mihma kaniohmi kak osh ai vlhpesa na yummak ash o ishi cha, yvmma ibbak fohka hinla kvv anukfihinli tok.

12. Atuk o pvska ik shatvmmo nitak vmmona ka vbanvblit ontia ya okla ai vbi ma, nan im ai ithvna vhleha hash osh, Katima yak o il ia cha, il atahli na vbanvblit ont ia ya ish impa hinla kvv ish ahni cho? im achi tok.



13. Mihma nan im ai ithvna vhleha hash o tuklochit pit tihleli cha, Tvmaha ha ont hvsh chukowashke : mikma hatak vt lukfi kotoba oka vlhto ho sholi kvv hvchi. afama chi hoke : apihvt hvsh iashke.

14. Mihma kanima yo ont chukowakma, chuka yvmma vttata hatak ash o, Nan-ithvnanchi vt, Ubapotvlhpo ai impa aboha hvv katima yak o talaia ho, nan vm ai ithvna vhleha ha pehlichit vbanvblit ont ia ya it ibai impa la chi cho ? achishke, hvsh im achashke.

15. Mikma vba-potvlhpo yosh chito, nana vlhtaha achukma ho hvchim anola chi hoke : yvmmak o hvsh a pim atahlashke, im achi tok.

16. Mihma nan im ai ithvna ash osh ivt, tvmaha ha ont chukowvt okla mvt, nana ai im anoli tuk ash ai vlhpiesa na pivvt okla tok : micha vbanvblit ont ia ya atahlit okla tok.

17. Atuk o ont opia ma yvmmak ash ot auahvuklo kash o pehlichich cha, ona tok.

18. Mihma binohmayvt impa ma, Chisvs ash ot, Ahli mak o hvchim achi lishke ; Svbai impvt hvsh maya kvv hvsh achvfona mvt, svshit inla ibbak hvv sa fohka chi hoke, achi tok.

19. Mihma okla nukhaklo fehna mvt, achvf-aiyukvt, Uno ak oh cho ? im achi ma, anonti inla mvt, Uno ak oh cho ? achit isht mahaya tok.

20. Mihma afalamanchi mvt, Auah tuklo kvv achvfvv ampo achvfa ho a svbai impa kak oke.

21. Hatak Ushi yokvto isht a holihiso tok mak o aya ho mvhlishe : amba Hatak Ushi a ishit inla ibbak fohki yvmmak okvto i palvmma chi mak oke : hatak yvmmak okvt ik tobo tok okmak osh im achukma hatuk mak a chi hoke, im achi tok.

22. Mihma impa hosh maya ma, Chisvs vt pvvka ya ishi cha, vba isht aiokpvchi mvt, tushahlichich cha, yvmmak ash o ima mvt, Ishit oh vpá, ilvppvt sa haknipp mak oke, achi tok.

23. Anonti isht-ishko ya ishi cha, vba pit aiokpvchit issa mvt, yvmmak ash o ima tok : mihma momvt okla ishko tok.

24. Mihma, Ilvppvt süssish nan-isht-vlhpisa himona hosh lawa ka i fohopa mak oke.

25. Ahli mak o hvchim achi lishke, Pakvpi a waya ka himmakma ak ishko mak atuk osh himonvchit Chihowa apehlichika yak o ai ishko la he nitak mak a hi oke, im achi tok.

26. Mihma vba-isht-taloa ya okla taloa mvt, kohehvt Alif nvnih ha pit ilhkoli tok.

27. Mihma Chisvs ash osh, Hvsh moma kvv himak ninak a vno pulla kak o hvsh ibetvbla chi hoke: Chukfvlhpoba apesvchi a issot boli likma, chukfvlhpoba vt it a fimimpa hi oke, achit holisso hatuk oka.

28. Yohmi kia tani li ha mvto, hvchi tikba ivt Kalili a ona la chi hoke, im achi tok.

29. Yohmi kia Pita ash osh, Moma kak osh ibetvbli ik nana kia, si yvmohma he keyu, im achi tok.

30. Mihma Chisvs vt, Ahli mak o hvchim achi lishke, Himak nitak peh himak ninak akinli, akaka yvt hitukla ha ola takla ka hituchina ha chik svthano ish miha chi hoke; im achi tok.

31. Yohmi kia Pita ash ot i shahlichit kvllochit anum-pulit, Chi awant svlli hokmvt, kaniohmi kak osh ak chitha-no ka miha la he keyushke, achi ma, momvt yvmmak inli ho miha tok.

32. Mihma osapushi Ketsemane hohchifo talaia ho okla ai ona tok: mihma nan im ai ithvna vhleha hash o, Uba pit anumpuli la chi takla ka ilvppak inli ho ho chiyá, im achi tok.

33. Mihmvt Pita, micha Chemis, mikmvt Chan aiena ka pehlinchit ia mvt, okokko! ahni fehna mvt, anonti nukhak-lot isht alotowa tok.

34. Mihmvt yvmmak ash o, Sa shilombishi vt nukhaklo atampvt illi hoke: ilvppakinli ho okchvt hvsh chiyashke, im achi tok.

35. Mihmvt itikba ivt olanlosi ona mvt, aka ont hlipia mvt, yohma hinla hokma, hvshi kanvlli ai vlhpisa atuk vt i kanvlla hinla ka, asilhha tok.

36. Mihmvt, Aki Abba ma! nan okluha kv̄t a chimi aiaḥli bano hoke; isht-ishko ilv̄ppa is sa kanv̄lichashke: ik yohmi kia vno ak osh nan aḥni li kak keyu, amba chishno ak osh nana hō ish aḥni mak ashke, achi tok.

37. Micha v̄la mvt, nusi hosh m̄aya na ant pisa cha, Pita ash o, Saimon chia hv̄t chi nusi hō? hv̄shi kanv̄lli v̄lhpisa achv̄fa takla ka chi okcha he keyu cho?

38. Okchv̄t v̄ba pit hv̄sh anumpv̄lashke, yv̄mmak keyukmvt anukv̄li hō ish iba chukowa hinlv̄shke. Shilombish okv̄to im v̄lhtaha ho mv̄hli kia, amba haknip ak osh tikambi hoke, im achi tok.

39. Mihmvt anonti kanima ia cha, v̄ba pit anumpuli mvt, anumpa mihi ash inli hō miha tok.

40. Micha falamvt v̄la ma, nishkin ak osh weki hatuk osh, anonti nusi hosh m̄aya na ant pisa tok: mihma nana hō okla im acha hi vt ik ithano ki tok.

41. Atuk o ont isht atuchina v̄la mvt, Himmak mak o, m̄ayvt nusit hv̄sh fohashke: ont ai v̄hli hoke, hv̄shi kanv̄lli v̄lhpisa hv̄t ai onv̄shke: yakeh! Hatak Ushi a ishit nanashv̄chi v̄hleha ibbak a fohka ch̄i mak oke.

42. Ho taní; kiloh ilhkoli, sv̄shit okla ibbak sa fohka ch̄i hokv̄t olanlosi v̄lv̄shke, im achi tok.

43. Yohmi ma mih makinli hō anumpuli moma na auah tuklo atuk achv̄fa Chutas vt okla chinto na-holitompa isht aḥsha pehlich̄i v̄hleha, micha na-holissoch̄i v̄hleha aiena aiasha ka a minti hosh bv̄shpo falaia, micha iti tv̄ptua aiena sholi hō it apehv̄t v̄la tok.

44. Yohmi kv̄t ishit okla ibbak fohka ch̄i yv̄mmak osh ot nana apesvt, Kv̄na hō i suksowa likma, yv̄mmak osh m̄ih mak ach̄i hoke; yv̄mmak o hv̄sh ishi cha, achukmalit ishit hv̄sh iashke, im achi tuk a tok.

45. Atuk osh v̄la makinli hosh, yv̄mmak ash o apissanlit iv̄t im ona mvt, A shahli ma! A shahli ma! achi mvt, i suksowa tok.

46. Mihma yv̄mmak ash o ibbak onochit okla ishi tok.

47. Mihma bilikasi hiohm̄aya tuk vt achv̄fv̄t bv̄shpo falaia



yo ishit shufi mvt, na-holitompa isht asha pehlichy in tishu ha ishit fahamvt haksobish a chanlit tvbli tok.

48. Mihma Chisvs vt anumpuli mvt, Hatak hukopa yo ayvt i kohcha ho chiyuhmit bvshpo falaia, micha iti tvptua aiena sholi hosh hvs svsha chi kvt hvsh itvnova cho?

49. Nitak moma ka tempel anukaka ya hvchi takla antvt, nan ithvnanchy li ka, hvch ik sasho chatuk: yohmi kia Holisso Holitopa yvt ont aiahly pulla chi kak o hvsh yakoh-mishke, im achi tok.

50. Mihma momvt yvmmak ash o issvt yihlepa tok.

51. Mihma hatak himita achvfa nipy bano hosh linen anchi kvt, yvmmak ash iakaiyvt aya tuk o, hatak himita vhleha hv it i hokli tok.

52. Mihma linen anchi ash o kanchy cha, nipy bano hosh mokofit mvllelit i kvnia tok.

53. Mihma Chisvs ash o na-holitompa isht asha i shahly yo okla isht im ia tok; mihma yvmma na-holitompa isht asha pehlichy vhleha, micha hochitoka vhleha, mikmvt naholissochy okla aiena kvt momvt im ai itvnahvt maya tok.

54. Yohmi ma Pita yvt auet mishemanchy hosh pit iakaiyvt maya mvt, na-holitompa isht asha i shahly im aboha holitopa yak kia ona tok: mihmvt tishu vhleha ha takla ashvt luak libesha tok.

55. Mihma na-holitompa isht asha pehlichy vhleha, micha nan-apesa moma aiena kvt Chisvs a nan isht im ai atokowa na vba chi kvt, okla akostininchy bvna tuk osh, ik akostinincho ky tok.

56. Yohmi ka yvmma nan isht atokoly ilahoby hokvto laua ky, nan isht atokoly kak osh ay it im achvfa keyu ky tok.

57. Mihma kanohmy hosh wakaya mvt, nan isht im atokoly ilahobit,

58. Ilvppvt ibbak o, isht toba tok tempel ilvppa okpvnlysh, nitak tuchinakma, inla yosh ibbak o isht toba keyu ho ikby la chy hoke, achy ka e haklo tuk oke, achy tok.

59. Yohmi ky yvmmvt okla nan isht atokoly kvt ont ik itibay achvfo akinly tok.

60. Mihma na-holitompa isht asha i shahli ash osh ikln-na wakayvt hikia mvt, Chisvs ash o i ponaklot, Afalaminchit nana kia chik acho cho? yakohmi kv̄t nan isht chi atokoli ka katiohmi hatuk oh cho? achi tok.

61. Yohmi kia nana ik acho hosh lumvt asha tok. Mihma anonti na-holitompa isht asha i shahli ash ot i ponaklot, Chishno ak osh Na-holitopa ya Ushi Klaist chia mak oh cho? im achi tok.

62. Mihma Chisvs vt, Mih sia mak oke: yohmi ka Hatak Ushi vt nan-okluha imaiya ibbak ishtimpakimma ya binili, mikmvt vba hoshonti anukaka minti aiena ho hvsh pisa he mak oke, achi tok.

63. Mihma na-holitompa isht-asha i shahli yash ot i nafohka ya it a hlihvfi mvt, Na katihmi ho himmakma nan isht atokowa ka iloh ahna hinla cho?

64. Chihowa isht ik ahobalo anumpa ha hvsh hakloshke: nanta hvchim anukfila cho? achi tok. Mihma illa he vlvhesa kak o, momvt okla anumpa onochi tok.

65. Mihma kanimi kv̄t on tuftua mvt, anonti nashuka ya ompohomo cha, ibbak bonunta isht isso cha, Akostininchit anoli, achi tok: mihma tishu vhleha hv̄t ibbak pv̄tha ya okla isht pvsaha tok.

66. Mihma Pita yvto nutaka aboha holitopa anukaka ya asha na ohoyo himita na-holitompa isht asha i shahli in tok-svli vhleha hv̄t achv̄vt v̄la tok.

67. Mihma Pita yvt libisha hosh asha na ont pisa cha atokolit pisa tok: mihmvt Chishno vt Chisvs. Nasalet v̄tta ya awant ish aya tuk akinlishke, achi tok.

68. Yohmi kia Pita yvt ik ithano ilahobit, yv̄mma ithana li keyu; mikmvt nana ish miha kak kia ak chim akostininchoshke, acki tok. Micha kohchvt apishia ya ona ma, aka-ka yvt ola tok.

69. Atuk o anonti ohoyo himita yosh yv̄mmak ash o pisa mvt, bilikasi hiohmaya kash o, Ilvppak osh yv̄mma pit ai achv̄fa mak oke, im achi tok.

70. Mihma anonti yv̄mma ik ithano, miha tok. Yv̄mmak atuk a in chekosi ma bilika hiohmaya tuk ash ot anonti Pita

yash o, Chishno ak kia okla ymma ish ibai achvfa yatuk o pullvshke: Kalili hatak chia hatuk osh, chim anumpa hvt pit ai achvfa hoke, im achi tok.

71. Yohmi kia Pita yash ot, Hatak ilvppa isht anumpulit hvsh maya ka ithana li keyushke, achit ik ahobalot anumpulit anumpa kvllo isht ile ononchit ishtia tok.

72. Mihma atukla ma akaka vt ola tok. Mihma Pita ash osh, Akaka yvt hitukla ha ik olo kisha ho hituchina ha chik svthano ish miha chi hoke, im achi tok Chisvs im anumpa hash pit ithaiyana tok. Mihma ymma anukfieli mvt, ya-haya tok.

CHAPTA XV.

Chisvs a okla takchi cha, Pailat ibbak fohki, 1; 15 na-holitompa isht asha vhleha hvt Pailat a anukfohkechi na Balabas ak o i hotofi cha Chisvs okvno ititaiyukhvna ahonvhlt illa chi ho im issa: 17 mihma tvshka chipota vhleha hvt ymmak ash o kvti tvnna yo iachukolichi cha, isso: 20 mihmvt ititaiyukhvna ahonvhla chi mak o ilauct ia. 21 Chisvs a Kolkohla ya okla isht ona mvt, hatak hukopa tuklo itin takla yo a tak alichit ititaiyukhvna ahonvhlichi; 29 mihma na-holitompa isht asha vhleha, micha okla puta kvrt ishit yopula: 33 hvshi vt okhlilit kvnia ma, Chisvs vt Chihowa ha pit in tahpahanlt illi. 38 Nantvna holitompa tempel anukaka takali tuk vt it a hlilafa; Sintulion vt, Chisvs vt Chihowa ushi pulla tuk achi; Chisvs vt ititaiyukhvna a takali ka, ohoyo kanimi kvrt pisa. 42 Chosef vt Chisvs haknip ititaiyukhvna takali tuk a ishit akvchi cha, sepvka himona ilap i hikia tuk vt fohki.

1. ATUK o onnahinli makinli ho na-holitompa isht asha pehlichi hash osh hochitoka vhleha, micha na-holissochi okla, mikmvt nan-apesa vhleha moma aiena ho nana ai it im apesvt maya cha, Chisvs a takchi mvt, isht ivt, Pailat ibbak a ont fohki tok.

2. Mihma Pailat ash ot i ponaklot, Chishno ak osh Chu okla ha i miko chia mak oh cho? achi tok. Mihma Chisvs vt, Vlhpesa ho ish mihvshke, im achi tok.

3. Mihma na-holitompa isht asha pehlichi vhleha hvt



yvmmak ash o nana ilaiyuka laua ho isht onochi tok: yohmi kia nanasi kia ilapvt afalaminchit ik miho ki tok.

4. Mihma Pailat ash osh anonti i ponaklot, Nana chik acho há cha? yakeh! nana ka isht a chi atokoli ka laua fehnvshke, achi tok.

5. Yohmi kia Chisvs ash ot nana ik acho moma tok. Yohmi hatuk o Pailat ash osh, okokko! aiahni tok.

6. Mihma vbanvblit ont ia impa asha ka ilap mak osh, kanima yo okla ahnikma, yukvt talakchi atuk a achvfalit im i hotofi chatuk a tok.

7. Mihma achvfa hosh, Balabas hohehifo kvv nan-vlhpisa ya itibai i sanalit ahashwa cha, nan-vlhpisa i sanali kvv hatuk vbi tuk vt ai it apehvt talakchi hosh itonla tok.

8. Atuk o okla laua yash ot chitolit tahpvlvt, nana ka ai i yvmihchi bilia yatuk vt yvmihcha chi ka okla im ahni tok.

9. Yohmi kia Pailat ash osh afalaminchi mvt, Chu okla i Miko ak o hvchim i hotofi la chi ka hvsh ahni cho? im achi tok.

10. Yvmmak okvno na-holitompa isht asha pehliche vhleha hvv i nukkilli kak osh ishit ibbak fohki tuk a ithana hatuk okvt.

11. Yohmi kia na-holitompa isht asha pehliche vhleha hash ot Balabas ak o im i hotofi pulla chi ka okla ha isht a nukfohkichi tok.

12. Mihma anonti Pailat ash ot afalaminchi mvt, Yohmi ka Chu okla i Miko hvsh achi yvmmak amo nanta ho kati-michi la he ak o hvsh ahni cho? achi tok.

13. Mihma atuklanchit chitoli hosh, Ititaiyukhvna ak o ahonvhlvchi, achi tok.

14. Yohmi ma Pailat ash ot, Nanta katiohmi ho nan ik achukmo nanta mak o yvmohmi tuk oh cho? im achi tok. Mihma yvmmak o okla isht i shahliche fehnvt tahpvlvt, Ititaiyukhvna ak o ahonvhlichí, achi tok.

15. Yohmi ma Pailat ash ot okla ha yukpali bvna kvv, Balabas ak o im i hotofi tok: micha Chisvs ash o fvmmi mvt, ititaiyukhvna ahonvhlvv illa chi mak o, yvmmak ash o ishit okla hash ibbak fohki tok:

16. Mihma tvshka chipota vhleha hash ot yvmmak ash o halvllit isht ivt nan ai apesa Pletolium hohchifo hō isht ona tok : mihmvt aya achvfa tuk ash o momint hoyot itvnali tok.

17. Mihmvt na-fohka hummakbi hō ishit fokvchi mvt, kvti tvnnvt iachuka ikbi cha, iachukolichi tok.

18. Mihmvt aiokpvchit, Chu okla i Miko ma ! na chi yuk-pashke, achi tok.

19. Mihmvt noshkobo ha kvshak ishit isso mvt, on tuf-tvvt, anonti hvchikbihleptv hikia cha, aiokpvchi aiena tok.

20. Mihmvt yvmmak ash o okla ishit yopula hayosh na-fohka hummakbi ash o i shvfi cha, ilap i na-fohka yash inli hō okla fohkvchi mvt, ititaiyukhvna ahonvhlicha chi mak o kocha isht ia tok.

21. Mihma Saimon Silinian hatak Aleksanta, micha Lufvs aiena iki vt yakni kocha vttvt minti hosh aya ma, im ititaiyukhvna ya shola chi ka okla atohnochi tok.

22. Mihma yvmmak ash o yakni Kolkohla, yvmmvvt to-showakma, Noshkobo foni aiasha achi hō okla isht ona tok.

23. Mihmvt ishka chi ka oka-paki osh mvh it-ibvlhto hō okla ipeta tok ; yohmi kia ik ishko ki tok.

24. Mihmvt yvmmak ash o okla ititaiyukhvna ahonvhlichi mvt, hatak achvfa kvv kaniohmi aiyuks isha chi kvv nan isht a shoelit mavvt, i na-fohka yash okla it i hopela tok.

25. Yohmi kvv hvshi kanvlli vlvhvisa ont atuchina hō ititaiyukhvna ya okla ahonvhlichi tok

26. Mihma anumpa isht ai onvtula hatuk holisso kvv pak-naka ya CHU OKLA I MIKO YOKE, achi hosh a holisso tok.

27. Micha hukopa tuklo hō achvfvv ibbak ishtimpak-imma takali ma, anonti achvfvv im vlvhvbekimma takali hō it aieninchit ititaiyukhvna ahonvhlichi tok.

28. Mihma holisso holitopa yvt achi kvv, Micha nan-ylvhvisa kobvffi vhleha hō iba holhtiena tok achi hatuk vt ont aiahli tok oke.

29. Mihma itvnovvt aya mvt, yvmmak ash o ik ahobalot pit i yuchunuklit, Tempel a okpvni cha anonti nitak tuchinakma ikbi chia hash osh,



30. Chishno ak inli kak osh ile okchalinchit ititaiyukhvna ya auet akowá, im achi beka tok.

31. Mihma na-holitompa isht asha pehlichí vñleha, micha na-holissochi vñleha aiena hash kia ishit yopula akinlit, Inla yokvno okchalinchi hatuk o kak osh, ilap inli hokvto ile okchalincha he keyushke.

32. E pisa cha pi yimma chí ka, himonasi ak o Isael i miko Klaist vt ititaiyukhvna ya vttvt auet ik akowá, it im achit maya tok. Mihma apehvt ititaiyukhvna ahonvñla kash kia yvmmak ash o na-mihachi tok.

33. Atuk o hvshi kanvlli vñhpisa isht hannali kv̄t ai ona ma, okhlili hv̄t yakni mominchit takali na hvshi kanvlli vñhpisa ont isht chakkali ka ona tok.

34. Mihma hvshi kanvlli vñhpisa ont isht chakkalik fehna, Chisvs ash ot chitoli hosh tahpvlvt, Eloi, Eloi, lama sabakhani, yvmv̄t toshowa kv̄t, An Chihowa ma! an Chihowa ma! nanta katiohmi ho is sa kanchi cho? achi hoke.

35. Mihma bilika hiokmaya tuk vt kanimi kv̄t haklo mv̄t, Yakeh! Elias ak o i howvshke, achi tok.

36. Mihma achv̄vt malelit ivt na-shatvmmi o wineka ont alotoli cha, kushak o takalichit ishka chí ka pit ima mv̄t, Ik ashá, Elias vt vla cha ant ishit akv̄chikmá nana chí hokmá, keho písá, achi tok.

37. Mihma Chisvs ash osh chitoli hosh anumpuli mv̄t, fiopa issa tok.

38. Mihma nantv̄nna tempel anykaka takali kash ot paknaka ai it a hlilav̄t ia mv̄t, aka ont taha cha tuklo tok.

39. Mihma Sintulion vt im a chapaka hikia tuk vt, yvmv̄t chitolit makachi cha, fiopá issa na pisa mv̄t, Hatak ilv̄ppvt Chihowa Ushi yatuk o pulla mv̄hlishke, achi tok.

40. Mihma ohoyo aiena hosh mishema ho písvt hiohmaya ma, Meli Maktalene, micha Chemis iskitini, mikmv̄t Choses aiena ishki Meli, mikmv̄t Salome aiena kak osh takla hinli tok.

41. Yohmi kv̄t Kalili a anta ma, ohoyo ilv̄ppak osh apehvt ayvt, nan isht im ashwa tok: mihma apehvt ayvt Chelusalem a ai vla tuk vt ohoyo inla yvt laua hosh pit ai oklyha tok.



42. Atuk o ont opivt taha ma, nana il ai atahli nitak, yummvt nitak hullo vt onnvt asha ho,

43. Chosef Alimahlea vttta, nan-apesa holitompa hosh, yummak kia Chihowa apehlichika hohoyo hosh anta hatuk osh, nukwaya ikshot Pailat ash o ont iba chukowa cha, Chisvs haknip a im asilhha tok.

44. Mihma Pailat ash ot mihi ash takla illi hotuma, ahni kvv nukhlakancha tok, micha Sintulion a hoyo mvt, illi tuk a ahchibakma, nana tuk a, i ponaklo tok.

45. Micha sintulion a isht ai akostininchi mvt, haknip ash Chosef a im issa tok.

46. Mihma yummak ash ot linen lapushki yo chumpa mvt, yummak ash ishit akvchi cha, linen a a bonulli cha, sepvka tveli yosh kulvt toba ho ont bohli cha, tveli yo tonolichit sepvka okhissa yash pit o bohli tok.

47. Mihma Meli Maktalene, micha Meli Choses ishki ita tuklo kvv yummak ash a bohli ka pivt okla tok.

CHAPTA XVI.

Enchil osh Chisvs vt falamvt tani tuk a ohoyo im anoli, 1. 9 Chisvs vt falamvt tani ha yvt Meli Maktalene a im otrni tuk osh, 12 nan im ai ithvna vhleha ha tuklot i haiaka: 14 atuk osh i himmakma auah-chvfa kash ont im otrni: yohmi mvt na yimma he keyu tuk a nan isht i miha; 15 micha vbanumpa ya kanima moyuma isht ai anumpohonla chi ka im apesa; 19 mihmvt vba ya ia ma, vba isht anumpa hvv anuhumpa.

1. ATUK osh nitak hullot issa ma, Meli Maktalene, micha Chemis ishki, mikmvt Salome aiena kvv ivt yummak ash o ont ahvmma chi kvv, na-balama okla chumpa tok.

2. Atuk osh wek chukowvt ia nitak vmmona onnahinli fehna hvshi kohcha ho sepvka yash okla ona tok.

3, 4. Mihmvt, Kvta hosh tveli vt chito fehna kash o sepvka okhissa a pim a kanvllicha chi ho? ilap bika it im achi tok: mihmvt okla pit hopokoyo kash osh, a kanvlli tuk a, okla pit pisa tok.

5. Micha sepvka ya okla pit chukowa mvt, hatak himita

yvt na-fohka tohbi falaia fohka hosh, ishtimpak imma tvn-nvp a binili ho, okla pisa cha, nukhlakancha tok.

6. Mihma yvmmak ash ot, Ik hvchi nukshopo kashke, Chisvs Nasalet vttā yvt ititaiyukhvna ahonvhlā tuk ash o hvsh hoyoshke: tani tuk oke: ilvppa ikshoshke: okla a bohli tuk a, pit ho pesá.

7. Yohmi kia hvsh ia cha, nan im ai ithvna vhleha, Pita aiena ka, yvmmak okvt hvchi tikba Kalili a ia he tuk a, ont hvsh im anolashke: yvmmak o hvchi miha tuk mak oka, yvmmak o hvsh a pisa chi hoke, im achi tok.

8. Mihma tushpvt pit okla kohcha mvt, sepulka yash ashvvt pit yihlepa tok: nukhlakancha, vwnihinechi, micha nukshopa aiena hatuk osh, kvna kia nanasi kia okla pit ik im acho ki tok.

9. Micha Chisvs vt wek chukowvt ia nitak vmmona on-nahinli fehna ho tani tuk vt, Meli Maktalene, yvmmak o nan-isht-ahullo okpulo untuklo ka a kohchi tuk ash nan tikba i haiaka tok.

10. Mihma yvmmak ash osh ivt apehvt itvnova yatuk vt nukhaklot yaiya hosh maya ma, ont im anoli tok.

11. Mihma yvmmak ash osh okchaya na yvmvvt pisa tuk a okla haklo mvt, ik yimmo ki tok.

12. I himmakma yvmmak ash osh, tuklo hosh itvnovvt ayvt, yakni kocha itonachi ma, anonti ai inlv̄t i haiaka tok.

13. Mihma itiachi cha, kashapa kash o ont im anoli tok: mihma yvmmak ash kia okla ik i yimmo ki tok.

14. Atuk o i himmakma auah-chvfa hash osh impa hosh maya ho ont i haiaka cha, tani ha ya inla yvt pisa tuk a okla ik i yimmo hatuk oka, na yimma he keyu, micha chvkvsh kv̄llo aiena ka nan isht ai i miha tok.

15. Mihmvt, Yakni moma ka ivt, vbanumpa ha hatak hi-kia puta isht hvsh im anumpohonlashke.

16. Kvna hosh yimmi cha baptismokmvt, okchaya hi oke; amba kvna hosh ik yimmo hokvto, issikkopvt bilia im v̄lhpisa hi oke, im achi tok.

17. Micha na-yimmi vhleha hokvno nan-isht atokowa yakohmi kak osh a takanlit aya hi oke. Uno sa hohchifo ha

nan-isht ahullo okpulo puta isht kocha welikmvt, anumpa ilaiyuka anumpula hi oke.

18. Micha sinti chilita puta ka peh okla aiowa he, mikmvt ishkot illi nana kia ishko hoh kia, nan ik kanihcho ka he : abeka ya ibbak isht umbitepakma, hlakofa he bano hoke, im achi tok.

19. Yohmi mvt Chitokaka yvt ant im anumpuli mvt, vba ivt vba yakni a ont chukowa cha, Chihowa im ibbak ishtimpak-imma ya a binili tok oke.

20. Mihma Chitokaka yvt apelahanchit anumpa ha nan isht atokowa kvt a takanlit aya hatuk ash isht aiahlichi ma, kanima moma ka vba isht ai anumpohonlit itvnowa tok oke. Amen.



# UBANUMPA LUK

UT HOLISSOCHI TOK.

---

## CHAPTA I.

Luk vt Hliopilvs a pit im anumpuli, 1. 5 Enchil vt Sakalias a ont im otvni: 13 mihmvt ushi asha hi a i miha; 24 Elisabet vt vlla shali cha, ile luhmi. 26. Enchil vt ohoyo himita Meli a ont i haiaka; yohmi mvt Shilombish Holitopa yosh nan anukfilli ho, Klaist ishki a toba pulla hi a i miha. 39 Meli vt Elisabet a ont i nowa mikmvt ita tuklo kvv Chihowa ya aiokpahanchi. 57 Chan vt vttta cha, hakshup trpa mvt hohchifo: 64 mihma Sakalias vt falamvt anumpuli mvt, 67 na tikbanli anolit Chihowa ha aiokpahanchi.

1, 2. NANA ka isht a pi-yimmi ahli fehna vmmonvt isht auehinchii ka nishkin isht pisvt, nana ka isht ahashwa tuk vt yvmma pim anohonli tok mak osh lava kvv yvmmak atuk a isht anumpa holisso ha ikbi tuk o,

3, 4. Vno ak kia nan vmmona isht-auehinchii ka nana kvv akaniohmi tok puta ka mominchit asilhhit achukmalit akostininchii li tuk vt, chishno vt nana ka isht chim annoa tuk a aiahli ka ish ithaiyana chi ka, nan-annoa ma it iakaiyachi hosh pit chi holissochi la hi vt vm anukfila tuk oke; Hliopilvs holitopa fehna ma!

5. Chutea i miko Helot vt ahanta nitak a, na-holitompa isht vttta achvfa Sakalias hohchifo kvv, Abia apehlichika ai ibafohka yosh anta tok: mihma tekchi vt Aalon ushetik vhleha isht-atiaka yosh, hohchifo kvv Elisabet a tok.

6. Mihi yosh yvmmvv tuklot Chihowa yvv pisa ho aiahli biekvv, anumpa vlhpisa puta, mikmvt nan-vlhpisa ilaiyuka Chihowa yvv apihisa tok a moma ka i shanaiya iksho hosh ahashwa tok.

7. Yvmohmi hosh Elisabet ak osh ushiksho yatuk o, vlla yvt ik im iksho ket okla hosh, tuklot sipoknit taiyaha tok.

8, 9. Atuk o yakohmi tok : ilap ai itvpeha yvt ont im ai vlhpiesa ma, yvmmt na holitomp a isht asha Chihowa itikba ya isht ai ahanta chi ka, na holitomp a isht asha nan im vlhpisa chatuk mak o, Chihowa in tempel a ont chukowa cha, na-balama luacha hi vt nashoeli ho isht im vlhpisa tok.

10. Yvmohmi ma okla laua yvt na balama lua takla ka vba pit anumpuli hosh kocha ya aiasha tok.

11. Yvmohmi ma Chihowa im enchil vt na-balama a lua alta ishtimpak imma tennvp o hiki vt i haiaka tok.

12. Mihma Sakalias vt pisa mvt, nukhlakanchvt nan-nukshopa mvt anukfoyuka tok.

13. Mihma enchil ash ot, Sakalias vt chi nukshopa na ; vba pit ish asilhha tok vt chim vlhpesa mak oke : yohmi ka chi tekchi Elisabet vt vlla nakni o chi shala he ; mikma ymma Chan ish hochifa he ;

14. Yohmikmvt na chi yukvt chim achukma fehna he ; yohmikma yvmmt vta ka na yukpa kvv laua hi oke.

15. Yvmmak okvt Chihowa ya i holitopa fehna lie : mikmvt oka-paki, micha oka homi nana kia ik ishko ka hi oke : micha ishki ikfoka a kohcha mak inli hosh Shilombish Holitopa isht anukfohkvv alotowa hi oke.

16. Yvmohmikmvt yvmmak okvt Israel isht-aiunchululi vhleha ha lauachit in Chitokaka Chihowa ya im antia hi a anukfohkicha he mak oke.

17. Mikmvt iki vhleha chukvsh a falaminchit vlla puta ka ai it ibafohkit it in nanaiyachikmvt, anonti nan ik yimmo puta ma hopoyuksa vhleha ha im anukfila ha pit ai ibafohkit, okla ha anukfohki na Chihowa hoka im vltaha chi ka, Elias im anukfila chinto il ai eshi hosh Chitokaka itikba ya ia hi oke, im achi tok.

18. Mihma Sakalias vt, Nanta hosh katiohmi na ilvppa isht akostininchi la chi cho ? vno vt hatak sa sipokni, yohmikma sa tekchi mvt sipoknit taiyaha kvno, enchil a im achi tok.

19. Mihma enchil ash ot afalaminchi kvv, Vno vt Chih-

wa itikba hikia Kebliel sia mak oke: mih hosh ant chit im anumpulit, nan annoa achukma ilvppa chim anoli la hi vt si vlhtoka tuk oke.

20. Yvmohmi tuk o vm anumpa ha ont im ai vlhpiesak-mvt aiahla hi oka ik chi yimmo; yohmi hokvt ik anumpulo ish toba cha, ish anumpula he ik chim vlhpeso mak o, nana kash ot ont aiahli nitak a onak mak a hi oke, im achi tok.

21. Mihma okla hash ot Sakalias a pit hoyot aiasha mvt, tempel anukaka ya anta na hopaki hatuk o, katiohmi cho? okla ahni tok.

22. Atuk o yvmmak ash ot kohcha mvt, okla hash im anumpula he keyu ki tok: peh abahanchi mvt, anumpula he keyu hosh hikia hatuk o, tempel anukaka ya nana ho a pisa tuk a, okla akostininchi tok.

23. Atuk o yakohmi tok; ilap na-holitompa isht ai ahanta he nitak atuk vt ont taha makinli ma, in chuka ia tok.

24, 25. Atuk o nitak yvmmak atuk a i himmak ha yo, tekchi Elisabet vt vlla i fohka cha, Hatak puta itintakla sa hofahya kv̄t a takali tuk a isht kancha chi hosh, auet sa pihisa nitak vt Chitokaka yvt ilvppak o a yakohmichi tuk oke; achi mvt ile luyuhmi na hvshi tahlapi tok.

26, 27. Atuk o hvshi ont isht hannalik fehna ohoyo him-ita yvt hatak Chosef hohchifo hosh, Lewi in chuka-chvfa isht atiaka yo, im vlhp̄a hosh ohoyo himita hohchifo mvt Meli osh, Kalili yakni tmaha Nasalet hohchifo ho anta ho, Chihowa yvt Kebliel a pit i chvffichi tok.

28. Yvmohmi na enchil ash ot im aboha ha ant chukowa mvt, Holitopa fehna chia hv̄t na chi yvkpashke; Chihowa hv̄t chi halvli hoke, holitopa kv̄t ohoyo puta moma ka ish imaiyvshke, achi tok.

29. Mihma yvmmak ash ot pisa mvt, yvmv̄t nana ahan-chi ka nukhlakancha mvt, nan isht aiokpv̄chi katiohmi hosh yakohma hinla cho? ahnit im anukfila tok.

30. Mihma enchil ash ot, Meli vt ik chi nukshopo kash-ke; Chihowa ish i holitopa hi vt chim vlhpesa tuk oke.

31. Yohmi kv̄t yakeh! vlla yvt chi fohka cha, vlla nakni o ish ishikmvt, hohchifo ha Chisvs ish hochifa he mak oke.



32. Yvmmak osh Chitokaka tobrt ahantvt, Nana moma i shahli Ushi hohchifa he; yohmikma Chitokaka Chihowa yvt iki Lewi im ai om binili holitopa ya ima hi oke.

33. Yohmikma yvmmak osh Chekob in chuka chvfa isht atiaka pehlichu na bilia he: yohmikma yvmma apehlichika ya ont ataha he mvt iiksho ka he mak oke, im achi tok.

34. Mihma Meli ash ot, Hatak kia ithana li keyu hatuk ano, katiohmit ilvppvt yakohma chi cho? enchil ash o im achi tok.

35. Mihma enchil ash osh anonti afalaminchit, Shilombish Holitopa yak osh chim aya he; yohmikma Nana moma i shahli nan isht im aiahlika yvt chi o hoshontikacha hi oke; yohmi hoka na-holitopa kvv chim vttu hi vt yvmmak kia Chihowa Ushi hohchifa hi oke.

36. Micha yakeh! chi kanomi Elisabet vt ushiksho hohchifo chatuk kia, sipoknit taiyaha hosh vlla nakni i fohka tuk a himak vt hvshi ont isht i hannali hoke.

37. Chihowa ak okvto nana kvv ik im aiahlo ka hi vt iksho hoka, im achi tok.

38. Mihma Meli ash osh, Chitokaka immi ohoyo sia ka is sa pesashke: chim anuhumpa tuk mak o nana kvv vm ai vllhpiesashke, im achi tok. Mihma enchil ash ot issvt ia tok.

39. Mihma nitak yvmma foka ma Meli ash ot wakaya cha, tushpvt ivt, Chuta yakni nvnih-foka tmaha chito mvt talaia ho ona tok.

40. Yohmi mvt Sakalias in chuka ya ont chukowa cha, Elisabet a aiokpvchi tok.

41. Mihma yakohmi tok; Meli vt aiokpvchi na Elisabet vt haklo ma, vlla yvt ikfoka anuka ilhkoli tok; yohmi ma Elisabet vt Shilombish Holitopa isht anukfohkvv alotowa tok.

42. Mihmvt chitoli hosh anumpulit, Holitopa kvv ohoyo puta moma ka ish imayvshke: mihma chikfoka anuka a toba mvt holitopvshke.

43. An Chitokaka ishki vt avvt vm vla ilvppvt katiohmi ho a yakohmi cho?

44. Yakeh! is si aiokpvchi ka anumpa hvv olvt sa hak-

sobish a ant fohka mak inli ho, vlla yvt na yukpa kvt sak-foka anuka ya ilhkoli kapo.

45. Chitokaka yvt ymma nana ho im anoli tuk a ont aiahlit taiyaha hi oka, na yimmi tuk ymmvto na yukpush-ke achi tok.

46. Mihma Meli ash ot, Sa shilombish vt Chitokaka ya holitobli,

47. Yohmi ma sa chukvsh vt Chihowa si okchalinchi a ai isht ilaiyukpvshke.

48. Ymmak okvt in tishu ohoyo ilbvsha ya i nukhaklot pisa tuk oke: yohmi hoka himak pillvt ia ka hatak isht ai unchululi puta kvt na-yukpa sia hochifa hi oke.

49. Ymmak osh nana moma imaiya mak osh nafehna chinto ka a yvmihchi tuk oke: yohmi kvt hohchifo hvt holitopa yoke.

50. Micha hatak it ai unchululi ia puta ka ilapa im antia vhleha ha ymmvt i nukhaklo kvt ai in takali mak oke.

51. Ymmak okvt ilapo shakba isht imaiyachi chatuk: ilapunla vhleha hvt ilap chukvsh nan isht im anukfilvt mayakma, ymmak okvt it a fimibli chatuk oke.

52. Ymmak okvt hochitoka vhleha im aiasha puta tuk a ai isht akakohlikmvt, anonti ilbvsha vhleha ak o holitobli-chi chatuk oke.

53. Hohchvfo ya ymmak okvt na hochukma puta ka isht fihoblikmvt, anonti nan in laua yano nana kia ik im ikshochit kanom pit tihleli chatuk oke.

54, 55. Eblaham, mikmvt ymma isht ai unchululi ka i nukhaklot a bilia hi vt pin tikba vhleha ha pim anumpohonli tok vt ithaiyana mvt, in tishu Israel a apelahanchi chatuk oke, achi tok.

56. Mihmvt Meli vt ymma awant anta na hvshi tuchi-na foka mvt, falamvt in chuka ona tok.

57. Yohmi ma Elisabet vt vlla in tonla hi vt ont ai im vllhpiesa mvt, vlla nakni o sholi tok.

58. Mihma in <sup>house</sup>chuka <sup>new</sup>panta asha, micha i kanomi vhleha aiena kvt, Chitokaka yvt ymma i nukhaklo fehna tuk a okla haklo mvt, ibai yukpa tok.

59. Atuk o yakohmi tok: nitak ont isht untuchina ma vlla ya hakshup tvblit itvnowa tok; atuk osh iki a hochifochit yvmmak ash Sakalias hochifo tok.

60. Mihma ishki ash osh anumpuli mvt, Yohma he keyu; amba Chan ak o hochhifa chi hoke, achi tok.

61. Mihma Chi kanomi hvt kanima mvt hochhifo ilvppa isht a hochhifo kvt iikshoshke, okla im achi tok.

62. Mihmvt iki ak osh nana ho hochhifa hi a ahnik mak a chi ka, okla pit abvchi tok.

63. Mihma yvmmak ash ot aholissochi a hoyo cha, Hohchifo hvt Chan oke, achit holissochi tok. Mihma, Na katihihi ho? momvt okla ahni tok.

64. Mihma yvmmak ash ot itih hvt ashalika wakama ma, isunlush vt yuhapa na anumpuli mvt, Chihowa ya aiokpahanchi tok.

65. Yvmohmi ma yvmma ai i bilika fullota aiasha tuk ash ot momvt nukshumpa tok: yohmi ma ilvppa yakohmi tuk vt momvt annovt Chutea yakni nvnihi foka yash mominchit a hlopulli tok.

66. Mihma okla yvmma haklo tuk vt moyumvt, Vlla katioma chi hosh ilvppvt yakohmi cho? ahanchit chukvsh anukaka okla isht anukfihinli tok. Mihma Chitokaka ibbak vt yvmmak ash o apelahanchi tok.

67. Mihma iki Sakalias ash ot Shilombish Holitopa isht anukfohkvt alotovrt, tikbanli nana anolit pit aiokpahanchit,

68-71. Israel in Chitokaka Chihowa hvt holitopashke: yvmmak okvt yakni toba tok taiyakla ka i hopaii hochukma aiashvt isht-auehinchi ka itih isht ai anumpohonli tok mak osh, pishno vt pin tvnvp vhleha, mikmvt pi nukkilli vhleha ibbak ma mominchit il ai o hlakofa hi o, im okla talaia ka i nukhaklot pihisa cha, nan isht vltoba he im atahlit, isht aiokchaya chinto fehna ka ilap in tishu Lewi in chuka-chvfa a pi hilechi tok.

72-75. Yohmi kvt pishno vt pin tvnvp vhleha ibbak ma il ai in hlakofikmvt, pi okchayvt nitak il ai ahanta kvt, nukshumpa iksho hosh nan-ashvchi ikshot ai vllhpiesa hosh im antivt, itikba ma il ahashwa he mak o, auct pim aiahna hi vt



ilap i nan-vlhpisa holitopa anumpa kullo aiena ka pin tikba Eblaham a isht ai im il onochi tok vt ithaiyana cha, anonti nan i nukhakla he anumpa ha pin tikba vhleha ha ihima tok vt aiahlich i mak oke.

76-79. Yohmikma, Ulla chishno vt Chitokaka yvt ataya chi puta ma apoksiachit, anonti hvpin Chihowa nan-isht i nukhaklo chinto pulla hatuk mak o, ilap nan im ai ashvchika yvt i kashofa hosh isht-ai okchaya ma im okla ha ish ithv-nahancha chi hosh Chitokaka itikba ish ia chi hokvt, Moma imaiya i hopaii chi hohchifa hi oke. Yvmmak atuk pulla mak o ai okhlilika, mikmvt ai-illi ai o hoshonti aiena anuka-ka aiasha tuk a in tohwekelicha chi, mikmvt hvv iyi yvt ai itin-nanaiya hina foyuka chi ka apelvcha chi mak o onna tohwikeli vba minti kvv auct pi on tommishke.

80. Yvmohmi tuk o vlla yash ot asvnot ivt, im anukfila mvt kullov i shahlit ia; yohmi hosh yakni haiaka ya ahanta na Israel a i haiaka he nitak vt ai ona tok.

## CHAPTA II.

Chisvs vt Behlehem ak o ai vtta cha, vlhpoba ai-impv peni yo fohka,

1. 8 Chukvvlhpoba apesvchi vhleha Behlehem bilika asha tuk o, Chisvs vt vtta ka, enchil osh ont im anoli; 13 mihma enchil vhleha hvv laua hosh ai vla cha, ibai achvvt Chihowa ha okla aiokpahan-chi. 21 Chisvs vt hakshup tvpa; yohmi ma tempel anukaka yak o Chitokaka ya pit ai im issa ma, Simeon, micha Anna aiena kvv, avvt okla hosh tempel a ont chukowa; yohmi cha hatak okchalin-chi himona vtta tuk a pisa mvt, Chihowa ha pit aiokpahanchi. 40 Chisvs vt avvmmi auah-tuklo ka ona mvt, 46 tempel o nan ai im avvchi vhleha puta ka i haponaklo, nan im asilhhvchi aienvt anta: 51 atuk osh falamvt Nasalet ona cha, iki, ishki aiena ka im antia hosh ahanta.

1. MIHMA yakohmi tok: nitak yvmma foka ma, yakni yvmmvv oklvuyhvvt holissa hi a Sesa Akvstv vt apihisa tok.

2. Yakohmi ka Silenivv vt Silia i mikot ahanta mak o okla holissa he ilvppvvt vlhpisa vmmona tok.

3. Mihma momvt ilap in tvamaha aiyuka a holissa chi hosh ilhkoli tok.

4, 5. Mihma Chosef ak kia, yummvt Lewi in chuka-chufa yo isht-ai-unchululi hatuk okvt, Kalili yakni Nasalet tmaha ha vttvt kohchvt ia mvt, Chutea yakni Lewi in tmaha Behlehem hohchifo ho tekchi vlhpoa Meli vt vlla in tola hosi ho, it iba holissa chi hosh ona tok.

6. Atuk o yakohmi tok: yumma ont abashwak fehna, yummvt vlla in tola he nitak vt ont ai vlhpiesa tok.

7. Mihmvt ishi ahpi kvv vlla nakni osh in tola cha, yummak ash na-hlilahli o a bonulli mvt, aboha anuka yano aiasha yvt iksho hoka, issuba ai-ilhpita yo fohkit bohli tok.

8. Yohmi ma yakni yummak inli ka chukfulhpoba apesvchi vhleha hvt vlhpoba apesvchi hosh ninak a haiaka yo aiasha tok.

9. Yumohmi tuk o Chihowa im enchil vt ayvt im vla na Chihowa im a tohwekali ehinto kvv ai on tommit talaia ma, okla nukshopa fehna tok.

10. Mihma enchil ash ot, Hvchi nukshopa na; vno vt anumpa na-yukpali a chinto fehna okla moyuma ka im aya he mak o isht hvchim aya li hoke.

11. Himak nitak a nan-okchalinchí, yummvt Klaist Chitokaka mak osh Lewi in tmaha ha a hvchim ai vttvshke.

12. Yohmi ka atokowa kvv ilvppak o yakohmi ha chi hoke: Vllosi vt nahlilahli o a bonunta hosh, issuba ai ilhpitta yo fohkvv itonla ho ont hvsh pisa chi hoke, im achi tok.

13. Yohmi ma i mih-makinli ho enchil okla chinto yvt enchil ash o ant okla apeha cha, Chihowa ya aiokpvchit,

14. Chihowa yvt vba chaha moma i shahli ya ik a holi-topa; mikmvt yakni paknaka ma ik a nanaiya: mikmvt hatak a nana achukma im anukfilli aiena kvv ik ai ituyula, ahanchi tok.

15. Mihma yakohmi tok: enchil okla hash osh issvt vba ya ivt taha ma, chukfulhpoba apesvchi vhleha hash osh, Inta! Behlehem fehna ka kiloh ia cha, nana kvv a yumohmi tuk o, Chitokaka yvt hvvim anohonli tuk ilvppa ont ehō pisashke, it im achi tok.

16. Mihmvt tushpvt itvnowvt ona cha, Meli, Chosef ita

tuklo ka, micha vllōsi atuk mvt issuba ai ilhpitta yō fohkvt itonla aiena hō okla pisa tok.

17. Yakohmit ont pisa mvt, vlla yvmma nana ka okla nan isht im annoa tuk ash ot mishema a mominchit ai anoli tok.

18. Yohmi ma na yakohmi ka chukvllhpoba apesvchi vhleha hvt im anoli na okla haiyaklo tuk vt momvt, okokko! aiahni tok.

19. Yohmi kia Meli vto nana yakohmi kash mominchit chukvsh anukaka isht ithaiyanvt, anukfihinli tok.

20. Mihma chukvllhpoba apesvchi vhleha hash ot nana kv̄t im ai annoa tuk ash fehna ka okluhvlinchit haklo, micha pisa aiena mvt, Chihowa ya holitoblichit aiokpahanchit, fala-mvt okla ilhkoli tok.

21. Yvmohmi tuk o nitak ont isht untuchina ma, vlla ya hakshup wishakchi tvbla hi a ai ona hatuk o, ikfoka anuka ik foko kisha mak o, enchil vt yvmmak o hochifo tok oka, yvmmak ash ot Chisvs hohchifo tok.

22–24. Yvmohmi tuk o Moses vt nana apesa tok a, ishki ash ot na-hullochi nitak vt ont in taha mvt, ishi ahpi ka nakni osh vtta hokvto moyumvt Chitokaka ma pit im a holitopa he mak o, Chitokaka i nan-vllhpisa ha a holihiso hatuk oka, yvmmak ash Chitokaka ima chi, micha nan-isht aiokpvchi vt pvchi yoshiba tuklo, keyukmvt pvchi himita yosh tukla hi o, Chitokaka i nan-vllhpisa yvto ahanchi hatuk oka, isht aiokpvcha chi hosh Chelusalem a itvlachi tok.

25. Yvmohmi ma yakeh! hatak Simeon hohchifo hosh Chelusalem a anta tok: yohmi kv̄t yvmmak okvt hatak vllhpiesa, Chihowa ma holitobli aiahli hosh Israel okla nayukpali a pit hohoyo hosh anta tok: yohmi ma yvmmak oka Shilombish Holitopa yvt anukfoyuka tok.

26. Yohmi kv̄t yvmmak okvt Chitokaka i Klaist a ik peso kisha hokvto, illa he keyu ka, Shilombish Holitopa yvt tikbanli im anoli tok.

27. Yvmohmi tuk o Shilombish Holitopa yosh yvmmak ash o anukfoyuka hō ayvt tempel a ant chukowa tok: atuk



o ai yvmohma he nan-vlhpisa ha isht ai yvmihcha chi hosh iki, ishki ita tuklo kvt vllosi Chisvs a sholi cha, ant chukowa;

28. Yohmi ma yvmmak ash ot ibbak ishit sholi cha, Chihowa ya pit aiokpahanchi mvt,

29. Chitokaka ma! chishno chim anumpa ha tok pulla mak o, himak okvno chin tishu hvt na-yukpa hosh ia hi a im aiahni:

30—32. Chi nan-ai-okchaya na-tohwikeli yvt oklushi nan ik ithano vhleha ha isht in tohwikela chi, micha chim okla vhleha Israel mvt isht a holitopa chi ka, okla moma itikba ish ai atahli tok a, sa nishkin vt pisa hoke, achi tok.

33. Yohmi ma yvmmak ash o ishki, Chosef ita tuklo kvt yvmma nana kvt isht anumpa ka, anukhlakancha tok.

34, 35. Mihma Simeon ash ot, yvmmt ai yukpvt okla hi a, im aiahnit vba isht asilhha; yohmi mvt ishki Meli ash o, Yakeh! vlla ilvppvt Israel okla hvt isht ai akakoha, mikma anonti a tana he aiena kvt lawa he: micha nan-isht-atokowa ka i sanalit isht anumpohonli na chukvsh lawa nan isht im anukfila puta mvt ai otaiyana he mak o isht ai vlhtoka hoke; ahli, mikmvt chishno chi shilombish ma aieninchit bvshpo falaia yvt a hlopulla hi oke; im achi tok.

36. Yohmi ma ohoyo hopaii Anna hohchifo Ase isht ai unchululi, Fanuel ushetik osh, himitasit hatak auwaya tuk o, afvmmi untuklo ma illi tuk o, antvt sipoknit kvnia tok.

37. Yohmi kvt vlhtaklvh hikia tuk a afvmmi pokoli untuchina akocha ushta foka hosh, yvmmak okvt tempel a issvt ik aiyo hosh, nitak, micha ninak aiena ka na-hullochi, micha vba pit anumpuli aiena hosh Chihowa ma isht a holitoblit ahanta tok.

38. Atuk osh yvmmak ash ot yvmmak fehna ma ant chukowa mvt, Chihowa ha, yakoke, achit aiokpvchi akinli tok: mihmvt isht ai okchaya hi a Chelusalem a hoyot aiasha tuk puta ka yvmmak ash ai isht im anumpohonli tok.

39. Yvmohmi ma Chihowa i nan-vlhpisa hatuk ash mominchit nana ka ont aiahlichit taiyahli mvt, falamvt, Kalili yakni ilap o in tmaha Nasalet a it onachi tok.

40. Atuk o vlla yash ot asvnot ia mvt, im anukfila hvt hopoyuksvt alotvt kvllot i shahlit mahaya; yohmi ma Chihowa nan isht ahniechi ka mvt ai anukfoka tok.

41. Ubanvblit ont ia nan-ai-impā holitopa ashakma iki, ishki ita tuklo kv̄t afvmmikma Chelusalem a itiachi beka tok.

42. Atuk osh impa holitopa isht asha yvmmak oh chatuk mak osh ont ai v̄lhpiesa ma, yvmmak ash ot afvmmi auah tuklo hō, Chelusalem a ilhkoli tok.

43. Atuk osh nitak v̄lhpisa hatuk vt ont in taha cha, falamvt itiachi ma, vlla Chisvs ash ot olbulaka Chelusalem a anta hokak o; Chosef, micha ishki ita tuklo kv̄t ik akostinicho ki tok.

44. Amba okla it apehvt asht aya ka takla aya he ak o im ahombvt, ayvt nitak achvfa nowvt okla tok: mihmvt yvmmak ash ilap i kanomi v̄hleha, micha ai it ithvnaka puta itin takla ya a hoyo tok.

45. Atuk osh yvmmak ash ik ahayucho mvt, hoyo kv̄t falamvt Chelusalem a itiachi tok.

46. Atuk ak o yakohmi tok: nitak ont atuchina hō yvmmak ash ot tempel anukaka ya hatak nan-ithvnanchi v̄hleha i haponaklo, micha nan im a ponaklo aiena hosh takla asha na ont ahayuchit okla tok.

47. Mihma yvmmvt nan-ithana, micha anumpa afalaminchit miha imponna aiena ka okla haklo mvt, momvt okokko! aiahni tok.

48. Mihma yvmmak ash ot ont pisa mvt, nukhlakanchvt okla tok: mihma ishki ash ot, Svso hvt nanta katiohmi hō ish p̄i yakohmichi na chiki ita tuklo li kv̄t nukhaiyaklot chi hoyo li cho? im achi tok.

49. Yvmohmi ma yvmmak ash ot, Nanta katiohmi hō hvs sa hoyo hosh? Aki nan isht im a kaniohmi ka isht ahanta la he v̄lhpiesa kvno, hvch ik ithano cho? im achi tok.

50. Mihma anumpa yvmma, yvmmvt isht im anumpuli ka, ik ai akostinincho kit okla tok.

51. Mihma yvmmak ash ot awant ia cha, falamvt Nasalet a ona mvt, im antia achukma hosh ahanta tok: yohmi kia

ishki ash ot anumpa yvmmak atuk ash mominchit ilap chukvsh ma isht il anukfohkit ieshi tok.

52. Mihma Chisvs ash ot ahopoyuksvt asvnot mahaya mvt, Chihowa, micha hatak puta aiena ka im a holitopa kv̄t i shahlit mahaya tok.

CHAPTA III.

Chan Baptist vt vbanumpa isht anumpohonli, 1: 15 Klaist a atokowa anoli; 20 anonti aboha kv̄llo fohka. 21 Chisvs vt baptismo, yohmi ma yvmmak okvt Chihowa ha Ushi pulla hatuk vt annoa. 23 Alvm ak o isht ai unchululit mihinti ho, Chisvs vt hatak a toba tok a vlhtokowa annoa.

1. TIBELIUS Sesa yvt miko tobr̄t ahanta tok afvmmi ont isht auah tahlapik fehna, Pontivs Pailat vt Chutea yakni ap ehlich̄i ma, Helot vt Kalili ak o ap ehlich̄i ma, anonti itibapishi Filip vt Itulea, micha Hlakonitis yakni aiena ka ap ehlich̄i ma, Lisantias mvt Abilene ak o ap ehlich̄i ho,

2. Annas, micha Kaiafas ita tuklo kv̄t na-holitompa isht asha i shahli yosh ashwa ho, Chihowa im anumpa hv̄t Chan Sakalias ushi a yakni haiaka yo im ai ona tok.

3—6. Yvmohmi ma hopaii Esias im anumpa holisso ha a holihiso kv̄t, Achvfa hosh yakni haiaka yo ai anumpohonlit, Chitokaka ataya hi a apoksiachit, i hina puta ka oh apissvlech̄i: kolukbi puta mvt momvt ik alotá: mikma nv̄nih, micha nv̄nih hochito aiena moma kv̄t akanlosit ik tahá: hina fullota atuk kia apissvt ik tobá: yohmi ma ai itilaūi iksho ke tuk vt itilauit tahashke: yohmikma hatak moma kv̄t Chihowa i nan okchal̄inchi a pisa he mak oke, achishke; ahanchi tok mak o, yvmmak okvt ai ashvchika puta ka isht a kashofa ch̄i ka, ile kostininchit baptisma hi a isht anumpohonlit Chatan a bilika yakni a mominchit aya tok.

7. Mihmvt im a baptisma ch̄i hosh ok'a laua yvt ai vla ma, Sinti chilita isht-atiaka hv̄chia ma! na palvmmi mihinti ka hv̄sh i hlakofa hi a, kv̄ta hosh hv̄chim anoli tuk oh cho?



8. Yohmi hokvt ile kostininchi ai it vlhpesa mak o vnit hvsh wayashke; micha, Himona Eblaham ak osh piki yoke, acha hi okvno hvch ik il anukfillo kashke; Chihowa hvv tvli yak aiasha ka, Eblaham im vlla ya chi ka ai ikba hinla hoka, hvchim achi lishke.

9. Yohmikma himak ak kia iskifa yvt iti puta ak-isht-vla ya ai itonla hoke; yohmi hatuk o iti yvt vni achukma ho vnit waya keyu hokvto, moyumvt chayvt akakoha cha, luak a pit itokaha hi oke, im achi tok.

10. Yohmi ma okla hash osh i ponaklot, Yohmi kvno nanta hak o e katiohma chi ho? achi tok.

11. Mihma afalaminchit kvv, Kvna hosh na-fohka yvt in tuklokmt, kanima hosh ik im ikshokma ik in chvfalli; mikma kanima hosh ilimpa hvv im asha kvv, yohmi makinlashke, im achi tok.

12. Yohmi ma pvblikan vhleha hak kia baptisma chi hosh ai vla mvt, Nan-ithvnanchi ma! nanta hak o e katiohma chi cho? im achi tok.

13. Yohmi ma, Nana hvchim vlhpisa tuk vt atamblit hvch ik hoyo kashke, im achi tok.

14. Yohmi ma tvshka chipota vhleha hak kia i ponaklot, Mikma pishno ak osh nanta hak o e yvmohma chi ho? achi tok: yohmi ma yvmmak ash o, Hatak nana kia hvch ik o mahlantokmt, anonti kvna kia a holvbit hvch ik wehpulo kashke; yohmikmt na hvchim ai vlhtoba ma, Vlhpiesa akinli hvsh aiahnashke, im achi tok.

15. Okla hvv nana ka pit hohoyo hosh asha hatuk, atul osh hatak moma kvv, Chan a yvmmak osh Klaist mak okma, keyukma, nanta ho chishba? ahnit chukvsh a isht anukfiell okla aiasha ma,

16. Chan ash ot mominchit im anumpullit, Vno yokvto oka yo isht hvchi baptismochi li mvhli; yohmi kia achvfa kvv a shahli fehna hosh mihinti ka i shulush isht-talakehi a vno vt hlitol la hi o si ahoba keyu hoke; yvmmak osh Shilombish Holitopa, micha luak aiena ho isht, hvchi baptismocha hi oke.

17. Yvmmak osh i nan-isht mvshahchi yvt ibbak a foyuka: yohmi kv̄t i nan-anihechi yatuk ma achukmali fehnvt kashofa he; mikmvt onush atuk ma kanchak a pit asha-chikmvt, amba hakhlopish okvno luak vt moshola he keyu a isht lukma hi oke, ahanchi tok.

18. Micha okla ha nana inla mvt laua ho isht ai i mihivt, vbanumpa ha isht im anumpohonli tok.

19. Yohmi kia Helot miko yvt ilap itibapishi Filip tekchi Helotias atuk, micha Helot vt nan ik vlhpeso puta ai yvmohmi chatuk ash, pit a mominchit atokowvt nan isht ai i miha hatuk o.

20. Nana ik ai vlhpesacho ke tuk moma kv̄t ilvppakma isht ai ibafohki hosh Chan a aboha kv̄llo fohkit im okhishta tok.

21. Okla moyuma kv̄t baptismot taha ma, yakohmi tok: Chisvs ak kia baptismo cha, vba pit asilhha ma, vba yvt auet tiwa,

22. Yohmi ma Shilombish Holitopa yvt nipi asha hosh pvchi-yoshuba chiyuhmit vba mintit im vla ma, vba ya anumpa hv̄t auet takali kv̄t, Chishno ak osh svso a holitopa chia hoke; chishno ak o nan isht chi a sai yukpa mak oke, achi tok.

23. Mihma Chisvs vt afvmmi pokoli tuchina ka ona foka hosh, peh im ahoba kvno, Chosef ak o ushi a tok: mihma yvmmvt Heli ak o ushi a tok.

24. Mihma yvmmvt Mahlat ak o ushi a tok: mihma yvmmvt Lefai ak o ushi a tok: mihma yvmmvt Melchi ak o ushi a tok: mihma yvmmvt Channa ak o ushi a tok: mihma yvmmvt Chosef ak o ushi a tok.

25. Mihma yvmmvt Mattahlias ak o ushi a tok: mihma yvmmvt Amos ak o ushi a tok; mihma yvmmvt Navm ak o ushi a tok; mihma svmmvt Esli ak o ushi a tok: mihma yvmmvt Nakke ak o ushi a tok:

26. Mihma yvmmvt Maath ak o ushi a tok: mihma yvmmvt Mattahlias ak o ushi a tok: mihma yvmmvt Semei ak o ushi a tok: mihma yvmmvt Chosef ak o ushi a tok: mihma yvmmvt Chuta ak o ushi a tok:

27. Mihma yummvt Choanna ak ̲ ushi a tok: mihma yummvt Lehesa ak ̲ ushi a tok: mihma yummvt Solobabei ak ̲ ushi a tok: mihma yummvt Salahliel ak ̲ ushi a tok: mihma yummvt Neli ah ̲ ushi a tok:

28. Mihma yummvt Melchi ak ̲ ushi a tok: mihma yummvt Alli ak ̲ ushi a tok: mihma yummvt Kosam ak ̲ ushi a tok: mihma yummvt Elmolam ak ̲ ushi a tok: mihma yummvt El ak ̲ ushi a tok.

29. Mihma yummvt Chose ak ̲ ushi a tok: mihma yummvt Eliesel ak ̲ ushi a tok: mihma yummvt Cholim ak ̲ ushi a tok: mihma yummvt Mathlat ak ̲ ushi a tok: mihma yummvt Lefai ak ̲ ushi a tok.

30. Mihma yummvt Simeon ak ̲ ushi a tok: mihma yummvt Chuta ak ̲ ushi a tok: mihma yummvt Chosef ak ̲ ushi a tok: mihma yummvt Chonan ak ̲ ushi a tok: mihma yummvt Eliakim ak ̲ ushi a tok.

31. Mihma yummvt Melea ak ̲ ushi a tok: mihma yummvt Menan ak ̲ ushi a tok: mihma yummvt Mattahla ak ̲ ushi a tok: mihma yummvt Nahlan ak ̲ ushi a tok: mihma yummvt Lewi ak ̲ ushi a tok.

32. Mihma yummvt Chesse ak ̲ ushi a tok: mihma yummvt Obet ak ̲ ushi a tok: mihma yummvt Boos ak ̲ ushi a tok: mihma yummvt Salmon ak ̲ ushi a tok: mihma yummvt Naason ak ̲ ushi a tok.

33. Mihma yummvt Aminatab ak ̲ ushi a tok: mihma yummvt Alam ak ̲ ushi a tok: mihma yummvt Eslom ak ̲ ushi a tok: mihma yummvt Fales ak ̲ ushi a tok: mihma yummvt Chuta ak ̲ ushi a tok.

34. Mihma yummvt Chekob ak ̲ ushi a tok: mihma yummvt Aisaak ak ̲ ushi a tok: mihma yummvt Eblaham ak ̲ ushi a tok: mihma yummvt Hlala ak ̲ ushi a tok: mihma yummvt Nachol ak ̲ ushi a tok.

35. Mihma yummvt Saluk ak ̲ ushi a tok: mihma yummvt Lakau ak ̲ ushi a tok: mihma yummvt Falek ak ̲ ushi a tok: mihma yummvt Hebeh ak ̲ ushi a tok: mihma yummvt Sala ak ̲ ushi a tok.

36. Mihma yummvt Kainan ak ̲ ushi a tok: mihma



yvmmvt Alfaksat ak o ushi a tok: mihma yvmmvt Sem ak o ushi a tok: mihma yvmmvt Noah ak o ushi a tok: mihma yvmmvt Lamek ak o ushi a tok.

37. Mihma yvmmvt Mehlusala ak o ushi a tok: mihma yvmmvt Enok ak o ushi a tok: mihma yvmmvt Chalet ak o ushi a tok: mihma yvmmvt Maleleel ak o ushi a tok: mihma yvmmvt Kainan ak o ushi a tok.

38. Mihma yvmmvt Enos ak o ushi a tok: mihma yvmmvt Seth ak o ushi a tok: mihma yvmmvt Alam ak o ushi a tok: mihma yvmmvt Chihowa ak o ushi a tok.

CHAPTA IV.

Chisvs vt, nan-isht-ahullo okpulo yosh imomaka pihisa ma, ik impo ho nitak pokoli ushta mvt, nan-isht ai imomaka pisa puta ka imai-yachi, 1. 14 Chisvs vt falamvt Kalili a ona cha, vba isht anumpohonli; 16 atuk osh Nasalet a ona cha, nitak hullo yo sinakak a nan ai ithvnanchi: 28 mihma okla hvt ik im vlhpeso mvt, vbi brnna; 31 Chisvs vt Kapenarm a ona cha, nitak hullo ya nan ithvnanchit ahanta mvt, 33 nan-ishtahullo okpullo ma kohchichi; 38 Pita tekchi ishki a hlakofichi; 40 mihmvt nan abeka ilaiyuka laua ka isht ahullo fehna kia ai yvmihchit ahanta mvt, 43 Kalili fullota ka vbanumpa ya isht ai anumpohonli.

1. CHISVS vt Shilombish Holitopa isht anukfohkvrt im alotowa hosh, Chatan vttvt falamvt ia ma, Shilombish ash ot im aiahni na ayvt yakni haiaka ont chukowa na,

2. Nitak pokoli ushta ka Setan vt imomaka pisa tok. Mihma nitak yvmma fehna ka nanasi kia vpa tok keyu: atuk osh yvmmvt ont taha na misha pilla mvno hochevfo tok.

3. Yohmi ma Setan ash ot, Chihowa Ushi chia hokmvt, teli ilvppvt pvska toba chi ka i mihá, im achi tok.

4. Yohmi ma Chisvs vt afalaminchit mvt, Hatak vt pvska yak bieka ho ai okchaya he keyu; amba Chihowa im anumpa moma kak ashke; achi kvrt holisso hoke, im achi tok.

5. Mihma Setan ash ot yvmmak ash ilaueletit nvnih chaha

y<sub>o</sub> isht oiya cha, yakosi itin takla fehna h<sub>o</sub> miko apehlich<sub>i</sub> puta yakni, aiasha ka mominchit i haiakvchi tok.

6. Mihmvt Setan ash ot, Nan im aiahlika, micha im a holitopaka aiena ilvppa mominchit chima lashke; yvmmvk okvt vno ak o vmmi toba tok: yohmi ka kvna h<sub>o</sub> vno ahni li hok mak osh ima li hoke.

7. Yohmi hoka chishno vt aka hlipvt is si aiokpvchi hokma, moma kvt chimmi hashke, im achi tok.

8. Mihma Chisvs ash ot afalaminchit, Setan chia hv<sub>t</sub> vm ashaka yak o ish likiashke; Chitokaka chin Chihowa yak o i hvchukbihleptv<sub>t</sub> ish aiokpahanchashke; micha yvmmak illa h<sub>o</sub> holitoblit ish im antiashke; achi kv<sub>t</sub> holisso hoka, im achi tok.

9. Mihma yvmmak ash ot Chisvs ash o ilaue<sub>l</sub>it Chelusalem a ont isht chukowa cha, tempel wishakchi y<sub>o</sub> ont o hilechi mvt, Chihowa Ushi chia hokmvt, aka pit ish ile pilashke:

10, 11. Chishno a chi apesahancha ch<sub>i</sub> ka, im enchil v<sub>h</sub>leha h<sub>a</sub> atohno na ibbak a okla vba isht takalihinchit chisht aya na nitak kanima kia chiyi y<sub>a</sub> tvli isht chik ai isso ka hi a, achi hosh holisso tok oka, im achi tok.

12. Mihma Chisvs ash ot afalaminchi mvt, Chitokaka chin Chihowa y<sub>a</sub> imomaka chik peso kashke; achi tok a ashvshke, im achi tok.

13. Mihma Setan ash ot nan isht ai imomaka pisa puta kash o isht im anukfillit ont tahli mvt, yakosi takla kvno i filvmm<sub>i</sub>t ia tok.

14. Yohmi ma Chisvs ash ot Shilombish nan-isht im aiahli ka yvt anukfoyuka hosh falamvt Kalili a ona tok: mihma yvmma isht annoa kv<sub>t</sub> yakni yvmma a bilika a mominchit hlopulli tok.

15. Mihma yvmma i sinakak a puta ka nan ai ithvnan-chit ahanta ma, momvt ahninch<sub>i</sub> tok.

16. Yohmi ma ai vttvt hofanti tok Nasalet mak o v<sub>l</sub>a tok; mihmvt a yohmi atuk okvt, nitak hullo nitak a sinakak a ont chukowa cha, holisso it im anumpula ch<sub>i</sub> hosh wakayvt hikia tok.

17—19. Mihma hopaii Esaias i holisso hō ant ima tok: yohmi ma holisso hash wakvmmi mvt, yvmma a holisso kv̄t, Ilbvsha puta ka vbanumpa isht im anumpuli la hi a yvm-mak osh nan isht si ahvmmi tuk okv̄t, Chitokaka im i shi-lombish vt si onvtuyula hoke: chukvsh nukhaklo puta ha-tuk kia hopohl̄vchit, yuka vhleha hatuk ma isht a hlakofa he; mikma l̄vpa puta yatuk mvt isht a hoponaya he, micha issikkopa puta kv̄t āsha tuk a isht a mokofit, Chitokaka yv̄t aiokpahanchi afvmmi ma isht anumpohonli la hi o, si a tohno tuk oke, achi hō ahayuchi tok.

20. Michā holisso hash akamvli mvt, falaminchit sinakak nan-isht aiv̄tta yash ima cha, aka binili tok. Mihma sinakak aiasha tuk ash ot momvt nishkin isht aiokchifeli tok.

21. Mihma yvmmak ash ot, Holisso ilvppvt himak nitak a hv̄chi haksobish a isht hv̄sh haklo kv̄t ont aiahli hoke, im achit isht ia tok.

22. Yohmi ma moma kv̄t nan ia atokowa ma p̄isvt, anum-pa hochukma kv̄t itih h̄a a kohoncha ka okokko! aiahni tok: mihmvt, Ilvppvt Chosef ushi keyu hō? okla achi tok.

23. Mihma, Alikchi a chishno inlit ile hlakofichī: nana kv̄t Kapenavm a a yvmohmi na e haklo tuk okma, chī yakni ilvppak inli ma a yvmihchī, achi anumpa isht vlhpisa ilvppak o hv̄s sv̄m achi pulla chī hoke, im achi tok.

24. Mihmvt, Ahli pulla hō hv̄chim achi lishke, Hopaii nana ak osh ilap i yakni ak inli hoka ai a holitopa chatuk keyushke, achi tok.

25. Yohmi kia aiahli mak o hv̄chim anoli li: Elias vt ahanta nitak a vba vt ai okshilitvt kv̄nia na afvmmi tuchina hv̄shi hannali; yohmi na hopoa chinta fehvt a hlopulli ka, Israel okla h̄a ohoyo i hatak illi vt lauv̄t aiasha tok.

26. Yohmi kia yvmma achvfona kia im aya hi vt Elias vt ik vlhtoko: amba Saiton yakni Salepta tvm̄aha, ohoyo i hatak illi yvmmak illa tok.

27. Michā hopaii Elis̄evs vt ahanta nitak a Israel okla h̄a leplosi vbi kv̄t lauv̄t aiasha tok: yohmi kia yvmmak ash ot achvfona kia ik hlakofo hō, amba Naaman Silian hatak ak illa tok.



28. Mihma sinakak aiasha tuk vt ilvppa puta ka haklo mvt, momvt anukhobelvt kvnia tok.

29. Mihmvt okla wakaya cha, yvmmak ash o tvmaha ha kohcha pit chvffichi mvt, itehpelvt aka pit kancha chi hosh' ilauelet, in tvmaha ai on talaia sakti ont on talaka fehna isht ona tok.

30. Yohmi tuk kia yvmmak ash ot okla hash itin takla a hlopullit kanima ia tok.

31. Mihmvt Kapenavm tvmaha Kalili yakni a ona cha, nitak hullo nitak puta ka okla nana ithvnanchi tok.

32. Yohmi ma im anumpa hvt a na-fehna hatuk o, nana ithvnanchi ka okokko! okla aiahnit im anukfila tok.

33. Yohmi ma sinakak a hatak vt shilombish okpulo yvt isht ai i foka hosh anta tok: atuk osh yvmmak ash ot chitolit tahpvlvt,

34. Ikikke! Chisvs Nasalet minti chia ha nanta ho isht e chi ahalaia cho? ish pissikkopala chi hosh ish la hoh cho? kvna ho chia hoka chithana li, Chihowa i holitopa yak oke, achi tok.

35. Mihma Chisvs ash ot yvmmak ash im olvbbit, Nukchintot yvmma ish a kohchashke, achi tok. Yohmi ma shilombish okpulo ash ot okla ai itintaklvchit ai akvchi mvt, nan ik kanehiho hosh a kohcha tok.

36. Yohmi ma okla moyuma mvt nukhlakanchvt, ilap bika it im anumpulit, Ilvppvt anumpa nanta hokak osh yakohmi cho? nan im vlhpisa, nan aiahlika aiena ho shilombish okpulo puta ka nan isht im ai apihisa hoka, okla kocha wihvshke, achi tok.

37. Yohmi ma yvmma ai isht annoachi ka yakni auet a bilika aiasha ka moyuma a hlopulli tok.

38. Mihma sinakak a vttvt kohchvt ia mvt, Saimon in chuka ont chukowa tok: mihma Saimon tekchi ishki vt yvnha fehna tuk o, pisa hinla ka okla im aiahni tok.

39. Mihma yvmmak ash o wakayvt hikia mvt, yvnha hash im olvbbi: yohmi ma yvmmak ash o yvnha hvt ai issvchi tok; mihma ashalika tani cha, okla hash nan isht im vtta tok.

40. Yohmi hatuk o hvshi vt okvtula ma, ililli ilaiyuka isht abeka im asha tuk puta kvt momvt yummak ash o im ai ona tok; yohmi ma ibbak vt aieninchit mominchit isht umbitepvt hlakofihinchi tok.

41. Mihma nan-isht-ahullo okpulo puta kvt laua ka a kocha wiha mvt, chitoli hosh mihvt, Chishno ak osh Chihowa Ushi Klaist chia hoke, ahanchi tok. Mihma yummak ash im olvbbi mvt, ilap ak osh Klaist atuk a ithvna ka, yumma ik mihá, ik im ahno ki tok.

42. Atuk osh ont onnvt taha ma, kohchvt ivt yahni haia-ka yo ona tok: mihma okla hvt hoyot itvnowvt im ai ona mvt, ai i filvmmiit kanima ik aiyo ka chi ho, im olvbbi tok.

43. Mihma tvmaha inla ak kia Chihowa apehlichika ya isht im anumpohonli la chi hoka, yummak a he mak osh aya li ha tok okvt, im achi tok.

44. Mihmvt sinakak pvta Kalili aiasha ka vbanumpa isht ai anumpohonli tok.

## CHAPTA V.

Chisvs vt Saimon i peni yo fohkvt asha hosh okla ha nan-ithvnan-chi, 1: 4 Saimon vt, Chisvs osh i mihvt nan anukfilli pulla ho, himona ka nvni lawa fehna hokli: 11 mihma Saimon, Chemis, micha Chan aiena kvt Chisvs a apeha. 12 Chisvs vt leplosi vbi yo hlakofichi: 16 atuk osh vba pit anumpula chi hosh haiaka ia; 17 mikmvt hatak palsi isht abeka yatuk a hlakofichi; 27 Chisvs vt Leifai nan im ai ithvna toba chi ka i miha: 29 micha pvblikan vhleha mikmvt hatak nan-ashvchi vhleha aiena ka yvmmvvt ai vhpesa ho ibai impa hatuk vt miha; 33 ilap nan im ai ithvna vhleha hvt kanihmit nan i palvmma he anoli.

1. **ATUK** o yakohmi tok; okla hvt Chihowa im anumpa ha hakla chi kvt yummak ash atehlifichit kaiyanchi ho, Chenesalet hohtak lapalika yo hikia;

2. Yohmi cha peni tuklo kvt hohtak lapalika ya takohnli na pisa tok: yohmi kia hatak nvni vbi vhleha hatuk vto a kocha wiha tuk osh nvni isht-hokli achvfa hosh maya ha tok.

3. Mihmvt peni achvfalit Saimon ak o immi yo pit chuk-

owa mvt, oka alaka takali tuk a kanvlichit mishemanchit pit takalicha hinla ka, im ahni tok. Mihmvt binili cha, peni yo fohkvt asha hosh okla ha nan ithvnanchi tok.

4. Anumpuli kvt ont issa mvt, Saimon ash o, Ahofombika pit takalichi cha, nvni isht-hokli puta ka okvchit ish hoklashke, im achi tok.

5. Mihma Saimon ash osh afalaminchi mvt, A shahli ma! ninak a isht il asha na oyunna kvt nana ke hoklo ke tuk: yohmi kia chishno chim anumpa atuk oka, nvni isht-hokli a pit okvchi li mak inlashke, im achi tok.

6. Micha ilvppa okla yvmihchi mvt, nvni lawa fehna ho hokli na i nvni isht hokli vt mitafa tok.

7. Yohmi ma im itapela vhleha hvt peni achvfa ya asha tuk vt vla cha, ant apela hinla ka, okla pit im avvchi tok. Mihma okla ai vla cha, peni ash it aieninchit okla alotoli: yohmi hoka yvmmak ash ot okbilhvvt isht ivt okla tok.

8. Saimon Pita yvt yakohmi na pisa mvt, Chisvs iyikalah ya pit tikinlit aka hlipivt, Hatak nan-ashvchi sia hoka a filvmmi, kanima ish iashke, Chitokaka ma! achi tok.

9. Himonna okvchit kohchi kvt, nvni yvt yohmi ho hokli kvt, ilapo, micha inla apehvt aya tuk vt momvt nukhlakan-cha tok.

10. Mihma Saimon im itapela, Sebate ushi, Chemis, mi-cha Chan ita tuklo kak kia yvmohmi tok. Mihma Chisvs vt Saimon a, Chi nukshopa na, himak pilla ha hatak ak o ish hokla chi hoke, im achi tok.

11. Mihma i peni ash vhli ha okla ant itaiyali mvt, nana moma kvt asha na issa cha, yvmmak ash okla iakaiya tok.

12. Atuk o yakohmi tok; yvmmak ash ot tmaha kani-ohmi ho anta tuk o, hatak vt leposi isht ai vbi fehna hosh anta tuk osh, Chisvs a pisa mvt, hlipivt itola cha, im ilbvshvt Chitokaka ma! chishno vt vlhpesa ish ahnikmvt, is sa kashofa hinlvshke, im achi tok.

13. Mihma ibbak pit welit potoli mvt, Vlhpesa ahni lish-ke; chi kashofashke, im achi tok. Yohmi ma leposi ash ot ashalika a mokofvt kvnia tok.

14. Mihma hatak nana kia ik im anolo ka chi ka i miha



mv̄t, amba iv̄t na-holitōmpa isht vt̄ta yak o ont im ile haiakv̄chi cha, na chī kashofa ka nan-isht-ai im atokowa mak o Moses vt̄ nan apesa tok a, nana ka ish bohlashke, im achi tok.

15. Yohmi kia yohmi ha yak o isht i shahlit kanima moma ka yvm̄mak o ai annoa tok: yohmi ma im a haponakla chī, micha haknip ik achukmo puta kv̄t a hlakofa chī hosh okla chinto feh̄nv̄t ai it̄vnaha tok.

16. Mihma ilap ill̄vt ai i mokof̄vt, yakni haiaka ona cha, v̄ba pit anumpohonli tok.

17. Atuk o yakohmi tok: nitak kaniohmi hō nana ithv̄nanchi hosh ahanta ma, Falisi v̄hleha, micha nan-v̄lhpisa ithv̄nanchi v̄hleha aiena kv̄t Kalili yakni tmaha aiasha moma, micha Chutea, mikmv̄t Chelusalem aiena ka asht kohch̄vt aya kv̄t yv̄mma binohm̄aya tok: yohmi ma Chito-kaka nan-isht im aiahlika yv̄t okla ma hlakoficha chī kv̄t ai ikl̄vn̄vt takali tok.

18. Yohmi ma hatak kanohmi kv̄t hatak vt̄ palsi v̄bi yō potv̄lhpo ai it i sholit isht v̄la tok: mihmv̄t kaniohmit yv̄mma pit isht chukowa cha, itikba ya ont bohla hinla kv̄t, okla akostinin̄chi b̄v̄nna tok.

19. Mihmv̄t okla hak osh laua feh̄na hatuk o, kaniohmit pit isht chukowa hinla kv̄t ik akostinin̄cho mv̄t, aboha paknaka yō okla pit oiya cha, pit hlopullichit in topushi ash fokit ikl̄vn̄na ka Chis̄vs itikba ya pit bohli tok.

20. Mihma okla na yimmi ka pisa mv̄t, Hatak chia kv̄t na chim ai ashv̄chika yv̄t chī kashofa hoke, im achi tok.

21. Mihma na-holissochi v̄hleha, micha Falisi v̄hleha aiena kv̄t, Ilv̄ppvt kv̄ta hokak osh Chihowa ik ahobalot anumpuli cho? Kv̄ta hosh nan-ai ashv̄chika ya kashofa hinla? Chihowa ak illa keyū? aiahnit okla im anukfil̄vt aiasha tok.

22. Yohmi kia yv̄mma im anukfila ha Chis̄vs vt̄ im akostinin̄chi mv̄t, anumpulit, Nanta mak o hv̄chi chukv̄sh anukaka isht hv̄chim anukfila cho?

23. Na chim ai ashv̄chika puta kv̄t chī kashofashke, achi

kak okmá, keyukmvt, Tani cha nowá : achi kak okmá, katimampo kak osh ahchiba kvt ik lauwo cho ?

24. Yohmi kia Hatak Ushi vt nan ai ashvchika puta kashofa hi vt yakni paknaka ya ai im vhlpiesa hatuk a hvsh akostinincha chí kak oka, im achi mvt, palsi vbi ash, Tanit chin topushi a ish ishi cha, chin chuka ish iashke, chim achi lishke, im achi tok.

25. Mihma okla momvt pisa na tanit ai onvtola tuk ash ishi mvt, Chihowa ya holitoblichit aiokpahanchit in chuka ia tok.

26. Mihma okla momvt nukhlakancha fehvt, Chihowa ya holitoblichit aiokpahanchi mvt, nukshopa fehna hosh, Himak nitak oka nana kvt inla fehna hō eho piesvshke, achi tok ;

27. Atuk o nana kvt a yakohmi ha ya kohchvt ia mvt, pvblikan vt Lefai hōchifo hosh tvli holisso abohli ya asha na ont pisa mvt, Is si akaiyashke, im achi tok.

28. Mihma nana moma kvt asha na issvt wakaya mvt, iakaiya tok.

29. Mihmvt Lefai ash osh ilap in chuka akinli hō yvm-mak ash o impa chinto fehna im ai ikbi tok : mihma pvblikan vhleha, micha inlaka aiena kvt laua hosh iba takla binoh-maya tok.

30. Yohmi kia i na-holissochi vhleha, micha Falisi vhleha aiena kvto yvmma nan im ai ithvna vhleha hā lumvt nana mihachit, Nanta katiohmi hō pvblikan vhleha, micha nan-ashvchi vhleha aiena ka it-ibai impvt, nan it ibai ishkot hvsh aiasha cho ? achi tok.

31. Mihma Chisvs vt afalaminchi mvt, Haknip im achuk ma hokvto alikchi a bvna keyu ; amba abeka mak oh chatuk oke.

32. Hopoyuksa vhleha ak o hoyot aya li ha tok keyu : amba nan-ashvchi vhleha hvv ile kostinincha chí kak atuk oke, im achi tok.

33. Yohmi ma, Nanta katiohmi hō Chan nan im ai ithvna vhleha hvto chekosikma nahullochit, vba pit anumpuli aienvt ahāshwa, mikma Falisi vhleha nan im ai ithvna vhleha ak

kia yvmohmi akinli hokak o, amba chimmi hvto impvt nan-  
ishkot aiasha cho? okla im achi tok.

34. Mihma hatak himona ohoyo itauwaya tuk vt takla  
anta moma ka, i kana vhleha hv nukhaklot nahullocha  
hinla, hvsh im apesa vlhpesa cho?

35. Yohmi kia hatak himona ohoyo itauwaya tuk ash ot  
ai i filvmma he nitak vt ai ona he: yohmik mak o nitak  
yvmma fokakmvno okla nukhaklot nahullocha hi oke.

36. Mihmvt nan isht vlhpisa ho aieninchit isht im anum-  
puli mvt, Hatak nan ak osh na-fohka himona a hlilafa ka na-  
fohka sipokni a akvlli chatuk keyu: yvmmak keyukma hi-  
mona yvt hlilvffikmvt, anonti himona ya a hlilafa tuk okvt  
sipokni a ai it im vlhpesa he keyu hoke.

37. Mikma hatak nan ak osh oka paki himona ya shukcha  
sipokni yo pit vni chatuk keyu: yvmmak keyukma oka paki  
himona yash ot shukcha ya mitahlichy cha hlayakma, anonti  
shukcha yash ot okpulo chatuk.

38. Amba oka paki himona yvt shukcha himona yo vlhto  
hok mak osh tuklot nan ik kanihmo chatuk oke.

39. Micha hatak nan ak osh oka paki siponki a ishko ha  
yvt ashalika himona ma bvna chatuk keyu: sipokni ak osh  
achukma kvv i shahlshke, achi hokvt, im achi tok.

CHAPTA VI.

Nana kvv achukma he okvno nitak hullo kia isht anta he ai vlhpesa  
hatuk a, Chisvs vt anoli, 1: 8 mihmvt ibbak shila yatuk a hlakofi-  
chi. 12 Chisvs vt ninak a vba pit anumpohonli na onna mvt, vba-  
numpeshi auah-tuklo ka atokoli; 17 yohmi mvt hatak abeka laua  
ka hlakofichi. 20 Hatak kaniohmi hosh holitopa he, mikma hatak  
kaniohmi ho na-palvmmi kvv onvtula he puta ka, Chisvs vt otv-  
nichi. 27 Pin tenvp vhleha kia e holitoblit, nan isht ai achukma  
he puta ma il i yvmohma hi a Chisvs vt pi miha; mikmvt okla  
moyuma ka il i kana hi ak o, pim ahni; 37 hatak inla asha ka  
nan ik achukmo imma hokvno im anukfillit kil anumpulo ka hi  
a, pim avvchi. 43 Iti a ilap vni akinli kak o isht ithvna cha-  
tuk: mikma hatak a ilap nana a kaniohmi kak o isht akostininchi  
chatuk.



1. YUMOHMI tuk osh vbanvblit ont ia yatuk nitak atukla ka ai isht nitak-hullo vmona ho, yvmmak ash ot osapa taloha ha hlopullit aya tok: yohmi ma nan im ai ithvna vhleha hash ot onush uni ya tvptulit ibbak isht koyuhlit okla vpa tok.

2. Mihma Falisi vhleha kaniohmi kv, Nanta katiohmi ho nana ka nitak hullo nitak a a yohma he vlhpesa keyu krno hvchi yvmohmi cho? im achi tok.

3. Mihma Chisvs ash ot afalaminchi mvt, Lewi vt ilapo, micha apehvt aya tuk aiena kv hohchvfo mvt, nana a kaniohmi tok;

4. Yohmi kv kaniohmit Chihowa im aboha ha pit chukovvt, pska otvnni a ishi cha vpa mvt, apehvt aya tuk ash kia ipeta tok: yvmmak oka ai vpa he vlhpesa keyu, amba na-holitompa isht asha ak illa ha tok oka, ilvppak kia holisso ha hvch ik a peso chatuk oh cho? achi tok.

5. Mihmvt Hatak Ushi vt nitak-hullo a in Chitokaka akinli hoke, im achi tok.

6. Atuk o anonti yakohmi tok: nitak-hullo inla ho sinakak ont chukowa cha, nana ithvnanchi tok: mihma hatak vt ibbak ishtimpak imma yvt shila yosh yvma asha tok.

7. Mihma na-holissochi vhleha, micha Falisi vhleha aiena kv nan vlhpisa onocha chi hosh, nitak-hullo nitak a na hla-kofichikma, nanta chi chishba? ahnit apesvchi tok.

8. Yohmi kia ilap vt okla im anukfila ha im ithana hatuk osh, hatak ibbak shila yash, Wakaya cha, iklvnnaka ya ont hikiá, im achi tok. Mihma yvmmak ash ot wakaya mvt, ont hikia tok.

9. Mihma Chisvs ash ot okla hash, Nana achvfa ho hvchi ponaklo lashke: Nitak hullo nitak a nana achukma kak o a yvmohmi kak okma, keyukmvt nana ik vlhpeso yak o a yvmohmi kak okma, ilhfopak a okehalinchi kak okma, keyukmvt tvbli kak okma, nana kak osh ai vlhpesa hob cho? im achi tok.

10. Mihmvt filemvt okla hash o mominchit pisa mvt, hatak ash o, Chibbak a chisemochi, im achi tok: mihma yv-

mihchi tok: yohmi ma ibbak ash osh falamvt achukmvt taha mvt, in tvmvvp akinli ho <sup>like</sup> chiyuhmi tok.

11. Mihma okla hvt anukhobela fehna tok: yohmi mvt Chisvs a nana ho kvnihecha chi kvv it i mihvt aiasha tok.

12. Mihma nitak yvmma foka ka, yakohmi tok: vba pit anumpula chi hosh kochevt nvni chaya yo ont oia tok; micha ninak a Chihowa pit im asilhhvt ahanta na onna tok.

13. Mihmvt ont onvvt taha ma, ilap nan im ai ithvna vhleha hash hoyot itahobi tok: mihmvt yvmmak ash auah-tuklo ho ai atokoli mvt, yvmmak ash vbanumpeshi hochifo tok.

14. Saimon yvmmakma ilap ak osh Pita yo hochifo, mikmvt itibapishi Antilu, Chemis, micha Chan, Filip, mikmvt Bathlolomu,

15. Mahlu, micha Tamas, Alfevs ushi Chemis, Saimon Selotes hochifo:

16. Micha Chutas Chemis itibapishi, mikmvt Chutas Iskaliot, yvmmak osh na haksichi yosh aiena tok.

17, 18. Mihmvt yvmmak ash ot awant akowa cha, yakni matali yo ant hikia ma, nan im ai ithvna yvt lava, mihmvt okla chinto fehna Chutea yakni moma, Chelusalem aiena ka a minti; mikma okhvta lapali ka Taia, micha Saiton aiena asht minti; mihma shilombish okpulo yo isht issikkopa yatuk aiena kvv yvmma im a haponakla chi, micha haknip ik in chukmo puta atuk vt im a hlakofohla chi hosh im ai vlvv hlakofohli tok.

19. Mihma okla chito ash ot momvt, nan-isht a hlakofi vt yvmmak o a kocheha hosh mominchit hlakofichi hatuk oka, yvmma potoli bvna tok.

20. Mihma ilap nishkin ash nan im ai ithvna vhleha ha isht on talohli mvt, Ilbvsha hvchia ma! Chihowa apehlichika yak osh hvchimmu hokvt na hvchi yukpvshke.

21. Himonasi hokvno hochvfvot aiasha hvchia mvt, hvchi kaiya hi okvt na hvchi yukpvshke. Himonasi hokvno yahayvt hvsh aiasha mvt, hvsh yukpa hi okvt na hvchi yukpvshke.

22. Hatak Ushi pulla atuk mak o hatak puta mvt hvchi



nukkillit, ilap ai itapeha ya isht a hvch il a flamohlichit, na hvchi mihachit, hvchi hohchifo ma nan okpulo yo ai itilauechit kahanchia hi oke: yohmikma na hvchi yukpvshke.

23. Yakeh! nan-isht-vlhtoba hvt chinto hosh vba ya hvchin tonla hokvt, nitak yvmma fehnaakma, na ho yukpa: na hvchi yukvt hvsh mvlashke: yvmma in tikba vhleha hvt hopaii puta ka yvmmak inli ho i yvmihchi beka tok oke.

24. Amba nan in laua hvchia hvto nan-isht a hvchi yukpa ma hvsh pisa hokvt, na hvchi palvmmi mak oke.

25. Kaiya hvchia hvto hvchi hohchifa hi okvt na hvchi palvmmi mak oke. Himonasi a hvchi yukpa hokvto hvchi nukhaklot hvsh yahaya hi okvt na hvchi palvmmi mak oke.

26. Hatak moma kvv ahninchit isht hvchi anumpohonlikma, na hvchi palvmmi mak oke: in tikba vhleha hvt hopaii ilahobi puta ka yvmmak inli ho i yvmihchi tok oka.

27. Amba hvsh haklo hvsh puta kvno hvchin tvnvp vhleha ma i hullot, hvchi nukkillikma nana achukma ho hvsh i yvmohmashke.

28. Nan ik vlhpeso isht hvchim anukfillit na hvchi miha-chi ya na-yukpali hosh anumpulit, anonti anumpa isht hvchi a holvbechikma, vba pit isht hvsh anumpohonlashke.

29. Micha kvna hosh chitisukpi a issokma, in tvnvp ma pit ish i weli makinlashke: mikmvt kvna hosh chim anchi a chim ai ishi ka, chi na-fohka lumbo ma isha chi ka, chik i halanlo makinlashke.

30. Kanimi hosh nan chim asilhha ka ish imashke; micha kvna hosh nana ka chim ai ishikma, falaminchit chik i hoyo kashke.

31. Micha hatak puta kvv hvchishno a a hvchi yohma hi a, hvsh aiahni hok mak osh, hvchishno ak kia mih-mak o hvsh ai i yvmohmi makinlashke.

32. Micha hvchishno a hvchi hullo na mihi yo hvsh i hullo hokvto, nanta ho isht a hvchi yukpa cho? nan-ashvchi vhleha hvt, kanima hosh ilap a i hullo hokvno i hullo chatuk akinli hoka.

33. Micha kanima kvv hvchishno a nana achukma ka isht a hvchi yvmohmi ho hvchishno mvt nan achukma ka isht



hush ai i yvmohmi hokvto, nanta ho isht hvchi yukpa cho ? nan-ashvchi vhleha ak kia yvmmvno yohmi chatuk oka.

34. Micha yvmmvt hvchim atobba hinla ka hvchim ahoba hokmak osh hvsh i-pota hokvto, nanta ho isht a hvchi yukpa cho ? nan-ashvchi vhleha ak kia yvmmak atuk ash inli ohmi ho isha chi kv, nanashvchi bika ya i pota chatuk oka.

35. Amba hvchishno vto hvchin tvnvp puta ka hvsh i hullo, mikmvt nana achukma ho hvsh yvmohmikmvt ; anonti nana kia isht ai vlhtoba hi a ik aiahno hosh hvsh i potashke : yohmikma isht a hvchim vlhtoba hokvto chinta he ; micha Nana moma imaiya im vlla hvchia ha hi hoke. Yvmmak okvt ilap a ik aiokpacho, micha nan vlhpesa keyu vhleha aiena ka i kana achukma yoka.

36. Yvmohmi hoka hvchishno mvt na hvchi nukhaklo bano kv, hvch Iki vt nan i nukhaklo bano yoka yvmmak inli ho hvsh chiyuhmashke.

37. Inla ya ik vlhpesachot nan hvch ik apeso kashke. Yohmik mak osh nan ik hvchim vlhpiso ka he mak oke : isht a hotopa he anumpa ha hvsh onochi ná : yohmikmak osh hvchishno vt isht a hotopa he anumpa hv ik hvchi onvtulo ka hi oke : inla ya i kashofit hvchim i haksashke ; yohmikmak osh hvchishno mvt hvchi kashofa hi oke.

38. Hvsh ihimashke : yohmikmak osh hvchishno mvt hvsh habihina hi oke : vlhpisa achukma, vlhtekvchit, mikmvt faiokvchit it ai isso hosh ont atampvt hlahaya ho, hatak vt hvch il ai vskofvchi anukaka ya pit hvchim apitta hi oke. Nan isht vlhpisa hvchishno vt isht hvsh apesa tuk a, yvmmak inli hosh hvchishno ma isht hvchim vlhpisa hi oke, hvchim achi lishke.

39. Mihmvt nan isht apesvt anumpulit, Lupa yvt lupa ya halvllit isht aya hinla ? tuklot yakni chiluk kia pit ik kaho ka hinla ho ?

40. Nana ithvna vt nan ithvnanchi a i shabli chatuk keyu : amba nana ka imponnvt aiahli hok mak osh moma kv nan-ithvnanchi ak o ai itilaua hi oke.

41. Micha nanta katiohmi ho na hishonluk iskvtnosi kv

ish itibapishi nishkin a foka na ish pisa hokak osh, anonti iti chito yvt chi nishkin akinli ka foka kvno chik akostinincho cho?

42. Keyukmvt anonti katiohmit ish itibapishi ha, Itibapishi li ma! na hishonluk iskvtnosi kvt chi nishkin a foka ka ak chi kohchi, ish acha hinla cho? chishno chi nishkin akinli kvno iti chito yosh foka ka chik peso kvt; nan-ilahobi chia hoka, iti chito yak o tikba ishit chi nishkin a ish a kohchashke; yohmikmak osh ish pisa achukma hosh ish itibapishi nishkin a nahishonluk iskvtnosi kvt foka ka ish koheha hinla hoke.

43. Iti achukma kvt vni vt okpulo yo vnit waya chatuk keyu: yohmikma iti okpulo mvt vni achukma ka vnit waya keyu chatuk oke.

44. Iti puta kvv ilap vni yak o isht il ai otrninchichi chatuk: hatak vt kvv hak o fik a ai vmo chatuk keyu: yohmikmvt bissrpi ak o paki a ai vmo chatuk keyushke.

45. Hatak achukma yvt chukvsh a nana achukma kvv i foka hatuk osh, nana kvv achukma ho ai ishit kohonchi chatuk: mikma hatak vvhpesa keyu kvto chukvsh a nana okpulo yosh i foka hatuk osh, nana kvv vvhpesa keyu ho ai ishit kohonchi chatuk: chukvsh vt isht alotowakmak o itih hvv kohchit anumpuli chatuk oke.

46. Na katihmi ho nana ka hvchi mihha li ka hvsh yohmi keyu kak osh, Chitokaka ma! Chitokaka ma! hvv si achi cho?

47. Kvna kia vm vlvv, nana mihha li ka haponaklo cha, ai yvmohmi kvv, kvna ho holba ka hvchim anoli lashke.

48. Hatak vt chuka ya ikbi kvv, yakni a kullit, hofobichit, tvli yo nutaka in tola ya ai om bohli tuk mak o chiyuhmi hoke: yvmohmi tuk o okchito hvv aya mvt, chuka yvmmak ash yanvlli hvv kullot ai isso fehna tok: yohmi kia tvli yo a toba ha tok oka, ik winalecho ki tok.

49. Amba kvna hosh haklo cha, mihma ik yohmo hokvto, hatak vt nutaka in tonla yvt iksho ho yakni yak o chuka ya ai on talali tok mak o chiyuhmi hoke: yvmohmi tuk o yvmmak ash yanvlli hvv kullot ai isso fehna tok; yohmi ma



chekosi makinli ho kinafa mvt, chuka yummvt okpulo kvt ai okluha tok, im achi tok.

CHAPTA VII.

Chisvs vt Kapenavm a ona cha, Sintulion na-yimmi ka ahninchu mvt, 1; 10 in tishu ha hlakofichi. 11 Nain a ona cha, ohoyo i hatak illi ushi illi tuk a falaminchit tanichi. 18 Chan vt aboha kvilo foka mvt, yummak osh Klaist mak okma, keyukma, nana hatuk ma Chisvs a pit i ponaklo: 22 mihma ilap vt nana kvt a fehna kia yummichi tok puta kvt Chisvs vt im anoli: 24 mihmvt Chisvs vt Chan a isht anumpulit atokowa ka anoli. 37 Ohoyo hvt nanashvchi yo ik yohmi, im aiahni na iyi ya nan-ahama a hvmmi; mihma ohoyo hash hopohlvehit nan im ai ashvchika ya i kashofi.

1. OKLA hvt haponaklot aiasha na nana ka mihvt ont in taiyaha mvt, Kapenavm a ont chukowa tok.

2. Mihma Sintulion achvft in tishu, yummvt i holitopa chatuk osh, abeka cha, illa hosi tok.

3. Atuk osh Chisvs a pit haklo mvt, vla cha, in tishu hash hlakoficha hinla ka, pit im aiahni hosh, Chu okla in tikba vhleha ha pit in tihleli tok.

4. Atuk o yummak ash ot Chisvs a im ai ona mvt, im asilhha kvt achilita fehvt, Ilvppa ai i yvmihcha he vllhpiesa fehna;

5. Yummak okvt pim okla talaia ha pi holitoblit sinakak a pim ikbi tok oka, achi tok.

6. Mihma Chisvs vt awant ia tok. Atuk osh chuka atuk ash ona hosit taha ma, Sintulion ash osh i kana vhleha ha pit in tihleli mvt, Chitokaka ma! avt ik chim ahchibo kashke: chishno vt vm aboha ya ant ish chukowa he si ahoba keyu hoka.

7. Yohmi kvt anonti vno akinli hosh avt ont chi pisa la he si ahoba keyu kvt vm anukfila atuk oke: amba anum-pa bano ho ish mihakma, an tishu hatuk mvt hlakofa hinlvshke.

8. Uno ak kia hatak tushka chipota vhleha pehlichit i shahli nutaka ahanta chatuk sia hoka: yohmi kvt achvfa ka, Ia, im achi likma, ia hoke: mikmvt inla ma, Minti, im achi



likma, minti hoke: mikmvt an tishu ha, Ilvppa yakohmichí, im achi likma, yvmihchi chatuk oke, pit im achi tok.

9. Mihma Chisvs vt ilvppa puta ka haiyaklo mvt, pit im aiokpanchi fehnvt, filemvt hikia cha, apehvt aya tuk okla hash, Israel okla ha kanima kia na yimmi chinto yakohmi ka ak a pesoshke, hvchim achi lishke, im achi tok.

10. Mihma yvmmvvt yakohmit itvnowa tuk vt chuka ash falamvt, tishu abeka tuk vt hlakofi tuk o ont pisa tok.

11. Atuk o ont onna ma yakohmi tok: tmaha Nain hohchifo ho ia tok; mihma nan im ai ithvna laua, micha okla laua aienvt apehvt ilhkoli tok.

12. Atuk osh tmaha okhissa ya i bilika vla ma, hatak vt ohoyo i hatak illi yo ushi yosh, ishki a yvmmak osh i bano chatuk osh illi na okla sholit kohcha tok; yohmi ma tmaha okla hvt lauvt yvmma apehvt aya tok.

13. Mihma Chitokaka yvt ishki atuk a pisa mvt, i nukhaklo cha, Ish yaiya ná, im achi tok.

14. Mihmvt yvmmak ash ot ai onvtola kash ant potoli tok: mihma sholi tuk vt lumvt hieli tok. Mihma, Hatak himita chia hvt ish tanashke, chim achi lishke, achi tok.

15. Mihma illi yatuk yvmmak ash ot tanit binili cha, anumpuli tok; mihma yvmmak ash ishki a pit ima tok.

16. Mihma okla moma ka nanukshopa kvt ai anukfoyuka tok: mihmvt Chihowa ya holitoblichit aiokpahanchit, Hopaii chinto kvt pitintakla ya a tobtv hikivshke; micha Chihowa yvt im okla ha i nowvt ayvshke, okla achi tok.

17. Mihma yakohmit Chisvs isht ai annoa kvt Chutea yakni a mominchit, anonti yakni inla auet a bilika aiasha ma moma a hlopulli tok.

18. Mihma Chan nan im ai ithvna vhleha hvt nana kvt a yakokmi tuk a mominchit im anoli tok.

19. Mihma Chan ash ot ilap nan im ai ithvna ya tuklot hoyo cha, Chisvs a pit in tihleli mvt, Chishno ak osh aya he tuk mak o chia hokmá, ak chu? himmak pilla hak o inla yo e hoyo chi cho? achi tok.

20. Hatak ash ot ayvt im it onachi mvt, Chan Baptist vt, Chishno ak osh aya he tuk mak o chia hokmá, ak chu?

himmak pilla hak o inla yo e hoya chi cho? achi hosh auet pi tihleli tuk oke, achi tok.

21. Mihma hvshi kanvlli vlhpisa yvmmak fehna ka haknip ik in chukmo, mikmvt ililli isht ai ilbvsha, micha shilombish okpulo ai i foka puta aiena kvt laua ho hlakofichi tok: mihmvt lpa vt laua atuk a hoponayochi tok.

22. Mihmvt Chisvs vt afalamинchi mvt, Oh ia cha, nana ka hvsh pisa tuk, mihmvt hvsh haklo tuk aiena kvt Chan a ont oh im anoli; lpa yvt hoponayo, imomokpulo yvt nowa ma, leplosi vbi vt i kashofa, ik haponaklo vt haponaklo ma, illi mvt falamvt tani, mihma ilbvsha ya vbanumpa hvt isht im anuhumpvshke.

23. Yohmi ka kvna hosh vno a ik si ai ibetvblokmvt, mihi yosh na yukpa hoke, achi tok.

24. Mihma Chan im anumpa isht aya tuk vt a falamvt, itiachi ma, okla ha Chan ak o isht im anumpulit, Nanta ho hvsh pisa chi hosh yakni haiaka yvno hvsh ilhkoli tuk oh cho? Kushak osh mahli na winakvchi kak atuk o?

25. Amba nanta ho hvsh pisa chi hosh hvsh ilhkoli tuk o? Hatak na-fohka lapushki fohka kak atuk o? Yakeh! na-fohka holitopa ishit shemvt, ilimpa hochukma in laua hokvto, hatak miko vhleha in chuka ak o aiasha cho kvmo.

26. Amba nanta ho hvsh pisa chi hosh hvsh ilhkoli tuk o? Hopaii ak atuk o? Ahlishke, micha holitopa kvt hopaii ya i shahli fehna hoke, hvchim achi lishke.

27. Isli ataya he chi tikba ai apoksiahancha chi mak o vm anumpeshi a chi nashuka itikba ma chuffichi lishke, achit holisso tok a, ilvppak osh mih mak oke.

28. Ohoyo ho a tobrt ai vtta tok puta ka hopaii chito kvt Chan Baptist a imaiya kvt iikshoshke, hvchim achi lishke; yohmi ik nana kia moma ik lauwo hosh Chihowa apelhlichika yvno anta kvt, Chan a imaiya hoke.

29. Yohmi ma Chan a okla im a haponaklo tuk vt moyuma, micha pvblikan vhleha aiena kvt Chan a i baptismo ya isht a baptismot, Chihowa ya im aiahlichich tok.

30. Amba Falisi vhleha, micha nan-vlhpisa ithvnanchi



vhleha aiena kvto ilapo yokvto yummak ash o ik im a baptismo, Chihowa nana im aiahni tuk a ik aiahlecho hokvt.

31. Mihma Chitokaka yvt, Yohmi kvno hatak himaka aiasha ka nanta hak o pit it apesa la chi cho? yohmi ka nanta hak o okla pit hoyulba cho?

32. Ulla yosh ilhpak a kanchi yo binomaya hosh ilap bika it i howvt, Oskula ha e hvchim olachi ka, hvchik heh-loshke; illi isht taloa isht e hvchi yaiya-ka, hvch ik yaiyosh-ke, ahanchi ho chiyumishke.

33. Chan Baptist vt pvska yo ik po, mihmvt oka paki ma ik ishko yosh aya; yohmi ma, Nan-isht-ahullo okpuli il ai ishishke, hvsh achi.

34. Hatak Ushi yokvto impa, micha nan ishko aiena hosh aya: yohmi ma, Yakeh! hatak isikopa, micha oka paki ishko shahli, pvblikan vhleha mikmvt nan ashvchi puta ka i kana yoke, hvsh achishke.

35. Yohmi kia Ahopoyuksaka yokvto ilap im vlla vhleha ha mominchit ai isht aiahli chatuk oke, achi tok.

36. Mihma ibai impa hinla ka Falisi achvft im ahni tok: yohmi ma Falisi in chuka yash ont chukowvt, impa chi hosh binili tok.

37. Yohmi ma ohoyo nan-ashvchi yosh tmaha yvma anta tuk osh, Falisi in chuka ya Chisvs vt asht impa na akostininchi mvt, alabasta kotoba nan-ahama balama vlhto ho isht ona mvt,

38. Im asha-ka iyi pit a chiya ka ont hikivt yahaya cha, iyi ash nishkin okchi yak o isht achift, anonti ilap noshko-bo pashi akinli ho ishit kasholinchi mvt, iyi a i sukschowvt, nan ahama balama ash o isht a hvmmi tok.

39. Mihma Falisi vt yummak ash o hoyo tuk ash ot, yvma pisa mvt, Hatak ilvppvt hopaii atuk ok mvt, kvna hosh, micha ohoyo kaniohmi chatuk osh potoli ka, ik akostinincho ka heto; ohoyo ilvppvt nanashvchi yoka, ahnit ilapo inli il im achi tok.

40. Mihma Chisvs ash ot afalaminchit, Saimon a nana chi miha la hinla kv vm ashvshke, im achi tok. Mihma



yvmmak ash ot, Nan ithvnanchi ma! ish mihashke, achi tok.

41. Mihma, Hatak nan-ahekvchi achvfa yvmma aheka im in takohnli kv̄t tuklo tok: achvfa kv̄to aheka yv̄t iskvli tahlepa in tahlapikma, anonti achvfa kv̄to pokoli tahlapi ha tok.

42. Atuk osh isht atobba hi vt nana kia ik im iksho kit okla ma, it aieninchit pilla hō yvmmak ash ot i kashofi tok. Yohmi ka, Ūm anoli; katimampo kak osh yvmma i hullo kv̄t i shahlichā hinla cho? achi tok.

43. Saimon ash ot afalaminchī mvt, Laua i shahli tuk o i kashofi kak a hinla, ahni li, achi tok. Mihma, Pit vllpesvchit ish anukfilli mvhlshke, im achi tok.

44. Mihmvt ohoyo a hikia ka pit filema mvt, Ohoyo ilvppa ish pisa cho? chim aboha ant chukowa li ma, chishno vto saiyi isht achifa he oka kapvssa kia chik samo ke tuk: amba ilvppak okvto nishkin okchi yo saiyi ya isht achifa mvt, ilap noshkobo pashi ak o isht kasholihinchishke.

45. Chishno vto chik sa suksowo ke tuk: amba ohoyo ilvppak okvto, ilvppa ant chukowa li tuk takla ka, saiyi ya i suksoh<sup>kiss</sup>owa kv̄t ik iēsoshke.

46. Chishno vto sa noshkobo hā nan-ahama isht chik svm a hvmmo ke tuk; amba ohoyo ilvppak okvto saiyi ya nan-ahama isht ahvmmishke.

47. Yohmi hokvt, Nan im ai ashvchika yv̄t laua tuk vt kashofa hoke: mihi yosh nan i hullo fehna hatuk okvt, chim achi lishke: amba ik lauo hosh i kashofa hok mak osh mihi yosh nan i hullo kv̄t a fehna keyu chatuk oke, im achi tok.

48. Mihmvt ohoyo hash o, Chim ai ashvchika puta kv̄t chi kashofa mak oke, im achi tok.

49. Mihma it apehvt asht impa tuk yvmmak ash ot, Ilvppvt kv̄ta hōkak osh nan-ai ashvchika puta kak kia kashofi hoh cho? ahnit ilapo inli okla im anukfila tok.

50. Mihma ohoyo hash o, Na chi yimmika yv̄t chi okchalinchishke: na-yukpvt ish ayashke, im achi tok.

## CHAPTA VIII.

Chisrs vt im anumpeshi vhleha, micha nan-isht im vtta vhleha ohoyo aienvt apihvt aya hq, vbanumpa isht anumpuli, 1. 4 Na hokchi isht vlhpisa anumpa; 6 micha yvmmak atuk vt vlbitvt achukma annoa. 16 Prla tohwikeli isht vlhpisa; 21 kvna hosh Klaist im anumpa puta ka im antia hokvto, yvmmak o i kanomi fehna mak oke. 22 Chisrs vt kocha umba mahli kvllo ka yukobli; 26 mihmvt nan-isht-ahullo okpulo lawa hq hatak achvfa ka a kocha weli: yohmi ma, shukha lokoli achvfa hq ont abeha chi ka, vlhpesa im ahni; 43 ohoyo issish ont ia vbi yatuk o hlakofichi; 49 mihmvt Chailrs ushetik illi tuk a falaminchit tanichi.

1. **ATUK** osh i himmakma yakohmi tok: tvmaha, micha chuka lokoli puta aiena ka mominchit a hlopullit ayvt, vbanumpa isht anumpohonli; micha Chihowa apehlichika ai isht ilaiyukpa anumpa ha otvninchit isht anumpohonli tok: mihma auah tuklo kash ot apehvt aya ma,

2. Micha ohoyo kanohmi, yvmmtv shilombish okpulo puta, micha haknip ik in chukmo puta aiena tuk osh a hlakofi tok, Meli Maktalene hohehifo yvmmak o nan-isht-ahullo okpulo untuklot a kohcha tok.

3. Mihmvt Choanna Helot a nan-isht im vtta Chusa a tekchi, micha Susanna, mikmvt inlaka mvt laua hosh nana im asha tuk vt, Chisrs a isht apelvchi tuk vt apehvt aya akinli tok.

4. Okla lawa fehnvt tvmaha moma ashvt minti kvv im ai itvnaha ma, nana isht apesa hosh im anumpuli tok.

5. Na hokchi vt i nanihi hokchit ia tok; atuk osh hokchi ma, kanimi kvv hina lapalika yo kaha tok: atuk o a hvhlich; yohmi na hushi puta vba itvnova kvv ant aiowvt vpa tok.

6. Mihma kanimi kvvto tvli yo ai o kaha tok: atuk osh offo mak inli hosh a shummi takanli kvv ik im iksho hatuk okvt, bvshit kvnia tok.

7. Anonti kanimi kvvto kvvti foka yo a kaha tok: atuk o kvvti ash ot awant offo cha, olvbbit ishi tok.

8. Yohmi ma inla kvto yakni achukma h<sub>o</sub> ai o kaha tuk osh offot, nihi achvfa tuk kia tahlepa achvfa vnit waya tok : ilvppa puta ka achit ont in taiyaha mvt, Kvna hosh isht haponakla he haksobish vt i hinlikmvt, haklashike, chitoli hosh achi tok.

9. Mihma nan im ai ithvna vhleha hash ot, Ilvppvt nan-isht vlhpisa katiohmi ha hinla hoh cho? achit i ponaklo tok.

10. Mihma, Hrvchishno ano Chihowa apehlichika ya nana kv<sub>t</sub> ik otaiyano ke tuk a hvsh akostinincha he mak osh hvchim vlhpisa hoke : amba inla ka yokvto pisa kia, pisa he keyu; mikmvt haklo kia, ik akostinincho ka chi h<sub>o</sub> nan-isht vlhpisa anumpa ha chi ha tok.

11. Nan-isht vlhpisa kv<sub>t</sub> ilvppak oke. Na-nihi ak osh Chihowa im anumpa mak oke.

12. Hina lapalika kaha kv<sub>t</sub>, anumpa ha haklo kak oke : yohmi ma Setan vt ayvt, okla yimmit ik okchayo ka chi ka, anumpa ha chukvsh ash a kohchit im ishi chatuk oke.

13. Tvli yo ai o kaha kvto, anumpa ha haklokmvt, na yukpa hosh ahninchi kak oke; yakohmi kak osh hakshish vt iksho; yohmi hosh chekosi takla hokvno yimmi tuk osh, nana kv<sub>t</sub> ont a palvmmikma, mokohli hoke.

14. Mikma kv<sub>t</sub>i foka yo a kaha kvto, anumpa ha haklo tuk kia, yakni pakna ahantvt nan-isht a kaniohmi puta, mikmvt nan in laua bvna, micha na-washoha puta isht a nukfoyuka kak osh ai im olvbbi na vnit ahlit ik wayo kak oke.

15. Amba yakni achukma yo ai o kaha kvto, yvmmvt chukvsh achukma aiahli mak osh anumpa ha haklokmvt, ieshit achunanchi cha, vnit waya kak oke.

16. Hatak nan ak osh pula ha luachi mvt, nan-ai<sub>v</sub>lhto yo isht ompohomokma, keyukmvt topa nutaka yo pit tala-likma, nana chatuk keyu; amba kvna hosh ant chukowakmvt tohwikeli ka pisa chi ka, pula ai-o-hikia yak o o hilechi chatuk oke.

17. Na luma nana hatuk osh ik otaiyano ka hi vt iksho :



mikma nana hosh luma tuk ak o ik akostinincho ki, ik otano ka he mvt iksho hoke.

18. Yohmi hoka nana ka hvsh haklo kvt, Ahah! hvsh ahnashke; kvna hosh ishi hokmak o, mihi yo ima hi oke: mikmvt kvna hosh ishi keyu tuk mvno, mihi yo ishi ahomba tuk ash kia aieninchit im ai isha hi oke, achi tok.

19. Yohmi ma ishki, micha itibapishi vhleha aiena kvt im ai vla kia, okla hak osh atehlefvv kvnia hatuk o, a hikia ka ona he keyu ki tok.

20. Mihma, Chishki, micha chitibapishi vhleha aiena kvt chi pisa bvna hosh, kocha ya hiohmayvshke, achit im anoli tok.

21. Mihma yvmmak ash ot afalaminchi mvt, Chihowa im anumpa ha haponaklo cha, mihi yo ai yvmohmi vhleha ilvppak osh vshki, micha itibapishi li vhleha aiena mak oke, im achi tok.

22. Atuk osh nitak kaniohmi ho yakohmi tok: nan im ai ithvna vhleha hash ai it apehvt peni-ont chukowa tok; mihmvt, Okhvta mish-tvnnvp ak o pit eho tanvblashke, achi tok. Mihma peni ash okla oka tobli tok.

23. Atuk o yakohmit peni a asht itvnowa ma, yvmmak amo nusi tok: atuk o mahli chito kvt okhvta hash on itu-yula; yohmi ma oka yvt ibai alota na ai isht-kvrvpvt ai i palvmma he pullvt aiasha tok.

24. Yohmi cha okla onvt yvmmak ash okchvli mvt, Pithvnanchi ma! Pithvnanchi ma! pilli mak oke, achi tok. Mihma yvmmak ash ot tani cha, mahli micha oka poakvchi aiena kash im alvmmi tok: mihma yvmmak ash ot yokopa na chulusvt talaia tok.

25. Mihma yvmmak ash ot, Na hvchi yimmika mvto? im achi tok. Mihma okla, nukshopa hatuk okvt, nukhlakanchvt, Ilvppvt hatak katiohmi mak oh cho? ilvppvt mahli, oka aiena kak kia nan i miha ma, im antivshke, it im achit maya tok.

26. Atuk osh Katalenes okla i yakni Kalili auct i chapa ka talaia ka, okla ont ataiya tok.

27. Yohmi na yvmmak ash ot pit kohchvt ia ma, hatak achvfa kvt nan-isht-ahullo okpulo puta kvt ai i foka tok ho-

paki hosh, na fohka kia fohka chatuk keyu, mihmvt chuka yo ai vtta chatuk-keyu, amba hatak illi aiasha yak o ai vtta chatuk osh, tmaha ha a kohchvt aya hosh afama tok.

28. Mihmvt Chisvs a pisa mvt, chitolit tahpula mvt, yvmmak ash itikba ya aka hlipvt chitoli hosh anumpulit, Chisvs Chihowa nana moma imaiya Ushi chia ha, vno vt nanta ho isht chi ahalaia li cho? chik svlvshalo ka chi mak o, chim asilhha lishke, áchi tok.

29. Yvmmak okvt shilombish okpulo vt hatak ash a kohcha chi ka, im apesa ha tok. Yvmmak okvt himonna hak-sinchit hohokli beka tok; yohmi hatuk a yvmmak okvt tvli ita-takvli, micha iyi ai vlhpitta tvli aiena isht talakchi ho okla apesvchi ha tok: yohmi kv isht a kamvssa yatuk a kobvffikma, nan-isht-ahullo okpulo ash osh chvffichi na yakni haiaka a kvnia beka tok.

30. Yohmi hatuk o Chisvs ash ot i ponaklot, Chi hohchifo hv nanta ho? achi tok: mihma yvmmak ash ot nan-isht-ahullo okpulo vt laua hosh pit ai abeha hatuk oka, Lechvn sia, achi tok.

31. Yohmi ma kohchvt ahofobika ai-ilbvsha mak o okla ia hi a ik im apeso ka chi ka, okla im asilhha tok.

32. Yohmi ma nvni pilla yvmmak oka shukha laua yvt ai impa hosh aiasha tok: yohmi ma yvmmak o okla ont abeha chi ka vlhpesa, im ahna chi ka, im asilhha tok. Yohmi ma vlhpesa, im ahni tok.

33. Yohmi ma-nan-isht-ahullo okpulo puta kash ot hatak ash a kocha wihvt ia mvt, shukha yash o ont chukowa tok. Yohmi ma shukha laua yash osh nvni chakpatali ka asht aka pit yihlepa fehvvt, okhvta ont ai oka kahvt, nuksakkit illi tok.

34. Yohmi ma yvmma apesvchi vhleha hv nana kv ai yvmohmi ka pisa mvt, yihlepvt ivt, tmaha mikmvt haiaka aiasha tuk aiena ka ai im anoli tok.

35. Yohmi ma nana kv ai yvmohmi tuk ash okla pisvt ilhkoli tok. Atuk osh Chisvs ash im ai vla cha, hatak nan-isht-ahullo okpulo puta kv a kocha wiha tuk ash, ilefoka fohka cha, im anukfila mvt hopoyuksa achukma hosh,



Chisvs iyi ituma ya binili ho okla pisa tok: yohmi mvt okla nukshopa tok.

36. Yohmi ma nan-isht-ahullo okpulo puta ai i foka tuk vt kaniohmit a hlakofi na okla pisa tuk ash kia im anoli tok.

37. Yvmohmi ma Katalenes yakni ai i bilika tuk vt okla laua kvt nanukshopa chinto kvt ai onvtuyula hatuk osh, yvmmak okvt i filvma hinla ka, momvt okla im asilhha tok. Yohmi na yvmmak ash ot oiyvt peni ash pit chukowa mvt, falamvt aya tok.

38, 39. Mihma nan-isht-ahullo puta kvt a kocha wiha tuk hatak ash ot awant aya hinla kvt, im asilhha tok: yohmi kia Chisvs ash ot, Chin chuka yak o falamvt ish ona cha, Chihowa hvt nana chinto nana mak o a chi yvmihchi tuk a, ont ish anolashike, achit pit chvffichi tok. Mihma yvmmak ash ot ia mvt, nana chinto fehna nana mak o Chisvs vt i yvmihchi tuk a, tvmaha hash mominchit ai anoli tok.

40. Atuk o yakohmi tok; Chisvs ash ot falamvt vla ma, okla hvt momvt hoyo hosh aiasha tuk okvt, okla na yukpvt aiokpvchi tok.

41. Yohmi ma hatak vt Chailvs hochifo hosh, sinakak apesvchi yosh vla tok; mihmvt Chisvs iyi ituma ya aka ant hlipia cha, in chuka ya ona hinla ka, im asilhha tok.

42. Yvmmak okvt ushetik vt achvfa illa hosh, afvmmi auah-tuklo foka tuk osh, illa hosi hosh itonla ha tok. Yohmi ma yvmmak ash ot ia hosh aya ma, okla chinto kvt ai a folublrit knia tok.

43. Yohmi ma ohoyo hvt issish um-bokafa tok afvmmi auah-tuklo hatuk osh, nana im asha tuk a mominchit alikchi puta kak o ai ataiyaha kia, achvfona ma a hlakofa he mvt iksho hosh, aya tuk osh,

44. Im ashaka ona cha, im anchi aposhokvchi ya pit potoli tok: yohmi ma ashalika issish ont ia tuk vt i hokofa tok.

45. Mihma Chisvs vt, Kvta hosh sa potoli cho? achi tok. Kvna hatuk keyu ka momvt miha ma, Pita yvt, micha apehvt aya tok aiena kash ot, Pi shahli ma! okla chito vt chi a folublrit chi atehlifichi fehna hokak o, Kvta hosh sa potoli, ish achi cha? achi tok.



46. Mihma Chisvs ash ot, Kvna hosh sa potoli tuk, nan-isht aiahlika yvt a si a kohcha ka akostininchí li hoka, achi tok.

47. Yohmi ma ohoyo hash ot ilapvt luma keyu kv akostininchí mvt, wvnihinchit ona mvt, itikba ya aka ont hlipia cha, nana kaniohmi hq yvmmak oka potoli tuk, micha kaniohmit ashalika hlakofi tuk aiena kv okla moma itikba ya ai im anoli tok.

48. Mihma yvmmak ash ot, Svsotek ma! na chi yukpa achukmashke; na chi yimmika yak osh chi hlakofichi hoka, na-yukpa bieka anukfoyuka hosh ish ayashke, im achi tok.

49. Yvmmak okvt anumpuli moma hq, sinakak apesvchi in chuka ya achvvt minti hosh vla mvt, Chiso-tek vt illishke; nan-ithvnanchi ma chik im ahchibalo kashke, im achi tok.

50. Yohmi kia Chisvs vt pit haklo mvt nan i mihvt, Ik chi komunto kashke; pilla ik chi yimmí, mikma yvmmak okvt hlakofa chi hoke, im achi tok.

51. Atuk osh aboha yash ont chukowa mvt, hatak nana kia ik chukowá, ik aiahno; amba Pita, micha Chemis, mikmvt Chan, micha ohoyo himita ya iki, mikmvt ishki itatuklo kak illa tok.

52. Yohmi ma moyumvt ilbvshvt isht yahaya tok: yohmi kia yvmmak ash ot, Hvsh yaiya ná; illi keyu; pilla nusi hoke, achi tok.

53. Mihma yvmmak okvt illi hoka, okla ithana hatuk osh, yvmmak ash ik ahobalo olvli tok.

54. Yohmi ma yvmmak ash ot mominchit kohchichit tahli mvt, yvmmak ash ibbak a halvli cha, i howvt, Ohoyo himita ma! tani, achi tok.

55. Mihma shilombish vt falamvt im vla cha, yvmmak ash ot ashalika tani tok; mihma nan-ilimpa i hoyá hinla ka, miha tok.

56. Mihma iki, ishki itatuklo kash ot nukhlakancha felna tok. Yohmi ma nana kv a yvmohmi tuk ash hatak nana kia ik im anolo ka hi o i miha tok.

## CHAPTER IX.

Chisvs vt im anumpeshi auah-tuklo ka vbanumpa isht anumpula chi, micha nana kvt isht ahullo fehna kia yvmihchi a puta hosh im ai vlhpesa hatuk vt otrninchu chi ho, pit tihleli, 1. 7 Helot vt, Chisvs a pisa brnna. 17 Chisvs vt prska lumbo tahlapi, micha nuni chipunta tuklo aiena tuk a, hatak tahlepa sipokni tahlapi ka imprchi: 18 micha ilapa kva hak o okla im ahoba hatuk a ponaklo tok; 22 micha ilap vt illi tuk osh, anonti falamvt tana he aiena kvt tikbanli anoli: 23 yohmi mvt nan im ai ithvna vhleha ilapa holi-tobli pulla kvt, ile kaiyancha he, micha na-palvmmi puta ma pisa chi aiena kvt im vlhtaha hi a, i miha. 28 Chisvs vt vba pit anumpula chi hosh nuni chaha pit oiya atuk osh, vba pit anumpulit ahanta moma hosh pisa ka inlvrt toba. 37 Vlla yosh nan-isht-ahullo okpulo isht abeka tuk a Chisvs vt hlakofichi: 43 mihmvt anonti ilap i palvmmi illa hi vt tikbanli anoli; 46 nan im ai ithvna vhleha hvt ilap na-fehna brnna im anukfila puta ka im okvbli: 51 Samalia okla hvt Chisvs a ik aiokpacho kvt okla illit taha chi ka, Chemis, Chan, Ita-tuklo kvt ahni ma, Chisvs vt nan isht i miha; 57 hatak kaniohmi kvt chukvsh a mominchit isht im antia he keyu kvt asha hatuk o, nan i miha.

1. YUMOHMI mvt ilapo nan im ai ithvna vhleha auah-tuklo kash hoyot itahobi mvt, nan-isht-ahullo okpulo puta imaiyvt, mikmvt abeka ilaiyuka puta ma hlakofihinchu chi ka, nan aiahlika ya isht im apesa tok.

2. Yohmi mvt, Chihowa apehlichika yoka isht anumpohonlit, anonti abeka puta ma hlakofihinchu chi mak o pit tihleli tok.

3. Yohmi mvt, Itvnowvt hvsh aya kvt tvbi kia, mikmvt shukeha, micha prska, anonti tvli holisso, ilefoka lumbo mvt tuklo aiyuka, peh nanasi kia hvch ik isho kashke.

4. Mikmvt chuka nana ho ont hvsh chukowakmvt, yvm-mak o hvsh ahashwa tuk osh, kohchvt hvsh iashke.

5. Michu kva kia ik hvchi aiokpachokma, tmaha yvma a kohchvt hvsh iakmvt, nan-isht im atokowa mak o hituk tohbi ka hvch iyi ya tahtulit hvsh a kanchashke, im achi tok.

6. Mihma okla ivt tmaha puta ka hlopullit ayvt, vba-

numpa isht anumpohonlit, kanima moma ka abeka a hlakofichit itvnowa tok.

7, 8. Helot miko ash ot, yummvt nana puta ai yvmihchi ka haklo tok; yohmi mvt kanimi kvv, Chan ak osh illi tuk vt falamvt tani tuk, achi ma; anonti kanimi kvv, Elias ak osh ant haiaka, achi: mihma inlaka mvt hopaii vhleha tikba ya tok ak osh achvvt falamvt tani hoke, achi hoka, katiohmi ahnit ik im vhlpiesot im anukfila tok.

9. Mihmvt Helot ash ot Chan ano noshkoba ha tvbli li chamo: amba na yakohmi puta a hahaklo li ka yummak osh kvta hoh cho? achi tok. Mihmvt yummak ash pisa bvna tok.

10. Mihma vbanumpeshi vhleha hash ot falamvt ai ona mvt, nana ai yvmihchi tuk vt mominchit okla im anoli tok. Mihma yummak ash ot pehlinchit il a lumvt, naksika tmaha hohchifo Betsaita ai i bilika yakni haiaka yo ia tok.

11. Mihma okla hvv akostininchi mvt, yummak ash o pit iakaiya tok; mihma yummak ash ot im aiokpahanchit, Chihowa apehlichika isht im anumpohonlit, yummak okvt hlakofi bvna hokvno hlakofihinchit tok.

12. Atuk o nitak ash ot ont shohbit mahaya ma, auah-tuklo kash ot ai vlvv, Yakni haiaka yo il aiasha hoka, okla laua ya ish in tohno na ilhkolit tmaha puta, micha a kochu chuka hiohli yakni auet a bilika fullota aiena ka ont a nusit, ilhpak ma ahayuchit mayashke, im achi tok.

13. Yohmi kia yummak ash ot, Impa oh ipeta, im achi tok. Yohmi ma, Pvska tahlapi, mikmvt nvnii tuklo aiena misha keyu hosh pin chiyvshke; kanima yo ivt okla moma ilvppa ilhpak a kil in chumpo hokmvt, okla achi tok.

14. Yohmi ka hatak vt tahlapa sipokni tahlapi foka ha tok. Yohmi ma nan im ai ithvna vhleha hash o, Pokoli tahlapi aiyukvt ia ho ho binohlichí, im achi tok.

15. Yohmi ma yvmihchit, mominchit okla binohlichit tok.

16. Yohmi ma yummak ash ot pvska tahlapi, micha nvnii tuklo aiena kash o ishi cha, pit vba chakalit aiokpvchi cha, tushahlichit mvt, okla laua ya in talohla chi ho, nan im ai ithvna vhleha hash pit ima tok.



17. Mihma okla impvt momvt kaiya tok; mihma okla im atampa tuk a, boshulli yvt kishi auah-tuklo hō okla aiowa tok.

18. Atuk o yakohmi tok: nan im ai ithvna vhleha ak illa hosh apiha hō antvt, vba pit anumpuli tok: atuk osh yvm-mak ash o i ponaklot, Okla hvto vno vt kvta sia hō achi hō? achi tok.

19. Yohmi ma afalaminchi mvt, Chan Baptist; amba kanimi kvto, Elias ak o achi: mikma inlaka yvto, Hopaii vhleha tikba ya tok ak osh achvftv falamvt tani hoke, okla achish-ke, achi tok.

20. Amba, Hvchishno vto vno vt kvta sia hō hvsh achi hō? im achi ma, Pita yvt afalaminchit, Chihowa i Klaist á, achi tok.

21. Yohmi ma yvmma hatak nana kia okla ik im anolo ka chi ka, achukmalit kvlochoit i miha mvt,

22. Hatak Ushi yokvt nan isht ai ilbvsha kv in laua chi, yohmikmvt hochitoka vhleha, micha na holitompa isht asha pehlichy vhleha, mikmvt na holissochi puta aiena mvt ik i yimmot ik aiokpachot vbi tuk ma, nitak ont atuchinakma falamvt tana hi oke, achi tok.

23. Yohmi mvt mominchit i miha kv, Kvna hosh siakai-ya he, ahni hok mvt, ilapo yvt ik ile holitoblo hosh nitak moma ka im iti-taiyukhvna atuk ma ieshi hosh, vno a siakai-yashke.

24. Kvna kia ilap im ilhfopak a okchalinchi bvna hok-mvt, i kvnia hi oka; amba kvna hosh vno pulla hatuk mak o im ilhfopak vt isht i kvnia hokmvt, mihi yosh il im okchalincha hi oke.

25. Hatak vt yakni a il a mominchit ieshi hosh, anonti ilapo fehna yash il okpvnichit il issikkopalit kaiyanchi hok-mvto, nanta hō isht ilaiyukpa hinla cho?

26. Kvna hosh vno, micha vm anumpa puta aiena ka i hofahya tukma, mihi yo Hatak Ushi vt ilapo, mikmvt Iki, micha enchil hochukma vhleha a puta nan-isht aholitopa ka il aieshit ayvt vlakmvt, i hofahya hi oke.

27. Yohmi kia Chihowa apelihika ya pisa ha keyuk

mv̄t, illa chi keyu kv̄t ilv̄ppa kanimi mv̄t hiohmaya hoke :  
ahli mak o hv̄chim anoli lishke, achi tok.

28. Ilv̄ppa puta ka ahanchi tuk ash nitak ont isht untu-  
china foka ma, Pita, micha Chan, mikmv̄t Chemis aiena ka  
pehlichī cha, nv̄nih chāha yō v̄ba pit anumpula chi hosh ia  
tok.

29. Atuk osh v̄ba pit anumpuli ma, nashuka yv̄t inlv̄t  
toba ma, i na-fohka yv̄t tohbit shohmalili tok.

30. Yohmi ma hatak tuklo kv̄t, yvm̄mv̄t Moses, micha  
Elias ita-tuklo mak osh yvm̄mak ash ant im anumpulit okla  
tok.

31. Yvm̄mak okv̄t nan-isht a holitopa ahli ka il aieshi  
hosh ant otaiyanit okla cha, yvm̄mak okv̄t Chelusalem a ai  
illa hi a, isht anumpohonlit okla tok.

32. Yohmi kia Pita, micha inlaka aiena yv̄mma apehv̄t  
aya tuk ash ot nosilhha fehna tok : atuk osh okla ont okelv̄t  
taha mv̄t, isht-a holitopaka yash, micha hatak tuklo kv̄t  
apehv̄t hielī tuk ash aiena ka okla pisa tok.

33. Atuk o yakohmi tok ; yvm̄mak ash ot ai i filv̄mmit  
tamov̄t okla ma, Pita yash osh Chisvs ash, Pī shahli ma !  
ilv̄ppa e maya kv̄t pim achukmv̄shke : yohmi ka vlhtipo  
tuchina ka il ikbashke, achv̄fa kv̄t chimmi hokma, anonti  
achrv̄f̄t Moses ak o immi hokma, anonti achv̄fa kv̄to Elias  
ak o immi hashke, achi tok : yvm̄mak o miha li, ahni keyu  
hosh :

34. Yvm̄mak ash ot yakohmichit anumpohonli moma na  
hoshonti aya kv̄t, ant o hoshontikachi tok ; yohmi ma ho-  
shonti anukaka ya pit chukov̄t ia kv̄t, okla nukshopa tok. :

35. Yohmi mā hoshonti anukaka ya auet ai anumpa kv̄t,  
Ilv̄ppak osh Sv̄so a holitopa mak oke, hv̄sh i haponaklashe,  
achi tok.

36. Atuk o anumpa hash ot ont taha ma, Chisvs ak illa  
hosh hikia na okla pisa tok. Yvmohmi ma nana yakohmi  
kash okla nana ik achot, nana hō pisa tuk vt achv̄fonv̄chi  
mv̄t hatak nana kia nitak yv̄mma foka ka ik im anolo beka tok.

37. Atuk o yakohmi tok : ont onna ma nv̄nih hash okla  
asht akov̄t minti ma, okla lava kv̄t ont afama tok.

38. Yohmi ma okla ha takla aya tuk vt hatak achvvt chitolit mihvt, Nan-ithvnanchi ma! svso ha ish pisakbano chim ahni lishke, vm vlla yvt yvmmak bano hatuk oke.

39. Yohmi ho shilombish okpulo yvt ishikma, ashalika tahpahanla hoke; mikmvt haiochichehit itukpokpokihinchi beka hoke: yohmi kvt kaniohmit i filvma he keyu chohmit, hakhp litolit hotopahanlishke.

40. Yohmi ho na chim ai ithvna vhleha hak o yvmma kohchicha hinla ka, im asilhha li tuk ak o, okla yvmihcha he keyu ketuk oke, achi tok.

41. Mihma Chisvs ash ot afalaminchi mvt, Na yimmi iksho, micha nan-ahli ai i shanaia fehna okla hvchia ma! hvch iba takla ahantvt, nana ka isht ak ahno ho katiohmi foka chi cho? Chiso ha ilvppa ishit minti.

42. Mihma ishit minti hosh aya ma, nan-isht-ahullo okpulo yash ot aka pila cha, haiochichechi tok. Mihma Chisvs vt nan-isht ahullo okpulo yash im alvmmi cha, vlla yash hla-kofichit, iki ibbak ash falaminchit fohki tok.

43. Yohmi ma Chihowa nan isht im aiahli chinto fehna ka momvt okla isht nukhlakancha tok. Yohmi kvt nana ka Chisvs vt ai yvmihchi tuk puta kash momvt, okokko! okla aiahnit maya takla ma, yvmmak ash osh ilap nan im ai ithvna vhleha hash,

44. Anumpa ilvppa puta kvt hvchi haksobish atuk ma ik a fohoka, hvsh ahnashke; Hatak Ushi yokvt hatak puta ibbak a i foyuka hi oke.

45. Yohmi kia anumpa ilvppa okla ik akostinincho ki tok: mihma na miha kash ik im ai otano; yohmi hoka yvmmak ash okla ik ai ithaiyano ki tok: mihmvt anumpa yvmmak ash im asilhvhchi okla nukwia tok.

46. Yohmi ma, Katima kak osh holitopa kvt moma i shahla hinla hoh chishba? ahnit okla isht im ai anukfilvt maya tok.

47. Mihma okla chukvsh nan im anukfila ha Chisvs vt im akostininchi mvt, vlla yo ishit, il a bilikvchit binilichi tok.

48. Mihmvt, Kvna hosh vlla ilvppa vmmi hohchifo ho ahninchi hokvto, vno ak o si ahninchi hoke: mikmvt kvna



hosh vno a si ahninchí hokmvt, yummvt auet. sa kanchi tok ma pit ahninchí hoke: kanima hosh moma ik a lauwo kv̄t hv̄chi takla ahanta hokvto, mihi yosh moma i shahla hi oke, im achi tok.

49. Mihma Chan vt afalaminchi mvt, Pi shahli ma! achvfa hosh chí hochehifo ha nan-isht-ahullo okpulo puta ka ishit kocha weli hosh anta ho e pisa tuk: yohmi kia yvm-mak okvt ik piba fohko hatuk o, il im alvmmi kano, achi tok.

50. Mihma Chisvs ash ot, Hv̄ch ik im alammo kashke: kv̄na hosh pi sanalit anta keyu hokvto, pibai achvfa hoke.

51. Atuk o yakohmi tok: yvmmak ash o aiokpanchit vba ya isht ia chí nitak vt ont vlhpiesa hatuk o, Chelusalem a ia chí kv̄t ai anukfoyukvt nashuka ya pit filimmi tok.

52. Mihmvt nan ont im atahla chí ho, anumpa shali vhle-ha ha tikba pit tihleli tok: yohmi na okla ivt Samalitan okla in tmahushi o ont chukowa tok.

53. Yohmi ma yvmmak okvt Chelusalem a ia ho fehna nashuka yatuk o, okla ik aiokpacho ki tok.

54. Yohmi na nan im ai ithvna Chemis, micha Chan ita tuklo kv̄t yakomi ka pisa mvt, Chitokaka ma! Elias vt yvmihchi tok akinli ho chohmichit, pishno mvt luak vba minti kv̄t aka itula cha, okla ilvppa hushmit tahla chí ka il im apesa hinla ka, ish ahni cho? achi tok.

55. Mihma yvmmak ash ot filemvt im alvmmi mvt, Hv̄chi chukvsh ai im anukfila a kaniohmi hosh hv̄sh aya kv̄t hv̄ch ik ithanoshke.

56. Hatak Ushi vt hatak puta ka vba chí hosh aya ha tok keyu, amba okchalíncha chí ha tok oke, achi tok. Mihma ilhkolit tmahushi inla yo ona tok.

57. Atuk o yakohmi tok; ia hosh okla itvnowa ma, takla ya hatak achvvt, Chitokaka ma! kanimak fehna chik aya. kia, vno vt chiakaiya la chí hoke, im achi tok.

58. Mihma Chisvs ash ot, Chula puta kv̄t chiluk vt im ai ashakma, vba hushi puta kv̄t vlhpichik vt im asha hoke: amba Hatak Ushi okvto noshkobo ha kanima a bohla hi vt ik im iiksho hoke, im achi tok.

59. Mihmvt inla yo, Is siakaiyashke, im achi tok. Yoh-

mi kia yummak ash ot, Chitokaka ma! vhlpesa, vm ahni na ivt, aki ak o tikba ont ak holpi ha yosh; im achi tok.

60. Mihma Chisvs ash ot, Illi ak osh ilap bika illi yokvno hohpashke: amba chishno vto ivt, Chihowa apehlichika ya isht ish anumpohonlashke, im achi tok.

61. Mihma anonti inla mvt, Chiakaiya la chi mak oke; yohmi kia ivt an chuka maya kak o tikba ont aiokpvchi la hi a, is svm ahnashke, achi tok.

62. Mihma Chisvs ash ot, Hatak nana kia yakni isht patafa ya ibbak a isht ishi ha yvt, olbulaka a pit hopokoyo kv, Chihowa apehlichika ya ahalaia he vhlpesa keyu hoke, achi tok.

## CHAPTA X.

Chisvs vt nan im ai ithvna vhleha pokoli untuklochit vbanumpa isht anumpula chi, micha nana kv a fehna kia yvmihchi puta hosh im ai vhlpesa hatuk vt otvnicha chi mak o a tohno, 1: 17 kaniohmi kak o okla na yukpa he isht ai vhlpesa hatuk a, Chisvs vt im anoli; 25 Chisvs vt nan-vlhpisa ithvnanchi hatuk a vba yakni hina ya isht it im anumpuli: yohmi hosh hatak achukma Samalitan vt kaniohmi tok, nan-isht vlhpisa yummak o, ilapvt in chuka panta hatak puta ka isht ithana he mak o isht im anumpuli.

1. NANA kv a yakohmi ha ya, Chitokaka yvt inla yosh pokoli untuklo ho atokoli akinli cha, tuklo aiyyukachit tvma-ha puta, mikmvt kanima yo ilapo vt ai ona hinla kv, tikbanli pit tihleli tok.

2. Yvmohmi hatuk osh na-way a yvt ai-vlmo-ona hokvto laua mvhli ho, amba na-toksvli vhleha hak osh chvbehasishke: yohmi hoka na-way a yvt ai-vlmo-ona ka in Chitokaka ya hvsh im asilhhahanchi na na-toksvli vhleha ha i na-way a yvt ai-vlmo-ona ka pit apittashke.

3. Hvsh itvnowashke: yakeh! chukfvhlhpoba ushi yosh nashobo ai itintakla maya ho, ohmichi mak osh pit hvchi tihleli li hoke.

4. Tvli holisso ai-vlhto, micha bahta, mikmvt shulush

aiena ka isht hvch ik ayo kashke: micha hina takla ya hatak nana kia hvch ik aiokpacho kashke.

5. Mikmvt chuka nana ho ont hvsh chukowa kvt nan tikba, Na-nanaiya kvt chuka ilvppa ant iba fokashke, ahnit hvsh mihashke;

6. Mikma na-nanaiya ushi vt yvmma anta tukma, nan-isht hvsh il a nanaiya mvt ai onvtuyulashke: amba keyukmvo, nan-isht hvsh il a nanaiya yvt hvchi falama hi oke.

7. Mikmvt chuka yvmmak ash inli ho ahashwvt, peh nana hoh kia hvch ipetakma, vpt hvsh ishkashke: toksvli vt im vlhtoba he ak osh im ai vlhpesa hoka. Chuka vbaiyvchit hvch ik itvnowo kashke.

8. Mikmvt tmaha nana ho ont hvsh chukowa ka, okla hvchi aiokpvchikma, impa nana hosh hvchi tikba talaia hokma, hvsh pashke.

9. Yohmikmvt abeka yvt yvmma ashakma, ho hlakofichi: yohmikmvt Chihowa apehlichika yvt hvch i bilika vlushke, hvsh im achashke.

10. Amba tmaha nana ho ont hvsh chukowa na ik hvchi aiokpachokma, yvmmak ash a kohevvt ivt, hina bvshkvchi puta ka hvsh ona cha,

11. Hvchin tmaha i hituk tohbi vt pi a lapali tuk a, hvchi o kashofit e kanchishke: yohmi kia Chihowa apehlichika yato hvch i bilika vla hoka, hvsh ithaiyanashke, hvsh im achashke.

12. Yohmi kia nitak yvmma fehnakma Sotom vt im ahleka hoh kia pit im vlhpisa kvt, tmaha yvmma i shahla hi oke.

13. Kolasin ma! na chi palvmmi mak oke; Betsaita ma! na chi palvmmi mak oke; na-fehna puta kvt hvchishno ya a hvchim a yvmohmi tuk vt Taia, micha Saiton ita-tuklo ka a yvmohmi ha tok okma, hopaki kash inli ho na-pashi tvnna fohka cha, hituk chubbi anuka binoh-mayvt ile kostininha hi a tok oke.

14. Yohmi kia nan ai-vlhpisa chinto nitak o Taia, micha Saiton ita-tuklo kvt im ahleka hoh kia pit im vlhpisa kvt, hvchishno a i shahla hi oke.



15. Yohmikma Kapenavm chia hvt shutik ak o ont ish talaia tuk vt, aka ivt ai-okpuloka mak o pit ish a kvnia hi oke.

16. Mikma kvna hosh hvchi haponaklokmt, vno a a haponaklo hoke : mikma kvna hosh hvchishno a hvchi shitilemakmt, vno a sa shitilema hoke : mikmt vno a sa shitilemakmt, auet sa kanchi tok a shitilema hoke.

17. Yvmohmi tuk o pokoli untuklo kash osh na yukpa hosh falamvt ai vla mt, Chitokaka ma ! chi hohchifo pulla kak o nan-isht-ahullo okpulo puta kak kia pim antihyvshke, achi tok.

18. Mihma yvmmak ash ot, Setan vt malvtha kvvba vttvt aka minti chatuk a, chiyuhmi ho pisa li kvno.

19. Yakeh ! sinti chilita puta, mikmt halambia puta aiena ka hvsh a hvhlihinchu : micha na tvnvp nan-isht ai im ahli ka ma mominchit a hvsh imaiya chi mak o nan isht aiahlika ya hvch ima lishke : yohmi ka nana hosh a kaniohmit hvchi hotopala hi vt iksho ka hi oke.

20. Yohmi kia shilombish okpulo puta kvvba hvchim antia ilvppak okvno nan ik hvchi yukpo kashke ; amba hvchi hohchifo puta kvvba ya a holisso, yvmmak o na hvchi yukpa vlvpesa hoke, im achi tok.

21. Hvshi kanvlli vlvpisa yvmma fehna ma Chisvs vt chukvsh na yukpa mt, Aki, vba, mikmt yakni ita-tuklo in Chitokaka ma ! na yakohmi puta ka na kostini, micha nan-ithvna aiena kvno ish in luhmi tuk osh, vloshi puta ho ish im otvninchu hoka, yak oke, chim aiahni lishke, vlvpiesvshke, Aki ma ! yvmmak osh chim vlvpiesa hatuk oka :

22. Nan oklvha ka Aki vt svbbak a a fohkishke ; yohmi ka kvna hosh Ushi yoka hatak nana kia ik ithano ho, amba Iki vt ak illa hoke : mikmt kvna hosh Iki yoka kvna kia ik ithano ho, amba Ushi vt ak illa ; micha Ushi vt kvna ho im otvninchu mak bano hoke, achi tok.

23. Yohmi mt nan im ai ithvna vlvleha a hielu ka pit filema mt yvmmak ash bano ho, Nishkin vt hvchishno nana hvsh pisa ka pisa kvvba na yukpvshke.

24. Hopaii vlvleha, micha miko vlvleha aiena kvvba laua hosh

huchishno nana hvsh pihisa ka pisa bvna tuk osh, ik peso ki tok: micha hvchishno nana hvsh hahaklo ka haklo bvna tuk osh, ik haklo ki tok o, hvchim anoli lishke, achi tok.

25. Yohmi ma yakeh! nan-vlhpisa ithvnanchi achvfa hosh wakayvt hikia mvt, imomaka pisa bvnvt, Nan-ithvnanchi ma! ai okchayvt bilia ya pisa la hi okvto, nanta ho katiohmi la chi cho? achi tok.

26. Mihma yvmmak ash ot, Nan-vlhpisa holisso ha katiohmit a holisso ho? katiohmi ho ai ish it im anumpuli ho? im achi tok.

27. Mihma yvmmak ash ot afalaminchi mvt, Chi chukvsh mominchi hosh, chi shilombish ma mominchit, chim isht-hlampko a mominchit, mikmvt chim anukfila ma mominchi hosh Chitokaka chin Chihowa ya isht ish holitoblashke; mikmvt chin chuka panta hatak ma ish holitobli kv, chishno akinli chim itilauashke, im achi tok.

28. Mihma yvmmak ash ot, Ulhpesa, ish miha mvhlishke: ilvppak o ish yvmihchashke: yohmi hokmak osh chi okchaya hi oke, im achi tok.

29. Yohmi kia yvmmak ash ot il ai achukmali bvna kv, Chisvs ash, Yohmi ka kvta hak osh an chuka panta hatak o? im achi tok.

30. Mihma Chisvs ash ot afalaminchi mvt, Hatak achvft Chelusalem vttvt Cheliko ia tuk osh, hatak hukopa vhleha ont iba chukowa na i nafohka ya im apoyua cha, isskkopalit boyuhli na illa hosit itonla ho, issvt ilhkoli tok.

31. Atuk o yakohmi tok; na-holitompa isht vta yosh hina ymma minta he mak yoba tuk osh, yvmmak ash ant pisa mvt, apakfompvt hina in tnnvp o ant ia tok.

32. Mihma Lefait hatak ak kia yvmmak ash vlt ant pisa kia, yvmmak ash inli ho apakfompvt hina in tnnvp o ant ia tok.

33. Amba Samalitan hatak osh nowvt aya tuk osh, ymmvt ai itola kash, vlt pisa mvt, i nukhaklo tok.

34. Mihmvt ai-itola kash vla cha, ai okpunlo tuk a na-

bila, micha okapaki aiena ka isht ahvmmit, afohli in tahli cha, ilap im issuba hatuk ash o binilichit isht ayvt, a-foha chuka yo isht ona cha, apesvchi tok.

35. Atuk osh ont onna ma ia chi mvt, iskvli tuklo ka ishit kohchit, afoha chuka apesvchi yash ima mvt, Ilvppa ish apistikelashke: micha atampa kvv kaniohmi hosh chi kvnia tuk mak heno, falamvt aya likmvt, chim atobbi lashke; im achi tok.

36. Yvmohmi ka tuchina ilvppa katima kak osh hatak hukopa vhleha ont im isht kanvpa tuk a in chuka panta hatak a tok o, chim ahoba cho? achi tok.

37. Mihma yvmmak ash ot, I nukhaklo tok á, achi tok. Mihma Chisvs ash ot, Ia cha, chishno mvt yvmmak inli ho ish chohminchashke, im achi tok.

38. Atuk osh yakohmi tok; ia hosh okla itvnowvt aya ma, yvmmak ash ot tvmahushi achvfa ho pit chukowa tok: mihma ohoyo achvfa, Mahla hohchifo hosh, aiokpvchit im aboha ya isht chukowa tok.

39. Mihma yvmma itibapishi hvv Meli hohchifo hosh anta tuk osh, yvmmak ash kia Chisvs iyi ituma ya binilit, im anumpa ha haklo tok.

40. Amba Mahla vto nan-isht vttá in lauvt isht ik im ai vlvpieso mvt, yvmmak ash o im ai vlvv, Chitokaka ma! sa nakfish vt si apela hi a ik ahno ho, vno ak bano hosh nan-isht anta li ka, nan isht chik ahno cho? yohmi hoka nan isht ik svbai vttá, ish i mihashke, ant im achi tok.

41. Mihma Chisvs ash ot afalaminci mvt, Mahla ma! Mahla ma! nana ka ahalaivt im anukfila isht ik chim vlvpieso kvv chin lauvshke.

42. Yohmi kia nana ai vlvpiesa hokvto achvfa hoke; yohmi ka ai im ai isha he keyu nana achukma mih mak o Meli yokvto ai apissali tuk oke, im achi tok.

## CHAPTER XI.

Chisvs vt nan im ai ithvna vhleha ha vba pit anumpuli im avvchi, 1;  
14 nan-isht ahullo okpulo kohchichi: 28 mikmvt kvna hosh Chiho-



wa im anumpa ha im antia hokvto holitopa ka anoli; 37 Falisi okla nana ka ilahobi, yvmmak oka nana palvmmi onvtula he puta ka atokowa anoli.

1. ATUK o yakohmi tok: a kaniohmi ho antvt vba pit anumpuli tuk osh ont issa ma, nan im ai ithvna vhleha ha achvvt, Chitokaka ma! Chan vt nan im ai ithvna vhleha ha im avvchi tok a, chohmit pishno ma vba pit anumpuli ka, ish pim avvchashke, im achi tok.

2. Mihma yvmmak ash ot, Uba pit hvsh anumpulikmvt, Piki vba ish binili ma! Chi hohchifo hvt holitopashke. Ish apeshlichika yvt vlashke. Nana ish aiahni ka vba ya a yohmi kvv yakni ilvppak ma a yohmi makinlashke.

3. Nitak moma ilhpak vt a pim vlvpiesa mak o nitak osh nitak ma ish pihimashke.

4. Mikmvt il ai-ashvchika puta ka ish pi kashofashke: pishno mvt kvna kia aheka pin takalikma, il i kashofi bano hoke: micha anukpvlika imma hokvno ik iba chukowá, chik pim ahno kashke; amba nanokpulo ya ish pi a hlakofihinchashke, hvsh achashke, im achi tok.

5, 6. Mihmvt yvmmak ash ot, Hvsh katima kak osh chi kana hvt asha tuk osh, ninak iklvna ho avvt ish onvt, A kana hvt nowvt aya tuk osh vm vla ho, nana kia itikba ma talali la hi vt ik svm iksho hoka, pvska tuchina ka is sam potashke, a kana ma! ish im achi;

7. Yohmikma aboha anukaka ya auct ai afalaminchi kvv, Chik svm ahchibalo kia, himak ano okhissa vt vlvkama ho, vm vlla vt si apihvt topa ha kahvt maya ka, tani lish chima la he keyushke, auct chim achi;

8. Yohmi tuk kia i kana hatuk ak osh tani cha, ipeta he tuk keyu kia, amba yvmmak ash osh im ahchibvchi fehna kak o tani cha, laua kvv kaniohmi ho bvvnakma, ima hinla hoke, hvchim achi lishke.

9. Yohmi ka hvsh asilhhakma, hvch ima he: hvsh hoyokmvt, hvsh ahayucha he: hvsh sokohakma, hvchin tiwa hi oke.

10. Asilhha aiyuka hokvto habena hoke; mikma kvna

hosh hoyo hokvto, ahayuchi hoke: micha kvna hosh sokohakma, in tiwa pulla hi oke, hvchim achi lishke.

11. Hvsh kanima kvt iki atuk o, ushi vt pvska im asilhhakma, yvmmak ash tvli yo ima hinla? keyukmvt nuni yo asilhhakma, nuni a he tuk ash sinti yo ima hinla ho?

12. Yvmmak keyukmvt, akak-ushi lobunchi yo asilhhakma, halambia ho ima hinla ho?

13. Yvmohmi ka hvchishno vt hvchi ai vlhpesa keyu kia, hvchim vlla ya nana achukma puta ka isht ima hokvto hvchimponna ka, hvch Iki vba binili kvt i shaiyahlit, kvna hosh im asilhhakma, Shilombish Holitopa ya ima hinla keyu cho? im achi tok.

14. Mihma yvmmak ash ot ik anumpulo yo nan-isht ahullo okpulo ya a kohchit anta tok. Atuk o yakohmi tok: nan-isht ahullo okpulo vt a kohcha mvno, ik anumpulo ash ot anumpuli tok; mihma okla hv anukhlakancha tok.

15. Yohmi kia kanimi kvto, Ilvppvt nan-isht ahullo okpulo puta i miko Beelsebvb ak o nan-isht ahullo okpulo puta ka isht kocha weli hoke, achi tok.

16. Mihma inlaka mvto imomaka pisa kv, nan-isht-atokowa kv vba a minta hi a im a hoyo tok.

17. Yohmi kia yvmmak okvt nana im anukfila puta ka ithana hatuk osh, Apehlichika achufa kv it a kashapvt ilapo ash inli it im i sanali hokvt, ont aiokpulokvt taha hoke: mikma chuka yvt ita kashapvt ilapo ash inli it im i sanali hokvt, akvma hoke.

18. Setan ak kia ita kashapvt ilapo ash inlit il im i sanali hokmvt, im apehlichika yvt katiohmi hosh talaia hinla cho? vno vt Beelsebvb ak o nan-isht ahullo okpulo puta ka isht kocha weli li ho hvsh miha hoka,

19. Yohmi ka vno vt Beelsebvb ak o nan-isht ahullo okpulo puta ka isht kocha weli li hokma, hvch iso vhleha hvto kvta hak o yvma isht kocha weli cho? Yohmi hoka yvmmak osh na hvchim apesa yashke.

20. Amba vno vt Chihowa ibbak-ushi o nan isht ahullo

okpulo puta ka isht kocha wihinli li hokma, yohmi hokmuno, Chihowa apelihika yvt hvchim vla mak oke.

21. Hatak hlampko yosh na-halupa ai im vlhtaiyaha hosh in chuka apesvchi hokuno, nana kv̄t ai yubaka hoke.

22. Amba kv̄llo kv̄t ilapo a i shahli hosh ant i kohchvt, imaiyachi hokmak osh, i na-halupa ai anukhieto tuk ash mominchit im ai eshi cha, nana immi hatuk ash inla im it a kv̄shkoli chatuk oke.

23. Kv̄na hosh vno a sv̄b ai achvfa keyu kv̄t vm i sanali hoke: mikma kv̄na hosh sv̄ba hoyo keyu hokvto na fmmi yoke.

24. Shilombish okpulo yvt hatak a a kohchakmvt, a foha he hoyot haiaka oka ik ai iksho puta ka hlopullit aya kia ik ahayucho mvt, An chuka ai vttvt kohchvt a minti li kash osh falamvt ia lashke, achi hoke.

25. Atuk osh onakmvt, yvmmak ash ot pashpovt shemvt taiyaha cha hikia hq, ont pisa hoke.

26. Yohmikmvt shilombish okpulo untuklo inla yvt okpulo kv̄t ilapo a i shahli hq ont pehlichit vla na, yvmmak ash okla pit abeha cha, aiasha hoke; yohmikma hatak yvma nana kv̄t ont ai-isht im ai yopa kak osh ik achukmo kv̄t vmmona tuk ash i shahli hoke, im achi tok.

27. Atuk o yakohmi tok; ilvppa anumpohonli moma hq, ohoyo achvftv okla takla hikia tuk vt chitoli hosh mihvt, Ikfoka yvt yvmmak osh chisht aya tuk, mikma i pishi ma ish a pihishi tuk a aiena kv̄to holitopvshke, im achi tok.

28. Yohmi kia yvmmak ash ot, Ahli, na-yukpa aiahli kv̄to Chihowa im anumpa ha haklo cha, im antia hak oke, achi tok.

29. Atuk o okla hv̄t itahobvt ant a laua fehvt taha ma, Hatak himonasi asha ilvppvt ai vlhpesa keyushke; nan-isht atokowa okla hoyo; yohmi kia nan-isht atokowa nana hosh in takala he keyu, amba hopaii Chonas nan-isht im atokowa kak a hi oke.

30. Chonas vt Ninefeh okla ha isht ai im atokowa tok a, Hatak Ushi mvt hatak himonasi asha ilvppa ai in chiyuhmi makinla hi oke.



31. Nana vlhpisa chinto nitak okvno oka-mahli ohoyo miko vt hatak himonasi asha ilvppa awant hikia cha, atokowvt anumpa onocha hi oke; yummak okvto yakni ont ai vhli pilla vttvt minti kvv, Solomon isht im a hopoyuksaka ya haklot aya tok okvt; atuk o yakeh! Solomon a imaiya mak osh ilvppa ahantvshke.

32. Nana vlhpisa chinto nitak okvno Ninefeh okla hvv hatak vt himonasi asha ilvppa iba takla wakayvt hiohmayvt, atokowvt anumpa onocha hi oke; yummak okvto Chonas vt vbanumpa ont isht im anumpohonli ma, ile kostininchii tok okvt; atuk o yakeh! Chonas a imaiya mak osh ilvppa ahantvshke.

33. Hatak nana ak osh pva ha pvlali kvv a lumaka ho talali chatuk keyu, keyukmvt tanchi isht-vlhpisa nutaka yo talali chatuk keyu, amba kvna hoh kia ant chukowakmvt tohwikeli ka pisa chi ka, pva ai-o hikia ak o o hilechi chatuk.

34. Haknip a i pva hvv nishkin ak oke: yohmi hoka chi nishkin vt achukmakma, chi haknip ak kia momvt tohwikelit alota hoké; amba chi nishkin vt okpulo yokmvno, chi haknip ak kia ai okhlilikvt kvnia hoke.

35. Yohmi ka ahah! ish aiahni na na tohwikeli kvv a chi foyuka yummvt ik okhlilo kashke.

36. Yvmohmi ka chi haknip vt im a kanima kvv ai okhli-likaa iiksho hosh tohwikeli banot alotowa hokma, moma kvv tohwikelit alotowa kvv, pva lua achukma kvv chim a tohwikelichi chatuk a a-chiyuhma hinla hoke, achi tok.

37. Yvmohmit anumpohonli moma na Falisi achvvt, yummak ash ot ont ibai impa hinla ka im ahni tok: mihma ont chukowa cha, impa chi hosh binili tok.

38. Yohmi ma Falisi ash ot pisa mvt, ik impo kisha kvv ibbak ik ahchifo ke tuk a, okokko! aiahni tok.

39. Mihma Chitokaka ash osh, Falisi hvchia hvv isht-ishko micha ampo aiena ka paknaka yokvno hvsh kashofishke: amba hvchi anukaka yvto na wehpuli, micha nan ik ai vlhpeso banot isht hvchi alotovvshke.

40. Nan anukfila iksho hvchia ma! nana ka paknaka ya ikbi mvt, anukaka yak kia ikbi akinli tok keyu cho?

41. Amba yohmi kia nana hvchim asha kv̄t hvsh habenv-chashke: yohmikma yakeh! nana puta kv̄t a hvchim v̄lh-pesa bano hoke,

42. Amba Falisi hvchia ma! na hvchī palvmmi mak oke, m̄i n̄t, micha l̄u, mikmvt haiyukpolo ilaiyuka puta waya it a kashkoa ont isht pokoli kak osh hvchī kv̄nia, mikmvt nana ai-v̄lhpiesa ka, micha Chihowa holitobli aiena hokvno hvsh v̄banv̄bli hoka: ilvppak ǝ a hvchi yvmohmi ha yosh, anonti yvmmak ma hvch ik a haksecho-ka hetuk oke.

43. Falisi hvchia ma! na hvchī palvmmi mak oke, sinakak puta anukaka aiasha holitopa puta, mikmvt ilhpak a kanchi ai it aiokpv̄chi aiena kak ǝ hvchim ai achukma hoka.

44. Na-holissochi v̄hleha, micha Falisi okla aiena nan-ilahobi hvchia ma! na hvchī palvmmi mak oke; a-hollopi vt otani keyu h̄o, hatak vt a nowvt v̄banopoli kia, yvmmv̄t ik akostinincho chatuk ǝ hvch itilauī hoka, im achi tok.

45. Mihma nan-v̄lhpisa ithvnanchi v̄hleha hv̄t achv̄vt afalaminchit, Nan-ithvnanchi ma! ilvppa yak ish achi kv̄t pishno ǝ aieninchit nan isht chik pi ahobaloshke.

46. Mihma yvmmak ash ot, Nan-v̄lhpisa ithvnanchi hvchia ma! hvchishno ak kia na hvchī palvmmi mak oke; nana weki shali ka palvmma hinla h̄o hatak ǝ hvsh shalihinchi mv̄t, hvchishno yak okvto nana weki ash hvch ibbak ushi achv̄fona kia ishit hvch ik potolo hoka.

47. Na hvchī palvmmi mak oke: hopaii puta ka hvchin tikba v̄hleha hv̄t v̄bi tok ǝ ī sepulka ȳo hvsh ih̄ikbi hoka.

48. Hvchin tikba v̄hleha hv̄t yvmmak oka ahambi mv̄hli ma, hvchishno vt ī sepulka puta ma hvsh ih̄ikbi kv̄t, hvchin tikba v̄hleha hv̄t nana a kaniohmi tok ǝ hvsh im ahninchī kv̄t isht atokowa mak ǝ hvsh ieshi mv̄hlishke.

49. Yvmohmi ka Chihowa ī hopoyuksaka yak kia yak achi tok. Hopaii v̄hleha, micha v̄banumpeshi v̄hleha aiena ka pit in tihlihinli likma, k̄anima ka v̄bikmv̄t, anonti issikko-pali aiena he;

50. Yohmi na yakni v̄t toba tok taiyakla ka hopaii v̄hleha im issish vt hlatahampa tok moyuma ka, himonasi hatak ahashwa ilvppak ǝ im a hoyā hi oke.

51. Ebel a im issish a tok a ai vhlit mihintit Sakalaias alta micha tempelitin takla ai vbi tok issish ak o ant ai vhli yummak o himonasi hatak aiasha ilvppak o im a hoya he mak oke, aiahli mak o hvchi miha lishke.

52. Nan-vlhpisa ithvnanchi hvchia ma! na hvchi palvmmi mak oke; nan-ai-ithvna isht tiwa ya ishit hvsh kanchi hoka: hvchishno ak kia pit hvch ik chukowokmvt, inla yvt pit abeha he tuk a hvsh ataklahamishke, achi tok.

53. Ilvppa puta ka isht im ahanchi moma na na holissochi vhleha micha Falisi vhleha aiena kvt a tushpalechit, yummvt nana ilaiyuka miha he tuk, okla achibvchi ho fehna mvt,

54. Nana kia itakha a kohchvt miha na haklot nan-vlhpisa isht onocha he bvna hosh okla im aiechi tok.

## CHAPTER XII.

Chisvs vt nan-im ai ithvna vhleha ha nana ka peh ilahoba he imna hokvno ahah! okla alma chi ka i miha, 1; 13 yohmi mvt nan im ai ithvna vhleha hv chukvsh a nan ilaiyuka isht ik asitio ka chi ka, hatak nan in laua yosh nana ai isht ilaiyukvrt ahanta tuk o, nan illi hv ashalika a mokofit ishi tok, nan isht vlhpisa ha isht im anumpuli. 22 Chisvs vt nan im ai ithvna vhleha ha yakni paknaka nana a kaniohmi puta hokvno chukvsh isht ik anushkunno ka hi a i miha; 31 micha hatak shilombish okchaya he ak o na tikba anukfihinli; 36 yohmikmvt Chitokaka yvt aya hi a, tikbanli im vlhtaha he puta ka isht im anumpuli. 54 Chisvs vt okla ha, ilap ak osh Klaist mak atuk a ik akostinincho ka, nan isht i miha; yohmi mvt Chihowa ha iti nanaiya pulla hi a i miha.

1. YUMOHMI ai itin takla ma, okla laua kvt atampa fehna hosh itvnaha, yvmohmi cha ilap bika okla it i hvhlihinchi ma, yummak ash ot nan im ai ithvna vhleha hash, Falisi vhleha i pvska isht shatvmmi, yummvt nan-ilahobi yak oka, ik kaniohmi kia ahah! hvsh aiahnashke.

2. Nana kvt ompoholmo tuk vt ik wakamo ka he, mikma nana kvt luma tuk vt ik otaiyano ka he aiena kvt iksho ka hi oke.



3. Yvmohmi hoka nana hō aiokhlilika yā hvsh ai anum-pohonli tuk ma, a tohwikeli yō a hakla he; mikmvt hakso-bish ont tikelichit abohushi anukaka yō hvsh ai anumpohonli tok ma, aboha paknaka puta ma ai annoa hi oke.

4. Yohmi ka a kana hvchia ma! Haknip a vbi kia, him-makma nana hō a kaniohma he mvt ik im iksho yvmmak okvno hvch ik i nukshopo kashke, hvchim achi lishke.

5. Amba kvna hō hvsh i nukshopa he okvno hvchim anoli lashke; Illich i ha mvt, ai-okpuloka yā pit kancha hi vt im vlpiesa yvmmak o hvsh i nukshopashke; ahli, Yvmmak o hvsh i nukshohompashke, hvchim achi lishke.

6. Hushi chipunta tahlapi kv̄t sint tuchina hō ai vlbi chatuk keyu? Yohmi kv̄t yvmmak okvt achvfona kia Chihowa itikba yā ai a haksi keyu chatuk oke.

7. Yohmi ka hvchishno hvchi pashi puta noshkobo ai o hiel i kak kia moyumvt holhtinv̄t taha yoke. Yohmi hoka ik hvchi nukshopo kashke; holitopa kv̄t hushi chipunta laua ka hvsh i shahli hoke.

8. Kvna hosh vno a hatak itikba yā Klaist oke, si achit si ahninch i tuk ma, mihi yō Hatak Ushi vt Chihowa im enchil puta itikba ai ahninchit, Ūm antia yoke, achit aiokpr̄cha he akinli hoke.

9. Amba kvna hosh hatak puta itikba vno a ik si ahniechot, Ahalaia li keyu, achi tuk ak o, mihi yō Chihowa im enchil itikba ya ik ahniechot ik ahalaiyo ka hi oke.

10. Mikma kvna hosh Hatak Ushi a na mihachit anum-puli tuk okvto, i kashofa he; amba kvna hosh Shilombish Holitopa ak o ik ahobalot anum-puli tuk okvto, i kashofa he keyu kv̄mohmi hoke.

11. Micha sinakak puta, mikmvt miko vhleha, mikmvt nan apesa puta ka hvch isht im ai onakma, kaniohma hosh, micha afalaminchit nana ka hvsh anumpula he aiena kv̄t hvch ik anukfillo kashke.

12. Nana hō hvsh acha he vlpesa ka Shilombish Holitopa ak osh hvshi kanvli yvmmak fehna akinli ka hvchim anola hi oke, hvchim achi lishke, im achi tok.

13. Mihma okla hash ot achvfv̄t, Nan-ithv̄nanchi ma!

itibapishi li ha ish i miha na, nana kv̄t vlhtoshowvt pibbak a pi fohka tuk a a kashvblashke, im achi tok.

14. Mihma yvmmak ash o, Hatak chia ha, kv̄ta hosh nana hv̄chim apesa yokmá, keyukmvt nana hv̄chi itakvshkoli yokmá, nanta ho sakbi tok oh cho? im achi tok.

15. Mihmvt, Ahah! hv̄sh aiahni cha, nan in laua bvnna ya hv̄ch ik ahalaiyo kashke: hatak vt nana kv̄t laua ho il aieshi kak o im ilhfiopak vt takali ho keyu hoke, im achi tok.

16. Mihmvt okla hash nan-isht vlhpisa ho isht im anum-pulit, Hatak nan in laua achvfa hosh im osapa yvt nana waya fehna tok.

17. Mihmvt, Nana a waya puta ka kanima ai ashachi la hi vt ik sv̄m iksho kv̄to, nanta ak o katiohmi la chi cho? achit il anukfilli tok.

18. Mihmvt, Ilvppak o yakohmi lashke; an tanchi in chuka yak o yuhli lish, chito i shahli ho ikbi lashke: micha yvmmak o a nan a waya, micha na hochukma puta ka mominchit ashachi lashke.

19. Mikmvt sa shilombish a, Sa shilombish ma! na hochukma laua kv̄t afv̄m̄mi laua taha he vlhpesa ka achukmalit ashachit chin tahlishe; peh nan ik pilesot fohvt, impvt, nan-ishkot, nan isht ish ilaiyukpashke, im achi lashke, achi tok.

20. Yohmi kia Chihowa yokv̄to yvmmak ash, Ik hopoyukso chia ma! chi shilombish a falaminchit himak ninak a chim a hoya chi hoke; yohmikmv̄no nana ish atahli tuk amo kv̄ta ho immi ha chi cho? im achi tok.

21. Yohmi ka kv̄na hosh na hochukma puta ma ilap inli isht im atahlit ahanta hosh, anonti Chihowa ai imma hokv̄no nana kv̄t im vlhtaiyaha tuk keyu kv̄t yvmmak o chiyuhmi hoke, achi tok.

22. Mihmvt nan im ai ithv̄na v̄hleha hash, Yvmohmi hoka hv̄chi ai okchaya hi a nana ho hv̄sh pa he; mikmvt hv̄chi haknip ma nana ho hv̄sh fohka hi a anukfillit hv̄ch ik ilbv̄sho kashke, hv̄chim achi lishke.

23. Okchaya kv̄t holitopa kv̄t ilhpak a i shahlikma, anonti haknip vt holitopa kv̄t na fohka ya i shahli hoke.



24. Evla chito puta ka anukfillit ho pesá: yummak okvt nana kia hokchi cha vmo h<sub>o</sub> keyu: mikmvt yummak okvt vllhpoyak in chuka, micha kanchak aiena kia im asha keyu h<sub>o</sub>, Chihowa ak osh ipeta hoke. Holitopa kvto hushi puta ka katiohmit isht hvsh i shahli h<sub>o</sub>?

25. Yohmi ka hvsh katima kak osh anukfihinlit isht ilbvsha kv<sub>t</sub> hvchi chaha ka k u b i t achvfa kia hvsh il achakala hinla cho?

26. Nana kv<sub>t</sub> moma ik a lauwo hoka hvsh yvmihcha he keyu kv<sub>t</sub>, nanta katiohmi h<sub>o</sub> inla yokak heno anukfillit hvsh pisa cho?

27. Lilli puta kv<sub>t</sub> kaniohmit offot hofantit mahaya ka anukfillit ho pesá; yummak okvt toksvlit a hoyubli keyu: anonti nana h<sub>o</sub> shvnni keyushke: yohmi kia Solomon vt nan isht im a holitopa moma isht a shema kv<sub>t</sub> ilvppa achv-fona kia chohmi tok keyu, hvchim achi lishke.

28. Yohmi ka Chihowa hv<sub>t</sub> hvshuk himak nitak a kowi h<sub>a</sub> hiohmaya tuk osh, onna h<sub>a</sub> apalvska pit vllhpita chi kia, shemvchi kv<sub>t</sub> yvmihchi kvto, hvchishno a i shahlichu hosh ik hvchi shemacho ka hinla cho? na yimmi fehna keyu hvchia ma!

29. Yohmi hoka nana hvsh impa he, mikmvt nana hvsh ishka he aiena kv<sub>t</sub> hvch ik hoyo kashke; mikmvt komuntvt ik hvchim anukfilo kashke.

30. Ilvppa chohmi puta kak o oklushi yakni paknaka aiasha kv<sub>t</sub> hoyo chatuk mak oke: ilvppa chohmi puta ka a hvchi bvna hokvno hvch Iki vt ithana hoke.

31. Yohmi kia amba Chihowa apelihika yak o hvsh hoyashke; mikmvno ilvppa moyuma kv<sub>t</sub> a hvchim ibakaha hi oke.

32. Apehlichika ya hvch ima kv<sub>t</sub> im achukma hoka, chukvllhpoba aya ik lauwo hvchia mv<sub>t</sub>, ik hvchi nukshopo kashke.

33. Na hvchim asha kv<sub>t</sub> hvsh kanchi cha, ilbvsha ya hvsh habenvchashke: tvli holisso i shukcha yummak okvt nitak nana ont a sipokna he keyu, na-holitompa nitak nana taiyaha he keyu vt vba itonla; hukopa nana hosh ai i bilin-



cha he keyu, mikma shushi mvt okpna he keyu, yak o isht hvsh il atahlashke.

34. Kanima yo hvchim ilayak vt itonla hokma, hvchi chukvsh ak kia mihi yo pit takanla hinla akinli hoka.

35. Il ai-vskufvchi ma isht il ai vskufvchit im vlhtahvt, pvla puta mvt hvchin lihimbashke.

36. Yohmikmvt hvchishno ak kia hatak osh i shahli hvt ohoyo ipetvchi ia tuk osh falamvt vla chi, atuk osh vla cha sokohakma, ashalika in tiwa chi cha, pit hoyo hosh aiasha ho hvsh chiyuhmashke.

37. Chitokaka yvt ayvt vlt, okchvt asha na ont pisa ka, tishu vhleha yvmmt na-yukpa mak oke: ahli mak o hvchim achi lishke, Ilap ash osh nan isht il ai vskufvchit tahli cha, yvmmak osh impa chi ka binohlichikmvt, wakayvt nan isht im vtta hi oke.

38. Micha ninak kashapa ont atukla ho ayakma, keyukmvt ont atuchina ho ayakma, nana cha yvmohmit aiasha ho ont pisa ka, tishu vhleha yvmmt nayukpa hi oke.

39. Hatak chuka chvfa pehlich i vt in chuka ahanta kv t hvshi kanvlli vlhpisa kaniohmi kak o hukopa yvt vla hi a akostininchi hokmvt, atoni tuk osh in chuka yvt okpulot ik in tiwo ka hetuk a, ilvppa hvsh ithaiyanashke.

40. Yohmi hoka hvchishno mvt, hvchim vlhtahashke: yvmmak a he hvch ik aiahno hvshi kanvlli vlhpisa takla kia Hatak Ushi vt vla hi oke.

41. Mihma Pita yash ot, Chitokaka ma! nan-isht-vlhpisa ilvppa pishno ak okma, keyukmvt peh moma kak o isht ish im anumpulikma, nanta cho? im achi tok.

42. Mihma, Yohmi kvno kvta hak osh nan-apesvchi aiahli, mikmvt hopoyuksa achukma aiena tuk o, mihi yo i shahli hvt ont ai-vlhpiesakma nan-vpa hvt ai immi ha he vlhpesa ka, ipihinta chi ka, ilap in chuka chvfa yash pehlich i ikba chi cho?

43. I shahli hvt ayvt vla kv t, yakohmi hosh ahanta na ant pisa ka, tishu yvmmt na yukpa mak oke.

44. Ahli mak o hvchim achi lishke: Nana im asha ka moma apesvchi o ikba hi oke.

45. Yohmi tuk kia tishu yvmmak ash osh chukvsh anuk-aka, A shahli hvt ai vla he tuk vt vbanvblichishke, achi cha, hatak toksvli puta, micha ohoyo toksvli puta aiena kash bolit, impvt, nan-ishkot, okishkot haksi aiena hosh ahanta tok mvno ;

46. Tishu yvmma i shahli hash ot ilapvt yvmma pit hoyo nitak keyu, micha ik akostinincho ai itin takla hvshi kanvlli vlhpisa fehna ho ayvt vla cha, chanlit ita hokofit, nan ik yimmo vhleha yak o ai iba foyuka chi ka im apesa hi oke.

47. Yohmikma i shahli nan ahni tuk a akostininchi hosh, ik il atahlokmvt, nan-ahni tuk ash kia yvmihchi keyu ke tuk tishu yvmmak ash ot fahama lawa isht boa hi oke.

48. Amba ik akostinincho hosh nana ka isht a fuma he vlhpesa ka yvmohmi hokmvto, fahama ik lauwo ho isht fuma hi oke : kvna ho lauachit ima tok ma, mihi yo laua ho im a hoya hi oke : micha kanima ho hatak vt lauachit ibbak fohki tuk ma, mihi yo laua i shahli ho im a hoya hi oke.

49. Yakni paknaka ya luak o ai yo bohyuli la chi hosh aya li tok : atuk osh himonasi ak o lua hatuk bano, nana ka ai ahni lishke.

50. Yohmi kia baptismo isht a baptismo la chi kvv vm asha : yohmi ka yvmvvt ont ai yvmohma chi takla hokvno a palvmmi fehnvshke.

51. Yakni paknaka ya a nanaiyvcha chi hosh aya li tok o, hvchim ahoba cho ? Keyushke ; ita kvshkoli. kak illa hoke, hvchim achi lishke.

52. Himak pilla ma chuka chvfa ka tahlapit ashvt it a kashapa cha, tuchina kvv tuklo ka i sanalikma, anonti tuklo kvv tuchina ka i sanala hi oke.

53. It i kanimachi cha, iki vt ushi a i sanalikma, anonti ushi atuk vt iki a i sanalikma ; ishki vt ushetik a i sanalikma, anonti ushetik atuk vt ishki a i sanalikma, anonti ipokni vt ipok a i sanalikma, ipok atuk vt ipokni a i sanala hi oke, achi tok.

54. Mihmvvt anonti okla hash, Hvshi ai-okvtulaka hoshon-tit kocha na hvsh pisakmvvt, ashalika, Umbvt mihintishke, hvsh achi chatuk ; atukma yohmi mvhli chatuk.

55. Micha oka-mahli hosh mahlikma, Lvshpa chishke, hvsh achi chatuk; atuk ma ont yvmohmi chatuk oke.

56. Nan ilahobi hvchia hoka, shutik, micha yakni aiena kvt pisa kaniohmi hokvno nan isht hvsh ai akostininechi hokak osh, amba katiohmi hō himak okvno nana ka hvch ik akostininecho cho?

57. Ahli, micha nanta katiohmi hō hvchishno akinli kvt nana vlhpesa kvno hvch ik ithano cho?

58. Nan-vlhpisa chi onochi ya awant miko ish im ona chi hosh ish aya kvt, takla ya, ai i hlakofi bvna kvt ish achunanchashke: yvmmak keyukma chi halvllit nan-apesa ya isht chi ai onakma, anonti nan apesa yash ot tishu ha ibbak a a chi fohki na tishu hash ot aboha kvlo ya chi fohka hinla hoke.

59. Iskvli ont isht aiyopi fehna ka ish atobbi hō keyukmvt, yvmmak oka ish kohcha he keyu hoke, chim achi lishke, achi tok.

### CHAPTER XIII.

Chisvs vt ile kostininehit il aiasha he ak o pi miha, 1. 6 Fik vpi vna he keyu nan isht-vlhpisa. 10 Nitak hullo yo Chisvs vt nan ithv-nanchit ahanta hosh ohoyo iksitopo ilbvsha ya hlakofichi; 15 micha vba yakni apehlichika ya mvstvt nihi, micha pvska isht shatvmmichi aiena kak o isht it apesa; 24 okhissa iskvtnosi yvma chukowa bvna kvt achunancha hi a, okla ha i miha. 31 Chisvs a Helot vt vbi bvna hatuk o, kohchvt kvnia hinla ka, okla im ahni ma, nana hō im achi; anonti Chelusalem vt ont aiokpulokvt taha chi ka, itukonofvt mihinti ka, Chisvs vt tikbanli anoli mvt, isht yahaya.

1. YUMMA fehna ma kanimi kvt yvma asha tuk vt, Pailat vt Kalili hatak issish a okla vba pit isht aiokpvchi a ai itaiomi tuk a, im anoli tok.

2. Mihma Chisvs ash ot afalaminchi mvt, Kalili hatak osh yakohmi hokvt nan-ashvchi kvt Kalili okla ha moma i shahli atuk osh na yakohmi ka isht ai ilbvsha tuk o, hvchim ahoba cho?



3. Keyushke; amba hvchishno ak kia hvsh ile kostininchi keyukmvt, hvsh moma kv̄t ilbvshvt hvch illi akinla chī ka, hvchim anoli lishke.

4. Yummak keyukmvt Siloam a chuka chaha hikia tuk vt auah untuchina ka o kinafv̄t vbi tok a, yummak osh nan ashvchi kv̄t hatak Chelusalem asha moma ka i shahli ha tok a, hvchim ahoba cho?

5. Keyushke; amba hvchishno ak kia hvsh ile kostininchi keyukmvt, hvsh moma kv̄t ilbvshvt hvch illi akinla chī ka, hvchim anoli lishke.

6. Nan-isht-vlhpisa ilvppakma isht anumpuli tok: Hatak achvfa hosh f i k vpi vt osapushi anukaka ya im a hollokchi tuk osh ona cha, vni a a hoyo tuk osh, ik ahayucho ki tok.

7. Mihmvt im osapushi apoksiachi ash o, Inta! ilvppvt afvmmi atuchina mak o f i k vpi ilvppa vni a hoyo kv̄t aya li hosh ak ahayucho bekvshke: chanlit akvchī; nanta katiohmi hō hikivt yakni a ai okpv̄ninchī cho? im achi tok.

8. Mihma yummak ash ot afalaminchi mvt, Chitokakama! himak afvmmi achvfa takla hokvno ant hikia na, kullit apakfoplit, yakni achukmali ya isht apolichit tahli li hayashke.

9. Yohmi na vnit waya hokmvno, vlhpesa: amba keyukmvno, yvmma misha pilla mak o chanlit ish akvchashke, im achi tok.

10. Mihmvt nitak hullo yō yummak ash ot nan ithvnan-chi hosh sinakak achvfona ka anta tok.

11. Mihma ohoyo hv̄t shilombish okpulo nan iksitopochi yvt ai i foka tuk a afvmmi auah untuchina hosh, kochofv̄t kvnia, kaniohmit il apissalecha he keyu kv̄mohmi hosh anta tok:

12. Atuk o Chisvs vt yummak ash pisa mvt, pit i howa cha, Ohoyo chia ma! nan ik chi ai iksitopo ka ish ai i mokofa mak oke, im achi tok.

13. Mihmvt yummak ash o ibbak a ita tuklonchit isht umbitepa tok: mihma yummak ash ot mihmakinli hō apissvt taha mvt, Chihowa hā holitoblichī tok.

14. Mihma sinakak a apesvchi ash ot, Chisvs vt nitak

hullo yō hlakofichi ka im okpulo fehna hatuk osh, okla hash, Nitak hannali kak o hatak vt a toksula he vlhpesa kvt ashvshke: yohmi ka nitak hullo ak a he tuk keyu; yohmi hoka yvmma ai itintakla kak o ai vlt hvchi hlakofashke, im achi tok.

15. Yohmi ma Chitokaka yash ot afalaminchi mvt, yvm-mak ash, Peh nana ilahobi chia hoke: hvsh moma kvt nitak hullo a chi wak toksuli okmá, keyukmvt chim issuba hakso-bish falaia okmá, nana kvt ai ilhpitta ya talakehit hikia tuk a i hotofi cha, havllit oka ipetvt ish ia chatuk keyu?

16. Yohmi ka ohoyo ilvppvt Eblaham ushetik atuk o, Setan vt takehit ishi tok a, ilvppvt afvmmi auahuntuchina hatuk a, nitak hullo ya isht talakchi tuk vt ai i holhtofa he vlhpesa keyu cho? im achi tok.

17. Mihma ilvppa yvmmak achi ma, i sanali vhleha hash ot momvt hofahya tok; mihma nan isht a chinto a puta ka yvmihinchí ka okla hvt momvt na yukpa tok.

18. Mihma yvmmak ash ot, Chihowa apehlichika yvt nanta hak o hoyulba? yohmi ka nanta hak o isht it apesa la chi cho?

19. Mvstvt nihi achvfa hō hatak vt ishi cha, im osapushi a pit a pila tok o, offot hofantit mahayvt, iti chito tovt hikia tok: yohmi na vba hushi puta kvt naksish puta ka ant ai o binohonli tok mak o chiyuhmi hoke, achi tok.

20. Mihmvt anonti Chihowa apehlichika ya nanta hak o isht it apesa la chi cho?

21. Pvska shatvmmichi yō ohoyo hvt ishi cha, tanchi pushi isht vlhpisa tuchina hō a yvmvslíchi tuk o, momvt shatvmmít taiyaha tuk mak o holba hoke, achi tok.

22. Mihmvt tmaha puta, micha tmahushi aiena ka hlo-pullit avt nan ithvnanchit, Chelusalem imma ia hosh aya tok.

23. Mihma achvft, Chitokaka ma! Achafoa kak illa hosh okchaya hi oh cho? im achi tok.

24. Mihma yvmmak ash ot, Yichina fehnvt okhissa iskitini a chukowa hvchi bvnashke; chukowa bvnvt pisa kia, nan ik kanihmo ka chi kvt laua hoke, hvchim achi lishke.

25. Chuka chvfa pehlichí yvt kaniohmi hō wakayvt, okhissa ya okhishta ha ma, kocha ya hvsh hiohmayvt, okhissa ya sokohvt, Chitokaka ma! Chítokaka ma! ish pin tiwashke hvsh achi kia, yvmmak ash ot afalaminchit, Yvmmak o minti, ahnit hvch ithana li keyu kv̄t, hvchim acha hi oke.

26. Yvmma fokakma hvchishno ash ot, Chi tikba ya ai im̄pvt, nan ishkot il aiasha chatuk: yohmi ma chishno vt pin tmaha itin takla ya nana ish ai ithvnanchi tok mak oke, hvsh acha he.

27. Yohmi kiā yvmmak ash ot, Yvmmak o minti, ahnit hvch ithana li keyu hoka, nan ai v̄lhpesa keyu puta ka a yohmi hvchia hv̄t, momvt hv̄s s̄a filvmmashke, hvchim achi lishke, acha hi oke.

28. Yohmikma hvchishno yokvno kocha hvchi kanchi na, Eblaham, micha Aisaak, mikmvt Chekob, micha hopaii puta ka a moyuma hokvto Chihowa apehlichika ya auet aiasha na hvsh pisa he, yvmma fokak mak osh yahayvt noti a v̄pvt hvsh aiasha hi oke.

29. Mikma hvshi akochaka imma, micha hvshi ai okv-tula ka, mikmvt falvmmi, micha oka mahli aiena ka a mi-hintit Chihowa apehlichika im ai-imp̄a ya ai a binohla hi oke.

30. Mikma yakeh! ishtaiyopi tuk vt mihi yosh na tikba hi oke, mikma na tikba tuk vt mihi yosh ishtaiyopa hi oke.

31. Mih-nitak fehna akinli ka Falisi kaniohmi kv̄t ai v̄la cha, Ilvppa a kohchvt kanima ish iashke; Helot vt chiba he ahna hinla hoka, achi tok.

32. Mihma yvmmak ash o, Oh ia cha, chula yvmma ont oh im anoli; Himak nitak, micha onna ha aiena kvno nan-isht ahullo okpulo puta kocha weli, micha haknip ik in chukmo puta ka hlakofichi aienvt ahanta li tuk osh, nitak ont atuchinakma, nana ka aiahlit ont vm ataiyaha hok mak a hi oke.

33. Yohmi kia himak nitak, micha onna ha, anonti nitak ont atuchina kvno, nowa li pullashke; hopaii atuk vt Chelusalēm keyu ka ai illa he keyu hoka.

34. Chelusalēm, Chelusalēm hopaii v̄hleha v̄bi, micha auet



chin tihleli tuk a tvli ishit boli chia ma! akaka yosh ushi vhleha ha sanahchi nuta ya pit ai itahobi chatuk mak o, chiyuhmit chim vlla vhleha ha itahohombi la he, aiahni li tuk nana kia, hvchishno ak osh vllpesa hvch ik aiahno hokvno,

35. Yakeh! hvchin chuka yvt hvchin chuk-illissvt taiyaha mak oke. Yohmi hoka aiahli mak o hvchi miha lishke; Chitokaka i hohchifo mak o aya kv holitopvshke, hvsh acha chi ka, ont ai vllpiesa, keyukma, hvch ik sa peso ka chi hoke, im achi tok oke.

## CHAPTER XIV.

Chisvs vt, nitak hullo nitak o hatak nipi shofohli isht abeka ya hlakofichi, 1: 7 hatak im anukfila kvllo vhleha hv im anukfila ha akanlosecha hi a, micha nan in laua vhleha hv ilbvsha ya i kana he aiena ka im avvchi. 15 Opiaka impa chito asha tok isht vllpisa. 25 Chisvs a nan im ai ithvna e toba chi hokmvt, yvmmak o e holitobli hatuk mak osh pishno vt ile kaiyanchit, nana fehna hatuk kia il issa hinla hatuk puta ka, yvmmak okvt nan isht vllpisa ilaiyuka ho isht a pim avvchi.

1. ATUK o yakohmi tok; nitak hullo yo impa chi Falisi miko vhleha achvfa ka in chuka yo pit chukowa ma, okla apesvchi tok.

2. Yohmi ma hatak achvfa kv haknip oka atoba ililli ho isht abeka kv itikba ya asha tok.

3. Mihma Chisvs ash ot na mihvt, nan-vllpisa ithvnanchi vhleha, Falisi okla aiena kash im anumpulit, Nitak hullo ya na hlakoficha he ai vllpiesa hoh cho? achi tok.

4. Mihma nan ik achot maya tok. Mihma yvmmak ash ishi cha, hlakofichi mvt, kanima ia chi ka, im ahni tok.

5. Mihmvt okla hash im anumpulit, Hvsh katima kak osh hvchim issuba haksobish falaia okma, keyukmvt wak toksvli okma, nana kv yakni chiluk hofobi o pit itula ka, ashalika nitak hullo nitak a hakvllit hvch ik kohcho ka hinla cho? achi tok.

6. Yohmi ma anonti ilvppa puta ka okla ai isht im afalamincha he keyu ki tok.

7. Mihma im annoa tuk vñleha hvt aiasha holitompa kak o hoyot a binohli na pisa mvt, nan-isht vñhpisa ha takalichit,

8. Ohoyo ipetvchi ish aya hi a, kvna hosh chim anoli tuk ma, aiasha holitopa i shahli ka chik binilo kashke; hatak holitopa kv chishno a chi shahli kia yvmmak ash ot im anoli tuk a hinla hoke.

9. Atuk o chim anoli tuk, anonti yvmma im anoli tuk yvmmak ash ot ita tuklot vla cha, Hatak ilvppak osh ik aiashá, chim achikma, chi hofahyvt aiasha ik a lauwo kak o ish a binila hinla hoke.

10. Amba chim annoakmvt ivt, aiasha ik a lauwo kak o ish a binili tuk o, na chim anoli tuk ash ot vlakmvt, A kana hvt chaha i shahli kak o pit oiyá, chim acha hinla hoke: yohmikma chibai imptv maya yvmma ish ai i holitopa he mak oke.

11. Kvna hosh ilefehnvchi hokvto aka ona he; anonti kvna hosh ik ile fehnacho hokvto holitopa hi oke.

12. Yohmi mvt ilapa hoyo tuk ash kia, Tvbokoli impa yokmá, keyukmvt opiaka impa yokmá, nana ho ish ikbi kv, chi kana vñleha, micha ish itibapishi vñleha, mikmvt chi kanomi vñleha, chin chuka panta hatak nan in laua puta kia chik hoyo kashke; yvmmak keyukma, ilapo mvt chishno a chi hoyo hinla hoke: yohmikma nana ho, ish yvmihchi tuk a ai itilavit chim vñhtoba hi oke.

13. Amba impa chito ish ikbikmvt, ilbvsha, imomokpulo, kinafa, lvpa aiena kak o ish hoyashke.

14. Yohmikmak osh na chi yukpa hi oke: yvmmak okvto chishno ma afalaminchit ai itilauechit-chi yvmihcha he keyu hoka: hatak vñhpesa illi puta kv tanik mak o yvmmak atuk a falamvt pit ai itilavit chim vñhtoba hi oke, im achi tok.

15. Mihma ai ibai imptv maya tuk ash o achvvt ilvppa puta ka haklo mvt, Chihowa apehlichika ya pvaska ai vpa kak osh mihi hosh na yukpa hi oke, im achi tok.

16. Mihma yvmmak ash o, Hatak achvfa hosh opiaka impa chito fehna ka ikbi cha, lavt aya chi ka, im anoli tok.

17. Atuk ash opiaka impa ont ai vñhpesa ma, im annoa

tuk vhleha hash, Himak ano nana moma kv̄t vlhtahvshke, ho minti, im acha ch̄i hō, in tishu h̄a chvffichi tok.

18. Mihma moyumvt im anukfila achvfa ohmit taha mvt, okla nan isht ile mihachit isht ia tok. Ummona kv̄t, Osapa iskitini yō chumpa li tuk osh, yv̄mma pisvt ia la he vlhpesa hoke; vno yokvno ik ayo mak kia ba is sv̄m ahna hi a chim asilhha lishke, im achi tok.

19. Mihma inla mvt, Ūno vt wak toksvli y o k tahlapi hō, chumpa li tuk osh, ivt kaniohmi hatuk okma pisa la ch̄i hatuk oka, vno yokvno ik ayo mak kia ba is sv̄m ahna hi a chim asilhha lishke, achi tok.

20. Mihma anonti inla hosh, Ūno vt ohoyo itauwaya li; yohmi hatuk osh aya la he keyushke, achi tok.

21. Yvmohmi ma tishu yv̄mmak ash ot vla cha, i shahli h̄a ilvppa puta kash ant im anoli tok. Mihma chuka yv̄mma pehlich̄i ash ot im okpulo mvt, in tishu hash, Tushpvt kohchvt ivt tmaha itin takla hina hochito, chipunta aiena ka ayvt, ilbvsha, micha imomokpulo, mikmvt kinafa, micha lvp̄a aiena ka pehlichit ilvppa isht ish lashke, im achi tok.

22. Atuk o tishu hashot, Chitokaka ma! chishno nana ish ai apesa tuk ano, ont aiahlit taha akinli kia, aiasha vt asha momvshke, achi tok.

23. Mihma i shahli ash ot tishu hash, Kohchvt ivt, haia-ka hina bvshkv̄chi, mikmvt kv̄ti holihta anukaka aiena puta ka ayvt, ilvppa vla ch̄i ka, ish atushpalechi na an chuka vt alota mak inlashke,

24. Im annoa tuk vhleha hatuk yv̄mmak amo achvfa kia v̄m opiaka impa ya iskitinosi kia ai vpa he keyu mak oke, hv̄chim achi lishke, im achi tok, im achi tok oke.

25. Atuk o okla lava fehna hosh apehvt aya ma, yv̄mmak ash ot filema cha;

26. Kv̄na hosh ayvt v̄m vla kv̄t, iki, micha ishki, mikmvt tekchi, mikmvt im vlla, anonti ilap itibapishi, mikmvt in tek vhleha aiena, mikmvt im ilhfiopak akinli aiena kak kia, i nukkilli keyu hokvto, nan v̄m ai ithvna a he keyushke.



27. Micha kvna hosh im iti-taiyukhona ya shoyuli cha, siakaiya keyu hokvto, nan vm ai ithvna a he keyushke.

28. Hvsh katima kak osh chuka chaha ikba he ahni kv, vmmona ka aka binilit, Tahli la hinlakmá, nanta cho? ahnit. ai-vlhtoba he ma hotinvt ik peso ka hinla cho?

29. Yvmmak atuk keyukmvt nutaka in tola ya bohli ha yosh, anonti atahla he keyukma, yvmmak atuk ash pisa kv momvt isht itukhlakavt,

30. Hatak ilvppvt itvbvnnit isht ia tuk ak osh, atahla he keyu ke tuk, acha hinla hoke.

31. Yvmmak keyukmvt miko nanta ak osh miko inla yo it in tanampa chi kv, vmmona ka aka binilit, ilavt tahlepa sipokni pokoli ishi kv, tahlepa sipokni pokoli tuklo pehlich hosh i kohcha ka, amokvfa he vlhpesakmá, nana kv anukfillit ik peso ka hinla cho?

32. Yvmmak keyukmvt, achvfa yash ot hopaki pilla auet takanli moma kak inli ho itin nanaiya ka ahnit, anumpa shali a pit chvfficha hinla hoke.

33. Yohmi ka yvmmak o chiyuhmit, hvchishno vt hvsh moma kv nana ho hvchim asha tuk vt mominchit hvsh issa keyukmvt, nan vm ai ithvna hvchia ha he keyu hoke.

34. Hvpi vt achukma hoke: yohmi kia hvpi hash ot homi tuk vt i kvniakmvt, katiohmi kak osh anonti homa hinla cho?

35. Yvmmvt yakni, micha nan i yvlhki yakni isht achukmvi aiena kak kia isht ai im vlhpesa he keyu; amba hatak vt kocha pit kanchi chatuk oke. Kvna hosh isht haponakla he haksobish vt i hinlikmvt, haklashke, im achi tok.

## CHAPTA XV.

Chukvlpoba kvnia nan isht vlhpisa, 1; 8 mikmvt tvi hvta tushafa kvnia nan-isht-vlhpisa aiena. 11 Hatak himita ik hoyoyukso nan isht vlhpisa.

1. YUMMA foka ma pvblikan vhleha, micha nan-ashvchi okla aiena kv i haponakla chi kv, momvt auet a kanvlli tok.

2. Yohmi ma Falisi vhleha hvt micha na-holissochi vhleha aiena kash ot lumasit na-mihachit, Hatak ilvppvt nan-ashvchi vhleha hvt ilapa ai ibafohka chi ka ahninchit, it ibai impa yoke, achi tok.

3. Mihma yvmmak ash ot nan-isht-vlhpisa ilvppa isht im anumpuli mvt,

4. Hatak hvsh katima kak osh chukfulhpoba tahlepa achvft im asha tuk osh, achvft i kvnia hokmvt, pokoli chakkali a kocha chakkali kash ot yakni haiaka ya maya na issvt, kvnia tuk yvmmak ash o hoyot hikikvt ahayuchik mak a hinla keyu?

5. Atuk osh ahayuchikmvt, na yukvt isht iabvnali;

6. Atuk osh in chuka yash vla mvt, i kana vhleha, micha in chuka panta hatak puta ka hoyot itahobi cha, An chukfulhpoba yvt kvnia tuk ash ahayuchi li hoka, na hvs svbai yukpashke, im achi hoke.

7. Yohmi ka yvmmak inli ho chohmit, Nan-ashvchi achvfa hosh ile kostininchikma, vba ya na yukpa asha kv hatak vlhpesa pokoli chakkali akocha chakkali kv nan ile kostinichi yvt ai im ahalaiya he keyu, yvmmak oka i shahla hi oke, hvchim achi lishke.

8. Yvmmak keyukmvt ohoyo nanta hak osh tvli hvta tushahli pokoli kv im asha tuk osh, tushafa achvft i kvniakmvt, pvla ha pvlali cha, aboha ya bvshpolit achukmalit hoyot hikikvt ahayuchik mak ahinla keyu?

9. Atuk osh ahayuchikmvt, i kana puta, micha in chuka panta asha tuk aiena kash hoyot itahobi cha, Tvli hvta tushafa a kvnia tuk ash ot ahayuchi li hoka, na hvs svb ai yukpashke, achi hoke.

10. Yohmi ka nan-ashvchi achvft ile kostininchikma, Chihowa im enchil vhleha aiasha ka na yukpa kv yvma akinli ho chiyuhmi chatuk oke, hvchim achi lishke, achi tok.

11. Mihmvt, Hatak achvfa hosh ushi vt in tuklo tok.

12. Atuk o nakfish ash ot iki a, Aki ma! nana kv <sup>mmi</sup> vmmi ha he tuk ash is svmashe, im achi tok. Mihma nan isht ai okchaya yash o im it a kashvli tok.

13. Mihma yummak atuk a nitak kanohmi keyu ho, ushi nakfish ash osh mominchit itahobit taiyahli cha, ivt yakni hopaki fehna ho ona cha, nan isht aya tuk puta kash yummak o isht a yopomot ahantvt kampilvt taiyahli tok.

14. Yohmit mominchit kampilvt tahli ma, yakni yumma hohchvfo chinto fehna kv̄t a kohcha tok; mihma yummak ash ot nana kv̄t ik im iksho kit isht ia tok.

15. Mihmvt yakni yumma hatak ont iba fohka tok; atuk o yummak osh shukha laua ipeta beka chi ka im osapa puta ka pit chvffichi tok.

16. Atuk o yummak ash ot shukha laua yvt nanvni ai vpa beka tok yummak o vpv̄t kaiya bv̄nna beka tok: yohmi kia kv̄na kia yumma ik ipeto beka tok.

17. Atuk o yummak ash ot ont il akostininchi mvt, Aki im ilhtohno vhleha hv̄t laua kv̄t katiohmi hosh pvska yvt laua kv̄t im v̄lhpesakma, anonti atampa mvt asha chatuk ak o, vno ilvppa a hohchv̄fot sv̄lli cho?

18. Wakayvt ivt, aki im ona lish, Aki ma! Chihowa im ashv̄chit, mikmvt chi tikba ya a sai yoshuba tuk.

19. Yohmi kv̄t himak a pilla ma, chiso sa hohchifa he si ahoba keyushke; chim ilhtohno vhleha achv̄fa kak o is si ai itilauechashke, im achi lashke, achi tok.

20. Mihmvt wakaya cha, iki a im ia tok; atuk osh auct hopaki pilla minti kak inli ho, iki ash osh pit pisa mvt, i nukhaklo cha, chv̄fvt ivt, yummak ash ikunla ont vb̄naiyvt i suksowa tok.

21. Mihma ushi ash ot, Aki ma! Chihowa im ashv̄chit, mikmvt chi tikba ya a sai yoshohumba tuk; yohmi kv̄t himak a pilla ma chiso sa hohchifa he si ahoba keyushke, im achi tok.

22. Yohmi kia iki ash ot im ilhtohno vhleha hash, Nafohka holitopa moma i shahli kak o ishit kohchit ant ho fohkv̄chi cha, ibbak ma ibbak-ushi-fohka ant fohkit, iyi ma shulush hv̄sh holochashke;

23. Micha wak ushi ilhpitvt nia ya ilvppa isht v̄lv̄t, oh vbi na impvt na-yukpv̄t kiloh aiashá;

24. Sv̄so ilvppvt illi tuk osh, falamvt okchaya hoke;



knia tuk osh haiaka hoke. Mihma na yukpvt okla aiasha tok.

25. Yohmi ka ushi akni hvto osapa anta tok: atuk osh minti cha, chuka yash bilikasi vla mvt, vhlepa ola, micha hihla aiena ka pit haklo tok.

26. Mihmvt ilhtohno vhleha hash achvfalit pit i howa cha, Katiohmi hosh yakohmi cho? achit i ponaklo tok.

27. Mihma yvmmak ash ot, Chi nakfish ak osh vla hosh achukmakvt ayvt vla ho, chiki vt pisa kak osh wakushi ilhpitvt nia ya vbi hatuk oke, im achi tok.

28. Mihma yvmmak ash ot hvshaya cha, ont chukowa ik bnno ki tok: yohmi hatuk o iki ash ot kohehvt ivt, ont i howa tok.

29. Mihma afalaminchi mvt, iki ash o, Inta! afvmmi kanohmi ilvppa chi yuka chiyuhmit isht chim ahanta li mvt, chim anumpa ma himonna kia ak kobvffoshke; yohmi kia a kana vhleha ai isht it ibai yukpa la chi ka, isi kosomushi kia chik samo chatuk,

30. Amba chiso ilvppvt haui puta ai iba fohkvt ayvt, nan isht ish ai okchaya he tuk ash isht yopomot tahli cha vla ma, mih makinli ho wak ushi ilhpitvt nia ya ish im vbishke, im achi tok.

31. Mihma yvmmak ash ot, Svso ma! nitak moma ka si awant ish ahantvshke, yohmi kvn nan okluha vm asha kvn chimmi hoke.

32. Chi nakfish ilvppak okvt illi tuk osh, anonti falamvt okchaya; micha knia tuk osh haiaka hoka, impa ikbit na yukpot il aiasha he vlhpesa hatuk oke, im achi tok oke; achi tok.

## CHAPTA XVI.

Nan-apesvchi ik aighlo nan-isht-vlhpisa, 1; 14 Chisvs vt Falisi vhleha hvv ilap a okla ishit yopula ma, nana ka peh ilahobi vhleha hatuk a nan isht i miha. 19 Hatak nan in laua, micha Lasalvs ita tuklo nan-isht-vlhpisa.

1. MIHMUT yvmmak ash ot nan im ai ithvna vhleha ha, Hatak nan in laua achvfa hosh nan-apesvchi vt im anta tok: atuk o yvmmak ash ot nana immi puta kash isht i yopomot tahli ho, im annoa cha haklo tok.

2. Mihmut yvmmak ash o i howa cha, Katiohmi ho ilvppa isht a chi haklo li cho? nan ish apesvchi yatuk vt achukmalit ish ai il anolashke: himak a pilla ma nan apesvchi chia ha chi keyu hoke, im achi tok.

3. Yohmi ma nan apesvchi yash osh, Nanta hak o katiohmi la chi cho? a shahli hvt nan ai apesvchi li ash si a kohchichikma, okchahli la he keyukmvt, nan asilhha ma sa hofahyvshke.

4. Nan ai apesvchi li ash sa kohchichikma, in chuka yokvno chukowa la hi a okla vm ahna chi ka, nana ho katiohmi la chi kvto ithaiyana lishke, achi tok.

5. Mihmut i shahli ha aheka im asha tuk vhleha hash mominchit hoyo mvt, Ummona ka a shahli ho aheka katiohmi ho ish in takanli cho? im achi tok.

6. Mihmut yvmmak ash ot, Na-bila vlhpisa tahlepa achvfa, achi tok. Mihma, Chim aheka holisso ha ishi cha, tushpvt aka binilit, pokoli tahlapi ho takalichí, im achi tok.

7. Mihma anonti inla ho, Mikma chishno vto katiohmi hosh aheka yvt chim asha cho? im achi tok. Mihma, Onush vlhpisa tahlepa achvfa, achi tok. Mihma yvmmak ash o, Chim aheka holisso ha ishi cha, pokoli untuchina ho takalichí, im achi tok.

8. Yohmi ma nan-apesvchi nan ik ai vlhpeso ash ot kostini fehnvt yvmohmi hatuk o, i shahli hvt im ai okpahanchi tok: yakni ilvppa im vlla vhleha hvt ilap bika nan it im a katiohmit hopoyuksa kv, a nitaki im vlla vhleha ha i shahli hoke.

9. Yohmi ka, Nan-ai-vlhpesa keyu m a m m o n a hvchi kana vhleha ha hi a isht hvsh ikbashke, hvchim achi lishke: yohmi tukma ont hvch ai illikma, ai vta bilia ya ik chuková, hvchim aiahna hi oke.

10. Kvna hosh nana kv moma ik a lauwo ho aiahli achukma yatuk mvt, nana kv ik aiaka kia aiahli achukma

akinli chatuk; yohmikma kvna hosh nana kv̄t moma ik a lauwo hō aiahli achukma atuk keyukmvt, nana kv̄t ik aiaka kia, aiahli achukma chatuk keyu akinli hoke.

11. Yohmi ka nan-ai-vlhpesa-keyu m a m m o n a isht a hvch ik aiahlo ke tuk ma, kv̄ta hak osh na holitopa ahli ya hvsh apesvcha hi a hvchi tohna hinla cho?

12. Micha inla yō nana kv̄t immi hatuk a isht hvch ik aiahlo ke tuk mvno, kv̄ta hosh nana kv̄t chimmi fehna ya chima hi o?

13. Tishu yuka nana kia i shahli tuklochit im antia he keyushke; achvfalit i nukkilli cha, achvfa kamo holitobla hinla; keyukmvt achvfalit halanli cha, anonti achvfa kamo a haksicha hinla hoke. Chihowa, micha mammon it aieninchit hvsh im antia he keyushke, im achi tok.

14. Mihma Falisi vt tvli holisso anuksitia fehna vhleha hatuk osh, ilvppa puta ka haiyaklo mvt, isht ik imi ahno ki tok.

15. Mihma yvmmak ash o, Hvchishno ak osh hatak itikba ya ai il achukmvli hvchia mak oke: yohmi kia Chihowa hv̄t hvchi chukvsh puta ka ithaiyanvshke: nana kv̄t hatak a im a holitopa fehnakma, Chihowa hv̄t ai i nukkilli mak oke.

16. Nan-vlhvisa, micha hopaii vhleha i holisso aiena kv̄t aiashvt mihinti tuk o Chan vt vla tok: yvmmak a tok takla kvno Chihowa apehlichika yak osh anuhumpa na hatak puta kv̄t yichinv̄t pit vlbihhvshke.

17. Micha vba shutik, mikmvt yakni aiena hokvto ont ik ahobot ik ai iksho ka hinla kv̄t, nan-vlhvisa iskitinosi kv̄t moma ik lauwo hosh ont ik ai iksho ka hi a ik lauwo ka hi oke.

18. Kvna hosh tekchi a kanchi cha, inla itauwayakmvt, haui toba hoke; mikma kvna hosh i hatak vt kanchi tok o itauwaya hokmvt, haui toba hoke, im achi tok.

19. Hatak nan in laua achvfa hosh na-fohka hummakbi hō anonti linen lapushki aiena hō foyuka mvt, nitak moma nan-va in chitot nan isht ilaiyukpa hosh anta tok.

20. Yvmohmi ma hatak ilbvsha yosh Lasalvs hohchifo



hosh liahpo bieka ho, yvmma i holihta okhissa ya ont bohyuli na ituyula tok.

21. Yohmi kvt hatak nan in laua im ai-impā yo boshulli vt a chilofa kak o habenvt vpa ka aiahni ha tok; yohmi ma ofi puta nana kia ai vlvrt liahpo a i holahakshi tok.

22. Atuk ash o yakohmi tok: hatak ilbvsha yash ot illi ma, enchil vhleha hosh ant isht ivt, Eblaham shakba pohloma ka ont fohki tok. Mihma hatak nan in laua yash kia illi cha, hollopi tok.

23. Atuk osh yvmmak ash osh aiokpuloka ya ont ai issikkopa cha, vba chakali mvt, Eblaham vt hopaki pilla ka auet asha ma, Lasalvs vt shakba pohloma ka foka na pisa tok.

24. Mihmvt tahpahanlvrt, Aki Eblaham ma! auet a nukhaklot Lasalvs a auet chvffichi na ibbak-ushi wishakehi a oka kapvssa ik oka hilechi cha, sasunlvsh a ant ik kapvsvlli: a libbi ilvppa vm a palvmmi kvt atampa fehnvshke, achi tok.

25. Yohmi kia Eblaham ash ot, Svso ma! chi okchaya taklvrt ish ahanta kvt, na hochukma puta ka ish pihisa tok: yohmi ma Lasalvs ak kia nana kvt a palvmmi puta ka pihisa tuk a, ish ithaiyanashke: yohmi tuk kia yvmmak ash ot himak okvno hopohlvt na yukpa ma, anonti chishno vto chim a palvmmi fehnvshke.

26. Micha ilvppak osh ai vhli keyu; a hvp itin takla ya kolukbi chito fehna hosh bachaya hoke: yohmi hatuk o ilvppa ai asht ia kvt tanvblit yvmma a chim ona he tuk mak osh, na kanihma he keyu; yohmikma anonti yvmma asht minti kvt hlopulli cha pim vla he keyu akinli hoke, achi tok.

27. Yohmi ma yvmmak ash ot, Yohmi hoka aki ma! yvmmak oka aki in chuka ya pit ish chvfficha he mak o chim asilhha lishke.

28. Yohmi ka itibapishi li hvrt tahlapit asha hoka, atokowa ka ont ai im anoli na ai issikkopa ilvppa yvmmakmvt ai vla yoba ná, achi tok.

29. Eblaham ash ot, Moses micha hopaii puta im anumpa

hvt in tonla hokvt, yvmmak o okla i haponaklashke, im achi tok.

30. Yohmi ma yvmmak ash ot, Aha! aki Eblaham ma! illi atuk ak osh achvft ayvt im ona hokmvno, okla ile kostinicha hinla hoke, achi tok.

31. Mihma yvmmak ash ot, Moses, micha hopaii puta im anumpa ha haklo keyukmvt, illi tuk osh achvft tani mak o, yimma hi vt anukfoyuka he keyu hoke, im achi tok.

## CHAPTA XVII.

Chisvs vt nan im ai ithvna vhleha hvt ahah! ahni cha, inla ya ik yoshublecho ka he, 1, 3 micha ilap bika yvt nana ka it i kashofa he aiena ka i miha: 6 na yimmi aiablika. yokvt na fehna ka anoli: micha Chihowa ha holitobli kvvt nana ho ik yvmohmi kia im anuk-fila mvt akanlosi bieka hi a, i miha; 11 leplosi vbi a hatak pokoli ho hlakofichi; 20 Chihowa apehlichika yvt hatak chukvsh anuka-ka ak o fohka: micha kvna hosh yvmmak oka nan isht ik ahno tuk okvto momvt ont ai okpulokvt taha pulla hi a, anoli.

1. YOHMI mvt nan im ai ithvna vhleha hash o ik kanihmi hoh kia nana isht ai ibetvbli okvt iksho ka chi keyu pulla hoke; yohmi kia kvna ho yvmmvvt isht a tobakma, mihi yosh nan i palvmmi mak oke.

2. Chipunta ilvppa achvfona ka ibetvblichichokmvt, ilap ak o ikunla ya tvli chito na botoli ak osh a takanli ho, okhvta ha pit okvchi kak o, vlvpesa kvvt im i shahli hoke.

3. Ahah! hvsh il aiahnashke. Ish itibapishi hvt chi yoshuba hokma, im alvmmi nana ish i mihashke: yohmi na yvmmak ash ot nukhaklot ile kostinichi hokma, kashofit ish i kanchashke.

4. Micha nitak achvfa ka untuklo ha chi yoshuba cha, anonti nitak achvfa ka untuklo ha yo filemvt, Sa nukhakloshke, achi hokma, ish i kashofa he mak oke.

5. Mihma vbanumpeshi vhleha hash ot Chitokaka yash, Na pi yimmi ka i shahlichit ish pi nukfohkashke, im achi tok.

6. Mihma Chitokaka yash osh, Na hvchi yimmi kvvt m v s t v t nihi achvfa ka chohmi hosh hvchi anukfoka hok-

mt, bihi vpi ilvppa hakshish fehna ai isht alobafvt okhvta hak o ont ish a holokchashke, hvsh im achikma, hvchim antia hinla hoke.

7. Yohmi ka hvsh katima kak osh yuka hv im anta tuk vt yakni patvffi hokmá, keyukmt wak ipeta hokmá, nana hosh anta tuk osh osapa mintit vla makinli ho, Ivt ont binili cha, impá, im acha hinla?

8. Amba yvmmak o keyukmt; Nana ho opiaka impa la chi ka atahli cha, il ai-vskofvchit chin taha cha, nan isht is svm anta na impvt nan ishko aienvt issa li ha yo, himmak o impvt nan ish ishkashke, im acha hinla keyu?

9. Micha yuka yvmmak ash ot nan ai im vlhpisa atuk ash ot yvmihchi ma, yak oke! im ahni ho? keyu ka, vm aho-bvshke.

10. Yohmi hoka yvmma chiyuhmit hvchishno mt, nana kv a hvchim vlhpisa tuk vt mominchit ont hvsh ataiyahlikmt, Nana ho isht ai yukpa hi o keyu tishu pia: nana ka isht il ai vtta hi a pim vlhpesa tuk mak osh e yvmihchishke, hvsh achi makinlashke, achi tok.

11. Atuk o yakohmi tok: yvmmak ash ot Chelusalem ia hosh aya mt, Samalia micha Kalili aiena ka iklvna hlo-pullit ia tok.

12. Micha tvmahushi achvfa ho ont chukowak fehna, hat tak pokoli kv leposi vbi yosh ant afama cha, mishemanchit auet hiel tok.

13. Mihmt chitoli hosh okla anumpulit, Chisvs pi shahli ma! ish pi nukhaklashke, achi tok.

14. Mihma yvmmak ash ot pit pisa mt, Oh ia cha, naholitompa isht asha vhleha hak o ont hvsh im ile haiakvchashke, im achi tok. Atuk o yakohmi tok: ilhkoli hosh asht aya mt, okla hlakofi tok.

15. Mihma yvmmak ash ot achvvt hlakofi kv ile pisa mt, falama cha, chitoli hosh anumpulit, Chihowa ha holi-toblich tok.

16. Mihmt yvmmak ash iyi ituma yak o hlipia cha, yak oke! ahnit aiokpvchi tok: yohmi kv yvmmt Samalatan hat a tok.



17. Yohmi ma Chisvs ash ot anumpuli mvt, Pokoli hosh hlakofi tuk keyu ? amba chakkali mvto ?

18. Falamvt Chihowa ha holitoblichit aya kut iiksho ho, amba oklushi inla hatak ilvppak illvshke, achi tok.

19. Mihmvt yvmmak ash o, Ish wakaya cha, ish iashke ; a chi yimmika yak osh chi hlakofichi hoke, im achi tok.

20. Yvmohmi ma Falisi vhleha hvt Chihowa apehlichika yvt, Katiohmi kak o aya hi o ? ahnit i ponaklo ma, afalaminchi mvt, Chihowa apehlichika yvt ai im akostininchi ho aya he keyu.

21. Micha Yakeh ! ilvppak oke : keyukmvt, Yakeh ! yvmmak oke ; achi kak okma, kanimampa he keyu hoke. Chihowa apehlichika yvt hvchi chukvsh. anukaka foyuka hoka, achi tok.

22. Yohmi mvt nan im ai ithvna vhleha hash o, Hatak Ushi i nitak o achvfalichit pisa ka hvchi bvna fehna kia, hvch ik peso ka hi a nitak vt ai ona pulla hi oke.

23. Yohmi ka Yakeh ! ilvppak oke ; keyukmvt, Yakeh ! yvmmak oke ; hvchim achikma, nana hi oke. Yohmikma ivt hvch ik im onokmvt, hvch ik iakaiyo kashke.

24. Malvtha kvv shutik nutaka kanima ho a malvthakachit kohchakmvt, shutik nutaka bakapa tvnvp ma pit on tomme chatuk a, Hatak Ushi i nitak vt ont ai vlhpiesakma, yvmmak inli ho chiyuhma hi oke.

25. Yohmi kia ik a yvmohmo kisha ka, isht ai issikkopa mvt in laua he ; mikma hatak himonasi asha ilvppvt ik i yimmot ik ahnincho ka hi mak oke.

26. Mikma Hatak Ushi i nitak mvt, Noah vt ahanta nitak a a kaniohmi tok mak o, a chiyuhmi makinla hi oke.

27. Okla impvt, okla nan ishkot, ohoyo okla itauwayvt, okla itauwaya hi vt im vlhpovvchit aiasha tuk o, Noah vt peni chito a pit chukowa nitak fehna ma, oka falama vt aya cha, mominchit vbit taiyahli tok.

28. Lat ahanta nitak a a kaniohmi tok mvt, okla impvt, okla nan ishkot, okla na chumpvt, okla na kanchit, okla na hokchit, chuka okla ikbi aienvt aiasha tok.

29. Yohmi tuk kia Lat vt Sotom a a kohchvt ia nitak

fehna ma, luak, micha hituk lakna aiena kvt vba ya auet ai umba cha, mominchit vbit taiyahli tok.

30. Yakohmi tok a chiyuhmit Hatak Ushi vt ont haiaka nitak fehnakma, yvmohma he akinli hoke.

31. Nitak yvmma fehnakma kvna hosh aboha paknaka anta na im vlhpoyak vt aboha anuka asha tuk ma, akowvt apoyvt isht ik aiyo kashke; yohmikma anonti kvna hosh osapa anta tukmvt, falamvt ik aiyo akinlashke.

32. Lat tekchi a tok a hvsh ithaiyanashke.

33. Kvna hosh ilap im ilhfiopak okchalinchi bvna hokvto, kaiyancha he; mikma kvna hosh im ilhfiopak a ik i hullo hokmvt, okchalincha hi oke.

34. Ninak yvmma fehnakma topa achvfa ka hatak tuklot kaha tuk ma, achvfa ka ai eshi na achvfa hosh itonla he.

35. Ohoyo tuklo hosh nan it iba botoli hosh ashwa tuk ma, achvfa kash o ai eshi na achvfa hosh anta he.

36. Hatak tuklo hosh osapa ya ashwa tuk ma, achvfa kash o ai eshi na achvfa hosh anta hi oka, hvch im anoli lishke, im achi tok.

37. Mihma okla afalaminchi mvt, Chitokaka ma! katima yak o? im achi tok. - Mihma yvmmak ash ot, Kanimayo illi haknip vt ituyulakma mihi yo ossi puta mvt ont ai itahoba hi mak oke, im achi tok.

CHAPTA XVIII.

Nan apesa ai ahlichy keyu, micha ohoyo i hatak illi nan asilhha achunanchi aiena nan isht vlhpisa, 1; 9 Falisi, micha prvlikan ita tuklo nan isht vlhpisa. 15 Chisvs vt vlla chipunta ya holitoblit ishit sholi. 18 Chisvs vt hatak pehlichy himita nan in laua yo Klaist okma, nan laua im asha kak okma, nanta kak osh holitopa kvt im i shahli chishba? ahnit imomaka pisa. 31 Chisvs vt ilapvt ititaiyukhvna ahonvhlvt illa he, atukmvt nitak ont isht atuchinakma falamvt tana he, anonti tikbanli anoli.

1. MIHMUT yvmmak ash o, Hatak vt vba pit anumponhli kvt bilia cha, ik in takobo ka he tuk a, nan isht vlhpisa ho isht anumpulit achi mvt,

2. Tumaha ho nan apesa vt ahanta kv̄t, Chihowa ya i nukshompa keyukm̄v̄t, anonti hatak ma nan isht ik im ahoboy tok.

3. Yohmi ma tumaha yvm̄ma ohoyo i hatak illi yosh anta tok; atuk osh yvm̄mak ash o im ai vla cha, Nan v̄lh̄pisa si onochi tuk a nan āhli achukma ka isht is sv̄m ai apesashke, achi tok.

4. Yohmi ma yakosi takla kv̄no yvm̄ihcha he ik ahno ke tuk osh, amba himmak o nan il anukfilli kv̄t, Chihowa ya i nukshompa li keyu m̄v̄t, anonti hatak ma nan isht vm̄ ahomba keyu hatuk nana kia,

5. Ohoyo i hatak illi ilv̄ppv̄t si ataklaiyami hoka, nan āhli achukma ka isht ai im apesa lashke; yvm̄mak keyukma, mihinti beakm̄v̄t, an takobicha hinlv̄shke, achi tok.

6. Mihma Chitokaka yash ot, Nan apesa ai v̄lh̄pesa keyu vt nana achi tuk a, ho haiyakl̄o.

7. Yohmi ka Chihowa hv̄t ilap osh ai atokoli tok mak o nitak, micha ninak aiena ka pit in tahpahanla ka, im ile sv̄laha tuk mak osh, nan ai āhli achukma ka ik im apeso ka hinla cho?

8. Chekosi makinli ho nan ai āhli achukma ka isht ai im apesa hi oka, hv̄chim achi lishke. Yohmi kia amba Hatak Ushi vt ayakm̄v̄to, yakni paknaka ya na yimmi kv̄t āsha na pisa hi oh cho? achi tok.

9. Mihm̄v̄t kanimi kv̄t ile yimmit, ilap ak osh ai v̄lh̄pesa mak o im ahobv̄t, inla āsha kv̄no ik ahobalo v̄hleha hatuk ash nan-isht-v̄lh̄pisa ilv̄ppa isht im anumpuli m̄v̄t,

10. Hatak tuklo kv̄t v̄ba pit anumpula ch̄i hosh tempel a pit chukowv̄t okla tok: achv̄fa kak osh Falisi okma, achv̄fa kv̄to pv̄blikan a tok.

11. Falisi ash osh hikia cha, v̄ba pit isht il anumpuli m̄v̄t, Chihowa ma! hatak inla āsha na-wehli; nan ik ai v̄lh̄pieso; haui puta; mikm̄v̄t pv̄blikan ilv̄ppak kia ak chohmo kv̄t, yak oke! pit chim aiahni lishke.

12. Nitak hullo achv̄fakma hitukla na hullochi likm̄v̄t, nan vm̄ āsha puta kv̄t ont isht pokoli kv̄t a kv̄nihyv̄shke, achi tok.



13. Yohmi ma p**u**blikan ash ot auet mishema yak inli h**o** hiki**vt**, i holhponayo ak kia vba chakalinchi keyu hosh, pe**h** ikkishi ak o is**so** m**vt**, Nan ashvchi sia hoka, Chihowa h**vt** is sa nukhaklashke, im achi tok.

14. Yohmi k**vt** hatak ilvpp**vt** nan im a**i**ahli achukma k**vt** achvfa yash i shahli hosh in chuka ona tok a h**v**chim anoli lishke: kvna hosh ile fehnvchikm**vt**, aka ona he; mikma kvna hosh ile akanlosichi hokm**vt**, holitopa hi oka, achi tok.

15. Yohmi ma vlo**si** puta kia, yvmmak ash ot potola hinla ka okla ishit im ai v**la** tok: yohmi kia nan im ai ithvna v**h**leha hash ot pisa m**vt**, okla im alvmmi tok.

16. Yohmi kia Chisvs v**to** yvmmak ash o pit hoyo cha, Ulla chipunta v**t** v**m** ai v**la** hi a h**v**sh ahni cha, h**v**ch ik im alammo kashke; ilvppak o chohmi hosh Chihowa apehlichika ya aiasha hoke.

17. A**h**li mak o h**v**chim achi lishke; Kvna hosh v**lla** iskitini ak o chohmit Chihowa apehlichika ya aiokpvchi h**o** keyukm**vt**, kaniohmi kak osh yv**ma** chukowa he keyu hoke, achi tok.

18. Mihma hatak pehlich**i** achvfv**t** i ponaklot, Nan-ithv-nanchi achukma ma! nantak o katiohmi li kak osh ai okchayv**t** bilia yato v**mmi** ha hinla cho? achi tok.

19. Mihma Chisvs v**t** yvmmak ash o, Na katihmi h**o** v**no** a achukma is si achi cho? achukma k**vt** iksho h**o**, amba achvfa kak illa, yvm**vt** Chihowa ak oke.

20. Nan vlhpisa, Haui ish toba ná: Kvna kia ish bi ná: Na chik hukopo kashke; Anumpa ik a**h**lo isht atokolit chik anto kashke; Ch**i**ki, micha chishke aiena ka ish holitoblashke; achi puta ka ish ithanvshke, im achi tok.

21. Mihma yvmmak ash ot, v**lla** sa tomba kash inli hosh ilvppa puta ka holitoblit isht mihinti li tok a ant a himak vshke, achi tok.

22. Mihma Chisvs v**t** ilvppa puta ka haklo m**vt**, Yohmi kia nana achvfa h**o** isht chik ai onoshke; nana chim a**sha** k**vt** mominchit ish kampila cha, ilbvsha ya ishit it a kvshkoach**i**, yohmik mak osh vba ya chim ilayak v**t** a**sha** hi oke; micha ant is siakayashke, im achi tok.

23. Mihma yummak ash ot ilvppa haklo mvt, nan in laua fehna hatuk osh, nukhaklo fehna tok.

24. Yohmi ma nukhaklo fehna ho Chisvs vt pisa mvt, Nana in laua vhleha hokvto palvmmi fehna nana ho Chihowa apehlichika ya chukowa he;

25. Kamel vt chofak ushi nishkin a hlopulli ka palvmmi kvv hatak nan in laua yosh Chihowa apehlichika chukowa hokvno ik lauwashke, im achi tok.

26. Mihma yvmma okla haklo mvt, Yohmikma kvta hak osh okchaya hinla cho? achi tok.

27. Mihma yummak ash ot, Hatak okmvno nana kvv ai yvmohma he keyu kia, Chihowa yak okmvno ai yvmohmi hoke, achi tok.

28. Yohmi ma Pita yash ot, Yakeh! Pishno vto momin-chit il issa cha, e chiakaiya kvno, achi tok.

29. Mihma yummak ash ot okla hash, Ahli mak o hvchim achi lishke; Hatak vt Chihowa apehlichika pulla hatuk mak o in chuka, iki, ishki, itibapishi vhleha, tekchi, im vlla puta aiena ka a kanima kia issvt aya hokvto,

30. Yakni ilvppak inli ka nana laua kvv yummak atuk a im i shahli tuk mvt, yakni inla mihintikma, ai okchayvt bilia ya ik peso ka hi vt iksho hoke, im achi tok.

31. Yohmi mvt auah-tuklo kash hoyo cha, Inta! Chelusalem ak o iloh ivshke; yohmi ka hopaii vhleha hvv Hatak Ushi ak o holisso ha ishi ai ikbichi tok a puyuta kvv ont ai ghla chi hoke.

32. Yvmmak oka ishit Chentail okla ibbak fohki na ishit yopulvt, itukhlakavvt hofahyalichit, on tuftua chi:

33. Micha okla fvmmi cha, vba chi hoke; atukma nitak ont a tuchinakma falamvt tana hi oke, im achi tok.

34. Yohmi ma ilvppa puta ka achi kia okla ik akostinin-cho ki tok: mihma anumpa ilvppvt im a luma na nana kvv anumpa tuk ash kia okla ik ithaiyano ki tok.

35. Atuk o yakohmi tok; yummak ash ot Cheliko bilikasi ka vla ma, hatak lvpa achvfa kvv hina lapalika yo binilit nan asilhha tok.

36. Atuk osh okla laua vt ont ihiya ka haklo mvt, Katiohmi hosh yakohmi cho? achit a ponaklo tok.

37. Mihma, Chisvs Nasalet ai vta ak osh aya hatuk a, okla im anoli tok.

38. Mihma yvmmak ash ot tahpvlvt, Chisvs, Lewi Ushi chia hvt is sa nukhaklashke, achi tok.

39. Mihma tikba asht aya tuk ash ot, nukchinta chi ka, i miha tok: yohmi kia yvmmak o isht i shahlichi fehnvt tahpvlvt, Lewi Ushi chia hvt is sa nukhaklashke, achi tok.

40. Mihma Chisvs vt hikia mvt, yvmmak ash o isht im vla hinla ka miha tok: atuk osh yvmmak ash ot i bilikasi vla ma, i ponaklot,

41. Nanta hak o a chi katimichi la hi a, ish ahni cho? achi tok. Mihma yvmmak ash ot Chitokaka ma! hoponayo la hi á, achi tok.

42. Mihma Chisvs ash ot, Ish hoponayashke, a chi yimmi yak osh chi okchalinchishke, im achi tok.

43. Yohmi ma yvmmak ash ot ashalika hoponayo cha, yvmmak ash o iakaiya mvt, Chihowa ya holitoblichich tok: mihma okla hvt pisa mvt, Chihowa ya pit aiokpahanchi tok.

CHAPTA XIX.

Sakevs vt vbanumpa anukfohka tok a isht anumpa, 1. 11 Hatak holitomp hosh miko tobrt ia hosh, in tishu vhleha ha tvli holisso ibbak fohki. 25 Chisvs vt issuba haksobish falaia himita yo o minilit aya hosh Chelusalem a ont chukowa; 45 Chisvs vt tempel a ont chukowa cha, nan itatoba vhleha maya tuk a kocha pit tihleli.

1. MIHMA Chisvs vt Cheliko ont chukowrt a hlopullit ia tok.

2. Mihma hatak vt publikan vhleha pehlichich yosh Sakevs hohchifo kvrt, nan in laua hosh anta tok.

3. Atuk osh yvmmak ash ot, Kvta hoh chishba? ahni mvt, Chisvs a pisa bvna tok: atuk ak osh okla a fohopa fehna hatuk o, ik chaho hatuk osh na kanihma he keyu ki tok,



4. Mihmvt yvm-imma ont ia chi hatuk o, pisa chi hosh tikba pit malelit, bihi iti o ont oiya tok:

5. Atuk o Chisvs ash ot yvmmak ash o vla mvt, pit vba chakalit yvmmak ash o pisa cha, Sakevs ma! tushpvt akowá; himak nitak a chin chuka ya anta la chi hatuk oke, im achi tok.

6. Mihma yvmmak ash ot tushpvt akowa cha, na yukpa felna hosh yvmmak ash o ilauelet ilap in chuka isht chukowa tok.

7. Mihma okla hvt pisa mvt, momvt lumasit na mihachit, Hatak nan ashvchi yo kak o ont ibai vtta chi hosh ia tuk, achi tok.

8. Mihma Sakevs ash osh hikia cha, Chitokaka yash, Inta! Chitokaka ma! vm ilayak a iklvnnachit ilbvsha ya im issa lishke; yohmi kvhatak nana kia nanasi ka anumpa isht a holabi hosh im ishi li tuk okmvt, yvmmak atuk a ohmi ushta ho i falamichi lashke, im achi tok.

9. Mihma Chisvs ash ot, Ilvppak kia Eblaham ushi akinli hatuk oka, himak nitak a ai-okchaya yvt chuka ilvppa vlshke.

10. Hatak Ushi vt okpulot taha tok mak o hoyot okchalinya chi hosh aya tok oka, achi tok.

11. Mihma ilvppa puta ka okla haklo ma, <sup>he added when</sup> (achakalini mvt,) Chelusalem a ona he, micha Chihowa apelhichika yvt chekosi otvna hinla ka, okla im ahoba aiena hatuk oka, nanisht-vlhpisa ho isht anumpuli tok.

12. Yohmi hatuk osh, Hatak holitompa achvfa hosh miko ont vlhtoka cha, falamvt aya hi osh yakni hopaki ka ia tok.

13. Mihmvt in tishu pokoli ka hoyo cha, tvli holisso weki pokoli ka ibbak fohki mvt, Nan isht hvsh itatomba tuk o, vla lashke, achi tok.

14. Atuk ak o i yakni achvfa okla hash ot i nukkilli cha, Hatak yvmmak okvno ik pi pehlichí, il ahna he keyu, achit anumpa shali a iakaiyachit pit chvffichi tok.

15. Atuk o yakohmi tok; yvmmak ash ot miko ont vlhtokvt im vlhtaha cha, falamvt vla; yohmi mvt nana isht itatoba kvhatak achvfa aiyuka kvh kaniohmi ho ahayuchi

tukma, akostinincha hinla kvt, tishu vhleha ilvppa tvli holisso ima tok ash, yummvt im annoa cha, im ai vla chi ka, apesa tok.

16. Mihma tikba vla kvt, Chitokaka ma! chin tvli holisso weki achvfa tuk ash osh weki pokoli hō isht il ahayuchi li tuk oke, achi tok.

17. Mihma yummak ash o, Ulhpesa, tishu chi achukmvshke; nana kvt ik lauwo fehna kia aiahli chi achukma tuk okvt, tmaha pokoli hō ai i shalhit ish pehlicha chi kvt a chim vlhpiesashke, im achi tok.

18. Mihma atukla kvt vla mvt, Chitokaka ma! chin tvli holisso weki achvfa tuk ash ot weki tahlapi hō isht il ahayuchi li tuk oke, achi tok.

19. Mihma yummak ash kia, Chishno mvt, tmaha tahlapi hō ish pehlicha chi kvt a chim vlhpiesashke, im achi tok.

20. Yohmi ma inla yosh vla mvt, Yakeh! Chitokaka ma! chin tvli holisso weki achvfa kash nantapvski yō a bonullit bohli li tuk o, yak itonlvshke.

21. Nana ka chishno ak osh ish bohli tuk keyu kia, ish ishi; yohmikmvt ish hokchi tuk keyu kia ish mo chatuk; hatak palvmmi chia hatuk oka chi sa nukshopa tuk oke, im achi tok.

22. Mihma yummak ash o, Tishu haksi chia ka chishno chitih a kohcha kak inli hō nan isht chim apesa la chi hoke. Hatak palvmmi sia nana ka vno yak osh bohli li tuk keyu kia ishi li; mikmvt hokchi li tuk keyu kia vmo li chatuk a, ish ithana;

23. Yohmi ho kak osh na katihmi hō an tvli holisso weki achvfa kash tvli holisso a bohli a chik bohlo ke tuk o, vla li kvt vmmi hash a chelichi hosh ak hoyo cho? im achi tok.

24. Mihmvt bilika hiohmaya kash o, Yumma tvli holisso weki achvfa kash oh im ishi cha, tvli holisso weki pokoli ha ishi kak o oh imá, im achi tok.

25. Mihma, Chitokaka ma! yummak okvto tvli holisso weki pokoli ka ishishke, okla im achi tok.

26. Kvna hosh ishi hok mak o ima he; amba ik im iksho

hatuk okvno ĭshi tuk ash kia, im ai ishā hi oka, hvch im achi lishke.

27. Amba a nukkilli vhleha hv̄t ĭ miko la he tuk a, vhl-pesa ik ahno ke tuk yvmmak okvno ilvppa isht vla cha, sa tikba ya oh ai vb̄i, achi tok oke, achi tok.

28. Micha ilvppa yakohmichit anumpuli mvt, tikba hikvt Chelusalem a pit oiyvt ia tok.

29. Atuk o yakohmi tok; Betfachi, micha Betani aiena ka auet bilika nv̄nih chaha Alif hohchifo h̄o vla mvt, nan im ai ithvna ya tuklochit pit tihleli mvt,

30. Ivt tmahushi hv̄chi chapaka talaia ka hvsh onashke: yvmma ont hvsh chukōwak fehna kv̄t issuba himita hatak vt ik o minilo k̄isha yosh talakchit hikia na hvsh pisa chi hoke; yvmma hvsh ĭ hotofi cha, isht hvsh lashke.

31. Mikma hatak nana hosh hvchim ponaklot, Nanta katiohmi h̄o hvsh ĭ hotofi cho? achikma, Chitokaka yak osh bv̄nna hatuk oke; hvsh im achashke, im achi tok.

32. Mihma vltoka tuk ash ot itiachi mvt, yvmma nana ai ĭ miha tuk ash yohmi fehna mv̄hli h̄o ont pisvt okla tok.

33. Micha issuba himita yash ĭ hotofi hosh ah̄ashwa ma, yvm̄mvt immi atuk ash ot, Nanta katiohmi h̄o issuba himita ya hvsh ĭ hotofi cho? im achi tok.

34. Mihma, Chitokaka yak osh bv̄nna hatuk oke, achi tok.

35. Mihmvt yvmmak ash o Chisvs a isht im ona; yohmi ma issuba himita yash anchi puta ka om pulli cha, Chisvs a okla o minilichi tok.

36. Micha ia hosh aya ma, hina ya im anchi puta ka okla pulli tok.

37. Atuk osh yvmmak ash ot ona he Alif nv̄nih h̄a pit okvtanowvt mahaya ma, nan im ai ithvna vhleha okla chito ash ot moyumvt na fehna puta kv̄t yvmohmi na okla pihisa tuk vt, na yukpvt chitolit tahpvlvt, Chihowa ya pit aiokpahanchi tok.

38. Chitokaka ĭ hohchifo h̄o aya kv̄t miko yvm̄mvt holi-topvshke; vba ya nanaiya achukmakma, achaha moma ĭ shahli ma Chihowa vt ik a holitopá, achi tok.

39. Mihma Falisi vt okla laua takla asht aya tuk vt kani



mi kv̄t, Nan ithv̄nanchi ma! na chim ai ithv̄na vhleha h̄a im alv̄nm̄i, im achi tok.

40. Mihma yvm̄mak ash ot afalam̄inchi m̄vt, Yakohmi kv̄t ont yokopa hokma, tv̄li puta kv̄t chekosi fehna tahp̄vl̄vt anumpula hinla hoka, hv̄ch im anoli lishke, im achi tok.

41. Atuk osh bilika ona ch̄a, tv̄maha hash pit pisa cha, isht yaiya m̄vt,

42. Chishno akinli fehna kv̄t a ch̄i nitak ilv̄ppa fehna kak kia nana isht chi ai yukpa he ai vl̄hpesa ka ish ithaiyana tok okbato; amba himak okv̄no ch̄i holhponayo h̄a ai in lum̄vt kv̄nia hoke.

43. Chin tv̄nv̄p vhleha hv̄t yakni kullit on talaka holihta kv̄llo ai ikbichit isht chi a folv̄blit a chim oktv̄bli bieka na anuk̄aka ya ish foyuka hi a nitak vt chim aya hi oke.

44. Yohmikma a ch̄i now̄vt aya he nitak a chik ithaiyano ke tuk oka, chishno, mikm̄vt chim v̄lla chi anuk̄aka asha aiena ka yakni ak o ai itilauechit aka chi bohla he; mikm̄vt tv̄li achv̄fona kia it vl̄ant̄vt kaha hi a, ik chim ahno ka hi oke, achi tok.

45. Mihma tempel a ont chukowa cha, anuk̄aka yvm̄ma nana a kanchi, micha nana a chumpa aiena maya tuk ash kocha pit yuhli m̄vt,

46. An chuka yv̄t v̄ba pit ai anumpuli chuka yoke: achi hosh holisso tok okak o, hv̄chishno yokv̄to na hukopa vhleha in chuka ȳo hv̄sh ikbishke, im achi tok.

47. Yohmi m̄vt nitak moma tempel anuk̄aka ya nana im ai abahanchi tok. Yohmi kia na holitompa isht asha pehli-chi vhleha, mikm̄vt na-holissochi puta, micha hatak hochi-toka vhleha aiena kv̄t v̄bi b̄vn̄vt aiasha tok.

48. Yohmi kia okla mom̄vt im a haponaklo kv̄t im achukma feh̄nv̄t aiasha hatuk o, nana a kaniohma hinla kv̄t ik ithaiyano ki tok.

CHAPTA XX.

Kanimi kv̄t, Klaist kaniohmit isht im ai vl̄hpesa hosh yvm̄ohmi hatuk vt atokowa anola ch̄i ka, im ahni hatuk o nan anoli, 1. 9 Pa-kv̄pi a hollokchi isht vl̄hpisa. 20 Iskv̄li itv̄nali vt Sesa ak o im

itahoba he ai vlhpesa hatuk a Chisvs vt otvninchi. 27 Chisvs vt hatak illi falamvt tana he ilvppa Satusi okla ha isht it im anum-pulimvt, anumpa ha i kobvffi. 41 Klaist vt a katiohmi kak osh Lewi a ushi okmvt, anonti Lewi a in Chitokaka ya hinla chishba? achit Chisvs vt ponaklo tok.

1. ATUK o yakohmi tok: nitak yvmma foka ma tempel anukaka ya okla nana im abvchi, micha vbanumpa isht anum-puli aiena hosh ahanta ma, na-holitompa isht asha pehlich i vhleha, micha na-holissochi vhleha, mikmvt hochi-toka vhleha aiena kvv ai it apihvt ant i kohcha tok.

2. Mihmvt im anum-pulit, Nan-isht ai vlhpesa nana ho ilvppa puta ka isht ish yakohmichi, micha kvna hosh nan isht ai vlhpesa ilvppa chima tok a ish pim anolashke, achi tok.

3. Mihma yvmmak ash ot afalaminchi mvt, Vno ak kia nana achvfa ka hvchi ponaklo la chi hoke, mikma is svv anolashke.

4. Chan baptismo vt vba yak o a minti hokma, keyuk-mvt hatak ak o a minti hokma, nanta ha tok o? im achi tok.

5. Mihma ilap bika nan it im achit maya mvt, Vba yak o a minti tok; il achi hokma, Nanta katiohmi ho yvmma hvch ik i yimm o ke tuk oh cho? acha hinla.

6. Amba anonti, Hatak ak o a minti tok; il achi hokma, Chan vt hopaii a tok a okla yimmi hatuk okvt, okla momvt tvi isht pi bola hinla hoke, achi tok.

7. Mihmvt afalaminchit, Kanimampo kak a tok a kil itha-noshke, okla im achi tok.

8. Mihma Chisvs ash ot, vno ak kia nan isht ai vlhpesa nana ho ilvppa puta ka isht yakohmichi li hatuk vt ak hvchim anoloshke, im achi tok.

9. Mihmvt nan-isht vlhpisa ilvppa okla ha isht anum-pulit isht ia tok: Hatak achvfa hosh pakvpi a hokchit tahli cha, hatak toksvli vhleha ho i pota cha, yakni hopaki ho nowvt aya na achiba tok.

10. Atuk osh a waya ont vlhpesvt taha ma, pakvpi a hollokchi a waya ka okla ipeta chi ho, yvmmak ash ot tishu

ha hatak toksvli vhleha hash pit i chvffichi tok: yohmi tok kia hatak toksvli vhleha hash ot yvmmak ash o boli cha, nana ik im iksho ho kanima pit chvffichi tok.

11. Mihma anonti tishu inla ho pit chvffichi tok; atuk o yvmmak ash kia okla bolit hofahyalichi fehna cha, nana ik im iksho ho kanima pit chvffichi tok.

12. Mihma anonti ont atuchina ma pit chvffichi tok; yohmi ma yvmmak ash kia okla bolit ai okpvninchi cha, kocha pit pila tok.

13. Yohmi ma pakvpi a hollokechi vt immi hatuk ash ot, Nanta ho katiohmi la chi cho? svso a holitopa yak o pit chvffichi lashke; yvmmak okmvno okla pisakmvt, holitobla hinla yoba ka, achi tok.

14. Yohmi tuk kia hatak toksvli vhleha hash ot yvmmak ash o pisa mvt, Ilvppak osh immi ha he mak oke; inta! kiloh vbi, atuk mvt nan im ai vlhtoshowa he tuk vt hvpimmi ha hinla hoke, ilap bika it im achit maya tok.

15. Mihma yvmmak ash o pakvpi a hollokechi a ishit a kohchi cha, okla vbi tok: yohmi kvno pakvpi a hollokechi vt immi hatuk ash ot yvmmak ash o nanta ho katimihcha hinla cho?

16. Yvmmak ash ot ayvt vla cha, hatak toksvli vhleha ilvppak ash vbit tahlkmt, pakvpi a hollokechi ash inla yo i pota hi oke, achi tok. Mihma okla haklo mvt, Yohma hi a Chihowa yvt ik ahino kashke, okla achi tok.

17. Mihma okla ha atokolit pisa mvt, Yohmi ka tvli ya chuk-ikbi vhleha hvt shitlema yash o mihi ash inli hosh chukbika nutaka in tola holitopa i shahli ho tovrshke, achi holisso ilvppvt katiohmi hoh cho?

18. Kvna hosh tvli yvma onvtulakmvt, kobahla he; amba yvmmak ash ot kvna ho onvtula hokmvt, litolit kaiyancha hi oke, achi tok.

19. Yohmi ma hvshi kanvlli vlhpisa yvmmak fehna ka na-holitompa isht asha pehliche vhleha, micha na-holissochi vhleha aiena kv, yvmmt nan-isht-vlhpisa ilvppa ilap ak o isht anumpuli hatuk a okla akostininchi hatuk osh, yvmmak ash ishi bvna hokak osh okla hak o i nukshopa tok.



20. Mihmvt okla apesvchi beka ; yohmi mvt hatak vllhpesa ilahobi cha, yvmmak ash ilap im anumpa akinli hō ai isht onochi : yohmi hokmak osh yvmmak ash ishit hatak pebli-chi ibbak a ont fohki na nana im apesa hinla ka, na pisa vhleha lia tohno tok.

21. Mihmvt yvmmak ash ot okla i ponaklot, Nan ithvnanchi ma ! nana kv̄t ai-vllhpiesa hō ish miha, mikmvt ish ithvnanchi, yohmi kv̄t hatak mvt a chim it i shahsholi keyu, amba Chihowa i hina ai ahli mak o ish ithvnanchi chatuk a il ithaiyanvshke.

22. Noshkobo isht chumpa tvli holisso a Sesa yak o ima he ai vllhpesa hokmá, keyukmá, nanta cho ? pit achi tok.

23. Yohmi kia yvmmak ash ot okla nan-ilahobi ka akostinichi hatuk osh, Nanta katiohmi hō imomakachit hvs sa pisa cho ?

24. Iskvli a oh a haiakvchí. Kv̄ta hak o holbvt toba hō, mikmvt kv̄ta hō a hohchifo hō ? im achi tok. Mihma afalaminchí mvt, Sesa yak oke, okla im achi tok.

25. Mihma yvmmak ash ot, Yohmi hoka nana kv̄t Sesa yak o ai immi hokma Sesa yak o hvsh imashke ; mikma nana kv̄t Chihowa yak o ai immi hokmvno Chihowa yak ashke, im achi tok.

26. Yohmi ma okla itikba ya im anumpa ha ai isht onocha he keyu mvt, yvmmvt nana miha ka anukhlakancha cha, nana ik acho ki tok.

27. Yohmi ma Satusi vhleha kanimi kv̄t, Illi yvt falamvt tana he keyu, achi chatuk osh im ai vlla cha, i ponaklot,

28. Nan-ithvnanchi ma ! hatak nana kia itibapishi hv̄t illi kv̄t tekchi vt asha hosh, vlla yvt iksho hō illi hokma, itibapishi hatuk ak osh tekchi atuk a ilauei cha, itibapishi hatuk a vlla isht im ai ikba hi oka, Moses vt holissochit pi bohli tok.

29. Yohmi tok o itibapishi hv̄t untuklo hosh asha tok : atuk o akni ak osh ohoyo itauawa tuk osh, vlla yvt iksho hō illi tok.

30. Mihma atukla kash ot yvmmak ash ilauei tuk osh, anonti vlla yvt iksho hō illi tok.

31. Yohmi ma ont atuchina kash ot ilauei; yohmi tok o ont isht untuklo kash kia yummak ash inli ho chomit ilauei; yohmi kv̄t vlla kia iksho ho illi tok.

32. Ont isht aiyopi fehna ma ohoyo hash kia illi tok.

33. Yohmi ka untuklo kash ot yumma tekchi ikbit ilauei tok okno, illi yvt falamvt tanikma, katima kak o tekchi mak a hi oh cho? achi tok.

34. Mihma Chisvs vt afalaminchit, Yakni ilvppa vlla yov̄to itauwaya, mikmvt vlhpovvchit itauwayvchishke.

35. Amba yakni yumma pisa he, micha illi tok vt falamvt tana he aiena kv̄t ai im vlhpesa tuk yummak okv̄to itauwaya he keyu, micha it im apovvchit itauwacha he keyu hoke,

36. Mikmvt himmakma illa he keyu; yummak okv̄t enchil vhleha hak o ai itilau i hokv̄t, micha falamvt tani tok okla hokv̄t Chihowa im vlla mak oke.

37. Illi yvt tana he, Moses ak kia bv̄faha anukaka ya ai otv̄nichi mak osh Chitokaka yvt Eblaham in Chihowa, mikmvt Aisaak in Chihowa, micha Chekob in Chihowa aiena ka hochihifo tok.

38. Yummak okv̄t illi ak o in Chihowa yo keyu, amba okchaya yak oke; yummak o moma kv̄t ai okchaya hoka, im achi tok.

39. Mihma na-holissochi vhleha kanimi kv̄t afalaminchit, Nan ithvnanchi ma! vlhpesa fehna ho ish mihvshke, achi tok.

40. Mihmvt yummak atuk o i himmakma okla nan i ponaklo kv̄t nukwia tok.

41. Mihma yummak ash ot okla hash, Katiohmi ho Klaist vt Lewi a Ushi okla achi cho?

42. Mihma Lewi vt ilap inli kv̄t ataloa holisso ha, Chitokaka yvt an Chitokaka ya, Svbbak isht-impakimma ya ish binili na,

43. Chin tv̄vp vhleha ha chiyi yvt ai-o-hikia yo ikbi lashke, im achi tok, achishke.

44. Lewi vt yumma Chitokaka achi, yohmi ka katiohmi hosh ilap ushi oh cho? im achi tok.

45. Yohmi mvt okla momvt haklo na nan im ai ithvna vhleha yash,

46. Na-holissochi vhleha nafohka holitopa hofvloha ho abehkvchit itvnowa bvnna, micha ilhpak a kanchi ai it-aiokpvchi yak o, micha sinakak puta anukaka ma ai-o-minili holitopa i shahli puta kak o, mikmvt impa chito asha ka aia-sha holitopa i shahli puta kak o ai im achukma vhleha;

47. Ohoyo i hatak illi vhleha in chuka puta ka a wehpuli, micha peh ilahobi kvv vba pit anumpuli aiena kvv falaiachi vhleha ha ahah! hvsh im aiahnashke; yvmmak okvto na palvmmi chito i shahli ho pisa he mak oke, im achi tok.

## CHAPTA XXI.

Ohoyo i hatak illi yosh Chitokaka ya na kvvtnosi pit isht aiokpvchi ho, Chisvs vt ahninchii fehna, i. 5 Tempel vt ont aiokpulokvt taha hi a, anonti Chelusalem vt ont aiokpulokvt taha cha, chukillissvt talaia hi a isht anumpuli; 25 micha ilap vt vla chikma, nan isht atokowa puta kvv kaniohma hi a anoli.

1. MIHMUT vba chakalit hopokoyo mvt, hatak nan in laua vhleha hvv tvli holisso abohli holitopa yo in tvli holisso ya pit apittvt maya ho pisa tok.

2. Mihmvt ohoyo i hatak illi ilbvsha yosh mait tuklo ho yvmma pit apitta ka, pisa akinli tok.

3. Mihmvt yvmmak ash ot, Ahli mak o hvchim achi lishke, Ohoyo i hatak illi ilvppvvt moma i shahlichit pit fohkishke.

4. Ilvppak okvto moma kvv nan in laua hatuk osh ai im atampa kvv Chihowa isht aiokpvchi abohli ya pit apittvshke; amba yvmmak okvto ilbvsha yosh isht ai okchaya he vt in tonla tuk vt lvshumit pit abehlishke, achi tok.

5. Yohmi ma kanimi kvv tempel vt tvli hochukma, micha na hvlbena puta ishit shema fehna ka okla isht anumpulit maya ma, yvmmak ash ot,

6. Ilvppa puta hvsh pisa ka, tvli achvfona kia aka ik itolo ke tuk osh, it o tvlkanchit itonla kvv ai iksho ka he nitak vt vla hi oke, achi tok.



7. Mihma okla i ponaklot, Nan-ithvnanchi ma! katiohmi fokak mak o ilvppa puta kvt ai yvmohma hi oh cho? micha ilvppa puta kvt ont a yvmohma chik ma, nan-isht atokowa nanta hosh otaiyana hi oh cho? achi tok.

8. Mihma yvmmak ash ot, Ahah! hvsh ahni cha, ik hvchi yoshubo kashke; sa hohchifo ha isht hochifo kvt, Ŭno ak osh Klaist sia hoke, achit aya kvt laua hi oka; ai yohma he nitak vt ik hopakoshke: yohmi kia yvmma hvch ik iakaiyo kashke.

9. Tvrvp asha, micha nana ik it im achukmo fehna ka hvsh haklo kia, ik hvchi nukshopo kashke: yvmma puta kak osh tikbanli ai yvmohma hi oka; amba ont ishtaiyopi kvto chekosa chi keyu hoke.

10. Yvmma fokakma oklushi achvfa kvt oklushi inla ya it in tanampa he; yohmikma miko apehlichy achvfa kvt miko apehlichy inla ya it in tanampa hi oke.

11. Yohmikma kanima ai ilaiyukachit yakni vt winakvchi chinta he; mikma hohchvfo chinto, micha abeka okpulo aiena kvt asha he; yohmikma nana pivt ai i nukshopa he fehna, micha nan isht atokowa chinto aiena kvt vba ya auet a haiaka hi oke.

12. Yohmi kia ilvppa puta kvt ik a yvmohmo kisha ka, sa hohchifo pulla hatuk mak o okla hvt ibbak a hvchi onochi cha, hvch issikkopala he; yohmi kvt miko vhleha, micha hatak pehlichy a puta itikba ya isht hvchi ai onvt, sinakak puta isht hvchi ai ona, mikmvt aboha kullo a hvchi fohka hi oke.

13. Mikma yvmmak ash osh nan isht a hvchim atokoli mak a hi oke.

14. Yohmi hoka afalaminchit nana ho hvsh miha hi vt tikbanli hvch ik anukfillo ka chi kvt, hvchi chukvsh ma hvsh il anukfoyukashke.

15. Ŭno ak osh itih, mikmvt im anukfla hopoyuksa aiena ka hvch ima likma, yvmmak o hvchi nukkilli vhleha hvt i sanalit miha, mikmvt a kanimanacha he kia iksho ka hi oke.

16. Micha hvch iki, hvch ishki, mikmvt hvsh itibapishi

vhleha, hvchi kanomi vhleha, micha hvch i kana vhleha aiena kv̄t hvch ishit, okla ibbak a a hvchi fohka he: mikmvt hvsh kanima mvt, yvmmak osh ai ahni hō, hvch illa hi oke.

17. Micha vno sa hohchifo pulla hatuk mak o hatak moma kv̄t isht a hvchi nukkilli hi oke.

18. Yohmi kia hvchi noshkobo pashi vt achvfa kia ai okpuloka he keyu hoke.

19. Nuklanlv̄t achunanchit hvsh ahanta pulla hosh hvchim ilhfiopak atuk ma hvsh il ai eshashke.

20. Micha Chelusalem a tvshka chipota puta ka isht apakfoyupa na hvsh pisakmvt, yvmmvt aiokpulokvt taha chi ka, atukonofa ka hvsh ithaiyanashke.

21. Yvmma fokakma Chutea ya aiasha tuk vt nv̄nih chaha foka pit yihlepakma; anonti yvmma ai iklv̄nna aiasha tuk vt a kocha wihashke; mikma kocha foka tvmahushi maya tuk okvto yvmma pit ik vlbeho kashke.

22. Nana puta hōlihiso tok vt ont ai ahla chi mak o, ilvppvt na palvmmi chinto kv̄t isht ai im vlhpisa he nitak a hi oke.

23. Amba nitak yvmma foka hō vlla shanli, micha pishinchi aiena hokvto i palvmma he; na komunta chinto kv̄t yakni a ai onvtuyulakma, vba auct i nukkilli mvt okla ilvppa onvtula hi oke.

24. Yohmikma bvshpo falaia yo isht akakoha he; micha yuka tobv̄t oklushi moma ai im ohona he; mikma Chelusalem a Chentail okla hosh aka a hvhlihinchī na Chentail okla nana im ai vlhpisa atuk vt ont ai ahlik mak a hi oke.

25. Yohmikma hvshi, micha hvshi-ninak-aya, mikmvt fochik puta aiena ka nan isht atokowa kv̄t aiasha he; mikma oklushi puta a kaniohmi ik ithanot isht a komunta yvt yakni paknaka ya ai onvtuyulakma, okhvta oka bvnvtha kv̄t fohompa he;

26. Ilvppa puta kv̄t yakni a ai onvtuyula chi ka hohoyo tuk vt hatak chukvsh puta kash ot nukshopvt illa hi oke: vba nan isht aiahli ka puta asha kash ot winakahancha hi oke.

27. Yvmma fokakma Hatak Ushi vt nan-isht-aiahlīka,

micha isht a holitopa chinto aiena ka il ai eshit a hoshonti anukaka minti na okla pisa hi oke.

28. Mikma nana ilvppa puta kv̄t ont aiahlit isht ia, yoh-mikma a hv̄chi hlakofa ch̄i kv̄t atukonofvt taha hoka, vba pit hopokoyot hv̄chi noshkobo h̄a hv̄sh vba chakalichashke, im achi tok.

29. Mihmvt nan-isht vlhpisa h̄o okla hash isht im anum-pulit, Fik vpi, micha iti puta ka ho pesá.

30. Yvm̄mvt bokoplit kohcha na hv̄sh pisakmvt, hv̄chish-no akinli kia toffa vt olanlosi ant takanli ka hv̄sh ithana chatuk oke.

31. Yohmi kv̄t yvm̄mak inli h̄o chiyuhmit nana ilvppa puta kv̄t ont aiahli na hv̄sh pisakmvt, Chihowa apehlichika yvt auet olanlosi vla ka hv̄sh ithaiyanashke.

32. Ahli mak o hv̄chim achi lishke; Himak a hatak asha ilvppvt ont ik ai ikshot ik kv̄nio k̄isha h̄o, momvt ont aiahli ha ch̄i hoke.

33. Vba shutik, micha yakni aiena hokv̄to ont ik ai iksho ka he; amba vno vm̄ anumpa puta hatuk vto ont ik ai iksho ka he keyu hoke.

34. Micha ahah! hv̄sh il aiahnashke; yvm̄mak keyuk-mvt kanima kash inli h̄o isikopa, micha na homi ishkot haksi, mikmvt yakni ilvppa antvt nana ai okchaya he anuk-foyuka fehna aiena kak osh hv̄chi chukv̄sh ma isht alótvt atvpa, yohmi na hv̄ch ik akostinincho h̄o, nitak yvm̄mvt ayvt ant hv̄ch̄i kohcha hinla hoke.

35. Yvm̄mak okv̄t nan-isht hokli o chiyuhmit ayvt, yakni pataiya ai ahashwa tuk a mominchit i kohcha hi oke.

36. Yvmohmi hoka il a nuktahlvt vba pit anumpohonlit hv̄sh biliashke: yohmi tuk osh nana kv̄t a yakohma ch̄i puta ka mominchit ai i hlakofit, Hatak Ushi itikba ya hioh-maya hi vt a hv̄chi vlhpesashke, im achi tok.

37. Mihmvt nitak okv̄no tempel anukaka yak o nana ithvnanchit anta tuk osh, ninak ano kohchvt ia mvt, nv̄nili chaha Alif hohchifo h̄o ont antvt on onna tok.

38. Atuk o onnahinli fehna i haponakla ch̄i kv̄t, okla hv̄t momvt tempel a im ai ona tok.



## CAPTA XXII.

Chutas Iskaliot vt Chisvs a ishit na-holitompa isht asha pehlichí vhleha ha ibbak fohka chí kvt nan it im apesa, 1. 7 Pita, Chan ita tuklo hosh ont ai vbanvblit isht vlpisa ka atahli ho, Chisvs vt auah-tuklo yash it ibai impa mvt, 19 opiaka na holitopa impa isht vlpisa ka apesa. 31 Pita na-yimmi im anukfila hatuk vt i kúnia chí keyu, amba hituchina ha yo ilapa ik ithano chatuk vt miha chí ka, Chisvs vt im anoli. 39 Nana kvt im a palvmmi, micha vba pit anumpohonlit osapushi anukaka ya anta; 47 Chisvs a okla isht ia na na holitompa isht asha pehlichí a im ona. 54 Pita yvt hituchina ha yo Chisvs a ik ithano ka miha tuk osh, i himmak o nukhaklot yahaya fehna, 63 mihma Chisvs a okla ik ahobalot na mihachi. 66 Chisvs a ilauelet nan ai apesa ya isht ona na illa chí im vlpisa.

1. MIHMA vbanvblit ont ia achi, pvska ik shatvmmo impa hv́t ai ona he tok.

2. Yvmohmi ma okla hak o i nukshopa hatuk osh, na-holitompa isht asha pehlichí vhleha, micha na-holissochi puta kash ot ymma kaniohmichit vba hinla kvt akostinichi bahana tok.

3. Yohmi ma Setan vt Chutas Iskaliot hohchifo, auah-tuklo ka ai iba holhtina hatuk ash ont chukowa tok.

4. Mihma yvmmak ash ot ia mvt, kaniohmichit ishit ibbak fohka hinla kvt, na-holitompa isht asha pehlichí vhleha, micha kvpitvni vhleha aiena ka ont isht it im anum-puli tok.

5. Mihma okla na yukpa mvt, yvmmak ash tvli holisso ima chí kvt im apesa tok.

6. Mihma, Yohma hinla kvt miha mvt, okla laua yvt ai iksho ma ataklvchit ishit, ibbak a fohka hinla kvt ai vlpesa hi a hoyo tok.

7. Atuk o pvska ik a shatvmmo ka he, micha ai vbanvblit ont ia illa he nitak vt ai ona tok.

8. Mihma Chisvs vt Pita, Chan ita tuklo ka pit tihlelit, Ivt ai vbanvblit ont ia ya hvsh pim atahli tuk o, iloh impashke, achi tok.

9. Mihma yummak ash ot, Katima yak o il ai atahla hinla ka ish ahni cho? im achit okla tok.

10. Mihma, Yakeh! tvmaha ha ont hvsh chukowakma, hatak vt lukfi kotoba oka vlhto ho sholi kvv hvchi afama chi hoke; yummak o apihvt aboha kanima yo pit chukowakma, hvsh chukowashke.

11. Mikmvt hatak chuka yumma ai vttat yatuk ash, Nanthvnanchi vt, Katima ko ai impa aboha yvt talaia ho, nan vm ai ithvna vhleha ha pehlichit ai vbanvblit ont ia ya ai it ibai impa la chi cho? auet chim achi kvno; hvsh im achashke.

12. Yohmikma yummak ash ot vba potvlhpo chito hosh nana ai vlhtaha achukma ho hvchi pisacha chi hoke; yummak o hvsh ai atahlashke, im achi tok.

13. Mihma itiachi tuk osh, yummvt nana ai i miha hatuk ash ont ai vlhpiesa na pisvt okla tok; yohmi mvt ai vbanvblit ont ia ya ai atahlit okla tok.

14. Atuk o hvshi kanvlli vt ai ona ma, vbanumpeshi auah-tuklo kash ot apiha ho, binili tok.

15. Mihmvt, Ik si ai ilbvsho kisha takla kak osh ai vbanvblit ont ia ilvppa a hvch ibai impa ka ahni kvv ahni li fehna tuk oke.

16. Himak a pilla ma yumma ak ai vpo mak o, Chihowa apelihika yak o ai isht aihla chi mak oke, hvchim achi lishke, im achi tok.

17. Mihmvt isht ishko a ishi cha, vba pit aiokpvchi mvt, Ilvppa oh ishi cha, hvsh ita kashkoashke;

18. Pakvpi a waya ka ak ai ishko mak o, Chihowa apelihika yvt vla chi mak oke, hvchim achi lishke, im achi tok.

19. Mihmvt pvskaa ya ishi cha, vba pit aiokpvchi mvt, tushalichi cha, yummak ash o ima mvt, Ilvppvt sa nipi yosh hvchishno yak o isht hvchi vlhtoba mak oke, isht hvsvthaiyana chi mak osh ilvppa hvchi yvmohmashke, achi tok.

20. Impvt issa ma, isht ishko ma aieninchit, Isht ishko ilvppvt nan vlhpisa himona yosh vm issish vt hvchishno atuk mak o hlatapa ka isht a toba mak oke.

21. Yohmi kia yakeh! svshit inla ibbak fohka chi ibbak vt si awant ai impa ya ashvshke.

22. Yohmi ka Hatak Ushi yokvto ai im vlhpisa tok mak osh yohmi mvhli; amba ishit inla ibbak fohki yvmmak okvto ai i palvmmi mak oke.

23. Yohmi ma, E katima mak osh ilvppa a pi yakohma chi hatuk oh cho? ahnit il im asilhhvchit maya tok.

24. Atuk osh anonti, E katima kak osh moma i shahli ha hinla chishba? ahnit ai ita-chapovt maya tok.

25. Yohmi ma yvmmak ash ot, Chentail okla i miko vhleha hak osh i na-hullo ho tobt, nana ho ahnikmvt, ai i yvmihchi chatuk; micha yvmma ai i shahlit nan im ai vlhpisvt antakmvt, nana achukmali yo hohehifo chatuk.

26. Amba hvchishno vto hvchi yvmohma he keyu hoke; mikma kvna hosh moma i shahli kv hvch ibafoka hokmvt, yvmmak osh himmak o chohmashke; mikma na pehlichi yokmvt, nan-isht im vta yo chiyuhmashke.

27. Ashvt impa kak okma, nan isht im anta kak okma, nanta kak osh i shahli yo? ashvt impa kak keyu? yohmi kia vno vto nan isht im vta mak o chohmi hosh hvchi ibafoka lishke.

28. Isht ai imomaka sa pesa a puta ka hvchishno ak osh hvs si apeha beka tuk mak oke.

29, 30. Yohmi ka a pehlichi li a vm ai impa ai impvt, ai ishкот, aiasha holitopa ka chieyvt, Israel hatak isht-ai-unchululi auah-tuklo ka nana hvsh im apihisa chi mak o, apehlichika ya hvch im apesa li kv, vno a Aki vt ai vm apesa tok a chiyuhmichi lishke, im achi tok.

31. Mihmvt Chitokaka yash ot Saimon, Saimon, yakeh! Setan vt chishi cha, mvshlichit onush o chiyuhmichi ka brnna tuk.

32. Yohmi kia na chi yimmi tuk vt ik chi kvnio ka chi ka, vba pit isht chi anumpuli li tuk; yohmi ka a filemvt ish ile kostininchikmvt, ish itibapishi vhleha ha ish hlampkochashke, achi tok.

33. Mihma yvmmak ash ot, Chitokaka ma! aboha kvllo,



micha ai-illi aiena ka chi awant ona la hi vt vm vlhtaha hoke, im achi tok.

34. Mihma, Pita chia ha chim anoli lishke, himak nitak a akaka yvt ik olo kisha ho, hituchina ha chik svthano ish miha chi hoke, achi tok.

35. Mihmvt, Tvli holisso i shukcha, micha bahta pinak ai-vlhto, mihmvt shulush aiena kvk iksho ho pit hvchi tihleli li chash, nanasi kia isht ik hvchim ai ono ke tuk o? im achi tok; mihma, Nanasi kia ik pim ai ono ke tuk keyu, okla achi tok.

36. Mihma, Amba himak okvno, kvna hosh tvli holisso i shukcha yvt in tonla tukmvt, ishi cha, anonti bahta pinak-ai-vlhto ma mihinlashke; yohmikma kvna hosh bvshpo falaia yvt ik im iksho ke tuk mvt, im anchi a kanchi cha, achvfa ka chumpashke.

37. Yohmi kvk yvmmak ash ot, Nan-vlhpisa kobvffi vhleha ho ai iba holhtina tok, achi holisso tok ilvppvt vno ak o ant si ai isht ai ahla chi ka pulla moma hoke; nana kvk vno ak o vsht anumpa tok okvto ont ai vbla chi mak oke, im achi tok.

38. Mihma, Yakeh! Chitokaka ma! bvshpo falaia yvt tuklo hosh yak chiyvshke, achi tok. Mihma, Yvmmak oh kia vlhpesa hoke, im achi tok.

39. Mihmvt yvmmak o yohmi chatuk okvt, kocha ia mvt, Alif nvnih chaha ya ona ma, nan-im ai ithvna vhleha hash kia iakaiya tok.

40. Mihma yvmmak ash ot yvma ont anta mvt, A yoshuba ya hvch ik iba chukowo ka chi kvk vba pit hvsh anumpohonlashke, im achi tok.

41. Mihmvt ai i filvmmitt tvli bohpoa ont ai itola ho tuk ohmi foka ho, ont hvchukbihlept hikia cha, vba pit anum-pulit,

42. Aki ma! vlhpesa ish ahni hokmvt, isht-ishko ilvppa is'sa kanvllichashke: yohmi kia vno ak osh ahni li kak o keyu; amba chishno ish aiahni kak o ai yvmohmashke, achi tok.

43. Mihma enchil vba minti kvk ant i haiakvt hlampkohonchi tok.

44. Mihma i palvmmi kv̄t a fehna hatuk okv̄t, i shahlichit a chilitv̄t v̄ba pit asilhha tok: mihma laksha kv̄t issish hlatapa chinto aka fohompa hō chiyuhmi tok.

45. Atuk osh v̄ba pit asilhha tuk ash ot wakaya cha, nan im ai ithv̄na v̄hleha aiasha ka v̄la mvt, nukhaklo kv̄t nusi tuk osh aiasha na pisa mvt,

46. Nanta katiohmi hō hv̄chi nusi cho? ai-ashv̄chika ya hv̄ch ik iba chukowo ka chī kv̄t, tanit v̄ba pit oh asilhhá, im achi tok.

47. Mihma yv̄mmvt anumpuli moma hō, auah̄tuklo ai iba holhtina Chutas hohchifo hash ot okla lawa ka in tikba hikv̄t aya tuk osh, i suksowa chī kv̄t Chisvs a atukonofv̄t ia tok.

48. Yohmi kia Chisvs ash ot, Chutas ma! na suksowa<sup>nis</sup> hak o Hatak Ushi a isht haksichit ishit inla ibbak a ish fohki hoh cho? im achi tok.

49. Mihma apeha atuk ash ot nana kv̄t a kaniohma hinla ka pisa mvt, Chitokaka ma! bv̄shpo falaia yō isht e fahama chī cho? im achi tok.

50. Mihma achv̄fv̄t na-holitompa isht asha pehlichī i shahli in tishu hō fahama cha, ishtimpak imma haksobish a tv̄bli tok.

51. Mihma Chisvs ash ot anumpulit, Yv̄mmak okv̄no ant ik a yohmi na hv̄sh aiahnashke, achi tok. Mihmvt hakso-bish ash i potoli mvt, hlakofichi tok.

52. Mihmvt Chisvs ash ot na-holitompa isht asha pehlichī v̄hleha, micha tempel i kv̄pitv̄ni v̄hleha, mikmvt hochitoka v̄hleha aiena kv̄t ai im v̄la tuk ash, Na-hukopa yō ayv̄t i kohcha hō chiyuhmit bv̄shpo falaia, mikmvt iti tv̄ptua aiena ka sholi hosh hv̄sh itv̄nowa cho?

53. Nitak moma hv̄chi takla tempel a anykaka ya ahanta li kv̄no; ibbak nana kia hv̄ch ik si o welo ke tuk; yohmi kia himak okv̄to hv̄chishno, micha aiokhlilika nana im aiahli aiena ka hv̄chī nitak mak okv̄t, im achi tok.

54. Yohmi ma yv̄mmak ash o okla ishi mvt, isht iyt na holitompa isht asha pehlichī i shahli in chuka yō ont ishit chukowa tok. Mihma Pita yv̄t auet i mishemanchit iakaiya tok.

55. Atuk o kvsbi aboha ai itin-takla talaia tuk a ai ik-lvna ka okla luak ai oti cha, binohlit taha ma, Pita yvt takla binili tok.

56. Atuk o yvmmvt luak bilika ont binili ka, ohoyo himita achvvt pisa cha, atokolit pisa fehna mvt, Hatak ilvppak kia yvmma awant aya kamo, achi tok.

57. Mihma ik ithano ilahobit, Ohoyo ma! yvmma ak ithanoshke, achi tok.

58. Atuk o anonti in chekosi ma, inla yosh yvmmak ash pisa mvt, Chishno vt yvmma ai achvfa chia akinli, achi ma; Pita ash ot, Hatak ma! mihi yo sia keyushke.

59. Atuk o yvmmak atuk a i hvshi kanvlli achvfa foka ma, inla hosh kvllochi fehvt miha mvt, Ilvppak kia yvmma awant aya yatuk vt aiahli hoke; ilvppvt Kalili hatak oka, achi tok.

60. Mihma Pita yash osh, Hatak ma! nana ho ish miha ka ak ithanoshke, achi tok. Mihma ashalika anumpohonli moma na akaka yvt ola tok.

61. Mihma Chitokaka yvt filemvt Pita ya pisa tok. Mihma Pita yash ot, yvmmvt, Akaka yvt ik olo kisha ho, hituchina ha chik svthano ish miha chi hoke, im achi tuk Chitokaka im anumpa hash ithaiyana tok.

62. Mihmvt Pita yvt kohcha cha, yahaya fehna tok.

63. Mihma Chisvs ash apesvchit maya tuk hatak ash ot ik ahobalot na-mihachi mvt, boli tok.

64. Micha nishkin a okla ompohomot, nashuka ya isso mvt, kvt ho sh chisso ho? akostininchit anoli, achit i po-naklo tok.

65. Mihmvt ik ahobalo fehvt nan ilaiyuka isht im i sanalit mihachi kvt lauachi tok.

66. Atuk o onvt taha mak inli ho, hochitoka vhleha, micha na holitompa isht asha pehlich i vhleha, mikmvt naholissochi vhleha aiena kvt itahoba cha, yvmmak ash ilaue lit im ai-apesa aboha ya ishit chukowa mvt,

67. Chishno ak osh, Klaist mak o chia hoh cho? pim anoli, im achi tok. Mihma, Hvchim anoli li mak o, hvchi yimma he keyu.



68. Micha vno mvt na hvchim asilhha li mak o, afalaminchit hvs svm anumpula he keyukmvt, anonti ant ik i hotofá, hvs svm ahna he keyu.

69. Himak a pilla ma Hatak Ushi vt Chihowa nan okluha imaiya im ibbak isht impak imma ya a binila he mak oke, im achi tok.

70. Mihma momvt, Mih-kvto chishno ak osh Chihowa Ushi chia ho? okla achi tok. Mihma yvmmak ash ot, Mihi yo sia mak atuk o hvsh mihvshke, im achi tok.

71. Mihma, Hvpishno akinli hosh ilap itih fehna iloh a haklo kv, himmakma nan isht atokowa ka iloh ahna hinla cho? okla achi tok.

### CHAPTA XXIII.

Chisvs a okla ilaelit Pailat ak o isht im ona ma, 1, 13 Pailat ash ot, okla ak osh yvmma im ahni fehna hatuk o, Chisvs vt ititaiyukhvna ahonvha chi ka, im issa cha, Balabbas ak o i hotofi. 26 Chisvs vt iti-taiyukhvna ahonvha chi ho okla isht ia mvt, Saimon ak osh iti taiyukhvna ya iba shola chi ka atohno; 33 hatak hukopa tuklo hosh apihvt iti-taiyukhvna ahonvha ak inli; achvfa kvto Chisvs vt yvmma takanli moma ho, i yimmit aiokpvchi. 44 Chisvs vt illi. 50 Chosef Alimahlea minti osh Chisvs haknip a ishi cha, hohpi.

1. MIHMA okla laua yvt momvt wakaya cha, yvmmak ash ilaelit Pailat a isht im ona tok.

2. Yohmi mvt, Hatak ilvppvt Klaist miko yo ile mihvt, Sesa ya noshkobo isht chumpa tvli holisso im itahobi chatuk a im alvmminchit ahantvt, pim okla talaja ka okpvnit ahanta ho, e pisa tuk oke, achit anumpa okla onochi tok.

3. Mihma Pailat vt yvmmak ash o i ponaklot, Chishno ak osh Chu okla ha i miko chia mak oh cho? achi tok. Mihma afalaminchi mvt, Mih-mak atuk ish mihvshke, achi tok.

4. Yohmi ma Pailat ash ot, na-holitompa isht asha pehlichu vheha, micha okla puta kash, Hatak ilvppa nan ik ai vhpeso nana kia ak ai akostininchoshke, im achi tok.

5. Mihma okla isht i shahlit a chilitvt, Ilvppvt vmmoma ka Kalili ak o ai isht ia hosh Chu okla aiasa ka mominchit a hlopullit nana im abvchit, okla ha ai okpvnichit isht aya hosh ilvppa vla hoke, achi tok.

6. Mihma Kalili achi na Pailat vt haklo mvt, Kalili hatak okmá, nanta hatuk ba ? achit ponaklo tok.

7. Atuk osh Helot apehlichí yak o ai iba fohka atuk o akostininchi makinli hosh, Helot ak kia ilapvt nitak yvmma fehna ma Chelusalem a ant anta hatuk o, pit i chvffichi tok.

8. Yohmi na Helot vt Chisvs a pisa mvt, na yukpa fehna tok : yohmi kv́t yvmma isht ai annoa ka hahaklo ka laua hatuk osh, pisa bv́na fehna tuk a hopaki tok ; yohmi hatuk osh nana a fehna kaniohmi kia a yvmnichi na pisa chi kv́t ahni tok.

9. Mihmvt anumpa lauachit nana isht im asilhhvchi tok : yohmi kia yvmmak ash ot afalaminchi kv́t nana kia ik im acho ki tok.

10. Mihma na-holitompa isht asha pehlichí vhleha micha, na-holissochi vhleha aiena kash ot kv́llochi fehnvt anumpa onochit hiohmaya tok.

11. Mihma Helot ash ot in tvshka chipota vhleha hash o pehlinchi cha, yvmmak ash o na-keyukechi fehnvt isht itukhlakavt ik ahobacho ke tuk : mihmvt na-fohka tohbi holitompa ho fohkachechi cha, falaminchit Pailat. a pit i chvffichi tok.

12. Mihma tikba hokvno ai it i nukkilli yoh chatuk ak osh, nitak yvmma fehna ka Pailat, micha Helot itatuklo kv́t ai iti kana toba tok.

13. Mihma Pailat ash ot na-holitompa isht asha pehlichí vhleha, micha hochitoka vhleha, mikmvt okla a puta kash hoyot itahobi mvt,

14. Hatak ilvppvt okla ha i miko a isht ai iti filamolichi yoke, achi hosh isht hv́s svm vla tuk : mihma yakeh ! hvchi tikba ya nana ka ai im asilhhahanchi li kv́t, anumpa isht hv́sh ai onochi tuk imma ka, nana ik ai-vlhpeso kv́t hatak ilvppa ai a takali ka ak im akostininchoshke.

15. Mihma Helot vt mihinli tuk; yvmmak o pit hvchi a tihleli li; yohmi ka nana ka isht ai illa he vlhpesa ma a takali keyushke.

16. Yohmi hoka fvmmi lish, i hotofi la chi hoke, im achi tok.

17. Yohmi kvv ai-vbanvblit ont ia impa asha ka achv-falichit ai i hotofa hi a vlhpesa ha tok.

18. Mihma himonna achvfa momvt tahpvlvt, Hatak ilvppvno kanima isht ia cha, Balabbas ak o ish pi kohchi-chashke, achi tok.

19. Yvmmak okvt tvmaha ha antvt i miko a ik im antio ka chi ka okla ha anukfohkichi, micha hatak vbi aiena hatuk o, aboha kvllo a pit a fohki tuk a tok.

20. Yohmi hatuk o Pailat vt Chisvs ak o i hotofi ka ahni hatuk osh, himmak ma okla ha im anumpuli tok.

21. Yohmi kia okla tahpvlvt, Iti-taiyukhvna yo ahonvh-lvchi, iti-taiyukhana yo ahonvhlchi, ahanchi tok.

22. Mihma ont atuchina ma, Nanta katiohmi ho? nan ik ai vlhpeso nanta mak o yvmohmi tuk oh cho? nana ka isht ai illa he vlhpesa ka vno vt ak im akostininchoshke; yohmi hatuk osh fvmmi lish, i hotofi la chi hoke, im achi tok.

23. Mihma okla a chilita fehvvt chitolit anumpuli hosh, yvmvvt iti-taiyukhvna ahonvhla hinla ka asihhlha tok: mih-mvt yvma, micha na-holitompa isht asha pehlich vhleha aiena im anumpa hak osh imaiyachi tok.

24. Mihma Pailat ash ot okla hvv nana asilhha tuk mak o vlhpesa chi ka apesa tok.

25. Mihma yvmmak o okla asilhha tuk oka, i miko ik im antio ka chi ka anukfohkvchichi, micha hatak ma vbi aiena hatuk o aboha kvllo a pit a fohki tuk a tok ash, i kohchichi tok: amba Chisvs ak okvno nana ho okla ahna chi ka, im issa tok.

26. Mihma yvmmak ash o kanima isht ivt itvnova mvt, Silinian hatak Saimon osh haiaka vttvt minti ho okla halvllit ishi; yohmi mvt yvmmak osh Chisvs a iba shola chi ka, iti-taiyukhvna ya om bohli tok.

27. Yohmi ma okla lava fehna kvv iakaiyvt itvnova ma,



ohoyo aiena tuk osh yvmmak ash o isht nukhaklot chitolit yahaya tok.

28. Yohmi kia Chisvs ash ot pit filema mvt, Chelusalem ushetik hvchia ma! vno ak okvno svsht yaiyvt nishkin okchi hvch ik hlatvblo kashke: amba hvchishno inli kak o isht ile yaiyvt nishkin okchi hvsh hlatvblikmvt, hvchim vlla aiena kak ashke.

29. Yakeh! vlla ik im iksho, micha oshvto nana a foyuka keyu, mikmvt i pishik vt na pishechi keyu aiena hokvto im achukmvshke, okla acha he nitak vt mihintishke.

30. Yvmma fokakma nvnih chaha puta ka, Pi o kinahli, im achikmvt, nvnih chipunta ya, Hvsh pi ompohomashke, achit isht ia hi oke.

31. Yohmi ka iti vt okchaki o ilvppa okla ai yvmichi tuk mvno, anonti shila yokvno nanta mak osh a katiohma hi oh cho? achi tok.

32. Yohmi ma hatak haksi tuklo hosh illit okla chi ho, ai apehalinchit isht aya tok.

33. Atuk osh Kalfali hohchifo yvmmak atuk ash okla ai vla mvt, yvmmak ash, mikmvt hatak haksi tuklo aiena kash ot achvft ibbak isht-impak imma yo takali ma, anonti achvft vlvfbeka tvnnvp o takali ho, iti-taiyukhvna ya ai aho-nvhlichí tok.

34. Yohmi ma Chisvs ash ot, Aki ma! ish i kashofashke: nana ka kaniohmi kvv okla ithana ho keyu hoka, achi tok. Yohmi ma i na fohka ya ita kvshkolit mayvt na-shoeli tok.

35. Mihma okla hvv pisvt hiohmaya tok: mihma hochi-toka vhleha mvt ik ahobalot, Inla ya okchalínchi yatuk okvt, ilap ak osh Chihowa i holitopa Klaist atuk okmvt ilap inli kak osh ik il okchalínchí, achi tok.

36. Mihma tvshka chipota vhleha ak kia ai im vlvv, ishit yopulvt, anonti wineka ipeta mvt,

37. Chishno ak osh Chu okla ha i miko chia hokmvt, ish il okchalínchashke, achi tok.

38. Yohmi ma Klik, micha Latin, mikmvt Heblu aiena anumpa ho isht a holisso kvv, ILÜPPAK OSH CHU OKLA HA I MIKO MAK OKE, achi hosh paknaka ya takali tok.

39. Mihma hatak haksi tuklot vba takohli tuk ash ot achvvt yvmmak ash ik ahobalot mihachit, Chishno ak osh Klaist chia hokmvt, il okchalinchichi cha, pishno ma ish pi okchalinchashke, achi tok.

40. Amba achvfa kvto afalaminchit im alvmmmit, Chishno ak kia na chim vlhpisa kvto a miha achvfa hokak osh Chihowa ha chik i nukshopo cho ?

41. Micha pishno ak okvto pim ai vlhpesa ho mvhli; pishno nana il a kaniohmi tuk isht ai vlhtoba he vlhpesa mak o e pisa hoka; amba hatak ilvppak okvto nana ho okpvi tuk keyushke, achi tok.

42. Mihmvt Chisvs ash, Chitokaka ma! ish apehlichika ya ont ish chukowakmvt, is svthaiyanashke, im achi tok.

43. Mihma Chisvs ash ot, Himak nitak a si awant palatais a ish anta chi hoke, ai ahli mak o chim achi lishke, im achi tok.

44. Yohmi ka yvmmvvt hvshi kanvlli vlhpisa ont isht han-nali foka tok; mihma yakni moma ka ai okhlilit kvnia na hvshi kanvlli vlhpisa ont isht chakkali tok.

45. Yohmi ma hvshi vt okhilli ma, nan-tvna tempel anykaka takali atuk vt iklvna ita hlilafa tok.

46. Mihma Chisvs vt chitoli hosh anumpulimvt, Aki ma! sa shilombish a chibbak pit a fohki lishke, achi tok: mihmvt yakohmichit miha mvt, fiopissa tok.

47. Mihma nana kvto ai yvmohmi na Sintulion vt pisa mvt, Ilvppvt hatak ahli achukma yatuk o pulla mvhlishke, achit Chihowa ya holitoblichichi tok.

48. Mihma okla yvmma pisvt ai itahoba tuk ash ot, nana kvto ai yvmohmi ka pisa mvt, momvt ilap ikkishi ha isso cha, falamvt ilhkoli tok.

49. Mihma yvmma ai it ithanaka puta, micha ohoyo Kalili a asht ai apehvt minti tuk aiena kash ot mishema ho auet hielit, na yakohmi puta ka pihisa tok.

50. Mihma hatak vt Chosef hohchifo nan-apesa, micha hatak ahli achukma hosh anta tok.

51. Okla nana im anukfila, micha a kaniohmit maya aiena ka ilvppvto ik ibafohko ki tok: ilvppvt Chu okla in tumaha

Alimahlea ak o ai vttā hosh yummak kia Chihowa apehlichika ya pit hohoyo ya tok.

52. Hatak ilvppak ash ot iwt, Pailat a im ona cha, Chisvs haknip a asilhha tok.

53. Michā yummak ash ot akvchi cha, na-lapushki linen o a bonullit sepvka vt tvli yosh kulvt toba hō, ymma hatak nana kia ik a fohko yatuk o fohki tok.

54. Mihma yummvt ai atahli nitak atuk o, nitak hullo vt atukonofvt mihinti tok.

55. Mihma ohoyo Kalili a asht ai apehvt aya tuk ash kia, iakaiyvt ilhkoli cha, sepvka, micha haknip ash ot kaniohmit itola aiena ka achukmalit pisa tok.

56. Mihmvt falamvt ilhkoli cha, na-balama, micha nanahama aiena ka atahlit maya tok: mihmvt anumpa vlpisa yoka nitak hullo yokvno foha tok.

CHAPTA XXIV.

Chisvs vt falamvt tani tuk a enchil tuklo hosh ohoyo hash sepvka ak o ai im anoli, 1. 13 Chisvs nan im ai ithvna vhleha tuk vt tuklot Emmavs a itiachi hosh ayvt okla; 38 il otvnihi, nan im ai ithvna vhleha hatuk vt chiya moma na Chisvs vt itintakla ant hikiā: 47 yohmi cha Chelusalem ak o vmmona ka ai isht ia hosh vbanumpa ya okla isht anumpula chi ka, im apesa. 51 Chisvs vt vba a holitopa ya ia.

1. **ATUK** osh wek nitak vmmona onnvt okhlilinchī fehna hō na-balama atahli tuk vt ishīit, inla ka ai itapihvt, sepvka yash okla ai ona tok.

2. Mihma tvli vt sepvka ya kanima pit tonoli tuk o okla pisa tok.

3. Mihmvt okla pit chukowa tuk osh, Chitokaka Chisvs haknip ash ik peso ki tok.

4. Atuk o yakohmi tok; okla nana a kaniohmi ik ai ithano fehnvt maya ma, yakeh! hatak tuklo kv̄t i na-fohka shohmalali hosh itumasi a hinli tok.

5. Mihma okla nukshopvt, aka pit yochonoli mā, yummak



ash ot, Nanta katiohmi hō okchaya illi aiasha ak o hvsh hoyo cho?

6. Ilvppa ikshoshke; amba tani tuk oke; Kalili a anta moma mvt hvchim anoli kvt;

7. Hatak Ushi vt hatak nan ashvchi vhleha ibbak a a fohka cha, iti-taiyukhvna ai ahonvhla tuk osh, nitak ont atuchinakma falamvt tana ki oke, achi tuk a hvsh ithaiyanashke, im achi tok.

8. Mihma im anumpa ha tok ash okla ithaiyana tok.

9. Micha seplka yash asht falamvt ilhkoli mvt, auahachvfa kash, micha inla moma aiena ka na yakohmi puta tuk ash mominchit ont im anoli tok.

10. Meli Maktalene, micha Choanna, mikmvt Meli, Chemis ishki, micha ohoyo inla ka yvmma apehvt aya tuk aiena kak osli vbanumpeshi vhleha ha na-yakohmi puta tuk a ont im anoli tok.

11. Mihma yvmma im anumpa hv annoa ik ahlo yak o ai im itilau cha, okla ik yimmo ki tok.

12. Mihma Pita yvt wakaya cha, malelit seplka ya onvt, pit aka chonoli mvt, linen nan-tvna ak bano hosh asha na pisa cha, ia mvt, nana kvt ai yvmohmi tuk ash, okokko! ahni tok.

13. Atuk o tuklo kvt nitak mih-makinli ka tmahushi Emmas hohchifo hosh, yvmvt Chelusalem a auct i kowi untuchina foka hatuk o itiachi tok.

14. Mihmvt nana kvt ai yvmohmi tuk ilvppa puta kash isht it im anumpohonli tok.

15. Atuk o yakohmi tok; it im anumpulit nan it im asilhhahanchi kash ot moma hō, Chisvs akinli kvt sakki cha, takla aya tok.

16. Yohmi kia ik ithano ket okla chi ka, nishkin vt mcholi hō chiyuhmi tok.

17. Mihma yvmmak ash ot, Ilvppak osh anumpa katiohmi mak o isht it im anumpohonlit hvsh aya cha, hvsh ilapissa cho? im achi tok.

18. Mihma achvft Kleopas hohchifo hosh afalaminchit; Hatak kanima minti chishno ak hosh Chelusalem a ish anta

kvt himak nitak chohmi yvmma nana kvt a kaniohmi ka chik akostinincho ke tuk oh cho? im achi tok.

19. Mihma yvmmak ash ot, Nana nanta ho? achi ma, Chisvs Nasalet hatak nan im a kaniohmi tuk a, yvmmak okvt hopaii yosh Chihowa, mikmvt okla puta aiena itikba ya nana a kaniohmi, micha anumpuli aiena kvt a chinto fehna tuk;

20. Yvmohmi tuk o na-holitompa isht asha pehlichì vhleha, micha pi hochitoka vhleha aiena kvt, yvmmvt illa chi hosh im vlhpisa chi ka, kaniohmichit ishit inla ibbak a fohki na iti-taiyukhvna ahonvhlichì tuk.

21. Yohmi kia yvmmak osh Israel okla ha hlakoficha he tuk mak atuk a pi yihimmi tuk; yvmohmi tuk kia keyushke; micha yvmmak bano keyu, nana kvt a yakohmi tuk a himak nitak vt nitak ont isht atuchinvshke.

22. Michà anonti ohoyo il ai itapeha tuk a a kanimi kvt onnahinli fehna sepvka ya ont maya tuk vt,

23. Yvmma haknip a ik peso hosh ai vla mvt, anonti en-chil mvt i haiaka na pisa ma, Yvmmak ash ot okchaya hoke, achi tuk achi cha, okla pi nukhlakvshli tuk oke.

24. Yohmi ma il ai itapeha tuk a a kanimi kvt sepvka ya ona, yohmi mvt ohoyo nana a miha tuk a vlhpesa ho ont pisa tuk; yohmi kia yvmmak amo okla ik peso ke tuk oke, im achi tok.

25. Mihma yvmmak ash ot, Im anukfila iksho, hopaii vhleha hvt anumpuli tok moma ka chukvsh isht yimma he svlaha hvchia ma!

26. Klaist vt na yakohmi puta ka pisa ha yosh a holitopaka ya chukowa he vlhpesa ha tok keyu cho?

27. Mihmvt Moses, micha hopaii puta aiena tok ai vhli kak o isht ia hosh, Holisso Holitopa ya a mominchit ilap a isht ai annoa ka achukmalit im anohonli tok.

28. Mihma tvmahushi itiachi yvmmak atuk ash ot itonacha hosi tok; yohmi ma yvmmak ash ot ont ia hinla ka, ile chohmichi tok.

29. Yohmi kia im a chilita fehnvt oklvt, Nitak vt shohbit ont opivt mahaya hoka, pi takla ish antashke,

achit okla tok. Mihma takla anta chi hosh ont chukowa tok.

30. Atuk o yakohmi tok; yvmmak ash ot takla impvt binili mvt, pvska ya ishi cha, vba isht aiokpvchi mvt, tush-tolit, yvmmak ash o ipeta tok.

31. Mihma nishkin vt i fatumvt okla cha, yvmmak ash ithanvt okla tok; yohmi ma yvmmak ash ot i holhponayo ha ai i kvninihya tok.

32. Mihma, Ilvppvt takla ya a pim anumpuli, micha Holisso Holitopa aiena ka achukmalit a pim otvninchi ma, pi chukvsh vt libisha tuk keyu? it im achi tok.

33. Mihmvt hvshi kanvlli vlhpisa mih-makinli ho wakaya cha, falamvt Chelusalem a it vlachi mvt, auah-achvfa kash ot, micha ai itapeha tuk aiena kvv, itvnaha mvt,

34. Chitokaka yvt falamvt tani pulla mvhli tuk osh, Saimon a i haiaka kvno, achit maya ho ant pisvt okla tok.

35. Mihmvt yvmmak ash osh hina takla ya nana kvv a kaniohmi tuk, micha yvmvvt pvska tushalichit ashvt kaniohmit im otaiyani tuk aiena kash anolit okla tok.

36. Mihma yakohmichit anumpohonli moma ho, Chisvs vt ilap fehna hosh ai iklvna ont hikia cha, Nanaiya kvv hvchimmi hashke; im achi tok.

37. Yohmi kia yvmmak ash ot komuntvt nukshopa fehna mvt, Shilup o pisa ka, im ahoba tok.

38. Yohmi ma, Na katihmi ho hvchi komunta cho? micha, Na katihmi ho hvchi chukvsh anukaka ya na hvchim anukfila anuktuklo kvv takali cho?

39. Subbak, saiyi aiena ka ho pesa; vno sia hash inli hoke; sa pvsholit ho pesa: shilup vto nipi, micha foni puta aiena asha, vno vt si yvmohmi na hvv sa pisa ka, chohmi keyu hoka, im achi tok.

40. Michu ilvppa yakohmichit anumpuli mvt, ibbak, micha iyi aiena kash i haiakvchi tok.

41. Mihma okla na yukpa kak osh yimmi keyu kisha, micha okokko! aiahni aienvt maya takla ma, yvmmak ash ot, Ilvppa nan-ilhpak nana kia hvchim asha cho? im achi tok.



42. Mihma nuni vlhpusha tushafa, micha foi-bila aiena ho okla ipeta tok.

43. Mihma ishi cha, okla itikba ya ai vpa tok.

44. Mihmut, Nan okluha kv̄t isht a si annovt Moses, micha hopaii vhleha aiena i holisso, mikmut ataloa holitopa aiena ka ai o holisso tok vt ont aiahli pulla chi mak o, hvchi takla anta li moma kv̄t anumpa ilvppa puta ka isht hvchim anumpuli li tok oke, im achi tok.

45. Mihmut Holisso Holitopa ya ithaiyana chi ka, im anukfila nan-isht akostininchi a in tiwi tok.

46. Mihmut, Klaist vt yakohmi hosh i palvmm̄t, illi tuk osh, anonti nitak ont atuchinakma illi tuk vt tana hi a, isht ai vlhpiesa tok.

47. Micha ile kostininha he, mikmut ai ashvchika puta isht a kashofa he aiena kv̄t yvmma hohehifo ho isht anumpa kv̄t, vmmona ka Chelusalem ak o ai isht ia hosh, oklushi moma isht im anumpa hi oke, achi hosh yakohmit holihiso hoke.

48. Yohmi ho hvchishno ak osh na yakohmi puta ka ai-atokowvt anoli hvchia mak oke.

49. Yohmi ka yakeh! Aki vt nana ka hvch ima hi vt miha tok mak o, hvchishno a hvchi o kaiyanchi lishke: yohmi kia Chelusalem tumaha hak o hvsh aiashvt, nana aiahli vba minti kv̄t ont hvchi anukfoyūka kak mak ashke, im achi tok.

50. Yvmohmi tuk osh yvmmak ash pehlichit kohev̄t ivt Betani yokvno isht ona tok: mihmut ilap ibbak ash vba pit wieli cha, yvmmak ash holitoblit aiokpv̄chi tok.

51. Atuk o yakohmi tok: yvmmak ash holitoblit aiokpv̄chi ai itin takla mvt, ai i filvmm̄t vba pilla pit a kv̄nia tok.

52. Mihma yvmmak ash okla pit holitoblichit aiokpv̄chi cha, na-yukpa fehna hosh falamvt Chelusalem a ai vla tok.

53. Yohmi mvt Chihowa ya in talovt holitoblichit pit aiokpahanchit tempel anukaka ya aiasha beka tok. Amen.

# UBANUMPA CHAN

UT HOLISSOCHI TOK.

---

## CHAPTER I.

Anumpa achi Chisvs Klaist yvmmak osh vmmona fehna ka Chihowa ha iba chvfa, 1; 6 Nan-tohwikeli ai ahli kvv achvfa illa ilvppak atuk a atokowa anola chi mak osh Chan vt aya hatok. 15 Chan vt Klaist a nan vlhtokowa isht ai anoli. 35 Chan nan im ai ithvna yatuk vt tuklot Chisvs a apeha toba; yvmmak atuk vt achvft An-tilu ak osh itibapishi Pita ya ilauelet Chisvs a isht im ona.

1. UMMONA ka Anumpa hvv ahanta mvt, Anumpa hvv Chihowa ya ai iba chvfa tok: mihmvt Anumpa hash ot Chihowa ya tok.

2. Yvmmak inli hosh vmmona ka Chihowa ya ai iba chvfa tok.

3. Yvmmak atuk mak o nan okluha kvv toba tok; yohmi ka nana kvv toba tok vt yvmmak o keyu hokvno ik tobo ki tok.

4. Yvmmak oka isht ai okchaya yvt asha tok: yohmi ka isht ai okchaya yvmmak ash ot hatak puta ka in tohwikeli ya tok.

5. Mihmvt tohwikeli hash ot ai okhlilika ya a tohommi; yohmi ka okhlilika yvt yvmmak ash o ik akostinincho ki tok.

6. Hatak Chan hohchifo hosh, Chihowa nana aiahni hvv aya tok.

7. Yvmma pulla tuk mak o hatak vt momvt yimma hi o, yvmmak ash osh nan atokoli osh Nan-tohwikeli ash atokowa anola chi hosh aya tok.

8. Yvmmak osh Nan-tohwikeli mih mak a tok keyu; am-

ba Nan-tohwikeli yvmma atokowa anola chi mak osh aya tok.

9. Yakni pakna hatak vt ai vtta hoka mominchit in tohwikelichi, yvmmak osh Nan-tohwikeli ahli mak a tok.

10. Yvmmak atuk mak o yakni vt toba tok o, yakni a ai ahanta ma, yakni vt yvmmak ash ik ithano ki tok.

11. Yvmmak okvt ayvt ilap immi vhleha ho im vla ma, immi vhleha hash osh ik i yimmo ki tok.

12. Amba laua kaniohmi hosh ahninchit, ilapo hohchifo ha i yimmi hokvno, Chihowa ushi vhleha toba chi mak o isht ai vhpesa ka ima tok;

13. Issish ak o keyu, mikmvt haknip nan ahni keyu, micha hatak osh nan ahni keyu ho, yvmmak okvt toba tok; amba Chihowa yak a tok.

14. Micha Anumpa hash ot nipi yo toba cha, nan isht i kana, micha nana aiahlika aienvt isht alotowa hosh pi takla ahanta tok: yohmi na isht a holitopa ya, Iki a Ushi vt achvfa illa cha ai isht a holitopa chatuk mak o, chiyuhmi ho e pihisa tok.

15. Chan vt yvmmak oka atokowa anoli hosh, chitolit anumpulit, Auet siakaiyvt mihinti kak osh sa tikba ahanta tok mak okvt, yvmmak ash holitopa kvv vno a a shahli ho, isht anumpohonli li tuk a ilvppak atuk mak oke, achi tok.

16. Micha yvmmvt isht alotowa hatuk ash e moma kvv nan isht i kana yvt ai itvlbitkvchi ho, e pisa tok.

17. Nan-vlhpisa yokvto Moses ak atuk mak o vlhpihisa tok: amba nan isht i kana, micha nan-aiiahlika aiena hokvto Chisvs Klaist ak o a minti tok.

18. Hatak nana hosh Chihowa ya nitak nan ash o pisa tok keyu: Ushi holitopa achvfa illa Iki shakba ya afoyuka, yvmmak atuk okvto yvmmak oka otvnnichi tok oke.

19. Mihma yvmmak ash o, Kvta chia hoh cho? achit ont i ponakla chi ka, Chu okla hvv na-holitompa isht asha, micha Lefait okla aiena ka Chelusalem a a kohchit pit tihleli na Chan vt atokowa anoli tok a ilvppak oke.

20. Yohmi kvv yvmmak ash ot atokolit anoli kvv, Mih sia



hoke, achi tok keyu; amba atokolit, Ūno ak osh Klaist o sia keyu hoke, achi tok.

21. Mihma okla i ponaklot, Mih kvto kvta hak o? Elias ak o chia ho? achi tok: mihma, Mih sia keyu, achi tok. Hopaii mih mak o chia ho? achi ma; afalaminchi mvt, Keyú, achi tok.

22. Mihma, Kvta chia hak o? ish pim anoli na auet pi tihleli tuk vhleha ha anumpa falama ka ont il imashke: chishno akinli kvto, Kvta ho ish ile miha cho? im achi tok.

23. Mihma yvmmak ash ot, Achvfa hosh yakni haiaka yo ai anumpohonlit, Chitokaka ataya hi a oh apissvlichí, ahanchi ho hopaii Esaias vt isht anumpohonli tok mak o mih sia mak oke, achi tok.

24. Mihma okla vlhtokvt ilhkoli tuk ash ot Falisi vhleha ha tok.

25. Atuk osh yvmmak ash o okla i ponaklot, Chishno ak osh Klaist mih mak o chia keyu; Elias a chia keyu; anonti hopaii mih mak o chia keyu hokak osh, nanta katiohmi ho ish baptismochi cho? im achi tok.

26. Chan ash osh yvmmak ash o im afalaminchi mvt, Ūno vto oka yo ishit baptismochi lishke; amba achvfa kvv hvchi takla hikia yvmmak okvno hvch ik itha-noshke.

27. Yvmmak osh siakaiyvt minti kvv holitopa kvv a shahli ka, i shulush isht-talakchi a hotofi la he si ahoba keyu mak oke, achi tok.

28. Chatan misha Behlabala yvmmak o Chan vt a baptismochi hosh ahanta hatuk o, ilvppa puta kvv ai yakohmi tok.

29. Atuk o ont onna ma Chan vt, Chisvs vt i minti na pisa mvt, Chihowa in Chukfulhpoba ushi, yvmmak osh yakni im ai-ashvchika isht kanchi a, ho pesá.

30. Hatak vt auet siakaiyvt minti kvv, yvmmak osh sa tikba ahanta tuk osh holitopa kvv a shahli hoke; achi li tuk a ilvppak osh mih mak oke.

31. Yohmi kvv ilvppa ithana li tuk keyu; yohmi kia

ilvppak osh Islael okla ha im otvna chi kak o, vno vt oka ya ishit baptismochit aya li hatuk oke, achi tok.

32. Mihmvt Chan vt atokowa anolit, Shilombish okvto puchi yoshuba yo chiyuhmi hosh vba ya vttvt mintit, yvm-mak ash ant o binili na pisa li tok.

33. Yohmi ka yvmmak ash o ak ithano ki tok; yohmi kia oka ishit baptismochi la chi ho, sa tohno tuk yvmmak osh, Kvna ho Shilombish ak osh aka mintit ant o binili na ish pisa chi ka, mihi yosh Shilombish Holitopa ya ishit baptismocha chi mak oke, im achi tok.

34. Atuk o, Ilvppak osh Chihowa ha Ushi pulla hatuk a pisvt, atokowa anoli li tuk oke, achi tok.

35. Anonti ont onna ma Chan vt ilap, nan im ai ithvna tuklo aienvt hinli tok.

36. Micha Chisvs ash ot nowvt aya na pisa mvt, Chihowa in Chukfvlhpoba ushi a ho pesá, im achi tok.

37. Mihma nan im ai ithvna tuklo kash ot, yvmmak ash ot anumpuli na haklo mvt, Chisvs a iakaiyvt okla tok.

38. Mihma Chisvs ash ot filema cha, iakaiyvt okla kash o pisa mvt, Nanta ho hvsh hoyo cho? im achi ma, Labbai ma! yvmvvt vlhtoshwakmvt, nan-ithvnanchi ma! achi, Katima ko ish ai vtta yoh cho? im achi tok.

39. Mihma, Mintit ant ho pesá, im achi tok. Mihma itvlachit kanima ai-vtta yatuk a ant pisvt okla mvt, hvshi kanvlli vlhpisa ont isht pokoli foka hatuk oka, nitak yvm-mvno apehvt ashwa tok.

40. Tuklot Chan vt anumpuli na haklo cha, yvmma iakaiyvt okla tuk ash, achvfa kv Antilu, Saimon Pita itibapishi ha tok.

41. Yvmmak ash ot na tikba ilapo itibapishi akinli Saimon ak o pisa mvt, Messias ash, yvmvvt vlhtoshwakmvt, Klaist achi ho il ahayuchishke, im achi tok.

42. Mihma yvmmak ash o ilauelit Chisvs a im vla tok. Mihma Chisvs vt yvmmak ash o pisa mvt, Chona ushi Saimon chia hv Sefas, yvmvvt toshowakmvt, tvli achi hoke, yvmmak o chi hohchifashke, achi tok.

43. Atuk osh ont onna ka Chisvs vt Kalili a ia hi atuk osh Filip a pisa mvt, Is siakaiyashke, im achi tok.

44. Filip vt Antilu, micha Pita ita-tuklo in tvmaha Bet-saita yak o ai vtta ya tok.

45. Filip vt Nahlanael a pisa mvt, Chisvs Nasalet vtta, Chosef ushi, yvmmak o nan vlpisa ya Moses vt, micha hopaii puta kvt isht a holissohonchi tok mak o, e psvshke, im achi tok.

46. Mihma Nahlanael ash osh, Nana achukma kvt Nasalet a ai itolt kohcha hinla ho? im achi ma, Filip ash osh, Minti cha, ant pisá, im achi tok.

47. Chisvs vt Nahlanael vt i minti na pisa mvt, Yakeh! Islael hatak ahli fehna kvt nana ilahobi keyu mak oke, achi tok.

48. Mihma Nahlanael ash ot, Katiohmit is svthana cho? im achi ma, Chisvs vt afalaminchi mvt, Filip vt ont ik chi hoyo kisha ho, fik vpi nuta ya ish asha kak o, chi pisa li kamo, im achi tok.

49. Mihma Nahlanael ash ot afalaminchi mvt, Labbai ma! chishno ak osh Chihowa Ushi chivshke; chishno ak osh Islael okla i miko chivshke, im achi tok.

50. Chisvs vt afalaminchi mvt, Fik vpi nuta ya ish asha ho chi pisa li tuk achi li kak o, chi yimmi há cha? nana kvt ilvppa i shahli fehna ka ish pisa hi oke, im achi tok.

51. Mihma, Ahlishke, ahli mak o chim achi lishke, Himak a pilla vba yvt tiwa na Chihowa im enchil vhleha hvt Hatak Ushi a auet ai akohowa, anonti vba pit ai ihiya aiena ka, ish pisa hi oke, im achi tok.

## CHAPTER II.

Kana ak o nan-itaawayvchi asha ho Chisvs vt oka kapvssa atuk a oka paki ikbi, 1; 12 Chelusalem a ona cha, na chumpa vhleha, micha na kanchi vhleha aiena tempel anyakaka aiasha tuk a kocha pit yuhli; 23 yohmi ma Chisvs vt na fehna yvmihinchi ho pisa hatuk mak osh laurt i yimmi.



1. ATUK o nitak ont atuchina ma Kalili yakni Kana a nan-itauiwayvchi vt asha tok: mihma Chisvs ishki vt yvmma ont anta tok.

2. Mihma Chisvs, micha nan im ai ithvna vhleha aiena kv̄t nan-itauiwayvchi a aya hi a, im annoa tok.

3. Atuk o oka paki vt ont ai ik im ikshot taha ma, Chisvs ishki vt yvmmak ash o, Oka paki vt okla ik im ikshoshke, im achi tok.

4. Chisvs ash ot, Ohoyo ma! vno vt nanta isht a chi aha-laia li cho? hvshi kanvlli vm ai vlhpisa hv̄t ik ai ono kisha hoke.

5. Ishki ash ot nan-isht asha vhleha hash, Nana ho hv̄chim achikma, hv̄sh yvmihchashke, im achi tok.

6. Mihma Chu okla ai yvmohmi yatuk osh isht il ai achi-fa ya tuk, tv̄li shuti oka ai-vlbeha hannali kv̄t, f̄v̄kin tuk-lokmá, tuchinakmá nana ai vlhto aiyuka hosh yvmma talohmaya tok.

7. Atuk o Chisvs ash ot, Shuti oka ai-vlbeha ya oka oh alotoli, im achi tok. Mihma yvmmak ash o okla alotolit iti-vlbi vhlich̄i tok.

8. Mihma, Inta! ho bicheli cha impa pehlich̄i ya ishit oh im iá, im achi tok. Mihma okla ishit im ia tok.

9. Mihma impa pehlich̄i ash ot oka oka paki toba tuk ash ishkot pisa cha, kaniohmi hosh toba tuk a ik akostinincho mvt, yohmi kia nan-isht asha vhleha oka ochi tuk okv̄to ithana ho, impa pehlich̄i ash ot himona ohoyo itauwaya ash hoyo tok.

10. Yohmi mvt, Hatak moma kv̄t vmmona ka okapaki achukma ka talohli chatuk; atuk osh hatak vt ishkot fiho-pak mak o, okpulo yak oh chatuk; amba chishno vto oka paki achukma ya ish il atomba na himak atoshke, im achi tok.

11. Na fehna yvmihchit isht ai vmmona kv̄t ilvppak o Chisvs vt Kalili yakni Kana yak o ai yvmihchit, ilap im a holitopa ya otv̄ninchi tok; mihma nan im ai ithvna vhleha hv̄t i yimmi tok.

12. Ai yakohmi ha ya, yvmmak ash ot, ishki, micha iti-bapishi vhleha, mikmvt nan im ai ithvna vhleha aienvt Ka-

penavm a ilhkoli tok; atuk osh nitak kanohmi keyu ho ont maya tok.

13. Mihma Chu okla i nan-vbanvblit ont ia yvt ai ona hosi hatuk o, Chisvs vt Chelusalem a ia tok.

14. Atuk osh tempel anukaka ya wak, chukfvlhpoba, micha pvchi vlhpoba aiena kanchi vhleha, mikmvt tvli holisso itatoba aiena kvv binohmaya na pisa tok.

15. Mihmvt aseta chipunta yo isht fvma ikbi cha, yvm-mak ash, chukfvlhpoba, micha wak puta aiena kash mom-inchit tempel a a kocha weli tok; mihmvt tvli holisso itatoba vhleha in tvli holisso ash aka fohopli mvt, anonti ai-impav tvli holisso ai-itatoba puta kash kinahlichit tok.

16. Mihmvt pvchi yoshuba vlhpoba kanchi vhleha hatuk ash o, Ilvppa kanima ishit oh ia cha, Aki in chuka yano nana ai-itatoba chuka hvch ik ikbo kashke, im achi tok.

17. Mihma, Chin chuka i hullo pulla kak osh vm anuk-fila uhvlinchit ai ishit kaiyanchishke, achi hosh holisso ha tok a, nan im ai ithvna vhleha hvv ithaiyana tok.

18. Mihma Chu okla hash ot afalaminchit mvt, Nan isht atokowa nanta ho ish pim otvvinchit hosh ilvppa puta ka ish yakohmichit cho? im achi tok.

19. Mihma Chisvs ash ot afalaminchit mvt, Tempel ilvppa oh okpvn; atuk ma nitak tuchinakma falaminchit ikbit hilechi lashke, im achi tok.

20. Yohmi ma Chu okla hash ot, Tempel ilvppvt afvmmi pokoli ushta akocha hannali ho tobtv vlhtaha tok: yohmi ka chishno vto nitak tuchina ho falaminchit ikbit ish hilecha hinla cho? achi tok.

21. Yohmi kia yvmmak okvt ilap haknvp tempel ak o isht anumpuli ha tok.

22. Yohmi tok o yvmmak ash ot illi tuk vt falamvt tani ma, ilvppa im achi tok a, nan im ai ithvna vhleha hvv ithaiyana tok; mihmvt Holisso Holitopa, micha Chisvs vt anumpa anumpuli tok aiena ka okla yimmi tok.

23. Vbanvblit ont ia isht ashvt impvt maya nitak o, yvmmvvt Chelusalem a anta cha, na-fehna puta ka yvmihinchit na okla pisa mvt, laurt i yimmi tok.

24. Yohmi kia Chisvs vt hatak moma ka ithana hatuk okvt ik i yimmo ki tok.

25. Micha nana hosh hatak a anukfoyuka ka ithaiyana hoka, kvna kia hatak a isht atokolit im anola he vlhpesa keyu ki tok.

CHAPTA III.

Chisvs vt Nikotemvs a it im anumpuli; yohmi hosh atuklanchit vtta hi oka ai vlhpesa hatuk, 1; 14 micha kaniohmi kia ilapvt ititaiyuk-hvna a takalit illa hi a ai vlhpesa hatuk aiena; 16 mikmvt Chihowa hvt hatak a i hullo ka, 18 micha Chihowa ik im antio vhleha hvt nan i palvmma he aiena ka anoli. 22 Chan vt Klaist nan-isht a holitopa ya, micha yvmma i yimmi hatuk okvto ai okchaya he.

1. **HATAK** vt Falisi yosh Nikotemvs hohchifo hosh, Chu okla pehlichy yosh ahanta tok.

2. Atuk osh yvmmak ash ot ninak o ayvt Chisvs a im vla cha, A shahli ma! chishno ak osh nan ithvnanchi yosh Chihowa ak o ish a minti ka il ithanvshke; Chihowa ak osh ik apelachokma, hatak nana hosh na-fehna ilvppa puta ish yvmihinchy ka, yvmihcha he keyu hoka, im achi tok.

3. Chisvs vt afalaminchi mvt, Ahlishke, ahli mak o chim achi lishke, Hatak vt atuklant vtta keyukmvt, Chihowa apehlichika ya pisa he keyu hoke, im achi tok.

4. Nikotemvs ash ot, Hatak vt sipoknit taiyaha kvv kati-ohmi kak osh vtta hinla ho? atukla ma ishki im oshvto ya pit chukowa cha, vtta hinla ho? im achi tok.

5. Chisvs vt afalaminchi mvt, Ahlishke, ahli mak o chim achilishke, Hatak vt oka, micha Shilombish ita-tuklo kak o isht ai vtta keyu hokvto, Chihowa apehlichika ya chukowa he keyu hoke.

6. Nipi yo a tobt vtta hokvto, nipi yoke; mikma Shilombish o a tobt vtta hokvto, shilombish oke.

7. Atuklanchit hvsh vtta pullashke, chim achi li tuk a, okokko! chik ahno kashke.

8. Mahli hvt kanima yo pit ai im vlhpesakmvt, pit mahlit fokka hokvno ish haklo kia, yvmmak o a minti hosh, anonti



yummak o ia, ish ai ahni keyu ka, Shilombish ak o a tobt vtta hokvto yummak inli kak o chiyuhmi bano hoke, im achi tok.

9. Nikotemvs ash osh afalaminchi mvt, Katiohmi kak osh ilvppa puta kv̄t ȳmohma hinla cho? im achi tok.

10. Chisvs vt afalaminchi mvt, Islael okla ha nañ-ithv-nanchi chia hokak osh, ilvppa puta ka chik ithano cho?

11. Ahlishke, ahli mak o chim achi lishke, Nana ka il ithana mak osh il anumpuli: mikmvt e pisa tuk mak osh atokolit il anoli hoke; yohmi ka nana atokolit il anoli ka ik hvchi yimmoshke.

12. Nana kv̄t yakni paknaka asha yo isht a hvchim anoli li ha ya tuk a, ik hvchi yimmo ke tuk vt, anonti nana kv̄t vba asha ho isht a hvchim anoli li hok mak o, katiohmit hvchi yimma chi cho?

13. Yohmi ka hatak nana hosh vba ya ia tuk keyu; amba vba ya mintit vla tok Hatak Ushi vba ya asha yummak ilvshke.

14. Yohmi ka Moses vt sinti a kowi anukaka ya vba takalichi tok a, yummak inli chiyuhmit Hatak Ushi vt vba takali pulla hi oke:

15. Yohmi na kv̄na hosh yumma i yimmikmvt, ik illo hosh, amba ai-okchayvt bilia yo pisa hi oke.

16. Chihowa yvt yakni a i hullo fehna kv̄t, kv̄na hosh yumma i yimmikmvt ik illo hosh, amba ai okchayvt bilia yo pisa hi o, Ushi achvfa illa holitopa ya auet ima tok.

17. Yakni ak o ilbvshacha chi ho, Chihowa yvt Ushi a auet ima tok keyu hoka; amba yummak atuk mak o yakni vt isht ai okchaya hi a tok;

18. Kv̄na hosh yumma i yimmi kv̄to, isht ai ilbvsha he anumpa hv̄t onvtula keyu hoke: amba kv̄na hosh i yimmi keyu hokvto, Chihowa Ushi achvfa illa holitopa hohchifo hatuk a i yimmi keyu kv̄t, isht ai ilbvsha he anumpa hv̄t onvtula mashko hoke.

19. Yohmi ka tohwikeli hv̄t yakni a ant iba chukowa ma, ilap nana a katiohmi ai vlpesa keyu hatuk okvt, hatak vt ai okhlilika yak osh im ai achukma kv̄t atohwikinli ka,

im i shahli, ilvppak o isht ai ilbvsha he anumpa hvt onvtula hoke.

20. Nan ik ai vlhpeso ya a yohmi ai yukali vt atohwikinli ka i nukkillikmvt, anonti ilap nana a kaniohmi yvt otvnt ik hofahyalo ka hinla ka, atohwikinli ka ik ono chatuk oke.

21. Amba kvna hosh nan-ai ahlika yo a yohmi yokvto, ilap nana a kaniohmi yvt Chihowa yak atuk mak o isht a yvmohmi tuk vt otvna chi ka, atohwikinli ka ona chatuk oke, im achi tok.

22. Nana kv ai yakohmi ha ya, Chisvs vt nan im ai ithvna vhleha ha it apihvt Chutea yakni a ai vla tok; mihma takla yvmmak o antvt baptismochi tok.

23. Mihma Chan ak kia Salim i bilika Enon yvmmak o oka vt laua hatuk o, baptismochit ahanta tok: mihma okla hvt ai vlvvt baptismo tok.

24. Chan vt aboha kvlllo ik fohko kisha ha tok.

25. Yohmi ma Chan nan im ai ithvna vhleha kanimi, micha Chu okla aiena kv na-baptismo a isht ai it im asilh-hvchit maya tok.

26. Mihmvt Chan a ai im ai vlvvt, Nan-ithvnanchi ma! Chatan misha ya a chi awant aya tok yvmmak o nana ai atokowa isht ish anohonli kash, yvmmak fehna kv baptis-mohonchi ho, okla momvt im ai itahohombvshke, im achi tok.

27. Chan ash ot afalaminci mvt, Uba yak o auct ai ima ho keyukma, hatak vt nana ho ilap inli kv isha he keyu hoke.

28. Uno vt Klaist mak o sia keyu: amba itikba aya a si vlhtoka hatuk oke; achi li tok a hvchishno fehna akinli kv ai atokowa ka hvs svm ithanvshke.

29. Ohoyo himona hatak auwaya ka ilauei kak osh, yvm-mvt hatak himona ohoyo itauwaya mak oke: amba himona ohoyo itauwaya i kana hokvto himona ohoyo itauwaya anumpuli pulla kak o hiki vt i haponaklot isht a yukpa chinto hoke: yohmi ka na sai yukpa ilvppvt isht aiahli mak oke.

30. Yvmmak okvto isht i shahlit mahaya he vlhpesakima, amba vno vto ak a lauwt mahaya la he vlhpesa hoke.

31. Ūba ya a minti yummak okvto moma ka i shahli hoke: yakni yak o a minti hokvto yakni yakinli; mikmvt yakni yak o ai isht anumpuli hoke; vba ya a minti yummak okvto moma ka i shahli hoke.

32. Micha nana ka pisa tuk; mihmvt haklo tuk aiena mak osh yummak ash atokolit anumpuli hoke; yohmi kia nan ai vlhtokowa anohonli ka, hatak nana kia ik yimmoshke.

33. Kvna hosh, yummvt nan ai vlhtokowa anoli ka yimmit aiokpvchi hokvto, Chihowa yvt aiahli ka, aiahlichy hosh yimmi hoke.

34. Chihowa yvt atolno tok a, yummak okvt Chihowa im anumpa ho anumpohonlishke; yummak oka Shilombish vt vlhpisa ho Chihowa yvt ihima keyu hoka.

35. Iki vt Ushi a i hullo kvv nan okluha ka yumma ibbak o fohkishke.

36. Kvna hosh Ushi a i yimmi hokvto ai-okchayvt bilia ya pisa hoke; mikma kvna hosh Ushi a i yimmi keyu hokvto, ai-okchaya ya pisa he keyu; amba Chihowa nan-isht ai i nukkilli yak osh onvtuyula hoke, achi tok.

#### CHAPTER IV.

Chisvs vt Samalia ohoyo ho ai okchaya oka ak o isht im anumpuli hosh 1, 26 ilap ak osh Klaist mak atuk vt il anoli; 28 mihma ohoyo hash ot falamvt tmaha ha ona cha, yummak-atuk a okla ha im anoli; 39 mihma okla hash ot na yimmi. 43 Chisvs vt falamvt Kalili a ona tuk osh Kana ak o anta hosh, hatak holitempa ushi vt abeka hosh Kapenavm ak o itonla ka, pit hlakofichi.

1. CHISVS vt nan ithvna vhleha ikbit baptismochi kvv, Chan a i shahlichy ka, Falisi vhleha hvv haklot maya ka; Chitokaka yvt akostininchy hatuk osh,

2. Chisvs vt ilap inli kvvto baptismochi keyu ho, amba nan im ai ithvna vhleha hak atuk ak o,

3. Chutea yash issvt Kalili yash inli ho anonti ia tok.

4. Yohmi kvv Samalia ya pit hlopullit maya he vlhpesa tuk a tok.

5. Atuk osh Chekob vt ushi Chosof a osapa ima tok ta-



laia ka bilika, Samalia yakni tumaha Saika hohchifo ho, vla tok.

6. Yohmi ma Chekob i kvli hvt ymma hikia tok; yohmi hatuk o Chisvs vt nowvt ayvt hoyvbli mvt, hvshi kanvlli isht vllhpisa ont hannali foka hatuk o, kvli ymmak ash yakohmit a bininli tok.

7. Atuk o Samalia ohoyo hvt oka ochit aya hosh ymmak ash o vla ma, Chisvs ash ot, Svpeta na ak ishkó, im achi tok.

8. Nan im ai ithvna vhleha hamo ilimpa chumpvt tumaha ilhkoli tuk a tok.

9. Yohmi ma Chu okla hvt Samalia okla ha nan ai itim ahalala keyu chatuk oka, Katiohmi ho Chu chia hokak osh, vno vt Samalia ohoyo sia ha oka is svm asilhha cho? im achi tok.

10. Chisvs ash ot afalaminchi mvt, Chihowa i na-hvlbena ha, micha kvna hosh, Svpeta na ak ishkó; chim achi aiena ka ish ithana hatuk okmvt, ilapo ak o ish im asilhha na ymmak okvt oka okchaya yo chipeta he tuk oke; im achi tok.

11. Mihma ohoyo hash ot, A shahli ma! isht ish ocha hi vt nana kia ik chim iksho ho, anonti kvli hvt hofobishke; yohmi ka katimak o oka okchaya ymma ish ai ishi hosh?

12. Chishno ak osh piki Chekob vt ilapo inli, micha im vlla vhleha, mikmvt i wak aienvt ai ishko yatuk vt kvli ha pima tok a ish imaiya hotuma! im achi tok.

13. Chisvs vt afalaminchi mvt, Kvna hosh oka ilvppa ishko tukmvt, anonti itukshila he;

14. Amba kvna hosh oka ya ipeta la chi ymmak o ishko hokvto, nitak nana itukshila he keyu; amba vno ak osh oka ya ipeta la chi hokvno, ymmak atuk ma a foyukvt tobohonli na nitak bilia hi oke im achi tok.

15. Ohoyo hash ot, A shahli ma! oka ilvppa is svpeta na ik svtukshilokmvt, anonti ochit aya kvv ilvppak o ak lo kashke, im achi tok.

16. Chisvs ash ot, Ia cha, chi hatak a ont i howvt vla, im achi tok.

17. Mihma ohoyo hash ot afalaminchi mvt, A hatak vt ikshoshke, achi ma, Chisvs vt, A hatak vt iksho, ish achi kvt, vhpesa ish mihvshke.

18. Hatak vt tahlapi hosh chim asha tuk osh, anonti himonasi a chim asha kvt, chi hatak atuk o keyu hoka, yvmmak okvno aiahli mak osh ish mihvshke, im achi tok.

19. Ohoyo hash ot, A shahli ma! hopaii chia hatuk o chi akostininchi lishke.

20. Pin tikba vhleha hvt nvni ilvppak o asht Chihowa pit aiokpahanchi tok: a tok ak o hvchishno vto Chelusalem a asht hatak puta kvt Chihowa pit aiokpahancha he vhpesa hatuk a ish mihvshke, im achi tok.

21. Mihma Chisvs ash ot, Ohoyo chia mvt is sa yim-mashke; nvni ilvppa, micha Chelusalem aiena kak kia mayvt Iki a pit hvsh aiokpvcha he keyu ka hi a hvshi kanvli vhpisa hvt mihinti hoke.

22. Hvchishno vto yvmmak o hvsh ahni keyu hosh pit hvsh aiokpvchishke; isht-ai-okchaya hi vt Chu okla immi hoka, pishno vto nana ho pit il aiokpvchi hokvt il ithana hoke.

23. Yohmi kia Chihowa pit aiokpvchi aiahli vhleha hvt shilombish, mikmvt aiahli aiena mak o isht aiokpahancha hi a, hvshi kanvli at vhpisa hvt mihinti ho, anonti himonasi a vla hoke: yvma chohmi hosh ilapa aiokpvcha he ak o Iki vt hoyo hoka.

24. Chihowa yvt Shilombish oke: yohmi ka kvna hosh yvma pit aiokpvchi hokvt shilombish, mikmvt aiahli aiena mak o isht aiokpvchi pullashke, im achi tok.

25. Ohoyo hash ot, Messias, Klaist hohchifo kvt, vla hi a ithana lishke, yvmvt vla hok mak osh, nana moma ka pim anola hi oke, im achi tok.

26. Chisvs ash osh, Uno vt chim anumpohonli li kak osh mihi yo sia hoke, im achi tok.

27. Mihma nan im ai ithvna vhleha hash ot ilvppa ataklama ma ai vla cha, yvmvt ohoyo ha it im anumpuli tuk a, okla anukhlakanacha tok: yohmi kvt hatak achufa kia, Nanta ho ish hoyo hosh? Katiohmi ho yvma ish it im anumpuli cho? achi kia iksho ki tok.

28. Yohmi ma ohoyo hash ot isht-ochi ash talali cha, ivt tmaha ont chukowa mvt, hatak puta kash,

29. Yakeh! hatak vt nana ho a kaniohmi li tok a mominchit vm anoli ka ant ho pesá, ilvppvt Klaist mak o keyu ho? achi tok.

30. Mihma tmaha hash a kohevvt ivt, yvmmak ash okla im ai ona tok.

31. Yohmi takla ma nan im ai ithvna vñleha hash ot, Pi shahli ma! impá, achit im asilhha tok.

32. Yohmi kia, Ilhpak vpa la chi kvv vm asha yvmmak oka hvch ik akostininchoshke.

33. Yohmi hatuk o nan-ithvna vñleha hash ot, Upa chi ka hatak nana kia isht im vla tuk atuk o? it im achit maya tok.

34. Chisvs ash ot, Auet sa kanchi tok nan ahni kak o a yvmohmi, micha i na-toksvli atahli aiena kak osh vm ilhpak oke.

35. Na-hoyo ai vñhpesa chi ka hvshi ushtvt asha moma, hvsh achi keyu ho? yakeh! oh vba chakali cha, osapa puta kvv himonasi ak kia a hoyá he ai ona kvv tohmibi ka ho pesá, hvchim achi lishke.

36. Na-hokechi, micha nan vmo ita-tuklo kvv itibai yukpa chi ka, nan vmo yash ot vñhtoba ha ishi hosh ai okchayvt bilia na-wayá ya hoyo hoke.

37. Yohmi ka achvvt hokechi okma, anonti achvfa hosh vmo, achi tok a yvmmvv aiñhlishke,

38. Hvchishno vt hvsh a toksaiyali tok keyu kvv hvsh ai vma chi ka, pit hvchi tihleli li tuk: hatak inla yosh toksvli tuk o, im a toksvli yash pit hvsh chukowa tuk oke, im achi tok.

39. Mihma ohoyo hvv nana vñhtokowa ka anolit, Nana ho a kaniohmi li tok a mominchit vm anolishke, achi ka Samalia okla tmaha asha tuk vt lavvt yvmmak ash isht ai i yimmi tok.

40. Yohmi hatuk osh Samalia okla hvv yvmmak ash im ai vla mvt, takla anta hinla ka im asilhha tok; mihma yvma anta na nitak tuklo tok.



41. Mihma ilap fehna akinli im anumpa hatuk o himakma yimmi kv̄t laua tok.

42. Mihmvt ohoyo hash o, Himak anō pi yimmishke, chishno ak osh nan ish anoli kak o keyu; pishno akinli hosh il ai i haponaklo cha, ilvppak osh Klaist, yakni okchalinchi mak atuk pulla ka il akostininchishke, im achi tok.

43. Nitak tuklo ont vbanvpa ma yvmmak ash kohchvt ia mvt, Kalili a ona tok.

44. Chisvs akinli kv̄t hopaii vt ilap i yakni akinli ka a holitopa hi vt ik im iksho ka, vlhtokowa anoli tok.

45. Micha Kalili ash vla ma, Kalili okla hv̄t yvmmak kia impa holitopa ya itvnowa hatuk osh, impa holitopa isht asha yvmmv̄t. Chelusalem a nana puta ka a yvmihchi tuk mo minchit pisa tuk okvt, yvmmak ash o okla aiokpv̄chi tok.

46. Yohmi hatuk o Chisvs ash ot Kalili yakni Kana yvm-mak o oka ya okapaki ai ikbi tok ash ot, anonti ona tok. Mihma hatak holitompa achvfa hosh ushi vt abeka kv̄t Kapenavm a itonla tok.

47. Atuk osh, Chisvs vt Chutea ya a kohchvt ayvt Kalili vla ka, haklo mvt, yvmmak ash im ona cha, ushi vt illa hosi hatuk o, ivt ont hlakoficha hinla ka, im asilhha tok.

48. Yohmi ma Chisvs ash ot, Nan isht atokowa, micha na-fehna aiena hō hv̄sh pisa hō keyukmvt, hv̄chi yimma he keyushke, im achi tok.

49. Mihma hatak holitompa hash osh, A shahli ma! vm vlla vt ik inlo takla ish onashke, im achi tok.

50. Mihma Chisvs ash ot, Chiso hv̄t okchaya hoke; ish iashke, im achi tok. Mihma hatak ash ot, Chisvs vt im anumpuli ka anumpa ha yimmi cha, ia tok.

51. Atuk osh ia hosh aya ma, nan isht im asha vhleha hv̄t afama cha, Chiso hv̄t okchayvshke; achit im anoli tok.

52. Mihma hv̄shi kanvlli vlhpisa yvt kaniohmi kak o pit nuktanlv̄t isht ia tuk a im a ponaklo tok. Mihma, Pila-shash hv̄shi kanvlli vlhpisa ont isht untuklo kak o yvnha hv̄t shipa tuk, im achi tok.

53. Yohmi ma iki ash ot, Chisvs vt, Chiso hv̄t okchaya hoke, im achi tuk hv̄shi kanvlli vlhpisa vt yvmmak fehna

akinli tuk a ithana tok ; micha ilapo fehna, mikmvt in ehuka chvfa yvt a momvt yimmi tok.

54. Chisvs vt Chutea ya a kohchvt ayvt Kalili a vlv, anonti na-fehna ka ai yimihchi kvt ilvppvt ont atukla ha tok oke.

CHAPTA V.

Chisvs vt Chelusalem a ona tuk osh, nitak hullo nitak o Behlesta oka talaia ho hatak vt abeka tok a afvmmi pokoli tuchina akocha untuchina tuk a a hlakofichi, 1. 10 Chu vhleha hvt, Chisvs vt nitak hullo yo na hlakofichi hatuk o, vbi bvna ma ; 17 Chisvs ash osh ilapvt Chihowa ya Ushi yatuk okvt yvmmak oka yvmihcha he im ai vhlpesa-hosh yvmihchi tuk vt anoli. 32 Chisvs vt ilapvt Chihowa Ushi pulla hatuk a, Chan vt atokolit anoli ma, 36 atukla ma ilapo inli kvt nana kvt a fehna kia yvmihinchichi ka isht otrni ; 39 Baibil vt yvmma atokolit anoli akinli hoke.

1. ILUPPUT ai yakohmi ha ya, Chu okla impa holitopa hvt asha tok : mihma Chisvs vt Chelusalem a ia tok.

2. Yohmi ka Chelusalem a chukfvlhpoba a kanchi i bilika yvmmak o ai-yupi vt Heblu hohchifo hosh Behlesta yosh i hoshontika tahlapi hosh talaya hoke.

3. Yakohmi ka hatak iksitopo, ik hoponayo, imomokpulo, nipi vt ikshot kvnia puta aiena kvt laua fehna hosh oka piakvcha chi ka, im aiehechi hosh kahvt maya tok.

4. Enchil vt kaniohmikma ayvt, ai yupi ash oka ont piailichi hatuk o ; yohmikma kvna hosh oka vt piakvchikma, tikba pit okvtulakmvt, abeka nana ho isht abeka hatuk kia hlakofi beka tok.

5. Yohmi ho hatak achvfa kvt iksitopo ik nowo tok a afvmmi pokoli tuchina akocha untuchina hosh yvmma itonla tok.

6. Yvmmak ash ot itonla na Chisvs vt pisa mvt, ai yvmohmi tok vt hopaki fehvt taha ka ithana hatuk osh, yvmmak ash o, Chi hlakofa hi a ish ahni cho ? im achi tok.

7. Mihma hatak iksitopo ik nowo yash ot afalaminchi mvt, A shahli ma ! hatak nana kia oka yvt piakvchikma, ai-yupi a pit si okvcha hi vt ik svm ikshoshke ; yohmi hatuk o maya

li taklakma, inla yosh sa tikba okvtula beka hoke, im achi tok.

8. Chisvs ash ot, Tanit, chi potvlhpo ya ishi cha, nowá, im achi tok.

9. Yohmi ma ashalika fehna hatak ash ot hlakofi cha, i potvlhpo ash ishi mvt, nowa tok; mihma nitak yvmma fehna kv̄t nitak hullo ya tok.

10. Yohmi hatuk o Chu okla hv̄t na hlakofi tuk yvmmak ash o, Nitak hullo yoke; chi potvlhpo a isht ish aya he ai vlhpesa keyu hoke, im achi tok.

11. Mihma yvmmak ash osh afalaminchi mvt, Na sa hlakofichi yvmmak osh, Chi potvlhpo ya ishi cha, nowá, vm achi tuk oke, im achi tok.

12. Mihma yvmmvt, Hatak nanta hosh, Chi potvlhpo ya ishi cha, nowá, chim achi tuk oh cho? achit okla im asilhhvchi tok.

13. Yohmi ma okla laua yv̄t yvmma asha hatuk o, Chisvs vt lumvt a kv̄nia tuk atuk a, na hlakofi tuk ash ot kv̄na ak atuk a ik ithano ki tok.

14. I himmakma Chisvs vt yvmmak ash o tempel anuka-ka ya a pisa mvt, Yakeh! chi hlakofi hokvt, nan okpulo i shahli kv̄t ik chi onvtulo ka chi kv̄t, himmak mv̄no ik chi yoshubo kashke, im achi tok.

15. Mihma hatak ash at kohev̄t ia mvt, hlakofichi tuk vt Chisvs ak atuk a, Chu okla ha ont im anoli tok.

16. Yohmi hatuk o Chu okla hash osh, Chisvs vt nitak hullo nitak o yvmma yvmihchi tuk o, yvmmak ash i nukkil-lit vbi bvn̄vt maya tok.

17. Yohmi kia Chisvs vt, Aki vt toksahanli na himak a kak o, vno vt toksv̄li li hoke.

18. Yohmi ka yvmmvt nitak hullo ya kobv̄ffi kak o illa keyu, amba Chihowa yak osh Iki yo mihvt, Chihowa ya ila-pinli kv̄t itilau i ho isht il ilapissa aiena hatuk o, Chu okla hv̄t yvmmak ash vbi bvn̄na kv̄t i shahlich i tok.

19. Mihma Chisvs ash osh afalaminchi mvt, Ahlishke, ahli mak o hv̄chim achi lishke; Ushi yv̄t ilapo inli hokv̄to nana kaniohma he keyu, amba nana ho Iki vt yvmihchi ho,



pisa tuk mak oh chatuk oke ; nana ho yummak osh a yohmik mak o, Ushi yak kia yummak o ai yohmi akinli hoke.

20. Iki vt Ushi a i hullo hatuk osh, ilapvt nana ho a kaniohmi kvt mominchit yumma im otvninchi chatuk ; yohmi kvt hvchi nukhlakancha chi ka, nana kvt ilvppa i shahli fehna ka im otvnincha hi oke.

21. Iki vt illi, a tanichit okchalinchi chatuk a, Ushi vt yummak inli ho chohmit kvna ho ilap ahni hosh okchalinchi hoke.

22, 23. Iki vt hatak kvna kia nana ka im apesa keyu hoka ; amba hatak vt momvt Ushi a holitobli kvt, Iki a holitobli kak inli hosh ai itilauecha chi ka, nan-vlhpisa he puta ka mominchit Ushi ak o im issa hoke. Kvna hosh Ushi yash ik holitoblokmvt, yumma auet kanchi tuk Iki ash ik holitoblo hoke.

24. Ahlishke, ahli mak o hvchim achi lishke ; Kvna hosh vm anumpa ha haklo cha, auet sa kanchi tok a pit i yimmi hokvto, ai-okchayvt bilia ya ahayuchi ; mikmvt isht ai ilvsha he anumpa hv ik onvtulo ka hi oke : amba ai-illi ha a kohchvt ai-okchaya yo ona hoke.

25. Ahlishke, ahli mak o hvchim achi lishke ; Illi yvt Chihowa Ushi im anumpa ha hakla he hvshi kanvlli ai vlhpisa kvt mihintit, himonasi ak kia vlshke ; yohmi ka haklo hokvto, yummvt okchaya he mak oke.

26. Iki vt ilapvt kaniohmit ai-okchaya ya ilap inli il ai ishi hokvt, yummak inli ho chohmit Ushi vt ilap inli il ai isha chi ka, im apesa hoke :

27. Micha yummak okvt Hatak Ushi atuk oka, nan apesvt ahanta he isht ai vlhpesa ka im apesa hatuk oke.

28. Hvshi kanvlli ai vlhpisa kvt mihinti yummak okvno a-hollopi ya vlbehvt maya kvt, momvt yumma im anumpa ha haklo cha, kocha wiha he ;

29. Kvna hosh ai vlhpiesa ho yvmohmi tok okvto okchaya chi mak osh tana he ; anonti kvna hosh aivlhpesa keyu ho yvmohmi tok okvto, nan isht ai i palvmma chi mak osh tana hi oka, ilvppa hvch ik anukhlakancha kashke.

30. Uno akinli hokvto nana ho kaniohmi la he keyu ; na-

na ka haklo lik mak osh apesa li; yohmi kvt vno vm anuk-fila hō hoyo li keyu, amba Aki auet sa kanchi tok im anuk-fila ak oka, nan apesa li kvt ai vlhpiesa hoke.

31. Uno akinli hosh nan il atokolit anoli li hokmvno, nan il atokolit anoli li kvt ik ahlo hoke.

32. Na si atokowa anoli kvt inla hosh asha kvt, yummvt nan atokowa isht si anoli ka nan vlhtokowa aiahli mak oka ithana lishke.

33. Chan a nan i ponakla chi ka, pit hvsh tihleli ma, yummak ash ot aiahli ka atokolit anoli tok.

34. Yohmi kia hatak osh nan atokowa anoli hō, hoyo li keyu hoke; yohmi kia hvchishno yak osh a hvchi okchaya chi kak o, ilvppa puta ka achi li hoke.

35. Yummak okvt pula lua yosh shohmalalit tohwikeli ya tok: yohmi ma hvshi kanvlli vlhpisa achvfa kvno in tohwi-kinli ka nan isht il aiyukpa ka hvsh abni tok.

36. Yohmi kia nan atokowa si anoli kvt Chan a i shahli-chi kvt asha hoke; na toksvli atahli la hi o Aki vt vm apesa tok o, na toksvli hō isht ahanta li ka yummak osh, Aki vt auet sa kanchi tok o mvhli ka, atokowa si anohonli hoke.

37. Mihma Aki vt auet sa kanchi tok vt, ilapvt ai atokowa ka si anohonli tok. Nitak kaniohmi kash o yumma im anum-pa ha hvsh im antia tok keyu mvt, anonti kaniohmit otaiyani ka hvsh pisa tok keyushke.

38. Mihma im anumpa hvvt hvchi anukfoka keyu hoke: auet sa kanchi tok ash yumma hvsh i yimmi keyu hoke.

39. Holisso Holitopa ya achukmalit asilhhit ho pihisá: yummak o ai okchaya yvt a hvchin takali ka hvchim ahoba hatuk okvt, micha yummak osh ai-atokowa ka si anohonli mak oke.

40. Yohmi ka vm vlvt ai-okchaya ya hvsh pisa hi vt hvch ik ahno kvmohmishke.

41. Hatak o ai im a holitopa hi ano ahni li keyushke.

42. Yohmi kia Chihowa holitobli kvt hvchi anukfoka keyu ka, hvch ithana lishke.

43. Uno vt Aki i hohchifo hō aya li ma, hvch ik si ahnin-

choshke; inla yosh ilap i hohchifo akinli ho aya hokmvno, yummak o hvsh ahninchu hinlvshke.

44. Ilap bika ai it im aholitopa yak o hvsh aiahni cha, Chihowa ak illa ai im a holitopa hi ano hvsh ahni keyu kv, katiohmi kak osh hvchi yimma hinla cho?

45. Anumpa hvchi onochit Aki a im anoli la hinla ka, ik hvchim ahobo kashke; amba hvsh anukchieto tuk Moses ak osh anumpa hvchi onochi hoke.

46. Moses a hvsh i yimmi tok okmvt, vno a hvsh sa yimma he tuk oke; yummvt vno ak o isht a sa holissochi tok oka.

47. Amba yummvt holissohonchi tok a ik hvchi yimmo hokmvt, katiohmit vm anumpa hak o hvchi yimma hinla cho? im achi tok.

CHAPTA VI.

Chisvs vt pvska lumbo tahlapi, micha nuni tuklo aiena tuk a batak tahlepa sipokni tahlapi ka imprchi, 1. 14 Nan-ithvna vhleha ash ot okhvta ilhkoli tuk osh, mahli okpulo itafama; yohmi tuk kia okhvta paknaka ya a nowvt maya hosh Chisvs vt ona. 27 Hatak vt imi shilombish ak o ilhpak im atahli bvnvt maya hi a i miha mvt, 32 ilap ak osh ai okchaya pvska mak atuk vt miha. 65 Laua hosh ik im vlpeso mvt, issvt i filvmmi; 66 Pita yvt auah tuklo nan im anukfila ka anoli hosh, Chisvs vt Chihowa ak o Ushi pulla ka yimmi ka anoli.

1. NANA kv ai yakohmi ha ya, Chisvs ash ot Kalili okhvta, yummvt Tibelias okhvta ho pit tanvli tok.

2. Mihma abeka puta hatuk a nana ka ai i yvmihchit anta na pisa tuk ak osh okla laua fehvt pit iakaiya tok.

3. Yohmi ma Chisvs vt nuni chaha yo pit oiya cha, yummak o nan im ai ithvna vhleha hash pehlinchit binili tok.

4. Mihma vbanvblit ont-ia Chu okla im impa holitopa yvt ai ona hosi tok.

5. Yohmi ma Chisvs ash ot vba chakalit, okla laua fehna



hosh im ai vla na pisa mvt, Filip ash o, Katima ko pvs-  
ka ya il a chumpa na okla ilvppvt impa chi cho? im achi  
tok.

6. Ilapvt nana a kaniohma hinla hokvto ithana hatuk osh,  
yvmmak o imomaka pisa hosh ilvppa achi tok.

7. Mihma Filip ash ot afalaminchi mvt, Pyska yvt iskvli  
tahlepa tuklo vlhtoba mak osh, momvt iskvtnosi aiyuka ho  
isha hinla kia, vlhpesa he keyushke, achi tok.

8. Nan im ai ithvna achvft, Antilu, Saimon Pita itiba-  
pishi hash osh,

9. Ulla himita yvt bali palvska tahlapi, micha nvni chi-  
punta tuklo aiena ho ishi kvv ilvppa ashvshke; yohmi mak  
osh laua fehna hoka, na katihma heto, im achi tok.

10. Mihma Chisvs ash ot, Okla ha ho binolichi, achi tok.  
Yvmma hvshuk vt asha fehna tok. Yohmi hatuk o hatak  
holhtina kvv tahlepa sipokni tahlapi foka hosh aka binohli  
tok.

11. Mihma Chisvs vt pvska yash ishi cha, vba pit aiok-  
pvchi mvt, nan im ai ithvna vhleha ha ima ma, nan im ai  
ithvna vhleha hash ot aka binohli tuk ash ima tok: mihmvt  
nvni mvt kaniohmi ho okla bvna hinla tuk a yvmmak atuk  
ash inli ho okla chohmichi tok.

12. Mihma okla hash ot kaiyvt taha ma, nan im ai ithvna  
vhleha hash o, Boshulli vt atampvt asha ka oh itahobi, na-  
nasi kia ik kvnio kashke, im achi tok.

13. Yohmi na yvmmak ash ot bali palvska tahlapi ka  
okla ai vpa ma im atampa tuk boshulli asha ka, aiowvt ita-  
hobi mvt, kishi auah tuklo ka okla alotoli tok.

14. Yohmi ma Chisvs vt na-fehna ho yvmihchi na okla  
pisa mvt, Ilvppak osh hopaii yakni ilvppa vla he tuk mak o  
pulla mvhlshke, achi tok.

15. Yohmi hatuk osh okla mintit iti halvllit ishit, miko  
ikba hinla ka, Chisvs vt akostininchi mvt, filvmmitt ilap bieka  
hosh nvni chaha yo anonti ia tok.

16. Atuk o opivt taha ma, nan im ai ithvna vhleha hash  
ot pit okvtahvt okhvta ho ona tok.

17. Micha peni ont vlhbeha mvt, Kapenavm imma ia hosh

okhvta ha asht aya tok. Atuk o ont okhlilit taiyaha ka, Chisvs ash ot ik im ayo kisha tok.

18. Mihma mahli chito yosh mahli hatuk o, okhvta hash ot poakahanchi tok.

19. Yohmi hatuk o peni ash okla mofi kv, kowi tuchinakmá, keyukmvt ushtakmá, nana foka ho ona mvt, Chisvs vt okhvta paknaka a nohowa hosh peni ash i bilika ona na okla pisa tok; yohmi mvt okla nukshopa tok.

20. Yohmi kia yvmmak ash ot, Hvchi nukshopa ná, vno sia hash oke.

21. Mihma okla na yukpa fehvt yvmmak ash o peni ash ik chukowá, okla im ahni tok; atuk o peni ash ot chekosi fehna okla ai ona he tuk ash yakni a ont ataiya tok.

22. Ont onna ma okla okhvta mish tvnvp hiohmaya kv, peni inla mvt yvma iksho ho, achvfa yvmmak illa tuk o nan im ai ithvna vhleha hv vlbeha tuk; yohmi ka Chisvs vt nan im ai ithvna vhleha ha takla peni ont ik chukowo ho, amba nan im ai ithvna vhleha ak bano hosh ilhkoli tuk a, pisa mvt;

23. Yohmi kia Chitokaka yvt pska vba pit ai isht aiokpuchi na okla ai impa tuk a pit bilika Tibelias a a minti kv peni inla kanohmi hosh vla tok.

24. Yohmi hatuk a Chisvs, micha nan im ai ithvna vhleha aiena kash ot yvmmak ash iksho ho okla akostininchi mvt, yvmmak kia peni inla kanohmi kash vlbeha cha, Chisvs a hoyot, itnowvt Kapenavm a okla ai vla tok.

25. Mihmvt okhvta ha mish in tvnvp o anta na okla ont pisa mvt, Pi shahli ma! katiohmi kash o ilvppa ish la tuk oh cho? im achi tok.

26. Chisvs vt afalaminchi mvt, Ahlishke, ahli mak o hvchim achi lishke; Nana a fehna puta ka yvmihchi li ho hvs sa pisa tuk ak osh hvs sa hoyo kak keyu, amba pska ya hvsh pvt, hvchi kaiya tuk ak oke.

27. Ilhpak vt okpula hi okvno ahnit hvch ik toksalo kashke; amba ilhpak vt ik taho hosh ai-okchayvt bilia ya ona hinla, yvma Hatak Ushi vt hvch ima he yvmmak ash-

ke: yummak o Iki Chihowa yvt ai atokolit ai im aiahlich hatuk oke, im achi tok.

28. Yohmi ma okla afalaminchi mvt, Nanta ak o e katiohmi hosh Chihowa i na toksvli ha e toksvli hinla cho? im achi tok.

29. Chisvs vt afalaminchi mvt, Auet sa kanchi tok yummak o hvch i yimmi ilvppak osh Chihowa i na toksvli mak oke, im achi tok.

30. Yohmi hatuk o okla hash ot, E pisa cha, e chi yimma chi kvno, na-fehna nanta ho ish yvmihchi ho? nanta hak o isht ish ahanta cho?

31. Pin tikba vhleha hvt chukushmi foka ya manna yo ai ahampa tok; okla vpa chi ka pvska vba minti ho ipeta tok, achi kvt holisso tok oke, im achi tok.

32. Yohmi ma Chisvs ash ot, Ahlishke, ahli mak o hvchim achi lishke, Pvska vba minti yumma Moses ak osh hvch ipeta ha tok keyu; yohmi kia Aki ak osh pvska aiahli vba minti ka hvch ipeta hoke.

33. Uba mintit vla cha, yakni a ai-okchaya ihima kak osh, yummvt Chihowa i pvska mak oke, im achi tok.

34. Yohmi ma, Chitokaka ma! Pvska ilvppak o ish pipihinta na biliashke, im achi tok.

35. Mihma Chisvs ash ot, Uno ak osh ai-okchaya pvska ya sia mak oke: kvna hoshi vno ak o vm vla hokvt nitak nana hohchvfa he keyu; micha kvna hosh vno a a yimmi hokvt nitak nana itukshila he keyu hoke.

36. Yohmi kia hvchishno vto hvs sa pisa kvt ik hvchi yimmo ka, hvchim anoli li tuk oke.

37. Aki vt vma hokvno momvt vm vla hi oke; mikma kvna hosh vm vla hokvno, ik kaniohmi kia falaminchit kocha pit tobli la he keyu hoke.

38. Uba ya mintit vla li kvt, vno akinli nana vm anukfila hosh a yvmohmi la he tok keyu hokvt, amba auet sa kanchi tok nan im anukfila ha he tok.

39. Yohmi kvt auet sa kanchi tok Aki vt vma tok moyuma ka achvfa kia ik sa kvnio hosh, amba nitak ont ishtaiyopikma falaminchit tanichi la he ilvppak o im anukfila hoke.



40. Micha Ushi a pisa cha, yummak ash i yimmi hokvto, momvt ai-okchayvt bilia ya pisa he, ilvppak o auet sa kanchi tok vt aiahni hoke; yohmi ka nitak ont ishtaiyopikma yummak ash o falaminchit tanichi la hi oke.

41. Yummvt, Uno ak osh pvska vba minti tok mak o sia hoke, achi hatuk o, Chu okla hash ot yummak ash o lumasit na-mihachit maya tok.

42. Mihmvt, Ilvppvt Chisvs, Chosef a Ushi yoh chokvsh keyu? mikma iki, micha ishki aiena ka iloh ithana keya ho? yohmi hokak osh katiohmi ho vba mintit vla li tok, achi cho? achi tok.

43. Yohmi hatuk o Chisvs vt afalaminchi mvt, Lumasit nan itiba mihvt hvch ik mayo kashke.

44. Hatak nana kia vm vla he keyv, amba auet sa kanchi tok Aki ak osh halvlli hok mak a hi oke: mikma nitak ont ishtaiyopikma falaminchit tanichi la hi oke.

45. Mihmvt momvt Chihowa yak o nan im ai ithvna he, achi kvt hopaii puta i.holisso ha a holisso tok. Yohmi hatuk o hatak vt Aki a im a haponaklot, nana ka im ai ithvna aiyuka hokvto, vm ahanla hoke.

46. Hatak nana hosh Aki ak o pisa chatuk o keyu; Chihowa yak o a minti tok ak bano yummvto Aki a pisa chatuk oke.

47. Ahlishke, ahli mak o hvch im achi lishke, Kvna kia a yimmi hokvto ai-okchayvt bilia ya pisa hoke.

48. Uno ak osh ai-okchaya pvska sia mak oke.

49. Hvchin tikba vhlaha hvv chukushmi foka ya manna ai ahampa tok vt illi tok.

50. Pvska ilvppak o hatak vt ai vpa cha, ik illo ka hi o, vba ya mintit vla tok mak oke.

51. Uno ak osh pvska okchaya vba minti tok a sia mak oke; hatak nana hosh pvska ilvppa vpa hokmvt, okchaya na bilia he; yohmikma pvska ipeta la he, yummvt vno sa nipi yakni vt ai okchaya hi o, isht atobbi la chi kak oke, im achi tok.

52. Yohmi hatuk o Chu okla hash ot, Hatak ilvppvt

katiohmi kak osh ilap nipi ya pipeta na e pa hinla ho? achit itachowvt maya tok.

53. Mihma Chisvs vt, Ahlishke, ahli mak o hvchim achi lishke; Hatak Ushi nipi ya vvt, im issish ma hvsh ishko keyu hokmvt, ai okchaya hi vt hvchi anukfoka keyu hoke.

54. Kvna hosh sa nipi a vpa cha, svssish ma ishko hokvto, ai-okchayvt bilia ya pisa hoke; atukma nitak ont ishtaiyopikma falaminchit tanichi la hi oke.

55. Sa nipi vt ilhpak o fehnakma, svssish a ishka hi o fehna hoke.

56. Kvna hosh sa nipi a vpa cha, svssish ma ishko hokvt, vno a a svbai achafakma, anonti vno mvt ilapa ai ibachafa li hoke.

57. Aki okchaya yvt vno a auet sa kanchi tok o, Aki ak o vno vt ai okchaya li hatuk a, kvna hosh vno a svpa hokvt, yvmmak inli ho chohmit vno ak o si ai okchaya hi oke.

58. Ilvppak osh pvska vba minti tok mak oke; hvchin tikba vhleha hvt manna ya vpa tuk osh anonti illi tok a a chohmi ho keyu; kvna hosh pvska ilvppa vpa hokvto okchayvt bilia he mak oke, im ahanchi tok.

59. Kapenavm a nan ai ithvnanchit ahanta mak osh sinakak anukaka ya ilvppa puta ka ai ahanchi tok.

60. Yohmi hatuk o nan im ai ithvna vhleha hvt ilvppa haklot in taha mvt, lava kv, Ilvppvt anumpa kvlo feh-vshke, kvta hosh haponakla hinla cho? achi tok.

61. Nan im ai ithvna vhleha hvt ymma lumasit nan isht a miha ka, Chisvs vt ilapo inlit akostininchi mvt, Ilvppvt hvchi ibetvblich i hoh cho?

62. Yohmi kvto Hatak Ushi vt tikba ma ai vta tok vba ya ia na hvsh pisa hok mvt?

63. Okchalinchi vt shilombish ak oke; yohmikma nipi vto nana ho isht ai vhpesa keyu hoke; anumpa hvchim anumpuli li yvmmak osh shilombish okmvt, anonti isht ai-okchaya yoke.

64. Yohmi ka hvsh katiohmi mvt ik yimmo kv hvsh ashvshke, im achi tok. Ummonvt isht auehinchi kak inli ho kvna hak osh ik yimmo ka he, mikma kvna hak osh

ilapa ishit inla ibbak fohka he aiena ka Chisvs vt ithana tuk a tok.

65. Mihmvt, Yohmi hatuk o Aki ak osh anukfohkichi ho keyukma, hatak nana hosh vm vla he keyu hoke, hvchim achi li kvno, achi tok.

66. Yvmmak fehna kak o nan im ai ithvna vhleha hv lauvt filamvt taha mvt, i himmak ma apehv ik itunowo ki tok.

67. Yohmi ma Chisvs ash ot auah-tuklo kash o, Hvchishno ak kia filvmmi aya hi a hvchim anukfila cho? im achi tok.

68. Mihma Saimon Pita yvt afalaminchi mvt, Kvta hak o il im ia hinla cho? chishno ak osh ai okchayvt bilia isht anumpa ha ish ieshishke.

69. Micha chishno ak osh Chihowa okchaya Ushi, Klaist mak o chia pulla ka il ithanvt, pi yimmi fehna hoke, im achi tok.

70. Chisvs ash ot, Auah-tuklo ho hvchi atokoli li tok o, hvsh achvfona kvv nan-isht-ahullo okpulo yo chia keyu? im achi tok.

71. Yvmmak osh auah-tuklo ka ai iba chvfa yatuk osh, yvmmak ash ishit inla ibbak fohka chi ha tok oka Saimon, ushi Chutas Iskaliot ak o isht anumpuli ha tok oke.

CHAPTA VII.

Chisvs vt luma chohmi hosh ayvt Chelusalem a ona ma, Chu vhleha hv yvmmak ash pisa bvvntv aiasha mvt, nan isht anukfilli kvv im ilaiyukvt aiasha, 1. 14 Chisvs vt tempel a ont chukowa cha, nan ithvnanchit ahanta. 37 Hatak vt itukshila hokvto, ilap ak o im ai onvt nan ishka hi a, ahnit Chisvs vt hoyo.

1. NANA kvv ai yakohmi ha ya, Chisvs vt Kalili yakni ak o ahanta tok: Chu okla hash osh yvmmak ash vbi ka bvvntv maya hatuk o, Chu i yakni yokvno ahanta he ik ahno ha tok.

2. Mihma Chu okla chishako vlvhtipo nuta ai impa holi-topa yoh chatuk nitak vt a tikeli tok.



3. Yohmi hatuk o i kanomi vhleha hvt yummak ash o, Ilvppa issvt ivt, Chutea yakni yak o ish ona na nan chim ai ithvna vhleha hak kia na-fehna puta ish ai yvmihchi ka pisashke.

4. Ilapo vt otvni achukmvt annoa hi a ahni hokvt, hatak vt ai alumaka ho nana ka yvmihchi chatuk vt iksho hoke. Ilvppak oka a chi yvmohmi mvhli chatuk okmvt, yakni a ish il ai im otvnochashke, okla im achi tok.

5. I kanomi vhleha hak kia ik i yimmo hatuk osh.

6. Mihma Chisvs ash ot, Ŭno vt ia la he ai vlhpiesa kvto ik ai ono kisha hoke; amba hvchishno vto hvsh ia hi vt hvchim vlhpiesa bĭeka hoke.

7. Yakni vt hvchishno yokvno hvchi nukkillā he keyu: amba vno vto yvmma nana a kaniohmi kvt ai vlhpiesa keyu ka atokolit anoli li hatuk o, vno yokvno a nukkilli hoke.

8. Ai-impā holitopa āsha ilvppa hvsh iashke; vno yokvto ai vlhpesa kvt ai ona fehna keyu kisha hoka, ai-impā holitopa āsha ilvppa himonasi kvno ia la chi keyu hoke, im achi tok.

9. Anumpa ilvppa puta ka im ahanchit in taha mvt, Kalili yakni akinli ho anta tok.

10. Yohmi tuk kia i kanomi vhleha hash ot ivt taha tuk o, ilap ash kia ile haiakvchi fehna keyu, amba luma chohmit ayvt, ai-impā holitopa āsha kash ona tok.

11. Yohmi ma Chu okla hvt yummak ash ai-impā holitopa āsha ka hoyot, Mih mvto katima yak o hikia cho? achi tok.

12. Mihmvt kanimi kvt, Yvmmvt hatak achukma hoke, achi ma, inlaka yokvto, Keyu, amba okla hā haksichi yoke, achi hatuk o yummak ash lumasit isht anumpulit, ilap bika itachowa fehnt maya tok.

13. Yohmi kia Chu okla hā i nukshopa hatuk osh, hatak nana kia haiakvchit yvmma isht anumpuli kvt iksho ki tok.

14. Atuk o ai-impā holitopa āsha ka iklvnvt taha foka

ma, Chisvs ash ot tempel a pit chukowa cha, nana ithv-nanchi tok.

15. Mihma Chu okla hvt nukhlakancha cha, Hatak ilvppvt katiohmi kak osh ithvna tok keyu kvto, holisso ha imponna hoh chishba? achi tok.

16. Chisvs vt afalaminchi mvt, Nan isht ai ithvnanchi li kvv vno vmmi hq keyu, amba auet sa kanchi tok ak o immi hoke.

17. Hatak nana hosh, yvmmvt nana ai ahni tok mak o ahninchit yvmihchi hokmvt, nan-isht-ithvnanchi ka Chiho wa ak o a minti hokma, keyukmvt peh vno ahni li hosh anumpuli li hokma, nana hatuk ma akostinincha hi oke.

18. Kvna kia peh ilap ahni hosh anumpuli hokvto ilap isht a holitopa he ak o aiahni chatuk; amba auet kanchi tok vt nan-isht a-holitopa he ak o aiahni hokvto, yvmmak osh aiahli, mikma nana ik ai vlhpeso nana kia ai a takali keyu hoke.

19. Moses vt vba-nan-vlhpisa ya hvch ima tok keyu hq? a tok ak o hvchli achrfona kia vba-nan-vlhpisa mvno hvch ik holitobloshke. Nanta katiohmi hq subi bvvvvt hvsh itvno-wa cho?

20. Okla hash ot afalaminchi mvt, Nan-isht-ahullo okpulo yq il ai eshi chia hoka, kvta hosh chibi bvvvvt itvnowa hoh cho? okla achi tok.

21. Chisvs vt afalaminchi mvt, Nana achvfa hq ai yvmihchi li, yvmohmi ma momvt okokko! hvsh ahnishke.

22. Yohmi ka Moses vt hakshup tupa ka hvchim apesa tok. Moses ak osh yvmma tikbanlichi tok keyu, amba in tikba vhleha ak a tok: a tok kia hvchishno vto nitak hullo nitak o hatak hakshup hvsh in tahamblishke.

23. Moses i nan-vlhpisa yut ik kobafu ka chi ka, hatak vt nitak hullo nitak o hakshup in tvptohowa ma, vno vto nitak hullo nitak o hlakofichit kaiyanchi li kak o, hvs sa nukkilli cho?

24. Nana kvv a katiohmi ahoba kak o isht ik hvchim a-

nukfilo kashke; amba nana kv̄t isht v̄lhpisa kv̄t ai-v̄lhpiesa mak ǝ isht hv̄chim anukflashke.

25. Mihma Chelusalem a asha tuk vt kanimi kv̄t, Okla v̄bi bvn̄vt maya beka tuk a ilv̄ppak osh mih mak ǝ keyu?

26. Yohmi kia nukwaya iksho hosh anumpohonli ma, nan ok ik im achoshke. Ilv̄ppak osh Klaist fehna mak ǝ mv̄hli kv̄no, hatak pehliche v̄hleha hv̄t akostininchi hoh chishba?

27. Yohmi kia hatak ilv̄ppv̄to kanima yǝ a minti ka iloh im ithanv̄shke; amba Klaist ak osh v̄la hokma, kanima yǝ a minti ka hatak nana hosh akostinincha he keyu hoke.

28. Mihma Chisvs vt tempel anukaka ya nana ai ithv̄nan-chi hosh anta tuk ash osh chitolit, Ūno a hv̄s sv̄thana mv̄t, anonti kanima yǝ a minti li tuk ma hv̄sh ithanv̄shke; yohmi ka v̄no akinli ahni li hosh aya li keyu, amba auet sa kanchi tok yvm̄mak osh aiahli mak atuk ǝ yvm̄ma chik ithanoshke.

29. Amba v̄no v̄to yvm̄mak ǝ a minti li tuk okvt, yvm̄ma ithana li hoke; yvm̄mak osh auet sa kanchi tok mak oke, achi tok.

30. Mihma okla ishi bvn̄na tok; yohmi kia hv̄shi kanv̄lli isht ai im v̄lhpisa kv̄t ik ai ono k̄isha hatuk oka, hatak nana kia ibbak a ik onochi ki tok.

31. Mihma okla lav̄vt yvm̄mak ash i yimmi mv̄t, Klaist ak osh v̄la hokmv̄to, na-fehna puta ka yvm̄ihchi kv̄t, hatak ilv̄ppvt ai yvm̄ihchi tuk puta ka i shahliche hinla ho? okla achi tok.

32. Okla hv̄t lūmasit yakohmichit yvm̄ma isht anumpulit maya ka, Falisi v̄hleha hv̄t haklo tok; micha Falisi v̄hleha, mikmv̄t na-holitompa isht asha pehliche v̄hleha aiena kash ot yvm̄mak ash isha ch̄i ka, tishu v̄hleha ha pit tihleli tok.

33. Mihma Chisvs ash ot, Chekosi itintakla kak ǝ hv̄chi takla anta li mōma ch̄i; atuk mv̄t anonti auet sa kanchi tok a im ia la ch̄i hoke.

34. Hv̄s sa hoyo kia, hv̄ch ik sa p̄eso ka ch̄i; mikmv̄t kanima yǝ ai ahanta likma, yvm̄ma hv̄sh ai ona he keyu hoke, im achi tok.

35. Mihma Chu okla hash osh ilapo bika it im achit, Katima kǝ ia ch̄i hokak ǝ, keho pesa ka ch̄i hoh chishba?



ita-fimimpvt Chentail okla ibvlhkahvt asha hak o im ayvt, Chentail okla ha nan ithvnancha chi ho?

36. Ilvppak osh anumpa nanta mak o, Hvs sa hoyo kia, hvch ik sa peso ka chi; mikinvt kanima yo ai ahanta likma, yvmma hvsh ona he keyu hoke, achi tok.

37. Nitak ont ishtaiyopi na holitoblit ai-impa nitak chinto yvmmak fehna Chisvs vt hikia cha, tahpahanla mvt, Hatak nana hosh itukshila hokmvt, vno ak o vm ai vltv ik ishkó.

38. Kva hosh vno a a yimmikma, yvmmak o, Holisso Holitopa yvt achi hatuk oka, oka okchaya okhina yvt chu-kvsh a a yavvllit a kokoncha chi hoke, achi tok.

39. Yohmi kia ilapa i yimmi vhleha hv Shilombish a habena he yvmmak o isht anumpuli hosh ilvppa miha tok: Chisvs vt ont ik a holitopo kisha hatuk o, Shilombish Holitopa yvt ik ayo kisha ha tok.

40. Yohmi hatuk o anumpa ilvppa haklo mvt, okla hash ot lavvt, Ilvppak osh hopaii mih mak o fehna ho mvhlshke, achi tok.

41. Kanimi mvt, Ilvppak osh Klaist mak oke, achi ma, amba kanimi kvto, Klaist vt Kalili yakni a vttvt a kohevvt aya hinla ho?

42. Klaist vt Lewi Ushi ai isht atiaka ho, micha Behlehem tvmaha Lewi vt ai ahanta tok mak o ai vtta ahpa hi a, Holisso Holitopa yvt achi hatuk keyu? achi tok.

43. Yohmi hatuk o yvmmak atuk mak o okla hv isht ai ita kashavvt maya tok.

44. Mihma kanimi kv yvmmak ash ishi ka ahni tok; yohmi kia hatak nana hosh ibbak a ik onochó ki tok.

45. Yohmi ma tishu vhleha hash osh na holitompa isht asha peblichí vhleha, micha Falisi vhleha aiena kash im ai ona tok; mihma yvmmak ash osh, Nanta katiohmi ho yvmmak ash isht hvch ik lo cho? im achi tok.

46. Mihma tishu vhleha hash ot, Hatak nana hosh anumpuli kv hatak ilvppa chohmi chatuk keyushke, achi tok.

47. Mihma Falisi vhleha hash ot afalaminchi mvt, Hvchishno ak kia hvsh i haksi hotuma?

48. Hatak hochitoka, keyukmvt Falisi vhleha aiena kvt kanimi mvt, yvmma i yimmi tuk o?

49. Yohmi ka nan-vlhpisa kia ithana keyu okla ilvppvto nan isht i palvmma he vlhpesvshke, achi tok.

50. Nikotemvs, yvmmvt ninak o ayvt Chisvs a im ona tok ash ot, yvmma ai ibachvfa hatuk osh,

51. Nan vlhpisa pin tonla kvt hatak a ai i haponaklot, nana ho a kaniohmi hatuk ma ai akostininchi keyu kisha kvt, nan im apesa chatuk oh cho? im achi tok.

52. Mihma okla afalaminchi mvt, Chishno ak kia Kalili hatak chia hatuk o? achukmalit hoyot pisá: hopaii vt Kalili yakni a ai vttvt kohchvt aya hi vt iksho hoka, im achi tok.

53. Yohmi ma hatak ash ot momvt in chuka aiyuka ilhkolit taha tok.

## CHAPTA VIII.

Falisi vhleha hvt, ohoyo hosh haui tobtv ahanta na yvmmak osh nan im apesa chi ho, isht im ona, 1. 12 Chisvs vt ilap ak osh yakni in tohwikeli; yohmi ka yvmmvt im aiahli ka Iki vt atokolit anoli chatuk aiena ka miha. 30 Chu okla hvt Chisvs a i sanali; yohmi hatuk o ilapvt Eblahan ak okvno isht atiaka ho mvhli akinli kia, nan ai ashvchika yokvno i yuka vhleha; micha nan isht ahullo okpulo a im vlla vhleha aiena hatuk a, Chisvs vt im otvninchi.

1. CHISVS vt Alif nvnih ha ia tok.

2. Atuk osh onna-hinli fehna falamvt tempel ash ant chukowa ma, okla momvt im ai itvnaha tok: mihma aka binilit nan ithvnanchi tok.

3. Mihma na-holissochi vhleha, micha Falisi vhleha aiena kvt, ohoyo hvt lumakvt anta tuk o, isht im ona tok; micha ai iklvnna ka okla binilichi mvt,

4. Nan-ithvnanchi ma! ohoyo ilvppvt lumakvt anta, ai yakohmi fehnvt haiaka na ishi tuk oke.

5. Yohmi ka Moses vt ilvppa chohmi hokvt tvli isht boa hi o, nan-vlhpisa ya isht a pim apesa tok; yohmi ka chishno vto nantuk ish achi cho? im achi tok.

6. Ilap ak o anumpa onocha hi vt ahnit, imomaka pisa hosh ilrppa okla achi tok. Yohmi kia Chisvs ash ot ik i haponaklo ho chohmit, aka pit waiahput, ibbak-ushi a yakni a isht ai o holissochi tok.

7. Yohmi ka okla i ponaklo kash ot a moyuma ma, wakaya mvt, Kanima hosh ai ashvchika ik im iksho kvt hvchi takla hikia hokmvt, yvmmak osh na tikba tvli ya isht ik boli, im achi tok.

8. Mihmvt anonti aka pit waiahput yakni a ai o holissochi tok.

9. Mihma okla haklo tuk ash ot, ilap chukvsh akinli ka nan isht ai il akostininchi mvt, holitopa i shahli tuk ak osh tikba achvfa aiyukvt kohchvt ihiya mvt, ik a lauwo ke tuk vt momvt ont taiyaha tok; mihma Chisvs ak bano hosh hikia ma, ohoyo hash osh ai iklvna ash hikia tok.

10. Chisvs ash ot wakaya mvt, inla yvt iksho ho, ohoyo ak bano ho pisa mvt, Ohoyo chia ma! anumpa chi onochi vhleha mvto? hatak nana kia anumpa ik chi onochi ke tuk oh cho? im achi tok.

11. Mihma, Hatak nana kia anumpa ik si onochoshke, Chitokaka ma! achi tok. Mihma Chisvs ash ot, Ŭno ak kia anumpa chi onochi li keyushke, ia cha, himmakma ik chi hakso kashke, im achi tok.

12. Mihmvt Chisvs ash ot anonti okla ha im anumpuli mvt, Ŭno ak osh yakni im a tohwikeli sia mak oke; kvna hosh vno a siakaiya hokvt, ai okhlilika yo aya he keyu; amba ai okchaya tohwikeli hv in takala he mak oke, im achi tok.

13. Yohmi hatuk o Falisi vhleha hash ot, Nan ish ai atokoli kvt chishno akinli hosh ish il ai-anoli hokvt, nan ish ai atokoli ka ahli keyushke, im achi tok.

14. Chisvs ash ot afalaminchi mvt Atokoli kvt vno akinli hosh il ai anoli li akinli kia, nan ai atokoli li ka ahli hoke: vno ak okvto kanima yo a minti li tuk: mikmvt kanima yo atia la he aiena kvt ithanali hoka; amba hvchishno vto kanima yo a minti li tuk, micha kanima yo atia la he aiena ka hvsh akostinincha he keyushke.



15. Haknip nan isht a kaniohmi chatuk mak o nana hvsh apesvshke; vno vto hatak nana kia nana ak im apesoshke.

16. Yohmi kia nana ka apesa li hokma, nan apesa li ka aiahli hoke; vno ak illa keyu hoka, amba vno vt auet sa kanchi tok Aki a itatuklo li hoke.

17. Hatak tuklo hosh nana atokolit anoli ho aiahla hi a, hvchi nan-vlhpisa yak kia a holihiso hoke.

18. Nan isht a si atokowa anoli kvv vno akinli kak osh mihi yo sia hokma, anonti auet sa kanchi tok Aki ak osh nana atokowa ka si anoli hoke.

19. Yohmi ma Katima ko Chiki vto asha hosh? okla im achi tok. Chisvs vt afalaminchi mvt, Uno, mikmvt Aki ita tuklo li ka hvch ik pithanoshke; vno a hvsvthana hatuk okmvt, Aki ma hvsh ithana he tuk akinli hoke, im achi tok.

20. Anumpa ilvppa Chisvs vt tempel anukaka ya nana ai ithvnanchi hosh ahantvt, tvli holisso abohli yo hikia hosh anumpuli tok: hvshi kanvlli isht ai im vlhpisa kvv ik ai ono kisha hatuk o, hatak nana kia ibbak a ik onochoko tok.

21. Anonti Chisvs ash ot, Kanima ia likma, hvsvsa hoyo kia, nan ai-ashvchika puta kak o isht hvchi ai illa hi oke: kanima yo ai ona li ka, hvchishno vto hvsh ona he keyu, im achi tok.

22. Yohmi ma Chu okla hash ot, Kanima yo ai ona li ka, hvchishno vto hvsh ona he keyu, achi kvv ilap inli kak osh ile ba chi hoh cho? achi tok.

23. Mihma, Hvchishno vto aka yo a minti hvchia hokma, vno vto vba yo a minti li hoke; hvchishno vto yakni ilvppak o ai ibachvfa hvchia hokma, vno vto yakni ilvppa ai ibachvfa sia keyu hoke.

24. Yohmi ka na hvchim ai-ashvchika puta kak o isht hvchi ai illa hi oke, hvchim achi li hokvno; vno ak osh mih mak o sia ka ik hvchi yimmo hokmvt, na hvchim ai-ashvchika puta kak o isht hvchi ai illa hi oka, im achi tok.

25. Mihma, Chishno ak osh kvvta hak o chia ho? okla im

achi tok. Mihma Chisvs ash ot, Ummona ka nana ho hvchim anoli li kash mih mak o sia hoke.

26. Nana ka hvchi mihvt, nan isht apesa la hi vt lauvt vm ashvshke. Yohmi kia auet sa kanchi tok yvmmak osh aiahli mak oke; mihma vno vt yvmmak o nana ka ai im a haklo li tuk mak osh yakni a isht im anumpuli li hoke.

27. Iki ak o isht im anumpuli hatuk a, okla ik akostinincho ki tok.

28. Mihma Chisvs ash ot, Hatak Ushi a vba hvsh takalichi hok mak osh, vno vt mih mak sia hatuk; micha vno akinli vm anukfila hosh nanasi ka ai yvmohmi li keyu; amba Aki ak osh nan svthvnanchi tuk mak o ilvppa puta ka anum-puli li hatuk a hvsh akostinincha hi oke.

29. Michi auet sa kanchi tok vt sa takla aya hoke; Aki vt ilap illvchit sa kanchi tok keyu; nana kvv yvmma yuk-pali pulla kak o yvmohmi kvv a sa bilia chatuk oke, im achi tok.

30. Anumpa ilvppa puta ka anumpohonli ma, i yimmi kvv laua tok.

31. Yohmi ma Chisvs ash ot i yimmi tuk vhleha Chu okla hash o, Um anumpa ha hvsh halvlli kvv hvch ik issok-mvt, nan vm ai ithvna ahli fehna hvchia mak a chi hoke.

32. Mikmvt nan-aiiahli ka hvsh ithana he; mikma nan-aiiahlika yash ot yuka keyu hvch ikba hi oke, im achi tok.

33. Okla afalaminchi mvt, Eblaham ak o isht atiaka pia, yohmi kvv nitak nan ash o hatak nana kia ai i yuka hosh il anta tok keyu ka, katiohmi ho, Yuka keyu hvchi toba hi oke, ish achi cho? im achi tok.

34. Chisvs ash ot afalaminchi mvt, Ahlishke, ahli mak o hvchim achi lishke, Kvna hosh nan ai ashvchika ya ai yohmi hokmvt, nan-ai-ashvchika ya i yuka mak oke.

35. Yohmi ka yuka hokvto chuka ya ai ahantvt bilia chatuk keyu; amba Ushi yokvto ahanta na bilia chatuk oke.

36. Yohmi hoka Ushi yak osh yuka keyu ka hvch ikbi hokma, yuka keyu ahli mak o hvchia ha hi oke.

37. Eblaham ak o isht atiaka hvchia hokvno hvchim



ithana li; yohmi kia vm anumpa hak osh huchi chukvsh a ai anukfoyuka keyu kak o, sabi huchi bnvnvshke.

38. Aki a ai iba pisa li tok mak osh vno vt nana ka isht anumpuli li hoke; mihma huchishno vt huch iki a hvsh ai iba-pisa tok mak osh a huchi yvmohmishke, im achi tok.

39. Mihma okla afalaminchi mvt, Eblaham ak osh piki oke; im achi tok. Chisvs ash ot, Eblaham ak o ushi huchia hatuk okmv, Eblaham vt nana a kaniohmi tok mak o, hvsh yvmohma he tuk oke.

40. Amba Chihowa ya nana ai im a haponaklo li tuk vt nan ai ahlika mak o hatak huchim anoli li ka, sabi huchi bnvnvshke; Eblaham vt ilvppa yakohmi tok keyu hoke.

41. Huch iki vt nana a kaniohmi tok mak o hvsh yvmohmishke, im achi tok. Mihma, Iki, ishki ita tuklo kv ai vlhpesa keyu ho a toba hosh il vtta tok keyu: Piki vt achvfa, Chihowa ak oke, im achi tok.

42. Chisvs ash osh, Chihowa ak osh huch iki atuk okma, hvs sa hulla he tuk oke; vno vt Chihowa yak o a kohchvt aya li hosh vla li ha tok oka; yohmi kv vno vm anukfila akinli hosh vla li tok keyu; amba yvmmak osh auet sa kanchi tok oke.

43. Nanta katiohmi ho vm anumpa ha huch ik svm akostinicho cho? vm anumpa ha haponaklo ik huchi bnvno kak okvt,

44. Setan huch iki ak o hvsh a toba hatuk osh, huch iki nana ai-ahni kak o ai yohma hi a huchim anukfilvshke; yvmmak okvt vmmona kash inli ho hatak vbi a tok; micha ilap ak osh nan aiahli kv anukfoka keyu hatuk osh, nan ai ahlika ya a hikia keyu hoke. Holabit anumpuli kv ai immi ka mak okvt anumpuli hoke; ilap ak osh holabi yokvt, anonti na-holabi iki mak oke.

45. Yohmi hatuk o ai ahlika yo huchim anoli li hatuk o, huch ik sa yimmoshke.

46. Hvsh katima kak osh nan ai-ashvchi li tuk a hvs svm atokola hinla cho? Ahli mak o miha li hok mak heno, nanta katiohmi ho huch ik sa yimmo cho?

47. Kyna kia Chihowa ya immi hokmv, Chihowa im



anumpa ha haklo hoke; yohmi hoka hvehishno vto Chihowa immi hvchia keyu hokvt hvch ik hakloshke, im achi tok.

48. Mihma Chu okla vhleha hash ot afalaminchi mvt, Chishno vt Samalitan hatak chia hosh, nan-isht-ahullo okpulo a ish il ai eshi hatuk a, e chi achi kvv vlhpesa ho e miha keyu cho? im achi tok.

49. Chisvs vt afalaminchi mvt, Nan-isht-ahullo okpulo il ai ishi li keyushke: amba Aki a holitobli li hatuk o, hvchishno vto vno a hvch ik sa holitobloshke.

50. Micha vno akinli isht a sa holitopa hi o ahni li keyu; yvmma aiahni cha, nan apihisa kvto achvfa hosh asha hoke.

51. Ahlishke, ahli mak o hvchim achi lishke; Hatak vt nana mihiha li ka vm antia hokmvt, nitak nana ai-illika ya pisa he keyu hoke, im achi tok.

52. Mihma Chu okla hash ot, Nan-isht-ahullo okpulo a ish il ai eshi hatuk a, himak vno il akostininchishke; Eblaham, mikmvt hopaii vhleha aiena kvv illi tok: yohmi ka hatak vt nana mihiha li ka vm antia hokmvt, nitak nana ai-illika ya pisa he keyu, ish achishke.

53. Piki Eblaham illi tok a ish i shaiyahli cho? mihma hopaii vhleha aiena kvv illit taha tok. Chishno ok ash kvta hak o ish il ai apesa hoh cho? im achi tok.

54. Chisvs vt afalaminchi mvt, Vno akinli hosh ile holitobli li hokma, na sa holitopa he mak keyu hoke. Hvchin Chihowa hvsh miha tuk Aki yvmmak osh sa holitobli hoke.

55. Yohmi kia hvchishno vto yvmma hvch ik ithanoshke; amba vno vto yvmma ithana lishke; yohmi kvv yvmma ak ithano hoke; achi li hokmvt, holabi hvchishno akinli ho chohmi la chi hoke; yohmi kia yvmmak oka ithana li mvt, nana ahanchi ka holitobli lishke.

56. Hvch iki Eblaham vt ai ahanta li nitak a pisa hi okvt na yukpa tok; atuk osh pisa cha, na yukpa chinto fehna tok, achi tok.

57. Mihma Chu okla hash ot, Sipokni kvv afvmmi pokoli tahlapi ka chik ono kisha hokak osh, Eblaham a ish pisa tok oh cho? im achi tok.

58. Mihma Chisvs vt Ahlishke, ahli mak o hvchim achi

lishke, Eblaham vt iksho kisha ma, anta li tok oke, im achi tok.

59. Yohmi ma ishit bola chi kv̄t, tv̄li a okla aiowa tok: yohmi kia Chisvs ash ot lumvt okla ai iklvnnaka ya hlopul-lit ayvt tempel a a kohchvt ont ia tok.

## CHAPTA IX.

Hatak vt l̄vpa yosh vtta tok a, Chisvs vt hoponayochi, 1: 13 hatak ash o ilauct Falisi vhleha h̄a isht im ona ma, Falisi vhleha hash ot hatak ash sinakak a a kohchichi. 35 Chisvs vt ilap ak osh Chihowa h̄a Ushi mak atuk vt hatak yvm̄mak ash im il otv̄ninch̄i ma, hatak ash ot i yimmi cha, aiokpv̄chi.

1. MICHA Chisvs vt ont ia cha aya mvt, hatak vt l̄vpa imoma yosh vtta tok osh a<sub>u</sub>sha na pisa tok.

2. Mihma nan im ai ithvna vhleha hv̄t, Pi shahli ma! hatak ilvppak okm̄a, keyukmvt i<sub>k</sub>i, ishki itatuklo ka a kati-ma kak osh nan ashv̄chi tok o, hatak ilvppvt l̄vpa imoma yosh vtta tok oh cho? achit i ponaklo tok.

3. Chisvs ash ot afalaminchi mvt, Hatak ilvppak okm̄a, keyukmvt i<sub>k</sub>i, ishki ita-tuklo ka a kanima kak osh nana ashv̄chi tok o keyu hoke; amba Chihowa nan-isht im ai ahlika yvt ilvppak o isht ai otv̄na he mak o, ai yakohmi tok oke.

4. In toksv̄li la he mak o auet sa kanchi tok oka nitaki moma kak o isht im ahanta li pullashke; ninak vt vla ha yokmv̄no, hatak nana kia pilesa he keyushke.

5. Yakni a ai ahanta li takla hokv̄to, yakni a in tohwikeli sia hoke, im achi tok.

6. Ilvppa mak achit ont issa mvt, yakni a on tofv̄t, lukfi a itukchi ishit yvm̄vslit tahli mvt, hatak l̄vpa nishkin a lukfi ash o isht im apolusli tok.

7. Mihmvt, Oka talaia Siloam, yvm̄mvt toshowakmvt, Pila, achi h̄o ia cha, ont okam̄i, im achi tok. Yohmi ma ia cha ont okami mvt, pisa hosh vla tok.

8. Yohmi hatuk o chuka panta hatak vhleha, micha yvm̄mvt l̄vpa yo tikba ka pisa beka tuk vhleha yvm̄mak ash ot, Ilvppvt ashv̄t nana asih̄ihla chokv̄sh mak o keyu? achi ma,



9. Kanimi kv̄t, Ilv̄ppvt mihi yoka, achi ma, inla mvt, Peh holba hoka, achi tok : yohmi kia ilap vto, Mihi yō sia hoke, achi tok.

• 10. Yohmi hatuk o, Katiohmi hosh chi nishkin vto fatuma tuk oh cho ? im achi tok.

11. Mihma afalaminchi mvt, Hatak Chisvs hohchifo kak osh lukfi a yvm̄slit, sa nishkin a isht v̄m apolusli cha, Oka talaia Siloam a ia cha, ont okamī, v̄m achi ma, ivt ont aka-mi li hosh, hoponayo li tuk oke, achi tok.

12. Mihma, Atuk osh mih mvtō ? okla im achi ma, Ak akostininchoshke, achi tok.

13. Mihma l̄pa yō beka tuk yvm̄mak ash o ilauinlit Falisi v̄hleha h̄a isht im ona tok.

14. Yohmi ka nitak hullo nitak o Chisvs vt lukfi a yvm̄sli cha, nishkin a i fatummi tuk a tok.

15. Yohmi hatuk o anonti Falisi v̄hleha hvt kaniohmit hopanayo tuk a, im asilhhv̄chi akinli tok. Lukfi yvm̄ska yō sa nishkin a isht a lapohlechi na okami li tuk osh, hoponayo lishke, im achi tok.

16. Yohmi hatuk o Falisi v̄hleha kanimi kv̄t, Hatak yvm̄mvt nitak hullo nitak a holitobli keyu hokvt, Chihowa ak o a m̄inti keyūshke, achi tok. Inlaka yokvto, Hatak vt nan ashv̄chi atuk vt katiohmi hosh na-fehna puta yakohmi ka yvm̄ihcha hinla cho ? achi tok : yohmi mvt ilap bika okla ai ita kashapvt māya tok.

17. Hatak l̄pa yatuk ash o anonti, Chishno vto chi nishkin a ch̄i fatummi tuk a, yvm̄mak oka nanta isht ish achi cho ? okla im achi ma, Yvm̄mak ash ot hopaii yoke, achi tok.

18. Yohmi kia Chu okla hash ot hoponayo tuk ash iki, ishki ita tuklo ka hoyot ik im asilhhacho kisha kv̄t, yvm̄mvt l̄pa yatuk osh hoponayo tuk a, ik yimmo ki tok.

19. Atuk osh yvm̄mak ash o okla i ponaklot, Ilv̄ppvt hv̄ch iso l̄pa yosh vtta tok hv̄sh achi chokv̄sh oh cho ? Yohmi hokak osh katiohmi hō himak ano hoponayo cho ? okla achi tok.

20. Iki, ishki ita-tuklo kash ot afalaminchi mvt, Ilv̄ppvt piso, micha l̄pa yosh vtta tok okvno il ithanv̄shke.

21. Amba nana hosh kaniohmi hō himak ano p̄isa kvno,



kil akostininchoshke ; mikmvt kvna hosh nishkin a i fatummi tuk aiena kvno, kil ithanoshke ; vlla keyu hoka, ilap ak o hvsh i ponaklokma, ilap inli hosh isht il ai anumpula hinla hoke, achit okla tok.

22. Hatak nana hosh, yvmmvt Klaist oke, achi hokmvt, sinakak a a kohcha hi o, Chu okla hvv ai it ibachvvt taha mashko hatuk o, iki, ishki itatuklo kvv Chu okla hak o i nukshopa hatuk osh, anumpa ilvppa achit okla tok.

23. Yohmi hatuk osh iki, ishki itatuklo kash ot, Vlla keyu hoka, ilap ak o oh i ponakló, achit okla tok.

24. Yohmi ma atukla ma hatak lvpa yatuk ash o okla hoyo mvt, Chihowa yak o pit holitoblichí, hatak ilvppak okvto nan ashvchi a il im ithana hoke, im achi tok.

25. Mihma afalaminci mvt, Yvmmak okvt nana ashvchi yokmá, keyukmá, nana hokvno ak im ithanoshke ; nana achvfa kvno ithana li ; yohmi kvv lvpa sia ha tuk kia, himak ano hoponayo li kak oke.

26. Mihma anonti, Nanta hō a chí katimichi tuk o ? Katimihchi hosh chi nishkin a fatummi tuk oh cho ? okla im achi tok.

27. Mihma im afalaminci mvt, Hvchim anolit taiyahli li kia, hvch ik haponaklo ke tuk vt, nanta katiohmi hō atuklanhit haklo ka hvsh ahni cho ? hvchishno ak kia nan im ai ithvna toba hvchi bvna hō ? achi tok.

28. Yohmi ma okla ishtukhlakavvt, Chishno ak osh yvmma nan im ai ithvna chia hoke ; amba pishno vto Moses ak o nan im ai ithvna pia hoke.

29. Moses ak okvno Chihowa yvt im anumpuli beka tok a il ithana ; amba ilvppak okvto kanima yō a minti ma, il ai im ithana keyushke, okla im achi tok.

30. Mihma hatak ash osh afalaminci mvt, Yvmmvt kanima yō a minti tuk a hvch ik im akostinincho hō, anonti sa nishkin a a fatummi hoka, ilvppvt na-fehvvshke.

31. Mihmvt Chihowa yvt nan ashvchi vhleha hokvno i haponaklo keyu chatuk ; amba hatak nana hosh Chihowa ya aiokpvchi, micha nan ahni ka im antia aiena yok mak o mihi yō i haponaklo chatuk a iloh ithanvshke.

32. Yakni vt toba tok a taiyakla ka lpa imoma yosh vta tok a hatak nana kia nishkin ash i fatummi tok a annoa chatuk keyushke.

33. Hatak ilvppvt Chihowa yak o a minti hatuk keyu hokmvt, nana ho yvmihcha he keyushke, im achi tok.

34. Mihma okla afalaminchi mvt, Nana ai ashvchika bieka mak osh ish vta tok ak naka nan ish pim avchi hotuma? im achi mvt, a kohchichi tok.

35. Yvmma a kohchichi tuk a, Chisvs vt haklo tok; atuk osh yvmmak ash o pisa mvt, Chihowa Ushi a ish i yimmi cho? im achi tok.

36. Afalaminchi mvt, Chitokaka ma! i yimmi la hinla yvmmak osh kva ho? achi tok.

37. Mihma Chisvs ash osh, Yvmmak oka ish pisa tuk o, anonti mihi yosh chit im anumpohonli hoke, im achi tok.

38. Mihma, Chitokaka ma! sai yimmishke, achi mvt, yvmmak ash aiokpvchi tok.

39. Ik hoponayo atuk vt hoponayo yokma, anonti hoponayo tuk vt lpa yo toba he, yakohmit nan isht im vlpisa hi o, yakni ilvppa aya li hatuk oke.

40. Mihma Falisi vheha kanimi kvv yvmma apela tuk ash ot anumpa ilvppa puta ka haklo mvt, Pishno ak kia lpa pia hoh cho? im achi tok.

41. Chisvs ash ot, Lpa hvchia hatuk okmvt, nan ai ashvchika yvt ik hvchim iksho ka he tuk; amba, E hoponayo, himak a hvsh achi; yohmi hokvt hvchim ai ashvchika yvt takanli moma hoke, im achi tok.

## CHAPTA X.

Chisvs ak osh okhissa, mikmvt yvmmak osh chukvrlhpoba apesvchi achukma yatuk osh chukvrlhpoba ya vltobvt illi, 1. 19 Okla hvv Chisvs a nan isht ai im anukila kvv ilaiyuka, 24 Chisvs vt Chihowa hak o a minti tuk a ilap nana ai isht ahanta kak inli hosh otrninchika im anoli; 39 Chu okla hvv vbi brnna kia im a blakofit kocha. 40 Chisvs vt ia mvt Chatan misha tvnrvp o ona ma, okla laua hosh i yimmi.

1. AHLISHKE, ahli mak o hvechim achi lishke, Kva hosh chukfulhpoba i holihta okhissa yak o ik a chukowo hosh, amba naksika kanima yo pit oiyvt o walvbli hokvto, yummvt hukopa, mikmvt na wehpuli mak oke.

2. Amba okhissa yak o pit a chukowa hokvto, yummak osh chukfulhpoba ya apesvchi mak oke.

3. Yummak o okhissa apesvchi atuk vt in tiwikma, itih ola ka, chukfulhpoba yvt ithana; yohmi hatuk oka in chukfulhpoba atuk ash hohchifo aiyuka hochifot pehlichit kohcha chatuk.

4. Atuk osh in chukfulhpoba yash kocha welit tahlukmvt, tikba im iakma, itih ola ka, ithana hatuk okvt, chukfulhpoba yash ot apehvt ia chatuk.

5. Yohmi kia inla itih ola hokvno ik ithano hatuk osh, apihvt ia he keyu hosh, amba i filvmmi yihlepa chatuk oke, im achi tok.

6. Nan-isht-vlhpisa ilvppak o Chisvs vt okla ha isht im anumpuli tok: yohmi kia nana ho yummvt isht ai im anum-puli hatuk a, okla ik akostinincho ki tok.

7. Yohmi hatuk o Chisvs ash ot atuklanchit, Ahlishke, ahli mak o hvechim achi lishke, Uno ak-osh chukfulhpoba im okhissa sia hoke.

8. A sa tikba aya tok puta kvto hukopa, mikmvt na-wehpuli bano ha tok: yohmi hatuk o chukfulhpoba yvt yummak okvno ik i haponaklo ki tok.

9. Uno ak osh okhissa sia hoke: hatak nana hosh vno ak o si a chukowa hokvto, okchaya he: micha pit chukohovvt, anonti kohonchvt, ai-impv ya ahayuhoncha hi oke.

10. Na-hukopa yvt hukopa, micha vbi, nan okpvni aiena he ak bieka hosh aya chatuk; amba ai okchaya ya okla ahayuchikmvt, anonti laua kvv i shahli fehna ho pisa he mak o, vno vto aya li ha tok.

11. Uno ak osh chukfulhpoba apesvchi achukma sia mak oke; chukfulhpoba apesvchi achukma yvt chukfulhpoba ya ilap im ilhfiopak a a kaiyanchi hoke.

12. Amba peh ihtohno, chukfulhpoba apesvchi keyu hatuk, micha chukfulhpoba yvt immi atuk keyuk mvto, na-



shoba vt minti na pisakmvt, chukfvlhpoba ya issvt chvfa hoke; yohmi ma nashoba yvt yvmmak ash ant hoklit, chukfvlhpoba yash it ai yuhli hoke.

13. Ilhtono hvt peh ilhtohno atuk okvt, chukfvlhpoba ya nan isht ik ahno hatuk mak osh chvfa hoke.

14. Uno ak osh chukfvlhpoba apesvchi achukma sia hoke; an chukfvlhpoba ya ithaiyana li hoke; mikma anonti vmmi hvt vno a svthana hoke.

15. Aki vt svthana ka, vno mvt Aki a ithana li akinli koke; yohmi hosh chukfvlhpoba ya isht vlhtoba ho vm ilhfiopek a aka bohyuli lishke.

16. Yohmi kvv chukfvlhpoba inla mvt ilvppa ashaka ai achvfa keyu kvv vm asha hoke: yvmmakma pehlichit vla likma, vm anumpa ha hakla hi oke: yohmikma aiasha vt achvfakma, anonti chukfvlhpoba apesvchi vt achvfa hi oke.

17. Um ilhfiopek a falaminchit ishi la hinla hosh aka bohyuli li; yohmi hoka Aki vt sa holitobli hoke.

18. Hatak nana hosh vm ishi ho keyu: amba vno akinli ahni li hosh aka bohyuli li hoke. Aka bohyuli la hi vt isht vm ai vlhpesakmvt, anonti falaminchit ishi la hi vt isht vm ai vlhpesa hoke. Nan-vlhpisa ilvppak o Aki a im a habena li tok, im achi tok.

19. Yohmi hatuk o anonti Chu vhleha hash ot anumpa ilvppa isht ai it a kashapvt maya tok.

20. Yohmi mvt, Nan-isht-ahullo okpulo il ai ishi hatuk osh tasimbo hokvto, nanta katiohmi ho hvsh i haponaklo hosh? achi kvv lau ma,

21. Inlaka yokvto, Ilvppak okvt nan-isht-ahullo okpulo il ai ishi ho im anumpa keyushke. Nan-isht-ahullo okpulo vt lva nishkin a fatumma hinla ho? achi tok.

22. Hvshtula yo tempel a himonvchit Chitokaka pit im issa impa hosh Chelusalem a asha ho, yohmi tok.

23. Mihma Chisvs vt tempel anukaka Solomon im api-shia nutaka ya hikikia tok.

24. Mihma Chu vhleha hash ot vlvv yvmmak ash o ant a folubli cha, Ik ai ithano chohmit il aiasha na katiohmi foka

chi h<sub>o</sub> ish pim ahni cho? Chishno ak osh Klaist chia hok-mvt, achukmalit ish pim anolashke, im achi tok.

25. Mihma Chisvs ash ot afalaminch<sub>i</sub> mvt, Hvch<sub>i</sub>m anoli li ka, ik hvch<sub>i</sub> yimmo hoke: nana ka Aki hohchifo h<sub>o</sub> isht a yvmihinch<sub>i</sub> li kak o, yvmmak osh ai vlhtokowa ka si anohonlishke.

26. Yohmi kia ik hvch<sub>i</sub> yimmoshke; yvmmak o hvch<sub>i</sub>m achi li hatuk oka, an chukv<sub>l</sub>hpoba keyu hvchia hatuk okvt.

27. An chukv<sub>l</sub>hpoba vto vm anumpa h<sub>a</sub> haklokma, anonti vno vt ilap ma ithana li h<sub>o</sub>, a si apeha chatuk.

28. Mikma ai-okchayvt bilia ya yvmma im issa li; yohmi ka nitak nana ilbrshvt illa he keyukma, anonti kvna kia yvmmak ash svbbak a a kohchit isha hi vt iksho hoke.

29. Aki yvmma vma tok vt moma i shahli; yohmi ka kvna kia yvmmak ash Aki ibbak a a kohchit isha hi vt iksho hoke.

30. Uno, Aki itatuklo li kv<sub>t</sub> il it ibai achvfa hoke, achi tok.

31. Mihma anonti Chu okla hash ot tvli ishit bola chi kv<sub>t</sub> tvli a okla aiowa tok.

32. Chisvs vt afalaminch<sub>i</sub> mvt, Isht il apelvchi vt Aki a minti pulla na na hochukma lawa ka isht a yvmihinch<sub>i</sub> li hvsh pisa tuk a, na-fehna yvmma puta tuk ash katima kak o tvli a isht hvs sa bola chi mak oh cho? im achi tok.

33. Mihma Chu okla hash ot afalaminch<sub>i</sub> mvt, Na fehna achukma yvmmak atuk ak o tvli a ishit e chi bola chi mak o keyu; amba ik ahobalot anumpulit, anonti hatak chia hokak osh, Chihowa ish il apesa aiena kak oke, im achi tok.

34. Chisvs vt afalaminch<sub>i</sub> mvt, Chitokaka vhleha hvchia hoke, achi li tok, achi kv<sub>t</sub> hvch<sub>i</sub> nan-vlhpisa holisso h<sub>a</sub> a holihiso keyu cho?

35. Chihowa im anumpa hv<sub>t</sub> ayvt ai im ahanta yo yvmmak o Chitokaka vhleha hohchifo tok okma, anonti Holisso Holitopa yvt kobafa hi o keyushke:

36. Iki vt na-holitopa ka isht a im atokoli cha, yakni a auet kanchi tok o, Chihowa Ushi sia hoke, achi li tuk ak o, Nan ik ahobalot ish anumpuli, hvsh achi hoh cho?

37. Aki vt nana a kaniohmi ak o ak yvmihecho hok mak o, hvchik sa yimmo kashke.

38. Amba yvmihchi li hokmvo, vno ak okvno hvch ik sa yimmo hoh kia, nana kvv a kaniohmi yvmmak o hvchi yimmi cha, Aki vt auct a si achafakma, anonti vno vt ilap a pit ai achafa li ka, akostininchit hvchi yimmashke, im achi tok.

39. Yohmi hatuk o anonti okla ishi bvna tok: yohmi kia ibbak a im a hlakofi tok.

40. Mihmvt anonti ivt, Chatan misha Chan vt a baptis-mochi vmmona tok yvmmak o ona cha, ahanta tok.

41. Mihma okla lavvt im ai itahoba mvt, Chan vto nafehna nana kia yvmihchi tok keyu; yohmi kia Chan vt hatak ilvppa isht anumpohonli tok a, momvt aiahli ha tok, achi tok.

42. Yohmi ma yvma ashvt ai i yimmi kvv laua tok.

CHAPTA XI.

Lasalvs vt abeka na in tek vhleha hvv Chisvs a pit im anoli, 1; 17 Chisvs vt Betani a vla, mihmvt Lasalvs a falaminchit tanichi. 45 Laua hosh Chisvs a i yimmi kia, kanimi kvv Falisi vhleha ha ont im anoli; Chisvs vt kohchvt ia mvt, tmaha Efiheim ont anta.

1. **HATAK** achvfa Lasalvs hohchifo, Meli micha itibapishi Mahla itatuklo in tmaha Betani ak o vta yosh abeka tok.

2. Meli yvmmak osh Chitokaka ya pashi ahama isht a hvmmi cha, iyi ma ilap pashi yo isht i kasholichi tok mak o i nakfi yosh Lasalvs vt abeka ha tok.

3. Yohmi hatuk o in tek tuklo kash ot yvmmak ash pit im anolit, Yakeh! Chitokaka ma! ish holitobli chatuk vt abekvshke, achi tok.

4. Mihma ilvppa Chisvs vt haklo mvt, Nan abeka ilvppvt isht ai illa hi o keyu hoke; amba Chihowa vt isht a holitopa na Chihowa Ushi vt yvmmak o isht a holitopa chi mak oke, achi tok.

5. Mahla, micha itibapishi, mikmvt Lasalvs aiena ka Chisvs vt holitobli tok.



6. Yohmi hatuk osh yummvt abeka tuk a haklo ha yvt, ai vtta tuk ash inli ho ahanta na nitak tuklo tok.

7. Atuk osh yumma ont vbanvpa ma nan im ai ithvna vhleha hash, Anonti Chutea yakni ya iloh iashke, im achi tok.

8. Mihma nan im ai ithvna vhleha hash ot, Pi shahli ma! Chu okla hvt chekosi kash o tvli a ishit chi boli bvna tuk a, anonti yumma ish ia chi ho? im achi tok.

9. Chisvs vt afalaminchi mvt, Nitak achvfa ka hvshi kanvlli vhpisa auah-tuklo chatuk keyu cho? Hatak nana hosh nitak o nowvt aya hokmvt, yakni ilvppa ai in tohwikeli ka pisa hatuk osh ik ibetvblo hoke.

10. Amba hatak vt ninak o nowvt aya hokmvt, tohwekeli kvk ik im iksho hatuk osh, ibetvbli hoke, achi tok.

11. Ilvppak o achi tok: yohmi ha yosh i himmak o, Hvpi kana Lasalvs vt nusishke; yohmi kia nusi tuk a ont okhvli la chi mak osh ia li hoke, im achi tok.

12. Yohmi ma nan im ai ithvna vhleha hvt, Chitokaka ma! nusi hatuk okmvt, hlakofa chi hoke, achi tok.

13. Yohmi kia yummvt illi kak o Chisvs vt miha ha tok; amba nusit foha kak o miha ka, okla im ahoba tok.

14. Yohmi ma Chisvs vt achukmali fehnvt, Lasalvs vt illi tuk oke.

15. Yohmi ka vno vt yumma ont ak anto ke tuk vt, hvchishno na hvchi yimma chi ka, hvchishno ak atuk mak o sai yukpvshke; yohmi kia yumma iloh im ai onashke, im achi tok.

16. Mihma Tamas, yummvt Titimvs hohchifo hosh yumma nan im ai ithvna ai itilauv vhleha hash, Pishno ak kia iloh ia cha, apihvt hvv illashke, im achi tok.

17. Atuk o Chisvs ash ot ona mvt, yummak ash ot hollopi tuk a nitak ushta tuk o, ont akostininchi tok.

18. Betani vt Chelusalem a pit i bilika kovi tuklo foka tok.

19. Mihma i nakfi illi Mahla, micha Meli itatuklo ka hophlvla chi hosh Chu okla hvt laurt im ai itahoba tok.

20. Atuk o Mahla ash osh, Chisvs vt minti ka, haklo

makinli hosh, ivt ont afama tok ; amba Meli vto aboha any-  
ka yash asha moma tok.

21. Mihma Mahla vt Chisvs ash o, Chitokaka ma ! ilvp-  
pa ant ish anta tuk okma, a nakfi vt illa hetuk keyushke.

22. Ik yohmi kia himonasi mak o Chihowa ya nana ho  
ish im asilhha hoka, Chihowa yvt chima hinla ka ithana  
lishke, im achi tok.

23. Mihma Chisvs vt, chi nakfi vt falamvt tana chi akinli  
hoke, im achi tok.

24. Mihma Mahla ash ot, Nitak ont ishtaiyopi illi vt fala-  
mvt tani yvmmak okvno falamvt tana hi oka, ithana lishke,  
im achi tok.

25. Chisvs vt, Vno ak osh illi a falaminchit tanichi, mik-  
mvt ai-okchaya aiena ka sia mak oke. Kvena hosh vno ak  
o a yimmi hokvto, ik illi tuk nana kia, okchaya he mak oke.

26. Micha kvena hosh okchayvt ahanta hosh vno a a yim-  
mi hokvto, nitak nana illa he heyu hoke. Ilvppa chi yim-  
mi cho ? im achi tok.

27. Ahli, Chitokaka ma ! chishno ak osh Chihowa Ushi,  
Klaist yakni ilvppa aya hi a tok mak o chia ka sai yimmish-  
ke, im achi tok.

28. Ilvppa yakohmichit miha mvt, ivt itibapishi Meli a  
lumasit ont i howvt, Nan-ithvnanchi vt vla cha, chi hoyosh-  
ke, achi tok.

29. Yvmma haklo makinli hosh, ashalika wakayvt ivt ont  
afama tok.

30. Chisvs vt tmaha ha ant ik chukowo kisha hosh,  
Mahla yvt ai afama tuk ash akinli ho hikia ha tok.

31. Mihma Chu okla hvv apehvt aboha anuka ya mayvt  
hopohlvi tuk ash ot, Meli vt tushpvt wakayvt kocha ia na  
okla pisa mvt, Ahollopi yvmmak o ont a yaiya chi hosh ia  
hoka, achi mvt iakaiya tok.

32. Atuk o Meli ash ot Chisvs a hikia kash ona cha, pisa  
mvt, iyi ituma ya ont hlipia cha, Chitokaka ma ! ilvppa ant  
ish anta tuk okma, a nakfi vt illa he tuk keyushke, im achi  
tok.

33. Yvmmvt yahaya ma, anonti Chu okla yvmma apihvt

ai vla tuk aiena kv̄t yah̄aya akinli na Chisvs vt pisa hatuk osh, chukvsh anukaka isht a nukhaklo fehnvt ik im v̄lhpieso ki tok.

34. Mihmvt, Katima yak o hvsh bohli tuk oh cho? achi ma, Chitokaka ma! minti cha, ant pisá, okla im achi tok.

35. Chisvs vt nishkin okchi minti tok.

36. Mihma Chu okla hash ot, Yakeh! i holitopa fehna tuk o mv̄hli, achi tok.

37. Mihma kanimi kv̄t, Lvpa yatuk a hoponayochi tuk vt, hatak ilvppak kia ik illo ka hinla ka, a kanimihcha he tuk keyu chishba? okla achi tok.

38. Yohmi ma Chisvs ash ot anonti chukvsh anukaka isht anukhaklo fehnvt ayvt ahollopi a ona tok. Yakni chiluk o tvli yosh isht v̄lhkvma ha tok.

39. Chisvs ash osh, Tvli ya ishit ho kanv̄lichí achi, ma, Mahla illi tuk a in tek ash osh, Chitokaka ma! illi tuk a nitak ushta hokvt himak foka ma shua hoke, im achi tok.

40. Mihma Chisvs vt, Chi yimmi hokmvt, Chihowa isht a holitopaka ya ish pisa hinla hoke, ak chim acho ke tuk oh cho? im achi tok.

41. Mihma illi ai itola tuk ash tvli ya okla ai ishit kanv̄lichi tok. Mihma Chisvs vt nishkin a pit vba chakalichi mvt, Aki ma! is sa haiyaklo hatuk a yak oke, chim aiahni lishke.

42. Yohmi kv̄t is sa haiyaklo a bilia chatuk a ithaiyana li kv̄no; yohmi kia okla ilvppa hiohmaya kv̄t, chishno ak osh auet is sa kanchi tok a ai yimma chi kak o, yv̄mma achi li tuk oke, achi tok.

43. Yakohmichit anumpulit ont in taha mvt, chitoli hosh anumpulit, Lasalvs ma! auet kohchá, achi tok.

44. Mihma illi atuk ash ot ibbak, iyi aiena ka ahollopi ishit shema yvt isht v̄lhfova ho ant kohcha tok; mihma nashuka yano nantapvski yosh isht v̄lhfoyuka tok. Mihma Chisvs vt, Oh i hotofi na ik iá, im achi tok.

45. Yohmi ma Chu okla Meli a im ai itahoba tuk osh, Chisvs vt nana ka ai yv̄mihchi na pisa mvt, laua hosh i yimmi tok.



46. Yohmi kia kanimi hokvto falamvt ivt, Falisi vhleha ha im ona cha, nana ka Chisvs vt ai yvmihchi tuk ash okla im anoli tok.

47. Yohmi ma na-holitompa isht asha pehlichí vhleha, micha Falisi vhleha aiena kash ot hatak hochitoka nan apesa vhleha ha itahobi mvt, Hatak ilvppvt na-fehna lawa ka yvmihchi ka, nanta mak o katiohmi hosh iloh aiasha cho ?

48. Ilvppa ant ik yohmí, iloh im ahni hokma, hatak mo-ma kv́t i yimma chí hoke ; yohmikma Loman okla hv́t vla cha, pí yakni, micha pim okla talaia aiena kash ai okprnichá hinla hoke, achi tok.

49. Mihma achvfvt Kaiafas hohchifo hosh afvmmi yvma fehna ka na holitompa isht asha pehlichí i shahli a ai ibafohka hatuk osh, Nana ka hvch ik akostinincho krmoh-mishke.

50. Mikmvt hatak achvfa hosh okla ha vlhtobvt illi na okla talaia kash ot momvt ik illo ka hi a, a hv́pim vlhpiesa hatuk a hvch ik anukfilloshke, im achi tok.

51. Yohmi kv́t ilap nana aiahni hosh ilvppa anumpuli ha tok keyu ; amba afvmmi yvma fehna ka na-holitompa isht asha pehlichí i shahli hosh anta hatuk okvt, Klaist vt okla yvma vlhtobvt illa he.

52. Yohmi kv́t okla yvmmak bana hi o keyu ; amba Chihowa im vlla vhleha kanima ai it afimimpvt asha tuk aiena ma hoyot a miha chvfa ho ai itahoba he ak o, tikbanli anoli ha tok.

53. Yvmohmi hatuk o nitak yvma ai vhlit mihinti ka, yvma vba chí kv́t nana it im apesvt okla maya beka tok.

54. Yohmi hatuk o Chisvs vt himmakma haiaka fehvt Chu okla itintakla ya ik a hikikio ki tok ; amba yvmmak ash vttvt ia mvt, yakni haiaka pit a bilika tvmaha Eflihaim hohchifo ho nan im ai ithvna vhleha ha pehliechit ahanta tok.

55. Atuk o Chu okla nan im vbanvblit ont ia yvt ai ona hosi tok ; mihma ilap nan ai il atahlit maya chí kv́t, nan-vbanvblit ont ia yvt ik ai ono kisha ho yakni yvma asht Chelusalem a ia kv́t laua tok.

56. Atuk osh Chisvs ash okla hoyot, tempel anukaka ya hiohmayvt, Impa holitopa asha ka ik lo ka chi hokma, nana ka hvchim ahoba cho? it im achit maya tok.

57. Na-holitompa isht asha pehlichí vhleha, mikmvt Falisi vhleha aiena kash ot, yummvt kanima yo anta ka hatak nana hosh akostinichi hokmvt, anoli na okla isha hinla kv́t anum-pa vlhpisa ka bohli tuk a tok oke.

## CHAPTER XII.

Meli vt Chisvs iyi ya nan-ahama im ahvmmi ma, yummvt ai vlhpesa ho yohmi hatuk a Chisvs vt miha, 1. 12 Chisvs vt issuba nashoba yo om binili hosh Chelusalem a ona. 20 Klik kanimi kv́t Chisvs a pisa bv́nna: 23 Chisvs vt ilapvt kaniohmit illa he, anoli; 27 Chisvs vt chukvsh anukaka nan isht nukhaklo in chito mvt, vba pit anumpuli; 37 Hatak pehlichí vhleha hv́t laua hosh Chisvs a i yimmi: yohmi kia Chisvs a isht anumpuli nukwia.

1. ATUK o nan vbanvblit ont ia isht asha chi ka nitak hannalit takanli moma ho, Chisvs vt Betani ak o Lasalvs vt ai illi tuk o falaminchit tanichi tuk a yummvt yummak o ai vtta chatuk o, ona tok.

2. Mihma yummak o opiaka impa yo okla ai im atahli tok; mihma Mahla ak osh nan ai isht im anta ma, amba Lasalvs vto ibai impa hosh maya kak o iba takla asha tok.

3. Yohmi ma Meli vt spiknat nan-ahama holitopa fehna weki achvfa ka ishi cha, Chisvs iyi ya ishit a hvmmi mvt ilap pashi akinli ho iyi yash isht i kasholichi tok: mihma nan ahama balama kv́t aboha yash alotowa tok.

4. Mihma nan im ai ithvna vhleha achvfa Saimon ushi Chutas Iskaliot vt yummak oka inla ibbak fohka he mak osh,

5. Nanta katiohmi ho nan ahama ilvppvt iskvli tahlepa tuchina kia isht ik vlbi cha, ilbvsha ya ik i holhpelo ke tuk oh cho? achi tok.

6. Ilbvsha yak o i nukhaklo kak osh ilvppa achi tok keyu; amba hukopa yatuk osh, micha yummak osh shuk-

cha ya ishi hatuk osh, nana kv̄t yv̄mma ai vlbeha hō shaiyali yatuk ak a tok.

7. Mihma Chisvs vt, Ant ik yvmihchí, ish im aiahnashke, a sa hollopa chī nitak mak a hi o, ilvppa ilatomba hatuk oke.

8. Ilbvsha yak okvto hv̄chim aśha na bilia chatuk; amba vno ak okvto hv̄chim anta lī a bilia he keyushke.

9. Yohmi ma yv̄mma ant anta ka Chu okla hv̄t lauv̄t akostininchi tok: mihmv̄t Chisvs ak bano kak o keyu, amba Lasalvs, yv̄mmv̄t illi tuk o, falaminchit tanichi tuk ash it aieninchit pisa chī hosh okla ai vla tok.

10. Yohmi kia na-holitompa isht aśha pehlichī vhleha hokvto Lasalvs ak kia aieninchit illichā hinla kv̄t, isht it im anumpulit maya tok.

11. Yv̄mmak atuk pulla mak o Chu vhleha laua kv̄t yv̄mma itv̄nowv̄t, Chisvs a ai i yimmi kak a tok.

12. Nitak ont atukla ma okla laua kv̄t ai-impā holitopa ya itv̄nowa tuk vt, Chisvs vt Chelusalem a vla chī hosh minti na okla haklo mv̄t,

13. P am vpi naksish a ishit, kohchv̄t afamv̄t okla ia mv̄t, chitoli hosh, Hosanna, Israel i miko Chitokaka i hohchifo hō ai eshi hosh aya hokv̄t holitopa mak oke, okla achi tok.

14, 15. Saion ushetik chia hv̄t chi nukshopa ná, chī miko vt issubā haksobish falaia himita ya on talaia hosh minti hoke, achi hosh holisso hatuk oka, Chisvs ash ot issuba haksobish falaia himita yo pisa mv̄t, yv̄mmak ash on talaia tok.

16. Ummona kv̄no nan im ai ithv̄na vhleha hv̄t ilvppa ik ai akostinincho ki tok; amba Chisvs vt ont a holitopa ha yak o, nana kv̄t yakohmi hosh yv̄mma isht a holisso tok a, anonti okla hv̄t nana kash ai i yvmihchi tok aiena ka ithaiyana tok.

17. Mihma yv̄mmv̄t Lasalvs a ahollopi ai i howv̄t kohchit illi tuk a falaminchit tanichi ka, okla apihv̄t aya tuk ash osh ai vlhtokowa ka anohonli tok.

18. Yv̄mmv̄t na-fehna ilvppa yvmihchi tuk a okla haklo tuk atuk osh, ilvppak atuk pulla kak o okla mak kia ont afama ha tok.



19. Yohmi ma Falisi vhleha hash ot, Nana hvsh kanihma he keyu kvto hvsh akostininchi cho? yakeh! okla puta hash ot yvmmak o pit a kanvllishke, ilap bika it im achit maya tok.

20. Mihma Klik vhleha kanimi kvv vba pit aiokpvchit ayvt, ai impa holitopa asha ka ai vla tuk vt takla maya tok.

21. Yohmi hatuk osh yvmmak ash ot Kalili yakni Bet-saita tmaha a minti tuk, Filip ash im ai ona mvt, Pi shahli ma! Chisvs a pisa pi bvvnvshke, achit i ponaklo tok.

22. Mihma Filip ash osh iyt, Antilu a ont im anoli tok; atuk o anonti Antilu ash osh Filip a ita tuklo cha Chisvs a im anoli tok.

23. Mihma Chisvs vt afalaminchi mvt, Hatak Ushi vt a holitopa he tuk a hvshi kanvlli vlhpisa kvv ai onvshke.

24. Ahlishke, ahli mak o hvchim achi lishke, Onush nihi vt yakni anukaka yo itola cha, illi ho keyukmvt, ilap ash biekvt itonla hoke; amba illi hokmvt, waya fehna chatuk oke.

25. Kvna hosh ilap im ilhfiopak a i hullo fehna hokvto, i kvnia hi oke; amba kvna hosh yakni ilvppa ahanta kvv ilap im ilhfiopak a i nukkilli hokvto, mihma ieshit okchayvt a bilia hi oke.

26. Hatak nana hosh vm antia hokmvt, siakaiyashke; mikmvt kanima yo ai ahanta likma, yvmmak o an tishu hoh kia anta hi oke; hatak nana hosh vm antia hokma, yvmmak o Aki vt holitobla he mak oke.

27. Himak oka sa shilombish vt ik im ai vlhpeshke: yohmi ka, Aki ma! hvshi kanvlli ai vlhpisa takali ilvppa ai isht is sai i hlakofichashke, achi likma, nanta chi cho? yohmi kia ilvppak a he mak o hvshi kanvlli vlhpisa takali ilvppa im aya li ha tok oke.

28. Chi hohchifo ha ish holitoblichashke, Aki ma! achi tok. Yohma ma vba ya auct ai anumpa kvv, Yvmmak oka holitoblich i li tuk osh, anonti himmakma holitoblich i la chi akinli hoke; achi tok.

29. Yohmi hatuk o okla hvv bilika hiohmaya tuk vt, yvm-

ma haklo mvt, Hilohvshke, achi tok. Mihma kanimi kv̄t, Enchil osh auet im anumpuli hoke, achi tok.

30. Chisvs ash osh afalaminchit, Ūno ak atuk mak o anumpa ilvppvt auet takali hō keyu, amba hvchishno pulla kak oke.

31. Himak okvno yakni vt nana im ai vlhpisa mak oke: himak okvno yakni ilvppa ai i shahli nan im aiyahanchi ash ot issvt kohcha he mak oke.

22. Ūno vt yakni a a mokofvt vba takali li hokmvt, hatak moma ka halvllit il a kanvllichi la hi oke, achi tok.

33. Ai-illi kaniohmi hō isht illa he ak osh anoli hosh ilvppa achi ha tok.

34. Mihma okla hash ot afalaminchi mvt, Klaist vt ahan-ta na bilia hō nan-vlhpisa holisso hā okla il a haklo chatuk; yohmi ka katiohmi hō, Hatak Ushi vt vba yā takala hi o ish achi cho? Hatak Ushi ilvppak osh kvta hokak o? okla im achi tok.

35. Mihma Chisvs vt, Himonasi takla kak o tohwikeli hv̄t hvch in takanli hoke. Tohwikeli hv̄t hvchin takanli takla kak osh hvsh nowashke, yvmmak keyukma okhlili hv̄t hvchi onvtula hinla hoke. Kvna hosh okhlili hō nowvt aya hokv-to, kanima yō ia kv̄t ithana keyu hoke.

36. A tohwikeli hv̄t hvchin takanli takla kak osh a toh-wikinli vlla hvchia ha ch̄i kv̄t, a tohwikeli hā hvsh i yim-mashke, im achi tok. Ilvppak o Chisvs vt anumpohonli mvt; ai i filvmm̄it kvnia cha, ik i haiako ki tok.

37. Na-fehna laua hō itikba yā yvmmak ash ot ai yumi-hinchi hoh kia, okla ai i yimma he keyu ki tok.

38. Yohmi kv̄t hopaii Esaias vt anumpuli mvt, Chitokaka ma! nana il anoli ka kvta hosh p̄i yimmi cho? micha kvta hak o Chihowa i shakba mvt i haiaka tuk oh cho? ahanchi tok a ont aiahla ch̄i mak a tok.

39, 40. Anonti Esaias vt i himmakma, Nishkin a isht ik peso, mikmvt chukvsh ma ik akostinincho kish, chukvsh hi-mona ik anukfoyo ki, ak hlakoficho ka ch̄i ka, nishkin a im akvmmi mvt, anonti chukvsh ma i kvllochishke; achi tok oka, okla yimma he keyu ki tok.

41. Yumma im isht a holitopa ya pisvt yumma pit isht anumpuli mak osh Esaias vt ilvppa puta ka achi tok.

42. Yohmi kia nan apesa hochitoka vhleha hvt i yimmi kv̄t laua akinli tok: yohmi kia sinakak a a kohchicha hinla hatuk o, Falisi vhleha pulla kak o yummak ash i yimmi hatuk vt okla ik otvnincho ki tok.

43. Hatak ai im aholitopa yak o im achukma kv̄t, Chihoa ai im a holitopa ka im i shahli hatuk osh.

44. Chisvs vt chitoli hosh, Kv̄na hosh vno a a yimmi kv̄t vno ak o a yimmi hō keyu, amba auet sa kanchi tok yummak o i yimmi mak oke.

45. Micha kv̄na hosh vno a sa pisa hokmvt, auet sa kanchi tok ma pisa mak oke.

46. Kv̄na hoh kia vno a a yimmi hokvt ai-okhlilika ya ik ai ahanto ka chī mak o, nan-tohwikeli mak osh ayvt yakni a vla li ha tok oke.

47. Yohmi kia hatak nana hosh vm anumpa ha haklo cha, ik yimmo hokma, nan im apesvt ilbvshali la hi o keyushke; yakni ak o nan im apesvt ilbvshali la hi osh aya li tok keyu; amba yakni a okchalinihi la chī ha tok oke.

48. Kv̄na hosh vno a sa shitilema cha, vm anumpa ha ik ahnincho hokvno, achvfa hosh nan im apesvt ilbvshali kv̄to asha hoke; anumpa anumpohonli li tuk ash fehna akinli kak osh nitak ai ishtaiyopikma nana im apesvt ilbvshala he mak oke.

49. Vno akinli hosh nana ka ahnit anumpuli li tuk keyu hoka; amba auet sa kanchi tok Aki ak osh nana hō achi la he, mikmvt nana hō anumpuli la he aiena ka nana vm apesa ha tok.

50. Yohmi ka i nan-vlhpisa vt ai-okchayvt bilia yoka ithaiyana lishke; yohmi hatuk osh nana hō anumpohonli li ka, yummvt Aki vt vno a a miha tok a mih mak o anumpuli li hoke, achi tok.



CHAPTA XIII.

Chisvs vt nan im ai ithvna vhleha ha iyi im achifa, 1. 18 Chisvs vt Chutas ak osh ishit inla im issa chi hatuk a, nana kv̄t isht vlhpisa hq isht im atokoli. 31 Chisvs vt ilap nan isht a holitopa hi anoli, mihmvt nan im ai ithvna vhleha hv̄t it i hulla chi ka, i miha mvt, 36 Pita yvt hituchina ha yo ilapa ik ithano miha chi ka, tikbanli im anoli.

1. NAN vbanvblit ont ia ai-imp̄a holitopa kv̄t ik ai ono kisha hq, Chisvs vt ilapvt yakni ilvppa ai issvt, Iki a im ia chi hv̄shi kanvlli vlhpisa kv̄t ai ona ka ithaiyana mvt, immi hv̄t yakni paknaka asha ka i hullo hatuk vt, yv̄mma i hullo kv̄t imomvt ont illi tok.

2. Yohmi ka okhlili ai-imp̄a yvt ont vlhtaha yv̄mma fehna ma, yv̄mmak ash ishit inla im issa chi ka Setan vt Saimon ushi, Chutas Iskaliot chukvsh a anukfokichi hatuk o;

3. Chisvs vt, Iki vt nana moma ka ilap ak o ibbak a fohki tok, micha ilapvt Chihowa hak o a minti ha tok osh, anonti Chihowa hak o im ia chi kv̄t ithaiyana mvt,

4. Okhlili imp̄a asha tuk vt wakayvt, im anchi ash o naksika pit bohli mvt, tikba takali ishi cha, isht il ai vskofvchi tok.

5. Yohmi ha yosh oka ya ampo pit vn̄it ishi cha, nan im ai ithvna vhleha iyi yash achiv̄t isht ia mvt, tikba takali isht ai il ai vskofanchi tuk ash o ishit isht i kasholichi tok.

6. Atuk osh Saimon Pita yash o ont a hikia tok; mihma Saimon Pita yash ot, Chitokaka ma! saiyi ya ish achifa chi boh cho? im achi tok.

7. Chisvs vt afalaminchi mvt, Nana ka yvmihchi li ka himonasi kv̄no chik akostininchoshke; yohmi kia himmak o ish akostinincha hi oke, im achi tok.

8. Pita yash ot, Saiyi yak okv̄no nitak nana chik sv̄m achifo kashke, im achi tok. Chisvs vt afalaminchi mvt, Ak chi achifo hokma, is si ahalaiia keyu hoke, im achi tok.

9. Saimon Pita yash ot, Chitokaka ma! saiyi ak bano

keyu kashke, amba subbak, micha sa noshkobo pit aieninchi hosh, im achi tok.

10. Chisvs vt, Ulhchifa tuk okvto himmak ma ik vlhchifo hō iyi ak bano kia, momvt kashofa chatuk; yohmi ka hvchishno vt hvchi kashofa akinli kia, hvsh moma keyushke.

11. Kvna hosh ilapa ishit inla ibbak fohka chi hoka ithana, yohmi hatuk osh, Momvt hvchi kashofa keyushke, achi tok.

12. Yohmit iyi ya im achifvt taiyahli mvt, im anchi ash ishi cha, falamvt aka binili mvt, Nana ka hvchi yvmihchi li ka hvsh ithana cho?

13. Ūno a, Na pithvnanchi, pin Chitokaka hvs si achi; yohmi ka mih sia hō mvhli hoka, vlhpesa hvsh mihvshke.

14. Yohmi kia vno vt hvchin Chitokaka, micha na hvch ithvnanchi sia hatuk osh, hvch iyi ya hvchim achifa li hatuk okma, hvchishno ak kia hvchishno bika iyi ya hvsh it im achifa he vlhpesa hoke.

15. Ūno vt a hvchi yvmihchi li tuk mak o hvsh a chiyuhmicha he mak o, na hvchim avchi li hatuk oke.

16. Ahlishke, ahli mak o hvchim achi lishke; Tishu hv i shahli ha imaiya chatuk keyu; mikma nan-vlhtoka yosh aya kvv nan-atokoli tuk a imaiya chatuk keyu hoke.

17. Ilvppa puta ka hvsh ithana cha, yummak o hvsh yvmihchi hokmvt, na hvchi yukpa mak oke.

18. Moma kak o isht hvchi anumpuli li hō keyushke; kanima kak o vno vt atokoli li tok okvto ithana lishke; yohmi kia Holisso Holitopa yvt, Pvska svbai vpa kash ot iyi kotoba ya isht a sai o wakelishke, achi ha tok a yummvt ont ai ahla chi mak oke.

19. Yummak ash ot ont ai yvmohmi ha ma, vno ak atuk a hvchi yimma he mak o, ik ai ono kisha hō himak ano hvchim anoli lishke.

20. Ahlishke, ahli mak o hvchim achi lishke, Kvna kia vno ak osh nan tohno li hō aya ka ahninchhi hokvt, vno ak o si ahninchhi hoke; micha kvna kia, vno a si ahninchhi hokmvt, auct sa kanchi tok mak o ahninchhi hoke; im achi tok.



21. Chisvs vt yakohmiechit anumpuli mvt, chukvsh anu-  
kaka ai ik im vllpieso mvt, atokolit anolit, Ahlishke, ahli  
mak o hvchim achi lishke, Hvsh achvfona kvv svshit inla  
ibbak o hvs sa fohka chi hoke, achi tok.

22. Mihma nan im ai ithvna vhleha hash ot kanima kak  
o miha hatuk a ik ai akostinincho mvt, filemvt okla iti  
pisa tok.

23. Yohmi ma nan im ai ithvna vhleha ha achvfa ka  
Chisvs vt holitobli yatuk o, Chisvs ikkishi ha vtayvt asha  
tok.

24. Yohmi tuk o yvmmak ash osh kvna hak o miha  
hatuk ma a ponakla chi ka, Saimon Pita yvt i yuchunukli  
tok.

25. Mihma Chisvs ikkishi ha vtayvt asha hosh, Chitokaka  
ma! kvta hak o cho? im achi tok.

26. Mihma Chisvs vt afalaminchi mvt, Itih fohka achvfa  
ka pit okvchit kohchi li kvv, kanima ho pit ima likma,  
yvmmak osh mih mak a chi hoke, achi tok. Atuk osh  
itih fohka achvfa ka pit okvchit kohchi mvt, Saimon ushi  
Chutas Iskaliot ak o ima tok.

27. Mihma itih fohka achvfa ishi ma, Setan vt yvmmak  
ash ont ekukowa tok. Mihma Chisvs vt, Nana ka ish yv-  
mohma chi kvv tushpvt ish yvmihchashke, im achi tok.

28. Nana ka a kaniohma hi o, ilvppa im achi ka, impvt  
maya tuk vt hatak achvfa kia ik akostinincho ki tok.

29. Chutas ak osh shukcha ya ishi hatuk oka, ai impa  
holitopa asha takla ka nana ho pi bvna hinla ka chum-  
pakma, keyukmvt ilbvsha vhleha yak o nanasi kia i hopela  
hinlakma, nana ho Chisvs vt i miha hatuk a, kanimi kvv im  
ahoba tok.

30. Mihma itih fohka achvfa ka ishi makinli hosh kocha  
ia tok; mihma yvmvvt ninak a tok.

31. Yvmmak ash ot kocha ia ma, Chisvs vt, Himak okv-  
no Hatak Ushi vt ai ahlit holitopakma, anonti Chihowa yvt  
yvmmak o isht a holitopa ai ahla chi mak oke.

32. Chihowa yvt yvmmak o isht a holitopa ai ahli hok-  
mvt, Chihowa yvt anonti ilap inlit yvmmak ash o ai isht il



a holiloblichī ai aḥla chī aḱinli: micha chekosi fehna yvm-mak ash o holiloblichī ai aḥla chī mak oke.

33. Chipota vḥleha ma! chekosi takla kak o hvchi takla aḥa lishke; yohmi ka hvs sa hoya chī hoke; Chu okla ḥa, Kanima yo ai ia li hoka, hvsh ona he keyushke, im achi li tuk mak osh anonti hvchishno ma himonasi a hvchim achi lishke.

34. Hvsh it i hullo kv̄t, vno vt hvchī hullo li tuk a ohmi-chi hosh hvchishno yak̄ kia hvsh it i hulla he mak o, nan vḥpisa himona ka hvch ima lishke.

35. Hvchishno bika yvt hvsh it i hullo ilvppa pulla kak o nan v̄m ai ithvna hvchia hatuk a, hatak moma kv̄t isht ithaiyana he mak oke, achi tok.

36. Saimon Pita yash ot, Chitokaka ma! katima ko ish ia chī hoh cho? im achi ma, Chisvs vt afalaminchi mvt, Kanima yo ia li hoka, himonasi kv̄no pit is siakaiya he keyushke; yohmi kia i himmak o pit is siakaiya hi oke, im achi tok.

37. Pita yash osh, Chitokaka ma! Na katihmi ho himonasi akinli kv̄no pit ak chiakaiyo ka hinla cho? chishno a pulla kak o v̄m ilhfipak a aka bohyuli lashke.

38. Chisvs vt afalaminchi mvt, V̄no a pulla kak o chim ilhfipak aka ish bohyula chī cho? Ahlishke, aḥli mak o chim achi lishke; Akaka yvt ik olo kisha ho, hituchina ha chik sv̄thano ish miha chī hoke, im achi tok.

#### CHAPTA XIV.

Chisvs vt nan im ai ithvna vḥleha ḥa pehlichit impvt aḥa moma hosh, apihvt vba yakni a ont okla aḥa hi a, i miha, 1; 13 micha ilap hohchifo hak o nan isht asilhv̄t anumpuli hokv̄no moma im aiahlichā hi vt miha. 15 Chisvs vt nanuktalali inla auct ima hi vt miha.

1. HUCHI chukv̄sh vt nana ik hvchī kaniohmo kashke; Chihowa ḥa, oh i yimmi cha, vno ma oh a yimmi.

2. Aki in chuka ya aiasha yvt laua hoke: ik yvmohmo

hatuk okma, hvchim anoli la he tuk oke, aiasha ya hvchim apoksiachit atahli la chi hosh ia li hoke.

3. Yohmi kvt ont apoksiachit hvchim atahli li hokmvt, anonti falamvt vla lish, vno vt kanima yo ai ahanta likma, hvchishno mvt yvmmak o hvsh ai ahashwa hi a, ant hvch ishit ai vtta li ka ona la hi oke.

4. Yohmi hokvt kanima yo ia li hoka pit hvsh ithana; mikmvt hina ya hvsh ithanvshke, im achi tok.

5. Tamas ash osh, Chitokaka ma! kanima yo ish ia hoka il ithana keyu: yohmi kvt katiohmi hosh hina yano il ithana hinla cho? im achi tok.

6. Mihma Chisvs ash ot, Uno ak osh hina, micha ai ahlika, ai okchaya aiena sia mak oke: vno ak o keyukma hatak nana hosh Aki a im ai ona he keyu hoke.

7. Uno a hvs svthana hatuk okmvt, Aki ma hvsh ithana akinla he tuk oke: atuk kia hvsh pisa tuk okvt himak ai vhlit ia hokvno hvsh ithaiyanvshke.

8. Filip ash osh, Chitokaka ma! Chiki a ish pi haiakvchashke, yohmikma pim vlhpesa hinla hoke, im achi tok.

9. Mihma Chisvs vt, Chi takla ahanta li hopakit taiyaha ka, Filip vt chik svthano kisha tuk oh cho? kvna hosh vno a sa pisakmvt, Aki a pisa hatuk; yohmi ka katiohmi ho, Chiki a ish pi haiakvchashke, ish achi cho?

10. Uno vt Aki ibai achafa likma, anonti Aki vt vno a a svbai achafa ka ik chi yimmo cho? anumpa hvchim anum-pohonli li kvt vno akinli vm anukfila hosh anumpuli li keyushke; amba Aki svbai achafa yvmmak osh nana ka ai yvmihchi hoke.

11. Uno vt Aki a ibai achafa likma, anonti Aki vt auet svbai achafa ka hvs sa yimmashke; keyuk mak heto nana kvt a katiohmi tuk yvmmak pulla kak o isht ai hvs sa yimmashke.

12. Ahlishke, ahli mak o hvchim achi lishke, Kvna hosh a yimmikmvt, vno nana ai yvmihchi li tuk ash yvmihchi akinla hi oke: yohmikmvt vno vto Aki a im ia li hatuk oka, nana kvt a fehna ilvppa puta ka i shahli ho yvmihcha hi oke.

13. Micha a hohehifo pulla ho nana ka isht hvsh asilhha hokma, Iki vt Ushi a ai isht a holitopa ai ahla hi a, mihi yo yvmihchi la hi oke.

14. A hohehifo pulla ho nana ka isht hvsh asilhha hokma, ai yvmihchi la hi mak oke.

15. Hvs sa hullo hokmvt, vm anumpa vlhpisa puta ka hvsh holitoblashke.

16. Mikma Aki a im asilhha likma, yummvt a hvchi takla ahanta na bilia he mak o hvchi nanuktalali inla ya auet hvch ima hi oke.

17. Yummvt Shilombish ai ahli, yummak oka yakni okvto pisa keyu, micha ithana keyu aiena hatuk osh, ahninha he keyu mak oke; yohmi kia hvchishno yokvno hvchi takla ahanta tuk osh, anonti hvchi anukfoyuka chi hoka hvsh ithana hoke.

18. Hvchi vlhtakla ho hvch issvt aya la he keyu; hvchim aya la hi oke.

19. Chekosikma yakni vt sa pisa chi keyu hoke; amba hvchishno vto hvs sa pisa hi oke; yohmi ka sai okchaya hoka, anonti hvchi okchaya he akinli hoke.

20. Uno vt Aki a ibai achafa likma, anonti hvchishno vt vno a hvs svbai achafa na hvchishno ma hvch ibai achafa li aiena ka, nitak ymma fehnakma hvsh akostinincha hi oke.

21. Kvna hosh vm anumpa vlhpisa vt in tonla cha, holitobli hokmvt, yummak osh sa holitobli mak oke; micha kvna hosh vno a sa holitoblikmvt, Aki ma i holitopakma, vno mvt holitoblit il im otvninchi la hi oke.

22. Chutas vt Iskaliot ak keyu hosh, Chitokaka ma! katiohmi ho pishno ano ant ish pim ile haiakvchi hokak osh, yakni ano chik im ile haiakvcho ka chi hoh cho? im achi tok.

23. Chisvs vt afalaminchi mvt, Hatak vt a hullo hokmvt, vm anumpa ha holitobla he; yohmikma Aki vt ilapo ma holitoblikma, il im aya cha, il ibai vtta he mak oke.

24. Uno a a hullo keyu hokvto, vm anumpa ha ik holitoblo hoke; micha anumpa ilvppa hvsh haiyaklo ka vm anum-pa keyu, amba auet sa kanchi tok Aki ak o immi hoke.



25. Hvchi takla ahanta li takla hatuk mak osh ilvppa puta ka isht hvchim anumpohonli lishke.

26. Yohmi kia nanuktalali, yvmmvt Shilombish Holitopa mak o a hohchifo pulla hatuk mak o Aki vt auet kancha chi hoka, yvmmak osh nan okluha ka hvch ithvnanchit, nana ho hvchim ahanchi li tuk ma, moma falaminchit hvchi anukfohka hi oke.

27. Nanaiya ya hvchi bohli lishke: a nanaiya ya hvch ima lishke: yakni vt ima chatuk a chohmi keyu ho hvch ima lishke. Hvchi chukvsh vt ik kaniohmokmvt, anonti ik nukshopo kashke.

28. Ia li tukmvt, anonti falamvt hvchim aya la hi oke, hvchim achi li ka hvsh haklo kvno. Hvs sa hullo hatuk okmvt, Aki ak o im ia li hoke, achi li tuk a na hvchi yukpa he tuk; Aki vt vmaiya hatuk oka.

29. Micha ont ai ahlikma, hvsh i yimma he mak o, himonasi ik ono kisha ho hvchim anoli li tuk oke.

30. Yakni ilvppa ai i shahli yatuk mvt, nana ho isht a si ahalaia keyu hosh minti hoka, himak a pilla mvno hvch it im anumpuli li fehna chi keyu mak oke.

31. Yohmi kia Aki a holitobli li ka, yakni vt ithaiyana chi ka, Aki vt nana ho vm apihisa tok a, mih mak o yvmihchi li hoke. Ho wakaya, kiloh ilhkoli.

## CHAPTA XV.

Chisvs vt paki vpi yosh naksish puta aiena hosh nan isht vlpisa ilvppak o hatak vt ilap ak o pit ai achafa pulla hosh vnit waya ka chohma he ai vlpesa hatuk a anoli, 1: 9 micha ilapvt nan im ai ithvna vhleha ha i hullo fehna hatuk vt anoli mvt, 12 anonti yvm-makmvt it i hullo kvv yvmmak inli ho chohma hi a in tohno; 19 yakni ilvppak okvt ilap, micha Iki ita-tuklo ka ik abnincho yatuk okvt yvmmakma i nukkillit ilbvshacha hi a im anoli.

1. UNO ak osh pak-vpi ahli sia hokma, anonti Aki ak osh apoksiachi oke.

2. Naksish vno ak o a sai offo hosh vni keyu hokma, mo-

minchit ishit kanchi hoke: mikmvt naksish vt vni hokvto, isht i shahlit vna chi ka, achukmalit apoksiachi hoke.

3. Anumpa isht hvchim anumpohonli li tuk pulla ho himonasi a isht a hvchi a kashofvshke.

4. Ūno a ho svbai achafá; mikma vno mvt hvch ibai achafa lashke. Naksish vt vpi ak o pit a hikia ho keyukmvt, ilap illa kvv vna he keyu chatuk a, yvmmak i chiyuhmit hvchishno ak kia vno a hvs svbai achafa ho keyukmvt, nana hvsh kanihma he keyushke.

5. Ūno ak osh pakvpi sia hokma, hvchishno vto naksish hvchia hoke. Kvna hosh vno a svbai achafa na anonti ilap ma ibai achafa li hokma, mihi yosh vni fehna chatuk oke: vno ak o keyukma nana hvsh kanihma he keyu hoke.

6. Kvna kia vno a svbai achafa keyu hokma, naksish mak o ai itilauechit kanchi na bvshi chatuk; yohmikma hatak puta mvt yvmmak ash aiowvt luak a pila na lua chatuk oke.

7. Ūno a hvs svbai achafa na vm anumpa mvt hvchi anukfoyuka hokma, nana ho hvsh aiahni cha hvsh asilhha hokvt, hvchim ai ahla hi oke.

8. Hvsh vni fehna yvmmak okmak o, Aki vt isht a holi-topa ai ahla he; yohmikma nan vm ai ithvna hvchia mak a hi oke.

9. Ūno a Aki vt a hullo tok mak o, ai itilauechi hosh hvchi hullo li hoke; a sa holitobli kvv hvsh biliashke.

10. Ūm anumpa vlhpisa puta ka hvsh im antia hokmvt, a sa holitobli kvv a hvchi bilia he: vno vt Aki a im anumpa vlhpisa puta ka im antia li kvv, ai i hullo mvt a sa bilia tok mak o hvsh chiyuhma hi oke.

11. Hvchishno pulla atuk mak o nan isht vm ilaiyukpa hatuk mvt hvchin takali bilia na, na hvchi yukpa kvv alotowa chi mak o, ilvppa puta ka isht hvchim anumpohonli li hoke.

12. Ūno vt hvchi hullo li tok mak o, chiyuhmichit hvsh it i hulla he, ilvppak osh vm anumpa vlhpisa mak oke.

13. Hatak vt i kana vhleha ha i hullo kvv im ilhfiopak a aka bohyuli hoka, hatak nana kia yvma i shahlichit it i hulla hi vt ikshoshke.

14. Nana hō hvchīm apesa li ka hvsh yvmohmi hokmvt, a kana hvchia mak oke.

15. Himak pilla kvno ilhtohno hvchi achi la he keyu; ilhtohno yokvto, i shahli hv̄t nana hō isht ahanta ka, akostinichi keyu chatuk; amba nana hō Aki a im a hāklo li tuk vt okluyuha hvchīm anoli li hatuk okvt, a kana v̄hleha hvchi achi lishke.

16. Hvchishno ak osh hvs si atokoli tok o keyu; amba itvnowvt vnit hvsh waya he ak atuk oke; yohmikma hvchi a waya kv̄t aiasha na Aki a nana hō a hohchifo pulla kak o isht hvsh im asilhakma, hvch ima he mak o, vno ak osh ai atokolit hvchīm apesa li hatuk oke.

17. Hvsh it i hulla he mak o, ilvppa hvchīm apihisa li hoke.

18. Yakni vt hvchi nukkilli hokmvt, ik hvchi nukkilli kisha hosh vno a a nukkilli tok a hvsh ithaiyanvshke.

19. Yakni ak o hvsh ai achvfa hatuk okmvno, yakni vt immi hatuk okvno holitobla he tuk; amba yakni a hvsh ai achvfa keyu; amba vno ak osh atokolit yakni a a kohchit hvch ishi li hatuk; yohmi hatuk o yakni vt hvchi nukkilli hoke.

20. Tishu hv̄t i shahli hā imaiya chatuk keyu, hvchīm achi li tok anumpa yvma hvsh ithaiyanashke. Ūno a okla svlvvshachi tok okmvt, hvchishno ma hvch ilbvshacha he akinli hoke; v̄m anumpa hā im antia tok okmvt, hvchīm anumpa hā im antia he akinli hoke.

21. Yohmi kia auet sa kanchi tok a pit ithana keyu hokvt, vno pulla hatuk mak o ilvppa puta ka hvchi yvmihcha hi oke.

22. Ūno ak osh ayvt vlv̄t ant ak im anumpulo hatuk okmvno, ai ashvchika yvt okla ik im iksho ka he tuk; amba himak okvno nan im ai ashvchika ya isht ompoholma hi vt okla ik im ikshoshke.

23. Kvna hosh vno a a nukkilli hokvt, Aki ma i nukkilli akinli hoke.

24. Ūno vt na-fehna puta ka, hatak inla nana kia ai yvmihchi chatuk keyu ka ai itintakla ma vno vt ai yvmihchi li



tuk keyu hokmvno, nan ai ashvchika yvt okla ik im iksho ka he tuk; amba himak okvno pisa cha, anonti vno, mikmvt Aki ita-tuklo ka i nukkilli tuk oke.

25. Yohmi kia na kaniohmi keyu ho okla a nũkkillishke, achi anumpa hvt i nan vhpisa holisso ha a holisso tok vt ont ai ahla chi kak o, ilvppvt ai yakohmi tok.

26. Yohmi kia nanuktalali, yvmmak okvt Shilombish ahli, Aki a a kohchvt aya mak o, Aki a im ai isht auet hvchi kanchi li vla hokmvt, yvmmak osh ai atokowa ka si anohonla he mak oke.

27. Yohmikma hvchishno vt nana vmmona ka si apehvt hvsh aya tuk okvt, nan ai-atokowa ka hvsh anoli akinla hi oke.

## CHAPTER XVI.

Chisvs vt anonti nan im ai ithvna vhleha ha okla hvt ilbvshala chi puta ka im anoli, 1: 7 mihmvt nanuktalali, yvmmvvt Shilombish Holitopa mak o auet ima hi vt miha. 16 Falamvt tani ha yvt, ilapvt i nowvt aya pulla he im anoli; 23 ilap hohchifo pulla ho Chihowa ha nan isht im asilhha hokvto im anumpa hvt holitopa pulla hi a miha.

1. IK hvchi ibetvblo ka he mak o, ilvppa puta ka isht hvchim anumpohonli li hoke.

2. Sinakak puta ka okla a hvchi kohchicha he; ahli, kvna hosh hvchibi hokmvt, Chihowa ha holitoblichhi mak o im ahoba he nitak vt mihinti hoke.

3. Yohmi kvvt Aki, mikmvt vno il ita-tuklo ka ik pithano hatuk mak osh, ilvppa puta ka hvchi yvmihcha hi oke.

4. Yohmi kia nitak yvmmvvt ai ona hokma, yvmmak oka hvchim anoli li tok a hvsh ithana he mak o, ilvppa puta ka hvchim anoli li hoke. Yohmi kvvt vno vt hvchi takla anta li hokvt, nana vmmona hokvno ilvppa puta ka ak hvchim acho ki tok oke.

5. Yohmi tuk osh himonasi yokvno auet sa kanchi tok mak o falamvt im ia la chi hoke; yohmi na hvsh kanima kia, Katima yo ish ia chi cho? achit hvchik sa ponakloshke.

6. Amba ilvppa puta ka hvchim achi li kak o, nanukhaklo kv̄t hv̄chi chukvsh a alotolishke.

7. Yohmi kia ahli mak o hvch im anoli lishke. Ūno vt ia li hok mak o nan isht a hvchim vlhpiesa chi hoke; vno vt ia li keyu hokmvno, nanuktalali vt hvchim aya he keyu: amba ia li hokmvto, yvmma auct hvchi kanchi la he mak oke.

8. Yohmikma yvmmak osh vlakmv̄t, ai ashvchika, micha nan ai vlhpiesa, mikmv̄t nan-vlhpisa aiena ka okla puta ka, anukfohkicha hi oke.

9. Ūno a okla a yimmi hatuk keyu hoka, nan im ai ashvchi hatuk a im otv̄nihincha he;

10. Ūno vt Aki a im ia li; yohmi na himmakma hvch ik sa peso hatuk oka, nan ai vlhpiesa hatuk a im otv̄nihincha he:

11. Yakni a ai i shahli hv̄t nan im vlhpisa hatuk oka, nan-vlhpisa ma im otv̄nihincha hi oke.

12. Na hvchim achi la he yokvto v̄m asha moma akinli kia, himonasi okvno yvmmak oka hvsh akostinincha he keyushke.

13. Yohmi kia Shilombish ahli, yvmmv̄t vla hok mak osh, nan ai ahlika puta ma hvch ithv̄nancha hi oke; yvmmak okv̄t ilap nana aiahni hosh anumpula he keyu hokv̄t; amba nana ho haklo tuk mak osh mihi yo anumpula hi oke; mikmv̄t nana a kaniolima he puta ka hvchim otv̄nihincha hi oke.

14. Yvmmak okv̄t vno ak o v̄m ai ishi cha, hvchim otv̄nihincha hi okv̄t, vno a sa holitoblicha he mak oke.

15. Nana moma Aki vt im asha kv̄t v̄m̄mi hoke; yohmi hatuk mak o, vno ak o v̄m ai eshi cha hvchim otv̄nihincha he, hvchim achi li tuk oke.

16. Chekosikma hvs sa pisa chi keyushke; atukmv̄t anonti Aki ak o im ia li hatuk oka, chekosikma hvs sa pisa hi oke, im achi tok.

17. Yohmi ma nan im ai ithv̄na v̄hleha kaniohmi kv̄t, Chekosikma hvs sa pisa chi keyushke; anonti Aki a im ia li hatuk oka, chekosikma hvs sa pisa chi hoka hv̄pim achi ka, ilvppak osh katiohmi hoh cho? ilap bika it im achit maya tok.

18. Yohmi hatuk osh, Chekosikma, achi ilvppvt nanta hak oh cho? nana hō miha ka kil im akostininchoshke, okla achi tok.

19. Ilapa okla i ponaklo bvnna ka Chisvs vt im ithana hatuk osh, Chekosikma hvs sa pisa chi keyushke: atuk osh anonti chekosikma hvs sa pisa chi oke, achi li tuk yvmmak ash isht ai it im a ponaklot hvsh maya cho?

20. Ahlishke, ahli mak o hvch im achi lishke; Hvchishno yokvto nishkin okchi mintit hvsh yahaya chi hoke; yohmikma yakni vto na-yukpa chi hoke: mikma hvchi nukhaklo fehna he; yohmi kia na hvchi nukhaklo kash ot falamvt isht a hvchi yukpa hi oke.

21. Ohoyo hvt vlla in tonla chikmvt, hvshi kanvlli vlhpisa hvt im ai vla hokvt ilbvsha hoke; yohmi tuk kia hatak osh tobtv yakni a ai ituyula ka, na yukpa kv, vlla yvt in tola makinli hosh na palvmmi tuk a imi-haksi hoke.

22. Yohmi ka hvchishno vt himonasi kvno hvch ilbvshvshke; yohmi kia himmakma hvchi pisa la chi akinli; yohmikma hvchi chukvsh vt yukpa he, mikma na hvchi yukpa ka hatak nana hosh ishit hvchi kancha wa.

23. Mikma nitak yvmma fehnakma nana kia hvch ik sa ponaklo ka hi oke. Ahlishke, ahli mak o hvch im achi lishke, Vno a hohchifo hō nana ka Aki a isht a hvsh im asilhhakma, hvch ima he mak oke.

24. Tikbtv a mihinti hokvno a hohchifo ha nana ka isht hvch ik asilhho ke tuk; oh asilhhá; yohmikmvt na hvchi yukpvt isht alotowa chi ka, hvsh habena he mak oke.

25. Nana ilvppa puta ka nan isht vlhpisa hō isht hvchim anumpuli lishke; yohmi kia himmakma nan isht vlhpisa hō isht ak hvchim anumpulo hosh, amba otvninchi achukma hosh Aki a isht a hvchim anohonli la he nitak vt mihinti hoke.

26. Nitak yvmmak okvno a hohchifo ha nan isht a hvsh asilhha hi oke: yohmikma Aki a hvch isht im a ponaklo la hi oke; hvchim achi li keyushke.

27. Hvchishno vt hvs sa hullo, mikmvt Chihowa ak o a



kochvt aya li hatok a hvchi yimmi tuk: yohmi hatuk o Aki vt ilapo akinli kv̄t hvch̄i hullo hoka.

28. Aki ak o a kohchvt aya hosh yakni a vla li tok osh; anonti yakni ash issvt, Aki a im ia li hoke, im achi tok.

29. Nan im ai ithvna vhleha hash ot, Inta! himak okvno achukmalit isht pim anumpuli cha, nan-isht vlhpisa h̄o chik anumpuloshke.

30. Nan okluha ka ish ithaiyana ka, hatak nana hosh nana ka a chim a ponakla hi o keyu ka himak okvno il akostininchishke; Chihowa ak o a kohchvt ish aya tok pulla ka ilvppak o isht a pi yimmishke, okla im achi tok.

31. Chisvs vt afalaminchi mvt, Himak ano okla hvchi yimmi cho?

32. Inta! hatak vt ilap in chuka aiyukali ka ai ita fimimprt ilap banochit hvs sa filvmma ch̄i ka hvshi kanvlli ai vlhpisa kv̄t mihinti tuk osh, anonti himak okvno ai ona hoke; yohmi kia Aki ak osh si ahina hoka, vno ak illa he keyushke.

33. Vno pulla h̄o nana anuktanla ka hvsh iesha he mak o, ilvppa puta ka isht hvchim anumpuli lishke. Yakni paknaka yokvno na palvmmi puta kv̄t a hvchim aiasha he; yohmi kia hvchi nuktanla achukmashke; vno vt yakni a imaiyachi li tuk oke, im achi tok.

## CHAPTA XVII.

Ishit inla ibbak fohka ch̄i ninak a Chisvs vt vba pit anumpuli kv̄t, ilapvt illi tuk vt falamvt tani ha ya, Chihowa hv̄t nan im ai ithvna vhleha h̄a apelahanchi na im anukfila hv̄t ai it achvfa he, 1; 20 Chihowa, Ushi ita tuklo ka im anukfila pit ai itachvfa he: 24 yohmi cha ilap vt vba yakni a holitopr̄t ahanta ka ont apehvt maya he puta ka vba isht anumpohonli.

1. ANUMPA ilvppa puta ka Chisvs vt anumpohonli mvt, vba pit vba chakali cha, Aki ma! hvshi kanvlli vlhpisa yvt ai onvshke. Chiso h̄a ish holitoblich̄i na anonti chiso mvt chi holitoblich̄i akinlashke.

2. Laua kv̄t kaniohmi h̄o ish im ihisa tuk ma, yvmmak

ash ai okchayvt bilia yo yummak ash ot ima hi vt, hatak puyuta ma ai imaiya he mak o, ish im apihisa tok oke.

3. Yohmi ka Chishno ak illa kak osh Chihowa ahli chia ka, micha Chisvs Klaist auet ish kanchi tok ma okla ithaiyana he ak o ilvppak osh ai-okchayvt bilia yoke.

4. Yakni paknaka ya a chi holitoblich lishke. Natoksvli isht ahanta la hi o is svm apesa tok a, atahli lishke.

5. Yohmi ka, Aki ma! yakni vt iksho mak o na holitopa ka isht chiba holitopa li ya tok mak o, himak a chishno a ai il a aieninchit is sa holitoblichashke.

6. Hatak puta ka yakni ak o ai ishit is soma hatuk a, chi hohchifo ha im otvninchi li hokvno; yummak okvt chimmi hatuk o, is soma hatuk oka, chim anumpa ha okla holitobli tuk oke.

7. Nana ka is soma tok okluyuha kvv chishno ak o a minti hatuk a himak okvno okla akostininchishke.

8. Anumpa is soma chash yummak o ima li hokvno; mihma yumma okla aiokpuchi mvt, vno vt chishno ak o a chi a minti li hatuk a, okla akostininchi, micha chishno ak osh auet is sa kanchi tok aiena ka okla yimmi hatuk oke.

9. Yummak o isht chim ilbvshvt anumpuli lishke; yakni ak o isht chim ilbvshvt anumpuli li keyu, amba ilvppak o is soma tok a, yummvt chimmi vhleha hoka, isht chim ilbvshvt anumpuli lishke.

10. Yohmi ka vmmi hvv momvt chimmi hokma, anonti chimmi hvv vno a vmmi makinli hoke: yohmi hoka vno vt yumma isht a sa holitopa hoke.

11. Himak okvno yakni paknaka ya himmakma ik si ai iksho mak oke; yohmi kia ilvppak okvto yakni a ai ahashwa na vno vt chim aya li mak oke. Aki holitopa ma! is soma tok vhleha ilvppak oka chishno chi hohchifo pulla hatuk mak o ish apesahanchi na yummak mvt ai itibai achvfa kvv pishno a chiyuhmashke.

12. Pehliechit yakni paknaka ai ahanta li moma kvto chi hohchifo pulla ho isht ai apesahanchi li tok: is soma tok vhleha yummak oka apesahanchi li ma, achvfa kia ik kvnio

h<sub>o</sub>, amba Holisso Holitopa vt ont ai a<sub>h</sub>la ch<sub>i</sub> kak o, nan-ok-pvni ushi ak illa tuk oke.

13. Yohmi ka vno pulla hatuk mak o a nan-isht ilaiyukpa ma ilap inlit okla il ai esha hi o, ilvppa puyuta ka yakni paknaka isht ai anumpohonli li, yohmi tuk osh himak okvno chim a<sub>y</sub>a li mak oke.

14. Chim anumpa ha ima li tuk oke: yohmi ma yvm-mak okvt yakni a ai immi keyu kv<sub>t</sub>, vno vt yakni a ai immi sia keyu kak inli h<sub>o</sub> chohmi hatuk o, okla i nukkilli hatuk oke.

15. Yakni ak o a kohchit ish isha hi o chim asilhha li keyu; amba apesahanchit nan-okpulo ak o ishit chik ahalai-yacho ka he ak oke.

16. Yakni a ai immi keyu kv<sub>t</sub>, vno vt yakni a ai immi sia keyu kak inli h<sub>o</sub> okla chiyuhmi hoke.

17. Yvmmak oka na chim ai a<sub>h</sub>lika pulla kak o isht ish i kashofichashke; chim anumpa hak osh nan ai a<sub>h</sub>lika yoke.

18. Chishno vt yakni paknaka ya auet is sa kanchi tok mak o, chohmichit vno mvt ilvppak ma yakni paknaka ya a tihlehinli lishke.

19. Micha ilap ak kia nan-ai a<sub>h</sub>lika ya ai isht a kashofa ch<sub>i</sub> ka, vno vt ilvppak pulla hatuk mak o ile kashofichi li hoke.

20. Micha ilvppa illa h<sub>o</sub> isht asih<sub>i</sub>hla li keyu; amba ilvppa pulla im anumpa hatuk mak o a yimma he aiena kak oke.

21. Moyumvt ai itib achvfa kv<sub>t</sub>, Aki chia hv<sub>t</sub> vno a is svbai achafakma, anonti vno mvt a chibai achafa li kak inli h<sub>o</sub> okla chiyuhmi cha, yvmmak mvt pishno a a pibai achafashke: yohmi na chishno ak osh auet is sa kanchi tok a okla moma kv<sub>t</sub> ithaiyanashke.

22. Yohmikma ilvppvt ai itib achvfa kv<sub>t</sub> pishno il itibai achvfa kak inli h<sub>o</sub> chohma hi a, nan-isht ahelitopa is suma tok a ilvppa ima lishke.

23. Vno vt ilvppa ai ibachafa likma, anonti chishno mvt auet is svbai achafa; ai yakohmi h<sub>o</sub> yvmmak osh ont ai a<sub>h</sub>li achvfa ka tobashke; yohmikma chishno ak osh auet is sa



kanchi tok; a tok osh ilvppak oka ish i hullo kv̄t vno a is sa hullo kak inli hō ish chohmichi ka, yakni vt ithaiya-nashke.

24. Aki ma! is suma tok vhleha hak kia kanima yō ai ahanta likma, si apihvt aśha cha, nan-isht v̄m aholitopa yv̄mma is suma tok a pisa he ak o, ahni lishke: yakni vt ik tobo kisha mak o is sa holitobli tok mak oke.

25. Aki ahli achukma ma! yakni vt ik chithanoshke; yohmi kia vno vto chithana li; mihma chishno ak osh auet is sa kanchi tok a ilvppak okvto akostininchi hatuk oke.

26. Yohmi na ilvppak o chi hohchifo hā isht im anohonli li tuk osh, anonti anohonli la chī hoke: yohmikma na-holitobli ai isht is sa hullo hatuk vt ilvppak ma anukfoyuka na, anonti vno mvt ai ibachafa lashke, achi tok.

## CHAPTA XVIII.

Chisvs vt osapushi yō ont chukowa, 1; 6 Chutas vt Chisvs a isha chī hosh ai vla na, Chisvs vt anumpuli ma, falamvt obvlhpelvt aka ont fohopa; 10 Pita yvt Malkvs haksobish a chanlit hokofi. 12 Chisvs a okla takchi cha isht ia mvt, Annas ak o isht im ona tuk osh achakalinchi mvt, Kaiafas ak o okla isht im ona; 15 mihma Pita yvt Chisvs a ik ithano miha. 29 Chisvs a Pailat ak o okla isht im ona ma, Pailat ash osh achukmalit nan im a ponaklo.

1. CHISVS vt ilvppa puta ka ahanchit in taiyaha mvt, nan im ai ithvna vhleha pehlinchit Kitlon bokushi a pit tanvblit osapushi vt yv̄mma talaia tuk o, nan im ai ithvna vhleha hash ai it apihvt ont chukowa tok.

2. Yohmi ka Chisvs vt nan im ai ithvna vhleha hā pehlichit yv̄mma ai ona fehna chatuk a ishit inla im issa tok Chutas ak kia yv̄mma pit ai ithana tok.

3. Yohmi hatuk osh Chutas ash ot hatak ai-itapeha achvfa, i kv̄pitvni vhleha aiena ka na-holitompa isht aśha pehlichit vhleha, mikmvt Falisi vhleha aiena ka ai im ai ishi mvt, pula afohka, mikmvt na shimahli pula, micha na halupa aiena ka sholi hosh yv̄mmak ash ai vla tok.

4. Yohmi ma Chisvs vt nana hosh ilapa ai onvtuyula chī

puta moma ka ithana hatuk okvt, ivt ont afamvt, Kvta ho hvsh hoyo cho? im achi tok.

5. Mihma, Chisvs Nasalet minti ak oke, okla im achi ma, Chisvs ash osh, vno ak osh mih sia mak oke, im achi tok. Mihma ishit inla im issa tok Chutas ash kia yvmma takla hikia tok.

6. Atuk o, Uno ak osh mih sia mak oke, im achi makinli ho, okla obvlhpelvt ivt aka ont kaha tok.

7. Mihma atuklanchit i ponaklot, Kvta hak o hvsh hoyo cho? achi tok. Mihma, Chisvs Nasalet minti ak oke, okla achi tok.

8. Chisvs vt afalaminchi mvt, Uno ak osh mih sia hatuk vt hvchim anoli li kvno; yohmi hoka vno ak o hvs sa hoyo hatuk okmvt, ilvppak okvno asht ik itvnowá, hvsh im ah-nashke.

9. Yohmi na yvmmak o isht anumpuli hosh, Is soma tok vhleha hokvt achvfa kia ik sa kvnioshke, ahanchi tok a ont ai ahlashke, achi tok.

10. Yohmi ma Saimon Pita yvt bvshpo falaia shanli tuk osh halvllit shufi mvt, na holitompa isht asha pehlichí i shahli in tishu ho isht fahamvt, haksóbish isht impak imma ya chanlit hokofi tok. Tishu hohchifo hvt Malkus a tok.

11. Mihma Chisvs vt Pita yash o, Chi bvshpo falaia ya i shukeha pit fohkí; isht ishko Aki vt auet vma tok a ak ai ishko ka hinla cho? im achi tok.

12. Yohmi ma hatak aya achvfa, micha kvpitvni, mikmvt Chu okla nan vlhtoka vhleha aiena kash ot Chisvs ash ishi cha, takehi tok.

13. Mihmvt yvmmak osh Kaiafas vt afvmmi yvmma feh-na ka na holitompa isht asha pehlichí i shahli yatuk o, yvmma ipochi yatuk oka Annas ak o tikba okla isht im ona tok.

14. Kaiafas ilvppak osh hatak achvfa hosh okla hoka vhllobvt illa he ak o ai vllhpiesa ka, Chu okla ha it im apesa tuk a tok.

15. Mihma Saimon Pita yvt Chisvs a pit iakaiyvt aya ma, anonti nan im ai ithvna achvfa yvmmak oka na-ho'

tompa isht a<sub>2</sub>sha pehlich<sub>1</sub> i shahli hvt ithana hatuk o, Chisvs a awant na-holitompa isht a<sub>2</sub>sha pehlich<sub>1</sub> i shahli i nan-ai-apesa ya ont chukowa tok.

16. Amba Pita vto okhissa kocha yak o hikia tok. Yohmi ma nan im ai ithvna achvfa na-holitompa isht a<sub>2</sub>sha pehlich<sub>1</sub> i shahli hvt ithana hatuk, yvmmak ash ot kohchvt ivt, ohoyo okhissa apesvchi yash ont im anoli cha, Pita ya ilaue<sub>1</sub>lit chukowa tok.

17. Mihma ohoyo himita okhissa apesvchi yash ot Pita ya, Chishno ak kia hatak ilvppa nan im ai ithvna chia keyu? im achi ma, Mih sia keyushke, im achi tok.

18. Mihma kapvssvchi hatuk o, ilhtolno vhleha, micha nan vlhtoka vhleha aiena kash ot tobaksi yo oti cha, libisha hosh hiohmaya tok; mihma Pita yvt takla hiki<sub>1</sub>vt libisha tok.

19. Na-holitompa isht a<sub>2</sub>sha pehlich<sub>1</sub> i shahli ash ot Chisvs a nan im ai ithvna vhleha, mikmvt nan isht im avchi aiena ka ai im asilhhvchi tok.

20. Chisvs vt afalaminchi mvt, okla puta ka ai im otvni achukma hosh anumpohonli li hatuk; Chu okla hvt ai itvnaha bilia sinakak, micha tempel aiena yvmmak o nana ai ithvnanchi li chatuk; yohmi kv<sub>1</sub>t luma chohmi hokvto nana ak achoshke.

21. Na kati<sub>1</sub>hmi ho vno ak o is svma ponaklo cho? nana im achi li ka haklo chatuk vhleha hak o ish i ponaklashke: yakeh! yvmmak osh nana achi li chatuk a okla ithana hoke, achi tok.

22. Ilvppa yakohmichit anumpuli ma, nan-vlhtoka vhleha hvt achvfv<sub>1</sub>t bilikasi hikia tuk osh, Chisvs ash ibbak isht pasalichi mvt, Na holitompa isht a<sub>2</sub>sha pehlich<sub>1</sub> i shahli ya yakohmichi hosh ish im anumpuli cho? achi tok.

23. Chisvs vt afalaminchi mvt, Ik vlhpeso ho anumpuli li hokma, nan ik vlhpeso mak o isht ish atokolashke: amba vlhpesa tuk mvno, katiohmi ho is svssso cho? achi tok.

24. Yvmmak ash ot talakchi na Annas vt na holitompa isht a<sub>2</sub>sha pehlich<sub>1</sub> i shahli Kaiafas a pit pila tuk a tok.



25. Mihma Saimon Pita yvt libisha hosh hikia tok : yohmi ma, Chishno vt yvmma nan im ai ithvna vhleha ha ish ibai achvfa tuk keyu ? okla im achi ma, ik ahlo mihvt, Ūno yokvt mih sia keyushke, achi tok.

26. Na holitompa isht asha pehlichī ī shahli im ilhtohno vhleha achvft Pita yvt haksobish tvbli tuk ash ī kanomi hosh, Chishno ak osh yvmma awant osapushi a ish anta ho, chi pisa li tuk keyu ? achi tok.

27. Mihma Pita yvt ik ahlo kash inli ho miha tok : mihma chekosi fehna akaka yvt ola tok.

28. Yohmi ma Chisvs ash Kaiafas a im ai ishit ivt, nan ai apesa yo okla isht ona tok : yvmmvt onnahinli ha tok ; yohmi kv̄t nan-vbanvblit ont ia ya ai impa he tuk vt, im ai okpuloka hinla hatuk osh ilapo ak okto nan ai-apesa ya okla pit ik chukowo ki tok.

29. Mihma Pailat vt kohchvt ona mvt, Hatak ilvppa anumpa nanta mak o hvsh ai ikbichi cho ? achi tok.

30. Mihma okla afalaminchi mvt, Ilvppvt nanokp̄vni keyu hatuk okma, chibbak oka ant e chi fohka he tuk keyu hoke, okla im achi tok.

31. Mihma Pailat vt, Isht oh ia cha, hvchi nan-vlh̄pisa mak o isht oh ai im apesá, im achi tok. Yohmi hatuk o Chu okla hash osh, Hatak nana kia illa he il im apesa he vt a pim vlhpesa keyu hoke, okla im achi tok.

32. Yohmi ka Chisvs vt kaniohmit ai-illi yo ai illa hi vt anumpohonli tok a, ont ai ahla he mak a tok.

33. Mihma Pailat vt atuklanchit nan-ai-apesa yash ont chukowa cha, Chisvs a ī howa mvt, Chishno ak osh Chu okla ī miko chia mak oh cho ? im achi tok.

34. Mihma Chisvs vt afalaminchi mvt, Chishno akinli hosh, keyukmvt, inla yak osh vno a isht a chim anolikmá, nanta tuk o ilvppa ish achi cho ? im achi tok.

35. Pailat vt afalaminchit, Ūno vt Chu sia ho ? chishno chim okla ash inli, mikmvt na holitompa isht asha pehlichī vhleha aiena kak osh chishit svbbak a fohki tuk oke. Nanta mak o ish katiohmi tuk oh cho ? achi tok.

36. Chisvs vt afalaminchi mvt, Apehlichī li ka yvt yakni

ilvppak inli keyushke. Apehlichli li ka yvt yakni ilvppak inli hatuk okma, Chu okla ibbak ak a fohko ka chi ka, an tishu vhleha hvt itihimba he tuk: amba himak okvno apehlichli li ka yvt ilvppak inli ho keyushke, achi tok.

37. Yohmi hatuk o Pailat ash osh, Mih kvto miko chia akinli hotuma? im achi ma, Chisvs vt afalaminehit, Miko sia mak atuk o ish mihvshke. Nan ai ahlika atokolit anoli la he ilvppak osh sa toba cha, anonti ilvppa pulla hatuk mak o ayvt yakni a vla li tuk oke. Nan ai ahlika yo anukfoyuka aiyukali hokvto, vm anumpa ha haponaklo bano hoke, achi tok.

38. Pailat ash osh, Nan-ai ahlika yak osh nanta ho? im achi tok. Mihmvt ilvppa achi mvt, falamvt kohchvt Chu okla hash im ona mvt, Nan ik ai-vlhpeso nana kia a takali ka ak im akostinincho kvmohmishke.

39. Yohmi kia nan-vbanvbli ont ia isht asha hokvno, achvfallichit a hvchim i hotofi la he ai vlhpesa chatuk vt ashvshke: yohmi hoka Chu okla i miko ak o a hvchim i hotofi la hi a hvsh ahni cho? im achi tok.

40. Mihma anonti momvt chitoli hosh, Hatak ilvppvno keyu ho, amba Balabbas ak ashke, okla achi tok. Yohmi ka Balabbas vt hatak hukopa ya tok.

## CHAPTER XIX.

Pailat vt Chisvs ash fvmmit issa ma, tvshka chipota vhleha hvt kvti tvnna yo iachokolichi, 1: 4 hlakofichi bvnna kia, Chu okla nan ahni kak o im antia hatuk osh, yvmmvvt ititaiyukhvna ahonvhla chi mak o, im issa: 17 tvshka chipota vhleha hvt i nafohka yatuk a iti hopela: 26 Chisvs vt ishki yatuk a achukmalit apelahancha chi ka, nan im ai ithvna i holitopa yatuk a i miha cha, illi. 31 Tvshka chipota vhleha hvt, Chisvs naksi a tvli halupa ishit bahli. 38 Chosef Alimahlea minti, micha Nikotemvs ita tuklo hosh Chisvs haknip a ishi cha, hohpi.

1. YOHMI hatuk o yvmma foka ma Pailat vt Chisvs a ishi cha, fvmmi tok.

2. Mihma tvshka chipota vhleha hvt kvti tvnvt iachuka

ikbit, noshkobo ha iachukolichi mvt, na tishepa na fohka holitopa yo ishit okla anchichi tok.

3. Mihmvt aiokpuchi mvt, Chu okla i miko yosh nan ik yukpa, achi mvt ibbak okla isht isso tok.

4. Yohmi ma anonti Pailat ash ot ia cha, Yakeh! nana ik ai-vlhpeso nana kia ai a takali na akostininchi li keyu ka hvsh akostinincha chi mak o, ilauelet hvchi kohchi lishke, im achi tok.

5. Mihma Chisvs vt kvti iachuka ha iachukoli cha, natishepa na-fohka holitopa fohka hosh auet kohcha tok. Mihma Pailat ash osh, Yakeh! hatak atukma ho pesa, okla ha im achi tok.

6. Yohmi ma na-holitompa isht asha pehlichí vhleha, mikmvt nan-vlhtoka vhleha aiena kash ot yummak ash pisa mvt, chitoli hosh mihvt, Ititaiyukhvna ak o oh ahonvhlichí, ititaiyukhvna ak o oh ahonvhlichí; ahanchi ma, Pailat ash osh, Oh ishi cha, ititaiyukhvna ak o oh ahonvhlichí; vno yokvto nana ik ai-vlhpeso nana kia ai atakali ka ak im akostinincho hoke, im achi tok.

7. Chu okla hvv afalamínchi mvt, Nan-vlhpisa hvv pin tonla: yohmi ka ilvppak okvt Chihowa Ushi ilapissa hatuk okvt, pi nan-vlhpisa pulla kak o isht illa he vlhpesa hoke, im achi tok.

8. Yohmi hatuk o Pailat vt anumpa ymma haklo mvt, nukshopa kvv isht i shahli tok.

9. Mihmvt anonti nan ai apesa yash ont chukowa cha, Chisvs ash o, Katima kv ish minti tok oh cho? im achi tok. Yohmi kia Chisvs ash ot nana ik im acho ki tok.

10. Yohmi ma Pailat ash ot, Chik svm anumpulo mak oh cho? vno vt ititaiyukhvna ya a chi ahonvhlichí la hi vt vm vlhpesa, anonti chi hotofi la hi vt vm vlhpesa aiena ka chik ithaiyano cho?

11. Chisvs vt afalamínchi mvt, Chishno yokvt vba ak o auet a chima hv keyukma, vno yoka nana hv is sa kaniheha hi vt chim vlhpesa keyushke: yohmi hoka svshit ayvt chibbak a ant sa fohki tuk a yummak osh nan-ashvchi kvv ai in chinto hoke, achi tok.



12. Yohmi ma yvmma ai vhlit minti ka Pailat vt yvmmak ash i hotofi bvnvt im anukfihinla tok: yohmi kia Chu okla hvv chitolit anumpulit, Hatak ilvppa ish i hotofi hokmvt, Sesa ya i kana chia ha he keyu. Kvna hosh miko il apesakmvt, Sesa ak o i sanalit anumpuli hoke, okla achi tok.

13. Yohmi hatuk o Pailat vt anumpa yvmma haklo mvt, Chisvs ash ishit kohchi cha, ilap vto nan ai-apesa ai-o-minili om binili tok, yvmmvt Tvli potvlhpo hohchifo ho, amba Heblu ano Kabbahla hohchifo ha tok.

14. Mihma nan vbanvblit ont ia asha chi ka, ai il atahlit maya nitak, mihmvt hvshi kanvlli vlvpisa yvt ont isht hannali foka aiena; yohmi hatuk o Chu okla hash o, Hvchi miko ya ho pesa, im achi tok.

15. Yohmi kia okla chitoli hosh anumpulit, Kanima isht oh ia cha, kanima isht oh ia cha, ititaiyukhvna oh ahonvhlichí, achi ma, Pailot ash ot, Hvchi miko ya ititaiyukhvna ahonvhlichí la chi cho? im achi ma, na holitempa isht asha pehlichí vhleha hash ot, Pi miko vt iksho, Sesa ak banoshke, im achi tok.

16. Yohmi ma polaka yvmmak ash ot ititaiyukhvna ahonvhlvt illa chi mak o, ibbak i fohki tok. Yvmma foka ma Chisvs ash o okla ishi cha, halvllit kanima isht ia tok.

17. Yohmi ma im ititaiyukhvna yash o sholi cha ivt yakni hohchifo noshkobo foni aiasha yo, anonti Heblu yokvno yvmmvt Kalkohla hohchifo ho ona tok.

18. Mihma yvmmak ash, micha inla yvt tuklo ho aieninchit ititaiyukhvna okla ai ahonvhlichí tok: Chisvs ak osh iklvna yo takali na achvfa bkvv ita hlaklaka takohli tok.

19. Mihma Pailat vt nan anoli holisso ha holissochit ititaiyukhvna ya a lapalichí tok. Yohmi ka holisso kvv, CHISVS NASALET MINTI CHU OKLA I MIKO YOKE, achi ha tok.

20. Yohmi na Chisvs vt ititaiyukhvna ai ahonvhlvt illi yvmmvt tvamaha ha i bilika ha tok: yohmi ka holisso kvv Heblu, Klik, mikmvt Latin aiena anumpa hosh isht a holisso hatuk oka, nan anoli holisso ilvppak ash Chu okla laua kvv pisa tok.

21. Yohmi ma Chu okla na holitompā isht im āsha pēh-  
lichī vhlēha hash osh Pailat ā, Chu okla ī mīko, achit chik  
holissocho kashke; amba Chu okla ī mīko sia hoke, achi  
chatuk yvmmak o ish holissochashke, okla im achi tok.

22. Mihma Pailat ash ot, Nana hō holissochi li kv̄t holis-  
sochi li mak atuk oke, im achi tok.

23. Yohmi ma tvshka chipota vhlēha hv̄t Chisvs ā ititai-  
yukhvna ahonvhlīchi mvt, ī na fohka yatuk ā ishit ita kv̄sh-  
koa ushtali cha, tvshka, chipota vt ī kashampa aiyuka tok;  
mihmvt ī na fohka lumbo ash kia aienīnchi tok: na fohka  
lumbo yvt ahchūwa yō keyu, paknaka yak o a tv̄nmvt māya  
hosh ont taiyaha ha tok.

24. Yohmi hatuk o, Ilvppak okvno keho hlilvffo hosh,  
amba kv̄na hosh immi ha chī ka, na shoelit kil oh āshā, ilap  
bika it im achit māya tok; yohmi ka Holisso Holitopa vt,  
Ūm ilifoka ya okla itī hopela mvt, ā na fohka lumbo yoka  
na shoeli isht aiasha kv̄no, achi ka ont aiāhla chī mak a tok;  
yohmi hatuk o tvshka chipota vhlēha hv̄t ilvppa okla yakoh-  
mi tok.

25. Mihma Chisvs ititaiyukhvna a takali ka ituma ya ish-  
ki, micha ishki nakfish, mikmvt Meli Kleofas tekchi, mikmvt  
Meli Maktalene aiena hosh hiohmaya tok.

26. Yohmi hatuk o Chisvs vt ishki, micha nan im ai ithv-  
na yvmma ī hullo beka tuk mak osh itatuklot hinli na pisa  
mvt, ishki ash o, Ohoyo ma! chiso hā ish pisashke, im achi  
tok.

27. Mihmvt nan im ai ithvna yash o, Chishki ā ish pi-  
sashke, im achi tok. Mihma nan im ai ithvna yvmmak ash  
osh hv̄shi kanvlli vlhpisa yvmmak fehna ai-vhlit ia ka, ohoyo  
hash ilauelit ilap in chuka akinli hō bohli tok.

28. Yakohmi ha ya, nan okluha kv̄t ont ai vlhtaha ka,  
Chisvs vt ithana hatuk osh, Holisso Holitopa yvt ont ai āhla  
chī ka, Sa tukshilvshke, achi tok.

29. Yohmi ma nan-ai-vlhto wineka alota kv̄t talaia tok;  
atuk o na-shatvmmi yō wineka yash alotolit hissop o ta-  
kalichit itih hā pit tikelichi tok.

30. Yohmi hatuk o Chisvs vt wineka yash ishkot pisa

mtv, Ulhtaiyahvshke, achi tok; yohmi cha aka yuhchunukli mvt, fiopissa tok.

31. Yohmi hatuk o nan il ai atahli nitak atuk oka, nitak hullo ya haknip vt ititaiyukhvna ya ik a takohmayo ka chi ka, nitak hullo yvmmvt nitak holitopa hatuk oka, Chu okla hash osh yvmma hanali ak osh kobahli na ishit kanima ia. hinla ka, Pailat a im asilhha tok.

32. Yohmi na tvshka chipota vhleha hash ot ivt, ititaiyukhvna ai iba honvhlvt okla kash achvfalit tikba hanali ha kobahlichy mvt, anonti achvfa yash kobahlichy tok.

33. Amba Chisvs vt a takali tuk a okla ona mvt, yvmmvto illi mashko tuk o pisa cha, yvmmvno hanali ha ik kobahlecho ki tok.

34. Yohmi kia tvshka chipota vhleha yash ot achvftv naksi a na halupa ho ishit bahli na ashalika issish, micha oka aiena hosh auct fohopa tok.

35. Yohmi ka yvmma pisa tok mak osh atokowa ka anoli; yohmi ka yvmmvt atokoli ka ai ahli hoke: yohmi ka hvchishno vt hvchi yimma chi ka, ai ahli mak o miha kvv ithana hoke.

36. Holisso Holitopa yvt, Foni vt ik pakoto ka he, achi kvv ont ai ahla chi mak o, nana kvv a yakohmi tok.

37. Micha anonti Holisso Holitopa ai anumpa inla mvt, Yvmma okla bahli tuk vt yvmmak ash pisa hi oke, achishke.

38. Micha ai yakohmi ha ya, Chosef Alimahlea minti vt Chisvs a nan im ai ithvna akinli kia, Chu okla ha i nukshopa kvv il aluma beka tuk osh, Chisvs haknip a isha hinla kvv, Pailat a ont im asilhha tok: mihma Pailat vt vlhpesa, im ahni tok. Yohmi hatuk o ivt, Chisvs haknip ash ont ishi tok.

39. Yohmi ma Nikotemvs vt nan vmmona ka ninak o ayvt Chisvs a pisa tok yvmmak ash kia vla cha, mvh micha aloes itibvlhto kvv weki tahlepa achvfa foka ho isht vla tok.

40. Yohmi ma Chisvs haknip ash o ishit okla cha, Chu okla hvv hohpi kvv yvmihchi chatuk mak o, yvmmak ash o linen osh na-balama pit aiena ho isht a bonulli tok.

41. Ititaiyukhvna ahonvhlvt ai illi yvmma osapushi osh ta-



laia tok: mihma osapushi anukaka ya sepuika himona, hatuk vt ik a hollopo kisha yo, hikia tok.

42. Yohmi hatuk o Chu okla nan il ai atahli nitak a tok; yohmi hatuk o sepuika yvt yvma auet i bilikasi hatuk oka, yvmak o Chisvs a bohli okla tok.

CHAPTA XX.

Meli Maktalene vt sepuika yash ona, 1. 2 Pita, Chan itatuklo kv tushvt irt, sepuika yash it onachi akinli. 11 Meli Maktalene ash ot sepuika ya falamvt ona, atuk o i himmak o Chisvs fehna kash osh yvmak ash inli ho ont i haiaka. 19 Mih nitak akinli opivt taha ho nan im ai ithvna vheha hv itvnavt chiya ma, Chisvs vt im ona; 25 Wek inla hosh ont taha ho nan im ai ithvna vheha hv Tamas a pit a momvt itvnavt chiya ho, Chisvs vt anonti i haiaka.

1. WEK chukowvt iahpi onnahinli fehna okhlilinch moma ho, Meli Maktalene vt sepuika yash ona cha, tvli yash osh sepuika ya a kanvli tuk o, pisa tok.

2. Yohmi ma maleli hosh vlv, Saimon Pita, micha nan-ithvna achvfa Chisvs vt holitobli yatuk ita tuklo ka, Chitokaka ya sepuika ya ai ishit kohchi cha kanima yo ont bohli tuk a chini ho, kil akostininchoshke, im achi tok.

3. Yohmi ma Pita yvt, micha nan-ithvna achvfa yash ita tuklo cha irt, sepuika ya it onachi tok.

4. Yohmi kv tuklot pit tihlaiya tok; atuk o nan-ithvna achvfa yash ot Pita ya imaiya cha, tikba sepuika ya ona tok.

5. Yohmi cha ont a hlipvt pit hopokoyo mv, linen vto kahvt maya na pisa akinli kia, pit ik chukowo ki tok.

6. Yohmi ma Saimon Pita yash ot auet iakayvt vla mv, sepuika yash pit chukowa cha, linen vt kahvt maya ka pisa tok.

7. Yohmi ma nantapvski noshkobo isht afoa tuk vto linen a ik ibafoko hosh, amba pohlv taha cha, ilapissa yo itonla tok.

8. Mihma nan-ithvna achvfa na tikba sepuika ya ona tuk ash kia pit chukowa cha, pisa mv, yimmi tok.

9. Yvmma foka mvno illi tuk vt falamvt tana hi oka, Holisso Holitopa ya ik ai akostinincho kishvt okla tok.

10. Yohmi mvt nan-ithvna ash osh ilap in chuka atuk akinli ho itiachi tok.

11. Yohmi kia Meli vto sepulka a kocha ya nishkin okchi mihintit hikia tok: atuk osh nishkin okchi mihintit pit aka chunulit, sepulka anukaka ya pit hopokoyo tok.

12. Mihmvt enchil tuklo i na-fohka tombi kvv Chisvs haknip ai itola tuk a, achvvt noshkobo imma yatuk ak o asha ma, achvvt iyi pilla hatuk ak o asha na pisa tok.

13. Mihma, Ohoyo chia hvv na katihmi ho ish yahaya cho? im achit okla ma, An Chitokaka ya okla ishit kvnia tuk a chini ho, kanima yo a bohli tuk a ak ithano kak oke, im achi tok.

14. Micha ilvppa mak achi mvt, im ashak-imma pit filema mvt, Chisvs vt hikia na pisa kia, yvmmak osh Chisvs ash atuk a ik ahno ki tok.

15. Chisvs ash ot, Ohoyo chia hvv na katihmi ho ish yahaya cho? Kvta ho ish hoyo cho? im achi tok: mihma osapushi apesvchi mak o im ahoba mvt, A shahli ma! chishno ak osh yvmmak ash ai isht ish ia tuk okmvt, kanima yo ont ish bohli tuk mvt, is svv anoli na ont ishit minti lashke, im achi tok.

16. Chisvs ash ot, Meli, im achi ma, pit-filema mvt, Labboni, yvmvt nan-ithvnanchi ma! achi hoke, im achi tok.

17. Chisvs vt, Vba ivt Aki a ak im ono kisha hoka, is sa potoli na; amba ivt itibapishi li vhleha aiasha kak o ona cha, Aki, mikmvt hvch Iki, an Chihowa, mikmvt hvchin Chihowa im ia li ka, ish im anolashke, im achi tok.

18. Meli Maktalene ash osh vla cha, Chitokaka ya pisa tuk, yohmi na ilvppa puta ka im ahanchi tuk a, nan-ithvna vhleha hash im anoli tok.

19. Atuk o nitak yvmmak ash inlit ont shohbi wek chukovvt iahpi nitak atuk o, Chu okla ha i nukshopa hatuk osh nan-ithvna vhleha ai itvnahvt chieya ka, okhissa yvt

vllkvma h<sub>o</sub>, Chisvs ash ot vltv iklvna ant hikia cha, Hvchi nuktanlashke, im achi tok.

20. Ilvppa mak achi mvt, ibbak iti chaplinchit, naksi aiena ka i weli tok. Yohmi ma nan-ithvna vhleha hash osh Chitokaka ya pisa kvv na yukpa tok.

21. Yohmi ma Chisvs ash ot atuklanchit, Hvchi nuktanlashke; Aki vt na sa tohno tok mak o, ai itilauechi hosh hvchishno ma na hvchi tohno li hoke, im achi tok.

22. Micha ilvppa makachit in taha mvt, o fiopa mvt, Shilombish Holitopa ya oh ishi.

23. Kvna im ai ashvchika yo hvsh i kashofi hoka, i kashofa he mak oke; mikmvt kvna im ai ashvchika yo hvch ik i kashofa hokma, ik i kashofa ka he mak oke, im achi tok.

24. Yohmi kia Chisvs vt vla ka, auah-tuklo yatuk a achvfa, Titimvs hohchifo Tamas vt takla asha tok keyu.

25. Yohmi tuk o nan-ithvna vhleha inla yash osh, Chitokaka ya e pisa kvno; im achi tok. Yohmi kia, Ibbak chofak ai ahonvha tuk a pisa lish, chofak pit a hika tuk a svbbak ushi pit maiachi lish, anonti naksi a svbbak pit hilechi li h<sub>o</sub> keyukmvt, sai yimma he keyushke, im achi tok.

26. Atuk o anonti nitak isht untuchina ma nan im ai ithvna vhleha hash osh aboha anyka aiasha ma, Tamas vt takla asha tok; yohmi ma okhissa yvt vllkvma h<sub>o</sub>, Chisvs vt vla cha, iklvna ya ant hiki, Hvchi nuktanlashke, achi tok.

27. Mihmvt Tamas ash o, Chibbak ushi a auet welit, svbbak a pisá; mikmvt chibbak ma auet welit sa naksi a pit hilechi: yohmi cha, na yimmi iksho hosh ish anta ná, amba chi yimmi kvv a chim alotowashke, im achi tok.

28. Mihma Tamas vt afalaminci mvt, An Chitokaka ma! an Chihowa ma! im achi tok.

29. Chisvs ash ot, Tamas is sa pisa hatuk mak osh chi yimmishke: pisa h<sub>o</sub> keyu kia, yimmi tok vhleha hokv na yukpa mak oke, im achi tok.

30. Micha na-fehna inla kvv laua h<sub>o</sub>, Chisvs vt nan im ai ithvna vhleha hvv pisa na yvmihchi mvhli tok a holisso ilvppa ik a holissoshke.

31. Amba Chisvs vt Chihowa Ushi Klaist mak a tok a,



h̄vchi yimma he; micha h̄vchi yimmi pulla hosh ȳmma hohchifo hatuk mak o okchayvt bilia ya h̄vsh ahayucha he mak o, iluppa puta kv̄t holisso hatuk oke.

## CHAPTA XXI.

Chisvs vt, nan im ai ithvna vhleha h̄vt Tibelias okh̄vta h̄a n̄vni hokli hosh maya h̄o, ont im otr̄ni, 1; 12 yohmi cha nan-isht-hokli a n̄vni im alotoli cha, anonti itibai impa. 15 Chisvs a i hullokm̄vt in chukf̄vlhpoba, micha in chukf̄vlhpobushi aiena ka im ipeta hi a hituchina ha Pita ya i miha; micha Pita yvt na palv̄m̄mi isht illa hi a tikbanli im anoli. 24 Chan vt ilap nana anohonli ka aiahli, micha Chisvs vt na fehna ka ȳvmihchi tok a, inla yvt lauv̄t asha hosh ik holisso ka, miha.

1. ILUPPVT ai yakohmi ha ya, anonti Chisvs vt nan im ai ithvna vhleha h̄a Tibelias okh̄vta hak o ont a im ile haiakv̄chi tok: mihm̄vt iluppak o ai yakohmi hosh ile haiakv̄chi tok.

2. Saimon Pita, micha Tamas Titimvs hohchifo, mikm̄vt Nahlanael Kalili yakni Kana v̄tta, micha Sebetē ushi tuklo, anonti nan im ai ithvna inla tuklo aiena kv̄t ai itapeh̄vt ma-ya tok.

3. Saimon Pita yash ot, N̄vni v̄bit ia lishke, im achi ma, Pishno ak kia chi ap̄ih̄vt il ivshke, im achi tok. Okla kohch̄vt iv̄t chekosi makinli h̄o peni a ont v̄lbeha tok; atuk osh ninak ȳmma nana kia okla ik hoklo ki tok.

4. Atuk o ont on̄vt taha ma, Chisvs vt alaka ya hik̄ia tok; yohmi kia nan-ithvna vhleha h̄vt Chisvs ash atuk a ik ithano ki tok.

5. Yohmi ma Chisvs ash ot, Ulla v̄to ilimpa h̄vchim asha cho? im achi ma, afalaminchit, Ikshoshke, achi tok.

6. Mihma, Peni ishtimpak-imma yak o n̄vni-isht-hokli a oh okv̄ch̄i, micha h̄vsh ahayuchashke, im achi tok. Yohmi hatuk o pit okv̄chi m̄vt, anonti n̄vni yvt laua fehna ka, halv̄lli kv̄t okla na kanihma he keyu ki tok.

7. Yohmi ma nan-ithvna Chisvs vt holitobli yatuk, ȳvmak ash ot, Chitokaka mak oke, Pita ya im achi tok.

Mihma yummvt Chitokaka mak atuk o, Saimon Pita yvt haklo mvt, nipi bano tuk osh nafohkvt nvti hokli yatuk ash o ishit il ai vskofvchi mvt, okhvta hash pit okatula tok.

8. Mihma nan-ithvna vhleha inla ka yvto alaka ya pit i hopaki keyu, amba k u b i t tahlepa tuklo foka ho asha hatuk okvt, pen-ushi ash o alhtot nvt-isht-hokli nvti alota ka halv-lit isht ia tok.

9. Atuk osh alaka ya okla ona makinli ho, tobaksi luak vt yvma asha ma, nvti yvma itotonla ma, pvska ak kia itonla na okla pisa tok.

10. Chisvs ash ot, Nvti himonasi hvsh hokli tuk vt, ishit ho minti, im achi tok.

11. Saimon Pita yvt pit chukowvt nvt-isht-hokli ash nvti hochito tahlepa achvfa pokoli tahlapi cha, akocha tuchina aienvt alota ho halvllit, alaka isht ona tok: laua hokvto yakohmi nana kia nvt-isht-hokli ash ot ik okpulo ki tok.

12. Chisvs ash ot, Mintit ant oh impa, im achi tok. Mihma yummvt Chitokaka mak atuk a ithana hatuk osh, nan-ithvna vhleha hv achvfa kia i ponaklot, Kvta chia ho? achi kia iksho ki tok.

13. Mihma Chisvs ash ot onvt, pvska ya ishi cha, i hopela mvt, nvti ma yvmihchi akinli tok.

14. Chisvs vt illi tuk osh falamvt tani ha yvt, ilvppv ont atuchina mak o nan im ai ithvna vhleha ha im ile haiakvchi tok.

15. Atuk o impvt okla issa ma, Chisvs ash ot Saimon Pita ya, Saimon, Chonas ushi chia hv is so hullo kv, ilvpa puta ka chim i shahli cho? im achi ma, Ahlishke, Chitokaka ma! chi hullo li hoka chishno vt ish ithanvshke, im achi ma, An chukfvlhpoba ushi puta ka pehlichit ish ipihintashke, im achi tok.

16. Anonti atukla ma, Saimon, Chonas ushi chia hv is sa hullo cho? im achi ma, Ahlishke, Chitokaka ma! chi hullo li hoka, chishno vt ish ithanvshke, im achi tok: mihma, An chukfvlhpoba puta ka pehlichit ish ipihintashke, im achi tok.

17. Ont atuchina ma, Saimon, Chonas ushi chia hv is sa

hullo cho? im achi ma; ont atuchina mak o, Is sa hullo cho? im achi hatuk o, Pita yash osh nukhaklot taha tok. Yohmi mvt, Chitokaka ma! nan okluha ka ish ithanvshke, chi hullo li hoka chishno vt ish ithanvshke, im achi tok. Mihma Chisvs vt, An chukfulhpoba puta ka pehlichit ish ipihintashke, im achi tok.

18. Ahlishke, ahli mak o chim achi lishke, Chi himita mvto chishno inlit il ai vskofachehit, chishno ish ahni hosh kanima ish aya beka tok: yohmi kia ont a chi sipokni hayokmvto, chibbak a ish wakeli na inla hosh chi vskofachechi cha, kanima ish aiahni keyu kia, chisht aya hi oke, im achi tok.

19. Ai illi kaniohmi ho Chihowa ha isht a holitoblichia he ak o, anoli hosh ilvppa anumpuli tok. Mihmvt ilvppa anumpuli mvt, Is siakaiyashke, im achi tok.

20. Mihma Pita yvt filemvt, nan-ithvna achvfa Chisvs vt holitobli chatuk opiaka impvt maya ka ikkishi ha pit vtayvt ashvt, Chitokaka ma! chishit inla ibbak chi fohki kvto, kaitima kak oh cho? achi tok ash osh awant aya na pisa tok.

21 Pita yvt yvmma pisa mvt, Chisvs ash o, Chitokaka ma! yohmikmvno hatak ilvppak amo katiohma chi cho? im achi tok.

22. Chisvs ash osh, Vno ak osh ahni li hokma, ilvppak okvt ahanta tuk o vla la he, yvmmvt nanta isht chi ahalaia cho? Is siakaiyashke, im achi tok.

23. Yohmi ma itibapishi vhleha kv, nan-ithvna yvmmvt ik illo ka he yatuk a, it im anolit maya tok; yohmi kia Chisvs vt, Yvmmvt ik illo ka hi a i miha tok keyu; amba vno ahni li hokma, ahanta tuk o vla la he, yvmmvt nanta isht chi ahalaia cho? achi tok.

24. Nan-ithvna ilvppak a tok mak osh ilvppa puta ka atokoli cha, anonti yakohmi ka holissochi tok: yohmi ka yvmmvt nana atokolit anoli ka ai ahli ka il ithaiyanvshke.

25. Micha nana inla Chisvs vt a kaniohmi tok a lauvt asha, yvmmak osh momvt holisso hokma, holihiso kv yakni ak oh kia holisso kv ai itola hi vt iksho ka hinla, vm ahobvshke. Amen.



# CHISUS KLAIST

IM APOSTEL VHLEHA HUT NANA A KANIOHMI TOK.

## CHAPTA I.

Klaist vt illi ha ya tok a isht annoa kaniohmi kv̄t vlbitvt annoa, 1. 9  
Yvmmvt vba ia isht annoa. 15 Chutvs vltoba hō achvfa ka ato-  
kola hi a, Pita yvt isht anumpuli.

1, 2. TIAFILUS ma! Chisvs vt vmmōna, nana puta  
a kaniohmit nan im avrchit isht mahaya tok osh, vba anum-  
peshi vhleha hā ilapo akinli atokoli tok vt, nana vllhpisa ka  
Shilombish Holitopa pulla hō isht ai ihima tok osh, vba ia  
tok nitak fena ka, holisso tikba kash o, isht ai ikbi li tok.

3. Yvmmak okvt ilbvsha hayvt okchaya kv̄t, nana ahli  
isht ikhaiyana he lava ka, yvmmak ash o ai isht im ile hai-  
akvchi cha, nana kv̄t Chihowa apelhlichika ya, pit ai ahalaia  
puta ka isht anumpohonli ka, okla pisa na nitak pokoli ushta  
tok.

4. Micha itahobit taiyahli mv̄t, Chelusalem a okla issvt ik  
aiyo hosh; amba Iki vt nana miha tok, Yvmma hvs sv̄m  
a haklo tuk vt, pit hoyot hvsh chieyashke; achit im apesa  
mv̄t,

5. Chan ak okvto oka yo isht baptismochi mv̄hli tok;  
amba hvchishno vto himmak pila hā, nitak kanohmi keyuk-  
ma, Shilombish Holitopa yak o isht hvchi baptisma chī hoke;  
achi tok.

6. Yvmohmi na okla itahobvt chieya mv̄t, nan i ponaklot,  
Chitokaka ma, himak foka hokvno apelhlichika ya falamin-  
chit Israel a ish ema chī cho? achi tok.

7. Mihma, Nitak, micha avvmmi puta ka, Iki vt ilapo ib-  
bak akinli hō fohkit ieshi ka hvsh ithana vllhpesa keyu hoke.

8. Amba Shilombish Holitopa yvt ayvt hvchim vla ha mvno, nana ai ahlika ya, hvsh esha he : yvmohmikmvt Chelusalem, micha Chutia moma, micha Samelia, micha yakni afolota ont ai vhli fena aiena ka, atokolit a na si anoli hvchia ha he mak oke ; im achi tok.

9. Mihma nana yakohmi ka anumpulit ont in taiyaha ma, oklat pisa na, vba ishtia ma, hoshonti hv t i holhponayo ha ant im a luhmit ishi tok.

10. Mihma vba ia na, pit aiokchifelit shutik pilla ka pit hopokoyot hiel ma, hatak tuklot nafohka tohbi fohka hosh i bilikasi hiel tok.

11. Mihmvt yvmmak ash osh, Kalili hatak hvchia hv, nanta katihmi ho shutik pilla ka pit hopokoyot hvsh hiel cho ? Chisvs ilvppak ash fehna akinli kv hvchim eshit vba ishtia ka, kaniohmit vba ia ho hvsh pisa tuk a yvmmak inli ho chohmit ayvt vla hi oke ; achi tok.

12. Yvmohmi ma, nvni chaha Alifit hohchifo ho, yvmmak okvt Chelusalem a pit bilika nitak hullo anowa vllpesa ho asht falamvt Chelusalem a okla vla tok.

13. Micha okla ant chukowa mvt, vba potvllpo ya yvmmak o Pita, micha Chemis, micha Chan, mikmvt Antilu, Filip, micha Tamvs, Bahlolomu, micha Mahlu, Chemis, Alfivs ushi, mikmvt Saimon Selotis, micha Chutvs Chemis itibapishi aiena kv ai asha tuk o pit oiyat taha tok.

14. Ilvppak osh momvt ohoyo puta, micha Meli Chisvs ishki, micha itibapishi vhleha hatuk aiena ka ai itapehvt im anukfila ai achvft vba pit anumpulit, nana asilhha aiena kv ik isso hosh aiasha tok.

15. Atuk o nitak yvma foka ma ! nan ithvna vhleha hohchifo holhtina kv tahlepa achvfa cha pokoli tuklo foka hosh itvnavt chieya ho, Pita yvt iklvna wakayvt hikia cha,

16. Hatak itibapishi li vhleha ma ! Shilombish Holitopa yvt tikbanli, Lewi ash itakha ai isht Chutvs a isht anumpuli tok o, Chisvs okla ishi ka in tikba hika tuk a, ik kaniohmi kia holisso ilvppvt ai ahli tuk pulla hoke.

17. Yvmmak okvt hvv iba holhtiena cha, anonti nan isht vta ilvppa pit ahalaia ka ieshi hatuk,

18. Micha hatak ilvppvt yoshoba isht vlhtoba tuk a osapa yo ishit chumpa tuk; micha itihpelvt akivt, iklvna mitafana, iskuna puta kashot momvt kocha pit fohopa tok.

19. Yvmohmi ka Chelusalem okla aiasha kvv momvt akostininchi tuk; yohmi hatuk o osapa yvmvvt ilap im anumpa ya, Esiltama hohchifo, yvmvvt osapa issish achi hoke.

20. Micha ataloa holisso ha a holisso kvv, Yvmvvt ai ahanta yatuk a ik chukilissá, yohmikma hatak nana kia yvm-mak ash ik ai ahanto kashke; micha, Nana ai isht vttá yatuk a, inla yosh ishashke; achishke.

21, 22. Yvmohmi hoka, Chitokaka Chisvs vt pi takla vttvt aya, Chan a im a baptismo chash, vhlit mintit a hvvim eshi na vba ia nitak fehna ai vla ka, hatak yakohmi kvv pi apehvt, aya na bilia tok okvt, yvmvvt falamvt tani tuk a, atokowa pib ai anola chi kvv, achvvt vlhtoka pullashke; achi tok.

23. Mihma hatak tuklot, Chosef osh Basabvs hohchifo hosh, hohchifo apunta kvv Chvstvs o, anonti Mathlaivs aiena ho, okla hiohliehi tok.

24. Micha okla vba pit anumpuli mvt, Chitokaka hatak moma chukvsh a ithaiyana chia hokvt, tuklo ilvppa kanimampo kak o, ish atokoli hatuk okmvt ish otvninchi na,

25. Nan isht vttá ilvppa, micha vba anumpa isht vttá pit ahalaia aiena, yvmmak atuk o, Chvstvs vt ilap ai vttá ya ia chin cha, yoshoba cha issa tuk oka, ieshashke; okla achi tok.

26. Micha okla nashoeli bohli tok; mihma nashoeli ash ot Mathlaivs ak o onvtula na, yvmmak osh vbanumpeshi auah-chvfa kash iba holhtiena tok oke.

CHAPTER II.

Vbanumpeshi vhleha hvv Shilombish anukfohka fehna mvt, anumpa ilaiyuka anumpuli, 1. 14 Pita yvt vbanumpæ isht anumpuli.

1. ATUKO Pentekost nitak vt ont vlhpiesvt taha ma, momvt im anukfila ai achvvt mih achvfa yo chieya tok.



2. Yvmohmi ma ashalika mahli kvlo chinto chiyuhmit, vba ya fopa hosh mintit vla cha, aboha anuka okla aiasha tuk ash ant alotolit kaiyanchi tok oke.

3, 4. Yvmohmi ma, isunlvsh chuhlahli kv luak o chiyuhmi hosh ant i haiaka, micha achvfaiyuka ant onvtoyula tok; yvmohmi na, moyumvt Shilombish Holitopa yvt isht anukfohkv alota ma, anumpa inla puta anumpula hi a, Shilombish vt apelahanchi na, okla anumpulit ishtia tok oke.

5. Yvmohmi ma Chelusalem a Chu vhleha, hatak hopoyuksa puta, oklushi moma shutik nuta ka aiasha ka a minti hosh, aiasha tok.

6. Mihma ilvppak ashot annovt takakanli ma, okla laua yvt ant itahoba cha, ilap im anumpa aiyuka yo, ai anumpulit maya na, hatak momvt haklo hatuk osh, okla anukhlakancha tok.

7. Micha momvt okla nukhlakancha mvt, okokke! ai ahni mvt, Ilvppa anumpulit maya kv momvt Kalili okla keyu ho?

8. Micha nanta katiohmi ho hatak moma kv il a toba tok pim anumpa akinli ho, e hahaklo cho?

9. Patia okla, micha Mit okla, micha Ilam okla, mikmvt Mesopotemia, micha Chutia, anonti Kapatosha micha Pontvs mikmvt Asia,

10. Fichia micha Pafilia Echip, mikmvt Libya pilla Sai-  
lini foka aiena aiasha puta, micha Chu vhleha, mikmvt ai  
ibvlhto puta, Lom mintit itvnowvt aya,

11. Klit okla, micha Alabia okla puta kashot, Chihowa i  
na fehna ka, pishno pim anumpa ho okla isht anumpuli na  
eho haiyakloshke; itim achit maya tok.

12. Micha okla momvt nukhlakancha mvt, ik ai akosti-  
nincho chohmi cha ilvppvt, Katiohma hinla hosh yakohmi  
ho? itim achit maya ma,

13. Anonti inla ka mvt isht yopulvt, Hatak yakohmi kv  
oka paki himona yo yvmmi hoka; achi tok.

14. Yohmi kia Pita yashot, auah chvfa kash ibafohkv  
hikia cha, im anumpa vba takalichit, Chutia hatak hvchia,

micha Chelusalem aiasha hvchia, hvsh moma kv̄t, ilvppa oh ithaiyana cha, v̄m anumpa ha hvsh haponaklashke.

15. Yakohmi kv̄t nan ishkot haksi ho keyu, chishno yokv̄to yohmi ho hvchim ahoba kia nitak hvshi isht v̄lhpisa ont atuchina hoka.

16. Amba ilvpp̄to hopaii Choel vt isht anumpo-honlit,

17. Nitak himmaka pilakma yakohma hi oke: Nipi puyuta ka v̄mi shilombish ma ai isht o fohohompli la hi oke: yohmikma hvch iso nakni v̄hleha, micha hvch iso tek puta kash ot v̄ba anumpa isht anumpulikma, anonti hatak hvchi himithoa puta kash ot nan isht ahoba pihisa he; yohmikma hatak hvchi sipokni puta kv̄t holhpokunna ma holhpokohuna hi oke.

18. Michā nitak yv̄mma fokakma, an tishu v̄hleha, micha ohoyō an tishu moyuma ka v̄mi shilombish a o fohohombli la he; yohmikma v̄banumpa isht anumpula hi oke.

19. Michā v̄ba shutik a nana fehna ka a haiakalah̄nchi lik-mvt, anonti aka yakni ma nan isht ahoba, issish, micha luak, anonti shobulli yobota aiena ya hi oke.

20. Chitokaka i nitak chinto holitopa kv̄t ik lo kisha ho, hvshi ash ot okhlili ho tobakma, hvshi ninak aya ash ot issish toba hi oke.

21. Michā yakohma hi oke, Kv̄na kia Chitokaka hohchifo ha pit hochihifokmvt okchaya he mak oke; Chihowa yvt ahanchishke: ahanchi tok mak oke.

22. Israel hatak hvchia hv̄t, anumpa yakohmi ka hvsh haiyaklashke; Chisvs Nasalet ai vtta, Chihowa yvt ai ahniechi hatak osh, hvch itintakla ahanta ma, yv̄mmak o Chihowa yvt isht ahullo, nana fehna, micha nan isht ahoba puyuta ka isht hvch itintakla ma, a yvmih̄nchi tuk a, hvchishno akinli kak kia hvsh ithainayvshke.

23. Yv̄mma Chihowa yvt nan tikbanli pit akostin̄nchi, micha ik kaniohmi kia yohma he ma im anukfila cha, issa tok pulla hatuk mak o, hvsh ishi cha, ibbak haksi yash isht iti taiyukhv̄na a takalichit hvsh bi tok.

24. Yv̄mma Chihowa yvt illi na-hotopa puta ka hotoffi

cha, tanichi tok: yummak oka yummvt a foka he vllhpesa keyu hatuk oka.

25. Lewi yvt yumma isht anumpuli mvt, Chitokaka yvt sa nashuka itikba ya hikia na, pit pihisa li chatuk. Ik sa kanvillo ka hi a, yummak okvt subbak isht impak imma ya hikia hoka:

26. Yohmi hatuk o, sa chukvsh vt na yukpa ma, anonti sa sunlvsh vt yukpa tok: yohmikma sa nipi ak kia nan ahni iksho hosh foha hi oke.

27. Umi shilombish a aiokpuloka ya ish a kancha he keyu hokvt, anonti chi Holitopa tuk ash kia ant toshbit ik taha, ish im ahna he keyu hoke.

28. Chishno yvt ai okchaya hina puta is sum otvnihi tok; chishno vt chi nashuka ya, isht yukpalit is si alotola hi oke; ahanchi tok.

29. Hatak il itibapishi vhleha ma! nukwaya ikshot hatak iki chinto Lewi atuk osh illi cha hollopi aiena tok o, im ahollopi yvt hvv itin takla ya hikia na himak a nitak fehna hatuk a, isht hvchim anumpohonli lashke.

30. Yomohmi ka hopaii atuk, micha Chihowa yvt, nipi okvto yumma isht atia ka yo, Klaist a ai ikbit yumma im ai asha holitopa tuk ash, ai o binila chi mak o, hilecha hi vt, anumpa kvllo isht ai im il apihisa tok a, ithaiyana tok oke.

31. Ilvppa tikbanli akostinichi hatuk osh, Klaist vt falamvt tana hi a isht anumpuli mvt, ilap imi shilombish a aiokpuloka ya ik im a kancha ma, anonti nipi yvt toshbit ik taho ki tok aiena ka, miha tok oke.

32. Chisvs ilvppa Chihowa yvt tanichi tuk o, yumma atokowa nan anoli pi bieka mak osh e hielishke.

33. Yohmi ka Chihowa im ibbak isht impak imma a binilit holitopa, micha Shilombish Holitopa im ihisa tuk ash, Iki ya im ai ihishi aiena hatuk makosh, ilvppa auet fohohombli na, himonasi ka mihmak o, hvsh pisa, micha hvsh hahakloshke.

34. Lewi yvt vba shutik a ona tok keyu hoka; yohmi kia ilapinli kvv, Chitokaka yvt an Chitokaka ya, Subbak isht impak imma ya ish binili na,



35. Chin twnvp vhleha ha chiyi ai o hikia ikbi lashke ; im achi tok, ahanchi tok.

36. Yvmohmi hoka, Islael okla moma kv̄t, Chisvs iti itai-yukhvna hvsh a takalichi chash fehna ka, Chihowa yvt yvm-mvt Chitokaka, micha Klaist aiena mak o, ikbi tok a, ithai-yana pullashke ; im achi tok.

37. Yohmi ma ilvppa okla haiyaklo mvt, chukvsh vt nuk-haklo fena mvt, Pita, micha vbanumpeshi inla aiena kash o, Hatak il itibapishi vhleha ma ! nantak o e katiohma chi cho ? im ahanchi tok oke.

38. Yvmohmi ma Pita yashot, Hvsh moma kv̄t ile kosti-ninchit, nan ai ashvchika puta isht kashofa chi ka, Chisvs Klaist hohchifo ha, im a hvchi baptismashke ; yohmikmvt Shilombish Holitopa holhpila ka hvsh isha he mak oke.

39. Anumpa hv̄t hvchishno, micha chim vlla puta aiena, micha auet hopaki pilla aiasha ka moma, peh laua kv̄t kaniohmi ho Chitokaka hvpin Chihowa yvt pit hoyā hi a, im aya hoka ; im ahanchi tok oke.

40. Michā anumpa inla mvt laiyawa ho, isht im anumpu-lit, anonti atohnohonchi mvt, Aivlhpesa iksho isht ai unchu-luli vhleha ilvppa hvsh ai ile mokofashke ; ahanchi tok oke.

41. Yvmohmi ma im anumpa ha na yukpvt ihishi tuk puta kv̄t baptismo tok ; yvmohmi na nitak yvmmak inli ka hatak tahlepa sipokni tuchina fokvt ibvlhkaha tok oke.

42. Yvmohmi cha vbanumpeshi vhleha im anumpa hash, micha iti hullo aiena, micha pvska boshullichi, mikmvt vba pit anumpuli aiena kv̄t kv̄llo fenhvt ahashwa tok.

43. Yvmohmi ma hatak moma ka nukshopa hv̄t onvtu-yula tok ; mihma nana fehna, micha nan isht ahoba laua aiena kv̄t vbanumpeshi vhleha hash isht a yvmohmi tok.

44. Yvmohmi ma na yimmi tuk vhleha hv̄t momvt ai it achvfa mvt, anonti nana puta ka ai i moma hosh ai asha tok.

45. Michā im osapa puta, vlpoyak aiena kash okla kam-pela cha, hatak mominchit hatak vt nana ho bvnna hatuk aiyuka ka, i hopela tok.

46. Michā im anukfila mvt ai achvvt, Tempel anukaka ya, nitak moma ai ahashwa, micha chuka taloha puta ma,

puska a boshullichit itvnowa aiena mvt, chukvsh ai ahlit na yukpvt im ilhpak ma vpvvt aiashvt,

47. Chihowa ya ai okpahanchi ma, okla moyuma kvv ahniechi tok. Yvmohmi ma okchaya he puta kano, Chitokaka yvt nitak moyuma ka vbanumpuli ikxa ya isht ibakanli tok oke.

### CHAPTER III.

Pita, Chan ita tuklo kvv hatak imomokpulo hlakofichi tok o isht anoa, 6.

1. **YOHMI** ma Pita, Chan ita tuklo kvv hvshi kanvlli isht vhpisa chakkali ho, vba pit ai anumpuli hvshi kanvlli hatuk o, tempel a itiachit ont chukowa tok.

2. Yvmohmi ma hatak vt imomokpulo yosh vttta tok o, yvma okla iti sholit, tempel a, okla ont a chukowa ka, nanasi kia im asilhha chi ho, nitak uha tempel okhissa, yvmvvt hohchifo mvt aiukli achi ho, ont okla bohuli beka tok o;

3. Yvmmak ashot, Pita, micha Chan ita tuklo kvv tempel a pit chukovvt okla chi ho, pisa mvt nanasi kia asilhha tok.

4. Mihma Pita yvt Chan ash awant yvmmak ash aiokchifelit pihisa mvt, Auet pi pesa, achi tok.

5. Yohmi ma yvmmak ashot nana ho im a habena chi ka, im ahoba mvt im atia tok.

6. Mihma Pita yashot, Tvli holisso, micha tvli holisso lakna aiena hokvto ik svv ikshoshke: amba nana ho ishi li kvto chima lishke: Chisvs Klaist Nasalet ai vttta hohchifo pulla ka, wakaya cha nowa, achi tok.

7. Mihmvt ibbak im ishtimpak imma ya halvlli cha, wakeli tok: mihma ashalika iyi, micha iyi imoksak foni puta aiena kash ot hlampkot toba tok.

8. Mihma yvmmak ash ot balaklit tanit hikia cha, nowa tok: mihmvt nohovvt, anonti mullit, Chihowa ma pit aiokpahanchit, yvmmak ash awant Tempel a ont chukowa tok.

9. Mihma okla momvt yummvt noh<sub>o</sub>wa, micha Chihowa pit aiokpahanchi aiena ka, piesa tok.

10. Mihmvt yummak osh na habena chi hosh tempel okhissa aiukli a asha beka tuk a, okla ithana tok: nana kv<sub>t</sub> ai i yakohmi tuk a, okla okokko! ahnit anukhlakanchvt kvnia tok.

11. Micha hatak imomokpulo hlakofi tuk ash ot Pita, micha Chan ita tuklo ka halanli ma, okla moma kashot okokko! ahni fehvt, o yihleptv Solomon im apishia achi ho nutaka ya, ont ai itahoba tok.

12. Yvmohmi na Pita yvt pihisa mvt, okla hash im anumpulit, Islael hatak hvchia hvt, nanta katihmi ho ilvp-pa isht hvchi anukhlakancha cho? Micha nanta katihmi ho pishno nan isht a pim ahlika akinli hokmā, keyukmvt pi achukma hokmā, nana tuk osh hatak ilvppa e nowvchi tuk o chiyuhmit aiokchifeli fenvt hvsh pi pihisa cho?

13. Eblaham micha Aisak, mikmvt Chekob in Chihowa, micha hvp iki vhleha in Chihowa yvt Ushi Chisvs a holitobli tok; yummak oka Pailat vt ant ik iá, im ahni vllhpiesa tuk a hvchishno vt itikba hielit kanchit ibbak hvsh fohki tok oke.

14. Micha Holitopa, mikmvt Aiahli aiena tuk ash hvsh kanchi cha, hatak vbi yak osh a hvchim vllhpiesa chi kv<sub>t</sub>, hvsh asihihla tok.

15. Micha Aiokchaya i miko ya hvsh bi tok o, yummak ash illi tuk a, Chihowa yvt tanichi tok o; yvmma atokowa anoli vhleha pia mak oke.

16. Yvmma hohchifo, hohchifo yvmma a yimmi pulla hosh hatak ilvppa hlampkochi tuk o, hvsh pisvt hvsh ithaiyanvshke: ahli, yvmma ai i yimmika pulla hosh haknip achukma aiahli ilvppa, hvsh moma hvchi tikba ya a im ataiyahli hoke.

17. Yohmi ka itibapishili vhleha ma! na hvchik ithaiyano kak osh hvsh yvmohmi tok; micha hatak hvchi pehlichu vhleha ak kia yohini akinli tuk a, himak a ithaiyana lishke.

18. Yohmi kia Klaist vt ilbvsha he a, Chihowa yvt tikba



ma i hopaii puta itih ha, nana yvmma puta ka isht anohonli tuk vt, yvmihchit ai ahlichit tok oke.

19. Yvmohmi hoka ile kostininchit im anukfila inla hvchi anukfokkashke; yvmohmi na nitak hochukma Chitokaka itikba a mihinti kv̄t ahanlakma, nan hvsh. ai ashvchika puta kv̄t hvchi kashofa hi oke.

20. Yvmohmikma tikba kash isht hvchim anumpa tok Chisvs Klaist a auet chvfficha hi oke.

21. Yvmmak oka v̄ba shutik vt ieshi pulla na, nana okluha Chihowa yvt nitak tikba pilla mihinti ka, i hopaii hochukma puta itih ha isht anumpohonli tok vt, ont ai ahla he v̄lhpiesa hoke.

22. Moses okvt hatak pin tikba v̄hleha ha, Chin Chitokaka Chihowa yvt hvsh itibapishi hatuk a hopaii, vno chohmi ka ikbit hvchi hilecha he: yvmmak o nan okluha nana ho hvchim ahanchikma, hvsh haiyakla hi oke.

23. Yohmikma, yakohma hi oke: kv̄na hosh Hopaii yvmma i haponakla he keyukmvt, okla ai ibafohka tuk vt ai okpulo kv̄t kv̄nia hi oke; im ahanchi mv̄hli tok.

24. Ahli, micha hopaii moma, Samuel ai v̄hlit minti, micha ola takla ha asht isht auehinchit anumponli kv̄t momvt, nitak yakohma hi oka, tikbanlit anoli akinli tok.

25. Hvchishno vt, hopaii v̄hleha, micha Chihowa yvt hvpin tikba v̄hleha ha, nan it im apesvt Eblaham a, chishno isht chi ai unchululi ho, oklushi puta yakni paknaka aiasha kv̄t ai isht ilayukpa hi oke; im ahanchi tok, anumpa ha ushi hvchia hoke.

26. Chihowa yvt ushi Chisvs ikbit hilechi mvt, hvchishno ak o mominchit nan im ai ashvchika ya ai isht filvmmichit a chi yukpala chi ka, tikbanli auet chvffibinchi tok oke; achi tok oke.

#### CHAPTA IV.

Pita, Chan ita tuklo kv̄t aboha kv̄llo v̄lhpitta tok, 1. 8 Pita yvt nukwaya iksho tok. 18 V̄banumpeshi v̄lheha hv̄t anumpa kv̄llo im v̄lhpisa tok.

1, 2. MICHA okla ha im anumpulit ahashwa ma, na holitompa ish vtta vhleha, micha tempel atoni, mikmvt Satusi vhleha aiena kv̄t, yvmmvt hatak illi puta tana hi oka, Chisvs atuk mak o okla ha nan ikhvnanchi, micha isht anumpohonli kak o, ik im vlhpieso hatuk osh, ant i kocha tok.

3. Micha okla ibbak isht ieshit, aboha kv̄llo apitta na onna tok, opia hosi tok oka.

4. Yohmi kia anumpa ha hahaklo tuk vt, laua hosh yimmi tok; yvmohmi ma hatak holhtina kv̄t tahlepa sipokni tahlapi foka tok.

5. Ont onna ma yakohmi tok; Okla i pehlichika vhleha, micha hatak hochitoka vhleha, micha na holissochi vhleha,

6. Mikmvt Annas, na holitompa isht asha pehlichi, micha Kaiavs, mikmvt Chan, micha Aliksanta, micha na holitompa isht asha pehlichi i kanomi vhleha moma aienvt, Cheluselem a ai itahoba tok.

7. Micha yvmmak ash o ai iklv̄na hiohlechi mvt, Kv̄ta hosh nan apesa tuk o, keyukmvt nanta hohchifo ho ilvppa isht hv̄sh ai yakohmi tuk oh cho? achit ponaklo tok.

8. Yohmi ma Pita vt Shilombish Holitopa isht anukfohka fehna mvt, Okla pehlichi vhleha micha Israel i hochitoka vhleha hv̄chia ma!

9. Hatak iksitopo vt nan isht il ayukpa yvt im vlhtaha tuk a, kaniohmi ho isht a hlakofi tuk a, himak nitak a pishno ak o pi ponaklo hatuk oka,

10. Hv̄chishno vt hv̄sh moma, micha Israel okla moma kv̄t hv̄sh ithaiyanashke; Chisvs Klaist Nasalet ai vtta hohchifo pulla, yvmma iti itaiyukhv̄na hv̄sh a takalichi tok o illi tuk a, Chihowa yvt tanichi tok: yvmmak fehna kak o, hatak ilvppvt isht a hlakofi cha hv̄chi tikba ya, yak hikia hoke.

11. Tv̄li ilvppak o, chuk-ikbi vhleha hv̄chia hv̄t, ik aho-balot hv̄sh kanchi tok mak o, yvmmak ash ot chukbi ka nutak intola fehna toba hoke.

12. Micha ai okchaya mvt inla kia iiksho: shutik nutaka ya hohchifo inla ma hatak puta ka auet ai ima tok o, mihi yo il ai okchaya he vlhpesa kv̄t iksho hoka; im ahanchi tok.

13. Yohmi ma Pita, micha Chan ita tuklo kvt nukwaya iksho hō okla pihisa, micha yvmmvt hatak holisso imponna keyu, micha nan ik ithano aiena yatuk a, akostininchi mvt, okokko! okla aiahni tok; micha yvmmvt Chisvs a apehvt aya tuk a, okla im akostininehi tok.

14. Micha hlakofi tuk hatak ashot ibafokvt hikia na, okla pisa hatuk osh, yvmma okla nan isht a miha he keyu tok.

15. Amba ai itnaha ka a kohcha chi ka, okla im apesa ha yokvto, ilap bika it im anumpulit mayvt,

16. Hatak ilvppa nanta kō eho katimihcha chi hō? na fehna ithana hinla mak o, yvmma ai isht yvmohmi mvhli tuk a, Chelusalem ai asha kvt momvt akostininchi hoka; anonti pishno vt ik ahlo, e miha he keyushke.

17. Amba okla ha ibai a chukowvt i shahlit isht ik aiyo ka he a, i nokowa fehvt, himmak a pilla ma, hatak nana kia hohchifo ilvppa isht ik im anumpulo ka hi a, iloh im apesashke; ahanchi tok.

18. Mihmvt okla pit i howa cha, Chisvs hohchifo ha isht ik anumpulo kvmohmikmvt, anonti nan im abvchit ik ahashwo ka chi hō, im apesa tok.

19. Yohmi kia Pita, micha Chan ita tuklo kash ot, afalaminchi mvt, Hvchishno ak o a hvchi haponaklo kvt, Chihowa ya, i shahlichei kak okmā, nanta kosh Chihowa itikba ya ai vllpiesa hō anukfillit ho pesá.

20. Nana ka e pisa tuk, micha e hahaklo tuk aiena kvt, isht kil anumpulo ka he keyu hoka; im achi tok.

21. Yvmohmi ma okla hatuk pulla mak o, kanimihchit a fvmma hinla kvt, ik akostinincho hatuk osh, achakalit nan i mihvt tahli mvt, ant ik ayá, okla im ahni tok; nana kvt a yvmohmi tuk a, hatak moma kvt, Chihowa ya pit isht holi-tobli hatuk o.

22. Hatak vt hopahki kvt afvmmi pokoli ushta ka atampa hō na fehna nahlakofichi ilvppvt ai i yvmohmi hatuk oka.

23. Ant ik ayá, im ahni mvno, ivt ilap ai itapeha ai asha kash itonachi tok; micha ná holitompaishť vtta vhleha, hohchitoka aiena kvt nana im achi tuk ash mominehit anoli tok.

24. Mihma yvmma okla haklo mvt, im anukfila ai achvvt,



Chihowa ya okla pit im anumpuli mvt, Chitokaka ma! chishno akosh Chihowa chia hosh, vba shutik, micha yakni, mikmvt okhvt, micha nana moma yakohmi aiasha ka ikbi tok chia hvt;

25. Lewi chim vlla itih ha isht ish ai anumpuli mvt, Nanta katihmi ho okla nan ik ithano yvt nokowa ma, anonti okla hvt nana tok keyu ka anukfillit ai asha tok oh cho?

26. Yakni miko vhleha hvt hiel ma, yohmi na pehlich vhleha hvt Chitokaka, micha i Klaist aiena ka i sanalit itahomba tok, ish achi tok.

27, 28. Ahli mvhlishe, chiso holitopa Chisvs, yvmmak o chishno vt ish il a hvmmichi tuk ash, Helot vt Pashis Pailat a ita tuklot, okla nan ik ithano vhleha, micha Isael okla aiena ka itapehvt i sanalit nana hosh kanihoma hi a, chibbak, micha chim anukfila aiena kvt, tikbanlit aiahni tok a, yvmihcha chi mak osh, okla itahohomba tok oke.

29, 30. Yvmohmi ka himonasi a, Chitokaka yvt okla im anumpa palvmmi a ish ithaiyanashke, micha hlakoficha chi kvt, chibbak a auet ish wihinli; micha nan isht ahoba puta, anonti na fehna puta aiena kvt chiso holitopa Chisvs hohchifo pulla ka isht a yvmohmi na, chin tishu vhleha hvt nukwaya iksho hosh chim anumpa ha isht anumpohonla chi ka auet ish im aiahnashke; achi tok.

31. Yvmohmit vba pit anumpulit okla in taiyaha ma, itv nahvt okla a chieya tuk ash winakahanchi tok: yohmi ma momvt Shilombish Holitopa yvt anukfohkv kvnia mvt, nukwaya iksho hosh Chihowa im anumpa ha okla isht anumpohonli tok oke.

32. Okla laua na yimmi tuk vhleha hashot chukvsh achvfa mvt, Shilombish mvt achvfa hosh ai asha tok; micha achvona kia nana im aiasha kvt kanihmi ka ilvppa vno vmmi fena, achi tok keyu; amba nana moma ai i moma hosh aiasha tok.

33. Ubanumpeshi vhleha hash ot nan ahlika chinto ka il aieshi hosh, Chitokaka Chisvs vt tani tok a atokowa okla anohonli tok: yvmohmi ma ayukpa chinto kvt mominchit onvtoyula tok.

34. Micha achvona kia nana kv̄t ik im iksho mvt ibafoka tok keyu; amba osapa, micha chuka kia in talohmaya aiyu-kali atuk vt, kampila cha, nana hosh nana kanchi ka it vlhtoba tuk puta ka, okla isht ai vla tok.

35. Micha yvmmak ash vbanumpeshi vhleha iyi ituma ya, ant ashachi tok; yohmi na hatak vt nana ka banna ka aiyu-kali tuk a isht i holhpila tok oke.

36. Yohmi ma Choses atuk o, vbanumpeshi vhleha hvt Banabas hochifo tok, yvmvt toshowakmvt Nana im abvchi ushi achi hoke, Lefait hatak Saipivs yakni vtta vt,

37. Osapa in talaia tuk osh, kanchi cha, teli holisso a isht vla cha, vbanumpeshi vhleha iyi ituma ya, ant ashachi tok oke.

## CHAPTA V.

Ananaivs, Safaila itatuklo kv̄t, Pita yvt nan i miha ma, illit aka kaha,

1. 12 Vbanumpeshi vhleha hvt na fehna puta yvmihinchī tok.

1. YOHMI kia hatak achvfa Ananaivs hohchifo hosh, tekchi Safaila itatuklot, osapa kanchi,

2. Micha isht vlhtoba tuk ash kashvblit ishi tok; tekchi ak kia im akostininchī ho; micha a kashampa ho isht vla cha, vbanumpeshi vhleha iyi ituma ant bohli tok.

3. Yohmi ma Pita yashot, Ananaivs, nanta katiohmi ho Shilombish Holitopa ya ish i holabi cha, osapa isht vlhtoba tuk a kashvblit ish isha chi ka, Setan vt chi chukvsh a anukfohki tok oh cho?

4. Talaya moma mvt, chishno ak o chimmi ha tok keyu? micha yvmvt kv̄nia ha ya, chishno chibbak o foka tuk keyu? nanta katiohmi ho, ilvppa chi chukvsh anukaka isht chim anukfiela tuk oh cho? (Hatak o)ish i holabi tuk keyu, amba Chihowa ak atuk oke; achi tok.

5. Yvmohmi ma, Ananaivs ashot anumpa ilvppa hahaklo mvt, aka itulvt fiopissa tok; yohmi ma na yakohmi ka haklo kv̄t momvt nukhlakancha fehna tok.

6. Mihma hatak himita vhleha yosh wakayvt, nan abo-nullit isht kohecha cha, ont okla holpi tok.

7. Mihma yummak atuk a hopaki kv̄t hvshi kanv̄lli isht v̄lhpisa tuchina foka hō, tekchi vt nana kv̄t yvmohmi tuk a, ik akostinincho hosh ant chukowa tok.

8. Mihma Pita yvt im anumpuli mvt, Yakohmi hō osapā ya hvsh kanchi tuk okmá, nanakmvt, is sv̄m anolashke; achi tok, mihma, Yau, yummak okvno; achi tok.

9. Mihma Pita yashot, Katiohmi hō Chitokaka imi Shilombish a imoma ka hvsh pisa ch̄i kv̄t, hvchim anukfila hv̄t ai achvfa tuk oh cho? Ch̄i hatak a hohpi tuk, micha chishno ma isht chi kohcha ch̄i v̄hleha iyi vt okhissá ya asha ka, pisá; im achi tok.

10. Yohmi ma mih makinli hō yummak ash ot iyi ituma ya ont itula mvt fiopissa tok; mihma hatak himita v̄hleha yash ot ant abeha cha, yvmvm̄t illi tuk o pisa mvt, ishit kohcha cha, i hatak ont apotulit hohpi tok.

11. Mihma v̄banumpuli iksa yvt moma, micha kaniohmi hosh na yakohmi ka h̄aklo tuk vt momvt nukshopa fena tok.

12. Yvmohmi ma v̄banumpeshi v̄hleha ibbak a nan isht ahoba, micha na fehna aiena laua kv̄t okla itintakla ya isht a yvmohmi tok. Mihma momvt im anukfila hv̄t ai achvfv̄t Solomon im apishia nutaka chieya tok.

13. Mihma inla hokvto nukwia kv̄t hatak achvfa kia ik ibafohko ki tok; yohmi kia okla hokvto yv̄mma ahn̄inchi tok.

14. Mihma na yimmi v̄hleha hatak nakni, micha ohoyo puta aiena kv̄t, laua hosh Chitokaka ya ai ibv̄ll̄kaha kv̄t i shahlit ia tok.

15. Yohmi hatuk o Pita yvt ayvt ont iakma shilombish ak illa kia kaniohmi ka pit o hoshontikacha hi a, abeka puta ka isht kohchvt hina puta isht onvt topa, micha topushi aiena paknaka ont okla o kahpulli tok.

16. Mihma auct abilika tv̄maha talohmayvt fullota ka asht minti kv̄t laua hosh abeka puta, micha na shilombish okpulo puta isht issikkopa v̄hleha hatuk aiena isht ayvt, Cheluselem a ai v̄la tok; mihma momvt hlakofit taiyaha tok.

17. Yohmi ma na holitompa isht asha pehlich̄i, micha apeha tuk vt, (yvmvm̄t Satusi iksa yatuk osh,) momvt wakaya mvt, anukhobela fehna tok.



18. Mihmvt vbanumpeshi vhleha ha, okla ibbak isht ieshi cha, okla moma im aboha kvlllo y<sub>o</sub> pit apitta tok.

19. Yohmi tuk kia Chitokaka im enchil vt ninak a aboha kvlllo okhissa ya ant tiwit tahli cha, pehlichit kohcha mvt,

20. Oh ia cha, ai okchaya ilvppa isht anumpa ha mom-inchit tempel anukaka ya ont hielit okla ha isht hvsh im anumpohonlashke; achi tok.

21. Mihma yvmma okla haklo mvt, onnahinli fehna tempel a ont abeha cha, nan ithvnanchit ahashwa tok. Yohmi kia na holitompa isht asha pehlichit vt apeha tuk ash aienvt ai vla mvt, nan apesa vhleha, micha Islael okla i hochitoka moma i howvt itahobi mvt, yvmmak ash isht vla chi ho, aboha kvlllo a pit tihleli tok.

22. Yohmi tuk kia nan vlhtoka vhleha hash ot ai vla cha, aboha kvlllo anukaka ya, yvmmak ash ant ik a peso mvt okla falamvt ont anolit,

23. Aboha kvlllo yokvto vhlkama achukma bano, yohmi ma apistikeli yvt okhissa puta itikba kocha ya hiel ho, ont e pisa ho mvhli tuk, yohmi kia e tiwi mvt, hatak nana kia anukaka ya asha na ke peso kano; ahanchi tok.

24. Yvmohmi ma na holitopa isht asha pehlichit i shahli micha tempel atoni, mikmvt na holitompa isht asha pehlichit vhleha aiena kv, na yakohmi ka haklo mvt, nana ak o ilvppvt ont ai vlhpiesa hinla ka, ik ai akostininchot okla aia-sha tok.

25. Yohmi ma achvfa kv ayvt okla hash ant im anohonli kv, Yakeh! hatak aboha kvlllo pit hvsh apitta tuk ash o tempel anukaka ya hielit, okla ha nan im abahanchishke, achi tok.

26. Yohmi ma nan atoni ash ot, nan vlhtoka vhleha hash itypeha cha ia mvt, okla ha i nukshopa, yvmmak keyukmvt, tvli okla isht boa hinla hatuk osh, yvmmak ash o nan ik kan-ihecho hosh ont pehlichit vla tok.

27. Ont okla pehlichit vla mvt, nan apesa vhleha itikba ya hiohlichit tok: yohmi ma na holitompa isht asha pehlichit yvt im a ponaklot,

28. Hohchifo ilvppa isht im avrchit hvchik ahanto ka hi

a, kvlochi fehvt okla e chim apesa tuk keyu ? Yohmi kash o Cheluselem a hvchim anumpa isht ai alotolit hvsh kaiyanchi ; yohmi mvt hatak ilvppa im issish a pishno ak o isht pi onochi hvchi bvvrvshke ; ahanchi tok.

29. Yohmi ma, Pita, micha vbanumpa isht vta vhleha inla aiena kashot afalaminch i mvt, Chihowa yak o il im antia kvhatak a, il i shahlich a he tuk oke.

30. Hvpin tikba puta in Chihowa yvt, Chisvs yvmma iti a takalichit hvsh bi tuk a, tanichi tok.

31. Yvmmak o Miko, micha Nan okchalinch i aiena cha, ilekostininch i Israel a anukfohki, micha ai ashvchika aiena ma kashofa chi ka, Chihowa yvt ilap ibbak ishtimpak imma ya isht holitobli tok oke.

32. Yvmohmi ka pishno ak osh nan ilvppa puta ka isht im a atokovt anoli pia ; yohmikma Shilombish Holitopa, yvmma Chihowa yvt im antia vhleha ha ima tok a, yohmi akinli hoke ; achi tok.

33. Yvmma haklo mvt, okla anukhobela fehna mvt, vba chi kvh, isht anumpulit maya tok.

34. Mihma achvvt Falisi hatak, Kameliel hohchifo, nan vlvhvisa ikhananch i, okla momvt i holitopa cha tuk o, nan apesa vhleha itin takla ya hikia mvt, vbanumpeshi vhleha hash, chekosi takla ka kocha pit ashacha chi ka, miha tok.

35. Yvmohmi mvt, Israel okla hvchia hvhatak ilvppa imma yo, nana kanihcha chi ka, hvsh aiahni hokvto, ahah ! isht hvsh il aiahnashke.

36. Himak nitak takla ka, Hlutas vt ilap ak osh hatak fehna mak o, mihvt ahanta na yvmma hatak holhtina kvh tahlepa ushta fokv ib a kaha tok o ; yvmmak ash o vbi ma, im antia vhleha hatuk ash ot momvt, ita fimimpvt, ont aiokpulokv taha tok.

37. Chutvs Kalili hatak osh hatak ilvppak ash achakv, okla holhtinvt maya nitak ash ahanta cha, okla lava ka isht il akanvlich i tok osh, yvmmak ash kia illi tok : yohmi ma kanihmi hosh im antia tuk vt, momvt itatiapvt taha tok.

38. Yvmohmi hoka, Hatak ilvppa nan isht hvchik ahalaio ho, peh asht ik itvnowa ; chim ahanch i lishke Anumpa, mi-

cha, nan isht vtta aiena ilvppvt hatak atuk okma, ont aiok-pulokvt taha chi hoka.

39. Amba yumma Chihowa yak atukmvno, ai okpvnit hvsh kancha he keyushke. Yummak keyukmvt, Chihowa yak o itibi hosh hvsh ahashwa na hvchi ahayucha hinla hoke; im ahanchi tok.

40. Mihma, vlpesa okla im ahni tok. Micha vbanumpa isht vtta vhleha hash i howa cha, fummit ashachi mvt, Chisvs hohchifo ha okla isht ik anumpolo ka chi ka, im apesvt taiyahli cha, kvmompit tihleli tok.

41. Yohmi ma yumma hohchifo pulla ho na hofahya ka isht ile pisa he a, ont ai vlpiesa tuk vt, na yuhukpvt nan apesa vhleha itikba ya asht okla ia tok.

42. Micha nitak moma tempel anukaka, micha chuka taloha moma ka, nan im avchi, micha Chisvs Klaist isht anumpuli aiena kv okla ik isso tok.

## CHAPTA VI.

Vbanumpeshi vhleha hvt hatak ilvsha ithana, micha anumpa ha isht anumpuli aiena, 1. 5 Hatak vlhtoka untuklot vlhtoka tok.

1. **NITAK** yummak foka, nan ithvna vhleha hvt laua kv isht i shaht taha ma, im ohoyo vlhtakla puta ka nitak moma nana iti hopela ya ahaksichi beka hatuk o, Klik okla hvt Heblu okla ha nanumachit aiasha tok.

2. Yohmi ma auhtuklo kashot nan ithvna vhleha laua kash itahobi cha, Chihowa im anumpa ha il issa cha, ai im-pa yak o isht il ai ashwa he, vlpesa keyushke.

3. Yohmi hoka il itibapishi vhleha ma! hvsh ai itvpeha ya hatak untuklo annoa achukma chatuk, nan imponna, micha Shilombish Holitopa anukfohka aiena ho hvsh atokoli na, yummak o nan ai isht vtta ilvppa e hiohlehashke.

4. Amba pishno ak okvto, vba pit anumpuli, micha anumpa isht vtta aiena kak o, kil isso kvmohma chi hoke; achi tok.

5. Yohmi ma okla lava kash ot momvt anumpa ha aiok-



panchi tok. Yohmi mvt Istefin hatak na yimmi, micha Shilombish Holitopa yvt anukfohka fehna, micha Filip, micha Pokolvs, mikmvt Naikena, micha Taimon, micha Paminvs, mikmvt Nikolis vbanumpa nukfohka Antiak ai vtta aiena ho, okla atokoli cha,

6. Ymma puta kash o vbanumpeshi vhleha itikba hiohlechi tok. Mihma okla vba pit anumpuli mvt, ibbak isht umbitepa tok.

7. Yohmi ma Chihowa im anumpa hvt isht i shahlit ia ma, Cheluselem a nan ithvna vhleha holhtina laua kvv i shahlit ishtia fehna tok; yohmi ma na holitompa isht asha lawa fena kvv ayimmika ya im antiat aiasha tok.

8. Mihma Istefin vt ayimmika, micha isht ai ahlika aiena kvv isht alota mvt, nan isht ahoba chinto, micha nafehna aiena ka, okla itin takla ya a yvmihinchi tok.

9. Yvmohmi ma sinakak Laibatin okla i sinakak achi ho, asha yatuk, micha Sailini okla, micha Aleksantia okla, mikmvt Silisia, micha Asia minti aiena kaniohmi kvv, Istefin a itim anumpulit hieli tok.

10. Yohmi kia chukvsh, micha ahopoyuksaka aiena ho isht ai anumpuli hatuk ash, okla nan isht a miha he keyu tok.

11. Yohmi mvt hatak lumvt tohno na, Yvmmak ashot Moses, micha Chihowa aiena ka ik ahobalot isht anumpohonli ka, e haklo kano; achi tok.

12. Mich a okla puta, mikmvt i hochitoka vhleha micha holissochi vhleha aiena kash okla ilhkoli hinch i na, okla i kohcha cha yvmmak ash ishi mvt, nan apesa vhleha ha isht im ona tok.

13. Mich a hatak nana aholvbi ya hiohlechi na, yvmmak ash ot, Hatak ilvppvt aholitopaka ilvppa, micha nan vlvhisa aiena ka, anumpa ik ahobalo isht mihachi kvv ik issosha.

14. Chisvs Nasalet ai vtta ilvppvt ilvppa okpva he, micha nan vlvhisa puta Moses vt hvv ima tok a inlvcha he, ilvppvt achi ho, okla e haklo kamo; achi tok.

15. Yvmohmi ma, itvnahvt maya kash ot momvt yvmmak

ash aiokchifeli fehnvt pisa ma, nashuka mvt enchil nashuka  
yo chiyuhmi na, pisa tok oke.

## CHAPTA VII.

Istefin a im asilhhvchi hatuk o isht il anumpuli.

1. YUMOHMI ma na holitompa isht asha pehlich  
ashot, Nana kv̄t yakohmi ho mvhli cho? achi tok.

2. Mihma yvmmak ashot, Hatak itibapishi li vhleha, mi-  
cha an tikba puta ma! hvsh haiyaklashke. Pin tikba Ebla-  
ham vt Chalan a, ont ik vtto kisha hosh, Mesopotemia ak o  
anta moma ma, Chihowa holitopa yvt ant i haiaka tok.

3. Mihmvt yvmmak ash o, Chi kanomi vhleha i filvmm̄t,  
chi yakni a a kohchvt ayvt, yakni chi pisachi la chi ka, ish  
lashke; im achi tok.

4. Mihma Kaltia okla i yakni ash a kohchvt minti cha,  
Kalan ak o ant ai ahanta tok. Atuk o iki vt illi ma, yvm-  
mak ash o a wihachit yakni ilvppa himonasi hvsh ai ahashwa  
ka, isht vla tok.

5. Ulla yvt ik im iksho kisha ma, ilap micha isht ai-un-  
chululi aiena ka, yvm̄mvt immi ha he mak o, ima hi okvt, i  
miha tok nana kia, a binila hi a peh iyi p̄tha a habli achvfa  
kia, ilap a ik emo ki tok.

6. Michā Chihowa yvt yakohmichit anumpuli tok: Yvm-  
ma isht ai unchululi vhleha hv̄t yakni inla ai itvnowa he;  
yohmikma okla yukachit ilbvshahanchi na, afvmmi tahlepa  
ushta he.

7. Yohmikma oklushi nana ho i yukvt ahashwa tukma,  
yvm̄ma na kanichi la hi oke; yohmi ha mvno, okla kocha  
wiha cha, ilvppa ant a si aiokpahancha hi oke; Chihowa  
yvt achi tok.

8. Mihmvt hakshup tv̄pa nan vlhpisa ka ima tok. Atuk  
o Eblaham vt Aisak a ikbi cha, nitak isht untuchina ma  
hakshup tvbli tok. Atuk o Aisak vt Chekob a ikbi tok.  
Chekob vt hatak p̄iki hochitoka auah tuklo ka ikbi tok.

9. Yohmi tuk o, hatak iki hochitoka yash ot Chosef a



nukkilli hatuk osh, nan isht chumpvt Echip a pit kanchi tok; yohmi kia Chihowa yvt awant anta tok.

10. Micha nan isht im a palvmmi puta ka mominchit ai isht kouchi cha, Echip miko Feleo a itikba ya aholitopa, micha nan imponna aienvt ahanta chi ka, ima tok; yohmi na yvmmak ashot Echip yakni, micha in chuka moma pehlich i ikbi tok.

11. Yvmohmi ma Echip yakni moma, micha Kenan aiena ka na hohehvfo, micha na palvmmi chinto aiena kvv onvtu-yula tok; yohmi ma hvpin tikba vhleha hashot nan ilimpa nana kia ik ahayucho ki tok.

12. Yohmi kia Echip a tanchi vt asha na Chekob vt haklo mvt, hvpin tikba vhleha ak o vmmona ka pit tihleli tok.

13. Atuk o ont atukla kak o, Chosef vt itibapishi vhleha ha im il anoli tok. Yohmi ma Chosef i kanomi vhleha hatuk vt Feleo a im annoa tok.

14. Yohmi ma Chosef vt iki Chekob, micha i kanomi vhleha moma kvv, hatak pokoli untuklo akucha tahlapi ho, pit hoyo hosh, pit chvffichi tok.

15. Yohmi na Chekob vt Echip a ona tok osh, ilap ash, micha hvpin tikba vhleha aienvt illi tok.

16. Yvmohmi na ishtivt Saikam a isht ona cha, Eblaham vt ahollopi Saikam iki, Ema ushi vhleha ha tvli holisso isht in chumpa tok a, ont fohki tok.

17. Yvmohmi kash o Chihowa yvt anumpa kvvlo Eblaham a nan isht ai im apihisa tok, nitak vt ai ona het mahaya ma, okla hashot Echip a a laua kvv i shaht isht mahaya na,

18. Miko inla Chosef a ithana keyu hosh hikia tok.

19. Yvmmak ash osh hvpi kanomi vhleha ha haksichi mvt, hvpin tikba vhleha hash o ilbvshachi, yvmohmi cha okchavvt ik mayo ka chi ka, im vllosi a isht kampila beka tok.

20. Yvmmak foka ma Moses vt vttta mvt, aiukli fehna, yvmohmi cha iki in chuka ya hvshi tuchina ho, a pishi tok.

21. Yvmohmi tuk o kocha kanchi ma, Feleo ushetik vt i cha, ilap ushi a chi ho hofantichi tok.

22. Yvmohmi ma, Moses vt Echip okla nan ai ithana



puta ka mominehit ithaiyana, yvmohmi mvt anumpa puta, micha na fehna puta aiena ka isht anta imponna tok.

23. Yvmohmi tok osh hopaki kvt afvmmi pokoli ushta ont vhlpiesa mvt, itibapishi Islael ushi vhleha ha nowt aya hi oka, chukvsh anukfoyuka tok.

24. Yvmohmi tok osh, achvvt nan vhlpesa keyu ho isht ilbvsha na pisa mvt, yvmmak ash apelvchi, yohmi cha, issik-kopa tuk a atobbit, Echip hatak ash vbi tok.

25. Yvmma ibbak ak o Chihowa yvt isht hlakoficha hi a, itibapishi vhleha hvt okla akostininchi hatuk a, im ahoba hatuk kia, okla ik akostinincho ki tok.

26. Yvmohmi tuk o nitak ont atukla ma itibi hosh ash-wa ma, yvmmak ashot ont i haiaka cha, itin nanaiyvcha chi hosh, Hatak, itibapishi hvchia hoke; na katihmi ho hvsh iti okpvni cho? ahanchi tok.

27. Yohmi kia in chuka panta hatak okpvni tuk ashot, Kvta hosh na pi pehlich, micha na pim apesa aiena ka chik-bi tuk o?

28. Pilashash Echip hatak ish bi tuk vt, is sa chomicha chi ho? achi mvt, naksi ka pit tobli tok.

29. Yohmi ma ilvppa ahanchi ka, Moses vt kvnia cha, hatak nowt aya yosh, Matian yakni ya ahanta hosh, yvm-mak o ushi tuklo ka ai ikbi tok.

30. Atuk o afvmmi pokoli ushta kvt ont taha ma, Chitokaka im enchil vt yakni haiaka nvnih chaha Saina ya bv-faha anuka luak libbi ho, ant im a haiaka tok.

31. Moses vt yvmma pisa mvt, na pisa kvt okokko! aiahni tok; micha akostinincha chi hosh bilika ona ma, Chitokaka im anumpa hvt im vla kvt,

32. Uno akosh chin tikba vhleha ya in Chihowa sia, Eblaham a in Chihowa, micha Aisak ma in Chihowa, micha Chekob a in Chihowa sia mak oke; ahanchi tok. Yohmi ma Moses vt wvnihinchi mvt, atokowvt pisa nukwia tok oke.

33. Yvmohmi ma Chitokaka ashot, Shulush a chihi ish a shuelashke; ish a hikia yvmvvt yakni holitopa hoka.

34. Um okla vhleha Echip ai ahashvvt ilbvsha ka pis-kvt pihisa li: micha okla yahaya ka hahaklo li chatuk

yvmohmi cha kocha weli la chi hosh aka minti lishke. Yohmi ka minti, chishno ak o himonasi a Echip a pit chi chvffichi lashke; im achi tok.

35. Moses ilvppa, okla shitilema cha, Kvta hosh na peh-  
lichí, micha nan apesa aiena ka chikbi tok o? ahanchi tok  
ash fena akinli ka, na pehlichí, micha na hlakofichi aiena  
ka, enchil bvfaha anuka ai i haiaka ka ibbak o, Chihowa yvt  
isht a pit chvffihinechi tok.

36. Mihma na fehna, micha nan isht ahoba puta aiena ka,  
Echip yakni, micha okhvta humma, mikmvt afvmmi pokoli  
ushta ho yakni haiaka ya, isht a kaniminchi hosh, yvmma  
pehlichit kohcha tok.

37. Moses ilvppak osh Israel ushi vhleha ha, Chihowa  
hvchin Chitokaka yvt hvsh itibapishi hatuk a, hopaii vno  
chohmi ho, ikbit hvchi hilecha he; yvmmak o hvsh i ha-  
ponakla hi oke; im ahanchi tok oke.

38. Ilvppak osh yakni haiaka okla ai itvnaha ka ibafohka,  
enchil vt nvni chaha Saina ya ai im anumpuli ka awant  
anta; micha hvpin tikba vhleha ma ibafohka tok; yvmmak  
osh isht ai okchaya, nan vhpisa puta ka hvv ima chi kvv,  
ishi tok mak oke.

39. Yvmmak o hvpin tikba vhleha hvv im antia he keyu  
hosh, amba naksi ka pit tobli cha, chukvsh vt falamvt Echip  
a ia mvt,

40. Alon ash o Pi tikba ilhkola chi ka, Chitokaka puta  
ka, pim ikbi; Moses ilvppa pi pehlichí Echip yakni ai isht  
pi kohchi ano, nana mak osh isht a kaniohmi tuk chishba,  
kil ithaiyano hoka, im ahanchi tok.

41. Michá nitak yvmma foka ma, wak ushi okla ikbi cha,  
na holba toba yash nan isht aiokpvchi ya, isht im ai vla  
cha, ilap ibbak nan ikbi tuk a isht il ai yukvvt aiasha tok.

42. Yohmi ma vba fochik puta ka, okla aiokpvcha chi  
mak o, Chihowa yvt issvt i filvmmi tok. Hopaii vhleha i  
holisso ha a holihiso kvv, Israel in chuka achvfa vhleha  
hvchia ma! afvmmi pokoli ushta ka yakni haiaka, nan  
vhpoba nipi puta, micha nan isht ai okpvchi puta aiena ka,  
isht hvv svv ahanla cho?



43. Amba Molak im vlhtipo a, micha Limfan chin Chihowa i fochik aiena, na holba hvsh aiokpvcha chi mak osh, hvsh ikbi tok vt shoyulit hvsh aya cha tok. Yvmohmi hoka wihachit Babulon misha pilla, hvch isht aya la hi oke, achi hoka.

44. Yvmmak okvt Moses a i mihvt, kaniohmi ho pisa tuk vt, holba ho ikba he o, apesa tok mak o, hvpin tikba vhleha hvt yakni haiaka ya isht ai atokowa vlhtipo vt in takali tok.

45. Atuk o hvpin tikba vhleha hak kia, yvmma ishi tok osh, Choshua a apehvt oklushi nan ik ithano, yvmmak o Chihowa yvt pin tikba vhleha itikba ya a kohchit tihlihinli tok, i yakni a isht chukowa tok o, ituyula na, Lewi vt ahanta nitak a oyuna tok.

46. Mihma yvmmak osh Chihowa itikba ai isht il ayukpa ahayuchi, yvmohmi cha, Chekob in Chihowa ya aboha im atahli bnna tok;

47. Yohmi tuk kia Solomon ak osh chuka ya im ikbi tok.

48. Yohmi kia Moma i shahli hvt tempel puta ibbak o isht ikbi yokvno, ai ahanta cha tuk keyu;

49. Uba yvt vm aiasha okma, yakni vt saiyi ai o hikia yoke. Chuka nanta ho hvš sm ikba chi ho? mikma a foha li ak osh nanta ho?

50. Uno svbbak ak osh nana ilvppa moma ka ikbi tok keyu cho? Chitokaka yvt achishke; hopaii vt achi hoka.

51. Ikunla kvllo, micha chukvsh mikmvt haksobish aiena wishakchi ik tapo hvchia hvt, Shilombish Holitopa ya i snalit hvsh bilia. Hvchin tikba vhleha hvt yohmi tok a, hvsh chiyuhmishke.

52. Hopaii vhliha ha katima kak o hvchin tikba vhleha hvt ik ilbvshacho ki tok o? Micha Aiahli vt aya hi a, tik banli anoli vhleha, yvmma okla vbi tok o mihi o himak hvchishno vt na haksichi, micha nan vbi aiena hvsh a toyuba tuk oke.

53. Micha enchil vhleha hosh nan vlhpisa ya auet tosholi



na, hvsh eshi tok; yohmi kia hvchik holitoblo cha tuk oke: achi tok oke.

54. Yohmi ma na yakohmi ka okla haiyaklo mvt, chukvsh vt nvhla tok; micha yvmmak ash noti isht o shakan-  
lichi tok.

55. Yohmi kia yvmmak okvt Shilombish Holitopa anuk-  
fohkvt kvnia hatuk osh, vba ya pit ai okchifeli fehnvt  
hopokoyo mvt, Chihowa im aholitopaka, micha Chisvs vt  
Chihowa im ibbak ishtimpak imma ya hikia aiena ho, pisa tok.

56. Micha, Uba yvt tiwa, micha Hatak Ushi vt Chihowa  
ibbak isht impak imma ya auct hikia aiena ho, pisa lishke;  
achi tok.

57. Yohmi ma chitoli fehnvt okla tasali mvt, haksobish a  
akvmmi cha, achvfa chohmit o yihhleptv tmaha ha ishit a  
kohchi cha, tvli ishit <sup>strike</sup> boli tok.

58. Yohmi ma nana atokowa anoli vlheha hashot, ilap  
anchi a hatak himita Sal hohchifo ho, iyi ituma ont ashachi  
tok.

59. Micha Istefin vt pit im payvt, Chitokaka Chisvs ma!  
Sa shilombish a ish ishashke; ahanchi na, okla tvli ishit  
boli tok.

60. Yohmi ma hvchukbihleptv hikia cha, chitoli hosh,  
Chitokaka ma! ai ashvchika ilvppa isht ish onochi na; achi  
tok. Micha ilvppa ahanchi mvt, nusit kvnia tok oke.

## CHAPTA VIII.

Filip vt Samelia ya vbanumpuli ikxa ahilichi, 5. 26 Ehliopia hatak  
anumpeshi yo baptismochi.

1. YUMMUT illi ka Sal vt vlhpesa ahni tok. Micha  
nitak yvmma foka ma, vbanumpuli ikxa Cheluselem ashwa  
tok a i palvmmichi fehna tok; yohmi ma momvt ita fimim-  
ptv Chutia yakni, micha Samelia aiena a mominchi na, vba-  
numpeshi vhlaha hash illa tok.

2. Yohmi ma hatak hochukma yosh Istefin a hohpit  
taiyahli mvt, okla isht yaiya fena tok.

3. Yohmi ma Sal vto, vbanumpuli ikxa ya okpvnit, chuka moma iba chukowa cha, hatak puta, ohoyo puta aiena ka halvllit ishit, aboha kvlllo pit apihinta tok.

4. Yvmohmi hatuk o ita fimimpa tuk vhleha hash ot, anumpa ha isht anumpulit kanima moma itvnowa tok.

5. Yohmi ma Filip vt Samelia tmaha ha ona cha, Klaist a isht im anumpohonli tok.

6. Mihma okla hvt, yvmmt na fehna yvmihinchi ka haklo, micha pihisa aiena mvt, im anukfila ai achvvt Filip vt nana ahanchi puta ka, haponaklo tok.

7. Shilombish okpulo puta a foyuka tuk vt chitolit tahpanvt lava ka a kocha wiha hatok o; micha palsi isht abeka lava tuk, micha imomokpulo aiena tuk vt hlakofi tok.

8. Yvmohmi ma tmaha ymma a yukpa chinto tok.

9. Yohmi kia hatak achvfa Saimon hohchifo hosh, tikba ma tmaha yvmmak inli ka ai isht ahullot ahantvt, ilap ak osh hatak na fehna mak o, mihia cha, Samelia okla ha nukhlakvshli tok.

10. Yvmmak o, chipunta, micha asvno aiena kvv momvt, Hatak ilvppvt Chihowa nan isht im ai ahlika chinto mak oke; ahanchi mvt, okla im antia tok.

11. Mich a yvmmak osh isht ahullot, isht nukhlakahashli tok hopaki hatuk o, okla im antia beka tok.

12. Yvmohmi tuk kia, Filip vt Chihowa apehliechika, micha Chisvs Klaist hohchifo aiena nana puta ka isht ai anumpohonli na, okla yimmi mvt, hatak, micha ohoyo puta aiena kvv baptismo tok.

13. Yohmi ma Saimon vt ilap ash kia yimmi akinli tok, micha baptismo mvt, Filip a ibafohkvv avvt, na fehna, micha nan isht ahoba puta aiena kvv a kaniohmi na pisa mvt, nukhlakanha tok.

14. Yohmi ma vbanumpeshi vhleha Cheluselem maya tuk vt, Samelia vt Chihowa im anumpa ha ishi tuk o, haklo mvt, Pita micha Chan aiena ka okla pit in tihleli tok.

15. Atuk o, yvmmak ashot itonanchi mvt, okla Shilombish Holitopa anukfohka chi ka, vba pit isht anumpulit oklat tok.



16. Yvmma foka ma, achvfona kia yvmmvt ik onvtulo kisha ha tok; Chitokaka Chisvs hohchifo ha isht a baptismo tuk ak illa ha tok.

17. Yohmi mvt okla hash ibbak isht umbitehimpa ma, Shilombish Holitopa yvt okla anukfohka tok.

18. Yvmohmi ma Saimon vt vbanumpeshi vhleha ibbak isht umbitepa ka, Shilombish Holitopa yvt ai anukfohka ho, pisa mvt tvli holisso ant i weli cha,

19. Uno ak kia nan isht im ai ahlika ilvppa hvs sama na, kvna ho vno vt svbbak isht umbitepa likma, Shilombish Holitopa yvt ai anukfohkashke, ahanchi tok.

20. Yohmi kia, Pita yvt, (Chihowa yosh nan ima ya <sup>good he gift it</sup>), tvli holisso yvt isht vlhtoba hinla ka, chim ahoba tuk oka, chin tvli holisso yvt chi awant aiokpuloka pit-kvniashke.

21. Chi chukvsh vt Chihowa ya itikba ya ai vlhpiesa keyu hokvt; nan ilvppa kaniohmi kia, micha ahalaia kia ik chim ikshoshke.

22. Yvmohmi hoka, nan isht ik chi ai vlhpeso ilvppa ish ile kostininchashke; micha Chihowa pit ish im asihihla na, yohma he yobakma, chi chukvsh im anukfila yvt chi kashofa hi oke.

23. Chishno vt basunlvsh homi, micha nan ai ashvchika abonunta aiena chia hatuk o, akostininchi li hoka; im achi tok.

24. Mihma Saimon vt afalaminchit, Chitokaka ya pit im ilbvshvt isht hvs si anumpuli na, na yakohmi hvsh anumpuli tuk a achvfona kia ant ik si onvtulo kashke; achi tok.

25. Mihma yvmmak ash ot, Chitokaka im anumpa ha atokowvt anolit, isht anumpohonli cha falama mvt, Samelia okla in tvmahushi lawa ka vbanumpa isht ai anumpohonlit, Cheluselem a itvlachi tok.

26. Yvmohmi ma; Chitokaka im enchil vt Filip a im anumpulit, Wakaya cha, oka mahli pila ivt, hina Cheluselem vttvt, Kesa ia bachaya chukushmi foka yvmma ish onashke, im achi tok.

27. Mihma wakaya cha ia tok. Atuk o Ehliopia hatak, Kantisi ohoyo Ehliopia okla i miko im anumpeshi holitompa



hosh, yummak osh tvli holisso a mominchit i shoyuli yosh vba pit aiokpvecha chi hosh, Cheluselem a vla tok osh,

28. Falamvt ia kv̄t im iti chanvlli anukaka binilit, Esaias hopaii i holisso ha itim anumpvli tok.

29. Mihma Shilombish vt, Filip a, Bilika ona cha, iti chanvlli ilvppa ont ibafohká; im achi tok.

30. Mihma Filip vt pit o malelit ona cha, Esaias hopaii i holisso itim anumpuli ka haklo mvt, Nan ish itim anumpuli kvto ish akostininchi cho? achi tok.

31. Mihma, Katiohmi li kak osh, hatak nana hosh vm abvchi ho keyukma? achi tok. Mihmvt, Filip vt pit oiya cha, awant asha hinla ka; ahni tok.

32. Anumpa holisso holitopa ai itim anumpuli ka ilvppak a tok. “Chukfi vlhpoba chohmi ho yvmma ai illi hvllat ishtia tok; micha chukfi vlhpo-ushi yosh hishi im vmo in tikba hikia kv̄t, nan ik ayo chatuk a chohmit, yummvt itih ha ik wakvmmo ki tok:

33. “Ilbvsha fena ma, nan ai vlhpiesa ka im ishi tok Im ilhfiopek a yakni a ai ishi tok oka; im ai itilaūi kv̄t ahashwa tok a, kvta hosh anola hinla cho?”

34. Mihma anumpeshi vto, Filip a afalaminchi mvt, Chi ponaklo lishke; Kvta ho hopaii vt ilvppa isht anumpuli ho? Ilapo akinli hokmá, keyukmvt hatak inla yokmá, nanta ho? achi tok?

35. Mihma Filip vt itih ha wakvmmi cha, holisso mihi ash inli ho ai isht ivt, Chisvs a isht im anumpohonli tok.

36. Yvmohmit hina fohkv̄t mahayvt okla mvt, oka nana kia ont a hieli tok. Mihma anumpeshi ashot, Yakeh! oka yoke; baptismo la hi a nanta kosh ai ataklvmmi cho? achi tok.

37. Mihma Filip vt, Chi chukvsh mominchit ishit chi yimmi hokma, vlhpiesvshke, achi tok. Mihma afalaminchi mvt, Chisvs Klaist vt Chihowa ya ushi yoka, sa yimmishke, achi tok.

38. Mihma iti chanvlli vt lumvt hikia chi ka, miha tok; micha Filip vt anumpeshi ash ita tuklot pit okvtahvt oka ya itonachi na, yummak ash baptismochi tok.

39. Yvmohmi ma oka yash ai ashvvt kochvt okla ma, Chitokaka imi Shilombish vt Filip a isht ia na, anumpeshi ash ot himmakma ik peso ki tok: micha na yukpa hosh i hina fohkvt ia tok.

40. Amba Filip vto Asotvs ak o antvt haiaka tok; micha a hlopullit aya mvt, tmaha moyuma ka vba isht ai anum-pohonlit ayvt Seselia ya vla tok oke.

CHAPTA IX.

Sal vt Tamaskvs pilla ia hosh aya ho, Klaist vt im anumpuli, 1. 10 Ananaivs vt ayvt im ona ma, baptismo tok. 20 Pal vt nukwaya iksho hosh Klaist a isht anumpohonli.

1. Y ŪMOHMI ma, Sal vt Chitokaka i nan im ai ithana vhleha ha i nokowa, micha vbi aiena he fioptv kohonchi kv imoma mvt, na holitompa isht asha pehlich i im ona tok.

2. Mich a sinakak puta, Tamaskvs asha ka, nakni okmá, keyukmvt ohoyo hokmá nana hosh, ilvppa chohmi kv asha na, ahayuchikmvt talakchi o Cheluselem a pehlichit vla hinla kv, yvma puta pit holisso ha, im ikba hi a, im asilhha tok.

3. Atuk osh ia hosh aya mvt, Tamaskvs pit bilika ona tok; mihma tohwikelit vba minti kv yvmmak ash o asha-lika tommit a folupli tok.

4. Yohmi ma aka ont itula tok; micha anumpa hv, Sal, Sal, nanta katihmi ho is svlvshali cho? im ahanchi na haklo tok.

5. Mihmvt, Chitokaka ma! kvta chia hoh cho? achi tok. Mihma Chitokaka ashot, Ūno akosh, Chisvs ish ilbvshahanli ka sia mak oke, Na halupa puta asvnalinchit ish hahahli kv chi palvmmi hoke; achi tok.

6. Yohmi ma yvmmak ashot nukhlakanchvt wvnihinchi mvt, Chitokaka ma! nanta hak o katiohmi la hi a, si svmahni cho? achi tok. Mihma Chitokaka yvt, Wakaya cha, ivt tmaha ha ont ish chukowakmak o, nana ish kaniohma chi kv, chim annoa chi hoke; im achi tok.

7. Yohmi ma hatak apehvt aya tuk ashot anumpa kuno haklo kia, hatak nana kia ik peso mvt, ik anumpolo hosh hieli tok.

8. Atuk o, Sal vt aka itolvvt tani tok: micha nishkin vt fatuma mvt, hatak nana kia ik peso ki tok. Yohmi ma ibbak a halvli cha ishtivt, Tamaskvs a okla isht chukowa tok.

9. Yohmi ma ik hoponayo mvt, anonti ik impo, nan ik ishko aienvt ahanta na nitak tuchina tok.

10. Yvmohmi ma hatak nan ithrna achvfa, Ananaivs hohchifo kvv Tamaskvs a anta tuk o: yvmmak ash o holhpokuna ka, Chitokaka yvt, Ananaivs, im achi tok; mihma, Yak anta lishke, Chitokaka ma! achi tok.

11. Mihma, Wakayvt, ivt hina Apissa hohchifo ka ish ona cha, Chutvs in chuka ya, Tasvs hatak Sal hohchifo ka, ish aponaklashke; yvmmak ash osh vba pit anumpohonli hoka.

12. Micha holhpokuna kvv, hatak Ananaivs hohchifo hosh ant chukowa cha hopokoya chi ka, ibbak a ant isht um bitepa na, pisa tuk oke: Chitokaka yvt im achi tok.

13. Yohmi ma Ananaivs ashot afalaminci mvt, Chitokaka ma! hatak ilvppvt, chi holitopa vhleha Cheluselem aiasha ka kaniohmit nan isht okpvni ka, laua ho a haklo li chatuk.

14. Micha chi hohchifo pit hohchifo vhleha mominchit takcha chi ka, na holitompa isht asha pehliehi vhleha yvt im apesa tuk o, ilvppa anta hoke: achi tok.

15. Yohmi kia Chitokaka ash ot, Ia, nan isht vm vta holitopa, sa hohchifo ha shoyulit, miko vhleha micha okla nan ik ithano puta, micha Israel ushi vhleha aiena itikba ya hikia hi oka.

16. Micha vno sa hohchifo pulla ka, na palvmmi hochito kaniohmi kia isht ilbvsha chi ka, im anoli la chi hoka; im achi tok.

17. Mihma Ananaivs ash ot, ivt aboha ya ont chukowa tok; micha ibbak a isht umbitepa mvt, Itibapishi li Sal ma! ish minti ma, hina takla ya a chi haiaka tuk, Chitokaka Chisvs vt chishno vt ish hopokoyo cha, Shilombish Holi-



topa yvt chi anukfohka chi ho, auet sa chvffichi tuk oke; achi tok.

18. Yohmi ma chekosi makinli ho, na hakhlobish atuk o chohmit nishkin a mokohlit aka itula tok; yohmi ma ashaliika hopokoyo mvt, wakaya cha baptismo tok.

19. Micha nana impvt in taha mvt hlampko tok; yohmi mvt Sal vt nan-ithvna vhleha Tamaskvs maya ka awant anta na nitak kanohmi tok.

20. Micha in chekosi makinli ho, Klaist a yummvt Chihowa Ushi atuk a, sinakak puta ka, isht ai anumpohonli tok.

21. Yohmi ma okla haklo kv̄t momvt anukhlakancha mvt, Ilvppak osh na hohchifo ilvppa pit hochifot Cheluselem ai asha tuk a ilbvshahanli cha, ilvppa aya kv̄t, yummvt talakchi yo, na holitompa isht asha pehlichī vhleha, isht im ona chi mak atuk keyu? achi tok.

22. Yohmi kia Sal vto hlampko kv̄t isht i shahlit ishtia, yohmi mvt atokowvt, ilvppak osh Klaist fehna mak oke; ahaya mvt, Chu okla Tamaskvs asha tuk a imaiyvchi tok.

23. Yvmohmi kash o nitak kanohmi kv̄t taha ma, Chu okla hv̄t, yvma vba chi kv̄t isht anumpulit maya tok.

24. Yohmi kia okla nan ahnit maya ka, Sal vt akostininchi tok; mihma vba chi kv̄t nitak, micha ninak moyuma holihta okhissa puta ka okla atoni tok.

25. Yohmi ma nan ithvna vhleha hv̄t nitak o ishit, kishi fohkit tvli holihta lapalint aka pit bohli tok.

26. Yvmohmi na Sal vt Cheluselem a vla mvt, nan ithvna vhleha ha ibafohka bv̄nna tok. Yohmi kia momvt okla i nukshopa tok; micha yummvt nan ithvna yo ik im ahobo ki tok.

27. Yohmi kia Banabas ato eshi cha, ilaelit vbanumpeshi vhleha ya isht im vla tok; micha hina takla ya kaniohmit Chitokaka ya pisa tok, yohmi na im anumpuli tok, micha kaniohmit nukwaya iksho hosh, Chisvs hohchifo ha Tamaskvs a isht ai anumpohonli tok aiena ka, im anoli tok.

28. Yohmi ma Cheluselem a asht kocha, micha ant abeha aiena ka takla ahanta tok.

29. Micha nukwaya iksho hosh, Chitokaka Chisvs hoh-

chifo ha isht anumpohonli cha, Klik okla ma itim anumpohonli tok; yohmi kia vbi brnvt okla aiasha tok.

30. Yohmi na itibapishi vhleha yvt akostininchi mvt, ilaelit Seselia isht vla cha, Tasvs a pit chvffichi tok.

31. Yohmi na Chutia yakni vt moyuma, micha Kalili, micha Samelia aiena ka, vbanumpuli iksa puta kv nuktanla mvt isht i shahlit ia tok; mihma Chitokaka i nukshoyupa, micha Shilombish Holitopa ya isht ilai yukpa aienvt itvno-wa kv, laurt isht i shaiyahli tok oke.

32. Yakohmi tok; Pita yvt mominchit hlopullit aya mvt, vbanumpuli vhleha Litti ai asha tuk ash kia, im vla tok.

33. Mihmvt yvmma hatak achvfa, Enias hohchifo kv palsi isht abeka hosh topa itoyula na afvmmi untuchina tuk o, ont pisa tok.

34. Micha Pita yashot, Enias ma! Chisvs Klaist vt chi hlakofichishke. Tani cha, chishno inlit chin topa ha patali, im achi tok. Mihma chekosi tani tok oke.

35. Yohmi ma Litti, micha Salon aiena asha tuk vt momvt yvmma pisa mvt, filemvt Chitokaka ya im ai ona tok.

36. Yohmi ma nan ithvna achvfa Tabihla hohchifo, yvmvt toshowakmvt Takvs achi ho, Chappa ya anta tok: ohoyo ilvppvt nan achukma a yvmohmi, micha na habenvchi aiena biekvt ahanta tok.

37. Atuk o nitak yvmma foka ma yakohmi tok; yvmvt abeka cha illi tok; yohmi ma yvmmak ash okla achivt talili mvt, vba potvlhpo ya boyuhli tok.

38. Mihmvt Litti yvt Chappa ya pit bilika hatuk, micha nan ithvna vhleha hv, Pita yvt yvmma anta ka, okla haklo tuk osh anukwaya im vla hinla ka, pit im ahnit hatak tuklo ka pit tibleli tok.

39. Atuk o, Pita yash ot wakaya cha awant ia tok. Atuk osh vla ma, ilaelit vba potvlhpo ya okla ishit chukowa tok; mihma ohoyo vlhtakla vhleha yvt momvt apelv hiohmavt yaiya mvt, nafohka, micha anchi chohmi, Takvs vt awant anta moma mvt ikbi tok a, haiakahanchi tok.

40. Yohmi kia Pita yvt mominchit koche weli cha, hvchukbihlevt hikia mvt, vba pit anumpuli tok; mihmvt hak-

nip ai ittola ka pit filema mvt, Tabihla, taní, achi tok; yohmi ma nishkin a fatummi cha Pita ya pisa mvt, tanit binili tok.

41. Mihma ibbak pit ima cha wakayvchi tok. Micha vba pit anumpuli vhleha, micha ohoyo vhtakla puta aiena kash hoyo cha, okchaya hō ima tok.

42. Yohmi ma Chappa okla hvt momvt yvmma akostin-inchi tok; yohmi mvt lawvt Chitokaka ya i yimmi tok.

43. Mihma yakohmi tok; Saimon wak hakshup hummvchi ya awant Chappa ya ahanta na nitak kanohmi tok oke.

CHAPTA X.

Kanilis vt Pita ya pit hoyo, 1. 34 Pita yvt vbanumpa isht anumpuli. Shilombish Holitopa yvt haponaklo vhleha ha onvtoyula.

1. **H**ATAK achvfa Seselia ya ahanta kvv, Kanilis bohchifo hosh tvshka chipota aya achvfa, Itili okla achi hō, i kvpitvni ha tok.

2. Hatak achukma, micha in chuka-chvfa moma aienvt Chihowa ya i nukshompa cha, okla ha na habenvchi fehna mvt, Chihowa ya pit im anumpohonli na bilia tok.

3. Yvmmak ashot holhpokuna chohmit pisa ka nitak hvshi kanvlli isht vlpisa ont isht chakkali foka hō, Chihowa im enchil vt haiaka achukma hosh mintit ant iba chukowa mvt, Kanilis, im achi tok.

4. Yohmi ma yvmmak ash atokowvt pisa mvt nukshopa cha, Chitokaka ma! nanta hoh cho? achi tok; mihma, Uba pit ish anumpohonli, micha nan ish hovela puta aiena ka, Chihowa yvt ithaiyana he mak o vba ihiya hoke.

5. Yohmi hoka himak a, Saimon, Pita hohchifo ka pit hoyot, hatak a Chappa pit ish tihlelashke.

6. Yvmmak okvt Saimon wak hakshvp hummvchi in chuka mvt okhvta lapali ka yo talaia hō, awant anta hoke; yvm-mak osh nana hō ish kaniohma he tuk ma, chim anola hi oke; im achi tok.

7. Mihma enchil, Kanilis a im anumpohonli tuk ash ot ia



ma, chuka nan isht im ai vta ya tuklo, micha tvshka chipota nan isht im ai ashwa bilia ya ahli achukma achvfa ho aieninchit hoyo tok.

8. Micha nan okluha kash mominchit im anolit taiyahli mvt, Chappa ya pit tihleli tok.

9. Ont onna ma okla itvnowvt mahaya mvt, tmaha hash pit bilika ona ma, hvshi kanvlli isht vlhpisa ont isht hannali foka ho, Pita yvt vba pit anumpula chi hosh aboha pakna pit oiya tok.

10. Atuk osh hohchvfo fehvt taiyaha cha, impa he tuk osh ; amba okla atahlit isht maya ma, holhpokuna ho chohmi tok.

11. Micha shutik vt tiwa, yohmi ma, nan ai vlhpitta yosh nan tohbi chito wishakechi ushtvt ita shekonopa ho chohmi hosh aka i mintit, yakni ant onvtoyula ho, pisa tok.

12. Mihma anukaka ya nan-vlhpoa puta, hanalushta ilia-yuka yakni aiasha kvv moyuma, micha napoa puta, micha nana aka a balvlli puta, micha vba hushi puta aiena kvv ai asha tok.

13. Yvmohmi ma anumpa hvv mintit im vla kvv, Pita, tani cha, vbit vpá ; achi tok.

14. Yohmi kia Pita ashot, Yohma he keyushke, Chitokaka ma ! nana kvv ai vlhpesa keyu, kashofa keyu hokvno himonna kia, vpa li chatuk keyu hokv ; achi tok.

15. Yohmi ma anonti anumpa hvv atukla ma, im anumpuli kvv, Nana ho Chihowa yvt kashofi tuk a, yvma vlhpesa keyu, chik hochifo kashke ; achi tok.

16. Hituchina ha yo ilvppa yakohmi tok ; yohmi ma nana ai vlhpitta kash ot falamvt vba ia tok.

17. Pita yvt holhpokuna chohmit nana pisa tuk, yvmvt nana isht akaniohmi hatuk a ik akostinincho chohmi ai itin takla ma, hatak Kanilis vt pit tihleli tuk ash, Saimon in chuka ya a ponaklo tuk osh okhissa itikba ya hieli tok.

18. Mihmvv tahpvla cha a ponaklot, Saimon, Pita hohchifo kvv, yvmmak o antakmá, nanta cho ? achi tok.

19. Pita yvt holhpokuna tuk ash o anukfihinli fehna, Shilombish vt, Yakeh ! hatak tuchina kvv chi hoyoshke.

20. Yohmi hoka tanit pit akowa cha, nana kia isht ai anuktuklo iksho hosh awant ish iashke, yumma vno ak osh auet tihleli li tuk oka; im achi tok.

21. Yohmi ma Pita yash ot akowvt ivt, Kanilis vt auet in tihleli tuk hatak ash im ona mvt, Yakeh! vno ak osh hatak hvsh hoyo hatuk a sia mak oke. Nanta hosh a katiohmi ho ayvt hvsh la cho? achi tok.

22. Mihma, Kanilis Kvpitvni hatak ahli, micha Chihowa ya i nukshohumpa cha tuk, micha Chu okla moyuma ka ai im annoa achukma hosh ahanta chatuk, yummak osh in chu-ka ya ish ona chi ka, chi hoyo cha, anumpa ha chi a hakla chi ka, Chihowa yvt enchil holitopa ya isht ai im anoli tuk oke; okla achi tok

23. Yohmi ma i howvt aboha pit apitta na maya tok. Atuk o ont onna ma, Pita yvt wakaya cha awant ia ma, itibapishi vhleha kanohmi kv Chappa ya asht apihvt ilhkoli tok.

24. Atuk osh yummak atuk a onna ma, Seselia ya okla ont chukowa tok; yohmi ma Kanilis vt i kanomi vhleha, micha i kana fehna aiena ka hoyot itahobit tahli cha, asht pit hoyo tok.

25. Atuk osh Pita yvt ant chukowa ma, Kanilis vt ont afama cha, iyi ituma ya hlipiyvt ai okpvchi tok.

26. Yohmi kia Pita yvt, Hikiá, vno ak kia hatak sia akinli hoke, ahanchi cha halvllit tanichi tok.

27. Michá im anumponlit pit chukowa mvt, itahoba tuk vt laua hosh ai asha na pisa tok.

28. Yohmi mvt Chu hatak okvt okla inla takla aya hokmá, keyukmvt ont ibafoka hokmá nana ka kaniohmit im ai vhpiesa keyu ka hvsh ithaiyanvshke; yohmi kia vno yokvto hatak nana kia ik vhpeso, micha okpulo a la he keyu ho, Chihowa yvt vm abahanchi tuk oke.

29. Yumohmi hatuk o, sa hoyo makinli ho nana ak acho hosh, ayvt hvchim vla li hoke. Yohmi hosh hvchi ponaklo lishke, nanta katiohmi ho is sa hoyo tuk oh cho? im achi tok.

30. Mihma Kanilis vt, Nitak ushta kash o nahullochit an-



ta li, hvshi kanvlli himak foka tok. Yohmi hosh hvshi kanvlli isht vlhpisa ont isht chakkali ho, vm aboha anukaka ya vba pit ai anumpuli li tuk; yohmi ma hatak vt nafohka shohmalali fohka kvv sa tikba ya hikia tuk.

31. Mihmvt, Kanilis, vba pit ish anumpuli ka haklo, micha nan ish hopehinla chatuk a Chihowa yvt ithaiyana hoke.

32. Yohmi hoka Saimon, Pita hohchifo ka pit hoyot Chappa ya pit ish tihlelashke; yvmmak okvt okhvta lapali ka Saimon wak hakshup hummvchi in chuka yo anta hoke; yvmmak osh vlakmvt ant chim anumpula hi oke; achi tok.

33. Yohmi hatuk o ashalika pit chi hoyo li kvno; atuk o ish la kvv ish vlhpesa hoke, yvmohmi ma Chihowa yvt nana chim apesa tuk a, mominchit e hakla chi mak osh momvt himak a yakohmit Chihowa itikba ya e chiya hoke; achi tok.

34. Mihma Pita yvt itakha ya wakvmmi mvt Chihowa yvt hatak a kanimanchi keyu ka, ai ahlit akostininchi lishke—

35. Amba oklushi moyuma ka kvna hosh yvmma i nukshoyupa cha, ai vlhpiesa ka yvmohmi hokvt, im a holitopa chatuk oke.

36. Chihowa yvt Israel ushi vhleha ya anumpa auet ema na Chisvs Klaist pulla ho nuktanla hi a, isht ai im anuhumpa tok a, yvmmak osh moma in Chitokaka yoke.

37. Baptismo yo Chan vt isht anumpuli ha yak o, anumpa yvmmvvt Kalili ai ishtia tuk osh, Chutia yakni a mominchit ai anumpvt hlopulli tok;

38. Kanihmit Chihowa yvt, Chisvs Nasalet ai vtta ya Shilombish Holitopa, micha nan isht im ai ahlika aiena ka isht ahvmmichi tok; Chihowa yvt awant aya hatuk o, yvmmak ashot nan achukma ka isht ahanta, micha nan isht ahullo okpulo isht ilbvsha vhleha ya mominchit hlakofichit nohowa tok, hvsh ithaiyanvshke.

39. Micha yvmmvvt Chu okla i yakni, micha Cheluselem aiena ka nana ho a kanimihinchi tukma, moyuma atokowa anoli pia mak oke; yvmmak o okla iti a takalichit vbi tok.

40. Yvmmak ash nitak ont atuchina ma, Chihowa yvt tanihi cha, achukmalit haiakvchi tok.

41. Yohmi kia okla moma kak a tok keyu, amba nana



atokowa anoli vhleha, Chihowa yvt tikbanli atokohonli tok, illi tuk vt falamvt tani ha ya, nan itibai impvt, ishkot maya tok, pishno ak a tok oke.

42. Mihma okla ha il im anumpula he, micha okchaya vhleha, mikmvt illi puta aiena nan im apesa ya he, Chihowa yvt atokoli ka ilap ak atuk a, atokowa il anohonla he, pim apesa tok oke.

43. Yvmmak o hopaii moma kvv, yvmma hohchifo pulla hatuk mak o, kvna ho kia i yimmi hokvt ai ashvchika puta kvv isht a kashofa ahayucha hi a, atokolit okla anohonli tok; achi tok.

44. Pita yvt anumpa ilvppa anumpohonli kvv moma ho, anumpa haklo yash Shilombish Holitopa yvt mominchit onvtuyula tok.

45. Yohmi ma hakshup tvptua na yimmi vhleha Pita ya apihvt vla tuk vt, okla nan ik ithano vhleha ak kia Shilombish holhpila kvv o fohopa hatuk o.

46. Anumpa ilaiyuka okla anumpulit Chihowa ahnihinchi ka, okla haklo hatuk osh momvt nukhlakancha tok; Mihma Pita yvt afalaminchit,

47. Shilombish Holitopa yvt anukfoka tuk vhleha pishno akinli chohmi; yakohmi kvv ik baptismo ka chi ka, hatak nanta hosh oka ya im ataklvmma hinla cho? achi tok.

48. Yohmi mvt Chitokaka isht a hochifot okla baptisma chi, i miha tok; yohmi ma awant anta na nitak kanohma chi ka okla im ahni tok oke.

## CHAPTA XI.

Pita yvt oklushi nan ik ithano vbanumpa ont isht im anumpuli tuk o, nanumachi, 1. 19 vbanumpa yvt tmaha kanohmi ka ai anumpa.

1. YUMOHMI ma vbanumpeshi vhleha micha itibapishi vhleha aiena Chutia maya tuk vt okla nan ik ithano vhleha hak kia Chihowa im anumpa ha ishi tuk a, okla haklo tok.

2. Yvmohmi tuk o, Pita yvt Cheluselem a vla ma, hakshup tupa vhleha yatuk vt i chapvt anumpulit,

3. Chishno vt hatak hakshup tupa keyu vhleha ya ont ish iba chukowa cha, ish ibai impa tuk oke; ahanchi tok.

4. Yohmi ma Pita yvt ai ishtia vmmona ka silhhit im anolit,

5. Chappa tumaha ha vba pit anumpuli hosh ahanta li tuk osh, sa holhpokuna chohmit na pisa li ka, nan ai vlhpitta yvt mihinti kv̄t nan tohbi chito yo chiyuhmi hosh v̄hli ushta ka ishi ho vba ya ai aka mihinti tok, mihmvt vno ash fehna vm vla tok.

6. Yvmmak ash sa nishkin a isht atokoli li mvt, nana vm anukfihinla tok, mihmvt nan-vlhpoba iyushta puta yakni pakna aiasha, micha na-poa nukshopa, mikmvt nan aka ballli puta, micha vba hushi aiena ka pihisa li tok oke.

7. Mihma anumpa hv̄t, Pita yvt wakaya cha, vbit v̄pá, vm ahanchi na, haklo li tok.

8. Yohmi kia vno ashot, Yohma he keyushke, Chitokaka ma! nitak nan ash nana kv̄t ai vlhpesa keyu, micha okpulo aiena kv̄t satakha ya fohka tok keyu chatuk oke; achi li tok.

9. Yohmi kia atukla ma anumpa hv̄t vba auet si afa-laminchit, Nana ho Chihowa yvt kashofi tuk a, yv̄mma ai vlhpesa keyu, chik acho kashke; achi tok.

10. Ilvppa yakohmi kv̄t hituchina ya tok; yohmi ma moma falaminchit vba isht maya tok.

11. Yvmohmi ma, mih makinli ho hatak tuchina Seselia auet ai an tihleli tuk a, chuka ai v̄tta li tuk ash, ai vla tok.

12. Yvmohmi ma Shilombish vt, nana kia isht anukwaya iksho hosh awant ia la he, a miha tok; yohmi ma il itibapishi hannali ilvppvt si apelv̄t itvnowa ho, hatak ash in chuka ont e chukowa tok.

13. Yohmi ma yvmmak ash ot kaniohmit enchil vt ilap im aboha anuka ya hikia na pisa ho, Hatak a Chappa ya pit tihlelit Saimon, Pita hoehifo ka pit ish hoyashke.

14. Yvmmak osh anumpa, chishno, micha chin chuka



achvfa moma aienvt isht hvchi okchaya hi a, chim anola hi oke, im achi tuk a, pim anoli tuk oke.

15. Yvmohmi ma anumpulit ishtia li makinli ho, Shilombish Holitopa yvt okla ha onvtuyula kv, vmona ka hvpushno a pi onvtula chash chiyuhmi tok.

16. Yohmi ma Chitokaka yvt, Chan okvto oka yo ishit baptismochi mvhlshke; amba hvchishno yokvto Shilombish Holitopa yo ishit hvchi baptisma hi yoke; achi tok a, im anumpa ha ithaiyana li kvno.

17. Yvmohmi ka Chihowa yvt, Chitokaka Chisvs Klaist i yimmi vhleha ha hv ima tok, ai itilau na holhpila ka ihima tuk a, vno ak osh nanta sia hatuk osh Chihowa ya ataklvmmi la hinla cho? im achi tok.

18. Na yakohmi ka okla haiyaklo mvt lumvt chieya cha, Chihowa ya aiokpahanchi mvt, Yohmikma Chihowa yvt okla nan ik ithano vhleha ak kia isht okchaya ile kostininchi ya ihima tumvshke; ahanchi tok oke.

19. Yvmohmi ma na palvmmi kv Istefin a isht atoba ma, okla ita fimimpa tuk vt itvnowvt aya kv Finisi, micha Saipilvs, mikmvt Antiak a pit vhlchit inla ka yano keyu, amba Chu vhleha ak bano ho anumpa ha okla isht im anumpohonli tok.

20. Micha kanimi kv Saipilvs hatak, micha Sailini hatak aiena hatuk osh Antiak a ai vla mvt, yvmmak ash ot Klik okla ha im anumpulit Chitokaka Chisvs a isht anumpohonli tok.

21. Yohmi ma Chitokaka ibbak vt awant anta tok, holhti-na laua hosh yimmi cha filemvt Chitokaka ya im ona tok.

22. Yvmohmi ma na yakomi kv annovt, iksa Cheluselem ashwa tok haksobish a ont chukowa tok; mihma Banabas a yvmvt ia kv Antiak a ona chi ho okla pit chvffichi tok.

23. Yvmmak ash osh vla cha, Chihowa im isht il aiyukpa ka pihisa mvt na yukpa tok; micha chukvsh mvt kvllo hosh Chitokaka ya isht asitia chi ka, mominchit atonohonchi tok.

24. Yvmmak okv hatak achukma hosh, Shilombish Ho-



litopa, micha ayimmika aiena kvt anukfoyuka fehna hatuk oka; yohmi ma okla hvt lawvt Chitokaka ya iba kaha tok.

25. Yohmi ma Banabas vt Sal a hoya chi hosh, Tasvs a ia tok.

26. Atuk osh yvmmak ash ahayuchi mvt, ilauehit Antiak a isht vla tok. Mihma yakohmi tok, afvmmi achvfa vhpiesa ka vbanumpuli iksa ya ibai itahobvt okla lawa ka nan im abahanchi tok. Mihma nan ithvna vhleha hvt vmmona ka Antiak ak o, Klaist okla a hohchifo tok.

27. Yvmohmi ma nitak ilvppa foka ma, hopaii vhleha Cheluselem minti kvt, Antiak a ai vla tok.

28. Micha yvmmak ash ot achvft Akabvs hohchifo hosh hikia cha, hohchvfo chinto kvt yakni mominchit a hlopulla chi ka, Shilombish pulla isht ai anohonli tok. Yvmmt Kilatvs Sesa yvt ahanta nitak ak o ont ai ahli tok.

29. Yohmi ma nan ithvna vhleha yvt nana kvt kaniohmit im asha tukmt ik kaniohmi kia, itibapishi vhleha Chutia maya ka isht apelvchi ya pit i pila chi kvt, hatak moma tok.

30. Yvmmak ash okla yohmi mvhli cha Banabas, micha Sal ita tuklo kak o ibbak fohkit, hatak tikba vhleha ya pit pila tok oke.

## CHAPTA XII.

Helot vt vbanumpuli vhleha ha issikkopali.

1. YOHMI ma nitak yvmma foka ma, Helot miko yvt vbanumpuli iksa yatuk a kaniohmi ho, ilbvshala chi kvt ibbak a o weli tok.

2. Micha Chemis, Chan itibapishi ha bvshpo falaia ho isht vbi tok.

3. Micha yohmi ka Chu okla hvt im achukma ho, pisa hatuk osh achakalinchi mvt, Pita ya aieninchit isha chin tok; mihma pvska ik shatvmmo vpa nitak a tok.

4. Atuk osh yvmmak ash hoklit ishi mvt, aboha kvlo pit fohki cha, vbanvblit ont-ia issa ha yo okla ha isht i kohcha

ch<sub>i</sub> mak o, ahni hosh, tvshka chipota ushta bat aya ushta ho apesvcha ch<sub>i</sub> ka, im issa tok.

5. Yohmi hatuk o Pita yashot aboha kvllō ya foka tok; yohmi kia vbanumpuli iksa yvt ymma isht Chihowa pit im asilhha kv<sub>t</sub>, ik yokopo ki tok.

6. Atuk o Helot vt isht kohcha he tuk a, ymma ninak fenak akinli ka, Pita yvt tvli itatak<sub>v</sub>li tuklo hosh isht talaiyakchi ho, tvshka chipota tuklo itin takla yo a nusi tok; yohmi ma apesvchi vt okhissa itikba ya hielit aboha kvllō ya apesahanchi tok.

7. Yvmohmi kash o Chitokaka im enchil vt im vla na tohwikeli kv<sub>t</sub> aboha kvllō anukaka ya tom<sub>m</sub>i tok: mihma ymmak ash osh Pita ya naksi a isso cha, tanichi mvt, Tushpvt tan<sub>i</sub>; achi tok; yohmi ma in tvli itatak<sub>v</sub>li yvt ibbak a a mokohli tok.

8. Mihma enchil ash ot, Il ai vskofachi cha, ch<sub>i</sub> shulush a holó, im achi ma, yvmihchi tok, mihma, Chim anchi a anchi cha, is siakaiyashke, im achi tok.

9. Mihma kohcha mvt iakaiya tok; yohmi kv<sub>t</sub> enchil vt nana a yvmihchi ka ai ahli mak atuk a, ik akostinincho ki tok. Amba nana mak o pisa ho im ahoba tok.

10. Ai atoni vmmona, micha atukla aiena ka ant itiachi mvt, vmaha pila ia tvli holihta okissa ya itvlachi ma, ilap akinlit in tiwa tok; mihma pit kohcha cha, hina achvfa ho fokv<sub>t</sub> ayvt okla tuk o, enchil ash ot ashalika i filvmmi tok.

11. Yohmi ma Pita yvt falamvt kostieni mvt, Chitokaka yvt im enchil a auet chvffichi cha vno a Helot ibbak, micha Chu okla nana ahni tuk puta ka, a sa hlakofichi tuk a, himak a ai ahli mak o ithaiyana lishke; achi tok.

12. Micha nan im anukfihinla mvt Chan, Mak hohchifo ishki, Meli in chuka ya, ymma laua hosh itahobvt vba pit anumpuli hosh maya na, vla tok.

13. Micha Pita yvt apishia okhissa ya ant sukoha ma, ohoyo himita Loti hohchifo hosh ont haponaklo tok.

14. Micha Pita im anumpa ho pit ithana mvt, na yukpa kv<sub>t</sub> apishia ya okhissa ya ik tiwo hosh, amba malelit ant chukowa mvt, Pita yvt apishia itikba ant a hikja ka, anoli tok.

15. Mihma, Ik chi hopoyuksoshke, im achi tok. Yohmi kia i shahlichit, yohmi tuk ash pulla ho mihiha tok; yohmi ma, Im enchil oka, okla achi tok.

16. Yohmi kia Pita ash ot sukoha kvt imoma tok; yohmi ma okla tiwi cha, pisa mvt nukhlakancha tok.

17. Yohmi ma nukhintot maya chi ka, ibbak pit i fahvmmi mvt, kaniohmit Chitokaka yvt ilap a aboha kvlllo isht a kohchi tuk a, im anoli tok; mihmvt, Na yakohmi ka Chemis, micha il itibapishi vhleha aiena ka ivt oh im anoli, achi tok; mihmvt kohchvt ivt inla ho ona tok.

18. Atuk o onnvt taha makinli ho, tvshka chipota vhleha ash ot Pita yvt nanta mak o a katiohmi tuk, ahnit nukhlakancha kvt chohmi tok keyu.

19. Yvmohmi tuk o Helot vt yvmmak ash hoyo tuk osh ik peso mvt, apesvchi vhleha yash achukmalit im asilhhvchi mvt, yvmmak ash o vba chi ka, apesa tok. Mihmvt Chutia ya vttvt ivt Seselia ona cha, yvmmak o anta tok.

20. Mihmvt Helot vt Taia, micha Saitvn aiena ai asha ka isht ik i yukpo fehna tok; yohmi kia miko im vba potvlhpo apesvchi Blastvs a iti kana okla ikbi tok, micha ilap i yakni ya miko i yakni yak osh ai apelvchi atuk aiena hatuk oka, im anukfila mvt ai achvfa hosh im ai vla cha, nanaiya ka ai ahni tok.

21. Yvmohmi ma ai vlhpisa tuk nitak o, Helot vt miko i na fohka ishit shemvt taiyahli cha, im aiasha holitopa paknaka ya binili cha, anumpa isht hikvt im anumpohonli tok.

22. Mihma okla hash ot tahpvlvt, Ilvppvt Chihowa yak o im anumpa, hatak im anumpa yo keyushke; ahanchi tok.

23. Mihma isht aholitopaka ya Chihowa yak o pit ik im isso hatuk o, mih makinli ho Chihowa im enchil vt isso tok, mihma shushi yosh ai ahampa na fiopissa tok.

24. Amba Chihowa im anumpa hvto achakvt isht i shahlit ia tok.

25. Yohmi ma Banabas micha Sal ita tuklo kvt nan isht ahashwvt atahli mvt Chan, Mak hohchifo ka ilauint Cheluselem a ashwvt falamvt ia tok oke.



CHAPTA XIII.

Pal, Banabas ita tuklo kvt oklushi nan ik ithano, ya im ia. 42 Oklushi nan ik ithano vhleha yvt vbanumpa yinmi.

1. YOHMI ma iksa Antiak ahashwa ka kaniohmi kvt hopaii, micha nan im abvchi vhleha, Banabas, micha Simion osh Naika hohchifo, anonti Lusivs, Sailini vtta, micha Manevn, Helot na pehlichy ya iba hofanti tok, micha Sal chohmi kvt maya tok.

2. Okla Chitokaka pit aiokpvchit nahullochit maya ma, Banabas, micha Sal ita tuklo ka, a toksvli im ai atokoli li tuk isht ashwa chi ka, hrs svm atokolashke, Shilombish Holitopa yvt achi tok.

3. Mihma okla nahullochit vba pit anumpuli cha, ibbak a isht umbitepvt taiyahli mvt, okla pit tihleli tok.

4. Yohmi ma Shilombish Holitopa yak osh pit tihleli hoka, ivt Silushi a itonachi tok osh, ymma ashvvt peni vlhtot ivt Saipilvs a itonachi tok.

5. Michs Salemvs a ont ashwa mvt, Chu okla i sinakak puta Chihowa im anumpa isht ai anumpohonli tok. Mihma Chan a il ai apelahanchi akinli tok.

6. Michs tashaiyi ya a hlopullit Pefvs a itonachi mvt, hatak isht ahullo achvfa hopaii ilahobi, Chu hatak Bachisvs hohchifo ho, pisa tok.

7. Yvmmak okvt nahullo miko hatak nan ithana, Sachis Paulvs a awant anta tuk o, yvmmak ash ot Banabas, michs Sal aiena ka hoyo mvt, Chihowa im anumpa ha haklo bvnna tok.

8. Yohmi kia Ilimvs hatak isht ahullo ash ot, hohchifo hvt toshowakmvt yvmmak oka nahullo miko a na yimmika ai i filvmmichi bvnna kvt yvmmak ash im ataklvmmi tok.

9. Mihma Sal mvt, Pal hohchifo akinli hosh, Shilombish Holitopa yvt anukfohkvt kvnia hosh, yvmmak ash atokolit pisa tok.

10. Mihma, Na haksichi, michs. nan ik ai vlhpeso aiena banot isht alotowa, nan isht ahullo okpulo ushi, ahopoyuksa

okluha in tuncp ma! Chitokaka i hina ai ahli puta okpni kvt, ish issa he keyu cho?

11. Mikma, yakeh! himak a Chitokaka ibbak vt chi onvtula hoka, chi lvpakmvt hvshi a chik peso ho ahchiba chi hoke; achi tok. Mihma chekosi makinli ho tohbi, micha okhlilika aienvt onvtula tok. Mihma kana kia ibbak a halvli cha isht aya chi ka, hoyot fullokahanchi tok.

12. Mihma nahullo miko vt Chitokaka im anumpa ha anukhlakancha cha, nana kvt yvmohmi na pisa mvt yimmi tok.

13. Mihma Pal vt itvpeha yash aienvt Pefvs a a hotofi cha, okla mintit Pafilia yakni Peki a ai vla tok. Mihma Chan vt i filvmmmit Cheluselem a falamvt ona tok.

14. Amba Peki a asht kohchvt okla ia mvt, Pisitia yakni Antiak a ai vla cha, nitak hullo a sinakak a ont chukowvt chieya tok.

15. Mihma nan vlhpisa, micha hopaii i holisso puta aiena kash, itim anumpulit atahli ma, sinakak apelhichi vhleha yvt, Hatak, il itibapishi vhleha ma! okla isht im anumpa he anumpa hv hvchim ashakmvt hvsh anumpulashke; achit auet im anoli tok.

16. Mihma Pal vt hikia cha ibbak a pit isht im alvmmmit, Israel okla, micha Chihowa ya i nukshohumpa vhleha hvchia ma! hvsh haponaklashke.

17. Okla ilvppa Israel vhleha in Chihowa yvt pin tikba vhleha ya atokoli mvt, hatak nowvt aya chiyuhmi hosh Echip a okla ahashwa ma, yvmmt holitobli tuk osh, ilap ibbak kvlo pulla kvt yvmmak ash isht akohonchi tok.

18. Micha afvmmi pokoli ushta foka yakni haiaka okla nana a kaniohmi ka, ant ik yohmi, im ahni tok.

19. Micha Kenan yakni a oklushi untuklot ai imaiyachi mvt, i yakni atuk a, na shueli ho, isht ai i hopela tok.

20. Micha yohmi ha ya nan apesa vhleha im a hiohlinchi na, afvmmi tahlepa ushta cha pokoli tahlapit aiena foka ho, Samuel hopaii vt vtta tok.

21. Atuk o i himmakma, miko okla asilhha tok. Mihma Chihowa yvt Sis ushi, Sal, hatak Benchamin isht atiaka yo, i hilechi na afvmmi pokoli ushta tok.



22. Atuk osh yvmmak ash ai ishi mvt, Lewi ak osh i mi-ko ya chi ho okla ha i hilechi tok; yvmmak o pit atokolit, Ilap vt, Lewi Chesse ushi, vno sa chukvsh fehna iakaiya hatak, micha vno nan ai ahni li ya mominchit ai ahlichia chi mako ahayuchi lishke; achi tok oke.

23. Hatak ilvppa isht ai unchululi yo Chihowa yvt ilap miha tok pulla hosh, okchalinchit Chisvs a Islael okla ha i hilechi tok.

24. Yvmmt ik lo kisha ho, Chan vt vmmona ka Islael okla moyuma ka ile kostininchit baptismo ya isht im anum-pohonli tok.

25. Micha Chan vt anumpulit ahanta mvt, Kvta hak o sia hvchim ahoba cho? Vno vto mih mak o sia keyu hoke. Amba siakaiyvt minti kak o, yvmma iyi i shulush a vno vt i hotofi la he si ahoba keyu hoke; achi tok.

26. Hatak itibapishi li vhleha ma! Eblaham isht atiaka ushi, micha kvna hosh hvchi takla ashwa kv Chihowa ya i nukshohumpakma, hvchishno ak o, ai okchaya isht anumpa ilvppv hvchim aya hoke.

27. Cheluselem ai asha, micha i hochitoka aiena kv, yvmma, micha hopaii vhleha im anumpa nitak hullo moma ka itim anumpuli chatuk aiena ka ik ithano hatuk osh, na palvmmi ka onochit yvmmak atuk a, ai-ahlichit tok oka.

28. Micha kaniohmi ho yvmmak okvt isht ai illa he vhpesa kvno, im ai akostininchit keyu ho kakosh, illa he a ahnit, Pailvt a okla im asilhha tok.

29. Micha yvmma isht a holihiso tok a mominchit ai ahlichit okla tahli mvt, iti ash ai ishit akvchi cha ahollopi anu-kaka ya bohyuli tok.

30. Yohmi kia illi tuk a Chihowa yvt tanichi tok.

31. Yohmi ma Kalili ya asht apéhv mintit Cheluselem a ai vla tuk vt yvmma okla pisa na nitak kanohmi tok; mih mak osh yvmma atokowvt okla ha im anoli yoke.

32. Yohmi hosh anumpa achukma pin tikba vhleha ima tok a isht e hvchim anumpulishke.

33. Im vlla vhleha hvpia hak o, Chihowa yvt yvmmak ash isht pim ai ahlichit hosh Chisvs a falamichit tanichi



tok. Yohmi kv̄t ataloa ont atukla ka, Sv̄so chia hoke, himak nitak a chikbi lishke, achit aholisso akinli hoke.

34. Micha yvm̄vt illi tok a falaminchit tanichi ka himakma falamvt ahollopi a chukowa he keyu hatuk o yak ahanchi tok, Lewi i nan isht il aiyukpa ahli ka chima la hi oke.

35. Yvmohmi hatuk o anonti, Chi Holitopa ka ant nan toshbi ka ik pisá, ish-im ahna he keyu hoke, inla ma ai ahanchi hoke.

36. Lewi ak okvto Chihowa nan ahni pulla ho, im okla ha nan isht im ahantvt in taiyaha mvt, illi cha in tikba vhleha ha ibafohkv̄t itoyulvt nan toshbi ma piesa tok oka.

37. Amba Chihowa yvt falaminchit tanichi tok, yvm̄vto nan toshbi nana kia ik peso ki tok.

38. Yvmohmi ka hatak il itibapishi vhleha ma! hatak ilvppa pulla hatuk mak o, nan ai ashvchika puta.isht ka-shofa yvt ishit hvchim anumpa hoka hvsh ithaiyanashke.

39. Micha Moses i nan v̄lhpisa ak okm̄vno yv̄mma kani-ohmit isht hvsh ai i hlakofa he keyu ke tuk kia, na yimmi vt momvt yv̄mma pulla kano okluha isht ai i hlakofi hoke.

40. Yvmohmi hoka ahah! hvsh ai ahnashke; yvm̄mak keyukma hopaii vhleha i holisso ha isht ai anum̄vt,

41. Na shitilema vhleha hvchia hv̄t ho pesa cha, okokko! ahnit, ik hvchi nukhlakanchá; hvchi nitak a nan isht v̄tta ya isht ahanta li ka, kv̄na kia ik hvchim anoli mak o, kani-ohmit nan isht v̄tta yv̄mma a hvchi yimma he keyu, achi kv̄t hvchi onvtula linla hoke; achi tok.

42. Mihma Chu okla hv̄t sinakak a a kohcha wiha ma, okla nan ik ithano vhleha yvt anumpa yakohmi kash ot nitak hullo atuklakma isht im anumpa hinla kv̄t asilhha tok.

43. Yvmohmi tuk o itv̄naha yash ot tisheli ma, Chu okla laua, micha himona v̄banumpuli toba vhleha aiena kv̄t Pal micha Banabas ita tuklo ka apehv̄t aya tok. Mihma yvm̄mak ash ot im anumpulit, Chihowa im ai isht il ayukpa pulla ho ai itv̄nowa chi ka atohnohonchi tok.

44. Atuk o atukla nitak hullo ya tv̄maha chito achv̄fa.

kv̄t momā hosit Chihowa im anumpa hakla chi kv̄t itv̄nalia tok.

45. Yohmi kia Chu okla hv̄to okla laua ya pisa mvt, nukhobelvt alota mvt, Pal vt nana anumpuli ka ik ahobalot na mihachit itachowvt maya tok.

46. Yohmi ma Pal, micha Banabas ita tuklo kash ot nukwaya iksho kv̄t isht i shahlit ia mvt, Chihowa im anumpa hv̄t tikba hv̄chishno ak o a hv̄chim anumpa he mv̄to ai vlhpiesa tuk okv̄no; yohmi kia, yv̄mmak ash naksi ka pit hv̄sh bohli cha, okchayvt bilia he o ik chi ahobo kv̄t isht hv̄sh il anukfihinli hoka, okla nan ik ithano yak o pit il i filemv̄shke.

47. Yakohmi ho Chitokaka yvt pim apihisa mvt, Okla nan ik ithano vhleha ya ish in tohwikela chi, yakni ont vhli fullota kv̄t isht ai okchaya he mako, chi hilechi lishke; ahanchi tuk oke, achi tok.

48. Mihma okla nan ik ithano vhleha yvt ilv̄ppa haklo mvt, okla na yukpvt Chitokaka im anumpa ha aiokpahanchi tok. Mihma okchayvt bilia he isht im vlhpisa tok v̄to momvt yimmi tok.

49. Yohmi na Chitokaka im anumpa hv̄t annovt yakni yv̄mma mominchit a hlopulli tok.

50. Yohmi ma Chu okla hv̄t, v̄banumpuli ohoyo holitompa vhleha, micha hatak holitompa t̄maha asha tuk aiena ka atohnohonchi cha, Pal, micha Banabas ita tuklo ka isht ai ilbv̄shaka ya ilhkolichi tok; micha i yakni a kohchit kanom pit tihleli tok.

51. Yohmi kia iyi hituk chubbi asha tuk a on tahtuli cha, mintit Aikoniv̄m a itvlachi tok.

52. Mihma nan ithv̄na vhleha yvt na yukpa, micha Shilombish Holitopa aiena ka isht anukfohka tok.

CHAPTA XIV.

Pal, micha Banabas ita tuklo kv̄t i palv̄mmi, 1. 8 Pal vt Listi a hatak imomokpulo a hlakofichi na, nan-ishtahullo vhleha hatuk o, okla

hvt ahobvchi, 1. 19 Pal vt tvli isht boa, 21 Tvmaha ilaiyuka hlo pullit aya mvt, falamvt Antiak a itvlachi.

1. **MIHMA** Aikonivm a yokohmi tok; Chu okla i sina-kak o ita tuklot ont chukowa cha, kaniohmit anumpohonli ma, Chu okla, micha Klik okla ai itvpeha kvt laua hosh yimmi tok.

2. Amba Chu nan ik yimmo vhleha hvto okla nan ik ithano a atohnochit, im anukfila ha itibapishi vhleha hash isht i nukkilichi tok.

3. Yvmohmi hatuk o nukwayiksho kit Chitokaka ya isht anumpulit, yvmmak ash ahashwa na hopaki ma, yvmmak ash ot nan isht ahoba, micha na fehna puta aiena kvt yvmma ibbak a isht ai yohma hi a ahni cha, im anumpa hanta ya isht ai ahlichit tok.

4. Yohmi kia tvmaha okla chinto kash ot ita kashapa tok; mihma kashapa kvto Chu okla hak o pit halanli ma, anonti kashapvt vbanumpa isht vta vhleha yak a tok.

5. Atuk osh okla nan ik ithano vhleha, micha Chu okla ha pit aiena kvt i pehlichit ka ai itvpehvt, yvmmak ash ilbvshachit, tvli isht bola chi kvt im anukfilvt maya ma.

6. Akostininchit okla mvt, tihlavt Laikeonia yakni a tvmaha Listi, micha Tabi ita tuklo, micha yakni auct folumpa ka ona tok.

7. Micha yvmmak o vbanumpa isht ai anumpulit okla tok.

8. Mihma Listi a hatak achvfa kvt ishki ikfoka anuka yakinli ho ai imomokpulo tok osh, iyi vt ik kullo hosh, nitak nana nowa tok keyu vt binili tok.

9. Yvmmak ash ot Pal vt anumpuli ka haklo tok; mihma yvmmak ash ot atokowvt pihisa cha, hlakofa he vt yimmi ka akostininchi mvt,

10. Chitoli hosh anumpulit, Wakayvt chiyi a apissvt isht ish hikiashke; achi tok. Mihma yvmmak ashot mullit, micha nowa aiena tok.

11. Mihma okla hash ot, Pal vt nana yvmihinchit na pisa mvt, Laikeonia anumpa ho okla anumpulit chitoli hosh, Chi-



tokaka vhleha yvt hatak o chiyuhmit aka mintit ayvt hvp im vlvshke; ahanchi tok.

12. Micha Banabas a Chupita hochifo mvt, Pal ak okvto anumpuli chito atuk o, Makul's hochifo tok.

13. Mihma in tmaha itikba hikia Chupita ya na holi-tompa isht im vtta yvt, wak nakni chohmi, micha sita bita puta aiena ka ishit holihta okhisa ya vla kvt, okla ai itvpehvt vbit isht aiokprcha he ahni tok.

14. Mihma vbanumpeshi vhleha Banabas, micha Pal ita tuklo kvt haklo mvt, im ilefohka ya ita hlilvffit, okla mvt pit tihlaiyvt okla ha iba chukowa cha, tahpvlvt,

15. Hatak puta ma! na katihmi ho hvchi yakohmi cho? Pishno ak kia hatak hvchishno chohmi pia hoke, mih hosh nan ik ahobo yakohmi ka ai i filvmmmit, Chihowa okchaya, vba shutik, micha yakni, micha okhvt, micha nana puta, yvmma ai ahashwa ka aiena ikbi tok a, hvsh im ona he mak o, e hvchim anumpohonli hoke.

16. Yvmmak okvt nitak tikba ma, oklushi moma ka ilap o inli nana a kaniohmi a ant ik ai itanowá, ahni tok.

17. Yohmi kia ilap fehna isht ai atokowvt anoli a ik takohlichu hosh ahanta tok keyu; yohmi kvt nana ka achukmali hosh umba vba minti, micha na waya achukma nitak aiena ka auct hvp ihima cha, pi chukvsh a ilhpak, micha na yukpa aiena ka, isht alotohonli hoke; ahanchi tok.

18. Micha ilvppa ahaya pulla hosh na kvni okla ha yokbli na, yvmma okla nan ik im abo ki tok.

19. Yvmolimi ma Chu hatak kanomona Antiak, micha Aikonivm aiena mintit vla cha, okla ha ant atohnochit, Pal a tvli isht bolit, illi ho im ahoba cha hvllat tmaha ha isht kohchi tok.

20. Yohmi tuk kia, nan ithvna vhleha yvt afolublit hinli ma, tani cha, tmaha ha ant chukowa tok. Atuk osh nitak ont atukla ma, Banabas awant Tabi a ia tok.

21. Atuk osh tmaha yvmma vba isht im anumpulit, micha lawa ho nan im avvchi mvt, falamvt anonti Listi, micha Aikonivm, micha Antiak aiena kash itvlachit,

22. Nan ithvna vhleha im anukfila hlampkochi, micha ayimmi kv̄t achunancha ch̄i h̄o atohnochi mvt, na palummi laua ka il a hlopulli pulla hosh Chihowa apehliechika yā e chukowa hi oke; achi tok.

23. Micha vbanumpuli ik̄sa moma pehlich̄i aiyuka atokolit hiohlechi cha, nabullochit vba pit anumpulit issa mvt, Chitokaka yvmmak o okla anukcheto tuk ash pit im issa tok.

24. Micha Pisitia hlopulli mvt, Paḡlia itvlachi tok.

25. Micha anumpa hash P̄rki a isht ai anumpuli cha, Atelia itonachi tok.

26. Atuk osh yvmmak o peni ai vlhtot Antiak yvmmak o toksula ch̄i ka Chihowa im aholitopaka hi o, pit im issa tok ash ai ahlich̄i tuk vt itonachi tok.

27. Micha itvlachi cha ik̄sa yā itahobi cha, Chihowa yvt isht kaniohmihinch̄i tuk moma, micha okla nan ik ithano vhleha yā ayimmika okhissa yā ik tiwi tuk aiena ka, im anohonlit okla tok.

28. Micha yvmmak o nan ikhvna vhleha yā awant ahashwa na hopaki tok oke.

## CHAPTA XV.

Hakshup t̄rpa isht ai itachowa, 1. 6 Vbanumpeshi vhleha hv̄t isht itim anumpulit māya. 22 Ai apissalechit im anukfila ha tok.

1. MIHMA hatak kaniohmi Chutia mintit ai vla tuk vt, itibapishi vhleha h̄a nan im abv̄chit, Moses i nan vlhpisa ak o chohmit hakshup hv̄chi tapa keyukmvt, hv̄chi okchaya he keyushke; achi tok.

2. Yohmi na Pal, micha Banabas ita tuklo kv̄t yvmmak ash itachowvt itim inla fehna mā, Pal, micha Banabas anonti inlaka kaniohmi aiena kv̄t anumpa itachowa tok, ilvppak atuk vt vbanumpeshi vhleha, micha asononchika vhleha aiena ka Cheluselem a im ona ch̄i ka, okla apesa tok.

3. Mihma ik̄sa vhleha yvt pit ahev̄t aya na kohchvt ilhkoli mvt, okla nan ik ithano vbanumpuli toba tuk a anohon-

lit, Finisi, micha Samelia aiena ka hlopulli tok; micha itibapishi vhleha ya mominchit yukpali chinto tok.

4. Atuk osh Cheluselem ash itonachi ma, ikxa vhleha, micha vbanumpeshi vhleha, micha asononchika vhleha aiena kvt aiokpanchi tok. Mihma Chihowa yvt ilapo a nana isht a kaniminchit tuk a mominchit anoli tok.

5. Yohmi kia Falisi ikxa kaniohmi na yimmi atuk vt wakaya cha, Hakshup a in tvpli cha, Moses i nan vlhpisa ha holitobla he aiena ka im apesa he vlhpiesvshke; ahanchi tok.

6. Yvmohmi ma vbanumpeshi vhleha, micha assononchika vhleha aiena kvt anumpa ilvppa anukfillit pisa chi kvt itvnaha tok.

7. Atuk osh itachowa chuma naha ma, Pita yvt wakaya mvt, Hatak itibapishi li vhleha ma! nitak hopaki kash Chihowa yvt hvpin takla ma auet ai atokoli ka, yvmmtv svtih ak o okla nan ik ithano vhleha yvt vba isht anumpa anumpa ka a haiyaklo cha, yimma hi a tok a, hvsh ithaiyanvshke.

8. Micha Chihowa yvmmak osh chukvsh puta ka ithaiyana kvt, aiokpanchi hosh Shilombish Holitopa ihima kvt hv-pishno yo chash itilauechi hoke.

9. Micha hv-pishno a ymma a pit im invchi keyu, yimmi hatuk o chukvsh a i kashohufi hoke.

10. Yvmohmi ka nanta katihmi ho Chihowa hvchik anukcheto hosh, nan ithvna vhleha ikonla ya ikonla abana ymma pin tikba vhleha, micha hv-pishno aiena kvt e lauwi cha, e shala he keyu ka, ymma hvsh onochi cho?

11. Yohmi kia Chitokaka Chisvs Klaist achukma pulla hatuk mak o, pi okchaya kvt yvmmak inli il itilaua he aiah-nit pi yimmishke; achi tok.

12. Yohmi ma okla laua yvt lumvt chieyvt, Banabas, micha Pal ita tuklo Chihowa yvt ilapo a, na fehna, micha nan isht ahoba puta aiena kaniohmi ho okla nan ik ithano vhleha itin takla ya, isht a yvmihinchit tuk a anoli ka haklo tok.

13. Okla hv lumvt chieya ha yano, Chemis vt achakalinchit mvt, Hatak itibapishi li vhleha ma! hv sa haponak-lashke.



14. Chihowa yvt vmmona ka oklushi nan ik ithano a kaniohmit aiokpanchit okla ilap isht hohchifa chi ka akohchit ishi tuk a, Simion vt anohonli tok.

15. Micha hopaii vhleha im anumpa hvt ilvppak o ai achvfvshke.

16. Yakohmi ha ma falama lish, Lewi in chuka kinafa tuk a falaminchit ikbi la hi oke; micha okpulo tuk a falaminchit ikbit hilechi la hi oke.

17. Yvmmv tatak a kashampa, micha okla nan ik ithano vhleha moma sa hohchifo ha isht a hohchifo tuk puta kv, Chitokaka ya okla hohoya chi ka, yvmmak osh na yakohmi moma ka yvmihchi mak osh Chitokaka yvt achishke; achi holisso tok a.

18. Ummona pillvt isht auehinchi ka Chihowa yvt ilap nana a kaniohmi puta ka mominchit ithaiyana chatuk.

19. Yvmohmi hoka okla nan ik ithano atuk filemvt Chihowa ya im onvt maya ka, kil anumpulicho ka he ak o, vno vt aiahni lishke.

20. Amba na holba toba puta isht ai okpulo, micha oho-  
yo himita itin lumaka, mikmv nana kv nuksitvt illi puta, micha issish aiena ka ik ahalaio ka chi kak o pit iloh i holis-  
sochashke.

21. Nitak hopaki isht auehinchi ka, Moses i holisso ha tmaha moma, kvna hosh isht ai anumpohonlikma, nitak hullo moma, sinakak a ai itim anumpohonli chatuk oka; ahanchi tok.

22. Mihma vbanumpeshi vhleha, micha asononchika vhleha, iksa vhleha moma ai itvpeha kv ilap ai itvpeha akinli, hatak ai vlhtoka ho Pal, micha Banabas ita tuklo ka ai itvpelinchit Antiak a pit tihlela he, vlhpesa ahni tok Chutvs osh Basabas hohchifo, micha Sailvs itatuklo itibapishi vhleha ya moma i shashonli kak a tok.

23. Micha holissochit ibbak fohki kv yakohmichi tok. Ubanumpeshi vhleha, micha asononchi ka, micha itibapishi vhleha aiena kv, itibapishi vhleha okla nan ik ithano a tok Antiak, Silia, micha Selisia puta aiasha ka pit aiokpvchishke.

24. Yvmohmi kv hatak kaniohmi ilvppa isht ia tuk osh,

anumpa isht hvchi ataklvmmmit hvchi shilombish okpanit, Hvchi hakshup vt tupa cha, nan vllhpisa ya hvsh holitoblashke, ahanchi tuk a e haiyaklo tok; yvmmak oka il atohnok tuk keyu hoke.

25, 26. Chukvsh vt achvfa chohmit itvnahvt e chieya mvt, hatak vllhtoka hvpin Chitokaka Chisvs Klaist hohchifo pulla ka ilap im ilhfiopak a a kaiyanchi chohmi hatak o, pi holitopa Banabas, micha Pal ita tuklo ka ai itvpehvchit pit a hvchin tihlela he a, vllhpesa il aiahni tuk.

27. Yvmohmi hatuk osh Chutvs, micha Sailvs aiena ka pit e hvchin tihleli hoka, mihi yosh yvmmak ash fehna ka itih ho isht hvchim anohonla hi oke.

28. Yvmohmi ka Shilombish Holitopa, micha pishno il aiena kvv nana kvv weki kvv ai vllhpesa ilvppa chohmi ka, ai i shahli ho e hvchi onoicha he keyu kak o vllhpiesa il aiahni tuk oke.

29. Yohmi kvv nipi na holba toba pit im issa tuk, micha issish, mikmvt nana kvv nuksitvt illi tuk puta, micha ohoyo himita itin lumaka aiena kak o, hvchik ahalaio kashke. Yvmmak o hvchik il ahalaiacho hokmvtto hvsh vllhpiesa hi oke. Hvchi achukmakashke; achi tok.

30. Yohmi na okla pit tihleli ma, Antiak a ai vla tok; micha okla laua ya itahobit tahli mvt, holisso hash ima tok.

31. Mihma yvmmak ash okla itim anumpuli mvt, nan im annoa kvv okla na yukpa tok.

32. Mihma Chutvs, micha Sailvs ita tuklo kvv, ilap mvt hopaii akinli hatuk okvt, itibapishi vhleha ha anumpa lava ka isht atohnohonchi cha kvvlochi tok.

33. Atuk osh yvmmak osh ahashwa na ahchieba ma, itibapishi vhleha vt aiokpanchi cha vbanumpeshi vhleha ha pit in tihleli tok.

34. Yohmi kia Sailvs vto yvmmak inli ahanta kak osh im vllhpiesa tok.

35. Pal ak kia, micha Banabas aiena kvv Antiak a, inla laua ho ai itvpehvt mayvt Chitokaka im anumpa ha im abahanchi, micha isht im anumpohonli aiena tok oke.

36. Yvmmak atuk a nitak ont isht kaniohmi ma, Pal vt

Banabas ash, Anonti ivt tvmalia moma Chitokaka im anum-pa il ai anumpohonli tuk vt, il itibapishi vhleha ha i nowvt ayvt kaniohmi hosh ai ashakma e pisashke; im achi tok.

37. Mihma Banabas vt Chan osh Mak hohchifo ka ilau-ehit aya lhi a ahni tok.

38. Yohmi kia Pafilia ai i filvmmi cha iba takla nan isht vttvt ik ayo ke tuk ash, ilauelit aya ik vllhpeso, Pal vt ahni tok.

39. Mihma itachowa kvv kullo fehna hatuk osh, iti filvmmi okla tok. Yohmi ma Banabas vt Mak a ilauei cha peni fokhvt Saipilvs a ona tok.

40. Mihma Pal vt Sailvs a hoyo cha itibapishi vhleha yvt Chihowa im aholitopa he mak o, pit im issa ma, ia tok.

41. Mihmvt yvmmak ashot iksa vhleha ya hlampkochit isht ayvt, Silia, micha Silisia aiena ka hlopulli tok oke.

## CHAPTA XVI.

Pal vt Timohli a hakshup tvpli, 1. 14 Litie vt vbanumpuli toba.  
24 Aboha kullo apesvchi vt vbanumpuli toba.

1. YUMOHMI mvt Tabi, micha Listi aiena ka vla tok. Mihma yvmma nan ithvna achvfa Timohlivs hohchifo hosh anta tok; Chu ohoyo na yimmi o ushi; amba iki okvto Klik hatak a tok.

2. Yvmmak oka itibapishi vhleha Listi, micha Aikonivm aiena aiasha kvv ahnichi tok.

3. Yvmmak osh takla aya hi a, Pal vt aiahni tok; micha ishi cha hakshup tvpli tok, yakni koyofa yvmma aiasha kvto Chu vhleha hatuk o, micha iki okvto Klik hatak a momvt ithana hatok oka.

4. Micha tvmaha puta a hlopullit aya mvt, nan vllhpisa vbanumpeshi vhleha, micha hatak asononchi aiena Cheluselem aiasha kvv apesa tuk a, holitobla chi ka ihmvt okla tok.

5. Yvmohmi ho iksa puta kvv yimmi kvv kullot hiohli ma, holhtina mvt laua kvv nitak atukma, i shahlit ia tok.

6. Yvmohmi ma Fichia, micha Kaleshi yakni aiena a hlo-



pullit okla, micha Asia a anumpa ha isht ai anumponla he keyu, Shilombish Holitopa yvt i miha tuk o,

7. Mishi a itvlachi mvt, Bihlinia chukowa bvna tuk kia, Shilombish vt vlhpesa, ik im ahno tok.

8. Yohmi ma Mishi a ant itiachi mvt, Tloas a itvlachi tok.

9. Mihma ninak o, Pal a nan isht ahoba yvt ant i haiaka tok. Masetonia hatak osh hikia cha, im asilhhvchit, Masetonia ak o vla cha ant pi apelá, ahanchi tok.

10. Mihma yvmmak oka vbanumpa ont isht il im anum-pula he mako, Chitokaka yvt auet pi hoyo tok pulla ka, pim anukfihinla mvt, nan isht ahoba ka pisa tuk a, in chekosi ma, Masetonia ya ia pi bvna tok.

11. Yohmi cha Tloas a il a hotoffi mvt, auet apissalint mintit Samoleshi e la tuk osh, nitak atukla ka Niapolis a e la.

12. Micha ymma ashwt il ia mvt, Filippi, ymmak okvt tmaha chito kvt Masetonia yakni koyofa ymma moma i shahli, okla wiha a binili a e la tok. Micha tmaha ymma il ashwa na nitak kanohmi tok.

13. Micha nitak hullo ma tmaha kohchvt ivt okhina la-pali ka, ymmak o vba pit ai anumpuli chatuk a, ont e chieya mvt, ohoyo hv itahohumba ma il im anumpuli tok.

14. Mihma Chihowa aiokpanchi ohoyo achvfa Litie hoh-chifo, na humma lusbi kanchi, Hlaiataila tmaha vta yvt pi haklo tok; mihi yo chukvsh o Chitokaka yvt tiwi na Pal vt nana isht ai anumpohonli ka anukfohka tok.

15. Micha ilap vt in chuka chvfa aienvt baptismo mvt, asilhhvchit, Uno vt Chitokaka ya pit im ai ahli li ka hvchim ahobakmvt, an chuka ya ont hvsh chukowa cha hvsh ash-washke; ahanchi mvt, pi atushpalechi tok.

16. Yakohmi tok, vba pit ai anumpuli ia hosh il aya ma, ohoyo himita achvfa kvt isht ahullo shilombish anukfoka hosh pi afama tok; ymmak okvt nan anoli ilahobit vlhto-ba chinto i shahli vhleha isht im ahayuchi a tok.

17. Ymmak ashot Pal, micha pishno aiena ka piakai-yvt aya mvt tahpvlvt, Hatak yakohmi kvt Moma i Shahli Chihowa yako, in tvshka vhleha yosh ai okchaya hina hvvim abahanchi hoke; ahanchi tok.

18. Mihmvt ilvppa yakohomi na nitak kanohmi tok. Yohmi kia Pal vt ik im vllpeso hatuk osh filema mvt, shilombish ash, Chisvs Klaist ho<sup>h</sup>chifo pulla ho, chishno vt yvmma ish akohcha ch<sup>i</sup> ka, ch<sup>i</sup> miha lishke; im achi tok. Mihma yvmmak ashot mih makinli ho kohcha tok.

19. Yvmohmi ma i shahli vhleha yvt nan isht ai ahayunchi ashot kvnia na pisa mvt, Pal, micha Sailvs ita tuklo ka hokli cha, hvllat ishtivt nan vpa a kanchi a isht chukowvt, hatak pehlich<sup>i</sup> vhleha ya isht im ona tok.

20. Micha ishtivt tvshka chipota i miko vhleha ya isht im ona cha, Hatak ilvppvt Chu okak osh hvpin tvmaha ha ataklaiyvmmi fenvshke.

21. Micha Lom okla pia hvt, nan vllpisa yvmma il aiokpvchi cha, e holitobla he pim ai vllpesa keyu ka pim abahanchishke; ahanchi tok.

22. Yohmi ma okla laua yashot im a svnali himona achvfa wakaya tok; mihma tvshka chipota i miko vhleha yashot im ilefohka ya okla i shueli mvt bola ch<sup>i</sup> ka, okla apesa tok.

23. Mihma f<sup>r</sup>ma l<sup>a</sup>wa ho okla onochi mvt, aboha kvllo apesvchi a achukmalit apesahancha ch<sup>i</sup> ka im apesvt tahli cha, aboha kvllo pit apitta tok.

24. Yvmmak ashot nana kv<sup>t</sup> yakohmit im vllp<sup>i</sup>hisa mvt, aboha kvllo anykaka pilla pit apitta cha, iti iyi isht akvllo isht a kvlloch<sup>i</sup> tok.

25. Yvmohmi tuk o ninak iklvna ma, Pal, micha Sailvs ita tuklo kashot vba pit anumpulit, Chihowa pit aiokpvchit in talohowa tok; mihma aboha kvllo vllhpinta tuk vt haiyaklo tok.

26. Mihma yakosi fena makinli ho, yakni winakvchi chinto na, aboha kvllo nutaka intola yvt ilhkoli tok: mihma ashali<sup>k</sup> okhissa yvt momvt tiwa ma, momvt im isht talakchi yvt i mokohli tok.

27. Mihma aboha kvllo apesvchi yvt nusi tuk vt okcha cha, aboha kvllo okhissa puta kv<sup>t</sup> tiwa ho pisa mvt, aboha kvllo vlhto a tihlaiyvt tamoa tuk a, im ahoba mvt i bvshpo falaia ya hvllat shufi kv<sup>t</sup> ile ba chin tok.

28. Yohmi kia Pal vt chitolit pit tahpvlvt, Momvt ilvppa e maya hoka, nana kia chik ile kanihcho kashke; ahanchi tok.

29. Mihma p<sub>v</sub>la h<sub>a</sub> pit hoyo cha, m<sub>v</sub>let pit chukow<sub>v</sub>t w<sub>v</sub>nihinch<sub>i</sub> hosh v<sub>l</sub>a m<sub>v</sub>t, Pal, micha Sail<sub>v</sub>s ita tuklo itikba y<sub>a</sub> ant hlipia tok.

30. Mich<sub>a</sub> pehlichit kohcha m<sub>v</sub>t, Hatak h<sub>v</sub>echia ma! sai okchaya ch<sub>i</sub> k<sub>v</sub>to nanta k<sub>o</sub> katiohmi la ch<sub>i</sub> cho? achi tok.

31. Yohmi ma, Chitokaka Chis<sub>v</sub>s Klaist ak o ish i yim-mashke, mikmak osh chishno, micha chin chuka ach<sub>v</sub>fa aien<sub>v</sub>t chi okchaya hi oke; achit okla tok.

32. Mich<sub>a</sub> Chitokaka im anumpa h<sub>a</sub> ilap, micha in chuka an<sub>u</sub>ka y<sub>a</sub> m<sub>a</sub>ya tuk ash a mominchit isht im anumpuli tok.

33. Mihma ninak h<sub>v</sub>shi kan<sub>v</sub>lli isht v<sub>l</sub>hpisa mih makinli h<sub>o</sub> ishi cha, a f<sub>v</sub>ma tuk a achifa tok; mihma ashalika ilap v<sub>t</sub> in chuka ch<sub>v</sub>fa m<sub>o</sub>m<sub>v</sub>t baptismo tok.

34. Mich<sub>a</sub> pehlichit im aboha y<sub>a</sub> ishit chukowa m<sub>v</sub>t, ilh-pak a itikba in talohli m<sub>v</sub>t, in chuka ch<sub>v</sub>fa y<sub>a</sub> a moyum<sub>v</sub>t Chihowa y<sub>a</sub> yimmit na yukpa tok.

35. Yvmohmi tuk o on<sub>v</sub>t taha ma, t<sub>v</sub>shka chipota i m<sub>i</sub>-ko v<sub>h</sub>leha y<sub>v</sub>t anumpeshi a pit tihleli m<sub>v</sub>t, Hatak yvm<sub>v</sub>t ant ik itiachi, ahanchi tok.

36. Atuk o aboha k<sub>v</sub>llo apes<sub>v</sub>chi y<sub>v</sub>t Pal a anumpa il<sub>v</sub>p-pa im anolit, T<sub>v</sub>shka chipota i m<sub>i</sub>ko v<sub>h</sub>leha y<sub>v</sub>t ant ik ay<sub>a</sub>, a<sub>v</sub>et h<sub>v</sub>chim aiahni tuk oke; yvmohmi hoka himak ano koh-ch<sub>v</sub>t i<sub>v</sub>t, na yuk<sub>v</sub>t h<sub>v</sub>sh ayashke, achi tok.

37. Yohmi kia Pal v<sub>t</sub>, Anumpa v<sub>l</sub>hpisa yosh pi on<sub>v</sub>tula keyu ka, Lom hatak pia ho kak o haiak<sub>v</sub>chi hosh pi fahami cha, aboha k<sub>v</sub>llo y<sub>a</sub> pit pi apitta tuk; yohmi kash ot an<sub>o</sub>ti peh luma hosh pi kohchi hoh cho? Yohma he keyu pul-l<sub>v</sub>shke. Amba ilapo inlit ai v<sub>l</sub>a cha, isht pi kohchashke; im ahanchi tok.

38. Atuk o anumpeshi ash ot anumpa il<sub>v</sub>ppa t<sub>v</sub>shka chi-pota i m<sub>i</sub>ko v<sub>h</sub>leha yash ont im anoli tok. Mihma yvm<sub>v</sub>t Lom hatak atuk o okla haklo m<sub>v</sub>t, nukshopa tok.

39. Mihm<sub>v</sub>t ai v<sub>l</sub>a cha ant im asilh<sub>v</sub>t, isht kohchi m<sub>v</sub>t, t<sub>v</sub>maha h<sub>a</sub> a kohch<sub>v</sub>t okla hinla ka, im ahni tok.

40. Mihma aboha k<sub>v</sub>llo a a kohch<sub>v</sub>t ia m<sub>v</sub>t, Litie in chuka ont chukow<sub>v</sub>t okla tok; micha itibapishi v<sub>h</sub>leha y<sub>a</sub> pisa cha hopohl<sub>v</sub>lit tahli m<sub>v</sub>t, kohch<sub>v</sub>t itiachi tok oke.



## CHAPTA XVII.

Pal vt Hlessalonika ya vba isht ai anumpuli, 1. 10 Pal vt Belia ako ai anumpuli. 15 Pal vt Ahlens a ai anumpuli.

1. YUMOHI kashot Amfipolis, Apollonia aiena ka hlopullit okla mvt, Hlessalonika yvmmak o Chu okla i sinakak vt hikia ho itvlachi tok.

2. Mihma Pal vt yvmmak o a yohmi atuk okvt ont iba ehukowa cha, nitak hullo nitak tuchina ka Holisso Holitopa ya ai isht okla ha im anumpohonli tok.

3. Klaist vt issikkopa he, micha illi tuk osh falamvt tana hi vt ai vlhpiesa tok, isht i fahpullit im avrchit, yvmohmi ka Chisvs ilvppa vno vt isht hvchim anumpohonli li kak osh, yvmvt Klaist mak oke; achi tok.

4. Mihma kanimi kvt yimmi mvt Pal, Sailvs ita tuklo kash iba kaha tok. Mihma Klik hatak vbanumpuli laua fehna, micha ohoyo holitempa aiena kvt kanomosi tok ke-yushke.

5. Yohmi kia Chu okla nan ik yimmo hokvto anukhobela mvt, hatak haksi nan isht vta ik im iksho kaniohmi ho pehliehit itvnali cha, tmaha okla ha mominchit nukhlakashlit, Chesvn in chuka ya o yihlepa tok; micha pehliehit kohchvt okla isht im vla chi hosh yvmmak ash hoyo tok.

6. Atuk osh yvmmak ash okla ik ahayucho mvt, Chesvn micha itibapishi vhleha kaniohmi ka-aieninchit, hvllat tmaha apehlichei vhleha ya isht im ona cha, tahpvlvt, Yakohmi kvt yakni a shot filimmi tuk vt ilvppak kia ai vlshke.

7. Mihiyo Chesvn vt pehliehit ishi tuk; micha yakohmi kvt momvt Sesa i nan-vlhvisa ai ahalaia keyu ho, okla yvmohmit, miko inla Chisvs vt asha hoke, ahanchishke, achi tok.

8. Mihmvt okla puta, micha tmaha apehlichei vhleha aiena kvt na yakomi ka haklo ma, nukhlakashli tok.

9. Mihmvt Chesvn, micha inla aiena anumpa nana ho im ai ishi kvt im vlhpesa mvt, asht ik itvnova, okla im ahni tok.

10. Mihma itibapishi vhleha yvt ashalika ninak o Pal, Sailvs itatuklo kash Belia pit tihleli tok; yvmmak ash itonachi mvt, Chu okla i sinakak o ont<sup>a</sup> abeha tok.

11. Yakohmi kvto hochukma kvv Hlessalonika maya ka i shahli tok, im anukfila mominchit isht aiokpanchit anumpa ha ishi hatuk osh, micha yvmmvv yohmi ho mvhli ho chishba, nitak moma Holisso Holitopa ya a hohoyo tok.

12. Yvmohmi hatuk osh okla yvmmvv laua hosh yimmi tok; mihma Klik ohoyo holitompa vhleha, micha hatak aiena mvt kanomosi tok keyushke.

13. Yohmi kia Chu okla Hlessalonika asha kvv, Pal vt Chihowa im anumpa ha Belia ya isht ai anumpohonli ka pit akostinichi mvt, yvmmak ash kia okla ai vla cha, okla ha ant okpvi tok.

14. Mihma ashalika itibapishi vhleha ash osh Pal a okhvt ak o ia chohma chi ho, pit chvffichi tok. Amba Sailvs, micha Timohlivs itatuklo kvto yvmmak inli ho ashwa moma tok.

15. Mihma Pal ilauet isht okla aya tuk vt Ahlens a isht ona tok; micha Sailvs, Timohlivs itatuklo kvv tushpa fehvt im itonancha chi ka, pit i miha, anumpa ishi mvt, okla ilhkoli tok.

16. Yohmi ma Pal vt yvmma pit hoyo hosh Ahlens a anta takla cha, vmaha hvv na holba toba banot isht alotowa na, pihisa mvt im anukfila hvv ik vlhpeso ki tok.

17. Yvmohmi hatuk osh Chu okla, micha vbanumpa ahni vhleha aiena ka, sinakak micha kvna ho nana ai itatoba ai itafama hokv nitak moma ai im anumpohonli beka tok.

18. Mihma hatak nan-imponna Epikulvs iksa, micha Is-toik okla aiena kaniohmi kvv, yvmma okla itim anumpuli tok. Mihma kanimi kvv, Anumpuli shahli ilvppvt nanta ko acha hinla? achi ma; kanimi kvv, Chisvs, micha falamvt tani aiena isht im anumpuli hatuk o, Yakni kanima nan isht ahullo ho isht anumpuli ha chinishke; achi tok.

19. Michi okla ilauelit ishtivv, Mas nvnih a isht ona mvt, Ilvppvt anurapa himona nana ho isht ish ai anumpuli hatukma, il ithvna hinla cho?

20. Chishno yokvt nan inla nana mak o pi haksobish a ant ish foyuki hoka. Yohmi hoka ilvppvt kaniohmi hatuk okma il akostinincha hinlvshke; ahanchi tok.

21. Ahlens okla moma, micha yakni inla hatak puta yvmma aiasha aiena kv̄t, nan inla yō keyu, amba na himona fehna anoli, keyukmvt haklo hokmá, nana hosh aiasha bilia hatok oka.

22. Yvmohmi ma Pal vt Mas nv̄nih iklv̄nna ya hikia cha, Ahlens okla hv̄chia mā! nana a kaniohmi puta ka na holba toba ya hv̄sh aiokpanchi fehna hō, hv̄chim akostininchi lishke.

23. Ant ia li kv̄t hv̄chi na holba toba puta ka pihisa li mvt, vba tula ya, Kv̄na ik ithano Chihowa mak o, achi, ilvppak osh isht ai o holisso ka pisa li hokvno. Yohmi hoka hv̄sh ithana keyu hosh, pit hv̄sh aiokpahanchi chatuk, mihmak o, vno vt hv̄chim anohonli lishke.

24. Chikowa yakni, micha nana moma yvmma anukaka aiasha aiena ka ikbi tok; yvmmak okvt vba shutik, micha yakni aiena ka in Chitokaka yokvt tempel puta ibbak a isht toba ya, ai ahanta keyu.

25. Michā nana hosh ik im iksho hatuk o, hatak ibbak vt im isht anta chatuk keyu; yvmmak osh moma ka okchaya, micha im ilhfiopak, micha nana moma aiena ka ihima hatuk oka.

26. Michā issish achvfa hō, hatak oklushi moma yakni paknaka a mominchit aiasha hi a ikbi tok; mihmvt nitak kaniohmi vlhpisa hō, micha kanima yō aiasha he puta ka, apesa tok.

27. Yvmmv̄t Chitokaka ya hoyā chi hatok; yvmmak okvto eho moma ka hv̄pi mishemanchi keyu nana kia, yohma he yobakmvt, pasholit hoyo fehna cha, yvmmak oka ahayucha hinla hoke.

28. Hv̄pishno vt yvmmak o iloh ai okchaya, micha ilhkolit, iloh aiasha hoka. Hv̄chim ataloa ikbi kaniohmi kv̄t, Hv̄pishno ak kia yvmma ushi hv̄pia hoka, ahanchi akinli tok oka.

29. Yohmi ka Chihowa ya ushi vhleha pia hokvt, Chih-



wa imma ya twli holisso lakna okmá, keyukmvt, twli hvta, keyukmvt twli, hatak nan isht vttá imponna nána anukfilli hosh, na holba ikbi ya chohmi hoka, hvvim ahoba he tuk keyu hoke.

30. Nan ik ithaiyano nitak yvmmak foka hokvno, Chiho-wa yvt tohmosonli hosh pihisa tok kia; amba himak okvno hatak okluha kanima moyuma ahanta kvv ile kostininha he ak o, im apihisvshke.

31. Hatak a ilapo inlit atokoli tok, yvmmak o yakni a ai ahli banot nan isht im apesa he vt nitak a apesa tok okvt; illi tuk a tanichi hosh moma ka im ai ahlichí tok; ahanchi tok.

32. Illi falamvt tana he puta okla haklo mvt, kanimi kvv isht yopula tok; mihma kanimi kvv, Anonti himmakma ilvppa e chim a hakla hi oke; achi tok.

33. Yakohmi ho Pal vt okla iklvnnaka ya, akohcha tok.

34. Yohmi kia hatak kaniohmi kvto yimmi cha, yvmmak ash ibakaha tok. Yvma iba takla kvv Taionishv, Mas nvni nána ai apesa, micha ohoyo Tamelis hohchifo hosh, anonti inla ai itvpeha tok oke.

## CHAPTA XVIII.

Pal vt Kolinhla, a ibbak isht a toksvli, micha vba isht ai anumpuli aiena, 1. 9 Holhpokuna hosh isht ai i yiminta.

1. NANA kvv a yakohmi ha ya, Pal vt Ahlens a akohchvt ia mvt, Kolinhla a vla tvk.

2. Micha Chu hatak achvfa Akuila hohchifo, Pantv ai vttá tok vt, tekchi Plisilla ita tuklo kvv, Kilativs vt Chu vhleha yvt momvt Lom a akocha wiha chi ka, apesa hatuk o, Itili ya ashvvt itvlachi tuk a cheki hosh ashwa na, pisa mvt yvmmak o im ona tok.

3. Micha ilap vt a toksvli itim ai achvfa hatuk okvt, takla ahantvt toksvli tok; yvmmak okvt isht vlhtipo ikbi im vlhtayak vhleha ha tok okvt.

4. Mihmvt sinakak a nitak hullo moma ai anumpulit, Chu vhleha, micha Klik okla aiena ka nukfokichi tok.

5. Atuk o Sailvs, micha Timohlivs ita tuklot Masetonia ashvvt itvlachi ma, Pal vt chukvsh vt a yimihinta mvt, Chisvs ak osh Klaist pulla mak atuk a, Chu okla ha im abahanchi fehna tok.

6. Mihma okla i sanalit ik ahobalot anumpuli ma, ilap im ilefohka ya wilohli mvt, Hvch issish vt hvchi noshkobo akinli ho onutulashke, vno vto sa kashofvshke. Himmak pilla ano okla nan ik ithano vhleha ak o im aya la chi hoke; im achi tok.

7. Michä yvmmak ash akohchvt ia mvt, hatak achvfa Chvstvs hohchifo, Chihowa aiokpahanchi in chuka ont chukowa tok. Yvmma in chuka yvt sinakak o bilikasi ho, talaiä hatok.

8. Mihma Kisvvs sinakak apehlichika yvt in chukachvfa moma ai itvpehvt, Chitokaka ya i yimmi tok. Mihma Kolinhla okla hvv haklo mvt, laua hosh yimmi cha baptismo tok.

9. Mihma Chitokaka yvt ninak o, Pal vt holhpokuna chohmi ka im anumpulit, Chi nukshopa na, amba anumpuli, micha lumvt chik asho kashke:

10. Vno vt chi awant aya li hoka; hatak nana hosh chi onvtulvt chi hotopala he keyu hoke, tmaha ilvppa okla lauvt vm ai ashwa hoka; im achi tok.

11. Mihma Chihowa im anumpa ha ai im avvchit ahanta na avvmmi achvfa cha hvshi hannalit aiena tok.

12. Atuk o Kalio vt Akaia i nahullo mikot ahanta ma, Chu okla hvv im anukfila ai achvfa chohmit, Pal a o kinafvv ishit nana ai apesa ya isht ona mvt,

13. Nan-vlhvsa ya ai ahalaia keyu ka, Chihowa ya aiokpvcha chi ka, hatak ilvppvt okla ha atohnohonchishke, achanchi tok.

14. Mihma Pal vt ilap itih ha wakkvmma chi foka ma, Kalio vt, Chu okla hash nana kvv ik vlhpeso, keyukmvt, okpulo fehna nana hatuk okmvno, vno vt hvchim aiokpanchi la hi a, ai vlhpiesa he tuk oke, Chu okla hvchia ma!

15. Amba anumpa, micha hohchifo puta, mikmvt hvchi nan-vlhvsa imma aiena isht anumpa hatukmvno, hvchishno

akinli hosh yummuno isht hvsh ashashke. Uno yokvto nana yumma chohmi hokvno, non apesvt ahanta la he keyushke, im achi tok.

16. Mihmvt nana ai vllhpisa asha tuk a kvnom pit tihleli tok.

17. Mihma Klik vhleha hvv momvt sinakak apelhichi Soshlenes a, okla hoklit ishi cha, nana ai vllhpisa itikba ya a boli tok. Mihma Kalio vt yumma puta ka nan isht ik ahno tok.

18. Yakohmi ha ya, Pal vt ahanta na nitak kanohmi tok; atuk osh itibapishi vhleha ya aiokpvchit tahli mvt, Plisilla, micha Akuila aiena ka ai itapilvt peni fohkvv ayvt Silia ya ia tok; anumpa ha il onochi tok okvt, Kenklea pashi ai vmo tok.

19. Micha Efesvs a vla mvt, yummak o ant ashachi cha; amba ilapo vto vba isht ai anumpa chuka ont chukowa cha, Chu vhleha ya im anumpohonli tok.

20. Mihma takla anta na hopaka hinla ka, okla ahni ma, ilap ak osh ik haklo tok.

21. Micha okla ha aiokpvchi mvt, Ik kaniohmi kia, impa holitopa mihinti ilvppa Cheluselem ak o ai isht anta la chi hoke. Yohmi kia Chihowa ak osh ik yohmi ahni hokma, falamvt chim aya la he akinli hoke; ahanchi tok. Mihmvt peni fohkvv Efesvs vttvt ia tok.

22. Atuk osh Sesalia ya ont atayali cha, pit oiyvt iksa vhleha ha ont aiokpvchit tahli mvt, Antiak a ia tok.

23. Mihmvt yumma ont anta naha cha ia mvt, Kaleshi, micha Fichia yakni aiena ka, nan ithvna vhleha moma hlampkochit abaiyvt ayvt hlopulli tok.

24. Mihma Chu achvfa Apollos hohchifo, Aleksantia ai vtta tok, hatak anumpuli imponna, micha Holisso Holitopa ya imponna fehna yosh Efesvs a vla tok.

25. Hatak ilvppvt Chihowa i hina yvt im vlvchi ya tok; micha chukvsh vt ai yimihinta hatuk osh, Chan i baptismo ak illa ho ithana hosh, achunanchit Chitokaka immi ya isht anumpuli, micha im avchi aiena tok.

26. Micha nukwaya kvv iksho hosh, sinakak a ai anum-



pulit ishtia tok. Yummak ash o Akuila, micha Plisilla ita tuklo kv̄t haklo mvt, yummak ash pit hoyot ishi cha, Chihowa i hina ya achukmalit i shahlichit im anohonlit okla tok.

27. Micha Akaia ya ia ka b̄vna ma, nan ithvna v̄hleha yvt okla aiokpahancha ch̄i ka, pit atohnochit, itibapishi v̄hleha yvt holissochi tuk o; yummak ashot v̄la mvt, i nukhaklo na yimmi tuk v̄hleha ya apelahanchi fehna tok.

28. Yummak okvt, Chisvs ak osh Klaist mak a tok a okla itin takla Holisso Holitopa ya ai isht im abahanchit Chu okla ha anukfohki fehna tok oke.

## CHAPTA XIX.

Pal vt ibbak isht umbitepaka Shilombish Holitopa yvt anukfohoka tok. 17 Vbanumpa yimmi kv̄t laua.

1. ATUK o, yakohmi tok, Apoll̄os vt Kolinhl̄a a anta moma ma, Pal vt ibetvp pilla ka a hlopulli mvt, Efesvs a v̄la tok; micha nan ithvna kaniohmi ka ant pisa mvt,

2. Hvchi yimmi tok takla kv̄to, Shilombish Holitopa ya hvsh eshi tok oh cho? im achi tok. Mihma Shilombish Holitopa yvt asha hokm̄a, nana kak kia, e haklo chatuk keyu hoke; okla im achi tok.

3. Mihma, Yohmi kv̄to, nanta ko ai isht hvchi baptismo hatok o? im achi tok. Mihma, Chan i baptismo ak a tok; okla achi tok.

4. Mihma, Chan v̄to ile kostininchit baptismo yo isht baptismochi ho mv̄hli cha, ilap iakayvt mihinti, Klaist Chisvs mak o yimma hi a, okla ha im ahanchi tok; Pal vt achi tok.

5. Mihma ilvppa okla haklo mvt, Chitokaka Chisvs hohchifo ha isht okla baptismo tok.

6. Mihma Pal vt ibbak a okla hash, isht umbitepa ma, Shilombish Holitopa yvt ant onvtoyula tok. Mihma anumpa ilaiyuka okla anumpuli mvt, vbanumpa aiena isht anum-puli tok.

7. Micha hatak vt moma kv̄t auah̄tuklo foka hatok.

8. Micha sinakak ont chukowvt, nukwaya iksho hosh, Chih̄owa apehlichika imma ya isht anumpulit, anukfohki-chit ahanta na hvshi tuchina tok.

9. Yohmi kia kaniohmi hokv̄to chukv̄sh kv̄llo taha cha, ik yimmo mvt, hina yvm̄mak ash na mihachit okla laua itikba ya ai anumpohonli ma, yvm̄mak ashot ai i filv̄m̄mi cha, nan ithv̄na vhleha hash a filamolechit eshi cha, Tailanvs osh na-na ai ikhv̄na i hikia h̄o, nitak moma ai anumpohonli tok.

10. Ilv̄ppa yakohmi kv̄t imoma na afv̄m̄mi tuklo tok; yohmi hatuk o, Chu, micha Klik okla aiena Asia ai asha tuk vt momvt Chitokaka Chisvs im anumpa h̄a haklo tok.

11. Mihma Chih̄owa yvt nana kv̄t isht ahullo fehna kani-ohmi ka, Pal ibbak a isht a yvm̄ih̄inchi tok.

12. Yvm̄ohmi hatuk o, nantapv̄ski puta, keyukmvt, tikba takohlich̄i kia, yvm̄ma haknip a ai isht abeka puta ka isht im oh̄ona; yohmi ma nan ililli puta kv̄t ai i filamoli, micha shilombish okpulo aiena kash ot akohoncha beka tok.

13. Yvm̄ohmi ma Chu kaniohmi nan isht-ahullo okpulo kohchi ilahobit itanowa yvt, shilombish okpulo anukfoka vhleha h̄a, Chitokaka Chisvs hohchifo h̄a isht ai o hochifochit pisvt, Chisvs, Pal vt yvm̄ma isht ai anumpohonli ka pulla h̄o, anumpa kv̄llo ai isht e chi onohonchishke; ahan-chi tok.

14. Yohmi ma Chu hatak Sifa hohchifo, na holitompa isht āsha pehlich̄i o ushi untuklo hosh yvm̄ma yohmi tok.

15. Mihma shilombish okpulo ash ot falaminchi mvt, Chisvs a ithana li, mikmvt Pal ano ithana li; amba hv̄chishno ak osh kv̄ta hv̄chia h̄o? achi tok.

16. Mihma shilombish okpulo yvt a foka hatak ash ot yvm̄mak ash o mv̄let, onvtulvt isht i shahlichit imaiyachi tok; yvm̄ohmi na na fohka iksho micha ai okpulo kv̄t taha aiena hosh, chuka yvm̄mak ash akohchvt yihlepa tok.

17. Yohmi ma Chu okla hv̄t moma, micha Klik puta aiena Efesvs āsha tuk vt, ilv̄ppa okla akostininchi tok; mihma na nuksh̄opa hv̄t mominchit onvtoyula ma, Chitokaka Chisvs hohchifo hv̄t holitopa tok.

18. Mihma na yimmi tuk vt laua hosh ai vlv<sup>t</sup> ant il anolit, nana akaniohmi chatuk puta kv<sup>t</sup> anohonli tok.

19. Micha isht ahullo imponna v<sup>h</sup>leha hatuk aiena kak kia, laua hosh i holisso puta ka isht itahobi cha, hatak moma itikba ya a hukmi tok. Micha ai v<sup>h</sup>ltoba ya okla hotihna mvt, tv<sup>l</sup>i hv<sup>t</sup>a boshulli tahlepa sipokni pokoli tahlapi tuk o, akostininchi tok.

20. Chihowa im anumpa hv<sup>t</sup> kullo kv<sup>t</sup> i shahlit ia fehna, yakohmi hosh imaiyachi tok.

21. Nana kv<sup>t</sup> a yakohmit ont ai issvchi m<sup>a</sup>, Pal vt Masetonia, micha Akaia aiena ka hlopullikmvt, Cheluselem a ia hi vt chukvsh a isht ai ahni mvt, Ymma ont anta li tukmvt, anonti Lom ma pisa li pulla akinlashke; ahanchi tok.

22. Mihmvt im ai itapela tuklo Timohlivs, micha Elastvs aiena ka Masetonia pit tihleli cha, amba ilapa vto Asia ya anta na ahchiba tok.

23. Mihma nitak ymma fehna ma, hina ymma okla hv<sup>t</sup> nanumachi fehna tok.

24. Hatak achvfa Temetivs hohchifo, tv<sup>l</sup>i hv<sup>t</sup>a ikbi, ymmak osh Taiena ya tv<sup>l</sup>i hv<sup>t</sup>a itombushi puta im ikbi yosh isht v<sup>h</sup>ltoba mvt chvbihasi keyu h<sup>o</sup>, hatak nan ikbi imponna v<sup>h</sup>leha ya isht im v<sup>l</sup>a cha;

25. Ymmak ash, micha nan isht vtta ai itim achvfa v<sup>h</sup>leha aiena ka hoyot itahobi mvt, Hatak puta ma! nan isht ai vtta ilvppa pulla h<sup>o</sup>, nan isht il ahayuchi ka hvsh ithaiyanvshke.

26. Ymmohmi ka Efesvs ak o bano keyu, amba Asia a mominchi chiyuhmit Pal ilvppvt, ibbak isht toba yokvto chitokaka v<sup>h</sup>leha nana h<sup>o</sup> keyu hoke, ahanchi cha, okla laua ka anukfokichit filamolihinchi ka hvsh pisa, micha hvsh haklo aienvshke.

27. Ymmohmi ka hv<sup>h</sup>pvshno nan isht iloh ai vtta ilvppak bano h<sup>o</sup>, ik ahobalo ka he fehna keyu; amba nan isht ahullo ohoyo chito Taiena in ten<sup>h</sup>pel ak kia aienvt kalakshikma, anonti ymmak o Asia moyuma, micha yakni puta kv<sup>t</sup> aiokpahanchi yash isht aholitopa yvt ont ai okpulot kvnia hinla fehna hoke; achi tok.



28. Mihma okla haklo mvt, anukhobelvt alota mvt, tahpult, Efesvs okla in Taiena vt chinto hoke: ahanchi tok.

29. Mihma tumaha ha yahapa kv̄t alotvt kv̄niā tok. Mi-cha Masetonia hatak, Pal apehvt nowvt aya Kaivs, micha Alistakvs ita tuklo ka hoklit okla ishi mvt, im anukfila ai achvfa chiyuhmit yihlept, okla ai itahoba chatuk a pit abe-ha tok.

30. Mihma Pal vt okla ha pit iba chukowa bv̄nna tuk ak o nan ithvna v̄hleha yvt v̄lhpesa, okla ik im ahno ki tok.

31. Mihma Asia hatak pehlichī v̄hleha kaniohmi, yv̄mma i kana yatuk vt, okla ai itahoba ya pit chukowa bv̄nvt ik peso ka hi a, ahnit pit im anoli tok.

32. Yvmohmi ma kanimi kv̄t nana ho mihakma, anonti inla mvt inla ho miha tok; itvnaha hak osh ai v̄lhpesa keyu hatuk o, micha moma chohmi kv̄t nana kaniohmi ho itvnaha hatuk vt ik ahostinincho ki tok.

33. Mihma Aleksanta ya okla laua akohchi ma, Chu okla hvt tikba pit hilechi tok; mihma Aleksanta yvt ibbak pit fahv̄mmi mvt, okla ha im isht il anumpuli bv̄nna tok.

34. Yohmi kia yvmmak okvt Chu atuk o, okla akostininchi mvt, momvt anumpa achvfa, Efesvs okla in Taiena yvt chinto hoke, tahpult ahanchi na hv̄shi kanv̄lli tuklo foka tok.

35. Mihma tumaha i holissochi yokvt okla ha yokopli mvt, Efesvs hatak hv̄chia ma! Efesvs tumaha hvt nan isht ahullo ohoyo chito Taiena, micha na holba toba Chupita a mintit akatula tok aiena ka aiokpv̄chi a, hatak nanta hosh ik akostinincho kv̄t ahanta cho?

36. Yohmi ka ilv̄ppa nana ho isht ai acha hi o keyu hoka, hv̄chishno yvt nukchintot hv̄sh maya cha, tushpt nana hv̄chik kaniohmo ka he tuk oke.

37. Hatak yakohmi kv̄t tempel puta wehpuli keyu mvt, anonti hv̄chi nanisht ahullo ohoyo ma ik ahobalot na miha-chi o keyu hokak o, ilv̄ppa isht hv̄sh la tuk oka.

38. Yvmohmi hoka Temetivs vt, micha hatak nan ikbi v̄hleha yv̄mma apeha kv̄t, hatak nana kia nana im a kanioh-

mi tuk in takanli hokma, nan vllhpisa nitak vt asha, micha nan apesa vllleha mvt mayvshke; nan vllhpisa iti onochit ik ashá.

39. Amba nana inla imma yo hvsh ai asilhhvchi hokma, yvmmak okvto itvnaha ai ahli hō ai vllhpisa hi oke.

40. Itvnaha ilvppak atuk a nana hō isht il ai anola he mvt iksho; yohmi hokvt himak nitak nana ai vllhpiesa mvt iksho ka, nan vllhpisa yvt hvpi onvtula he fehna hoka; achi tok.

41. Micha yakmichit anumpulit issa mvt, itvnaha yash tishelichi tok oke.

## CHAPTA XX.

Pal vt Masetonia ona, 1. 7 Pal vt Chitokaka im opiaka impa holi-toblit antvt, vba isht anumpuli. 28 Pal vt iksa in tikba vllleha ha atohnochi.

1. ATUK o yahapa kash ot issa ma, Pal vt nan ithvna vllleha ya hoyo cha ai okpvchi mvt, Masetonia a ona chi hosh ia tok.

2. Atuk osh yakni puta yvmmak ash a hlopullit, im anumpohonli fehnvt aya tuk osh Klis a vla tok.

3. Micha yvmmak o ahanta na hvshi tuchina tok. Mih-mvt peni fohkvvt Silia ia chi foka ma, Chu vllleha hv im aie chi ma, falamvt Masetonia pit hlopulli ka ahni tok.

4. Mihma apehvt Asia ona kvv Sopeta, Belia hatak, micha Hlessalonika okla Alistakvs, micha Sikvntvs, micha Tvbi hatak Kaivs, mikmvt Timohlivs aiena kak, a tok; mikma Asia hatak vt Tikikvs, mikmvt Tafimvs aiena kak a tok.

5. Yakohmi kvv tikba ilhkoli tuk osh Tloas ak o ont ash-vvt pi hoyo tok.

6. Mihma pvska ik shatvmmo vpa nitak vt ai issachi ha yo, peni vlbihvt, Filippi asht e minti kvv, nitak tahlapi hō Tloas a il im ai vla cha, yvmmak o il asha na nitak untuklo tok.

7. Mihma nitak hullo achvfa nitak ahpi hō, nan ithvna

vhleha hvt pvska kobahlichia chi hosh itahoba ma, Pal vt onnakma kanima ia chi hatuk osh, im anumpuli mvt; anumpa hash isht mahaya na, ninak iklnna ona tok.

8. Mihma aboha vba potvlhpo ai itahobvt maya ka, pula hvt lawa tok,

9. Mihma hatak himita achvfa Yutikvs hohchifo hosh okisushi ya asha tuk osh nusit knia tok; anonti Pal mvt anumpa ha falaiachi aiena hatuk o, nusit knia kv akia cha, vba potvlhpo ont atuchina ho vttvt aka ont ittula cha, illi yo okla sholit wakeli tok.

10. Mihma Pal vt pit akowa cha, ont onvtuyulvt ishi mvt, Im ilhfiopak vt a foka moma hoka, ik hvchi nukhlakancho kashke, achi tok.

11. Yvmohmi hatuk osh falamvt oiya mvt, pvska ya kobahlichit impa cha, anumpohonli hopaki, polaka onnvt taha ho, kohchvt ia tok.

12. Mihma hatak himita yashot okchaya ho, okla isht vla mvt, na yukpa kv chohmi tok keyu.

13. Mihma tikba ivt peni ya il ona cha, ilap vt aka ayvt ia kak o ahni cha, yvmmak o miha tuk oka, ymma Pal ont ai isht e fohka chi, pim ahoba hosh peni fohkv ivt Asvs a il ona tok.

14. Atuk osh yvmmv Asvs a a pi afama ma, ishit auet e, fohki cha, mintit Mitilini ya e la tok,

15. Micha ymma asht peni fohkv, e minti tuk vt nitak atukla ma, Kaios, i chapaka e la tuk osh, anonti onna ma, Samvs e la cha, Tochilm a ant il ashwa tok; atuk osh onna ma mintit Mailits a e la tok.

16. Pal vt Asia a antvt nitak i knia ik bnno hatuk osh, yohma hinla yobakmvt, Pentekost nitak a Cheluselem a, ont anta chi hatuk osh, tushpvt aya hokvt Efesvs a peni fokvt ont ia he ak o, ahni tok.

17. Micha Mailits ak o vttvt, iksa i pehlichia vhleha ha Efesvs a pit hoyo tok.

18. Atuk o okla im ai vla ma, Asia ya vla li nitak vmona tok ai itin taiyakla kv, nitak moyuma ka kaniohmi hosh hvchi awant ahanta li chatuk,



19. Chukvsh akanlosi bieka, micha nishkin okchi mihinti fehna hosh, Chu vhleha hv̄t aiechit maya na, na palvmmi puta sai onvtulvt, Chitokaka ya im antihiya li tok.

20. Michā hv̄chishno nan isht hv̄chim ai v̄lhpesa puta ka hv̄chim a luhmi li tok keyu; amba hv̄chim anolit ai itvnaha, micha chuka puta, a hv̄chim abahanchi li tok.

21. Chu okla, micha Klik vhleha aiena ka, Chihowa ile kostininchit i falama cha, hv̄pin Chitokaka Chisvs Klaist a i yimmi aiena ka, im abahanchi li fehna chatuk a, hv̄sh ithaiyanvshke.

22. Yvmohmi hosh himak a sa chukvsh vt pit a yiminta fehna hosh, yvmma nana a si akaniohma hi a pit ithana iksho hosh, Cheluselem a ia lishke.

23. Amba Shilombish Holitopa ak osh tvmaha moma ka ai anolit, talakchi, micha na palvmmi puta kv̄t an takalishke; ahanchi kak illvshke.

24. Yohmi kia nan ilvppa puta kv̄t achvfona kia ik sa folulechoshke, micha na yukpa hosh a nitak ma, micha nan isht v̄tta Chihowa achukma ka anoli, vbanumpa im av̄chi la he, Chitokaka Chisvs a ai im ishi li tuk vt atahli la chi kv̄t, vm ilhfiopak a a holitopa ak ai ahnoshke.

25. Yvmohmi hosh himak a, Chihowa apelihchika ya isht hv̄chim anumpulit hv̄ch itin takla ma aya li chatuk a, hv̄sh moyuma kv̄t himmakma sa nashuka ya hv̄sh pisa chi keyu ka, ithaiyana lishke.

26. Yvmohmi hoka hatak okluyuha im issish a, vno yvt nan isht ai ahalaia li keyu kv̄t, ai ahli mak osh himak nitak a hv̄chishno a hv̄chim anohonli lishke.

27. Vno vt Chihowa im anukfila puyuta ka hv̄chim anoli ka, sa nukwaya iksho chatuk okvt.

28. Yvmohmi hoka hv̄chishno akinli, micha nan iakaya vhleha moma, Shilombish Holitopa yvt mihi yo apesvchi puta hv̄ch ikbi tok a, ahah! ahnit Chihowa im iksa puta ilap im issish akinli ho isht chumpa tok a, mominchit hv̄sh pehlichashke.

29. Vno vt kanima atia li ha ma, nashoba okpulo nan

iakaiya vhleha hash, i nukhaklo iksho mak osh, ant hvch iba chukowa he ; ilvppa vno vt ithaiyana li hoka,

30. Micha hvchishno hvsh ai itapeha yash inli hatak ak kia nan ikhvna vhleha ya filvmmichit il iakaiyvcha chi kvt, nan isht okpvi ya anumpulit hiohla hi oke.

\*31. Yvmohmi hoka, hvsh ile nuktahla chiké ; micha afvmmi tuchina ka nishkin okchi mihinti hosh, nitak micha ninak puyuta ma, moma nan im anolit ahanta li kvt, ak isso kv-mohmi chatuk a hvsh ithaiyanvshke.

32. Inta ! il itibapishi vhleha ma ! Chihowa, micha ilap o achukma isht anumpa aiena, yvmmak osh ai ahlichit hvchi hiohlichea hinla, mikmvt hochukma toba tok vhleha moyuma ka ai itin takla ya, ai vttvt hvch ima he vllhpiesa mak o, yvmma ibbak a pit hvchi fohki lishke.

33. Hatak nana kia in tvli hvta kia, mikmvt in tvli holisso lakna yokmá, keyukmvt ilefohka yokmá nana kia im anush-kunna li chatuk keyushke.

34. Ahli, ibbak ilvppak osh vno, micha si apehvt aya puta na pi bvna ka, nan isht ahanta chatuk a, hvchishno ak kia hvsh ithaiyanvshke.

35. Yakohmit toksahanli hosh ilbvsha puta ka hvsh ape-lvcha he tuk, micha Chitokaka Chisvs im anumpa puta, yvm-mak okvt, Ima kak osh na yukpa kvt habena ka, i shahli hoke, achi tok a hvsh ithaiyana chi ka mominchit hvchim anohonli li chatuk oke ; im ahanchi tok.

36. Micha yakohmichit anumpulit taiyahli mvt, hvchuk-bihlept hikia cha, moma ka pehlichit vba pit anumpuli tok.

37. Mihma momvt nishkin okchi minti fehna mvt, Pal ikonla ya okla onvtuyula cha i suksowa tok ;

38. Himmakma i nashuka ya okla pisa he keyu, miha tok ; anumpa yvmmak o isht nukhaklo im atampa ha tok. Mihmvt apihvt peni ya okla ona tok oke.

CHAPTA XXI.

Pal vt Cheluselem a ia, 1. 17 Pal vt Cheluselem a ont anta ma, iti hokli. 31 Kvpitvi chito vt Pal hlakofichi.

1. **MIHMA** yakohmi tok, yvmmak ash pit il oka topli cha, i mokofvt auet apissanlit mihintit, Kofs a e la tuk osh, nitak atukla ma Lotis a e la; atuk osh yvmma ashvvt Patela ya e la tok.

2. Micha peni vt Finishi ya ia hosh aya ka e pisa mvt, ont e chukowa cha, e maya tok.

3. Atuk osh Saipilus vt auet pi haiaka mvt, yvmmak ash pim vlfvubeka imma yo talaia na, ont il ia mvt, Silia ya il ona cha, Taia yak o ont il ataya tok; peni na shali ka yvmmak o ont akohcha wiha chi hatuk o.

4. Micha yvmma nan ithvna vhleha ya ont il ai ahayuchi mvt, il ashwa na nitak untuklo tok; yvmmak osh Pal a Cheluselem ik aiyo ka hi a, Shilombish pulla hatuk mak o, im achi tok.

5. Nitak yvmmak ash ot ont pin taiyaha mvt, pishno ash ot kohchvt pi hina fohkvt il ia ma, momvt tekchi vhleha, micha im vlla puta aienvt pi apehvt pisht aya na, tmaha ha ant e kohcha tok; mihma oka takchvka ya hvchukbihleptv e hiel cha, vba pit il anumpuli tok.

6. Atuk osh okla it aiokpvchit pin taiyaha ma, peni pit il vlhto ma, yvmmak ash ot falamvt, in chuka ilhkoli tok.

7. Atuk o peni fohkvt, Taia asht e minti tuk vt ont pim ai vhli mvt, Talimeis a e la cha, il itibapishi vhleha ya ant il aiokpachi cha, nitak achvfa ho takla il ashwa tok.

8. Atuk osh ont onna ma, Pal a apeha pia hatuk vto kohchvt ivt, Sesalia ya e la tok; micha Filip vbanumpa isht vtta, yvmmak osh untuklo kash aiena hatuk ash, in chuka ont e chukowa cha apehvt e maya tok.

9. Mihma hatak yvmmtv ushetik ohoyo himita ushta hosh im ashwa tuk osh, vbanumpa isht anumpuli tok.

10. Micha yvmma il asha na nitak kanohmi ma, hopaii achvfa Akebv hohchifo hosh Chutia mintit vla tok.

11. Micha yvmmak ashot ayvt pim vla mvt, Pal im vskofvchi yash ishi cha, ilap ibbak micha iyi aiena ka isht takchi mvt, Hatak vskofvchi ilvppvt immi yatukma, Chu vhleha Cheluselem aiasha kvv yakohmichit takchi cha, ishit okla



nan ik ithano ibbak a a fohka hi oke; Shilombish Holitopa yvt achishke; ahanchi tok.

12. Mihma ilvppa okla e haklo mvt, pishno ash ot yvm-mak inli asha yatuk pit il aienvt, Cheluselem a ik aiyo ka hi a, okla il im ahni tok.

13. Mihma Pal vt afalaminchi mvt, Katiohmi ho hvsh ahni hosh yaivvt sa chukvsh a hvsh kobvfi cho? Sa talakcha he ak o illa keyu; amba Cheluselem a Chitokaka Chisvs hohchifo pulla ka, isht a si ai illa chi aiena kvt vm vlhtaha hoke, achi tok.

14. Micha hakla he keyu ma, Chitokaka nan ahni yak osh ik yvmohmi, il ahni mvt, okla il issa tok.

15. Mihmvt nitak yakohmi kvt ont taha ma, il il apoyua cha, Cheluselem a pit il ilhkoli tok.

16. Mihma nan ithvna vhleha kaniohmi kvt Sesalia ya asht pi apehvt ia akinli tok; micha Nesvn Saipilvs vtta nan ithvna sipokni ka yo, yvmmak o il ibai ashwa chi ka, okla pisht ona tok.

17. Atuk o Cheluselem ash il ai ona ma, il itibapishi vhleha yvt na yukpa hosh pi aiokpvchi tok.

18. Atuk o onna ma, Pal vt pi awant Chemis a im ona; mihma hatak tikba vhleha yvt momvt chieya tok.

19. Mihma yvmmak ash aiokpvchit tahli mvt, ilap vt nana isht ahanta ho, Chihowa yvt okla nan ik ithano vhleha itin takla ya, nana ai atahanli tuk puta kash o atokowa fehna kak o anohonli tok.

20. Mihma okla haklo mvt, Chitokaka ya okla aiokpahanchi mvt; yvmmak ash o, Chu vhleha na yimmi kvt tahlepa sipokni kaniohmi hosh ai asha kvt, yvmmak okvt moyumvt nan-vlhpisa holitobli fehna ka, ish pihisvshke, il itibapishi ma!

21. Micha chishno vt Chu vhleha hosh oklushi nan ik ithano takla asha ka, mominchit Moses a okla issa chi ka, im avchit im vlla puta ka hakshup tvpla he tuk keyu, mikmvt ilap nana a kaniohmi vlhpisa puta aiena ka, okla iakaiya he tuk keyu ka, ish i mihila ho, okla im annoa tok.

22. Yohmi ka nanta mak oh cho? Ish la tuk a, okla hakla chi hokvt, okla laua yvt itvnaha pulla chi hoke.

23. Yvmohmi hoka pishno yvt nana e chi miha, ilvppak o ik chi yvmohmi; hatak anumpa holitopa ile onochi tuk ushta hosh pim ashwvshke.

24. Yvmmak o pehliechi cha, takla nan iba hullochit, mi-cha chishno ak osh vlhtoba hvt ibafohkvt chi knia pulla na, okla noshkobo shafashke; mina momvt chishno a nana a chi haiyaklo tuk vt peh pilla hatuk; amba chishno ak kia ai vlhpiesvt ish aya cha, nan vlhpisa ya ish holitobli ka ithai-yanashke.

25. Amba okla nan ik ithano na yimmi vhleha imma kamo, nana yvmma chohmi ka ik holitoblo ka chi, amba nana ka na holba toba pit im issa tuk puta, micha issish mikmvt nana kvt nuksitvt illi puta, micha ohoyo himita itin lumaka aiena kak o, okla ik ahalaio ka he yak o, okla pim anukfilvt pit il i holissochi tok; im achi tok.

26. Mihma Pal vt hatak ash pehliche cha, onna ma, nan iba hullochi mvt, vba nan isht pit aiokpuchi ya achvfa ai-yuka pit im isht aiokpachi ha ya chi ho, nahullochi nitak vt ont taha ka, anola chi hosh tempel a chukowa tok.

27. Atuk o nitak untuklo kash ot ont taha ahosi ma, Chu vhleha Asia minti tuk vt, yvmmvvt tempel anyakaka ya asha na, okla pisa mvt, okla mominchit atushpvlihinchit yvmmak ash ibbak isht ishi mvt;

28. Israel hatak puta ma! pi apelá; hatak ilvppak osh yakni ilvppa, okla, micha nan-vlhpisa aiena ka i snalit, hatak moyuma ka kanima mominchit ai imabuchi mak oke; micha achakalechi mvt, Klik vhleha ma pehlichit tempel a ant isht chukowa cha, aholitopaka ilvppak ash aiokpunishke; achit tahpahanla ha tok.

29. Tikba ka Tafimvs, Efesvs hatak vt yvmma awant tv-maha anta ho, okla pisa tuk osh, yvmma Pal vt ilauint tempel a chukowa tuk a, okla im ahoba tok.

30. Mihma tmaha hash ot momvt wakaya ma, oklat yihleptv itahoba tok; micha Pal ash okla ishit tempel a a koh-chi ma; chekosi makinli ho okhissa puta kash ot vlhkuma tok.

31. Micha okla vbi bunna hosh maya ma, tvshka chipota aya-chufa i kvpitvni chito ya, Cheluselem vt momvt nan ik ai vllipeso bano ka annoa kvv ayvt im vla cha ;

32. Yvmmak ash ot ashalika tvshka chipota vhleha, mi-cha kvpitvni puta ka pehlichu cha, chvfvv itv im ona tok ; mihma kvpitvni chito, micha tvshka chipota vhleha aiena ka okla pisa mvt, Pal a boli mvt issa tok.

33. Mihma kvpitvni chito ash ot itv ituma ona cha, yvmmak ash ishi mvt, tvli itatakvli tuklo hosh ishit talakecha chi ka miha tok ; mihmvt, yvmmvt kvna hatuk, micha nana hv kaniohmi aiena tuk a, asilhhvchi tok.

34. Mihma okla laua asha tuk vt tahpvvlt, kanimi kvv kanimihchit miha ma, anonti kanimi kvv inlvchi tok ; mihma yvmmak ashot yahapa hatuk o, ai atokowa ma ik ai akostinicho mvt, yvmmak ash isht holihta kvvlo ont fohka chi ka, miha tok.

35. Atuk o yakohmi tok, okla hak osh okpulo ka fehna o, yvmmak ashot pit atuyvt ia ya ona ma, tvshka chipota vhleha yosh sholit ishtia tok.

36. Okla laua yak osh, Yvmma kanima isht oh ia cha, ahayvt iakaiya hatuk o,

37. Atuk o Pal ash o holihta kvvlo ya, ont isht chukowa chi foka ma, yvmmak ash ot kvpitvni chito yash, Chim anum-puli la hinla cho ? im achi ma, yvmmak ash ot, Klik anumpa ya ish anumpula hinla ho ?

38. Chishno ak osh Echip hatak chia hosh, nitak tikba kash nan isht ish ataklaiyama cha, hatak bika vbi ya tahlepa sipokni ushtat pehlichit yakni haiaka ya, pit isht ish chukowa tok keyu ? achi tok.

39. Mihma Pal vt, Vno vt Chu hatak Tasvs, Silisia yakni tmaha ai vtta, tmaha ik ahobo nana hv ai vtta sia keyu hoke : mi hosh okla hv im anumpuli la hi a vm ahnikbano, chim ahni lishke ; achi tok.

40. Mihma yvmmak ash ot vllhpesa im ahni ma, Pal ash-ot pit atuyvt ia ya o hikia cha, okla hv ibbak a pit i fahvm-mi tok ; micha luma biekvv okla aiasha ma, Heblu anumpa hv im anumpulit yak ahanchi mvt,



## CHAPTA XXII.

Pal vt kaniohmit vbanumpa nukfoka tok vt anoli, 1. 25 Pal vt fyra he tuk kia, Lom hatak atuk osh hlakofi.

1. **H**ATAK il itibapishi vhleha, micha an tikba puta ma! himak a isht hvchim il anumpohonli li ka, hvsh hai-yaklashke.

2. Yvmmvt Heblu anumpa ho isht im anumpuli na, okla haklo mvt, isht i shahlit lumvt aiasha tok. Mihma yvm-mak ashot,

3. Uno vt Chu hatak fehna sia, Tasvs, Silisia yakni in tmaha ak o ai vta li tok nana kia, tmaha ilvppa Kamiliel iyi itmaka yo ahantvt sa hofanti; micha hatak tikba vhleha i nan vlpisa ai apissali mvt, vm vlbahanchi tok; mihmvt Chihowa ya pit achunanchi kvv himak a nitak hvsh moma kvv, hvchi yvmohmi kak inli chiyuhmi li tok.

4. Mihma ilvppa yakohmi ka nakni, micha ohoyo aiena ka, illa he mak o, takchit aboha kvvlo pit apittvt ilbvshachi li tok.

5. Yohmi ka na holitompa isht asha pehlich, micha hatak tikba vhleha hak kia momvt vm ithaiyana hoke; micha yvmmak o il itibapishi vhleha pit i holisso ka, im ai ishi li hosh, yvmma asha tuk vt talakchi ya Cheluselem a isht vla likma, na palvmmi pisa chi ho, Tamaskvs a ia li tok.

6. Atuk o yakohmi tok; nowvt aya li mvt, hvshi vt tv-bokoli foka ho, Tamaskvs a ona la hosi ma, ashalika nan tohwikeli chito vba minti kvv ant tommit si afolupli tok.

7. Mihma aka ont sa tula cha, anumpa hvv, Sal, Sal, nanta katiohmi ho, is sa palvmmichi cho? vm ahanchi na, haiyaklo li tok.

8. Mihmvt afalaminchit, Kvta chia hoh cho, Chitokaka ma? achi li ma, Uno ak osh Chisvs Nasalit ai vta mihi yo ish i palvmmichi ka sia mak oke; vm ahanchi tok.

9. Mihma si apehvt aya tuk vt tohwikeli hokvno okla pisa mvhli cha, nukshopa tok; yohmi kia anumpa auct vm anumpuli hokvno okla ik haklo ki tok.

10. Mihma, Chitokaka ma! nanta ko katiohmi la chi ho? achi li tok. Mihma Chitokaka yash ot, Wakaya cha, Tamaskvs a ish onashke; mikma nana ish a kaniohma he a chim vlhpisa tuk vt moyuma, yvmmak o a chim annoa hi oke; vm achi tok.

11. Mihma tohwikeli yvmma shohpakali tuk a ak hopanayo hatuk o, si apehvt aya tuk ibbak ak osh sa halvlli ho, ayvt Tamaskvs a ona li tok.

12. Mihma hatak achvfa vbanumpuli nan vlhpisa ya isht ai ahli, Ananaivs osh, Chu vhleha yvmma ai asha ka moma ai im annoa achukma chatuk osh,

13. Ayvt vm vla cha hikia mvt, Itibapishi li Sal ma! ish hoponayashke, vm achi tok; mihma hvshi kanvlli makinli ho, vba chakalit ilap a pisa li tok.

14. Mihma, Hvpin tikba vhleha in Chihowa yvt, chishno vt ilap o nan ahni ka ish ithaiyana he, mikmvt Ahli yvmma ish pisa cha, yvmma itakha ai anumpa ma ish hakla hi a chi atokoli tuk oke.

15. Chishno vt nana ho ish pisa tuk, micha ish haklo tuk aiena kvv, hatak moyuma ka im anoli chia ha chi mak oka.

16. Yohmi kvv nanta katiohmi ho himak a ish ahchibali cho? wakaya cha, baptismot, Chitokaka ya pit hochihifot, nan chim ai ashvehika puta kvv kashofvt chi kvniashke; achi tok.

17. Atuk o yakohmi tok, falamvt Cheluselem ash vla lish, tempel anukaka ya vba pit ai anumpohonli li mvt, sa holhpokuna chohmi tok.

18. Mihma yvmmak ash ot vno ya, Nana isht is si ai anoli ka, okla chim aiokpahancha he keyu hoka, tushpa, micha Cheluselem a chekosi ish akohchashke; vm ahanchi na pisa li tok.

19. Micha vno ash ot, Chitokaka ma! chishno chi yimmi vhleha hatuk a aboha kvllo pit apittvt, sinakak puta ka, a fahami li tuk a, okla ithaiyanvshke.

20. Micha Istefin atokowa chi anolit im issish hlatapa ka, vno ak kia itomasi ya hikia li tuk osh, yvmmtv illa chi ka, vlhpesa ahni li mvt, yvmma vbit maya ka, im ilefohka ya ishi li tok oke; achi li tok.

21. Mihma, Hopaki pilla, okla nan ik ithano vhleha aia-sha kak o pit chi chvffichi la chi hoka, ish ayashke; vm achi hokvno; achi tok.

22. Mihma anumpa ilvppa vhli kano okla i haponaklo tok; atuk osh chitolit, Hatak yvmma chohmi ka, yakni a ai isht ho kanchi, yvmmak okvt okchayvt anta he vlhpesa keyu hoka, okla achi tok.

23. Micha okla tahpvlvt i na fohka puta kash shoelit kampilvt, lukfi pushi aiena ka pehlit vba pilvt maya ma,

24. Kvpitvni chito yvt yvmmak ash o holihta kvlllo ya isht ona chi ka, apesa mvt, anonti yvmmak ash fvmmi hosh, nan i ponaklo na, kaniohmi ho okla hvt isht anumpuli kv yohmi fehna hatukma, ilap vt akostinincha chi kv, miha tok.

25. Mihma wak hakshup aseta chuhla ka, okla ishit takchi ma, Pal ash osh kvpitvni hvt bilikasi hikia tuk o, Lom hatak, micha nan vlhpisa yosh ai atokowa keyu ka, ish fvmma he chim ai vlhpesa ho? im achi tok.

26. Kvpitvni vt ilvppa haklo mvt ivt, kvpitvni chito ya ont im anolit, Nana ish kaniohmi kv, ahah! ish ahnashke, ilvppvt Lom hatak oka; ahanchi tok.

27. Mihma Kvpitvni chito ash ot vla mvt, Chishno vt Lom hatak chia ho? vm anoli, im achi ma, yvmmak ash ot, Yau, achi tok.

28. Mihma kvpitvni chito yash ot afalaminci mvt, Ilap inli nan ahni hosh aya ilvppa, vlhtoba chinto ho isht ishi li tok, achi tok; mihma Pal ash ot, Amba vno vto si ai imoma yosh vtta li tok oke, achi tok.

29. Yohmi ma yvmma nan i ponakla he tuk ash ot mih makinli ho, ai i filamoli tok.; mihma kvpitvni chito ash kia, yvmmak okvt Lom hatak atuk a akostininchi, micha takchi tuk aiena hatuk osh nukshopa tok.

30. Ont onna ma, kaniohmi ho Chu vhleha yvt anumpa ha onochi hatukma atokowa ka akostininchi bvna hatuk osh, isht talakchi ya i hotuffi mvt, na holitempa isht asha pehlich i vhleha, micha i nan apesa vhleha moyuma kv itv-naha chi ka, apesa tok. Micha Pal ash isht ona cha itikba ya ont hilechi tok oke.



CHAPTA XXIII.

Pal vt isht il anumpuli, 1. 10 Pal vt atukla aboha kullo foka tok.  
23 Pal vt nahullo miko Filiks a im ia.

1. **MIHMA** Pal vt hochitoka vhleha ya ai okchifelit pi-hisa mvt, Hatak il itibapishi vhleha ma! im anukfila ai achukma biekvt Chihowa itikba ma ai ahanta li himak nitak fenvshke; achi tok.

2. Mihma na holitompa isht asha pehlichi Ananaivs ash ot, yvmma bilika hiohmaya tuk vt itih ha lvsalicha chi ka, miha tok.

3. Mihma Pal ash ot, Chihowa yvt chishno ak o chissa chi hoka, holihta kullo tohbi chia ka; nan vlhpisa yo nan isht vm ai apesa chi hosh ish asha mvt, anonti nan vlhpesa ya ai vlhpesa keyu ka, svssa hi a ish miha cho? im achi tok.

4. Mihma a bilika hiohmaya tuk vt, Chihowa i na holitompa isht asha pehlichi a chik ahobalo ho? achi tok.

5. Mihma Pal ashot, Iloh itibapishi ma! yvmmak okvt na holitompa isht asha pehlichi ya, ak akostinincho ke tuk oke. Chim okla talaia pehlichi ya ik ahobalot ish anumpuli na, achi hosh holihiso hoka, achi tok.

6. Yohmi kia kashapa kvv Satusi okla yokma, anonti kashapa kvv Falisi yo akastininchi mvt, itvnaha itin takla ya tahpvlvt, Hatak il itibapishi vhleha ma! vno vt Falisi sia, Falisi o ushi sia hoke; illi falamvt tana he isht a sai yimmi hatuk mak o, nan vm ai asilhhvchi hoke; achi tok.

7. Yvmihchit anumpuli ma, itachowa anumpa kvv Falisi vhleha, micha Satusi vhleha aiena itin takla ya takakanli tok; mihma okla laua yvt ita kashapa tok.

8. Satusi iksa yokvt falamvt tana hi vt takanli keyu, mik-mvt enchil, micha shilombish aiena kvv iksho, achi hoka; amba Falisi yokvt tuklonchit yimmit anoli hoke.

9. Mihma yahapa chinto kvv takali tok; mihma holissochi vhleha, Falisi apehanchi kvv wakaya cha, anumpa ha isht ai isso fehvt, Nan ik vlhpeso nana kia hatak ilvppa kil

ai akostininchoshke; amba shilombish okmá, keyukmvt enchil okmá nana hosh im anumpuli tok okma, Chihowa ya kiloh itibo kashke; ahanchi tok.

10. Mihma okla itachowa chinto kv̄t takali ma, kv̄pitvni chito ash ot, Pal a okla it̄i hv̄lat nipli na ahni kv̄t, komunta mvt, ont afovt mokofit im ishit, holihta kv̄llo ya ant foka ch̄i h̄o, tvshka chipota vhleha ya i miha tok.

11. Mihma yvmmak atuk niniak a, Chitokaka yvt ant a hik̄vt, Pal ma! na chi yukpashke, Cheluselem a is si ai anohonli hatuk okvt, chiyuhmit Lom ma atokowvt ish ai anohonla ch̄i pulla akinli hoke; achi tok.

12. Atuk o onnvt taha ma, Chu vhleha kaniohmi kv̄t itibai achv̄vt anumpa kv̄llo ile onochit, Pal a okla vbi h̄o keyukmvt ik impo, micha nana kia ik ishko ka ch̄i kv̄t, mih̄iha tok.

13. Mihmvt pokoli ushta ka atampa hosh anumpa yakohmi ka ikbi tok.

14. Mihmvt na holitompa isht āsha pehlich̄i, micha asononchika puta aiena ka im ai v̄la mvt, Anumpa kv̄ll̄o fehna ka il il onochi kv̄t, Pal a ke bokmvt nana kia ke po ka ch̄i hoke.

15. Yvmohmi hoka, himik a hv̄chishno, micha hochitoka vhleha hv̄sh ai itapeha kv̄t, yvmmak atuk ak o anonti achukmalit i shahlichit im ai asilhv̄cha ch̄i h̄o chohmit, kv̄pitvni chito ya hv̄sh im anoli na, onna ha ma yv̄mma isht hv̄chim ayashke, yohmikma yvm̄vt ilv̄ppa itomasi a ik lo h̄o e ba ch̄i kv̄t pim v̄lhtaha yoke; achi tok.

16. Mihma Pal in tek ushi yvt, yv̄mma im aiechit maya ka haklo mvt, ivt holihta kv̄llo a ont chukowa cha, Pal a im anoli tok.

17. Mihma Pal vt kv̄pitvni vhleha ya achv̄vt pit hoyo cha, Hatak himita ilv̄ppa ilauct kv̄pitvni chito ya isht im ona, yvmmak oka nanasi kia im anola ch̄i kv̄t in takanli hoka; achi tok.

18. Mihma yvmmak ash ilauēli cha, kv̄pitvni chito ya isht im ona mvt, Pal aboha kv̄llo fohka yak osh pit sa hoyo na v̄la li h̄o, hatak himita ilv̄ppvt nanasi kia chim anola hi vt

im asha hatuk o, ilauet chim vla la hinla ka, vm ahni tuk oke; achi tok.

19. Mihma kvpitvni chito yvt yvmmak ash ibbak a halvlli cha, naksika alumaka isht im ona mvt i ponaklot, Yvm-mak osh nanta mak o is svm anola chi kvv chin takanli hatuk o? achi tok.

20. Mihma, Yvmmak oka achukmalit i shahlichit im asilhhvcha chi ho chohmit, onnaha ma, Pal a ilauet ai itv-naha ya isht ish ona chi ka, chim asilhha chi kvv, Chu vhlaha yvt itib ai achvfa tuk oke;

21. Yohmi kia chishno vto vlpesa, chik im ahno kashke; yvmmak okvt hatak pokoli ushta ka atampa hosh, yvmma im aiechi kvv ai asha hosh, yvmmvv anumpa kvvlo ya isht il onochit, yvmma okla ik bokmvv nana kia vpvv, ishkot ik mayo ka chi, isht il apesa tuk oke; yohmi hatuk osh himak a im vlvhtavv, anumpa falama ka avet chim a hoyot maya hoke; achi tok.

22. Mihma kvpitvni chito yvt hatak himita yash ant ik ia, im ahni mvt, nana ilvppa puta is svm anoli tuk vt hatak nana kia, chik im anolo kashke; im achi tok.

23. Mihmvv yvmmak ash ot kvpitvni tuklot hoyo mvt, Ninak hvshi kanvlli isht vlvpisa ont atuchinakma, Sesalia ilhkola chi ka, tvshka chipota tahlepa tuklo, micha issuba o binili tvshka pokoli untuklo, mikma na halupa ishi mvt tahlepa tuklo ho hvsh atahlashke.

24. Micha Pal a, okla o binilichit achukmalit isht avv, nahullo miko Filiks a isht im ona chi ka, nan vlvpoa ma, hvsh atahlashke, ahanchi tok,

25. Mihmvv ilvppak o yakohmichit holissochi tok.

26. Kilativs Lisivs vt nahullo miko holitompa fena Filiks a pit aiokpvchishke.

27. Hatak ilvppa Chu vhlaha yvt ishi tuk; micha okla vba he tuk o; ilvppv Lom hatak atuk o haklo li mvt, tvshka chipota pehlinchit vla lish, okchalinchil li hokvno.

28. Micha kaniohmi ho okla anumpa onochi tuk okma, akostininchi ka sa bvna mvt ilauelet ilap itvnavv maya ka iba chukowa li tuk.



29. Mihmvt yummak okvt ilap i nan-vlhpisa yak o anum-pa hvt isht im atoba hatuk o, akostininchi li tuk; yohmi kia isht ai illikmá, keyukmvt talakchikmá nana he imma hokvto ik onvtulo ke tuk oke.

30. Micha Chu vhleha yvt hatak ash im aiechi hosh ma-ya ka vm annoa mvt, ashalika pit chin chvffichi lishke, mi-cha anumpa onochi vhleha mvt, yvma nana ho isht a miha hi vt im asha tuk vt, chishno chi tikba yak o a miha chi ma, aieninchit im apesa li tuk oke. Chi achukmakashke; achi tok.

31. Mihma tvshka chipota vhleha yvt, yummak osh im vlhpisa tuk okvt, Pal a ilauehit ninak o isht ayvt Antipetis a isht vla tok.

32. Ont onna ma yvma apihvt ia chi ka, issuba o binili tvshka ya ashachi cha, falamvt holihta kvlo ya okla ona tok.

33. Yummak ashót Sesalia ya ai vla cha, holisso hash nahullo miko ya ant ima mvt, Pal ma aieninchit ibbak fohki tok.

34. Mihma nahullo miko vt holisso hash pisvt issa mvt, ulhti nana ho vttvt aya hatuk a i ponaklo tok; Silisia ak atuk o akostininchi mvt,

35. Anumpa chi onochi vhleha ak kia ai vla hok mak o, chi haklo lashke; achi mvt Helot i nan ai vlhpisa chuka yak o, yummvt a foka chi ka, apesa tok oke.

#### CHAPTA XXIV.

Tatvlys vt Pal a anumpa onochi, 1. 10 Pal vt isht il anumpuli.

24 Pal vt nahullo miko tekchi ita tuklo ka Ilaist isht im anum-puli.

1. YUMMAK atuk a nitak tahlapit taha ma, na holi-tompa isht asha pehliche Ananais vt asononchika vhlena, miha hatak anumponli achvfa Tatvlys hohchifo ho itapehvt vla na, yummak osh Pal a nahullo miko a nan isht im anoli tok.

2. Yummak ash pit hoyo na vla ma, Tatuls vt anumpa onochit ishtivt, Filiks holitompa fehna ma! chishno ak atuk mak o nukchinto fehnvt il ahashwa chatuk, micha chishno vt nan chimponna pulla ho, nan isht im ai ahli achukma fehna kv̄t okla ilv̄ppa ai i yvmohmi chatuk oke.

3. Nitak moma, micha kanima a mominchit yukpa fehna hosh, il aiokpanchi chatok oke.

4. Himmakma achakalechit ak chin takobecho ka chi na-na kia, nuktanla chia hv̄t, anumpa tilofasi ish pi haiyaklobano, chim ai ahni lishke.

5. Hatak ilv̄ppvt, Chu v̄hleha yakni paknaka aiasha ka mominchit ai itin takla ma, nan isht ataklaiyamvt nan itachowa ma atohnochit aya mvt, Nasalin iksa ya in tikba hika yo e pisa hatuk oka.

6. Tempel ma aieninchit yummvt ik akobalo bvnna ho, ilv̄ppa il ishi kv̄t pishno pi nan v̄lhpisa yo, nan isht il im apesa chin tok.

7. Yohmi tuk kia kv̄pitvni chito Lisivs vt ayvt ant pi kohcha cha, kv̄llo fehnvt yummak ash pibbak a a kohchit eshi cha,

8. Yumma anumpa ai ikbichi v̄hleha yvt ayvt chishno a chim vla chi ka apehis̄a tuk; yummak oka chishno inlit im ai asilhhv̄chi hosh, anumpa isht il ai ikbichi hatuk puta ilv̄ppa ish akostinincha chi hatuk oke, ahanchi tok.

9. Mihma Chu v̄hleha hak kia pit ataklammvt nana kash yummvt yohmi tok oka, ahanchi tok.

10. Mihma anumpula chi ka, nahullo miko vt pit im av̄vchi ma, Pal ash ot, Okla ilv̄ppa nan im apesvt ish ahanta afv̄m̄mi kanohmi ka, chim akostininchi li hatuk osh, na yukpa fehna hosh isht ile anumpohonli lishke.

11. Uba pit aiokpv̄chi la chi hosh, Cheluselem ia li chash, nitak auah tuklo ka atampa keyu ka, ish ithaiyana hinla kama.

12. Yohmi ka tempel anukaka ya hatak nana kia ai itachowvt ahanta li, micha sinakak puta, micha tvmaha aiena ka okla ha ai ilhkolichit ahanta li, okla sa pisa tuk keyu.

13. Mikmvt nana ka anumpa ma himonasi a okla isht a sai onochi tuk vt atokola he keyu hoke.

14. Amba ilvppak o chim il anohonli li, vno nana puyuta nan vlhpisa holisso, micha hopaii vhleha i holisso aiena, a holihiso tok moma ka, yimmit iksa inla yo okla achi hatuk oka, an tikba vhleha in Chihowa ya yakohmit aiokpahanchi li mvhlishke.

15. Micha, ahli mikmvt ik ai ahlo, moma illi yvt tana hi a, yvmma ilap ak kia yohmi, okla ahni akinli hoka, vno vt Chihowa ya pit anukchieto lishke.

16. Yohmi hatuk o Chihowa, mikmvt hatak puta aiena itikba ya chukvsh mvt yoshoba iiksho bilia hosh ahanta la chi kv achunanchi li chatuk oke.

17. Yvmmak a tok a afvmmi kanohmit taha ma, na holhpila vm okla ha isht im aya li mvt, vba pit isht aiokpvchi puta aiena ka isht vla li tok.

18. Mih ho yvmmak o Chu kaniohmi Asia minti kv okla laua yokmá, keyukmvt a yahapa itin takla yokmá nana keyu, tempel anykaka yo, nahullochit vm vlhtahvt anta li ka, sa pisa tok.

19. Yvmmak osh chi tikba ma, ant maya tuk osh nana kia isht sa mihacha hi vt im asha tukmvt acha he tuk.

20. Yvmmak keyukmvt ilvppa maya kak inli kia vno vt nan ai apesa itikba-hikia li ka, nan ik vlhpeso nana kia vm ai akostininchi tukmvt, ik mihá.

21. Amba yvmma itin takla hikia li mvt, illi tani yak o isht tahpahanli li tuk, anumpa achvfa ilvppa illa tok o, himak nitak a hvchishno vt hvs svm asilhvchishke; achi tok.

22. Mihma Filiks vt ilvppa puta haklot, na yakohmi puta kash achukma fena ai akostininchi mvt, Kvpitvni chito Lisivs ak osh vla hokmak o nana hvchim a kaniohmi ya okluha hvchim akostininchi lashke; achi mvt, im achakalechi tok.

23. Micha kvpitvni hv Pal a apesvcha chi, yohmi kia fohacha he, mikmvt it ithvna ka vhleha yvt, nana ant isht im



vtta, keyukmvt im ai itanowvt maya ka, ik im olabo ka hi a, im apesa tok.

24. Yummak atuk a i himak nitak kanohmi ho, Filiks vt tekchi Chu ohoyo Tusila ya ilauelet vla mvt, Pal a pit hoyo cha, Klaist a i yimmi imma ka im a haponaklot chieya tok.

25. Yohmi na yummak ash ot, ai ahli, mikmvt ile nukta-lanli, micha nan-vlhpisa hi vt mihinti aiena ka isht anumpo-honli ma, Filiks vt wvnihinchi mvt, Himak okvno ish iashke, nitak vt vm vlhpiesa hok mak osh pit chi hoyo la hi oke; achi tok.

26. Micha Pal vt twli holisso kia ima na, i hotofa hinla ka im ahoba tok; yohmi hatuk osh chekosikma pit hoyo cha, itim anumpohonli beka tok.

27. Yohmi tuk kia yummak atuk a, afvmmi tuklo taha-ma, Pashis Festvs vt Filiks vlhtobvt hikia tok; mihma Filiks vt Chu vhleha ya yukpali bunna kvv, Pal vt talakchi na, issvt ia tok.

CHAPTA XXV.

Chu okla hvv Festvs itikba hielit, Pal a anumpa onochi.

1. YOHMI tuk o Festvs vt ulhti ha vla tuk a, nitak tuchina ont ia ma, Sesalia ya vttvt ivt Cheluselem a ona tok.

2. Mihma na holitompa isht asha pehlichy, micha Chu vhleha i hochitoka aiena kvv, yvmma Pal a ai isht im anoli cha, nan im asilhha tok.

3. Micha im aiokpanchi cha, yummak ash Cheluselem a vla chi ka, pit hoyo na, takla im aiechit vba chi kvv, im asilhha tok.

4. Yohmi kia Pal vt Sesalia yak inli ho anta pulla he, micha ilapo akinli mvt chekosikma, yvmma ia chi kvv, Festvs vt miha tok.

5. Yohmi hoka hatak vlhpisa hvchi takla maya kvv si apihvt ik ia cha, nan ik achukmo kvv a takanli hatukma hatak ilvppa ont ik atokolí; achi tok.

6. Micha yummak ash takla ahanta na, nitak pokoli ka ont atampa ma, ivt Sesalia ya ona tok. Atuk osh ont onna ma, nan apesa aiasha ya om binili mvt, Pal a isht vla hi a, miha tok.

7. Atuk o yummak ash ot vla ma, Chu vhleha Cheluselem mintit vla tuk vt, afoluplit hiohmayvt anumpa laua, micha okpulo fehna ho, ai ikbichit Pal a onochi mvt, yummak ash ai atokolit ahlichha he keyu ki tok.

8. Mihma ilapo inlit isht il anumpulit ahanta mvt, Chu okla i nan vlhpisa, micha tempel, mikmvt Sesa yak okma nana kia, nana ka isht ai i yoshoba li iksho kvmohmishke, achi tok.

9. Yohmi kia Festvs vt Chu vhleha ya yukpali bnna kvv, Pal a afalaminchi mvt, Cheluselem a ish ona cha, sa tikba hiki vt ilvppak atuk puta kvv nan isht chim vlhpisa hinla cho? achi tok.

10. Mihma Pal ash ot, Nana vm ai vlhpisa he ai vlhpesa mak o, Sesa vt ai asht nan apesa yo hikia lishke; Chu okla hoka nana ik achukmo nana kia, ai i yvmohmi li iksho ka, chishno vt ish ithaiyana fehnvshke.

11. Uno vt anumpa kobvffi sia hokma, keyukmvt isht ai illa he vlhpisa kaniohmi ho a si yvmohmi tuk okmvt, ik svllo ka hi a ak ahnoshke, Amba ilvppa puta kvv takali ho anumpa ma yakohmi kvv a sai onochi keyu hokmvno, hatak nana kia sasht ibbak ma ik fohko kashke, Sesa ya achakvlit pit im anoli li mak oke, achi tok.

12. Mihma Festvs vt nan itibai apesa vhleha ya itim anumpulit issa mvt, afalaminchit, Sesa yak o ish im anoli mak o? Sesa yak o ish im iashke, achi tok.

13. Atuk o nitak kanohmit taha ma, miko Ekilipa, micha Banisi ita tuklo kvv, Festvs a aiokpvchit aya hosh Sesalia ya itvlachi tok.

14. Micha yummak ash ant ashwa na nitak kanohmi ma, Festvs vt Pal nana im a kaniohmi ya, miko im anolit, Hatak achvfa kvv talakchi na, Filiks vt issvt ia tok a ashvshke.

15. Mihi yo Cheluselem ont anta li ma, na holitompa

isht asha pehlichí vñleha, micha Chu in tikba vñleha aiena kv̄t nan im apesakbano, ahnit v̄m anoli tok.

16. Mihma afalaminchit, Anumpa onvtula tuk vt anumpa onochi ya nashuka bika ita sanali keyu, micha nana isht a kaniohmi nan ash onvtula tuk vt, mihma isht il anumpula he mv̄t, ik im vñhpeso kisha ka Lom okla hv̄t hatak nana kia illi issa, im ai vñhpesa chatuk keyu hoke ; im achi li tuk.

17. Yohmi hatuk o ilv̄ppa okla ai v̄la ma, ahchiba iksho ont onna ma, nan apesa ai o binili ya o binili lish hatak ash isht kohchvt v̄la chí ka, apesa li tok.

18. Mihma anumpa onochi vñleha yvt wakayvt hieli mv̄t, yakohma chí ka ahni li tuk amo, achvfali kia isht ik onochi ki tok.

19. Amba ilapo v̄ba pit anumpuli isht a tovt̄t maya, mik-mvt Chisvs illi tok, yvm̄mak o Pal ak osh yvm̄mv̄t okchaya kak pulla, miha kak o ; yvm̄mak o anumpa isht onochi tok.

20. Mihma anumpa yvm̄ma chohmi ka, nan ai anukfilli ak ithano hatuk osh, Cheluselem ak o ona cha, yvm̄mak o ilv̄ppa puta kash ot nan isht im ai vñhpisa hinlakma, nana ka i ponaklo li kv̄no.

21. Yohmi kia Pal vt anumpa ha Akv̄stvs vt atoshowa ka, hakla he pulla h̄o ahni ma, apesanchi tuk o Sesa ya pit in chv̄ffichi la he vt miha li tuk oke ; ahanchi tok.

22. Mihma Ekilipa ash ot Festvs a, Ūno ak kia hatak yvm̄ma i haponaklo la hinla, im achi ma ; Onna ha mak o, ish i haponaklashke ; achi tok.

23. Atuk o ont onna ma, Ekilipa, micha Banisi aiena kv̄t shema chinto fehna hosh itvlachi cha, kv̄pitv̄ni hochitoka vñleha, micha hatak holitompa vñleha tv̄maha asha tuk a, ai itapeha cha ai asht na haklo ya pit abeha ma, Festvs im anumpa h̄o Pal a isht kohchit v̄la tok.

24. Mihma Festvs ash ot, Ekilipa miko, micha hatak pi apehvt ilv̄ppa hv̄sh maya kv̄t momvt hatak ilv̄ppa, Chu okla laua yvt moyumvt, yvm̄mak okvt himmakma okchayvt ahanta na ahchiba he vñhpesa keyushke, ahanchit Cheluselem, micha ilv̄ppak inli aiena ka, ai v̄m v̄la beka tuk mak o, hv̄sh pihisv̄shke.



25. Yohmi kia nana ho isht ai illa he vhpesa ka yvmohmi tuk keyu; micha ilapo akinli mvt anumpa ha achakalinchit Akvstvs a im anoli mak atuk o, akostininchi li mvt, pit chvffichi ka vm-anukfihinla tuk okano.

26. Mih hosh nana ho ymma ai isht, a shahli ha pit i holissochi li fehna hi vt ik svm iksho: yohmi hatuk osh nana im asilhhvchi yak osh asht issa ha yokmvo, nanasi ka holissochi la he vt vm asha hinla kak osh kohchit hvchi tikba, micha chishno ak o fehna kak o chi tikbi ya ant hilechi lishke, miko Ekilipa ma!

27. Anumpa mvt isht ai onvtula ka atokowa ma anoli ka aieninchi ho keyu kv, aboha kvlo foka ya pit chvfficha he vhpisa keyu ka, vm ahoba hokv; ahanchi tok oke.

## CHAPTA XXVI.

Pal vt Ekilipa a itikba hiki vt kanihmit aya chatuk puta kv anoli, 1.  
12 Pal vt vbanumpuli toba tok vt anoli.

1. MIHMA Ekilipa ashot, Chishno isht ish il anumpula chi kv, chim vhpesvshke, Pal a im achi tok. Mihma Pal ash ot ibbak a pit fahvmmi mvt, isht il anumpohonli tok.

2. Chu vhleha yvt anumpa isht a sai onochi tok imma puta ka mominchit himak nitak a, chi tikba hiki vt isht il anumpohonli la chi kv, na yukvt vm anukfihinvshke, miko Ekilipa ma!

3. Chu okla i nan vhpisa puta, micha anumpa ai isht itachowa puta aiena ka, chishno vt chimponna pulla hatuk mak o; yohmi hoka achukmalit a haponaklokbano, chim ai ahnilishke.

4. Ulla sa tomba tok takla, yvmvvt vmmona ka vno vm okla talaia ai itin takla Cheluselem ak a tok oka, nana a kanihmit mihinti li puta ka, Chu vhleha yvt momvt ithavvshke.

5. Vmmona kash inli ho, svthanvt isht auehinchi tok, yvmmak osh vbanumpa isht pim iksa apissali kv moma i shahli, Falisi yosh ahanta li tok a, anola hinla chishke.

6. Micha Chihowa yvt hvpin tikba vhleha ya anumpa ima tok a, a yimmi hatuk pulla hosh himonasi a hikiyt nan vm vhlpisa mak oke.

7. Anumpa tok yvmmak o pisa ka, aiahni hosh pim okla auah tuklo kv̄t nitak, ninak puyuta ka Chihowa ya pit aiok-pahanchi na bilia hoke. Na pit ai ahni yvmmak pulla ho, Chu vhleha yvt anumpa isht a sai onochi hoke, Ekilipa miko ma!

8. Chihowa yvt illi puta ka tanicha hi a, katiohmi ho ayimma he keyu nana ho hvchim ahoba cho?

9. Ūno vt Chisvs Nasalet vtta hohchifo ha i sanalit nana ka lauachit a si yvmohma he tuk oka, ahnit il anukfilli li mvhli tok.

10. Mihmvt na yvmmak ash Cheluselem a ai yvmihinchī li akinli tok; micha na holitompā isht aśha pehlichī vhleha yvt vm apesa hatuk o, vbanumpuli lauachit aboha kv̄llo pit apihinta li tok; micha okla vba chī ka vno vt vhlpesa, ahanchi li tok.

11. Micha sinakak puta ka ai ilbvshahanchi li mvt, Chihowa pit ik ahobalot anumpula hi a; atushpalihinchī li tok; micha yohmi ka i nukkilli li fehna hatuk osh issikkopali kv̄t, yakni inla tmaha puta kak kia isht aya li tok.

12. Yvmmak o na holitompā isht aśha pehlichī vhleha yvt atokowa, anumpa kv̄llo ai ahli achukma ka vma na, ieshi hosh Tamaskvs a ia hosh aya li tuk o,

13. Ont tvbokolik fehna, hina takla ya, tohwikeli vba minti kv̄t shohmalali kv̄t hvshi a imaiya hosh, tommit vno, micha si apehvt nowt aya tuk aiena kash a folupli na, pi-hisa li tok oke, miko ma!

14. Mihma momvt aka ont pi kaha ma, anumpa hv̄t vm anumpuli kv̄t, Heblu anumpa yo Sal, Sal ma! nanta katiohmi ho is svlvshali cho? Na halupa puta ho pit ish hvhli kv̄t chī palvmmi hoke; ahanchi na haiyaklo li tok.

15. Micha, Kv̄ta chia hoh cho. Chitokaka ma! achi li tok. Mihma, Ūno akosh Chisvs ish issikkopali a sia hoke.

16. Yohmi kia chishno a vbanumpa isht vtta, mikmvt nana ish pisa tuk ilvppa, micha nana chim ottv̄ninchī likma,

yvma puta ka ish anohonla he aiena ka, chikbi la chi, apisali ilvppa pulla hosh chi haiaka li hatuk oka; wakayvt chiyi a isht ish hikiashke.

17. Okla ha, micha oklushi nan ik ithano vhleha aiena ka akohchit chi hlakofichi li hatuk okvt.

18. Yvmmak oka i holhponayo ha fatummi, anonti ai okhlilika ya a filvmmichit tohwikelika ya isht onvt; micha Setvn apehliche a akohchit Chihowa ya isht ish im ohona na, nan ai ashvchika puta isht a akashofa ka, micha vno a yim-mika pulla hosh isht kashofa tok puta ka, iba takla ai ahanta aiena ma, ahayucha chi mako himak a pit chi chvffhinchilishke; achi tok.

19. Yohmi ma vba mintit haiaka kash ik im antiot ahanta li tok keyushke, miko Ekilipa ma!

20. Amba ile kostinichi cha filemvt, Chihowa ya okla im ona cha, ile kostinichi yvt a yohmi ai vhpiesa ho yvmohmit aiasha hi a, vmmona ka, Tamaskvs, mikmvt Cheluselem, micha Chutia yakni afullota moma aiasha ka mominchit im anoli li mvt, anonti oklushi nan ik ithano vhleha ma im anohonli li tok oke.

21. Yakohmi puta pulla hatuk mak o, tempel anukaka ya anta li ho, Chu vhleha yvt sashi cha, svbi bvnvt maya tok.

22, 23. Chihowa yvt si apelahanchi hatuk mak o, hopaii vhleha, micha Moses aiena kvv nan a kaniohma he, Klaist vt illvsha he, micha yvmmak osh illi tani ka tikba he, micha okla hash, mikmvt okla nan ik ithano vhleha aiena ka tohwekeli ka i haiakvcha he a, ahanchi tok a, yvma nan isht inla yo miha keyu hosh asvno, micha chipunta aiena ka im anohonli kvv, himak nitak a sa moma hoke, ahanchi tok.

24. Yakohmicheit isht il anumpohonli ma, Festvs vt chitolit anumpulit, Pal, chi tasimboshke; holisso chimponna fehna kak osh isht chi tasimbo hoke; achi tok.

25. Mihma, Sa tasimbo ho keyushke; amba anumpa ai ahli, anumpa kostini yo anumpohonli li hoke, Festvs holi-tompa fehna ma!

26. Miko vt ilvppa puta ka ithaiyana ho, itikba ma hikivt



nukwaya ikshot anumpuli li akinlishke. Nana ilvppak okvt chukbika y<sub>o</sub> a yvmohmi tok keyu hoka. A yakohmi puta kv<sub>t</sub> achvfona kia in luma keyu ka, vno vt akostininchi li hoka.

27. Miko Ekilipa ma! hopaii vhleha im anumpa ha chi yimmi cho? . Chi yimmi ka ithana lishke, achi tok.

28. Mihma Ekilipa ash ot Pal a, Ubanumpuli toba la hi a is si anukfokichi naha fehnvshke; im achi tok.

29. Mihma Pal vt, Chishno ak o bano keyu, amba himak nitak a sa haklo kv<sub>t</sub> moyumvt naha fehna cha, anonti fehna, vno ak o chiyulmi hosh, amba talakchi yakohmi kano keyu hosh, hvsh aiasha hi a, Chihowa ya pit im asilhha li hoke; achi tok.

30. Yakmihchit anumpulit issa ma, miko vt, nahullo miko, micha Banisi, mikmvt apehvt chieya tuk aiena kv<sub>t</sub> wakaya tok.

31. Micha naksika onvt taha mvt, Hatak ilvppvt isht ai illa he, micha isht a talakcha he ai vlhpesa nana ka, nana ho a kaniohmi kv<sub>t</sub> ikshoshke; achit itim anumpuli tok.

32. Mihma Ekilipa vt, Hatak ilvppvt i holhtufa hinla tuk, Sesa ako achakalit im anola chintuk keyu hatukmvt; Fests a im achi tok oke.

## CHAPTA XXVII.

Pal vt peni fohkv<sub>t</sub> Lom pila ia hosh aya, 1. 14 Mahli kv<sub>llo</sub> vt peni a onvtula. 39 Yakni a ont ahayuchi cha okla hlakofi.

1. MICHA peni fohkv<sub>t</sub> Itili ya il ona hi a ai vlhpisvt taha ma, Pal, micha aboha kv<sub>llo</sub> fohka inla kaniohmi aiena ka, tvshka chipota Akvstvs ai itapeha i kvpitvi, Chulivs hohchifo ho ibbak fohki tok.

2. Mihma Hlessalonika tumaha Masetonia hatak, Alistakvs vt piba foka hatuk o, Asia ya pit lapalika okla e maya chi mak osh pim anukfila hosh Atlemitivm peni yo pit il vlbeha mvt il ilhkoli tok.

3. Atuk osh ont onna ma, Saitvn a ont il ataya tok; mih-

ma Chulivs vt Pal a i kana fehnvt isht aya mvt, i kanomi vhleha aiasha ka ona cha, impa hinla chohmi ka, im apesa tok.

4. Atuk o yvmma asht il ilhkoli mvt, mahli hak osh ai isso hatuk o Saipilvs a nutaka il aya tok.

5. Micha Silisia, mikmvt Pafilia aiena okhvta ha pit il a hlopulli mvt, Lishi yakni, Maila tmaha ha e la tok.

6. Mih ho yvmmak o Aleksantia peni yvt Itili ya ia hosh aya na, kvpitvni hvt pisa cha, yvmmak o pishno ash pit pi apitta tok.

7. Mihma svlahvt il itvnova na nitak kanohmi hosh, Naitvs a ont kil i chapo kisha chiyuhmi ho, mahli hak osh pi a sanali hatuk o Salmoni i chapa ka Klit ak o nunta asht il aya tok.

8. Micha yvmmak ash ont kil aiyo chohmi hosh, peni ai ataya achukma hohchifo ho e la tok; yvmmak o bilika yo Lesi tmaha hvt talaia ha tok.

9. Atuk o ahchiebvt taha, micha nahullochi hvt ai issa-chi lia ya tuk o, himak okak heno peni isht aya ka ai achukma he keyu hatuk o, Pal ash ot nan i miha tok.

10. Mihmvt, Hatak puta ma! himak okhvta aya ka nana kvrt ai okpulo kvrt kvnihia fehna chishke, vllhpoyak, micha peni aiena kak bano keyu; amba hvvim ilhfopak vt aiena chi ka akostininchi lishke; im ahanchi tok.

11. Yohmi kia kvpitvni hash ot, peni vt immi hatuk, micha isht aya pehliche aiena kak o i yimmi kvrt, Pal vt nana anumpuli tuk a, im i shahli tok.

12. Micha peni ai ataya yokvt hvstula ya aiasha achukma keyu hatuk o, yvmma asht achakvltit ivt kaniohmi kia yohma hinlakmvt, Finisi yvmmak okvt Klit peni im ai ataya yosh falvmmi im okvtula imma pit bachayakmvt, anonti oka mahli im okvtula imma ma pit hikia ho, ona cha hvstula ya yvmmak o okla asha hi a, miha kak osh laua kvrt i shahli tok.

13. Atuk o oka mahli hvt lomvt mahli ma, okla nan ahni tuk vt im vllhpesa; im ahoba mvt, hotofi cha, Klit pit a bilikasit peni isht aya tok.

14. Yohmi tuk kia yummak atuk a hopaki keyu ho, mahli kvllo fehna tobt, Yulaklitvn hohchifo hosh ai isso tok.

15. Mihma peni vt atapvchit kvnia cha, mahli ha a sanalit ia hekeyu ma, ant shalit isht ik ayá, il ahni tok.

16. Mihma shalit ishtia ma, yakni tashaiyi achvfa Kilati hohchifo ho nutaka ona ma, penushi yak osh palvmmi ho isht e mihinti tok.

17. Yummak ash o okla hvlat ishi mvt, apelvchi kvv peni chito ash afohlit takehi mvt; anonti ik yohmokma, okchv-nak ont ai issa hinla ka, nukshopa kvv na hvta ha ai akvchi na shalit isht aya tok.

18. Atuk o mahli kvllo ka e takakanlit aya fehna hatuk o, ont onna ma, peni a okla shohhvachi tok.

19. Atuk osh nitak ont atuchina ma, pishno pibbak akinli ho peni isht talakchi ya ishit kocha pit e kampila tok.

20. Micha nitak kanohmi ka, hvshi, mikmvt fochik nana kia ik haiako ma, anonti mahli kvllo mvt atampa fehna hosh pi onvtuyula ma, pi okchaya he pit ahomba kash ot, momvt pi kvnia tok oke.

21. Yohmi kia okla ik impo ho hopakit taha ma, Pal vt wakayvt itin takla hikia cha, Holitopa vhleha ma! vno ak o hvs sa haponaklo tukmvt, Kilati a hvchik a hotofo ke tuk osh, nan okpulo, micha nan kvnia aiena ilvppa hvchik peso ka he tuk oke.

22. Yohmi kia hatak hvsh achvfona kia im ilhfiopak vt a kvnia chi keyu, amba peni ak illa chi hoka, hvchi yukpa hi a hvchi miha lishke.

23. Himak ninak a Chihowa yummak o immi sia hosh, mihi yo im atibiya li yatuk mak o, im enchil vt sa tuma ya hikivt,

24. Pal vt ik chi nukshopo kashke. Sesa itikba ya ish ona chi pulla hoke; mikmvt Chihowa yvt ai itapehvt peni isht hvsh aya ka, yvmma mominchit chima hoke; ahanchi tuk oka.

25. Yvmohmi hoka holitopa vhleha yvt na hvchi yuk-



pashke; nana vm annoa tuk fena kvt ont vllpiesa chi ka, Chihowa i sai yimmi hoka.

26. Yohmi kia yakni tashaiyi kaniohmi ho, ont iloh o hlatapa chi hoke; achi tok.

27. Yvmohmi tuk o ninak vt ont isht auah ushta mak o Atelia okhvta ha e fullokahanchi na, ninak iklvna foka ma, peni isht aya vhleha hash ot yakni nana mak o pit bilika ona ho, im ahoba tok.

28. Micha oka ya apesa mvt, ashatvpa pokoli tuklo ho akostininchi tok; atuk osh achakvltit ivt mishema ona mvt, anonti apesa ma, ashatvpa auah tahlapi na pisa tok.

29. Mihmvt tvli hochito ka ont ai issa hinla, ~~let~~, okla nukshopa kvt, yakni yichifi ya ushtat peni hasimbish a pit ai okvchi mvt, onnakbano ahnit aiasha tok.

30. Mihma peni chito isht aya vhleha yash ot peni chito ya a kohcha wihvt yihlepa chin cha, penushi yash okhvta ha pit oka talali mvt, yakni isht yichifi ya peni chito itikba ya pit ai oka kapulla hi a ahoba ma,

31. Pal vt, kvpitvni, micha tvshka chipota vhleha aiena kash, Yakohmi kak osh peni chito anukaka ya maya ho keyukma, hvchi okchaya he keyushke; im achi tok.

32. Mihma tvshka chipota vhleha yvt peni ushi isht-talakchi ya chanlit hokofi na akia tok.

33. Atuk o onnvt mihinti ma, Pal ash ot, momvt impa hinla ka, im ahni mvt, Nahullochit hvsh ahashwa cha, nana kia hvchik impo mak o himak vt nitak ont isht auah-ushtvshke.

34. Yohmi hoka nanasi hvsh impa hinla ka hvchim ahni lishke. Ilvppak o hvsh ai okchaya chi mak okvt; hvsh achvfona kia chi noshkobo ha pashi vt ai akia chi keyu mak oke; achi tok.

35. Yakohmihchit anumpulit tahli mvt, pvska ya eshi cha, moma itikba ya Chihowa pit ai aokpachi tok; micha tushtuli mvt, impvt ishtia tok.

36. Yohmi ma momvt yukpa chukma mvt, yvmmak ash kia okla impa tok.

37. Micha peni il alhto kvt e moma kvt hatak tahlepa tuklo cha pokoli untuklo akucha hannali il aiena tok.

38. Micha impa kvt okla ont im vhpesa mvt, onush a okla okhvta pit oka hlahlit peni a shohhalali tok.

39. Atuk o onnvt taha ma, yakni ya okla ik ithano ki tok; yohmi kia okhvta filvminchi yvt vhli hvt auet asha ho, okla pit pisa mvt, yohma hinla yobakma, yvmma peni ya ont fohka chi kvt okla im anukfila tok.

40. Micha isht yichifi ya okla kohchit aiowa mvt; okhvta ha okla im ile kaiyanchit peni isht afana isht talakchi a hotofi cha, nan tohbi shvpha wishakchi fehna takali ya mahli ha pit a asanalichit vba takalichi mvt, oka vhli pillaka, okla ia tok.

41. Micha okhvta tuklo ai itafama ya pit vlhto cha, peni ash yakni ont on talali tok; mihma ibbish imma kvto a kvllot kvnia cha ilhkola he keyu hosh talaya ma, amba hasimbish pila hamo oka banvtha kvllo fena kvt okpunit kanchi tok.

42. Mihma tvshka chipota vhleha hash ot aboha kvllo vhpita yatuk a vba hinla, yvmmak keyukma, kanima mvt okshonullit kohcha cha, hlakofa hinla ka, anumpulit maya tok.

43. Yohmi kia kvpitvni hvt Pal a okchalinechi bvna hatuk osh, okla nan ahni tuk a im olvbbi tok; mihmvt kanima hosh okyohla hinla kak osh tikba okhvta ha pit oka kahvt kocha ona chi ka,

44. Mikma inla kanimi kvt iti bvsha yo o binohli ma, kanimi mvt peni pahlahli yak o o binohla chi ho, miha tok. Mih hosh yakohmi tok; momvt nana kaniohmi iksho hosh yakni ya, okla onvt hlakofi tok oke.

CHAPTA XXVIII.

Pal, micha apehvt aya tuk aiena kash okla nan ik ithano vhleha hvt i kana fehna, 1. 8 Pal vt yakni tashaiyi abeka aiasha tuk a laua ho hlakofichi. 16 Pal vt Lom a vla mvt, Chu okla ha vbi isht im anumpuli.

1. **M**ICHA okla hlakofi mvt<sub>o</sub> yakni tashaiyi vt Milita hohchifo hatuk o akostininchi tok.

2. Mihma okla nan ik ithano vhleha yvt pi kana kv<sub>t</sub> peh chohmi tok keyu; mihma uhumba hatuk, micha kapvssa aiena hatuk oka, okla luak oti cha, mominchit pehlichit pishi tok.

3. Mihma Pal vt iti chipunta laua itahobit, sholit luak a ant itoyashachi ma, sinti okpulo fena yvt luak lvshpa ka vttvt kohchvt, ibbak a apakfoa tok.

4. Mihma sinti okpulo fehna yvt ibbak a a-takanli na, oklushi nan ik ithano vhleha yash ot pisa mvt, Ik kaniohmi kia hatak ilvppvt hatak bika vbi pulla tuk osh, okhvta hokvno i hlakofi tuk nana kia, na palvmmi ak okvto okchayvt ik antá, ahni keyu hoke; ilap bika itim achit maya tok.

5. Mihma sinti yash fahlit luak pit itvchi mvt, nan ik kanihmo ki tok.

6. Yohmi kia shatalikmá, keyukmvt ashalika illit aka itulakmá nana chi kak o, im ahobvt maya tok; yohmi tuk kia okla pisa na hopaki ho, nan ik i kanihmo ho pisa mvt, inlvchit im anukfla mvt, yvmmak ash nan isht-ahullo hoka, achi tok.

7. Yakni yvmmak oka yakni tashaiyi ya apehlichit Pvblivs hohchifo ho, im osapa yosh talohmaya tok. Atuk osh yvmmvt pi kana achukmvt pehlichit pishi na, nitak tuchina il ashwa tok.

8. Atuk o yakohmi tok, Pvblivs iki vt yvnha, micha isish ikfia aiena ho isht abeka hosh ittoyula tok; atuk o Pal vt yvmmak ash ont iba chukowa cha, vba pit anumpulit ibbak a isht umbitepa mvt, hlakofichi tok.

9. Ilvppvt a yakohmi ma inlaka ak kia, yakni tashaiyi yvmma abeka maya tuk vt ai vlv<sub>t</sub> hlakeh<sub>o</sub>fi tok.

10. Micha yvmmak okvt nan isht a holitopa laua ka isht pi holitobli tok; micha kocha il ilhkoli ma, nana kia isht aya he vlvhesa puta ka okla pi shaliichi tok.

11. Mihma hvshi tuchina kv<sub>t</sub> taha ma, Aleksantia peni yosh yvmmvt yakni tashaiyi yak o hvstula ya takanli tok; micha hohchifo mvt Kasta, mikmvt Palvks aiena hosh lapali ho, pit vlvhtot il ilhkoli tok.



12. Micha Sailekus a ont il ataya cha, ymma il ashwa na nitak tuchina tok.

13. Ymma asht e minti mvt apakfompvt mihintit Lichi-vm a e la tok; atuk o ont onna ma, oka mahlit mahli ma, mintit nitak ont atukla ma, Putioli, ya e la tok.

14. Ymmak o il itibapishi vhleha ya ant il ahayuchi ma, takla e maya na nitak untukla chi ka pim ahni tok; yohmi ma Lom pila imma pit il ilhkoli tok.

15. Mihma ymma asht il ilhkoli ka, il itibapishi vhleha yvt pi haklo mvt, Api Folvm, mikmvt Ai-impa chuka tuchina heli ka ai vhli kak o, ant a pi afamvt itvnowa tok, Pal vt ymma pisa mvt, Chihowa ya, yakoke, pit im ahni mvt, ayiminta tok.

16. Atuk o Lom a okla il ai vla ma, kvpitvni hvt aboha kvllo vhpita yatuk a nan apesvchi i kvpitvni ha ont ibbak fohki tok; amba Pal ano ik yohmi im ahni na, ilap bano hosh isht aya tuk tvshka chipota ya awant anta tok.

17. Atuk o yakohmi tok, nitak tuchina ont taha ma, Pal vt Chu hochitoka vhleha ha hoyot itahobi tok; micha itahoba ma, Hatak il itibapishi vhleha ma! vno vt okla hoka, micha pin tikba nana a kaniohmi a puta kia nana im ai isht a kaniohmi li kvv iksho nana kia, Cheluselem a vttvt talakchi yosh Lom okla ha ibbak fohka li hokvno.

18. Atuk o ymmak ashot okla achukmalit vm asilhhvchit taiyahli mvt, isht ai illa he vhpesa mvt, si a takali keyu hatuk oka okla a hotofa he tuk.

19. Yohmi kia Chu vhleha yvt ymma a sanalit anumpuli ma, vno vt ik kaniohmi kia, Sesa ya im anoli la hi vt, vm anukfila ha tok; vm okla talaia ka nana ho isht ai atokoli la hi vt vm asha ha tok o keyushke.

20. Yvmohmi hatuk osh ilvppa a yakohmi pulla kak o hvchi pisvt isht hvchitim anumpuli la chi hosh hvchi hoyo li tuk oke; Israel nan pit ai ahni a tok pulla mak o, tvli itatkvli ilvppvt isht sa talaiyakchi hokvt; im ahanchi tok.

21. Mihma, Chishno a chi nanumachi holisso kvv Chutia ya minti kvv ik pim vlo; yohmikma il itibapishi vhleha ak kia ai vla kvv kanima mvt, nana ik achukmo nana kia chi anolit anumpuli chatuk keyushke.

22. Yohmi kia chishno nana isht chim anukfila kano haklo ka il ahnishke; amba iksa ilvppak okvno na mihachi kvt kanima mominchi hoka, il ikhaiyanvshke; okla im achi tok.

23. Micha nitak okla pit im apesa tuk o, laua kvt ai vtta ya okla ant iba chukowa tok; mihma yummak osh Chihowa apelhichika ya atokolit im anolit, Moses i nan-vlhpisa, micha hopaii vhleha i holisso puta ka akohchit, Chisvs a isht ai anukfokichit ahanta na onnahinli tuk vt opia tok oke.

24. Yohmi ma nana kvt anumpa tuk puta ka kanimi kvtto yimmi ma, anonti kanimi mvt ik yimmo ki tok.

25. Micha okla ik ai it achvfo mvt, Pal vt anumpa achvfa anumpulit, Shilombish Holitopa yvt hopaii Esaias a, ahli hosh ai isht anumpulit hvpin tikba vhleha ya,

26. Oh ia cha, okla ilvppa haklo hokvno hvsh haklo kia hvchik akostinincho ka hi oke; mikmvt pisa hokvno hvsh pisa kia, yakohmi hvchik ai ahno ka hi oke; hvsh in ahanchashke.

27. Yummak keyukmvt nishkin a ishit pisa cha, anonti haksobish ma, ishit haklokmt, anonti chukvsh a akostininchi cha inlv im anukfila na, hlakofichi la hinla ka, okla ilvppa chukvsh vt nusilhha fehvrt taha ma, anonti haksobish mvt haponaklo kvt in takobi ma, anonti nishkin a okla okhishta hoka; im ahanchi tok.

28. Yvmohmi hoka, Chihowa yvt isht ai okchalinchi ya okla inla puta kak o ima ka, yummak okvto haponakla chi hoke, hvsh ithaiyanashke; achi ma, tisheli tok.

29. Yvmmt anumpa ilvppa ahanchit ont issa ma, Chu vhleha yvt tisheli cha, ilapo bika yak o itim anumpuli fehna hosh maya tok.

30. Yvmohmi ma Pal vt, ilap chuka puta tuk vt ahanta na, avmmti tuklo vlhpisa hlopulli tok; yohmi mvt kvna hosh i nowvt avvt vla ka aiokpahanchi banot,

31. Chihowa apelhichika ya isht anumpulit, hatak nana hosh im avmmti iksho ho, nana kvt Chitokaka Chisvs Klaist a pit ai ahalaia putakma nukwaya iiksho hosh im abahanchi beka tok oke.

# HOLISSO PAL UT CHUCH LOM

A HIKIA HO I HOLISSOCHI TOK.

---

## CHAPTA I.

Vbanumpa yimmi Lom aiasha ka Pal vt pit aiokpvchi, 1; 16 Vbanumpa hvt nana, micha nan vhpiesa nana hq isht otaiyani; 18 nashvchi moma ka Chihowa yvt i nukkilli; 21 nan ik ithano okla nan im ai ashvchika yvt nana hatuk okma anoli.

1. PAL, Chisvs Klaist in tishu, apostel toba kv, Chihowa im vbanumpa isht vtta hi osh vlhtoka tok vt,

2. Yvmma tikba pilla kash o Chihowa hvt Holisso Holitopa yak o i hopaii vhleha ha isht ai anohonli kv,

3. Ilap Ushi Chisvs Klaist hvpin Chitokaka, yvmmvt haknip imma hokvno Lewi isht atiaka yo isht atoba kak atok;

4. Micha shilombish holitopa hokvno illi tuk osh falamvt tani kak osh Chihowa Ushi nan im ai ahli fehna kv isht otaiyani ai okluha tok:

5. Yvmmak atuk pulla mak o isht ai i kana, micha vbanumpa isht-ai vtta vlhtoka aiena ka il ai eshi ka, oklushi moyuma kv vbanumpa ha im antia na ilap hohchifo hvt isht a holitopa hi atok:

6. Yvmmak o ibai achvvt Chisvs Klaist a im a hvchi vlhtohoka tok:

7. Lom aiasha moyuma Chihowa i holitopa, vbanumpuli tohomba tok moyuma ka Piki Chihowa, micha Chitokaka Chisvs Klaist ita tuklo nan isht i kana, micha nan isht it i nanaiya ita tuklo kv hvchi anukfoyukashke.

8. Vmmona ka Chisvs Klaist ak atuk mak o hvsh moyuma ka hvch ithaiyanvt, na hvchi yimmi hoka annohovvt



yakni moyuma ka a hlopulli kak o, an Chihowa ya yak oke, pit im ai ahni li hoke.

9. Yohmi ka yvmmak oka ilap Ushi im vbanumpa hak o ai isht sa shilombish oka isht in toksahanli li kvt, anumpa ilbvsha anumpuli li puta kvt pit hvch ithaiyana bieka hosh, isht hvchi anumpohonli li kvt ak isso kamohmi hoka, Chihowa yak osh nan atokowa si anoli yoke.

10. Himak a yohma he yoba tuk o nitak vt ik hopako kia achukma biektv ayvt, Chihowa yak osh ai ahni pulla na hvchim ona la he ak osh asihila lishke.

11. Yohmi ka hvchi pisa sa bvna fehna kvt, shilombish isht im achukma he yak o hvchi hopela li, nana ka isht hvchi hlampka hi atok.

12. Ilvppv nana ka hvch ibai yukpa li hokbano, na yimmi bika pia hatuk oka, achi li hoke.

13. Yohmi ka itibapishi li vhleha ma! hvch im ona la hi okvt himonna vm anukfihila kvt, nan-vni kaniohmi ka hvch itintakla ya ai ishi li kvt, Chentail inla vhleha ha ai ihishi li tok a chiyuhmi ak inlikbano ahni li tuk kia, si ataklama na himak a hvch ik ithano ka he ai ahni li keyu hoke.

14. Klik, micha Bvlbaha vhleha, nan ithana, nan ik ithano aiena ka vbanumpa ha isht im anumpohonli la he vm vlhpisa hoke.

15. Yohmi hoka, vno yokvto Lom hvsh ai asha kak kia, vbanumpa isht hvchim anumpohonli la chi kvt vm vlhtaha hoke.

16. Yohmi ka Klaist im vbanumpa ha i sa hofahya he keyu hoke: yohmi ka yvmmak okvt Chihowa nan im ai ahli pulla hatuk ak o kvna hosh yimmi puta hokvto isht ai okchaya hoke; vmmona ka Chu hak osh ai yvmohmi ho, anonti Klik vt ai yvmohmi ak inlishke.

17. Yohmi ka yvmmak o na yimmi ak atuk pulla kak o Chihowa i nan isht okchalanchi yvt na yimmi vhleha ha im otaiyani hoke; holiho kvt, Ai-vlhpiesa yokvto na yimmi pulla kak osh isht okchaya hi oke, achi hoka.

18. Yohmi ka Chihowa vba yakni binili nan isht i nukkilli yvt hatak vt Chihowa ik holitoblo, micha nan ai vlhpiesa

keyu yvmohmí puta kvt anumpa ai ahli ka ataklvmmi kak o onvtuyula hosh otaiyani hoka.

19. Yohmi ka Chihowa imma ka isht ithvna hinla ka ilap inli kvt isht otaiyani hoka, Chihowa yak osh i haiakvchi hatuk oka.

20. Yohmi ka yakni, micha nan okluha vba ai asha kvt toba tok takla ka nana nishkin isht pisa he keyu Chihowa immi puta ka akostininchi fehna kvt nan okluha tohomba tok a Chihowa nan okluha im ai ahli, micha okchayvt bilia yoka isht akostininchi hatuk osh nan isht a miha hi vt ik im ikshoshke.

21. Yohmi ka Chihowa yoka ithana ha yokvt, Chihowa chohmichit ik holitoblo kish, yak oke ik im ai ahno, amba im anukfila kvt nan isht ik ahobo tobt, chukvsh anukfila iksho yvt okhlilit knia tok.

22. Yvmmvt hopoyuksa ilahobi hosh ik hopoyukso toba tok.

23. Micha Chihowa illa he keyu isht a holitopa ya kan-ehit na holvt toba hatak illa he, micha hushi, micha nam-poa iyi ushta, micha nana balali puta aiena ka holvt toba ho holitobli tok.

24. Yvmohmi hatuk ak o Chihowa hokvt ilap inli chukvsh okpulo nan ai ahni puta kak atuk mak o na liteha ya a yvmohmit, ilap haknip puta kash inli isht ik iti hofahyali, im ai ahni tok ak inlishke :

25. Yohmi ka yvmmvt Chihowa i nan ai ahli yoka holabi yo isht ai ikbi cha, natoba yak o aiokpvchit, in toksahanli kvt Nan ikbi ya i shahlichit tok: yvmmak okvto holitopvt bilia yoke. Amen.

26. Ilvppak atuk pulla kak o Chihowa hv ant ik yvmohmí ai ahni ho, haui isht ile hofahyali ilaiyuka ka ai yvmohmi tok. Yohmi kvt ohoyo hak kia nana ka ai yvmohma he atuk ash o ai inlvchit, ohoyo hv ai yvmohma he atuk keyu ka yvmohmi tok.

27. Mihma nakni yak kia ohoyo hak o ai yvmohma he atuk vt issa cha, it i haui anukfilli kvt luhwa fehna mvt, nakni vt nakni bika ka isht a hofahya yak o it i yvmihinchit

hosh, ilap nan ai ashvchika isht vlhtoba ai vlhpiesa mak o ilap ash inli hosh ihishi tok.

28. Micha Chihowa hoka ithaiyana ka ik bvno hatuk oka, Chihowa hvt ant ik yvmohmi ai ahni ho, im anukfila okpulo yoka nan isht ai ahni hosh, nan isht a hofahya he puta ka yvmihinchik tok.

29. Yohmi hosh nan ai vlhpiesa keyu, itin lumaka, nan okpulo anukfilli, nan anushkunna, inla chukvsh hotopali bvna, nan it i potvno, hatak bika vbi, itachowa, it i haksichi, nan isht i nukkilli, inla lumvt na mihachi aiena ka isht ai alotovvt kvnia hatuk osh,

30. Inla ya ashakachit na mihachi puta, Chihowa i nukkilli vhleha, na hofahyalit isht anumpuli, ilefehnvchi, ilauata, nan isht ik achukmo puta ihikbi, iki, ishki ita tuklo ik im antio,

31. Nan im anukfila iksho, nan it im vlhpisa kobvfit shahli, im vlla i hullo ik im iksho, it i hopohla himma keyu, it i nukhaklo ik im iksho :

32. Yvmmak okvt Chihowa i nan vlhpisa yvt, kvna hosh nana yvma chiyuhmi ka yvmihinchik hokvt isht ai illa he vlhpiesa achi ka ithana kia ; yvma yvmihinchik kak bano keyu, amba kvna hosh yvmihinchik mak o isht im ai achukma hoke.

## CHAPTER II.

Kvna hosh nanashvchi hokvto nana ho isht apohpoacha hi vt ik im iksho, 1 : 6 mikvvt Chu yokma, keyukvvt Chentail okma, nana hatuk oh kia Chihowa i nan vlhpisa ha im a hlakofa he keyu.

1. YVMOHMI ka kvna chia hoh kia inla anumpa ish onochikvvt, nan isht ile mihacha hi vt ik chim ikshoshke, hatak chia ma ! kvna chia hosh inla anumpa ish onochi hokvvt, nana yvmmak ash inli ho ish ai yvmohmi chatuk okvt ; nana ho inla ya ish onochi kvvt, chishno yash inli hosh anumpa ish il onochi hoke.

2. Yohmi kia ilvppa chiyuhmi yvmihinchik puta hokvno



Chihowa yokvt ai ahli mak o nan vlhpisa ya onochi hoka il ithaiynvshke.

3. Yohmi ka hatak chia ma! nana yvmma yvmihinchī puta ka anumpa ish onochi mvt, yvmmak ash inli hō ish yvmihinchī kvt, Chihowa i nan vlhpisa ya ish ai i hlakofa hinla, chim ahoba cho?

4. Micha Chihowa isht chī kana ya isht ish ile kostinīncha he atuk vt chik ithaiyano hosh, isht chī kana fehnvt, chim ile salalit, na palvmmi chi onocha hi osh ile halanli aiena ka ish shitelama cho?

5. Amba chi chukvsh kvllo nan ai ashvchika isht nukhaklo keyu yak o ish iakaiya hosh, Chihowa yokvt nan ai vlhpiesa apesa ka otaiyana he, micha ai ilbvsha nitak vt otaiyanikma, a chilbvsha hi vt ish il im itvnahanlishke.

6. Yvmmak okvto hatak puta kvt ilap nana kaniohmi tok ak o isht ai im atobba hi oke.

7. Yohmi kvt kvna hosh nuktaiyalvt achunanchit nan achukma yvmohmi kvt, isht a holitopa, micha isht annoa achukma, micha isht ai illa he keyu hohoyo hokvno isht ai okchaya bilia he im apesa hi oke.

8. Amba kvna hosh Chihowa ya i sanali, micha anumpa ai ahli ik holitoblo hosh, amba nan ai vlhpiesa keyu a yvmohmi yokvno, isht i nukkilli chinto kvt onvtuyula hi oke,

9. Micha hatak nan ik achukmo yvmihchi puta hokvno isht ai ilbvsha, micha isht anukhvmmi aiena hosh onvtuyula kvt; Chu ak o tikba onvtuyula cha, Chentail ak kia onvtuyula hi oke:

10. Amba isht a holitopa, micha isht annoa achukma, micha isht it i nanaiya aiena hosh hatak nana achukma yvmihinchī puta hokvno onvtuyula he; yohmi kvt Chu ak o tikba onvtuyula cha, Chentail ak kia onvtuyula hi oke;

11. Yohmi ka Chihowa hokvto hatak puta ka it i shahshohlichī kvt ik im iksho hoke.

12. Yohmi ka laua kaniohmi hosh vba nan vlhpisa yvt ik im iksho hosh nan ashahanchī hokvto, vba nan vlhpisa iksho hō ai okpulo kvt kvnia mak inla he; mikma laua kaniohmi hosh vba nan vlhpisa yvt in tonla hosh nan ashahan-

chi hatuk mvt, vba nan vlhpisa yak o nan isht ai im vlhpisa hi oke :

13. Yohmi ka vba nan vlhpisa ya haklo vhleha hak osh Chihowa itikba ya isht ai vlhpiesa ho keyu, amba vba nan vlhpisa ya yvmihinchi vhleha hak osh ai vlhpiesa hoke.

14. Yohmi ka Chentail vba nan vlhpisa ik im iksho vhleha hvt ilap nan anukfilli hosh nana a kaniohma he vba nan vlhpisa ya foka tuk a yvmihchi hokmvt, yvmmvt vba nan vlhpisa yvt ik im iksho ak inli kia, ilap ash inli hosh isht im i nan vlhpisa yoke.

15. Yvmmak osh vba nan vlhpisa yvt nan i miha ka otvninchi kv̄t i chukvsh oka ai o holihiso ho, ilap nan isht il akostininchi yak kia nan atokowa ka ibai anohonli, mikma im anukfila puta kv̄t i himmak ano ilap ash inli hosh anumpa isht il onochi, isht il achukmali, kanimampo ka it im anohonli hoke.

16. Yohmi kv̄t Chihowa hokvt vm vbanumpa ak atuk pulla kak o Chisvs Klaist oka ishit hatak im anukfila luma puta tuk a nan im apesa he nitak yvmmak fehna ka yvmohma hi oke.

17. Yakeh ! Chu chi hohchifo kv̄t, vba nan vlhpisa ya ish anukchieto hosh Chihowa ya isht ish ilauata ;

18. Micha vba nan vlhpisa ya isht a chim vlbvchi hatuk osh, nan ai ahni ka ish ithana, micha nan achukma i shahli ka ish holitobli hoke ;

19. Micha nishkin tamoa ya in tikba hika, ai okhlilika anukaka aiasha ka im p̄vla sia hoke, ai ahnit ish ile yimmi hokvt ;

20. Micha im anukfila iksho kostininchi, vlla chipinta nan im avvchi, nan ithana, micha nan ai ahli vba nan vlhpisa foka ka ai isht ithvna ish ishi hoke.

21. Yvmohmi ka chishno yvt inla nan ithvnanchi chia hokvt, chishno inli kv̄no chik il ithvnancho cho ? Hatak vt hukopa he keyu ho otvninchit ish anumpohonli hokak osh, chishno yvt ish hukopa cho ?

22. Hatak vt itin lumaka he keyu, ish ahaya hokak osh, ish itin lumaka cho ? Na holv̄t toba ya i yuwalvt ish shi-

tilema hokak osh, Chihowa ya nana ish ima hi atuk vt ish ishi cho?

23. Uba nan vlhpisa isht ish ilauata ho kak osh, vba nan vlhpisa yash kobuffit Chihowa ya isht chik holitoblo cho?

24. Yohmi ka, Yohma hi o holihiso hatok oka, Chihowa hohchifo hvt Chentail vhleha ha ai i kvllakshi kv hvchishno yak atuk pulla kak oke.

25. Yohmi ka vba nan vlhpisa yak o ish holitoblik mvno, hakshup tupa yvt isht ai achukma ai ahli; amba vba nan vlhpisa ya, ish kobuffi yokmvno chi hakshup tupa yvt hakshup ik tapo hoke.

26. Yvmohmi ka hakshup ik tapo yvt vba nan vlhpisa yvt isht ai vlhpiesa kak o holitobli hokmvt, hakshup ik tapo yash ot hakshup tupa yo chohma hinla keyu?

27. Micha hakshup ik in tapo yoh mak osh vba nan vlhpisa ya holitobli hokmvt, chishno yokvt holisso hvt chin tonla, micha chi hakshup tupa kia vba nan vlhpisa ya ish kobahafi ka, nan chim apesa hinla keyu?

28. Yohmi ka paknali yokvto Chu keyu, micha nipi ai otvni kvto hakshup tupa keyu hoke.

29. Amba im anukfila anukaka yokvto Chu oke; mikma hakshup tupa yvto chukvsh anukaka yak oke; yvmmak oka hatak okvt ahninchu keyu, amba Chihowa yak oke.

### CHAPTA III.

Chu okla nan isht im achukma kv i shahli, 1. 9 Uba nan vlhpisa yvt nanashvchi Chu a isht im atokowa; 20 hatak nana hosh vba nan vlhpisa ya isht ai vlhpiesa he keyu: moma kv na yimmi ho isht ai vlhpiesa; yohmi kia vba nan vlhpisa yvt akshot kvnia keyu.

1. YOHMI ka Chu hvt nanta isht i shahli ho ishi ho? micha hakshup tupa ya nanta hak o isht im ai achukma ho?

2. Ai okluha bieka; vmmona ka Chihowa im anumpa hvt ibbak a foyuka hatok oka.

3. Yohmi ka kaniohmi kv ik yimmo hatuk okma, nanta



katiohmi cho? yummvt ik yimmo kak osh Chihowa yvt nan isht ai ahli yoka ik ai ahlecho hō?

4. Ik yvmohmo pullashke; ahli, Chihowa hokvto ai ahlikma, amba hatak moma kvto holabi ashke; yohma hi o holihiso hatok oka, Ish ai anumpohonli puta kvt ish ai ahla hi atok, micha nana chim vlhpisakmvt, ish imaiyacha hi atok.

5. Yofimi ka nan ai vlhpiesa keyu e yvmohmi kak osh Chihowa hvt nan ai vlhpiesa yvmohmi ka otvninchi hokmvno, nanta hak o il acha hinla hō? Chihowa hvt na palvmmi ka onochi kvt ik ai vlhpieso hō? Hatak vt anumpuli chatuk mak o anumpuli lishke.

6. Ik yvmohmo pullashke; yohmi hokmvno, Chihowa hvt okla moyuma ka katiohmit nan im apesa hinla hō?

7. Yohmi ka Chihowa nan isht ai ahli yokvt vno ak osh holabi li kak o isht i shahlit otvni na ilap vt isht a holitopa hokak o, nanta katiohmi hō nan ashvchi yo chiyuhmit nan vm vlhpisa hinla ak inli hō?

8. Amba nan ik ahlo isht a pi annohowa kvto, nan ik achukmo kak o e yvmohmi na nana kvto isht ai achukmashke, il achi hō kaniohmi hokak heto kvllochit anohonli hatok a, nanta katiohmi hō ke yvmohmo cho? yvmmak ash nan vlhpisa hvt onvtuyula he vt ai vlhpiesa hoke.

9. Yakohmi ka katiohmi hō? isht a pim achukma kvto yvmma il i shahli hō? Keyu kamohmi hoke; yohmi ka Chu, micha Chentail vhleha moyuma hokvt ai ashvchika nuta ai asha ka tikba kash il otvninchi tuk oke:

10. Yohma hi o holihiso hatok oka, ai vlhpiesa yvt iksho; achvfa kia iksho hoke:

11. Achvfona kia nana ka akostininchi kvto iksho; achvfa kia Chihowa ya hohoyo kvto iksho hoke.

12. Moyuma kvto naksika yo itvnohowa, moyuma kvto itapihvt isht ai achukma hi vt iksho; achvfa kia nana achukma yvmihchi kvto iksho; achvfa kia iksho hoke.

13. Ishit nvlli yvt hatak a hollopi tiwa yoke; isunlvsh a isht haksihinchi; asps nan isht vbi yvt itivlbi anukaka ya foka hoke:

14. Inla ya nan okpulo im ai ahnit anumpuli, micha anumpa na hotopali aiena kvt itih hā alotowa hoke.

15. Iyi yvt issish a hlatahampla chi kvt pulhki hoke.

16. Isht ai okpulo, micha isht ai ilbvsha aiena kvt i hina ya foyuka hoke :

17. Isht it i nanaiya hina ya ik ithano chatuk oke.

18. Chihowa isht i nukshopa yvt nishkin itikba ya ik im iksho hoke.

19. Yohmi ka nana hō vba nan vlhpisa yvt achi kvt, kva hosh vba nan vlhpisa i nuta ai asha kak o im achi ka il ithana; yohmi na itih puta kvt vlhkuma hi atok; micha okla moyuma kvt Chihowa itikba ya nan vlhpisa yvt ai onvtula hi atok.

20. Yvmohmi hoka nan isht ai vtta vba nan vlhpisa yvt ai ahni kak o hatak nana kia itikba ya ai vlhpiesa he keyu hoke; yohmi ka vba nan vlhpisa yak o ai ashvchika ya isht ithvna yoka.

21. Amba himonasi kano nan ai vlhpiesa kvt vba nan vlhpisa holitobli kak o keyu, Chihowa hvt atahli tok a otaiyani kvt, vba nan vlhpisa, micha hopaii vhleha hvt nan atokowa anohonli tok ak atok :

22. Yvmmvt Chihowa i nan ai vlhpiesa Chisvs Klaist i yimmi kak o a minti mak osh moyuma ka im annohowa, micha yimmi moyuma, kvt anukfoyuka; it im inla kvt iksho hoka :

23. Yohmi ka moyuma kvt nan ashvchi hatuk, micha Chihowa hvt ai ahninha hi a ik ono hatuk oka :

24. Chisvs Klaist vt isht vlhtoba ya atobbi tok pulla mak o, Chihowa isht i kana ya pilla isht ai im vlhpiesa hatuk oke :

25. Yvmmak oka im issish a anukchieto hokmak o, Chihowa hvt haiakvchi tok; yohmi hosh Chihowa hvt na palvmmi onocha hi osh ile halanlit, tikba nan ai ashahanchi tok a i kashofi kvt, nan isht ai vlhpiesa otvninha hi osh yvmohmi tok :

26. Yohmi hosh himonasi ya nan isht ai vlhpiesa ya otvninha chi hosh yvmohmi kvt, Chisvs ak o i yimmi hokvno

nan ai ashvchika ya ai vlhpiesachi kvt, ilap vt ai vlhpiesa hi atok.

27. Yohmi ka nan isht ilauata yvt katimak o? Iksho kamohmishke. Nan vlhpisa nanta hak o isht ai akshu ho? nan isht vtta nan vlhpisa hak o? Keyu, amba na yimmi nan vlhpisa kak oke.

28. Yvmohmi hoka hatak vt vba nan vlhpisa ya holitobli tok ak o keyu, amba na yimmi pulla kak osh isht ai vlhpiesa il ai ahnishke.

29. Chihowa hvt Chu ak illa in Chihowa ho? yvmmtv Chentail ak kia in Chihowa ak inli keyu ho? Ahli, Chentail ak kia in Chihowa hoke;

30. Yohmi ka hakshup tupa yvt i yimmi hatuk pulla mak o, micha hakshup ik tapo yvt yimmi hatuk pulla mak o ai vlhpiesacha hi vt Chihowa achufa illa hoka.

31. Yohmi ka na yimmi yatuk pulla kak o vba nan vlhpisa ya il akshochi ho? Ik yvmohmo pullashke: amba vba nan vlhpisa yak o il ai ahlichhi hoke.

#### CHAPTER IV.

Eblaham vt na yimmi hosh ai vlhpiesa isht hohchifo, 1 : 18 na yimmi moma hokvno Eblaham vt iki; 26 na hvvim a yimmi ka yak kia ai vlhpiesa isht pi hohchifa chi.

1. YOHMI ka piki Eblaham vt haknip imma hokvno nanta hak o ahayuchi tok o, il acha hinla ho?

2. Yohmi ka Eblaham vt vba nan vlhpisa ya isht ahanta kak osh isht ai vlhpiesa hokmvt, nan isht ilauata ishi; yohmi kia Chihowa itikba hokvno yvmohmi keyu ki tok.

3. Yohmi ka Holisso Holitopa yvt nanta hak o achi ho? Eblaham vt Chihowa ya i yimmi kak osh nan isht ai vlhpiesa yvt immi toba tok.

4. Yohmi ka na toksahanli ka isht im vlhtoba kvt isht i kana yo keyu, amba aheka yoke.

5. Amba toksahanli yak keyu, amba nan ashvchi ya ai



vlhpiesachi yak o i yimmi hokvto, ilap na yimmi ak osh nan isht ai vlhpiesa yvt immi toba hoke.

6. Yvmma chiyuhmi ka hatak vt toksahanli keyu kia, nan isht ai vlhpiesa ya Chihowa hvt ima na nan isht ilaiyukpa ka Lewi ak kia isht anumpuli kvt,

7. Kvna hosh nan ik ai vlhpieso yvt i kashofa, micha ai ashvchika yvt im ompoholmo hokvto, na yukpvshke.

8. Chitokaka yvt ai ashvchika ik im iksho yo chohmichi hokvno hatak yvmmvt na yukpvshke, achi tok.

9. Yohmi ka nan isht ilaiyukpa ilvppvt hakshup tupa ak illa ho immi ho? keyukmvt hakshup ik tapo yak kia aiena ho? Yohmi ka na yimmi yak osh Eblaham a nan isht ai vlhpiesa immi toba tok, il achi hoke.

10. Yohmi ka katiohmit immi toba tok o? hakshup tupa hayak atok o? keyukmvt hakshup ik tapo kisha kak atok o? Hakshup tupa hayak atok keyu, amba hakshup ik tapo kisha kak atok.

11. Yohmi ka hakshup tupa yak osh nan isht atokowa, micha nan isht ai vlhpiesa isht ai ahli mak o hakshup ik tapo kash inli hosh ishi tok; yohmi kvt hakshup ik tapo kia, yimmi hokvno moyuma ka iki ya hi atok; yohmi ho yvmmak kia nan isht ai vlhpiesa yvt immi ak inla hi atok:

12. Yohmi kvt hakshup tupa iki, micha hakshup tupa kak illa keyu, amba piki Eblaham vt hakshup ik tapo kisha ak inli kash osh yimmi a nohowa tok ak o iakaiya yvmmak okvno iki ya hi atok.

13. Yohmi ka Eblaham, micha isht atiaka yvt yakni moyuma kvt immi ha hi o im issa kvt, vba nan vlhpisa ya holitobli tok ak atok keyu, amba na yimmi nan isht ai vlhpiesa kak atok.

14. Yohmi ka vba nan vlhpisa yvmma anukchieto yak osh immi ha he yokma, na yimmi vt akshu toba, micha nan im issa tok a ai ahla he keyu hoke.

15. Yohmi ka vba nan vlhpisa yvto nan isht a palvmmi yoka; yohmi ka nan vlhpisa iksho hokvno, nan vlhpisa kobvffi iksho hoka.

16. Yvmohmi hoka isht i kana yak a hi atuk pulla kak o, na yimmi isht ai vlhpiesa kak oke: yohmi ho yvmmak ash isht atiaka moyuma ka nan im issa tok ash im ai ahla hi-atok: isht atiaka vba nan vlhpisa in tonla kash illa keyu, amba isht atiaka Eblaham e moyuma ka piki vt yimmi tok ak o chiyuhmi aiena kak o im ai ahla hi atok.

17. Yohmi ka, Oklushi lawa ka iki yo chikbi li tok; achi kv̄t holihiso hatok ak o yohmi hoke; Chihowa i yimmi tok yvmmak osh illi ya tanihinchī, micha nana kv̄t ik yvmohmo kisha kia, yohmi tuk ash inli ho chohmichit isht anumpohonli yvmmak o itikba ai yvmohmi hoke.

18. Yvmmv̄t yohma he ik ahobo fehna kia, yohmi pulla chi ahnit, oklushi lawa ka iki toba hi atuk vt yimmi tok; yohma hi o anuhumpa hatuk oka, Isht chi ai unchululi hv̄t yvmohma hi oke.

19. Yohmi kv̄t yimmi kv̄t ik kullo keyu hokv̄t, sipokni kv̄t afv̄m̄mi tahlepa achv̄fa foka kia, ilap hknip vt himonasi kv̄no illi, micha Sela im oshv̄to yv̄t illi, ai ahni tok keyu.

20. Chihowa hv̄t nan im issa tok ash ik yimmot anuk-tuklo keyu; amba yimmi kv̄t kullo hatuk osh Chihowa ha holitohombli tok:

21. Micha nan im ihisa hatuk vt ai ahlichā he bano aiena ka nukfoyuka fehna tok.

22. Micha yvmohmi kak o nan isht ai vlhpiesa yv̄t immi toba tok.

23. Yohmi ka yvmmv̄t immi toba tok a, holihiso kak osh ilap ak atuk illa hak atok keyu:

24. Amba pishno ak kia pi holihiso ak inli tok; pin Chitokaka Chisvs okv̄t illi tuk a falaminchit tanichi tok a il i yimmi hokmv̄t, pishno ak kia pimmi toba hi atok oka,

25. Yvmmak ash ot pim ai ashv̄chika yak atuk pulla mak o illa chi hosh im vlhpisa tuk osh, isht pi ai vlhpiesa he mak o anonti falamv̄t tani tok.

CHAPTA V.

Na yimmi ho isht a pi vlhpiesa hokmak osh nan isht i kana Chihowa il ibai ishi, 1; 8 in tenvp pia hatuk kia Chisvs im issish pulla ho il itin nanaiya tok; 10 il itin nanaiya hokvt hvpi okchaya chi pulla; 12 nanashvchi, micha nan illi itatuklo kv Alvm ak o minti tok; yohmi hoka nan ai vlhpiesa micha nan okchaya itatuklo kv Chisvs Klaist ako a minti hoke.

1. YUMOHMI ka na yimmi pulla yak o isht a pi ai vlhpiesa hatuk osh, pin Chitokaka Chisvs Klaist ak atuk pulla mak o Chihowa ya il it i nanaiya hoke.

2. Yvmmak atuk pulla mak o isht i kana il a hielu ilvppa na yimmi pulla kak osh e chukowa cha, Chihowa isht a holitopa ya il isha he ahnit, pi yuhukpvshke.

3. Micha yvmmak illa keyu, amba na palvmmi puta ak atuk mak o pi yuhukpa ak inlishke; na palvmmi yak osh nuktaiyalvt achunanchi ikbi hoka, il ithana hoke:

4. Mikmvt nuktaiyalvt achunanchi yak osh Chihowa immi ai a atokowa isht ai il ithana ikbi hoke; micha Chihowa immi ai atokowa isht ai il ithana yak osh ai okchaya pisa he ahni ikbi hoke:

5. Micha ai okchaya pisa he ahni yvt hofahyali keyu; Shilombish Holitopa yvt pi anukfoka hatuk osh Chihowa isht i hullo ya lauachit pi chukvsh anukaka ya pit fohobli hoka.

6. Yohmi ka hlampko ik pim iksho moma kak o ont ai vlhpiesa ma, Chisvs vt Chihowa ik holitoblo ya vlhtobvt illi tok.

7. Yohmi ka hatak vlhpesa yak ok mak o kanima kv vlhtobvt illa he keyu chiyuhmi; amba hatak achukma yokvno kaniohmi kv vlhtobvt illi kv ik nukwiyo ka hinla chishke.

8. Amba Chihowa hokvto isht pi hullo otvninchi kv, nan ashvchi pia moma kash o, Chisvs Klaist vt pi vlhtobvt illi kak a tok.

9. Yohmi ka himonasi hokvno im issish ak o isht a pi



vlhpiesa hokvt, yvmmak atuk pulla kak o isht i shahli fehnvt na palvmmi mihinti ka il i hlakofa hinla hoke.

10. Yohmi ka in twnvp pia moma kash ot, Ushi yvt illi tok pulla kak o Chihowa ya isht a il it i nanaiya hatuk okmvt, il it i nanaiya ha yokvt, ilap okchaya pulla kak o isht i shahli fehnvt isht a pi okchaya hinla hoke.

11. Micha yvmmak illa keyu, amba pin Chitokaka Chisvs Klaist ak atuk pulla kak o Chihowa ya isht a pi yuhukpa fehna cha, yvmmak atuk pulla kak o himonasi kvno isht il it i kana hoke.

12. Yvmohmi ka hatak achvfa nan ashvchi achvfa pulla ho ai ashvchika yokvt yakni paknaka yoka chukowa tok; micha ai ashvchika yak atuk pulla mak o nan illi yvt yakni paknaka yoka onvtuyula tok; yohmi hatuk o nan illi yvt hatak moyuma ka onvtuyula tok, moyuma kvt ashahanchi hatuk oka.

13. Yohmi ka vba nan vlhpisa yvt ik holisso kisha ho ai ashvchika yvt yakni paknaka ya a takali tok: amba nan vlhpisa yvt iksho hokvno ai ashvchika yvt onvtuyula he keyu hoke.

14. Yohmi kia Alvm ai ahantvt Moses ai ahanta ant ai vhli Alvm nan ashahanchi tok a chohmi keyu moyuma kak kia nan illi yokvt i shaiyahli tok; yvmmak ash ot vla hi atok yvmma isht vlhpisa hoke.

15. Amba nan ai ashvchika yash o na hvlbina yvto ik chiyuhmo hoke. Yohmi ka achvfa hosh nan ashvchi kak o moyuma kvt illi hokma, Chihowa hvv isht i kana, micha isht i kana yak o isht a hvlbina yvt isht i shahli fehnvt, Chisvs Klaist, hatak achvfa, yvmmak atuk pulla kak o moyuma ka in laua hoke.

16. Micha achvfa nan ai ashvchi tok ash o na hvlbina yokvto chiyuhmi keyu hoke: yohmi ka ai ashvchika achvfa nan im vlhpisa kvv isht ai i palvmmi yatok, amba pilla na hvlbina yak okvto ai ashvchika lava isht a kashofvt isht ai vlhpiesa yoke.

17. Hatak achvfa kash im ai ashvchika yak o nan illi yvt hatak achvfa kash pulla kak o isht i shaiyahli hatok okma;

isht i kana lawa, micha nan isht ai vihpiesa hulbina lawa ka ihishi hokak heto isht i shahli fehnvt, hatak achvfa, Chisvs Klaist ak atuk pulla mak o ai okchaya ya a mikot aiasha hi oke.

18. Yvmohmi ka achvfa nan ashvchi kash pulla kak o isht ai i palvmmi yvt hatak moma kvt isht im vlhpisa tok ash inli chiyuhmit, achvfa i nan isht ai vlhpiesa yak pulla kak o pilla na hulbina ai ashvchika i kashofvt isht ai vlhpiesvt okchaya hi vt hatak moyuma ka im aya hatok.

19. Hatak achvfa kash osh ik im antio pulla kak o moma kvt nan ai ashvchi vhleha toba tok ash inli chiyuhmit, achvfa kash osh im antia pulla kak o lawa kvt ai vlhpiesa toba hi oke.

20. Anonti ai ashvchika yvt lawa chi mak o, vba nan-vlhpisa yvt aya tok: yohmi kia ai ashvchika yvt lawa ma, isht i kana yvt isht i shahli fehnvt lawa tok.

21. Yohmi ka ai ashvchika yvt imaiyvt illihinchi tok ash inli chiyuhmit, isht i kana isht ai vlhpiesa pulla kak osh isht i shahlit pin Chitokaka Chisvs Klaist atuk pulla mak o, isht okchalinchi bilia hi atok.

## CHAPTA VI.

Nanashvchi il ai ahanta he keyu, 1; 3 na baptismo pulla hosh yvm-mak ash il im illi hatuk okvt: 12 nan ahopoyuksa a yvmohma he osh pishno ak inli il im issa hatuk oka; himaka pilla ma nanashvchi yvt ik hvp i shahlo kashke: 22 nanashvchi atoksali isht im vlhtoba kvt nan illi.

1. YOHMI ka nanta hak o il acha hinla ho? Isht i kana yvt laua chi mak o, isht ai ashvchika ya e mahaya hinla ho?

2. Ik yvmohmo pullashke. Ai ashvchika ya il im illi ha yvt, katiohmi kak osh yvmmak ash inli ho il ai ahanta moma hinla ho?

3. Yohmi ka Chisvs Klaist ak o im a baptismo kvt, illi tok a isht a pi baptismo ak inli hatuk a, hvch ik ithano ho?

4. Yvmohmi ka pi baptismo pulla kak osh illit il iba hol-

lopi hoke: yohmit Klaist illi tok vt Chihowa isht a holi-topa yak pulla kak o falamvt isht a tani tok ash inli chiyuhmit, pishno yak kia himonvt toba yosh il itvnowa hi atok.

5. Yohmi ka ilap illi tok ak o isht a hoyulba hosh il iba hollokchi hatokmvt, illi tuk vt falamvt tani tok ak kia isht il a hoyulba ak inla hi atok.

6. Yohmi ka ai ashvchika haknip vt okpulot kvnia na himak a pilla hokvno ai ashvchika yvno il i yuka he keyu mak o, pim anukfila tikba yvt ititaiyukhvna yak o yvmma ibai illi hatok, ilvppa il ithana hoka.

7. Yohmi ka kvna hosh ibai illi hokvto, ai ashvchika ya ai i mokofa hoke.

8. Anonti Klaist a il ibai illi hatok mvt, il ibai okchaya ak inla hi okvt, pi yimmishke.

9. Yohmi ka Klaist vt illi tuk vt, falamvt tani hatok okvt, himmakma illa he keyu: nan illi yvt himmakma imaiyacha he keyu ka il ithaiyanvshke.

10. Yohmi ka illi hokvto, himonna illa ho ai ashvchika pulla kak o illi hatok: amba okchaya hokvto, Chihowa hak o im ahantvshke.

11. Yvmmak inli ho chiyuhmit hvchishno yak kia ai ashvchika ya il im illi ho mvhli, hvsh il ahni, amba pin Chitokaka Chisvs Klaist ak atok pulla mak o okchayvt Chihowa ya il im ahanta, hvsh il ahni ak inlashke.

12. Ai ashvchika yvt hvchi haknip illa hi a ik imaiyacho ki, im anukfila okpulo yvmma hvch ik im antio kashke.

13. Hvchi haknip moyuma ka vlhpesa ahnit, nan ik ai vlhpieso isht a yvmohmi yo chiyuhmit isht hvsh ashvchi ná; amba illi tok osh falamvt okchaya ho chiyuhmit, Chihowa ya hvsh il im issashke; micha hvchi haknip moyuma kv Chihowa yak o nan isht ai vlhpiesa isht i yvmohmi mak o hvsh chiyumashke,

14. Yohmi ka ai ashvchika yvt hvch i shahla he keyu; yohmi ka nan vlhpisa yak o nutaka hvsh anta keyu, amba isht i kana yak oke.

15. Yohmi ka katiohmi cho? nan vlhpisa ya nutaka il



anta keyu; amba isht i kana nutaka yo il anta kak osh il ashvcha chi ho? ik yvmohmo pullashke.

16. Yohmi ka kvna ho in tishu tobt hvsh im antia hokmvt, kvna ho hvsh im antia kv, in tishu hvchia hokvt hvch ik ithano ho? Ai ashvchika isht ai illi, keyukmvt im antivt isht ai vlhpiesa yak okmá, kanimampo yoke.

17. Amba ai ashvchika ya i yuka hvchia hatok ak inli kia, nan isht vlbvchi kaniohmi ho hvchim vlbvchi hatok vt hvchi chukvsh ak o isht hvsh holitobli hatuk-ak o, Chihowa ya yak oke, pit im ai ahni lishke.

18. Yvmohmi ka ai ashvchika ya hvsh ai i mokofa mak osh, nan isht ai vlhpiesa ya in tishu hvsh toba hatok.

19. Hvchim anukfila hv ik hlampko pulla kak o, hatak anumpuli chatuk mak o chiyuhmit anumpuli lishke; yohmi kv hvchi haknip moyuma ka vlhpesa ahnit, nan ik vlhpeso ya hvsh yvmohma chi kak osh, na liteha, micha nan ik vlhpeso aiena ka i yuka hvsh toba tok ash inli chiyuhmit, himonasi hokvno hvchi haknip moyuma ka vlhpesa ahnit, ai ashvchika yvt ik hvchim iksho ka chi kak osh nan isht ai vlhpiesa ya in tishu hvsh tobashke.

20. Yohmi kv ai ashvchika ya i yuka hosh hvsh ai asha mvto, nan isht ai vlhpiesa yvt ik hvchim iksho ki tok;

21. Yohmi ka nana yakohmi puta kvno nan isht il ai yukpa nanta ho hvsh ai ishi tok okak osh himonasi hokvno yvmak a tok a hvsh i hofahya ho? yohmi ka nana yakohmi puta ka ont im ai isht aiyopi hokvto nan illi hak oke.

22. Amba himonasi hokvno ai ashvchika ya ai i mokofa hatok osh, Chihowa yak o in tishu hvsh toba hosh, ai ashvchika i kashofvt isht il ai yukpa hvsh ishi hoke: yvmvt ont im ai ishtaiyopi kv ai okchayvt bilia yak oke.

23. Yohmi ka ai ashvchika ya isht vltoba hokvto nan illi hak oke; amba pin Chitokaka Chisvs Klaist ak atok pulla mak o Chihowa i na hvlbina hokvto ai okchayvt bilia yak oke.

## CHAPTER VII.

Okchayvt anta kak illa ho vba nan vllhpisa yvt onvtuyula, 1, 4 yohmi ka vba nan vllhpisa ya il im illi tok; 7 yohmi kia vba nan vllhpisa yvt nanashvchi keyu; 12 amba holitopa vllhpiesa, micha achukma; nan vllhpisa ya holitobli kvit ik onancho kak osh Pal vt nukhaklo tok.

1. ITIBAPISHI li vhleha ma! nan vllhpisa ya ithana vhleha hak o im anumpuli lishke; yohmi ka hatak vt okchaya takla ka nan vllhpisa yvt i shaiyahli hoka hvch ik ithano cho?

2. Yohmi ka ohoyo hvit i hatak ashakmvt, nan vllhpisa ya nutaka ahanta hatuk osh, i hatak vt okchaya takla ka i filvmma he keyu; amba i hatak ak osh illi hok mvno, i hatak a i filvmma he keyu nan vllhpisa yash o ai i mokofa hoke.

3. Yvmohmi hatuk o i hatak vt okchaya takla ho, hatak inla auwaya hokmvt, havi hohchifa hi oke; amba i hatak vt illi hokmvno, nan vllhpisa yvmmak ash ai i mokofa hoke; yohmi hokvt hatak inla yo ik auwaya mak osh havi toba he keyu hoke.

4. Yvmohmi hoka itibapishi li vhleha ma! hvchishno yak kia Chisvs Klaist haknip atuk pulla mak o nan vllhpisa ya hvsh im illi hoke: yohmi kvit inla yo hvsh auwaya kvit, illi tok vt falamvt tani tok yvmmak a hi atuk: yohmi hosh Chihowa yoka nan vnit hvsh i waya hi atok.

5. Yohmi ka haknip ak o i nutaka hosh il ai asha mvno, ai ashvchika anukfila puta kvit nan vllhpisa atuk pulla mak o yvmohmit, haknip moyuma ka a toksahanli hosh isht illi ya vnit wahaya tok.

6. Amba himonasi kvno nan vllhpisa ya il ai i mokofa kvit, i nutakvt il ai asha hatok vt il im illi hatuk okvt; Chihowa ya holisso tikba ya tok ak o isht il a holitobla he atuk keyu, amba shilombish himona yo isht e holitobla he atuk oke,

7. Yakohmi hoka nanta hak o il acha hinla ho? vba nan

vlhpisa yak osh ai ashvchika yo? ik yvmohmo pullashke. Keyu, ai ashvchika ya ak ithano ke tuk osh, amba vba nan vlhpisa ak atuk pulla mak o ithana li tok; yohmi kv̄t nan vlhpisa yak osh, Chik anushkunno kashke, achi hatuk keyukma, nan anushkunna yo ithana la hi atuk keyu hoke.

8. Amba ai ashvchika yvt vba nan vlhpisa atuk pulla mak o nan-anushkunna ilaiyuka puta ka isht si anukfokihinchī tok; vba nan vlhpisa yvt iksho hokvno ai ashvchika yvt illi yatok oka.

9. Yohmi ka vba nan vlhpisa ya ak ithano hokvto, himonna ka sai okchaya tok; amba vba nan vlhpisa nan ai ahni kv̄t vla mvno, ai ashvchika yvt okcha tok: mihma svlli tok.

10. Micha vba nan vlhpisa yvm̄m̄vt isht ai okchaya yosh vlhpihisa tok ash osh, isht illi yo ahayuchi li tok.

11. Yohmi ka ai ashvchika yvt vba nan vlhpisa yak o isht okcha cha, sa haksichi tok; micha yvm̄mak o isht svbi tok.

12. Yvmohmi hatuk o vba nan vlhpisa yvt holitopa, mikma nan vlhpisa nan ai ahni kv̄t holitopa, ai vlhpiesa, micha achukma hoke.

13. Yvmohmi ka nana achukma yvm̄mak okak osh isht a svlla he an toba tok o? ik yvmohmo pullashke. Amba ai ashvchika yak atok yohmi ho ai ashvchika yvt otvna chi kak osh, nana achukma ka isht a svlla he vm̄ ikbi tok; yohmi ho ai ashvchika yvt ik achukmo atampa fehna kv̄t nan vlhpisa nan ai ahni kak o isht ai otvna hi atok.

14. Yohmi ka vba nan vlhpisa yvto shilombish imma hoka il ithanvshke; amba vno yokvto haknip nan ai ahni i nuta sia, ai ashvchika ya i yuka sia hoke.

15. Yohmi kv̄t nana ho yohmi li kv̄t, vlhpesa ak ahno; yohmi kv̄t nana ho ai ahni li hokvto, yvm̄mvno ak yvmihcho; amba nana ho ak ahninchokm̄vt, yvm̄mak o yvmihchi lishke.

16. Yvmohmi kv̄t nana ka ak yvmihcho hokbano ai ahni lik mak osh yvmihchi li hokm̄vt, vba nan vlhpisa yvt achukm̄vshke, vno yvt ai ahni lishke.

17. Yakohmi hoka vno ak osh himmakma yvm̄ma yvmi-



hinchí li kak keyu, amba ai ashvchika si anukfoyuka kak oke.

18. Yohmi ka vno ya sa foyuka, yvmmvt sa haknip anukaka ya nana achukma kv̄t iiksho ka ithaiyana lishke: yohmi kv̄t nana achukma ai ahni hokv̄to si anukfoyuka; yohmi kia nana achukma yvmma yvmihinchí la he ak osh ak aha-yuchoshke.

19. Yohmi kv̄t nana achukma kv̄no yvmihchí la he ai ahni li kv̄t, ak yvmihchoshke; amba nana ik achukma kv̄no yvmihchí la he ak ai ahno kia, yvmmvno yvmihchí lishke.

20. Anonti nana ka ak yvmihcho hok bano ai ahni lik mak osh yvmihchí li hokmv̄t, vno ak osh himmakma yvmma yvmihchí li kak keyu; amba ai ashvchika si anukfoyuka kak oke.

21. Yakohmi hoka nana achukma ka yvmihchí la he ai ahni likma, nana ik achukmo hokv̄t si anukfoyuka a bilia kv̄t, il akostininchí lishke.

22. Yvmohmi hoka Chihowa i nan v̄lhpisa ya vm anukfila himona yak okv̄no isht i hullo lishke.

23. Yohmi kia sa haknip nan ai ahni hokv̄t inla hatuk osh, vm a nukfila nana ai ahni ka in tanahampi, micha ai ashvchika nan ai ahni sa haknip foyuka kak o i yuka sahakbi ho, pisa lishke.

24. V̄no hatak ilbrysha fehna sia hoka, kv̄ta hak osh isht ai illi haknip ilv̄ppa a sa hlakoficha chí cho?

25. Pin Chitokaka Chisvs Klaist atuk pulla kak o Chihowa ya yak oke pit im ai ahni lishke. Yakohmi hoka vm anukfila hokv̄no Chihowa i nan v̄lhpisa yoka isht holitobli li; amba sa haknip okv̄no ai ashvchika nan ai ahni kak o isht i yuka sia hoke.

## CHAPTER VIII.

Klaist a kv̄na hosh ib ai achv̄fa cha, Shilombish nan ahni ho ahanta hokv̄to isht ai ilbrysha he nan v̄lhpisa ya im ai i hlakofi, 1; 5-13 nan isht ahotopa he nana hosh haknip a atoba: 6-14 nan achukma nana hosh Shilombish a a minti, 17 mikma Chihowa im v̄lla toba

ka nana achukma nana hosh otvni; 29 nan isht ai okchaya hi vt Chihowa pulla hō tīkba ma im vlhpisa tok; 38 nan isht i hullo ya nanta hosh isht a pit i filamincha hinla hō?

1. YŪMOHMI hoka Klaist Chisvs ibai achvfa, haknip nan ai ahni kak o yvmohmi keyu, amba Shilombish nan ai ahni kak o iakaiya vhleha hokvno himonasi ka isht ai i palvmma he anumpa hvt im vlhpisa keyu hoke.

2. Yvmohmi ka isht ai okchaya Shilombish nan ai ahni Klaist Chisvs a minti kak osh ai ashvchika nan ai ahni isht ai illi yō a sa hlakofichi hatok oke.

3. Yohmi ka vba nan vlhpisa yvt nana ka ik atahlo kv̄t, haknip ak atuk pulla kak o ik ai ahlo hatuk o, Chihowa hvt ilap Ushi ak inli hō ai ashvchika isht vlhtoba mak o hatak nan ashvchi haknip a hobachit auet kanchi hosh, haknip ak o ai ashvchika ya ai i palvmmminchi tok:

4. Yohmi hō pishno yokvno haknip nan ai ahni ka e yvmohomi keyu, amba Shilombish nan ai ahni kak o il iakaiya kak osh, vba nan vlhpisa isht ai vlhpiesa kv̄t pim ai ahla he atok oke.

5. Yohmi ka haknip nan ai ahni kak o iakaiya hokvto, nana puta haknip immi hak o i hullot anukfihinli chatuk: amba Shilombish nan ai ahni kak o iakaiya hokvto, nana puta Shilombish immi hak o i hullot anukfihinli chatuk oke.

6. Yohmi ka haknip nan ai ahni kak o isht ahanta hokvto isht ai illi yoke; amba Shilombish nan ai ahni kak o isht ahanta hokvto isht ai okchaya, micha isht it i nanaiya yoke:

7. Haknip nan ai ahni kak o isht ahanta hokvto Chihowa i nukkilli yoka; yohmi kv̄t Chihowa i nan vlhpisa ya im antia keyu, micha yohma hi o keyu kamohmi mvhlishe.

8. Yakohmi hoka haknip nan ai ahni kak o i nutakvt ahanta hokvto Chihowa ya yukpala himma keyushke.

9. Amba haknip nan ai ahni kak o i nutakvt hvsh ahanta keyu, amba Shilombish nan ai ahni kak o i nutakvt hvsh ahanta hoke; Chihowa imi Shilombish ak osh hvchi anukfoyuka ho mvhli hokmvt. Yohmi ka hatak nana hosh Klaist imi Shilombish a ishi keyu hohmvt, immi hō keyu hoke.

10. Michā Klaist ak osh hvchi foyuka hokma, hvchi hak-

nip okvto ai ashvchika yak atuk pulla kak o illi hoke : amba hvchi shilombish okvto nan isht ai vlhpiesa pulla kak o okchaya hoke.

11. Amba Chisvs vt illi tuk a falaminchit tanichi tok imi Shilombish ak osh hvchi anukfoyuka hokmvt, Klaist vt illi tuk a falaminchit tanichi hatok ak osh hvchi haknip illi im vlhtayak ilap imi Shilombish hvchi anukfoyuka kak o isht okchalinchi ak inla hi oke.

12. Yvmohmi ka itibapishi li vhleha ma! nan aheka vhleha pia kvv haknip nan ai ahni kak o il im aheka yosh haknip nan ai ahni kak o il iakaiya hi o keyu hoke.

13. Yohmi ka haknip nan ai ahni kak o hvsh iakaiya hokmvt, hvch illa hi oke ; amba Shilombish ak atuk pulla kak o haknip nan a kaniohmi puta ka hvsh illihinchi hokmvt, hvchi okchaya hi oke.

14. Yohmi ka laua kaniohmi ho Chihowa imi Shilombish ak osh anukfokit isht aya hokvno, Chihowa ak o ushi vhleha hoke.

15. Yohmi ka anonti isht a hvchi nukshopa chi hosh yuka im anukfila ho hvsh ishi hatok keyu ; amba vlla im anukfila ho hvsh ishi hatok ak o, pishno vt Abba, Piki, il achishke.

16. Shilombish Holitopa ak inli hosh pimi shilombish a nan isht atokowa it ibai anohonli kvv, Chihowa im vlla vhleha pia ka anolishke,

17. Micha im vlla pia hokmvt, isha he ai vlhpiesa pia : micha Chihowa yak o im ai isha he vlhpiesa pia, micha Klaist ak o it ibai isha he ai vlhpiesa pia hoke : yohmi ka il ibai ilbvsha ho mvhli hok mak osh il iba holitopa hi atok.

18. Yohmi ka yakni paknaka ilvppa nan isht ai ilbvsha puta hokvto nan isht a holitopa pim otaiyana hi a pit it vlhpisa hi a ik ono, ai ahni lishke,

19. Nana toba tok puta hokvto Chihowa ushi vhleha hvv isht otaiyana hi ak o pit hohoyo fehna hosh ai asha hoke.

20. Nana toba tok puta hokvto vlhpesa ik ahno kia, isht ai illa hi vt im vlhpisa tok : yohmi kia isht ai illa he im apesa kvv, isht a hlakofa he ahna hi a nukfokit yvmilichi tok.



21. Yohmi hoka nana toba tok ash puta kvt isht ai illa he i yuka hatuk vt ai i hlakofi cha, Chihowa im vlla vhleha hvt yuka keyut isht a holitopa yvt immi ak inla hi oke.

22. Yohmi ka nana toba tok puta moyuma kvt it ibai hihivt, it ibai ilbahasha na himak a hoka, il ithaiyanvshke.

23. Micha yvmmak illa ho keyu, amba pishno ak kia Shilombish isht ai vni waya vmmona ka il ishi kvt, pishno ak kia e hihaha kvt vlla ai ahli e toba he, yvmvt pi haknip isht a hlakofi yak o e hohoyo hoke,

24. Yohmi ka nana kvt pim vlhtaha tok vt il isha he il ahni kak osh isht ai okchayvt il ahanta hoke: amba nana ka il ishi hokvto, himmak o il isha he il ahna he keyu hoka: yohmi ka katiohmit hatak vt nana ka ishi kvt himmak o ishi la hi oka, ahni ho?

25. Amba nana ka e pisa keyu hosh il isha chi, il ai ahni hok mak osh nuktaiyalvt achunanchit e hohoyo hoke.

26. Yvmmak i chiyuhmit Shilombish ak kia ik a pi hlampko puta ka pi apelahanchi fehna hoke: nana ka il asilhha he tuk ai vlhpiesa kvt pishno ak inli kvt il ithana keyu hoka; amba Shilombish ash inli hosh isht a hihaha isht anumpa he keyu puta kak o pi anukfokihinchli hoke.

27. Yohmi kia chukvsh puta silhhit akostininchi yak okvto Shilombish vt nana ho pi anukfokihinchli ka ithana hoke: Chihowa nan ai ahni kak o Shilombish ash ot vbanumpuli ahli puta ka nana ka anukfokihinchli hokvt.

28. Yohmi ka nan okluha hokvt Chihowa i hullo vhleha, ilap nan ai ahni tok pulla mak o vlthohoka tok vhleha hokvto, isht im ai achukma he mak o it ibai toksahanli ka il ithaiyanvshke.

29. Yvmohmi ka tikbanli ithaiyana tok okvto ilap Ushi yak o hoyulba he mak o tikbanli atokohonli mak inli tok; yohmi ho yvmmak ash ot itibapishi laua ka tikba vttahpi ha hi atok.

30. Anonti tikbanli atokohonli hatok okvto hoyo mak inli tok: mihmvt hoyo hatuk okvto ai vlhpiesvchi mak inli tok:

mihmvt ai vlhpiesvchi hatuk okvto ilap isht aholitopa yo ib ai isha he im ai ahni tok.

31. Yakohmi kvno nana ilvppa puta imma hokvno nanta hak o il acha hinla ho? Chihowa hak osh pi kana hokma, kvta hosh pi sanala hinla ho?

32. Ilap Ushi fehna ka ik ilatombo hosh, amba pishno e moyuma hak atok pulla mak o pim issa tok vt, katiohmi ho yvmma pima hatuk vt nan okluha ka anonti pilla pima ak inla he keyu ho?

33. Kvta hak osh Chihowa im vlhtoka vhleha ha isht ai i palvmmi anumpa kia onocha hinla ho? Chihowa ak osh i kashofi hoke.

34. Kvta hosh nan vlhpisa onocha hinla ho? Klaist ak osh illi hatok; ahli, yvmma i shahli, yvmmak osh falamvt tani hatok osh Chihowa ibbak isht impak imma yo binilit, yvmmak osh isht pi anumpohonli hoke.

35. Kvta hak osh Klaist vt pi hullo ka pi filvmmicha hinla ho? Isht ai ilbvsha, isht a palvmmi, hatak bika yvt pi hotopali, isht a hohchvfo, haknip bieka, isht ai illa he, keyukmvt bvshpo falaia yak a hinla ho?

36. Yohma hi o holihiso hatok oka, Chishno yak atuk pulla mak o nitak moma ka pihimbi na shohombishke, chukfi vlhpoba vba chi kak o e chiyuhmi hoke.

37. Yvmmak illa keyu, nan okluha ilvppa puta ka ilap pi hullo tuk pulla kak o im aiyachi yak kia il i shahli hoke.

38. Yohmi ka isht illa he, isht okchaya he, enchil vhleha, enchil vhleha i shahli, majko puta, himonasi nana ai asha puta, himak a pilla ai asha he puta;

39. Isht a holitopa fehna, ilbvsha fehna, keyukmvt nana toba tok nana kia, pin Chitokaka Chisvs Klaist ak atuk pulla mak o, Chihowa il i hullo ka, pi filvmmicha himma keyu ka, sai yimmishke.

## CHAPTA IX.

Pal vt Chu i nukhaklo, 1. 7 Eblaham isht ai unchululi moma kvt nan ai yukpa isha hi vlla keyu: 18 Kvna ho ahni hok mak osh

Chihowa yvt i nukhaklo; 28 Chentail vt yimma he; mikma nan ik yimmo kak osh Chu yvto ik holitopa ka he a tuk tikba anoa.

1. **KLAIST** ak o nan ai ahli ka isht ai anumpuli li kv̄t holabi li keyu, Shilombish Holitopa ak osh anukfokihinchī ho, isht akostininchī li yak kia nan atokowa ka anohonli ak inlishke.

2. Yohmi kv̄t sa chukvsh anukaka ya isht a nukhaklo bilia, micha isht a weki chinto kv̄t a foyuka kak osh miha lishke.

3. Yohmi ka itibapishi li vhleha, vm okla achvfa yak atuk pulla mak o Klaist a i filvmm̄it sa kv̄nia hi a, ahni la hinla hokbano.

4. Yvmmak osh Israel isht atiaka vhleha hoke: yvmmak o ushi isht a toba, micha Chihowa yvt holitopa fehvt im otaiyani, micha nan it im v̄lhpisa puta, micha v̄ba nan v̄lhpisa in tonla, micha Chihowa isht aiokpv̄chi, micha ai okchayvt bilia puta im issa tok aiena kv̄t immi hoke:

5. Mihm̄vt iki vhleha tikba chash ot immi, micha yvmmak o Klaist vt hatak haknip imma hokvno a minti tok osh, moma i shaiyahlit Chihowa holitopvt bilivshke. Amen.

6. Chihowa im anumpa hokvt aka itulvt kv̄nia tok o chiyuhmi keyu hoke. Yohmi ka Israel vhleha hak osh moyumvt Israel okla keyu hoke.

7. Michā Eblaham isht atiaka vhleha hokak osh moyumvt im v̄lla vhleha keyu ak inli: amba Aisaak ak o isht chi ai unchululi hohchifa hi oke.

8. Yohmi kv̄t haknip imma im v̄lla vhleha hokvto, Chihowa im v̄lla vhleha keyu hoke: amba im issa tok v̄lla vhleha hak osh isht ai unchululi mak osh toba ho mak a chi hoke.

9. Yohmi ka nan im issa tok isht anumpa hv̄t ilvppak oke, V̄lhpisa tok nitak ont ai v̄lhpiesakma v̄la la hi oke, mikma Sela yvt ushi im vtta hi oke.

10. Michā yvmmak illa keyu; amba Lebeka yak kia achvfa piki Aisaak ak o isht ai i chakali hatuk o;

11. Yohmi ka v̄lla yokvt ik ashwo kisha hokvt, nana



achukma, nana ik achukmo nana kia ik yvmihcho kisha ak inli kia; nana ho yvmihchi tok ak o keyu, amba ilap ak osh hoyo hatuk o vltoka kv̄t Chihowa nana ai ahni tok vt ai ahla chi kak o;

12. Yvmmak ash o, Akni ak osh nakfish a i nutaka li oke, im achi tok.

13. Holihiso kv̄t, Chekob ano i hullo li tok: amba Esau yokvno ak i hullo ki tok, ahanchi hatok oka.

14. Yakohmi ka nanta hak o il acha hinla ho? Chihowa hv̄t nana yvmihinchi kv̄t ik ai vllhpeso ho? ik yvmohmo pullashke.

15. ~~Yohmi ka, Kvna ho i nukhaklo la he ahni likmvt, i~~ nukhaklo la hi oke; micha kvna ho i kana la he ahni likmvt, i kana la hi oke, Moses a im achi tok.

16. Yakohmi hoka yvmmak ash o, ilap nan aiahni hokmá, mvlihinli kak okmá, nana kak osh ishi ho keyu; amba Chihowa yak osh i nukhaklo kak o yvmohmi hoke.

17. Yohmi ka, Chishno yak o nan isht vm ai ahli yoka ai otvninchi la he, micha sa hohchifo hokvt yakni moma ka hlopullit ai annohowa he, ilvppak fehna kak atuk mak o ik ahantá chim ai ahni li tok, Feleo ya Holisso Holitopa yvt im achishke.

18. Yvmohmi hoka kvna ho i nukhakla he ahnikmvt, i nukhaklo hoke: micha kvna ho kvllocha he ahnikmvt, kvllochi hoke.

19. Yakohmi ka chishno yokvt, Nanta katiahmi ho ik ahnincho imoma ho? Kvta hak osh ilap nan ai ahni ka i sanali hatuk o? is svm acha chi hoke.

20. Yohmi ak inli kia, amba hatak chia ma! kvta chia hokak osh Chihowa ya i sanalit ish anumpuli cho? Nana toba tok vt ikbi tok ash o, Nanta katihmi ho yakohmichit chishno yvt is sakbi tok o? im acha hinla ho?

21. Lukfampo ikbi yvt lukfi ya kanimihcha hi vt im ai vllhpiesa keyu ho? lukfi yvmvaska miash inli ka achvfa kvto isht a holitopa, mikma achvfa kvto isht a kvllakshi ampo yo ikbi chatuk keyu ho?

22. Yohmi ka Chihowa hut ilap isht i nukkilli, micha ilap

nan isht ai ahli ya otvnincha he ai ahni kak osh, isht i nukkilli onvtuyula he nan ai vlhto okpulot knia he im vlhtaiyaha puta ka ilbvshala hi vt i svlaha fehna hatuk mvt:

23, 24. Micha ilap isht a holitopa lawa fehna ka i nuk haklo onvtuyula he nan ai vlhto puta, yvmmt isht a holitopa pisa hi o tikbanli im ataiyahli hatok vt, pishno yak fehna ka pi hohoyo hatok; Chu okla hak bano keyu, amba Chentail okla hak kia ai isht otvnincha he ai ahni hatok okma, nanta katihmi cho?

25. Hosea yak o isht ai anumpohonli mvt, vm okla vhleha hatok keyu ka vm okla vhleha hochifa la he: micha a holitopa tok keyu kv, a holitopa hi oke, ahanchi ak inli hatok oka.

26. Yohmi ka, Um okla hvchia keyu ai im ahanchi tok ash inli, yvmmak o Chihowa okchaya im vlla vhleha a hoh-chihifa he mak oke.

27. Esaias ak kia, Israel imma ka chitolit isht anumpohonli mvt, Israel im vlla vhleha holhtina kv okhva on talaka shinuk ai asha kak o chiyuhmi ak inli kia, kashapa hosh okchaya he mak oke.

28. Yohmi kv ilap im anumpa ha ai ahlichia chi kv ai vlhpiesa hosh tushpa fehvvt yvmilcha hi oke: yohmi hosh Chitokaka yvt yakni paknaka ya a yvmohma he vlhpisa tok anumpa ha ai ahlichia he mak oka.

29. Mikma Esaias vt tikba kash; Sabaolh in Chitokaka yak osh kashapa ka pim ashahanchi hatuk keyukma, Sotom atok ash inli ho e chiyuhmi, micha Komolah yak o chiyuhmit e toba hi atok oke, ahanchi tok.

30. Yakohmi ka nanta hak o il acha hinla ho? Chentail okla hv nan isht ai vlhpiesa yak o achunanchit hohoyo hatuk keyu kv, isht ai vlhpiesa na yimmi yak o ai isht ai vlhpiesa yak fehna ka ihishi hatok oke.

31. Amba Israel okla hokvto nan vlhpisa isht ai vlhpiesa ya achunanchit hohoyo kv, nan vlhpisa isht ai vlhpiesa ya ik ai ono hatok oke.

32. Yohmi ka katiohmi hatok o? isht ai vlhpiesa yash o isht ai yimmi kak o keyu, amba nan vlhpisa yak o a mihinta

hi ash o in chiyuhmit hohoyo hatok okvt. Isht ai ibetvbli tvli yvmma isht ibetvbli hatuk okvt.

33. Holihiso kv̄t, Yakeh! isht ai ibetvbli, micha isht ai itula tvli yo Saion anukaka ya bohli lishke: yohmi ka kv̄na hosh i yimmikmv̄t, hofahya he keyu mak oke, ahanchi tok oke.

## CHAPTER X.

v̄ba nan v̄lhpisa, micha na yimmi yo isht ai v̄lhpiesa kv̄t itim inla ka anoli, 5, 11 Chu yokma, Chentail okma, nana hohkia, na yimmi kv̄t mōmv̄t hofahya he keyu, 18 Chentail vt v̄banumpa ha holitoblit yimma he.

1. ITIBAPISHI li v̄hleha ma! sa chukvsh nan aiahni, micha Is̄rael oka anumpa ilbv̄sha Chihowa ha isht im anum-pohonli li kv̄t, okla okchaya he ak o ai ahni lishke.

2. Yohmi ka Chihowa ya ai yiminta fehna kia, ai ahli ithana keyu ka atokowa im ithaiyana lishke.

3. Yohmi kv̄t Chihowa hv̄t nan isht ai v̄lhpiesa ya ataiyahli tok a ithana keyu hatuk osh, ilap inli i nan isht ai v̄lhpiesa yo ai ahlich̄i bv̄nna kv̄t, Chihowa hv̄t nan isht ai v̄lhpiesa ataiyahli hatok okv̄no ik im antio hatuk oke.

4. Yohmi ka na yimmi puta hokvto isht ai v̄lhpiesa he mak o, Klaist ak osh v̄ba nan v̄lhpisa nan ai ahni ka ai ahli-chi yoke.

5. Yohmi ka Moses okvt v̄ba nan v̄lhpisa isht ai v̄lhpiesa ka isht anumpuli mv̄t, Hatak vt yvmma puta ka yvmihinchik mv̄t, isht ai okchaya hi oke, achi tok oke.

6. Amba na yimmi isht ai v̄lhpiesa hokvto yakohmichit anumpulishke: Chi chukvsh oka isht anumpulit, Kv̄ta hak osh v̄ba yakni yoka ont chukowa hi o? achi kv̄t, Klaist a ont ilauēlit aka isht v̄la chi ho? achi ka, chik acho kashke.

7. Keyukmv̄t, Kv̄ta hak osh ahofobi fehna ka ont chukowa hi o? achi kv̄t, Klaist a falaminchit tanichi cha, isht v̄la chi ho? achi ka, chik acho kashke.

8. Amba yvmmak ash ot nantuk achi? Anumpa hokvt chi bilikasi, chitakha anukaka yak fehna, micha chi chukvsh



anukaka fokā hoke; achi kv̄t isht ai yimmi anumpa isht il anumpuli kak oke.

9. Chishno yokv̄t chitih fehna ka Chitokaka Chisvs oka isht otv̄ninchit ish anumpuli, micha illi tuk a falaminchit Chihowa hak osh tanichi tok a chi chukvsh oka isht chi yimmi hokmv̄t, chi okchaya hi oke, yvm̄mv̄t achi hoke.

10. Yohmi ka hatak vt chukvsh ak o isht ai yimmi kak osh isht ai vllhpiesa hoke; micha itih hak o Klaist a isht otv̄ninchit anumpohonli kak osh isht ai okchaya hoke.

11. Yomohmi ka Holisso Holitopa yvt, Kvna fehna hoh kia i yimmikmv̄t, hofahya he keyu mak oke, ahanchishke.

12. Yohmi ka Chu, micha Klik ita tuklo ka nana kv̄t ai it im inla keyu hoke: yohmi ka Chitokaka moyuma i shaiyahli miash inli hosh ilapa i pahaya moyuma ka i nukhaklo kv̄t a chinto fehna hoke.

13. Yohmi ka kvna hoh kia Chitokaka hohchifo ha i pahayakmv̄t, okchaya hi oke.

14. Yohmi ka katiohmit yv̄mma i yimmi hatuk keyu kv̄t i pahaya hinla ho? micha katiohmit yv̄mma haklo hatuk keyu kv̄t i yimma hinla ho? micha katiohmit vbanumpa isht anumpuli yvt iksho ka, hakla hinla ho?

15. Michā vllhtoka keyu kv̄t katiohmit vbanumpa ha isht anumpula hinla ho? holihiso kv̄t, Isht it i nanaiyv̄chi vbanumpa isht anumpohonli, micha na hochukma isht anohowa isht ai yukpa puta isht aya ka iyi yvt yakeh! aiokli fehnrshke, ahanchishke.

16. Yohmi kia moyumv̄t vbanumpa ha im antia hatuk keyu. Yohmi ka Esaias vt, Chitokaka ma! kv̄ta hak osh pim anumpa ha yimmi hatuk o? achishke.

17. Yakohmi hoka haklo kak osh isht a yimmi hoke: Chihowa im anumpa hv̄t isht anuhumpa pulla kak o a haklo hoke.

18. Yohmi kia haklo tuk keyu ho? Ih! ai ahli fehna; yakni moyuma ka itih ola kv̄t im ohona tok; micha anumpa puyuta kv̄t yakni hatak ai ahanta moyuma ka im ohona tok oke, vno vto achi lishke.

19. Amba Islael vt ithana hatuk keyu ho? vno vto achi

lishke. Ummona ka Moses vt okla ho keyu kia isht a chi nuktahlachi la hi oke, micha oklushi ik hopoyukso yo isht a chi nokowvchi la hi oke, achishke.

20. Anonti Esaias vt nukwaya iksho hosh, Sa hohoyo hatok keyu kv̄t si ahayuchi tok; si a ponahaklo hatok keyu ka im otaiyani li hatok, achishke.

21. Amba vm antia he keyu, micha a sanalit anumpuli okla hoka sabbak a pit i wiyeli li shohombishke, Israel okvno im ahanchishke.

## CHAPTA XI.

Chihowa hvt Chu moma kak o kanchi hatok keyu, 1; 7 kanimi kv̄to chukvsh kv̄llochi kia, kanimi kv̄to okchaya he vlhtoka tok: 16 vbanumpa anukfohka hi yokvno im ahna he vllpesa; 26 Chihowa yak osh ahnit imissa tuk atok oka, 33 Chihowa nan im anukfila yokvno kv̄na hosh hoyo kv̄t im ithvna he keyu.

1. YAKOHMI ka Chihowa hvt im okla fehna ka kanchit taiyahli hatok o? Ik yvmohmo pullashke; yolimi ka vno yak kia Israelait Eblaham isht atiaka Benchamin iksa sia hoke, achi lishke.

2. Chihowa hvt im okla fehna tikbanli ithaiyana tok okvto kanchit taiyahli hatok keyu hoke. Holisso Holitopa yvt. Elias ai isht anumpohonli ka chik ithano cho? Israel oka anumpa onochit Chihowa ya isht anumpohonli kv̄t,

3. Chitokaka ma! chi hopaii vhleha ha ahambi tok, chim alta puta ka iba kullit akahanchi tok; yohmi ka vno ak bano hosh ahanta li ma, vm ilhfiohpak a tvbli bahavshke, ahanchishke.

4. Yohmi kia Chihowa hvt afalaminchit nanta hak o im achi ho? Hatak tahlepa sipokni untuklo hokvto Baal holbvt toba ya ik i hvchukbihlepo atuk okvno vno vmmi yo ilatohomba li tuk oke, achishke.

5. Yvmmak ash inli chiyuhmit himonasi ak kia isht i kanvt isht ai vlhtoka tok vt kaniohmi kv̄t ai asha ak inli hoke.

6. Yohmi ka isht i kana yak okma, toksahanli tuk pulla yak o ai yvmohmi keyu hoke; yakohmi hokma isht i kana

yvt isht i kana keyu yoke. Amba toksahanli tuk pulla yak o ai yvmohmi hokma, isht i kana yak o ai yvmohmi keyu hoke: yakohmi hokma toksahanli yvt toksahanli keyu hoke.

7. Yakohmi ka katiohmi ho? Israel okvt nana hohoyo kvt ishi hatok keyu hoke: amba vlhtoka yak osh ishi hatok; mihma kashapa hokvto im anukfila hvt kvllot kvnia tok oke;

8. Yohmi ka holihiso kvt, Chihowa hokvt im anukfila nosilhvvt kvnia, nishkin nan isht pisa he keyu, micha hak-sobish nan isht hakla he keyu puta aiena ho ihima hatok; ahanchi hatok ash o ihima na himak a nitak a ai vlvshke.

9. Mihma Lewi vt achi kvt, Ai impa yvt isht ai ibetvbla he, micha isht ai itula he, micha isht ai okpula he, micha isht ai im vlhtoba he aiena isht ai in tobashke.

10. Micha nishkin vt im okhlili cha, isht ik peso hosh hlipkvchit maya na biliashke, achishke.

11. Yakohmi hoka ibetvbli hatuk ak osh isht ai itulvt kvnia ho? Ik yvmohmo pullashke: amba isht ai itula hatuk pulla kak o isht ai okchaya yvt Chentail a im vla ho isht a nuktahlahancha chi hatok oke, achishke.

12. Yohmi ka yvmmvt isht ai itulvt kvnia kak o yakni moyuma kvt isht ai yukpa laua kvt im vla hokma, micha isht ik a lauwt taiyaha kak o Chentail vhleha ha isht ai yukpa lava kvt im vla hokma; isht ai alotowa hokak heno isht i shahli fehna hi o keyu?

13. Yohmi ka Chentail hvchia ha hvch im anumpohonli il kvt, Chentail im apostel sia hatuk okvt, nan isht ai vttali ya holitobli lishke.

14. Yohmi hosh kaniohmit isht a nuktahlachit sa haknip ai achvfa kash kanimi kvno okchalinechi la hinla hokmvt,

15. Yohmi ka yvmma kaiyanchi kak o yakni moyuma kvt isht ai it i nanaiya hokma, yvmmak ash i kanvt falaminchit ishi hokak heno nanta ha hi o? amba illi tuk vt falamvt isht ai okchaya kak a hi o?

16. Yohmi ka vnit waya vmmona kvt holitopa hokma, a moyuma kvt holitopa ak inli hoke: micha hakshish vt holitopa hokma, naksish puta kak kia yohmi ak inli hoke.

17. Mihma naksish kaniohmi kvto atvptvvt kvnia hokma,



alif haiaka ai offo chia hash osh ish ibafohka hatuk; micha yummak ash ibafoka hosh alif okchi, micha hakshish aiena ka ish ibai ishi hatuk okmvt;

18. Naksish puta ka ik ahobalot chik im ilauato kashke; amba ish ilauata hok mak osh chishno yak osh hakshish ish il ai ishi keyu, amba hakshish ak osh chishi hoke.

19. Yvmohmi ka, Naksish kaniohmi kv̄t kobahlit kv̄nihiya kv̄t, vno yak osh iba fohka la he yak o yohmi hatok, ish acha chi hoke.

20. Ahli; ik yimmo kak osh kobahlit kv̄nihiya hatok; amba chishno vto na yimmi kak osh isht ish a hikia hoke. Chik ilefehnacho kashke, amba ish il akanlosechashke:

21. Yohmi ka Chihowa hv̄t naksish fehna yash kanchi nukwiya tok keyu hokmvt, chishno yak kia chi kancha he yoba ká, ahah! ish ahnashke.

22. Yvmohmi ka Chihowa hv̄t isht i kana, micha isht palvmm̄nchi ya ho pesá: aka itula tok ash isht palvmm̄nchi; amba chishno yokvno isht chi kana, ilap isht i kana yash o ish a mahaya hokmvt; yummak keyu hokmvno chishno yak kia chayvt chi tupa he ak inli hoke.

23. Yummak ash kia ik yimmo kak o keyu hokmvt, iba fohoka he; Chihowa hak osh yummak ash falaminchit iba fohoka hi vt im ai ahli hoka.

24. Yohmi ka chishno yvt alif haiaka ai offo yo a tupa hosh alif achukma yash, ai yvmohmi chatuk keyu kia, ish ibafohka hatok okma; naksish fehna yatok ilvppak heto isht i shahli fehvt ilap immi yatuk ash inli ka ibafohoka hinla keyu ho?

25. Yohmi ka itibapishi li vhleha ma! Israel a kashapa hokvt im anukfila hv̄t kahanlo na Chentail vhleha isht ai alotowa yvt vla he yak atok, anumpa ai ahli ik otano chatuk ilvppa hv̄ch ik ithaiyano hosh, hv̄chishno ash inli hosh ile yimmit hv̄sh ai asha hi a ak hv̄chim ai ahnoshke.

26. Yakohmikmvno Israel vhleha hv̄t moyumvt okchaya hi oke; holihiso kv̄t, Nahlakofichi yvt Saion ak o a mintit kohcha hosh ai ashvchika ya Chekob a ai isht i kahancha hi oke, achi hatok oka.

27. Micha ai ashvchika yash ai isht i kanchi likmvt, ilvp-pak o nan it im apesa la he tok mak oke.

28. Ubanumpa hash imma hokvno, hvchishno yak atuk pulla kak o yvmmak ash ot tvnvp vhleha hoke; amba vltoka yash imma hokvno iki vhleha yash ak atuk pulla kak o i holitopa vhleha hoke.

29. Yohmi ka Chihowa hvt na habenahanchi, micha atokohonli aiena kvv inlvchit im anukfila he keyu hoke.

30. Yohmi ka hvchishno yokvto tikba pilla kash Chihowa ya hvsh i yimmi hatok keyu; yohmi kia yvmmak ash ot isht ik a yimmo pulla kak o isht i nukhaklo yash hvsh ishi hatok ash o;

31. Chiyuhmit ilvp-pak ash ot himonasi ka ik yimmo ak inli hatok kia, isht hvsh i nukhaklo yak atuk pulla kak o ilvp-pak ash kia isht i nukhaklo ya ishi mak inla hi atok.

32. Yohmi ka Chihowa hvt yvmmak ash moyuma kvv ik yimmo ka he im ai ahni hosh moyuma ka i nukhakla he ak atok.

33. Yakeh! Chihowa hvt hopoyuksa fehna, micha nan ithana aiena kvv ataha hi vt ik im iiksho; nana apihisa ka akostininchit nana a kaniohmi puta ka silhhit ahayucha he keyu hoke.

34. Yohmi ka kvta hak osh Chitokaka im anukfila ha ithaiyana tok o? keyukmvt kvta hak osh nan i miha yatok o?

35. Keyukmvt kvta hak osh tikba ima hatok osh, anonti falamvt im vltoba hi atok o?

36. Yohmi ka nan okluha kvv yvmmak o a mihinti, micha yvmmak o isht a toba, micha yvmmak o immi mak osh tohomba tok; isht a holitopa yvt yvmmak o immit peh biliashke. Amen.

## CHAPTA XII.

Chihowa ahnichit e yukpa la chi ka Chihowa nan isht i nukhaklo yash pi nukfokihinja hi a tuk, 1; 3 ilifehnvchit pishno ak inli ka isht ik pim anukfilo kashke; 6 amba kanima yo il a hikia na nana.

ka yvmohma he vlhpesa kvt a pi onutuyulak ma, mihi yo e yvmohmashke; 9 iti hullo, micha nana ka il a yvmihcha he vlhpesa inla aiena ka pim apesa; 19 afalvminchit nana ka ik vlhpesalo ka hi okvno pim ahni keyu hoke.

1. YUMOHI ka itibapishi li vhleha ma! Chihowa hvt isht i nukhaklo puta hak atuk pulla mak o hvchi haknip puta hokvno vba isht aiokpvchi okchaya, holitopa, Chihowa yvt aiokpancha he vlhpesa ho, yvmma isht hvsh ai ahan-ta he vllipiesa hokvt, hvsh im issa he, hvchim ai ahni lishke.

2. Micha yakni ilvppek inli ka hvch ik hoyulbo kashke; amba hvchim anukfila hvt himonvt toba pulla hatuk mak osh inlvt hvsh tobashke; yohmi hosh nan achukma, nan ai vlhpiesa, nan ai ahli Chihowa nan ai ahni ka hvsh akostininchashke.

3. Yohmi ka isht i kana ya vma hatuk pulla mak o, hatak hvch ibafoka puta ka ilap ash inli kvt isht il anukfilla he ai vllapiesa ka isht i shahlichit isht ik anukfillo kashke, im achi lishke: amba il oktamblit Chihowa hvt hatak hikia aiyuka ka isht ai yimmi kaniohmi ho ima hatok ash o, hatak hikia aiyuka kvt isht il anukfillashke.

4. Yohmi ka pi haknip vt achvfa kia, pit ai achvfa hvt laua, micha pit ai achvfa ilvpptv moyuma kvt nan isht ai vtta yvt miash inli keyu kash o:

5. E chiyuhmi hosh e laua kia, Klaist il ibai achvfa kvto haknip achvfa pia, micha achvfa aiyuka kvt pit il it ibai achvfa hoke.

6. Yvmohmi ka isht i kana yvt kaniohmi ho il ishi hatok ak osh na hvlbina puta kvt ilaiyuka ho il ieshi hokvt, Shilombish anukfoyukvt anumpuli isht ai vtta yo e habena hatuk okmvt, isht ai yimmi yak o ai itilau ho yvmmak o isht il ahantashke.

7. Mikmvt chvch nan isht im vtta isht ai vtta ya e habena hatok mvt, yvmmak o isht il ahantashke; micha nan ithvnanchi yokmvt, yvmmak o isht ahantashke.

8. Micha vbanumpa isht atohnochi yokmvt, yvmmak o isht ahantashke: na hopela yokmvt, im anukfila apissali hosh yvmihchashke: pehlichu yokmvt, ai ahli achukmashke:



i nukhaklot nan isht im vtta yokmvt, aiokpanchi hosh yvmihchashke.

9. Isht i hullo yvt isht il ahobi iiksho hashke. Nan ik achukmo ka ish i nukkillashke; nan achukma hoka ish asi-tiashke.

10. Itibapishi chiyuhmit it i kana fehnvt hvsh it i hul-lashke; hvsh iti holitobli kvv hvsh it im i shahlashke.

11. Nan isht vtta kvv intakobi keyu; chukvsh isht ai yiminta fehnvt, Chitokaka yak o in toksvli hosh isht hvsh ahantashke.

12. Ai okchayvt bilia pisa la he ai ahnit, hvchi yuhupashke: na palvmmi hvsh pihisa kvv hvchi nuktaiyalashke: achunanchi hosh anumpa ilbvsha hvsh anumpohonlashke.

13. Ubanumpuli a bvna ka hvsh i hopehinlashke: hatak ik ithano ya hvsh i kana fehnashke.

14. Hvch ilbvshali ka isht im ai achukma he ai ahnit isht hvsh anumpohonlashke; isht ai okpula hi a hvch ik ai ahno hosh, isht ai achukma he ak o ai ahnit isht hvsh anum-pohonlashke.

15. Nan isht ilaiyukpa ka hvsh ibai yukpashke; micha nukhaklokma, hvsh iba nukhaklashke.

16. Hvchim anukfila hvv ai achvvt hvsh it im anukfil-lashke. Isht a holitopa puta ka hvch ik hohoyo kashke: amba hatak ilbvsha yak o hvsh il itilauechashke. Hvchish-no inli hvch ik ile yimmo kashke.

17. Hatak vt nan ik achukmo hvchi yvmihchi ka nan ik achukmo yo hvch ik i falamincho kashke. Hatak moyuma itikba ya nana achukma puta ka hvsh yvmihchashke.

18. Yohma he yobakma, hvsh a yvmohma he ai vlhpiesa kvvto, hatak moyuma ka hvsh it i nanaiya hosh hvsh ahantashke.

19. A holitopa ma! hvch ik il ai okho kashke, amba ai vlhpiesa isht im atobbi yak o hvsh il im issashke; holihiso kvv, Ai vlhpiesa isht atobba hi okvt vmmi hatuk osh, afala-minchit atobbi la hi oké, Chitokaka yvt achi hatok oka.

20. Yvmohmi ka chin tvnvp vt hohchvfo hokma, ish ipetashke; itukshila hokma, nan ishko ish ipetashke; ilvppak

o ish yvmihchi hokmak osh luak tobaksi yo noshkobo ha ish o fohobla hi oke.

21. Nan ik achukmo i nutvt chik il ai okho kashke; amba nan achukma kak o nan ik achukmo ka isht ish imaiyachashke.

### CHAPTA XIII.

Nan apesa ya imantia, mikmvt nana ka il i yvmohma he vlhpesa kvv inla mvt asha ka isht anumpuli, 1, 8 vba nan vlhpisa yvt ahla hi a holitobli, 11 atampli fehvvt impa, nan ishkot haksi aiena kvv ai okhlili ka yo yvmohmi hatuk osh kanima yo vbanumpa hvv atohwikeli hokvno ai otaiyana he keyu.

1. SHILOMBISH puta kvv nan vlhtoka i shahli vhleha ha im antiashke. Nan vlhtoka inla kvv iksho: amba Chihowa ak osh ai ahni ak bano hoka; nan vlhtoka puyuta ka Chihowa hak osh vlhtoka he ai ahni hoke.

2. Yvmohmi hoka kvv fehna hoh kia nan vlhtoka yoka i sanali hokvt, Chihowa hvv nan apesa tok a i sanali hoke: mikmvt i sanali vhleha hokvto ilap inli isht ai ilbvsha yosh im vlhpisvt isha hi oke.

3. Nan vlhtoka vhleha hoka nan toksvli achukma yak osh ai i nukshopa yo keyu hoke: amba nan ik achukmo toksvli yak oke. Yakohmi ka nan vlhtoka yoka chishno yvt i nukshopa la he, chik ai ahno cho? Nan achukma kak o ish yvmohmashke; mikmvt yvmmak ash o ish im a holitopa hi oke.

4. Nan isht chim achukma chi mak o yvmvvt Chihowa nan isht im vta hatuk oka. Yohmi kia nan ik achukmo kak o ish yvmihchi hokmvt, chi nukshopashke: yohmi ka yvmvvt bvshpo falaia ya peh pilla ieshi ho keyu; amba yvmvvt Chihowa nan isht im vta yosh nana ka ai ahlichit nan ik achukmo yvmihchi ya isht ai i palvmmi ka onohonchi mak oke.

5. Yvmohmi hoka isht ai i palvmma he ak bano kak o keyu, amba isht il akostininchi yak atuk pulla aiena kak o ish im antia pullashke.



6. Yohmi ka ilvppak atuk pulla kak o noshkobo chumpa ya ish atobbi makinlashke: yummvt Chihowa nan isht im vtta vhleha hatuk osh nana ilvppak fehna ka isht ahantvt bilia hoke.

7. Yvmohmi ka moma kvt ilap ai isha he ai vlhpiesa ka ish imashke: noshkobo chumpa ya kvna hosh isha he ai vlhpiesa kak o ish imashke: vlhpoyak isht ai vlhtoba kashampa kvnia he tuk a kvna hosh isha he ai vlhpiesa kak o ish imashke: kvna ho i nukshopa he, ai vlhpiesa kak o ish i nukshopashke: kvna ho holitoba he ai vlhpiesa kak o ish holitoblashke.

8. Hatak nana kia aheka yvt ik chin takanlo kashke: amba hvsh it i hulla he vto hvsh it in takanlashke; yohmi ka kvna hosh inla ya i hullo hokvto vba nan vlhpisa ya ai ahlichi hoke.

9. Yohmi ka, Chik it in lumako kashke, Chik bo kashke, Chik hukopo kashke, Chik aholvbecho kashke, Chik anushkunno kashke; micha nan vlhpisa inla kvt takanli hokmvt, anumpa kanomosi, Chin chuka panta hatak a ish i hullo kvt, chishno ish il i hullo kak i chiyuhmashke, achi ilvppak o foka hoke.

10. It i hullo yvt nan ik achukmo in chuka panta hatak a ik i yvmihcho yoke: yvmohmi hoka it i hullo yak osh vba nan vlhpisa ya ai ahlichi mak oke.

11. Micha ilvppak o hvsh yvmohmashke: mikmvt himonasi ka nusi tuk vt pi okcha he hvshi kanvlli hvnt ont ai vlhpiesa ka il ithaiyanashke; himonasi kvno isht ai pi okchaya yokvt pi bilika kvt pi yimmi hatok ano i shahli hoka.

12. Ninak vt ant ia hosi ma, nitak vt vla hosishke: yvmohmi hoka okhlili isht a toksvli puta ka e kaiyan-chashke: micha nan tohwikeli isht il atukkochi yak o e foyukashke.

13. Nitak itvnowa yak o chiyuhmit ai vlhpiesa hosh il itvnowashke: haksi, micha tasimbot tasali keyu, itiba nusit isht a havi keyu, itachowa, micha it i potvnnnot hvch ik it i nukkillo kashke.

14. Amba Chitokaka Chisvs Klaist ak o hvsh foyukash-



ke; micha haknip nan ai ahni okpulo puta ka im ai ahlichia  
chi kvt haknip a nana hvch ik atahlo kashke.

#### CHAPTA XIV.

Nana kvt ilim itim inla mak osh il iti shetilima he tok keyu, 1; 13  
amba nana ka ahah! il oh ahni na, nana ka il itim inla hoh kia, inla  
maya kvt isht ik pim ai ibetvblo kashka; 15 nana kvt yohmi ka  
na laua ho isht mihvt Pal vt otrninchí hoke.

1. NA yimmi kvt ik ono ka hvsh i kana banashke;  
micha im anukfila anuktuklo atuk a nana isht chik im apeso  
kashke.

2. Yohmi ka achvfa hokvto nan okluha ka vpa hi atuk vt  
yimmishke; inla hokvto na yimmi kvt ik ono mvt, na waya  
yak o vpvshke.

3. Yohmi ka vpa hokvt ik po hoka ik kanimancho kash-  
ke; micha ik po hokvt vpa hoka nan ik im apeso kashke;  
Chihowa ak osh i kana hatuk oka.

4. Kvta chia hokak osh hatak inla in tishu ha nan ish im  
apesa hoh cho? ilap i shahli ak illa ho isht im a hikia he,  
keyukmvt isht ai im itula hi oke. Ahli, ai ahlit hikia hi  
oke, Chihowa hak osh ai ahlichit hilecha hinla hoka.

5. Hatak achvfa hokvto nitak achvfa kvt inla ka i shahli,  
ai ahnishke; inla hokvto nitak moma kvt itilauí, ai ahnishke.  
Hatak puyuta kvt ilap im anukfila fehna ka ai ahlit anukfo-  
yukashke.

6. Kvna hosh nitak a holitoblikmvt, Chitokaka yak o i  
holitobli hoke: mikma kvna hosh nitak a ik i holitoblo hok-  
mvt, Chitokaka yak o ik i holitoblo hoke. Kvna hosh vpak-  
mvt, Chitokaka yak o im vpa hoke; Chitokaka yak o isht  
aiokpvchi ya ima hokvt: mikma kvna hosh ik pokmvt,  
Chitokaka yak o ik im vpo hoke: yohmi kia isht aiokpvchi  
ya Chihowa yak o ima hoke.

7. E kanima kvt pishno inli il im anta keyu hoke: micha  
hatak nana kia ilap inli il im illi keyu hoke.

8. Pi okchayvt il ahanta kvt, Chitokaka yak o il im ahan-  
ta hoke; micha pilli hokmvt, Chitokaka yak o il im illi hoke;

yvmohmi hoka pi okchaya, pilli, kanimampo hoh kia Chitokaka yak o immi pia hoke.

9. Yohmi ka Klaist okvt illi tuk vt falamvt okchaya kvt, illi, micha okchaya it aieninchit in Chitokaka toba chi ilvpak fehna hatok oka.

10. Yohmi kia nanta katiohmi ho chitibapishi ha nan ish im apesa cho? micha nanta katiohmi ho ish itibapishi ha ish kanimanchi cho? e moyuma kvt Klaist nan apesvt ai o binili ka itikba ya e hiohla hi oka.

11. Yohmi ka holihiso kvt, Sai okchaya hoka iyikalaha puta kvt a hvchukbihlapa hi oke; mikma isunlvsh puta kvt Chihowa ha aiokpahancha hi oke, Chitokakayvtachi hoke, achi hatuk oka.

12. Yakohmi hoka e moyuma kvt Chihowa hoka il im il anohonla hi oke.

13. Yvmohmi hoka himak a pilla kvno nan it im apesvt kil ahanto kashke; amba hatak nana kia isht ai ibetvbla he, keyukmvt isht ai itula he nana kia itibapishi i hina ya ik bohlo ka he ilvppak o hvsh im anukfillashke.

14. Yohmi ka nana kvt ilap ak inli kvt ik kashofo kvt iksho ka, Chisvs Klaist ak atuk mak o isht a sa nukfoyukvt, ithaiyana lishke: amba kvna hosh nana kvt ik kashofo ai ahni hokvno, yvmvno nana kvt ik i kashofo hoke.

15. Ish itibapishi hvvt nana ish pa ka isht ik im vlhpieso hokma, himak a i hullot ish nohwa keyushke. Yvmmak ash Klaist vt vlhtobvt illi hatok oka, chim ilhpak a isht chik okpano kashke.

16. Yvmohmi hoka nana achukma isht ish ilaiyukpa kvt ik ai vlhpesot isht ik anumpo kashke.

17. Yohmi ka Chihowa apehlichika yokvt nan impa, nan ishko kak o keyu hoke; amba nan isht ai vlhpiesa, micha isht it i nanaiya, micha Shilombish Holitopa ai isht ilaiyukpa yak oke.

18. Yohmi ka kvna hosh nana ilvppak fehna ka Klaist a isht im antia hokvno Chihowa yvt ahninchu, mikmvt hatak puta kvt vlhpesa ai ahni hoke.

19. Yvmohmi hoka nana kvt isht ai it i kana puta, micha



nana ka isht it i hlampkohoncha he aiena kak o e yvmohomashke.

20. Yohmi ka nan vpa ak atuk mak o Chihowa hvt nana toksahanli tuk ash isht chik okpano kashke. Nan okluha kv̄t kashofa mvhli hoke: yohmi kia hatak nana hosh inla isht ai ibetvbli hō impa hokv̄to, isht ik im achukmo hoke.

21. Nipi vpa, oka paki ishko, keyukmvt nana kia ish itibapishi hvt isht ai itulvt isht ai ibetvblit isht ik a hlampko ka chi hō, ai yvmohmi kv̄t ik achukmo hoke.

22. Nana kash chi yimmi cho? Chihowa itikba yak o chishno illa hosh ish a yvmohmashke. Kv̄na hosh ilap vt nana hō v̄lhpiēsa ahnit, ilap ash inli anumpa isht ik il onochō hokv̄t, na yukpa hoke.

23. Yohmi ka kv̄na hosh anuktuklo hoh kia vpa hokmvt, anumpa onvtula hoke: nana hoh kia yimmi keyu hosh yvmihchi hokv̄to ai ashvchi yoka.

## CHAPTA XV.

Hlampo kv̄t, ik hlampo ya nan ib ai isha he, 1; 2 pishno inli kil ile yukpalo, 3 Klaist vt yohmi tok keyu, 7 amba e moma ka Klaist vt pi kanvt nan pim anukfilli tok a chohmit, it i kanvt ili tiholito-blichā he: 30 Pal vt Loman v̄banumpuli v̄hleha hvt v̄ba isht anumpula he im a sihlha.

1. YAKOHMI hoka pi hlampo hokv̄to ik hlampo hokv̄no nan il ib ai isha he atuk; micha pishno inli il ile yukpala hi atuk keyu hoke.

2. E moyuma kv̄t ilap in chuka panta hatak vt v̄banumpa ha isht a hlampkot im achukma chi ka e yukpalashke.

3. Yohmi ka Klaist ak kia ile yukpali tok keyu hoka; amba holihiso kv̄t, Isht a hofahyali puta kv̄t chi onvtula hatuk vt sai onvtula hatuk oke, achi hatok oka.

4. Yohmi ka nana fehna hoh kia tikba pilla kash holihiso kv̄t nana isht a pim v̄lv̄vcha he mak o holihiso hatok oka; yohmi kv̄t Holisso Holitopa ak o nana ka isht a nuktaiyalvt achunanchit ai okchayvt bilia ya il isha he, il ai ahna hi atok oke.



5. Yohmi ka Chihowa hak osh hvchi atohnohonchit isht anuktaiyalvt achunanchi ya hvch ima na nana hvsh it im anukfilli kvt ai achvftv Klaist Chisvs ak atok ak o hvsh chiyumashke.

6. Yohmi hosh hvchim anukfila hvt ai achvftv, itih achvfa hosh Chihowa, pin Chitokaka Chisvs Klaist Iki yak fehna ka hvsh holitobla hi atuk oke.

7. Yvmohmi hoka Chihowa hvt isht aholitopa chi kak o Klaist ak kia pi kana hatok ash o, chiyuhmit hvsh it i kanashke.

8. Yohmi ka Chihowa isht ai ahli yak atuk pulla kak o Chisvs Klaist okvt hakshup tupa yak o nan isht im vta toba kvt, iki vhleha ha nan im ihisa tok puta ka ai ahlichha chi kak atok oke, achi lishke.

9. Micha yohmi ho Chentail vhleha hvt ilap isht i nukhaklo tok ak o Chihowa ya holitobla hi atok oke; holihiso kvt, Ilvppak atuk mak o Chentail vhleha ha ibai achvftv chi aiokpahanchi la he; micha chi hohchifo ha isht talohowa la hi oke, achi hatok oka.

10. Micha anonti Chentail hvchia hvt vm okla vhleha ha hvsh ibai okpahanchashke, Chitokaka yvt achishke.

11. Micha anonti, Chentail moyuma kvt Chitokaka ya hvsh aiokpahanchashke: micha okla moyuma kvt hvsh aiokpahanchashke, achishke.

12. Micha anonti Chesse ak o isht atiaka yosh ahanta he, micha yvmmak fehna hosh Chentail okla ha i shahlit mikot wakaya hi oke: yvmmak o Chentail okla hvt anukchieta hi oke, Esaias vt achishke.

13. Yohmi ka ai okchayvt bilia ya pisa he ai ahni ya in Chihowa yak osh isht ai yimmit ai isht it i nanaiya, micha ai isht il aiyukpa moyuma ka hvchi alotoli ho Shilombish Holitopa nan isht ai ahli yak atuk pulla mak o ai okchayvt bilia hvsh isha hi okvt, ai ahli fehvt hvchi anukfoyukashke.

14. Micha itibapishi li hvchia hvt nana achukma bieka hosh hvchi anukfoyukvt, nan ithana isht a hvchi alotowa hatuk osh, nana ka hvsh it i miha he bieka ak inli ka, vno ak inli kvt hvchi yimmi li ak inlishke.

15. Yohmi ak inli kia itibapishi li vhleha ma! Chihowa ak osh isht i kana ya vma hatuk oka, ik sa nukwayo kv̄t isht i shahli hosh isht hv̄sh ithana ch̄i kak o, nana a kaniohmi ka hv̄chi holissohonch lishke;

16. Yohmi hosh Chisvs Klaist nan isht im v̄tta yosh, Chihowa im v̄banumpa ha Chentail okla hak o isht im ahan-ta la ch̄i hatok; yohmi h̄o Chentail vt Shilombish Holitopa yak o isht a kashofa hatuk o v̄ba isht aiokpv̄chi ka ahninchā hi atok oke.

17. Yvmohmi hoka nan okluyuha, Chihowa hv̄t isht pit ahalaya ka Chisvs Klaist ak atuk pulla mak o, nana ka isht ilauata la hi vt ieshi lishke.

18. Chihowa imi Shilombish nan isht ai ahli yak atuk pulla mak o nan isht nukhlakancha, micha nan isht atokowa yo nana ka isht ai yvmohmit anumpohonli li h̄o, Chentail okvt im antia ch̄i ka, Klaist vt isht a si atoks̄eli hatuk keyu hokv̄no nana ai yvmohmi tuk ash achv̄fa kia isht anum-puli la he keyu hoke.

19. Yvmohmi hosh Chelusalem, micha isht ai apakfoyu-ptv̄t Illilikv̄m a ont ai v̄hli itintakla ya Klaist im v̄banumpa ya ai ahli fehv̄t isht ai anumpohonli li hatuk oke.

20. Ahli, yakohmi hosh intolahpi hatak inla immi pak-naka yo ai ikbi li yoba ná, ai ahni li kak osh kanima yo Klaist vt isht ik ai anumpo hokv̄no v̄banumpa ya isht ai anumpohonli sa b̄v̄nna fehna chatuk oke.

21. Yohmi kia holih̄iso kv̄t, yvmmak o isht im anumpa hatok keyu kia, okla pisa hi oke; micha okla yvm̄vt haklo hatok keyu kia, akostininchā hi oke, achi hatok oka.

22. Yohmi ka ilv̄ppak atuk pulla kak o hv̄chim ona la hi atok vt, isht a si ataklv̄ma fehna ak inli hatuk oke.

23. Yohmi kia himonasi hokv̄no ilv̄ppa ai anumpuli la hi okvt ik sv̄m iksho hatuk osh; micha hv̄chim ona sa b̄v̄n-na fehna tok a himak a afv̄mmi hv̄t laua fehna hatuk osh;

24. Kanima kash inli h̄o nowvt ayvt Ispani yoka chukowa likm̄vt, hv̄chim ona la hi oke: yohmi kv̄t nowvt aya li hokvt, ont hv̄chi pisa la he ai ahni li: micha hv̄chi pisvt



kaniohmit vm vlhpiesa ha yokmuno, nowt aya li kash achakalit pit hvs sa pila he chishke, ai ahni lishke.

25. Yohmi kia himonasi hokvno vbanumpuli vhleha hak o i hopela la chi hosh Chelusalem ak o ia la chishke.

26. Yohmi ka Masetonia, micha Akaia okla aiena kvt im vlhpiesa hosh vbanumpuli ilbvsha Chelusalem ai asha ka nan isht apelvchi kaniohmi ka i bohonli tuk oke.

27. Im vlhpiesa ai ahli fehna hosh yvmihchi tuk: yohmi hatuk o im aheka vhleha hokvt. Yohmi ka Chentail okla hvt nana Shilombish immi puta ka ibai ihishi toba hatuk mvt, anonti nana haknip immi puta ka yvmma isht apelvcha hi okvt im ai vlhpiesa ak inlishke.

28. Yvmohmi hoka ilvppa isht rtvt vm vlhtaha, micha nan isht apehlvchi ilvppak ash o im ai ahlich li ha yok mak osh, hvchin tmaha ha hlopullit Ispani yoka ont chukowa la hi oke.

29. Micha hvchim ona likmvt, Klaist im vbanumpa ai isht ilaiyukpa ai ahli fehna laua ka isht hvchim ona la hi okvt, ithaiyana lishke.

30. Yohmi ka itibapishi li vhleha ma! Chitokaka Chisvs Klaist ak atuk puyula, micha Shilombish ak atuk mak o isht iti hullo yvt hvchi anukfoyuka hokvt, svbai yichina fehna hosh anumpa ilbvsha Chihowa ya im anumpohonli kvt, isht hvs si anumpohonlashke.

31. Yohmi ho ik yimmo vhleha Chutia ai asha ka ai i hlakofi lashke: micha Chelusalem a nan i hopela la chi ishi li kash vbanumpuli vhleha hash ot aiokpahanchashke.

32. Yohmi ho Chihowa nan ai ahni pulla ho nan isht ilaiyukpa ya ieshit hvch im ona li hosh, nana ka hvch ibai yuhukpa li hokbano.

33. Yohmi ka nan isht it i nanaiya in Chihowa yak osh lvsh moyuma ka hvch iba foyukashke, Amen.

## CHAPTA XVI.

Vbanumpuli Ioman asha tuk vt laua ka ai okpacha hi a, Pal vt im ahni, 1, 17 mihmvt nan itakvshkoli, nan ibetvblichi aiena ka ahah!



okla im ahna chi ka im anoli; 21 atuk osh nana ka yakmihchit na pit i mihihvt tahli mvt, ishtaiyopichi kvt Chihowa ya aiokpachanchi.

1. **KLENKLEA** chvch hikia ka nan isht im vtta, pin tek, Febi ya hvsh aiokpancha he pit hvchim ai ahni lishke:

2. Yohmi hosh Chitokaka yak o ai achvfa hoka vbanumpuli ai yvmohmi yak o chiyuhmit hvsh aiokpvchashke: micha nana hoh kia isht apelvcha hi a bvna hokma, hvsh apelashe: yohmi ka yvmmt laua ka apelahanchi chatuk; micha vno ak kia aieninchit si apelahanchi chatuk oke.

3. Klaist Chisvs a ibai achvft svb a toksahanli Akuila, micha Plissilla ita tuklo ka hvsh aiokpvchashke.

4. Yvmmak okvt vm ilhfiopak ak atuk pulla kak o ilap ikunla fehna ka aka ya bohonli tok: yvmmak oka vno ak illa keyu, amba Chentail iksa hiohli puyuta aiena kvt yak oke, im ai ahnishke.

5. Yvmmak ash chiyuhmit yvma in chuka vbanumpuli iksa maya ka hvsh aiokpvchashke. Epenetvs a holitopa fehna, yvmmt Klaist i yimmi kvt Akaia ya ai yvmohmit nan vni vmmona hatok a hvsh aiokpvchashke.

6. Meli ya hvsh aiokpvchashke; yvmmak okvt pin toksahanli fehna hatok oke.

7. A kanomi, micha svbai yuka Antonikvs, micha Chunia itatuklo, yvmmak okvt vbanumpeshi vhleha ha i holitopa yoka hvsh aiokpvchashke; yvmmak okvt sa tikba Klaist ai ibai achvfa hatok mak oke.

8. Amplias Chitokaka ya ai achvfa a holitopa ya hvsh aiokpvchashke.

9. Ulbani Klaist ai achvft piba toksahanli, Stakvs a holitopa aiena ka hvsh aiokpvchashke.

10. Apelles, Klaist vt ahninchii ya hvsh aiokpvchashke. Alistobulvs in chuka chvfa ai achvfa ka hvsh ai okpvchashke.

11. A kanomi Helotion a hvsh aiokpvchashke. Nasissvs in chuka chvfa Chitokaka ai achvfa ka hvsh aiokpvchashke.

12. Tlaifina, micha Tlaifosa itatuklo, Chitokaka in toksahanli ya hvsh aiokpvchashke. Pasis holitopa, yvmmt

Chitokaka ya in toksahanli fehna chatuk a, hvsh aiokpvchashke,

13. Lufvs Chitokaka im vlhtoka, micha ishki, micha yvm-mvt vshki ya hvsh aiokpvchashke.

14. Asinklitvs, Flekon, Hemas, Patlobvs, Hemes, micha il itibapishi vhleha hvt yvmma apehvt maya aiena ka hvsh aiokpvchashke.

15. Filolokvs, micha Chulia, Nelevs, micha in tek, micha Olimpas, micha vbanumpuli yvmma apehvt maya aiena ka hvsh aiokpvchashke.

16. It i suksowa holitopa yo isht hvsh it aiokpvchashke. Klaist in chvch vhleha hokvt hvchi aiokpvchishke.

17. Yohmi ka itibapishi li vhleha ma! nan vlvchi hvsh ithvna kash i sanalit isht it i filvmmichi; micha isht ibetv-blich i aiena ihikbi hokvno, yakohmi hvsh ahni pulla cha, hvch ik ahalaiyo kashke.

18. Yohmi ka ilvppa chiyuhmi puta hokvto Chitokaka Chisvs Klaist ak o in toksvli keyu hoke, amba ilap ikfoka yak inli hoke: mikmvt anumpa achukma puta, micha isht ahninch i anumpa puta aiena kak o nuktvlvt ahah! ik ahno chukvsh puta ka isht haksichi hoke.

19. Yohmi ka isht hvsh im antia yokvt hatak moyuma ka im anohowa hoke: yvmohmi hoka hvchishno yak atuk pulla kak o sai yukpvshke: yohmi ak inli kia nana achukma kak o hvch imponna cha, nan ik achukmo hokvno ik hvch imponno hok bano hvchim ai ahni lishke.

20. Mikma nan isht it i nanaiya in Chihowa yak osh Setan oka chekosikma chiyi nuta ya a litola chi hoke. Pin Chitokaka Chisvs Klaist isht i kana yvt hvchi anuk foyu kashke. Amen.

21. Timohlivs svba toksvli, micha Lusivs, micha Chason, micha Sosipata a kanomi aiena kvv pit hvchi aiokpvchishke.

22. Tetivs sia holisso ilvppa holissohonchi kash ot Chitokaka ibai achvfa hvchia ha pit hvchi aiokpvchi lishke.

23. Vno, micha chvch moma aiena ka nan im atahli Kais ash ot pit hvchi aiokpvchishke. Elastvs, tvmaha in

tvli holisso sholi, micha il itibapishi Katvs aiena kv̄t pit hv̄chi aiokpv̄chishke.

24. Pin Chitokaka Chisvs Klaist isht i kana yvt hv̄sh moyuma ka hv̄chi anukfoyukashke. Amen.

25. Yohmi cha Chisvs Klaist vt nan abahanchi tok vm vbanumpa ak atuk na luma ituyula chatuk yakni toba tok itin takla ka isht ik anumpo chatuk osh isht anuhumpa ak atuk puyula mak o isht a hv̄chim ai ah̄liche he im ai v̄lhpiesa hatuk,

26. Micha Chihowa okchayvt bilia yvt nan apihisa hatuk mak o hopaii v̄hleha hv̄t holissohonchi tok o, oklushi moyuma kv̄t na yimmit isht im antia ch̄i mak o, im otaiyani hatok:

27. Chihowa hopoyuksa achvfa bano kash ot Chisvs Klaist ak atuk pulla kak o isht a holitopa yvt immit biliashke. Amen.



HOLISSO VMMONA PAL VT

KOLINHILA CHUCH

A HIKIA HO I HOLISSOCHI TOK.

CHAPTA I.

Vbanumpuli Kolinhila asha tuk a Pal vt pit ai okpuchi, mihmvt Chihowa ya aiokpuchi, 1; 10 itibachvft maya he i miha; 12 itaka-shapvt maya tuk a nan i miha. 18 Aka a nahopoyuksa yvt nan isht a hopoyuksa ka; 21 nan ik ahobo vbanumpa isht anumpuli kak o Chihowa yvt isht okpaninchi: 26 na hopoyuksa, micha nan i shahli aiena kak osh vlhtoka keyu, amba ik hopoyukso, ik hlampko, aiena kak osh vlhtoka.

1. PAL, Chihowa nan ai ahni atuk pulla mak o Chisvs Klaist im apostel vlhtoka tok, micha il itibapishi Soshlenes ita tuklo kv,

2. Chihowa in chvch Kolinhila a hikia, Chisvs Klaist ak atuk pulla kak o isht a kashofvt, vbanumpuli vlhtoka tok, micha pin Chitokaka Chisvs Klaist vt yvma, micha pishno il ita tuklo ka pimmi hatuk o hohchifo ha anukchietot hohoyot kanima moma ai asha aiena ka pit i holissohonchishke.

3. Isht i kana, micha isht it i nanaiya aiena Piki Chihowa, micha Chitokaka Chisvs Klaist ita tuklo ka a mihinti kv hvchi anukfoyukashke.

4. Yohmi ka Chisvs Klaist ak atuk pulla kak o Chihowa hv ilap isht i kana ya hvch ima hatuk oka, an Chihowa ya hvchishno yak atuk pulla mak o yak oke im ai ahni li bilivshke.

5. Yohmi ho nan okluha kv yvmmak o isht a hvchin

laua hosh isht anumpuli puta, micha nan ithana puta kv̄t isht a hv̄chim aienvshke.

6. Yakohmi hosh Chisvs Klaist nan isht atokowa yash osh hv̄chishno a isht ai āhli hatuk oke.

7. Yohmi hosh na hv̄lbina nana kia ik ai ono hō hv̄sh ishi tuk keyu hatuk osh; pin Chitokaka Chisvs Klaist vt otaiyana hi a hv̄sh hohoyo hoke.

8. Yvmmak ash inli hosh hv̄chi ai āhlihinchit ont ai v̄hli ka isht hv̄ch ona hi oke: yohmi hō pin Chitokaka Chisvs Klaist i nitak fehna ka anumpa isht a hv̄chi onvtula hi vt iksho ka hi oke.

9. Chihowa hv̄t ai āhli yoke, yvmmak o ilap Ushi pin Chitokaka Chisvs Klaist a ai ib ai eshi isht a hv̄chi vlhtoka hatuk oke.

10. Yohmi ka itibapishi li v̄hleha ma! nana a miha chvfa hō isht hv̄sh anumpula he, mikmvt ai it i filvmmi puta kv̄t ik hv̄chim iksko ka he; amba nana hosh ai ahni kv̄t hv̄chim anukfila hv̄t ai āhli fehmv̄t hv̄sh it ibafoyuka he mak o, pin Chitokaka Chisvs Klaist isht a hochihifo hosh hv̄chim ai ahni lishke.

11. Itibapishi li v̄hleha ma! nan itachowa yvt hv̄chin takla a takali ka, Kloe in chuka chvfa yosh vm̄ anoli hatuk oke.

12. Yohmi ka hv̄sh moma kv̄t, Ūno ak osh Pal ai achvfa sia; anonti, Ūno mvt Apollos ai achvfa sia; mikma, Ūno vto Sefas ai achvfa sia; yohmik ma, Ūno vto Klaist ai achvfa sia; hv̄sh achi ilvppak o achi lishke.

13. Klaist vt ita kv̄shkoa hō? hv̄chishno atuk mak o Pal ak osh ititaiyukhvna ai illi tok o? keyukmvt Pal i hohchifo hō isht hv̄chi baptismo tok o?

14. Hv̄sh kanima kia ak hv̄chi baptismocho hosh Klisv̄s, micha Kaīvs ita tuklo bano tok a yak oke, Chihowa ha im ai ahni lishke.

15. Yohmi hatuk o vno ak inli a hohchifo hō isht baptis-mochi li tok a, hv̄sh kanima kia hv̄sh acha he keyushke.

16. Mikmvt Stefan̄vs in chuka chvfa ak kia baptismochi li tok; inla yano baptismochi likmá, nana tuk vt ak itha-noshke.

17. Baptismochi la hi o, Klaist vt si atokoli tok keyu hoka, amba vbanumpa isht anumpuli la he ak atok: anum-pa hopoyuksa ya he atuk keyu, yohmi hokma Klaist im ititaiyukhvna yvt nan ai ahla he keyu hoke.

18. Ititaiyukhvna isht anumpuli yokvt kvna hosh ilbvshvt illa chi yvmmak o ik im ahobo yoke: amba okchaya chi pishno ak okvno Chihowa nan isht im ai ahli yoke.

19. Nan imponna isht a hopoyuksa yokvno okpvi la chi, mikmvt nan ithana nan isht akostininch i yano akshochi la chi, achi hosh holihiso hatok oke.

20. Katima yak o na-hopoyuksa yvt anta ho? katima yak o na-holissochi yvt anta ho? yakni ilvppa nan isht ai it i ponaklo yvto katima yak o maya ho? yakni ilvppa isht a hopoyuksa ya Chihowa hvto ik ahobalecho hatuk keyu?

21. Nan isht a hopoyuksa hosh Chihowa hvn nan atahli tok kia, yakni vt ilap hopoyuksa kak osh Chihowa ya isht ik ithano ma, vbanumpa isht anumpuli ik ahobo kia, kvna hosh yimmi hokvno mihi yo Chihowa hvn vlhpesa, ahnit isht okchalinch i yoke.

22. Chu okla hvn nan isht atokowa asihhla, mikma na hopoyuksa yo Klik vto hohoyoshke:

23. Yohmi kia pishno vto Klaist ititaiyukhvna ai illi tok a isht il anumpohonli ka, Chu okla hokvno isht ai im ibetv-bli yokmvt, anonti Klik okvno nan ik im ahobo yoke;

24. Yohmi kia Chu okla, mikmvt Klik okla ita tuklo ka kanima hosh vlhtoka hokvno mihi yo Chihowa nan isht im ai ahli, micha Chihowa nan isht im ahopoyuksa Klaist a isht il im anumpohonlishke.

25. Chihowa nan isht ik im ahobo yvt hatak okvno hopoyuksa kvn i shahli hoka; micha Chihowa yvt isht ik a hlampko ahoba kia hatak okvno hlampko kvn i shahli hoke.

26. Itibapishi li vhleha ma! hvchishno vto hvchi vlhtoka hokvto yakni pakna a hopoyuksa yvt ik lauwo, nan isht ai ahli ishi kvn ik lauwo, hatak holitempa aiena kvn ik lauwo hosh vlhtoka ka hvsh pisvshke:

27. Yohmi kvn ilap hopoyuksa ya hofahyala chi kvn



Chihowa hvt yakni ilvppa nana ik ahobo puta ka atokoli hatuk; micha nana hlampko yvmma hofahyala chi kvt yakni ilvppa ik a hlampko yō Chihowa hvt atokoli hatuk:

28. Mikmvt nana kvt yakni ilvppa ik a holitopo, micha nana kvt yvmma ik ai ahobo aiena ka, Chihowa hvt atokoli hatuk; ahli, yohmi kvt nana asha tuk a akshocha chi kvt nana kvt iksho ke tuk a atokoli hatuk:

29. Yohmi hō hatak nana kia Chihowa itikba ya ai ilauata he atuk keyu hoke.

30. Yohmi kia hvchishno vto yvmmak atuk mak o Klaist Chisvs a hvsh ibai achvfa ka yvmmak o Chihowa pulla kak o isht pi a hopoyuksa, micha isht pi ai vlvpiesa, micha isht pi a kashofa, micha isht pi ai vlbi yoke:

31. Yohmi ka holisso hatuk oka, Kvna kia ilauata hokmvt, Chitokaka yak o isht ik ilauatá.

## CHAPTER II.

Vbanumpa isht anumpohonli ka Chihowa nan isht im ai ahli yosh ai ibafoyuka tuk a, Pal vt achi, l. 14 Im anukfila himona hatak keyu hokvto vbanumpa ha ik akostinincho.

1. <sup>Y</sup>OHMI ka itibapishi li vhleha ma! kaniohmi kash hvchim ona li kvt, Chihowa isht atokowa yō hvchim anohonli la chi kvt, isht ahninha he anumpa hokmá, keyukmvt isht ahninha he hopoyuksa hokmá, nana hō isht hvchim aya li hatok keyu hoke.

2. Nana ka a hvchim ai ithvna la he ahni li hatok keyu, amba Chisvs Klaist, micha yvmmak osh ititaiyukhvna ai illi tok akbano hatok ak oka.

3. Yohmi mvt isht a hlampko iksho, mihmvt komunta, micha wvnihinchi fehna hosh hvchin takla ya ahanta li tok.

4. Mihmvt anumpuli li, micha vbanumpa isht anumpuli li aiena kvt, hatak hopoyuksa nan isht yukpali anumpa hatok keyu, amba Shilómbish, micha nan ahli yō otvninchit isht anohonli li tok:

5. Yohmi ka na hvchi yimmi kvt hatak nan isht im a

hopoyuksa yo a minta chi hatok keyu, amba Chihowa nan isht ai ahli yak a he atok.

6. Yohmi kia vbanumpa ithana ahli yokvno na hopoyuksa yo isht il im anumpulishke: yohmi kia yakni ilvppa isht a hopoyuksa yak keyu; mikmvt yakni ilvppa, i miko vhleha isht a hopoyuksa, yvmmak okvt ont ik ai iksho ka he ak atuk keyushke.

7. Yohmi kia Chihowa isht im a hopoyuksa yvmmt luma hatok a yvmma isht. pi a holitopa hi o, yakni vt ik tobo kisha ma, Chihowa hvt apesa tok ak o isht il anum-pohonlishke.

8. Yakni ilvppa i miko vhleha achvfa kia ilvppak ash ik ithano ki tok: okla ithana hatuk okmvt, a holitopa in Chitokaka ya ititaiyukhvna ai vba he atok keyu hoke.

9. Yohmi kia kvna hosh yvmma i hullo hokvno mihi yo Chihowa hvt nana ka im ataiyahli tok a, yvmmak oka hatak nishkin vt ik pesokma, anonti haksobish vt ik haklokma, hatak chukvsh ak kia ik anukfohko hoke, achi hosh holihiso hatuk oka.

10. Yohmi tok o Chihowa hvt ilap imi Shilombish pulla h<sub>o</sub> yvmmak ash isht a pim otvninchi hatuk: Shilombish ak osh nana puta ka silhhit ithana hokvt, ahli, Chihowa nana im a kaniohmi a hofobi kak kia ai yvmohmi yoke.

11. Kvta hosh hatak nana im a kaniohmi puta ka ithana cho? hatak shilombish yvmmt ilapa anukfoyuka ak illa keyu? yvmmak i chohmi h<sub>o</sub> Chihowa nana im a kaniohmi puta ka hatak nana hosh ithana keyu h<sub>o</sub>, amba Chihowa imi Shilombish ak illa hoke.

12. Yohmi ka yakni nana isht ai im anukfila yo il ishi hatuk keyu, amba Chihowa hatuk mak o nana puta ka il ishi hatuk vt il ithana chi pulla hosh Shilombish Chihowa a minti h<sub>o</sub> il ishi hatuk oke.

13. Nana puta yvmma isht il anumponhli kv yvmma hatak nan isht im a hopoyuksa yosh abvchi anumpa keyu, amba yvmmak oka Shilombish Holitopa yosh abvchi anum-pa h<sub>o</sub> Shilombish nana im a kaniohmi ya Shilombish anukfoyuka vhleha h<sub>o</sub> il ithvnahanchishke.

14. Hatak chukvsh ik kashofo hokvto Chihowa imi Shilombish nana im a kaniohmi puta ka ik ithano yoke; yvm-mak okvt ilap a nana ik aliobo hokvt: mikmvt ithana he keyu, yvmmak ash o Shilombish osh abvchi hoka.

15. Yohmi ka kvna hosh Shilombish anukfoyuka hokvto nana puta ka anukfillit akostininchí, yohmi kia ilap okvno hatak nana hosh im akostininchí keyushke.

16. Kvta hosh Chitokaka im anukfila ha ithaiyana cha, mihi yosh nan im abvcha hinla cho? Yohmi kia pishno yokvto Klaist im anukfila yo il ieszvshke.

### CHAPTA III.

Pishukchi vt vlla chipunta yak o immi, 1: 3 kaniohmi ho itakvsh-koa hatuk a haknip imma im anukfila hatuk vt otvni. 7 Kvna hosh hokchi, mikma kvna hosh oka o foechi itatuklo kv nana keyu: 14 Chihowa ak osh wayachi. 16 vbanumpuli yvt Chihowa in tempel; 19 yakni nan isht ahopoyuksa yokvto Chihowa i naho-poyuksa keyu.

1. YOHMI ka itibapishi li vhleha ma! Shilombish anukfoyuka ho chohmichit hvchim anumpohonli la he keyu, amba haknip nan ai ahnit Klaist ibai achvfa villosi yo hvchi chohmiechi lishke.

2. Pishukchi yo isht hvch ipeta li tok, ilhpak kvllo atok keyu; tikba kamo isht a hvchim vlhpesa tok keyu kvt himonasi ak kia, isht a hvchim vlhpesa keyu momvshke.

3. Haknip nan ai ahni hvchia moma hoka iti potvno, micha itachowa anonti iti filamohli aiena kv hvch itin takla aiasha hoka, haknip nan ai ahni mak o hvchia moma, micha hatak im anukfila yo chohmit, hvsh itvnohova keyu?

4. Hvsh kanima kv, Vno vto Pal ai achvfa sia; anonti in-la mvt, Vno vto Apollos ai achvfa sia, hvshi achi hokvt haknip nan ai ahni hvchia mak o keyu?

5. Yohmi ka kvta hosh Pal okmá, anonti kvta hosh Apollos o? amba vbanumpa isht vtta yvmmak atuk mak o hvsh moma ka Chitokaka yvt hvchi anukfohki tuk mak o, hvchi vimmi tuk oke.



6. Hatak moma kv̄t yohma he mak ǝ Chitokaka yvt a-pe-sa tok ǝ, Ŭno ak osh na-hokchi li tok, Apollos vto oka on hlali tok; amba Chihowa yokvto offochi hatuk oke.

7. Yohmi ka kv̄na hosh hokchi, mikma kv̄na hosh oka isht on hlali hokvto na kanihma he keyu, amba Chihowa yvmmak osh offochi yoke.

8. Yohmi ka kv̄na hosh na hokchi, anonti kv̄na hosh oka isht on hlali ita tuklo kv̄t itibai achvfa yoke: yohmi ka moma kv̄t ilap na toksvli isht ai v̄lhpiesvt v̄lhtoba ak illa ho isha hi oke.

9. Chihowa immi hosh itiba toksvli v̄hleha pia hoke. Chihowa nan im ahollokechi hv̄chia, m̄icha aboha Chihowa hv̄t atahli tuk mak ǝ hv̄chia hoke.

10. Chihowa hv̄t ilap nan isht i kana yvmma vma tuk mak ǝ aboha ikbi imponna hopoyuksa yo chohmit in tolahpi ya bohli li hatuk, mihma inla yosh yvmmak ash ǝ ai itv̄bni hoke. Yvmohmi hoka hatak moma kv̄t kanimihchit yvmmak ash ǝ ai itv̄bni kv̄t ahah! ahnashke.

11. Intolahpi yvmmv̄t Chisvs Klaist, yvmmak osh itola ha ya, hatak nana hosh inla ya bohla he keyu hoka.

12. Yohmi ka hatak kv̄na kia intohlapi ilv̄ppa pakna ya tv̄li holisso lakna yokmá, tv̄li hv̄ta yokmá, tv̄li ai v̄lbi chito yokmá, iti yokmá, hv̄shuk okmá, onush v̄pi yokmá, nana ho isht itv̄bni tuk okmá;

13. Nana v̄lhtaha tuk aiyuka kv̄t otaiyana hi oke: nitak yvmmak osh otv̄ninha he, luak ǝ isht otaiyana hi oka; yvmohmi ka hatak a im a toksvli aiyuka kv̄t kaniohmi hatuk oh kia, luak osh imomaka pisa hi oke.

14. Yvmmak ash pakna ai itv̄bni tuk a hatak nana hosh atoksvli tuk ak ǝ ik okpulokma, mihi yosh nan v̄lhtoba ya isha hi oke.

15. Kv̄na hosh atahli tuk a lua hokma, yvmmak osh i kv̄niv̄t ilbv̄sha hi oke: yohmi kia ilap okvto okchaya he, yohmi kia luak ǝ a hlopulli kak inli ho chohma hi oke.

16. Chihowa in tempel hv̄chia, yohmi hatuk ǝ Chihowa imi Shilombish vt hv̄chia chukvt anta ka hv̄ch ik ithano cho?

17. Kvna kia Chihowa in tempel a liteblikma, mihi y<sub>o</sub> Chihowa hvt ishit kancha he; Chihowa in tempel vt holitopa yoka, tempel yummak o hvchia hoke.

18. Kvna kia ik ile haksecho kia. Hvchi kanima hosh yakni ilvppa hopoyuksa h<sub>o</sub> ilahobikmvt, yummvt hopoyuksa chi kvt yakni ilvppa ik ahobo y<sub>o</sub> ik tobá,

19. Yakni ilvppa isht im a hopoyuksa yokvto Chihowa ya isht ik im ahobo yoka. Yummak okvt hopoyuksa ya ilap nan isht imponna ak inli h<sub>o</sub> isht ishi yoke, achi hosh holisso tok oka.

20. Mihmvt anonti atuklanchi mvt, Chitokaka yvt hopoyuksa im anukfila p<sub>u</sub>ta, yummvt ai ahli ik ono ka ithaiyana hoke, achi tok.

21. Yvmohmi hoka kvna kia hatak puta h<sub>o</sub> isht ik ilauato kia, nana moma kvt hvchimmi hoka;

22. Pal ak okmá, keyukmvt Apollos, keyukmvt Sefas, keyukmvt yakni ilvppa, keyukmvt ilhfiopak okchaya, keyukmvt nan illi, keyukmvt nana kvt himonasi asha, keyukmvt nana kvt asha he moma kvt hvchimmi yoke.

23. Mikma hvchishno vto Klaist immi hvchia; mikma Klaist vt Chihowa immi hoke.

#### CHAPTA IV.

Kaniohmit Klaist im vbanumpa isht v<sub>t</sub>ta ya il ahnicha he tuk 1; 7 nana ka e habena tuk keyu kvt il i shi keyu. 9 Apostel v<sub>h</sub>lehvt yakni pakna ik ahobo y<sub>o</sub> isht v<sub>h</sub>lpisa, 16 yummak o il im antia he tuk.

1. KLAIST in tishu v<sub>h</sub>leha, micha, nan ahli Chihowa hvt otv<sub>n</sub>inchi tok puta nan im apesvchi v<sub>h</sub>leha mak o, chiyuhmichit hatak puta kvt isht pi anukfillashke.

2. Anonti nan apesvchi v<sub>h</sub>leha nan isht im v<sub>h</sub>lpisa kvt hatak yummvt ai ahla hi ak oh chatuk oke.

3. Yohmi kia hvchishno, keyukmvt hatak inla nana kia nana h<sub>o</sub> isht hv<sub>s</sub> sv<sub>m</sub> anukfillit hvsh apesa kia, vno yokvto

yvmmt vm iskitinosi fehna hoke; ahli vno ak inli kv̄t isht il anukfillit nan apesa li keyu hoke.

4. Vno ak inli kv̄t nana hō isht il akostininchi li keyu kv̄t; yohmi kak osh ilvppak o isht si ai vlhpiesa hi o keyu; amba kv̄na hosh nan isht si anukfillit apesa hokvto Chitokaka yak oke.

5. Yvmohmi hoka Chitokaka yvt ik lo kisha ka tikbalinchit nan isht anukfillit hvch ik apeso kashke, yvmmak osh ai okhlilika ya nana kv̄t a luma puta tuk a otvninchikmvt, anonti chukvsh im anukfila puta hatuk ma haiakahancha hi oke; yvmohmi ha ya hatak moma kv̄t nana ai isha he vlhpesa tuk vt Chihowa ya im ai isha hi oke.

6. Yohmi ka itibapishi li vhleha ma! yvmma puta kash hvchishno pulla hatuk mak o, vno, mikmvt Apollos, ita tuklo li kak o isht il onochi li: yohmi ka nana kv̄t holisso tok a i shahlichit hatak o isht ik hvchim anukfilo hosh pishno ak o hvsh pim ai ithvnashke; yohmi hosh hvsh achvfona kia achvfa ka ish ile fehnvchit, anonti achvfa ka hvch ik i sanalo kashke.

7. Kv̄ta hosh hvch iti shashohlichit hvchim apesa tok o? Nanta hō ish ishi hosh yvmma chik habeno tok o? yohmi ka ish habena hatuk mvt, nanta katiohmi hō chik habeno ke tuk ak inli hō chohmit isht ish ilauata cho?

8. Himak ano na hvchi fihopa, himak ano na hvchin laua, ik piksho hō mikot hvsh mayvshke; yohmi ka hvsh miko hatuk o mvhli hokbano ahni li, yvmmak atuk mvno pishno ak kia e hvch iba mika he atuk.

9. Illa he isht im vlhpisa kak o chohmit vbanumpeshi ishtaiyopi pishno a Chihowa hv̄t pi atokoli tuk a vm ahoba hoka; yakni moma, mikmvt enchil vhleha, mikmvt hatak puta itikba a yopissa e toba tok oka.

10. Klaist atuk mak o ik pi ahobo ma, amba hvchishno vto Klaist a isht hvchi a hopoyuksa hoke: ik pi hlampko ma, amba hvchishno vto hvchi hlampkoshke: hvchi holitopa ma, amba pishno vto ik pi holitoposhke.

11. Pi hohehahafot, pi tukshihinla, micha haknip bieka, mihma pi pvsahaha; yohmi hō ai vtta ahli yvt ik pim iksho na ant himakvshke.



12. Mihmvt pishno pibbak ak inli h<sub>o</sub> isht toksahanli hosh ont pi a hoyublishke. Isht pi atukhlakahafa kia, i kanvt il anumpohonlishke: pi palvmihinchia kia, vlhpiesa il ahnishke.

13. Ik ahobalot na pi achi kia, i kana hosh il im anumpohonlishke; yakni pakna im a liteha ak inli h<sub>o</sub> a pi chiyuhmi, mikma nana moma isht liteha chukvlhpvsh ak o e chiyuhmi na ant himakvshke.

14. Hvchi hofahyali la he osh ilvppa puta ka holissochi li keyu, amba vm vlla a holitopa hvsh chiyuhmi kvv ahah! hvsh ahana chi kak o hvchi miha lishke.

15. Klaist nan isht ithvnanchi tahlepa sipokni pokoli hosh hvchim ai asha hoh kia, hvch iki vt ik lauwohke; Klaist Chisvs osh nan apelvchi h<sub>o</sub> vbanumpa pulla h<sub>o</sub> isht hvchi tobachi li tuk oke.

16. Yvmohmi hokvt hvs siakaiya hi a hvchi miha lishke.

17. Ilvppa yakohmi kak o Timohlivs, svso a holitopa, Chitokaka im ai ahlit achukma ya pit hvchi kanchi li ka, mihi yosh kanima moma ikxa a hiohli puta ka Klaist isht avvchit, nana a kaniohmi li puta ka anolit hvchi anukfohki-cha hi oke.

18. Yohmi ka ak hvchim ono ka he im ahobvt, hvsh kanimi kvv isht hvsh ilefehcvchishke.

19. Yohmi kia Chitokaka yvt vlhpesa ahnikma, chekosi hvchim ona la chi hoke: yohmi kvv ilefehvvchi vhleha hatuk yvmmak ash im anumpa hak a chi keyu, amba nan ai ahli yak o ithana la chi hoke.

20. Chihowa im apehliechika yokvt anumpa h<sub>o</sub> keyu, amba nan isht ai ahli yak oke.

21. Nanta h<sub>o</sub> hvsh ahni? fuli yokmá, keyukmvt i hullo, micha chukvsh im anukfila yohbi hokmá, nanta h<sub>o</sub> ieshi hosh hvchim ona la chi cho?

## CHAPTA V.

Hau mvt Kolinhla hvch a ibvlhkahvt maya kak osh hofahyalichi, 1; 10 nan ibetvblichia okpulo yokvno hofahyalit kano pit kancha he vlhpesa.

1. ITIN lumaka yvt hvch itin takla ya asha kvv anohowa fehna hoke; yohmi ka kvna kia iki tekchi atuk a itauwaya, nan itin lumaka chohmi kvv Chentail okla ak kia ai yvmohmi fehna chatuk keyu hoke.

2. Yohmi ka kvna hosh na yakohmi ka yvmihchi tuk vt hvch itin takla ya a filvmma chi ka, ik hvchi nukhaklo kish, isht hvsh ile fehnvchishke.

3. Sa haknip okvno isht a hvchi filvmmi li mvhli; yohmi kia sa shilombish okvno isht hvch ibafokvt hvch itin takla ahanta li ka chohmit, kvna hosh na yakohmi ka yvmohmi tuk mihi yo nana im apesa li mashkoshke.

4, 5. Kaniohmi ho pin Chitokaka Chisvs Klaist i hohchifo ho isht itvnavt hvsh chiyakma, sa shilombish vt a hvch iba foyuka na pin Chitokaka Chisvs Klaist nan isht im ai ahli pulla hatuk mak o, kvna hatuk ash haknip isht ai im ilbvsha tok osh Chitokaka Chisvs Klaist i nitak vla hokvno imi Shilombish okvto okchaya chi ka, Setan ak o hvsh im issashke.

6. Nan isht hvsh ilauata ka ik achukmoshke. Nan isht shatvmmi iskvtnosi kia na yvmmvka moma ka yvmmichi ka hvch ik ithano cho?

7. Yvmohmi ka ik yvmmo hvchia hokvt, na yvmmvka himona mak o hvchia ha chi kvv, nan isht shatvmmi tikba yash isht ile filvmmichit hvsh kanchashke. Klaist vt na pim vbanvblit ont ia yvt vlhtobvt illi tok oka.

8. Yomohmi hoka impa holitopa isht kiloh ai ashá; yohmi kvv nan isht shatvmmi tikba yash o keyu, mikmvv isht iti nukkilli, micha nan ik ai vlhpeso aiena ka isht shatvmmi yak o keyu, amba nan ilahobi keyu hosh ai ahli i pvvka ik shatvmmo yak ashke.

9. Itin lumaka vhleha ha hvch ik itiba chvfo ka chi ho, holisso ha hvchi holissochi li tuk oke.

10. Yohmi kak osh yakni ilvppa ai itin lumaka vhleha, mikmvv nan anushkunna atampa vhleha, micha na wehpuli vhleha, mikmvv na holvvt toba aiokpvchi vhleha aiena ka hvch ik itvpeho kvvmohe he ak atok keyu; yohmi hokmvv yakni ya hvsh a kohcha he ak osh hvchim vlhpesa hoka.

11. Yohmi tok kia kvna hosh itibapishi hohchifo hatuk vt itin lumaka, keyukmvt nan anushkunna atampa, keyukmvt na holbvt toba aiokpvchi, keyukmvt inla isht itukhlakafa, keyukmvt oka homi ishko, keyukmvt na wehpuli okmá, nana hokvno hvch ik itibai achvfokmvt, yvmma chohmi kash impa kia hvch ik itibai impo ka hi o himak a hvchi holissochi lishke.

12. Kvna hosh iksa ibafohka yatuk keyu yvmmak kia nanta ho isht im apesa la he vlhpesa ho? iksa ibafohka yvmmak atuk okvno hvsh im apesa keyu ho?

13. Amba kvna hosh iksa ibafohka keyu hokvno Chihowa yosh nan im apesa yoke. Yvmohmi hoka hatak nan ashvchi yvmmak ash ai il i filvmmichit hvsh kanchashke.

## CHAPTA VI.

Vbanumpuli vt nan vlhpisa isht it onocha he keyu, 1; 9 nan ik vlhpeso vto vba apchlichí ka ai ahanta he keyu. 15 Hvpi haknip vt Klaist a ibachvfa, 19 mikmvt Shilombish Holitopa in tempel oke.

1. HVSH kanimi kvv inla ya nana hvsh iti kaniohmikmvt, nan ik vlhpeso itikba yo ont nana hvchim vlhpisa hi osh hvsh ahni cha, amba na yimmi vhleha itikba yokvno keyu ka hinla hatuk o?

2. Na yimmi vhleha hvv yakni moma nan im apesa hi a hvch ik ithano cho? yohmi ka yakni a nan hvsh im apesa hi okmvt, nana kvv iskvtnosi hokvno hvsh apesa he hvchi vlhpesa keyu ho?

3. Enchil vhleha ha nan iloh im apesa hi a hvchik ithano cho? yohmi hokvt okchaya ilvppa nana im a kaniohmi yokak heno il i shaiyahlichí fehna hinla keyu ho?

4. Yohmi ka okchaya ilvppa nana im a kaniohmi yo nan isht hvchim vlhpisa chi hokmvt, kvna hosh iksa im a holitopa keyu mihi yosh na hvchim apesa chi ka, hvsh atokoli chatuk oh cho?

5. Hvchi hofahya chi ho hvchim anumpuli lishke. Hatak hopoyuksa kvv hvch itin takla ya iksho ho? achvfa kia



itibapishi vhleha nan iti kaniohmi ka im apesa he keyu kvt iksho hō? yohmi ho mvhli hō?

6. Yohmi kia itibapishi achvfa kvt itibapishi atuk a anum-pa onochi cha, nan ik yimmo vhleha itikba yō nana im vlpisa chi kvt ohonvshke.

7. Yomohmi hoka himonasi kia anumpa itonochit nan im vlpisvt hvsh maya hokvt, nana hvsh ashvchi fehnvshke. Nanta katiohmi hō nan ik vlpeso ka hvchi onocha he hvch ik im ahno hosh? nanta katiohmi hō nana ka ik vlpesachot hvchim isha hi a vlpesa hvchik im ahno hosh?

8. Yohmi keyu, amba hvch itibapishi ak kia ai vlpiesa keyu hō na hvsh im ishi kvt, nan hvsh ashvchi hoke.

9. Ik vlpeso vhleha hokvt Chihowa im apehlichika yvt ai immi ha he vlpesa keyu ka hvch ik ithano cho? hvch ik ile haksecho kashke; itin lumaka vhleha, naholbvt toba aiokpvchi vhleha, micha haui vhleha, micha nakni haui vhleha, micha nakni bika iti hauichi vhleha,

10. Micha hukopa vhleha, micha nan anushkunna atampa vhleha, micha oka homi ishko vhleha, micha inla isht itukhlakafa vhleha, micha na wehpuli vhleha, aiena hokvno Chihowa im apehlichika yvt ai immi toba he vlpesa keyu hoke.

11. Yohmi ka hvsh kanimi kvt yvmma chohmi hvchia hatuk oke. Yohmi tuk kia hvchi ahchifa hatuk, mihmvt hvchi kashofa hatuk, yohmi kvt Chihowa imi Shilombish pulla hō Chitokaka Chisvs i hohchifo hō isht a hvchi vlpiesa hoke.

12. Nana puta kvt isht vm ai vlpesa, yohmi kia nana puta kvt isht vm ai achukma keyu; nana puta kvt isht vm ai vlpesa, yohmi kia yvmma kanima kak oh kia i yuka la he keyu hoke.

13. Il impa hvt takoba yak o immi holr chatuk oke, mikma takoba yato ilimpa hak o ai immi hoh chatuk oke: yohmi kia yvmmak ash o it aieninchit Chihowa hvt ikshokecha chi hoke. Yohmi ka haknip okvt haui yak o ai im vlpisa keyu, amba Chitokaka yak oke: yohmikma Chitokaka yvt haknip a nan im atahli yoke.

14. Yohmi kvt Chihowa hvt Chitokaka ya tanichi hatuk

okvt anonti pishno a ilap nan isht im ai ahli yo isht pi tani-  
cha he ak inli hoke.

15. Yohmi ka hvchi haknip vt Klaist a ai it immi ha hvch  
ik ithano cho? yohmi hatuk a Klaist a ai it immi hash ishi  
lish, anonti haui yo ai it immichi la chi cho? ik yvmohmo  
pullashke.

16. Yakeh! kvna hoh kia haui yo ibafohka kvt, yummvt  
haknip achvfa ka hvch ik ithano cho? tuklo tuk kia haknip  
achvfa toba hi oke, achi hoka.

17. Amba kvna hosh Chitokaka ak o ibafokkakmvt, shi-  
lombish achvfa hoke.

18. Haui ya ili filvmmichit hvsh m lelashke. Kvna kia  
nan ai ashvchika moma ka yvmihchi hokvto, haknip okvno  
nana kanihchi keyu hoke: amba kvna hosh itin lumaka ho-  
kvto, ilap haknip ak inli ho okpanit nan ashvchi hoke.

19. Yakeh! hvchi haknip vt Shilombish Holitopa mihi  
yosh hvchi afoka, yummak osh Chihowa a minti ho hvsh  
ieshi, yummak o in tempel hvchia hosh, hvchishno ak inli  
kvno keyu kvt hvch ik ithano cho?

20. Nan ai vlli ho isht hvsh ai vlhtoba hatok: yvmohmi ho-  
kvvt hvchi haknip, micha hvch imi shilombish, yummak okvt  
Chihowa immi hoka, Chihowa ya isht hvsh holitoblashke.

## CHAPTA VII.

Nan itauwaya imma ka miha, 1; 4 mikmvt ik iti lumako ka hi a itau-  
waya hi a miha: 10 nan itauwaya kvt pilla ik ahobot iti mokofa  
he keyu: 18 moma kvt ilap nan im vlhpisa kvt vlhpesa ahnit ahi  
kia he; 25 ohoyo himithoa itauwaya ka nan isht anumpuli.

1. YUMOHMI ka nana ka hvsh sa holissochi tok imma  
kak oke. Hatak vt ohoyo ha ik potolo kak osh im achukma  
hoke.

2. Yvmohmi kia itin lumaka iksho ka chi kak o, hatak  
moma kvt ilap tekchi ak inli ho ieshikma, anonti ohoyo mo-  
ma kvt i hatak ak inli ho ieshashke.

3. I hatak vt ohoyo ha isht ai im vlhpesa ka imashke:  
mikma tekchi atuk ak kia i hatak a mihinlohimchashke.

4. Tekchi vt ilap haknip ak o immi ho keyu, amba i hatak ak oke; mikma i hatak ak kia mihi yo chohmit ilap haknip a immi keyu, amba tekchi ak oke.

5. Isht im ai vlhpiesa hatuk ash hvch ik it im esho kashke, amba anumpa ilbvsha hvsh anumpuli fehna chi hosh chekosi itin takla yo hvsh it im ahni hok mak ashke; atuk osh nan isht il ai oktambli ik hvchim iksho ki Setan vt imo-maka hvchi pisa hinla ka, atuklant hvsh it im onashke.

6. Yohmi kia vno nana vm anukfila hosh ilvppa isht hvchim anumpuli lishke, yohmi kvv nana isht vm vlhpisa tuk keyu hoke.

7. Hatak puta kvv vno ak inli chiyuhma he ak o ahni lishke. Yohmi kia hatak moma kvv Chihowa i nan hvlbina ya isht im vlhpiesa cha, achvfa kvv ilvppak o isht ai im vlhpiesakma, anonti inla yvt yvmmak o isht im vlhpiesa yoke.

8. Yvmohmi ka nan ik itauwayo kisha, micha i hatak illi vhleha aiena kvv, Vno ak inli chohmit maya hinla hokmvt, im achukmvshke, achi lishke.

9. Yohmi kia okla il oktampla he keyu mvt, okla itauwayashke: itauwaya kak osh lua hi a im i shahli hoke.

10. Anonti itauwaya vhleha hokvno im apesa lishke; yohmi kia vno ak keyu, amba Chitokaka yak oke; Tekchi atuk vt i hatak atuk a ik i filvmmo kashke.

11. Yohmi kia anonti tekchi atuk vt filvmmi hokmvt, inla ik auwayo hosh antashke: keyukmvt i hatak atuk ash o i kanvt i falamashke; mikma i hatak vt tekchi a ik kancho kashke.

12. Yohmi ka inlaka yano vno ak osh anumpuli li, Chitokaka yak keyu; iloh itibapishi kva kia tekchi ik yimmo, yohmi kia yvmmak ash o awant anta kvv im achukmakma, yvma ik kancho kashke.

13. Anonti ohoyo hvv i hatak osh ik yimmo, yohmi kia yvmmak ash awant anta kvv im achukmakma, yvma ik kancho kashke.

14. I hatak vt ik yimmo yvt tekchi atuk pulla mak o isht im a kashofa yoke; mikma tekchi nan ik yimmo yvt i hatak atuk mak o isht im a kashofa yoke; yvmmak keyukma hv-



chim vlla yvt ik kashofo ka he tuk; amba himak ano holi-topa hoke.

15. Yohmi kia ik yimmo yvt filvmmi hokmvt, filvmmi ayashke. Yvmma chohmi hokvno il itibapishi yokmá, pin tek okmá, nana hash osh i yuka he keyushke; yohmi ka Chihowa hvto iti nanaiya he ak o pi atokli tuk oke.

16. Tekchi chia ma! chi hatak a ish okchalinchikmá nana chi kvt nanta ish ithana cho? mikma hatak chia ma! chi tekchi a ish okchalinchikmá, nana chi kvt katiohmit ish ithana cho?

17. Yohmi kia Chihowa hv kaniohmichit hatak moma ka i hopehinla hatuk, Chihowa yvt moma achvafalechit atokoli tok; yohmi hoka yvmmak o ik ai itvnowá. Yohmi ka chvch hiohli moma ai yvmohma chi mak o apihisa lishke.

18. Kvna kia hakshup tupa yvt vbanumpa nukfohka ho? Yohmi hokmvt hakshup ik tapo yo ik tobo kashke. Kvna kia hakshup ik tapo yosh vbanumpa nukfohka ho? yohmi hokmvt hakshup tupa keyu kashke.

19. Hakshup tupa yokvto nana keyu, mikma hakshup ik tapo yokvt nana keyu, amba Chihowa i nan vllhpisa holito-hombli kak oke.

20. Hatak moma kvt kaniohmit antvt vbanumpa anukfohka tuk vt, yvmmak inli ho anukfoyukvt isht ahantashke.

21. Yuka chia hosh vbanumpa chi nukfohka ho? yohmi hokmvt na yohmi chik ahno kashke; yohmi kia yuka keyu ish toba hinla hokmvto, yvmmak o ish yvmihchashke.

22. Kvna hoh kia yuka hosh Chitokaka isht anukfoyukakma, mihi yosh Chitokaka immi yuka keyu hoke; yvmmak ash inli ho chohmit kvna hosh yuka keyu yosh vbanumpa anukfohkakmvt, mihi yosh Klaist in tishu yokvt.

23. Nan ai vlli yo hvsh ai vlbi hatuk; hatak i yuka ho hvchia keyu kashke.

24. Itibapishi li vhleha ma! hatak moma kvt kanima yo hikivt anukfohka tuk mvt, Chihowa im antihiyvt yvmmak inli ho antashke.

25. Yvmohmi ka ohoyo himithoa hatak haleli keyu vhleha imma kak a he tuk okvno Chitokaka i nan vllhpisa yvt ik

svm ikshoshke: yohmi kia ai ahla chi hosh Chitokaka nan isht i nukhaklo ahayuchi tuk mak o, chohmit vno vm anuk-fila ha ima lishke.

26. Yohmi kia himonasi yokvno nan isht palvmmi ak atuk mak o ilvppak okvt achukma, ahni li; na yakohmi ka hatak vt yohmi kak o achukma, achi lishke.

27. Tekchi a ish a talaiyakchi ho? i holhtoyufa he, chik ahno kashke. Chi tekchi a ish i holhtoyufa ho? tekchi a chik hoyo kashke.

28. Yohmi kia anonti ish itauwaya hokmvt nana ish ashv-chi tuk keyu hoke: mikma ohoyo himita hatak haleli keyu yosh hatak auwaya hokmvt, nan ashvchi tuk keyu hoke. Yvmohmi ak inli kia yvmma chohmi kvv haknip nan isht ik im vllhpieso ka he; yohmi kia hvchi kanvt nana kaniohma hi okvno ak hvchim anoloshke.

29. Yohmi ka itibapishi li vhleha ma! ilvppak o achi lishke: nitak vt ik falaio yosh takanli hoke; tekchi im asha vhleha yatuk vt, ik im iksho chiyuhmashke.

30. Mikma kvna hosh yaiya kia, yaiya tuk keyu chiyuh-mashke; mikma kvna hosh yukpa kia, yukpa tuk keyu chiyuhmashke; mikma kvna hosh chumpa kia, ik esho ke tuk chiyumashke.

31. Mikma kvna hosh yakni ilvppa nan isht ai ahanta kia, ik vlhpesachot ahanta ik chiyuhmo kashke. Yakni ilvppa nana a kaniohmi yokvto ont ikshot ihiya hoka.

32. Yohmi hoka nan isht im anukfilvt ik hvchi komunto ka he ak o hvchim ai ahni lishke. Kvna hosh itauwaya keyu hokvto, kaniohmit Chitokaka ya yukpala chi kvv, nana kvv Chitokaka ai immi hak o anukfihinli hoke.

33. Amba kvna hosh itauwaya yokvto, kaniohmit tekchi a yukpala chi kvv, nana kvv yakni ai immi hak o anukfihinli hoke.

34. Hatak im asha, mikmvt ohoyo himita hatak haleli keyu hokvto, it im inla hoke: ohoyo hatak auwaya keyu hokvto ilap haknip, micha im anukfila ita tuklo ka isht ik ashvcho ka chi kvv, nana kvv Chitokaka ai immi hak o anukfihinli hoke: amba hatak im asha yokvto, kaniohmit i hatak yukpala chi kvv, nana kvv yakni ai immi hak o anukfihinli hoke.

35. Yohmi ka hvchishno isht ai hvchim vlhpesa hi o ilvppa anumpuli lishke: yohmi kv̄t nan isht ataklvma y<sub>o</sub> isht hvchi onochi la ch̄i hatuk keyu; amba nana kv̄t ai vlhpiesa kak atuk; yohmi ka nan isht fitekvchi ik im ikshot, Chitokaka ya im antihyv̄t nan isht hvsh im ahantashke.

36. Yohmi ka hatak kv̄na hosh ilap ushetik hatak haleli keyu hatuk a ilap inli hosh ik vlhpesalo kv̄t anukfillikmv̄t, yvmmak ash osh hofantit taha ha ya tuk okma, anonti yvmohma he vlhpesa hoka, nana h<sub>o</sub> i<sub>ki</sub> ash osh ahnikmv̄t nanashvchi keyu hokv̄t, yvmihchashke: yohmi h<sub>o</sub> hatak auwayashke.

37. Yvmohmi kia yvmohma he vlhpesa keyu hokmv̄no, i<sub>ki</sub> ash osh ilap chukvsh isht ile kv̄llochit ilap nan ahni hosh ahlichia hinla hosh, anonti yakohmashke, ahnit ilap chukvsh a anukfoyuki hokmv̄t, ushetik hatak haleli keyu kash ot imoma hosh im anta he ahnikmv̄t, vlhpesa h<sub>o</sub> yvmihchi hoke.

38. Yvmohmi hoka kv̄na hosh ushetik hatak haleli keyu h<sub>a</sub> hatak auwayvchi kv̄t vlhpesa h<sub>o</sub> yvmihchi hoke; yohmi kia kv̄na hosh ushetik hatak haleli keyu ya hatak auwayachi keyu kak osh, vlhpesa kv̄t i shahli h<sub>o</sub> yvmihchi hoke.

39. I hatak vt okchaya moyuma ka tekchi vt nan vlhpisa pulla h<sub>o</sub> isht a talaiyakchi hoke; yohmi tuk kia i hatak ash osh illi hokmv̄no, Chitokaka immi kv̄na loh kia ahnikmv̄t, auwaya hi vt i holhtofa hoke.

40. Yohmi ka Chihowa imi Shilombish vt a si anukfoyuka ak inli ka vm ahoba hoka, vno vm anukfila h<sub>a</sub> yvmmak ash osh iakaiyv̄t peh anta hokmv̄t, yvmmv̄t yukpa kv̄t i shahli hoke.

## CHAPTA VIII.

Naholbvt toba puta ka nan isht aiokpvchi ka isht anumpuli, 1; 9 kv̄na kia na kil ibetr̄blichō kashke.

1. YOHMI ka na holbvt toba isht aiokpvchit nana ka im issa tok imma hokv̄no, nana ka iloh ithaiyana kv̄t il



ithanvshke. Nan ithana yvt ile chahvchi, amba nan i hullo yokto nan achukmali yoke.

2. Yohmi ka kvna kia nana ka ithana im ahoba hokmvt, nana ka kaniohmit ithana he tuk ash osh ik ithano kisha hoke.

3. Amba kvna hosh Chihowa ya i hullokma, mihi yosh yvmma im a holitopa hoke.

4. Na holbvt toba puta isht aiokpvchit nana ka im issa tok yvmmak o vpa hatuk imma tok okvno, na holbvt toba yvt yakni pakna ya nana ho keyu; micha Chihowa inla yvt iksho, amba achvfa kak illa ka iloh ithanvshke.

5. I shahli hohchifo kvt ai asha kvt vba shutik ak okmá, keyukmvt yakni pakna yak okmá, nana ho ai asha kvt, i shahli hvt laua cha, anonti chitokaka mvt laua hoke.

6. Amba pishno yokvno Chihowa achvfa, Iki, yvmmak osh nan ai ahni pulla ho nana moma kvt toba hoke; mikma pishno vt yvmmak o immi pia hi osh il in toba hoke; mikma Chitokaka Chisvs Klaist achvfa yvmmak atuk mak o nana moma kvt ai asha, mikma pishno mvt yvmmak atuk mak o il ai ashvshke.

7. Yohmi kia nan isht ithaiyana yash hatak moyuma ka anukfoyuka keyushke: kanimi kvt na holbvt toba ya nana ho chohmichit isht ai i yimmi cha, na holbvt toba yash nana ho im issa tuk ash o yvmmak o ai vput maya na ant himakvshke: yohmi mvt nan isht il ai akostininchi yvt ik ono hatuk osh ai okpuloka hoke.

8. Yohmi ka il impa hatuk mak o Chihowa hvt pi ahninchi ho keyu: il impa hoh kia, kaniohmit il i shahli keyu hoka; mikmvt kil impo kia kil a lauwo keyu hoke.

9. Yohmi kia ahah! hvsh ahni na na hvsh a kaniohma he vllpesa ilvppak ash ot kvna hosh ik hlampko, yvmmak ash o ibetvblichy yo ik kaniohmi kia ik tobo kashke.

10. Kvna chia hosh nana hash isht ithaiyana kia, na holbvt toba in tempel anukaka ya ish ai impa na kvna hosh chi piesakmvt, yvmvt nan isht il akostininchi hvt ik hlampko hatuk okmvt, na holbvt toba nana ho im issa tok yvmmak ash o vpa hi vt i shahlit anukfohka keyu ka hinla ho?

11. Yohmi ka nana ish ithana pulla tuk ash o chitibapishi ik hlampko yvmmak o Klaist vlhtobvt illi tok a ai okpuloka chi cho?

12. Yohmi ka hvsh itibapishi vhleha ha yakohmiechit hvsh im ashvchi cha, nan isht il akostininchi ik hlampko yash hvsh hotopali kv, Klaist ak o hvsh im ashvchi hoke.

13. Yvmohmi ka ilhpak vt itibapishi li ha ibetvblichichokma, itibapishi li hash ak ibetvblecho ka chi kv, yakni vt talaia moma ka nipi nana kia vpa la he keyu hoke.

## CHAPTA IX.

Vbanumpa isht vta yvt nan isht il apelacha hi okvno im atahla he otvninchi, 1: 18 yohmi kia ilap vt kvna kia nana ka iwekechi tok keyu. 21 Okchayvt il anta ilvppvt nan iti timiya pvlhki ho chohmi.

1. APOSTEL sia keyu ho? yuka keyu sia keyu ho? pin Chitokaka Chisvs Klaist a pisa li tuk keyu ho? Chitokaka hvsh ibai achvfa ka yvmmt na hvchi atahli li tuk mak keyu?

2. Inla yokvno im apostel sia keyu hok mak heto, hvchishno yokvno hvchim vbanumpeshi sia mvhlshke: Chitokaka hvsh ibai achvfa kak osh vbanumpeshi si vlhtoka hatuk a isht ahlichichia hoke.

3. Kvna hosh ik yimmot si a ponaklo tuk yvmma im afalaminchi li ka ilvppak oke;

4. Impa, micha nan ishko ita tuklo kv isht a pim vlhpiesa keyu ho?

5. Ohoyo pin tek a ilaelit aya kv, apostel inla vhleha, mikmt Chitokaka itibapishi vhleha, micha Sefas aiena ka chohmit pim ohoyo, pin tek a ilaelit il aya hi vt pim vlhpiesa keyu ho?

6. Yohmikmt Banabas ita tuklo li kak bano hosh ke toksvlo ka hi vt pim vlhpiesa keyu ho?

7. Kvta hosh kaniohmi hoh kia itotinowa kv ilap inli hosh nan i kvnia ho? kvta hosh pakrpi a hollokchi ya ikbi tuk vt, yvmma nan ai vni ka ai vpa keyu ho? keyukma



kvta hosh nan vlhpoba apistikeli kv̄t anonti nan vlhpoba ya ī pishukchi yā ik ishko ka hinla?

8. Hatak ō chohmit ilvppa puta ka achi li ho? vba nan vlhpisa yak kia yvmmak inli hō achi ak inli keyu ho?

9. Wak toksvli yvmmt na nihechi ka, Itakha yā chik takcho kashke, achi hosh Moses ī nan vlhpisa yā holisso hoke. Chitokaka yvt wak toksvli yā nan im atahli ho?

10. Yohmi ka pishno ak illa puyulla hatuk mak ō achi tok o? pishno puyulla mvhli hatuk mak ō ilvppvt holisso hatuk: yohmi ka kvna hosh yakni patvffi kv̄t, nawaya pisa he ahni hosh yakni patvffashke; mikma nan isht ilai yukpa pisa he ahni hosh kvna kia nanihechi kv̄t, na pisa he ahni tuk ak ō ibai isha hi oke.

11. Nana kv̄t shilombish imma kō e hvchim a hokchi hatuk okma, nana kv̄t haknip ahalaiia imma e hvchim ai vma chī ka, nana kv̄t a fehna ho?

12. Inla yvt ilvppa hvch ibai isha hi vt vlhpesa hokma, pishno yokak heto isht a pim vlhpiesa keyu ho? yohmi kia nana vlhpesa ahnit ilvppak ash ō isht kil il apelacho hatuk: amba Klaist im vbanumpa hā kil ataklammo ka chī kv̄t, nana moma ka ik yvmohmī il ahni hoke.

13. Kvna kia nana kv̄t holitopa imma kak ō isht vtta kv̄t, yvmmt nana kv̄t tempel ā aī immi hak ō ai vpa; mikma kvna hosh alta yā nan isht ai vtta kv̄t, yvmmt alta yā nan ai ibai ishi ka hvch ik ithano cho?

14. Yvmmak inli hō chohmit kvna hosh vbanumpa isht anumpuli kv̄t, yvmmt vbanumpa hā ai isht il apelacha hi ō, Chitokaka yvt apesa tok.

15. Yohmi kia ilvppa puta kash achvfona kia isht il apelachi li tuk keyu: yohmi mvt nana kv̄t vm ai yvmohma chī kv̄t ilvppa puta kash holissohonchi li tuk keyu: kvna kia nan isht il a holitopa li yā ik ahobalecho ka he atuk ā, illi kak osh achukma kv̄t yvma vm ī shahlistke.

16. Vbanumpa isht anumpohonli li hoh kia, nan isht il aholitopa la hi vt ik sv̄m iksho kamohmishke: nana kv̄t ai vlhpiesa mak osh si onvtuyula hoka; ahli, vbanumpa hā isht anumpohonli li keyukmvt, nan vm a palvmmi hoke.



17. Ahni li hok mak osh ilvppa yvmohmi li hokmvt, nan vlhtoba kia ieshi li hoke; amba ak ahno hok mak osh ilvppa yvmihchi li hoh kia, vbanumpa isht ai vta hi okvto si vlhtokowa hatuk oke.

18. Yohmi ka nanta hosh nan isht vm vlhtoba yo? ahli, vbanumpa ho isht anumpohonli li kv̄t, Klaist im vbanumpa hash nan ak ai illecho ka chi hatuk; yokmi hokv̄t vbanumpa isht vm ai vlhpiesa hatuk a ak vlhpesacho ka hi o keyushke.

19. Achvfona kia i yuka sia keyu, yohmi kia i shahlichit asitvbi la chi kv̄t, vno ak inli hosh moma ka il im i yuka-hanchi li hoke.

20. Yohmi hokv̄t Chu okla ha asitvbi la chi kv̄t, Chu okla hokvno Chu ak inli ho toba li hatuk; mihmvt kv̄na hosh nan vlhpisa ya ai i nutaka atuk a asitvbi la chi kv̄t, nan vlhpisa ai i nutaka hokvno nan vlhpisa ai i nutaka ak inli ho toba li hatuk;

21. Kv̄na hosh nan vlhpisa a keyu ka asitvbi la chi kv̄t, nan vlhpisa a keyu hokvno nan vlhpisa a keyu ak inli ho toba li hatuk; yohmi kia nan vlhpisa ik im ikshot Chihowa ik im antio ka hi o keyu, Klaist i nan vlhpisa yosh onvtu-yula hoka.

22. Ik hlampko ya asitvbi la chi kv̄t, ik hlampko hokvno ik hlampko ak inli ho toba li hatuk; yohmi kv̄t ik kanihmi kia kanimi ka okchalinchī la chi kv̄t, hatak moma ka nana moma ka in toba li hoke.

23. Yohmi kv̄t vbanumpa ha hvch ibai ishi la chi kv̄t, vbanumpa pulla kak o ilvppa yakohmi li hoke.

24. Kv̄na hosh ai itin timiya ai yihlepa chi hatuk okv̄t, moma kak osh yihlepa kia, nan isht a holitopa hi okvno achvfa bano hosh ishi chatuk a hvch ik ithano cho? Nan isht a holitopa hi ya hvsh isha chi kv̄t, yvmmak inli ho chohmit hvsh malelashke.

25. Yohmi ka hatak moma kv̄t i shahlichā he ahnit ile lushummi hokvto, yvmmv̄t nana moma ka il ai oktampli hoke. Yohmi kv̄t iachuka okpula hi o isha chi kv̄t, okla ilvppak o yakohmi hoke: pishno yokvto nan okpula he keyu kak oke.

26. Yvmohmi hoka ik im ai ono keyut, yakohmit malihinli lishke: kvna hosh mahli hō ihisso hō chohmi keyut, itihimbi lishke.

27. Yohmi kv̄t sa haknip imaiyachi li, yohmi mvt yukahanchi lishke: yvmmak keyukmvt ik kaniohmi kia inla ya vbanumpa isht im anumpohonli li haya tuk vt, vno ak inli kak osh ak ai ahlo ka hinla hoke.

CHAPTA X.

Chu okla nan isht im v̄lhpisa holitopa, 1. 7 Chu okla nan isht im apalv̄mi tok a nan isht il ithana he tuk. 21 Chitokaka im ai impa ya Setan o im ai impa kiloh ikbo kashke. 24 Il itibapishi im anukfila ha il itim ahnicha he tok.

1. YAKOHMI ka itibapishi li v̄hleha ma! pin tikba v̄hleha hvt kaniohmit moma kv̄t hoshonti ha ai i nutakvt ayvt, anonti momvt okh̄vta hō a hlopulli tok a hv̄ch ik itha-  
no ka hi a, hv̄chim ai ahni li keyushke.

2. Yohmi ka Moses a im antia ch̄i kv̄t hoshonti, micha okh̄vta ita tuklo kash o isht a baptismo tok.

3. Mihma il impa shilombish imma a miha chv̄fa hō momvt vpa tok.

4. Mihmvt nan ishko shilombish imma a miha chv̄fa hō momvt ishko tok. Tv̄li chito shilombish imma yvmmak ash okla ai ishko tok a yvmmak ash ot iakaiya tok oka; yohmi ma Tv̄li chito yvm̄mvt Klaist mak atok oke.

5. Yohmi kia yv̄mma kashampa laua ka Chihowa yvt isht ik i ahno fehna tok; illit yakni haiaka ya okla a fimimpa tok oka.

6. Yohmi ka nana yakohmi kv̄t nan isht a pim v̄lv̄v̄cha hi atuk; yvmohmi hokvt okla nan anushkunna tok ak inli hō chokmit nan ik v̄lhpeso puta ka kil anushkunno ka he atuk oke.

7. Okla hvt binohmayvt impvt, nan ishkot wakaya cha, a hihlv̄chi tok, achi kv̄t holisso hoka; kanima kv̄t yohmi hatok a chohmit nan holbvt toba aiokpv̄chi hv̄chia keyu kashke.

8. Mihmvt kanimi kv̄t itinlumaka tuk osh, nitak achvfa ka tahlepa sipokni pokoli tuklo akocha tuchinv̄t ak-akoha tok vhleha h̄a chohmit kil itinlumako kashke.

9. Mihmvt kanimi kv̄t Klaist imomaka pisa tuk osh, sinti o isht ai illi tok vhleha h̄a chohmit Klaist a imomaka ke peso kashke.

10. Mihmvt kanimi kv̄t ik im vlhpesot na mihachi tuk osh, nan okpv̄ni o isht ai okpuloka tok vhleha h̄a chohmit, na hvch ik mihacho kaskke.

11. Yohmi ka isht a pim vl̄bvcha hi a ilvppa puyuta kv̄t yvm̄mak ash o ai i yvmohmi tok: yohmi tuk osh yvm̄mak atok vt isht a pim achukma chi mak o holisso ma, yakni ont ai vhli hv̄t pishno ak o pim vl̄vshke.

12. Yvmohmi hoka kv̄na hosh, Hikia li, ahni kv̄t, mihi yosh ik itulo ka chi kv̄t ahah! ahnashke.

13. Nana imomaka pisa nana hosh hv̄chi onvtula he keyu; amba hatak moma ka ai onvtuyula chatuk chohimi kv̄t yvm̄mak oke; yohmi kia Chihowa yvt ai ahli, yvm̄mvt nan hv̄sh a lauecha he ont ia hokv̄no imomaka hv̄chi pisa hi a ahna he keyu hoke; amba yvm̄mak ash hv̄sh a lauecha chi ka nana imomaka pisa yvt hv̄chi ontuyulakma, a hlakofa he ataya ya hv̄chim ikba he ak inli hoke.

14. Yvmohmi hoka a kana a holitopa vhleha ma! na holbv̄t toba ai okpv̄chi hv̄sh i filv̄mmashke.

15. Hatak hopoyuksa yo hv̄chi chohmichit anumpuli lishke; nana ho achi li ka anukfillit hv̄sh akostininchashke.

16. Isht ishko holitopa mihi yo Chihowa isht il aiokpv̄chi kv̄t, yvm̄mvt Klaist im issish a isht itibai ishi keyu ho? Pvska e boshullichei ka, yvm̄mvt Klaist haknip a isht itibai ishi keyu ho?

17. Pishno vt pi laua kia, pvska achvfa, anonti haknip achvfa pia hoke; pvska achvfa yvm̄ma momvt iloh itibai ishi hokvt.

18. Israel okla haknip imma hokv̄no ho pesa; kv̄na hosh v̄ba nan isht aiokpv̄chi nipi yo ai v̄pa kv̄t, yvm̄mvt alta ya itibai ishi keyu ho?

19. Yohmi ka nanta ho achi li ho? na holbv̄t toba



yummvt nana hoke; mikmvt na holbvt toba nana hō isht aiokpvcha ehi hō imma ka yummvt nana hoke, achi li hō? keyú.

20. Amba nana hō Chentail okla hvt vba isht aiokpvchi kvt, nan isht a hullo okpulo yak o isht aiokpvchi kvt, Chihowa yak okvno keyu, achi li hoke: yohmi hokvt nan isht a hullo okpulo ya hvsh ibai isha hi o, hvchim ahni li keyushke.

21. Chitokaka im isht ishko, mikmvt nan isht ahullo okpulo im isht ishko it aieninchit hvsh ai ishka he keyushke: mikmvt Chitokaka im ai-impā, mikmvt nan-isht ahullo okpulo vhleha im ai-impā it aieninchit hvsh ibai achvfa he keyushke.

22. Chitokaka ya il anukhobelvchi na pi nuktvhla hinla hō? yvmma hlampko kvt il i shahli hō?

23. Nana moma kvt isht vm ai vlhpiesa, yohmi kia nana moma kak osh isht achukma he keyu; nan moma kvt isht vm ai vlhpiesa, yohmi kia nana moma kak osh achukmalechi keyu hoke.

24. Hatak kvna kia ilap nan isht im ai vlhpiesa he ak bano hō ik hoyo kashke; amba hatak moma kvt inla nan isht im ai vlhpiesa he yak ashke.

25. Nipi a chumpa ya nana hosh a kvnia tuk a, yvmma nan isht il akostininchi pulla kak o nana ik a ponaklot, hvsh pashke.

26. Yakni moma, micha awaya moma kvt Chitokaka immi hoke.

27. Kanimi kvt na yimmi keyu hosh ont hvsh ibai impa he hvchim ahni hokma, ia li a hvsh ahni hokmvt; nana hosh hvchin tikba ya talaiakma nan isht il akostininchi pulla kak o nana ik a ponaklot, hvsh pashke.

28. Yohmi kia kvna hosh, Na holbvt toba isht aiokpvcha hi o ilvppa im issa tok a hvchim achikma, na hvchim anoli tuk yvmmak pulla, mikmvt nan isht il akostininchi aiena pulla kak o hvshpa ná; yakni micha ai immi moma aiena kvt Chitokaka immi hoke.

29. Nan isht il akostininchi achi li ka, chimmi ak o keyu,

amba yummak ash oke; nan isht vm ai vlhpisa hosh yvmihchi li ka, nanta katiohmi hō inla nan isht il akostininchi hosh si onochi hō?

30. Chihowa nan isht i kana pulla hō ibai ishi li hokmvt, yummak oka yak oke isht ahni li ka, nanta katiohmi hō nan ik vlhpeso yō isht a si anumpa cho?

31. Yvmohmi hoka hvsh impa, keyukmvt na hvsh ishko, keyukmvt nana hō hvsh yvmihchi hokmvt, Chihowa isht a holitopa chī hō, mominchit hvsh yvmohmashke.

32. Achvfona kia Chu ak okmá, keyukmvt Chentail ak okmá, keyukmvt Chihowa in chvch ak okmá, nana kia hvch ik ibetvblichō kashke.

33. Hatak moma ka nana moma ka yukpali kv̄t, vno nan isht vm ai vlhpiesa hi ō hoyo li keyu; amba lawa yvm̄vt okchaya chī ka, isht im ai vlhpiesa hi ō hoyo li ka hvsh chiyuhmashke.

## CHAPTA XI.

Chihowa aiokpahanchi a nana kv̄t ik vlhpeso, micha Chitokaka im opiaka impa ma ik ahobalo aiena ka im alv̄m̄mi, 1. 23 Chitokaka im opiaka impa vlhpisa vmon̄vt isht a minti tok a im anoli; mihm̄vt kaniohmit okla holitobla hi tok a im otr̄ninchi.

1. UNO vt Klaist a iakaiya sia akinli hō chohmit, siakaiya hvchia hashke.

2. Yvmohmi ka itibapishi li v̄hleha ma! nana moma isht h̄vs sv̄thaiyana, mikm̄vt nan vlhpisa holitopa moyuma ka hvch ich̄ima li tuk a hvsh holitobli hoka, hvchi ahn̄inchi lishke.

3. Yohmi ka hatak moma i noshkoboka yvt Klaist ak okma; anonti ohoyo hā i noshkoboka yvt hatak ak oke; mikma Klaist i noshkoboka yvt Chihowa yak oka, hvsh ithana he ak ō, hvchim ahni lishke.

4. Hatak moma kv̄t anumpa ilbv̄sha anumpuli, keyukmvt Shilombish ō anukfoyuk̄vt anumpuli kv̄t, noshkobo h̄vt im ō h̄lipia hokm̄vt, ilap noshkobo hā hofahyali hoke.

5. Amba ohoyo moma kv̄t noshkobo ō h̄lipia keyu hosh,



anumpa ilbvsha anumpuli, keyukmvt Shilombish o anukfo-yukvt anumpuli hokmvt, noshkobo yash o hofahyali hoke; yvmmak okvt noshkobo i shafa yak inli ho chiyuhmi hoka.

6. Ohoyo hvt noshkobo ompoholmo keyukmvt, pashi ak kia vlmashke; yohmi kia pashi vlmo, keyukmvt shafa kak okmá, nana ka ohoyo hvt isht a hofahya hinla hokma, noshkobo hvt ompoholmashike.

7. Chihowa ya a hoyulba na isht a holitopa hoka, hatak vt noshkobo ha nan o hlipela he vlhpesa keyu mvhlishe: amba hatak a isht im a holitopa yokvto ohoyo ak oke.

8. Hatak vt ohoyo ak o a toba tok keyu, amba ohoyo ak osh hatak ak atok oka.

9. Mikmvt hatak vt ohoyo ak atuk pulla mak o toba tok keyu, amba ohoyo ak osh hatak ak atok oke.

10. Yvmohmi kak o ohoyo hvt enchil vbleha ak pulla kak oka, noshkobo hvt ompoholma he vlhpesa hoke.

11. Yohmi kia ohoyo hvt iksho ka hatak vt anta he keyu, mikma hatak vt anta he keyu, mikma hatak vt iksho ka ohoyo hvt anta he keyu, Chitokaka yvt im ahni hoke.

12. Ohoyo hvt hatak ak o a toba yatuk o, yvmmak inli ho chohmit hatak vt ohoyo pulla kak o atoba hoke; yohmi ka nana puta kvv Chihowa ak o atoba hoke.

13. Hvchishno ak inli hosh anukfillit ho pesá; ohoyo hvt noshkobo ompoholmo keyu hosh Chihowa im ilbvshvt anumpuli yvmvvt vlhpesa ho?

14. Hatak vt pashi vt falaia hokmvt, ishit hofahya ka nan isht anukfilli kak oh kia nan hvchi ithvnanchi keyu ho?

15. Amba ohoyo hvt pashi vt i falaia hokmvt, isht im a holitopa hoke; ilap pashi vt noshkobo isht ompoholma hi o ishi tok oka.

16. Yohmi kia kvna hosh a sanali kak o bvna ahoba kia, pishno yukvto yvma chohmi kvv ik pim iksho chatuk; mikmvt Chihowa in hvch a hiohli kvv yvma chohmi kvv ik im iksho chatuk oke.

17. Yohmi ka achukma i shahli kak o keyu, amba okpulo i shahla chi hosh mintit hvsh itvnaha kak o, ak hvchim ahnincho ilvppak osh hvchim anoli lishke.



18. Ubanumpuli iksa yosh ant hvsh ai itvnaha kvt, nana vmonna ka ita kvshkovt hvsh maya ka haklo lishke: yohmi kvt sai yimmi chohmishke.

19. Yohmi ka hvch ik itibachvfo kak o pulla chi, yohmik mak o kvna hosh ai ahli hok mak osh hvch itin takla ya otaiyana hi oke.

20. Yohmi ka a miha chvfa ho ant hvsh ai itvnaha, ilvp-pak osh Chitokaka im opiaka impa ya vpa ho keyu hoke.

21. Hvsh impakmvt, hvsh moma kvt hvchim opiaka impa yatuk kak illa ho tikba hvsh ishishke: yohmi hatuk o achvfa kvt hohchvfohma, anonti inla yato nan ishkot haksishke.

22. Yakeh! ai impa he, mikmvt ai ishka he aiena chuka yvt ik hvchim iksho ho? keyukmvt Chihowa in chvch hvsh shitlema cha, anonti kvna hosh nana kvt ik im iksho ke tuk yummak ash kia hvsh hofahyala chi hosh hvsh yohmi ho? Nanta ho hvchim achi la chi ho? ilvppak ash o isht hvchi ahninchil la chi ho? isht hvchi ahninchil li keyushke.

23. Chitokaka ya im ishi li tuk mihi yo hvch ihima li; yohmi ka Chitokaka Chisvs vt tunvp ibbak fohka chi ninak yummak inli mvt pvska ya ishi tok.

24. Mihmvt yummak ash ot vba pit isht aiokpvchi cha, pvska yash boshulliehi mvt, Ieshi cha, ho vpa; ilvppvt sa haknip osh hvchi boshulli hoke: hvsv svthana chi kvt ilvppak o hvsh yvmihchashe, achi tok.

25. Yummak ash inli ho chohmichit opiaka impa ishi hayosh, isht ishko ash kia yummak ash ot ishi mvt, Ilvppvt nan vlpisa himona vm issish o isht ai ahli toba hoke; ilvppak o hvsh yvmihchi cha, yummak ash hvsh ishko aiyyukakmvt, hvsv svthahanashke.

26. Pvska ilvppa hvsh pa aiyyuka, mikmvt isht ishko ilvppa hvsh ai ishko aiyyuka aiena kvt, Chitokaka illi tok a hvsh otvnihinchi na yummak atuk vt vla hayashke.

27. Yvmohmi ka kvna hosh yohma he ai vlpiesa keyu hosh, pvska ilvppak ash vpa chi, mikmvt Chitokaka im isht ishko ilvppak ash ai ishka chi aiena hokmvt, mihi yosh Chitokaka haknip, micha im issish ita tuklo ka ik holitoblott nan isht i palvmmi mak a hi oke.

28. Yohmi ka hatak okvt anukfillit ik ile pisá: yvmohmi cha mihi yosh pvska yash ik pá, mikmvt isht ishko yash ik ai ishkó.

29. Kvna hosh ai vlhpiesa keyut yvmmak ash vpa, micha ishko aiena kv Chitokaka haknip ash ik akostinincho hokvt, mihi yosh ilap nan isht im vlhpisa hi o yvmmak ash vpa, micha ishko aiena hoke.

30. Ilvppa yakohmi kak o ik sitopo, micha abeka aiena kv lauá hosh hvchim ai asha; mihma lauá kv nusi hoke.

31. Pishno ak inli kv il il akostininchi hatuk okmvt, nan isht pim vlhpisa hi atuk keyu.

32. Yohmi ka nan isht pim vlhpisa kv, yakni ya ai itvpehvt ik pi palvmmo ka chi kv, isht pi achukma chi hosh Chitokaka ya il im aftma hoke.

33. Yomohmi hoka itibapishi li vhleha ma! hvsh impa chi hosh hvsh itvnahakmvt, it i hullot hvsh iti hoyashke.

34. Yvmohmi ka itvnahvt nan isht hvchim vlhpisa chi kv, kvna hosh hohchvfo hokvto, mihi yosh in chuka yak o ik ai impá. Nana inla ka yatuk okvno ona lik mak osh, apoksiachi la hi oke.

CHAPTA XII.

Shilombish na holhpela hokvto il ai yuka, 1; 7 yohmi kia moma kv nan isht ai yukpa he vlhpesa bano. 12 Haknip a ai ibachvfa yvt ai it im il aiyuka bano, yohmi kia ilap bika it im vlhpesak mvt, haknip ma im ai vlhpiesa chatuk; 29 yohmi hoka na pi hvlbena kv il aiyuka kia, isht il itapela he tok.

1. YUMOHMI ka itibapishi li vhleha ma! Shilombish imma ka hvch ik akostinincho ka hi a ak hvchim ahnoshke.

2. Chentail hvchia hv na hvsh anukfoyká hosh na holbvt toba ik anumpulo puta ilvppa hvsh im ohona kv hvsh ithaiyanvshke.

3. Yvmohmi ka hatak nana kia Chihowa imi Shilombish anukfoyká hosh anumpuli kv, Chisvs a na kallakshi yo hohchifa he keyu hoke: yohmikma hatak kvna kia Chisvs vt Chitokaka yoke, acha he keyu, amba Shilombish Holitopa yak osh anukfoyká hok mak ahinla ka hvch itvnanchi lishke.



4. Yohmi ka na hvlbina ilaiyuka kv̄t ai asha; yohmi kia Shilombish mihi ash inli hoke.

5. Mikma nan isht vt̄ta mvt̄ im ilaiyuka; yohmi kia Chitokaka yokv̄to mihi ash inli hoke.

6. Mikma na toksv̄li mvt̄ im ilaiyuka hoke; yohmi kia Chihowa mihi ash inli hosh ilv̄ppa moma ka hatak moma ka anukfokkichi hoke.

7. Yohmi ka Shilombish nan isht otv̄ni hō hatak moma kv̄t isht ai vl̄hpiesa hi osh habena hoke.

8. Shilombish pulla hō na hopoyuksa anumpa hā achv̄fa kv̄t anukfoyuka hoke; inla yato Shilombish yvm̄mak inli hō nan ithana anumpa hā anufoyuka hoke.

9. Inla mvt̄ Shilombish mihi ash inli pulla hō na yimmi hā ishi: mikma inla mvt̄ Shilombish mihi ash inli pulla hō na hlakofichi hvlbina ka ishi hoke.

10. Inla yvt̄ na fehna puta yvm̄ihcha hi vt̄ ishi; inla mvt̄ Shilombish anukfoyukv̄t nan ithv̄nancha hi vt̄ ishi; inla mvt̄ chukv̄sh im anukfila puta akostininchi yō ishi; inla mvt̄ anumpa ilaiyuka anumpula he vt̄ ishi; inla mvt̄ anumpa ilaiyuka toshola hi vt̄ ishi ka Shilombish pulla kak oke.

11. Shilombish achv̄fa mihi ash inli kak osh hatak moma ka kanimi hō im ai ahni aiyuka hosh na yakohmi puta kash im it a kv̄shkolit anukfokkichi hoke.

12. Haknip okv̄to achv̄fa, yohmi kia yvm̄ma ai immi hokv̄to in laua; mikma haknip achv̄fa yvm̄ma ai immi moma kv̄t laiyawa kia, haknip achv̄fa hoke; yohmi ka Klaist ak kia ilv̄ppak inli hō chohmi hoke.

13. Shilombish achv̄fa pulla hō momv̄t isht il a baptis-mot haknip achv̄fa e toba; Chu, keyukmvt̄ Chentail pia hokmá, yuka, keyukmvt̄ yuka keyu yō pia hokmá, nana tuk kia momv̄t Shilombish achv̄fa il ibai ishi yō e toba hatuk.

14. Haknip vt̄ ai immi im achv̄fa keyu, amba laua hoka.

15. Iyi yvt̄, Ūno v̄to ibbak sia keyu hokv̄t, haknip ai im-mi sia keyu; achi hokm̄v̄to, yohmi kia yvm̄mvt̄ haknip a ai immi keyu hō?

16. Mikma haksobish vt̄, Ūno v̄to nishkin sia keyu hokv̄t,



haknip ai immi sia keyu hoke; achi hokmvto, yohmi kia yvmmvt haknip a ai immi keyu hō?

17. Yohmikma haknip moma kv̄t nishkin okma, katima yak osh na haklo ya hinla hō? moma kak osh na haklo yokma, katima yak osh na huwa ya hinla hō?

18. Yohmi ka himonasi yokvno Chitokaka yvt yakohma hinla, ahni mak osh, ai immi hash achvfa aiyukali momin-chit haknip ash ai iba fohkichishke.

19. Yohmi ka moma kak osh ai immi achvfa hokmvno, katima yak osh haknip a hinla hō?

20. Yohmi ka himonasi yokvno ai immi yvt laua: yohmi kia haknip okvto achvfa hoke.

21. Yohmi ka nishkin vt ibbak a, Nana ka ak chī sv̄bn-noshke, im acha he keyu: keyukmv̄t anonti iyi yash o, Nana ka ak chī sv̄bnnoshke, noshkobo hv̄t im acha he keyu hoke.

22. Keyú, yvmma i shahli, haknip ai immi ilvppak ash osh ik hlampko fehna ahoba kia ai vlhpiesa hoke.

23. Yohmi ka haknip ai immi ilvppak ash kanima ka holitopa ik lauwo pim ahoba kia, ilvppak ash o holitopa i shahli fehna il ima hoke: mikmv̄t a pim alumaka imma hokvno i shahlichit e shemvchi hoke.

24. Isht a pi aiokli imma hokvno shema yvt isht im ai vlhpesa keyu hoke: yohmi ka Chihowa hv̄t haknip a iti fohkit apoksiachi mv̄t, kanimi kv̄t ik alauwo ke tuk ash holi-tobli kv̄t i shahlichit fehna hoke.

25. Yohmi na haknip ash ita kvshkoa iksho ka hi atok; amba ai it immi hash osh ahah! it im ahna he ak atok oke.

26. Yohmi ka haknip ai immi achvfa hatuk vt ilbvsha hokma, haknip ai immi moma kak osh ibai ilbvsha hoke: mihma ai immi achvfa kv̄t holitopa hokma, moma kv̄t ibai yukpa hoke.

27. Yohmi ka Klaist haknip o hvchia, micha yvmmak ash o ai immi ka a kashampa ai yuka hvchia hoke.

28. Yohmi ka Chihowa hv̄t kanimi ka atokolit chvch a hiohlichit; vmmona ka apostel, atukla ka Shilombish anuk-foyukv̄t anumpuli; atuchina ka vbanumpa isht ithvnanchi;

mikmvt na fehna puta yvmihchi, mikmvt na hlakofichi holhpela, nan apelvchi, chvch pehlich, anumpa ilaiyuka anumpuli puta kak oke.

29. Moma kak osh apostel o? keyukmvt moma kak osh Shilombish anukfoyukvt anumpuli yo? keyukmvt moma kak osh vbanumpa isht ithvnanchi yo? keyukmvt moma kak osh na fehna puta yvmihchi yo?

30. Moma kak osh na hlakofichi holhpela ha ishi ho? keyukmvt moma kak osh anumpa il ai yuka anumpuli ho? keyukmvt moma kak osh anumpa ilaiyuka tosholi yo?

31. Yohmi ka na holhpela puta achukma i shahli kak o ishi ka hvsh ahni fehnashke. Yohmi kia na fehna kv̄t i shahli ho hvchim anoli lishke.

### CHAPTA XIII.

Shilombish holhpela moma kv̄t nan i hullo kv̄t aiena keyu hokvto nan ik ahoba, 1; 4 nan i hullo im anukfila nan a kaniohmi.

1. **HATAK** im anumpa ilaiyuka puta, mikmvt enchil puta im anumpa ho isht anumpuli li hoh kia, nan i hullo yvt ik svm ikshokmvt, tvli lakna ohonla, keyukmvt tvli kvsahahanchi ak inli ho holba li hoke.

2. Yohmi ka Shilombish anukfoyukvt anumpuli na holhpela ka ieshi li, micha nan ik otano-ki tok moma ka akostinichi li, micha nan ithana moma ka ieshi li, yohmi cha na yimmi moma ma ieshi li, yohmi hokvt nv̄nih hochito puta ka kanv̄lich, la hinla kia, nan i hullo yvt ik svm iksho hokmvt, nana ho sia keyu hoke.

3. Yohmikmvt nana vm asha moma kash ilbvsha ya im iti yopelachi li, micha sa haknip mvt lua chi ho im issa li; yohmi kia nan i hullo yvt ik svm iksho hokmvt, nana ho isht vm ai achukma keyu hoke.

4. Nan i hullo yvt na hotopali ya i sv̄laha, micha nan i kana yoke; nan i hullo yvt nana potvm̄not i nukkilli keyu; nan i hullo yvt ilap inli ka isht ilauata keyu, ile chahvchi keyu.



5. Ilefehnuchi hosh inla ya hofahyali keyu, ilap immi yo hoyo keyu, nan ik kanihmo ka nokowa keyu; nan ik vlhpeso anukfilli keyu.

6. Nan ik vlhpeso isht ai yukpa keyu, amba nan ahli yo isht ai yukpa yoke.

7. Nana moma ka ompohomo, nana moma ka yimmi, nana moma kvt vlhpesa chi, ahani a yimmi, nana moma kvt ant ik sum ai yohmi, ahani.

8. Nan i hullo yokvto nitak nana ont ai iksho ka he keyu: amba Shilombish anukfoykvt anumpuli yokma, nana hatuk kia yvmmak okvto ont ai iksho ka hi oke; anumpa ilaiyuka ithaiyana yokma, nana tuk kia yvmmak okvto ont issa hi oke; nan ithana yokma, nana hatuk vt ont akshot kvnia hi oke.

9. Ik onancho hosh il ithaiyana hosh, anonti ik onancho hosh Shilombish anukfoykvt il anumpuli hoke.

10. Yohmi kia nana ont ai ahli yvmmt vla chi, yohmi hokmvno nana ik ono yvmmak atuk vt ont ai ikshot kvnia hi oke.

11. Ulla sa tomba mvt, vlla yo chohmit anumpuli li tok; vlla yo chohmit nana akostininchi li tok; vlla yo chohmit nana anukfilli li tok; yohmi tok kia hatak ont toba li mvt, vlla nana im akaniohmi yash kanchi li tok.

12. Himonasi yokvno ik onanchot a pisa yo hlopullechit e pisa: yohmi kia yvmmak fokak mak o nashuka bika il iti pihisa hi oke: himonasi yokvno ak onancho hosh ithana li; yohmi kia himmak o himonasi ya sethaiyana kak inli ho chohmit ithaiyana la hi oke.

13. Yohmi ka himonasi yokvno na yimmi, ai okchayvt bi lia pisa he ahni, nan i hullo, tuchina ilvppak ash osh takali hoke: yohmi kia ilvppak ash moma i shahli hokvto nan i hullo yak oke.

## CHAPTA XIV.

Shilombish anukfoykvt anumpuli ha ahninch; 4 yvmmak osh anumpa inla ithanvt anumpuli ka i shahli; 12 isht a hlampko



achukmvt i shaht ia chi ka ita tuklo ka a yrmihcha hinla ;  
34 chvch itvnahvt maya ka ohoyo hvt anumpula he keyu im  
vlhpisa.

1. NAN i hullo ya achunanchit iakaiyvt, ishi ka hvchi  
bvnashke : mikmvt Shilombish imma ka anukfoyuka chi ka  
hvchi bvnashke : yohmi kia Shilombish anukfoyukvt hvsh  
anumpula he ak osh ahni kvt hvsh i shahlichashke.

2. Kvna hosh anumpa inla yo anumpuli hokvto, hatak o  
im anumpuli keyu, amba Chihowa yak oke : kvna hosh im  
akostininchi keyu hoka ; yohmi kia Shilombish anukfoyuka  
hosh yvmmak ash ot nana luma hatok puta ka anumpuli hoke.

3. Amba Shilombish anukfoyukvt anumpuli hokvto,  
hlampkohonchi, mikmvt ai okchaya he ahna chi ka i mihaha,  
mikmvt hopohlahanli, aiena hosh hatak puta im anumpuli  
hoke.

4. Kvna hosh anumpa inla yo anumpuli hokvto, ilap illa  
isht achukmali hoke ; amba kvna hoshi Shilombish anukfoy-  
ukvt anumpuli hokvto, chvch a hlampkohonchi hoke.

5. Hvsh moma kvt anumpa ilaiyuka hvsh anumpula he  
ak o hvchim ahni li ; yohmi kia Shilombish anukfoyukvt  
hvsh anumpula he ak o hvchim ahni li kvt i shahlich i :  
kvna hosh anumpa ilaiyuka anumpuli ka, chvch vt achuk-  
mvt i shahlit hlampka chi ka, yvmmt tosholi keyukma, kv-  
na hosh Shilombish anukfoyukvt anumpuli kak osh holitopa  
kvt i shahli hoke.

6. Yohmi ka itibapishi li vhleha ma ! nana otvninchi, ke-  
yukmvt nana ithvnanchi, keyukmvt Shilombish anukfoyukvt  
anumpuli, keyukmvt nana avchi nana hosh anumpa ilaiyu-  
ka anumpuli la chi hosh hvchim ona li hokmvt, nanta ho  
isht hvchi yukpali la hinla ho ?

7. Yohmi ka nana kvt fiopa iksho hosh ohonla kvt, oskula  
hokma, keyukmvt hap okma, nana ka ai ola kak osh it im  
ilaiyuka keyukmvt, katiohmi kak osh oskula yokma, keyuk-  
mvt hap okma, nana ho ai ola kvt otaiyana hinla ho ?

8. Isht pufa yvt ola kvt ik haiako hokma, kvta hosh itiba  
chi kvt il atahla hinla cho ?

9. Yvmmak inli ho hvsh chiyuhmi kvt anumpa akostinin-

cha he kullo keyu hō hvsh anumpuli keyukma, katiohmi kak osh nana hosh anumpa tuk vt otvna chī hō? mahli ak o hvsh ai anumpuli ha chī hoka.

10. Anumpa ola ilaiyuka laua kvt yakni pakna ai asha, yvmohmi chatuk; yohmi kia achvfa kvt nana hō miha keyu kvt iksho hoke.

11. Yvmohmi ka anumpa ola ka yvmmak o miha ka ak akostininchokma, kvna hosh anumpuli yvmmak ash o im bulbaha sia mak a hi oke; mikma kvna hosh anumpuli yvmmak ash ot am bulbaha mak a hi oke.

12. Yvmmak inli hō chohmit Shilombish imma ka ahnit hvsh achilita hokvt, chvch a hvsh hlampkohoncha he yak osh hvsh anukfillashke.

13. Yvmohmi hoka anumpa inla yō kvna hosh isht anumpuli hokmvt, yvmmak ash toshola chī kvt vba ik asilhhā.

14. Anumpa inla yō vba isht anumpuli li hokma, sa chukvsh ak osh vba asilhha hoke: yohmi kia vm anukfila hokvto inla yā nan im vni keyu hoke.

15. Yohmi ka katiohmi kak a chī hō? chukvsh o vba isht anumpuli la he, micha vm anukfila hō vba isht anumpuli la he: mikmvt chukvsh o isht taloa la he, micha vm anukfila hō isht taloa la hi oke.

16. Yvmmak keyukma, Chihowa isht ish aiokpvchi kia, kvna kia nan ik ithano im ai o binili binili hatuk vt, nana hō ish achi ka akostininchi keyu kvt, katiohmi kak osh yvmmak ash osh yak oke ahnit, vba pit ish aiokpvchi ka, Amen acha hinla hō?

17. Ahli hosh yak oke vba pit ish aiokpvchi ho mvhli; yohmi kia inla yokvno hlampkohonchi keyu hoke.

18. Anumpa inla anumpuli li kvt, hvsh moma ka hvch i shahlichī li kvt, an Chihowa yā yak oke im ahni lishke.

19. Yohmi kia chvch itvnaha ka inla maya ka vm anumpa ola ka nana isht im avchi la chī kvt, vm anukfila anumpa akostininchi tahlapi anumpuli li kak osh, anumpa inla tahlepa sipokni pokoli anumpuli ka vm i shahlishke.

20. Itibapishi li vhleha ma! nana akostininchi kvt vlla chipunta yō hvch ik tobo kashke: yohmi kia nana ik ai vhl-

peso hokvno vll<sub>o</sub>si y<sub>o</sub> hvsh tobashke ; yohmi kia nana akostin<sub>i</sub>nchi hokvno hatak o hvsh tobashke.

21. Anumpa im inla, mikmvt itivlbi inla hatuk o okla ilvppa isht anumpohonli la chi : ilvppa moma yvmohmi hoh kia okla ik sa haponaklo ka chi, Chitokaka yvt achi hoke, achi kvt nan vllhpisa ya a holisso hoke.

22. Yohmi hoka anumpa inla anumpuli yvt na yimmi vhleha h<sub>a</sub> isht im atokowa keyu, amba kvna hosh yimmi keyu kak oke ; yohmi hoka Shilombish anukfoyuka kvt anumpuli kak o kvna hosh yimmi keyu yummak o achukmali keyu, amba kvna hosh yimmi kak oke.

23. Yvmohmi hoka chvch moma kvt miha chvfa h<sub>o</sub> ant ai itvnaha cha, momvt anumpa inla anumpuli aiyuka hokma, anonti nan ik ithano, mikmvt nan ik yimmo aiena kak kia ai vlakmvt, tasimbo y<sub>o</sub> hvchim acha hinla keyu ?

24. Amba moma kak osh Shilombish anukfoyukvt anumpuli hokma, anonti na yimmi keyu, keyukmvt nan ik ithano yosh vla hoh kia yimmit, momvt anumpuli ka ahli ahnit anukfohka, yummak ash ot moma kak o nan isht ai im vllhpisa hoke.

25. Yohmi ka yakohmi hosh chukvsh isht im anukfila anukaka yvt otaiyani yoke : yakohmi hok mak osh hlipia cha, yummak ash ot Chihowa ya aiokp<sub>o</sub>chishke, mikmvt Chihowa hvv hvch iba takla ho mvhli hatuk a anola hi oke.

26. Yohmi ka itibapishi vhleha ma ! nanta katiohmi h<sub>o</sub> ? ant hvsh itvnahakmvt, hvsh moma kvt ataloa yokmá, anumpa tosholi ak okmá, nana h<sub>o</sub> hvsh ishi aiyuka hosh ant hvsh itvnahvshke. Isht achukma hi o nana moma kvt yvmohmashke.

27. Hatak kvna hosh anumpa inla y<sub>o</sub> anumpuli hokma, tuklo, keyukmvt tuchina kvno ont ik aiyo, yohmik mak o it iakaiyashke ; mikma achvfa kak osh tosholi ashke.

28. Amba tosholi iksho hokmvno, ai itvnaha ya lumvt binilashke : yohmi cha Chihowa, ilapo ak inli ita tuklonchit im anumpulashke.

29. Shilombish anukfoyukvt anumpuli vhleha hvv tuklo,



tuchinakma, nana kv̄t anumpulikma, inla yokvto ahli ho? ahnit anukfillit pisashke.

30. I bilikasi binili yvmmak ash o nana kv̄t im otvni hokma, vmmona kash ot nuktanlv̄t binilashke.

31. Momv̄t ithana cha, anonti moma kv̄t isht im ai achukmv̄t isht i shahla chi ka, Shilombish anukfoykvt hv̄sh moma kv̄t it iakaiya hosh hv̄sh anumpula hinla hoke.

32. Shilombish anukfoykvt anumpuli v̄hleha im anuk-fila puyuta kv̄t Shilombish anukfoykvt anumpuli v̄hleha hash o i nutaka yoke.

33. Shakapv̄t nan iti ataklv̄ma he Chihowa hv̄t ahni keyu, amba v̄banumpa anukfohka ahli im ai itvnaha moma kak o chohmit iti nanaiya yak oke.

34. Ik̄sa itvnahv̄t maȳa ka hv̄chim ohoyo hv̄t lumv̄t binohmayashke; yvmmak okv̄t anumpula he im v̄lhpesa keyu hoka; amba im antia he ak osh im v̄lhpesa hoka, nan v̄lhpisa yv̄t yvmmak o achi ak inli hoke.

35. Yohmi ka nana ho itvna bv̄nna hokmv̄t, chuka ak inli kak o i hatak a ai im aponaklashke: ik̄sa itvnahv̄t maȳa ka ohoyo hosh anumpuli hokvto nan isht im a hofahya hoka.

36. Yakeh! Chihowa im anumpa hv̄t hv̄chishno ak o a kohchv̄t minti hatok o? keyukmv̄t hv̄chishno ak bano ho hv̄chim ona hatuk o?

37. Hatak kv̄na hosh ilap inli kv̄t Shilombish anukfoyukv̄t anumpuli yokma, keyukmv̄t Shilombish holhpela ka isht anukfoyuka ho mihi yosh im ahobakmv̄t, pit hv̄chi holissochi li tuk yvmmv̄t Chitokaka i nan v̄lhpisa mak atuk a akostininchit, ahli ahnashke.

38. Amba kv̄na hosh ik̄ akostinincho hokvto mihi yosh nan ik̄ akostinincho kv̄t imomashke.

39. Yvmohmi ka itibapishi li v̄hleha ma! Shilombish anukfoykvt anumpula he ishi ka bv̄nnv̄t hv̄sh achilitashke; mikmv̄t anumpa inla anumpuli ka hv̄ch ik̄ im alammo kashke.

40. Nana moma kv̄t ai v̄lhpiesa, micha ai itiakaiyv̄t anuktanla mak o yvmohmashke.

## CHAPTER XV.

Illit falamvt e tani pulla hi a, Klaist vt illit falamvt tani tok a isht anoli, 1: 21 Klaist vt illit falamvt tani tok a nana kv̄t isht a yvmohmi: 36 falamvt e tana he nana akaniohmi: 51 Klaist vt vlak ma, okchayvt anta tuk vt inlv̄t toba he.

1. YUMOHMI ka itibapishi v̄hleha ma! v̄banumpa yvmmak o hv̄chim anumpohonli li yv̄mma hv̄sh ishi tuk osh, anonti mihi yō anukfoykvt hv̄sh mahaya ka, yvmmak inli hō hv̄ch im anohonli lishke:

2. Yvmmak o hv̄chi ai okchaya, nana ka isht hv̄chim anumpuli li tuk a ithaiyanvt hv̄sh ieshi hokmvt, nana ka ik onancho keyut hv̄chi yimmi hatuk okmvt.

3, 4. Holisso Holitopa nana achi tok mak o nana pim ai ashv̄chika puta kak o Klaist vt kaniohmit isht ai illi; yohmi cha yvmmak ash ot hollopi tuk osh, anonti nitak ont atuchina ma Holisso Holitopa nana achi tok mak o yvmmak ash ot anonti tani tok, yvmmak o vno ak kia si anukfoykuka hatuk osh, mihi yō tikbanli hv̄chim anohonli li tuk oke.

5. Mihma yvmmak ash ot Sefas a i haiaka, yohmi mvt auah tuklo kash i haiaka tok.

6. Yohmi ha ya tuk osh himona achv̄fa yvmmak ash osh itibapishi tahlepa tahlapi ont ia ka i haiaka tok: yvmmak atok a akashampa laua kv̄t okchaya na ant himakv̄shke, yohmi kia kanimi kv̄to nusit akakoha tok.

7. Yohmi ha yō yvmmak ash ot Chemis a i haiaka tok; yohmi mvt apostel v̄hleha hash mominchit i haiaka tok.

8. Yohmi mvt moma ont ishtaiyopi ka ai v̄lhpiesa keyu hō chohmi, vno ak kia yvmmak ash ot a haiaka tok.

9. Apostel v̄hleha moma ik alauwo sia, yohmi kv̄t apostel hohchifa he si v̄lhpesa keyu, Chihowa in chv̄ch a ilbv̄shali li tok okvt.

10. Yohmi kia Chihowa nan isht i kana pulla hō kanima a hikia li kv̄t yvmmak o hikia sia mak oke; mikmvt yv̄mma nan isht i kana yvmmv̄t si anukfoykuka kv̄t ik ai ono ke tuk keyu hoke: yohmi hokvt toksv̄li hoyubli kv̄t yvmmak ash

moma ka i shahlichu li: yohmi kia vno ak keyu, amba Chihowa nan isht i kana mihi yosh a subai achvfa kak atuk oke.

11. Yvmohmi hoka vno yak okmá, keyukmvt yvmmak okmá, e nana hosh yvmihchit il anumpohonli ma, yvmohmit hvchi yimmi hatuk oke.

12. Yohmi ka Klaist yvmmv̄t illit falamvt tani tuk vt isht anumpa hokma, katiohmi hō hvsh kanimi kv̄t illit falamvt tana hi vt iksho, hvsh achi cho?

13. Yohmi ka illit falamvt tana hi vt iksho hatuk; yohmi hokma Klaist vt ik tano ki tok oke.

14. Yohmi ka Klaist vt ik tano ki tok; yohmi hokma vbanumpa isht il anumpuli ka isht ai achukma he keyu, mikma nan isht hvchi ai yimmi ka yvt isht ai achukma he keyu ak inli hoke.

15. Ahli, yohmi ka Chihowa isht atokowa ik ahlo il otvni hoke: Chihowa yvt Klaist a tanichi tok a isht il atokoli tok okvt: yvmmak ash ik tanicho ke tok, illi yvt falamvt tana he keyukma.

16. Illi yvt tana he keyu, yohmi hokma Klaist vt ik tano ki tok oke.

17. Yohmi ka Klaist vt ik tano kitok okma, na hvchim ai yimmi ka yvt ik ai ahlo; na hvchim ai ashvchi ka hvsh a hikia momvshke.

18. Yohmikma kvna hosh akakohvt Klaist a iba nusi tuk vhleha yvmmv̄t aiokpuloka mak oke.

19. Okchaya ilvppak bano kak osh Klaist a il ai okchaya chi il anukchieto hatuk okmvt, pilbvsha kv̄t hatak moma ka il i shahlishke.

20. Yohmi ka himak vno Klaist vt illit falamvt tani tok, micha kvna hosh nusi tuk vhleha yvmmak ash nan vni vmona mak o toba hoke.

21. Hatak puyulla hatuk mak o nan illi hv̄t aya tok, hatak pulla kak o illit falamvt tani vt a minti tok.

22. Alvm atok puyulla mak o momvt illi ka, yvmmak inli hō chohmit Klaist pulla atuk mak o momvt falamvt okchaya yo toba hi oke.



23. Yohmi kia hatak moma kvt ilap nan isht im ai vlhpiesa kak a hi oke : Klaist ak osh nan vni vmmona hoke : i himmak o Klaist immi hatuk vt, yummvt mintikma, tana hi oke.

24. Mikma ap ehlichika, nan vlhtoka, micha nan im ai ahli aiena ka ai akshochi ha yosh ap ehlichika ya yummak ash ot Iki Chihowa mak o ibbak fohka hi oke ; yohmik mak o ai vhlh hvt vla hi oke.

25. Yummak okvt mikot ahanta pullvt, in tenvp vhleha moma ka ilap iyi nuta ashachi ha ya hi oke.

26. Tenvp ishtaiyopi mak osh yummvt ont ik ai iksho ka chi kvt nan illi ak oke.

27. Nana moma ka yummak ash ot iyi nuta ya ashachi tok oke. Yohmi ka nana puta kvt yummak ash ai i nuta-kvshke, yummvt achi kia, nana moma ka yummak ash ai i nutakvchi tok ilap ak bano hosh keyu kvt otaiyanishke.

28. Yohmi ka nana moma kvt yummak ash o ai i nutakvt taha, yohmik mak o Ushi ilap ak kia nana moma ka ai i nutakvchi tok yummak ash o ai i nutaka he ; yohmi ho Chihowa ya moyuma kvt nana moma ka isht ai okpahanchit isht im antia hi oke.

29. Yummak a he keyukma ; illi tuk ak o vlhtoba hosh baptismo tuk, yummvto nanta ho katiohma hi o ? illi yvt tana he keyu kvmohmi hokma ; nanta katiohmi ho illi atuk pulla ka isht a baptismo hatuk o ?

30. Mikma nanta katiohmi ho hvshi kanvlli moma ka isht. a pi palvmmi ya il a hikia cho ?

31. Nan isht ilaiyukpa yumma hvchishno pulla hatuk mak o pin Chitokaka Klaist Chisvs isht im ai eshi li kak osh ai ahlichit anohonli li mvt, nitak moma ka sahanlishke.

32. Hatak o chohmit nampo a nukshopa puta ka Efesvs ak o ai itihimbi li tuk vt, illi yvt tani keyukma, nanta hosh isht vm ai achukma hinla ho ? onnaha ya hvv illa chi hokvt, impvt, nan ishkot keho mayá.

33. Hvch ik ile haksecho kashke : nan ik vlhpeso a chukulbi yokvto im anukfila achukma puta tuk a im okpuni yoke.

34. Yohma he ai vllhpiesa hoka oh okcha, micha na hvch ik ashvcho kashke; kanimi kv̄t Chihowa nan isht im ithaiyana ik im iksho hoka. Hvchi hofahya chī hō ilvppa hvchim anumpuli lishke.

35. Yohmi ka katiohmi hosh illi yvt tani hō? mikmvt haknip vt̄ katiohmi hō yvmmak ash ot isht kohcha hō? hatak kanimi kv̄t acha hi oka.

36. Im anukfilla iksho chia ma! nana ka ish hokchi tuk a illi yō keyukmvt, yvmmak ash ot okchaya yō keyu hoke.

37. Mikma nana ish hokchi kv̄t nan vpi yvmmak a hi o ish hokchi keyu, amba onush okmá, keyukmvt nihi inla yokmá, nana kia nihi ak bano hoke:

38. Yohmi ka Chihowa yvt yohmi ai ahni mak osh, nan vpi ya chī ka ima hoke; mikmvt nihi moma kv̄to ilap im vpi ya chī ka ima hoke.

39. Nipi moma kv̄t nipi mihi achvfa keyu hoke; yohmi ka hatak nipi vt̄ inlak ma, inla mvt nampoa nipi, inla mvt nvn̄i nipi, inla mvt hushi nipi yak oke.

40. Ūba imma na haknip ilaiyuka, aka imma na haknip ilaiyuka aiena kv̄t ai asha hoke: yohmi kia vba imma isht im a holitopa yokv̄to achvfa, mikma inla mvt aka imma nan isht im a holitopa yak oka.

41. Hvshi yvt nan isht im a holitopa yvt achvfa, inla mvt hvshi ninak aya nan isht im a holitopa, anonti inla mvt fochik puta isht im a holitopa yvt asha hoke; isht a holitopa hokv̄no fochik achvfa kv̄t fochik inla ya it im inla hoke.

42. Illit falamvt tani kv̄t yvmmak inli hō chiyuhma hi oke. Toshba hi osh hollohokchi tuk vt̄, ik toshbo ka hi osh taiyani hoke.

43. Ik holitopot hollohokchi tuk vt̄, holitopa hi osh taiyani hoke: ik hlampkot hollohokchi tuk vt̄, nan ai ahlahe mak osh taiyani hoke.

44. Ilhfiopak haknip hollohokchi tuk vt̄, shilombish imma haknip osh taiyani hoke. Ilhfiopak haknip, mikmvt shilombish imma haknip ita tuklo kv̄t ashvshke.

45. Yvmohmi kak o hatak vmmona Alvm vt̄ shilombish



okchaya yosh toba tok; Alvm ishtaiyopi kvto Shilombish okchalinechi yo toba tok, achi hosh holihiso hoke.

46. Yohmi kia shilombish imma kak osh vmmona tuk keyu, amba haknip imma kak atok oke: atuk o i himmak o shilombish imma kak atok oke.

47. Hatak vmmona kvt yakni yo a toba hatuk osh, yakni imma kak oke. Hatak atukla kvto vba minti Chitokaka ak oke.

48. Yakni ai immi atuk asli o, chohmit kvna hosh yakni ai immi hokvto yvmmak inli ho chohmi hoke: mikma vba ai immi hokvto, yvmmak ash inli ho chohmi hoke.

49. Yohmi ka yakni ai immi kash o holba ka iloh ieshi hatuk a, chohmit vba ai immi kash o holba ka iloh iesha he ak inli hoke.

50. Yohmi ka itibapishi li vhleha ma! nipi, micha issish ita tuklo kvto Chihowa im apehlichika yvt ai immi ha he vhpesa keyu; mikma nan toshba hi okvto nan ik toshbo ya ai immi ha he vhpesa aiena keyu hoke.

51, 52. Yakeb! nana a luma hatuk a hvch im anoli lishke; moma kak osh hvpi nusa chi keyu, amba ai ishtaiyopi isht pufa yvt nana olakma, yakosi itin takla, nishkin mochukli ai itin takla ho, moma kv inlv e toba hi oke: nana ola hv ohonla he, mikmak o illi atuk vt ik toshbo ka hi osh tana he, mikma inlv e toba hi oke.

53, 54. Na toshba he ilvppak ash osh nan toshba he keyu ho isht a foyuka pulla he, mikma nan illa he ilvppak ash osh nan illa he keyu ho isht a foyuka he: yvmohmi ha yok mak o, nan illi hash o ont imaiyachi na ik ai iksho ka hi oke; ahanchi hosh holisso tok vt yvmmak ash ot ont ai ghla hi oke.

55. Nan illi ma! katima yak o nan isht ish nvhli yo? ahollopi ma! katima yak o nan isht ish imaiyachi ho?

56. Nan illi i nan isht nvhli vt nana ashvchi ak oke; mikma nan ashvchi isht imi hlampko yvt nan vhpisa yak oke.

57. Yohmi kia hvpin Chitokaka Chisvs Klaist pulla hatuk mak o nan isht imaiyachi ya Chihowa yvt hv ima hoka, Chihowa ya yak oke; im ai ahni lishke.

58. Yvmohmi hoka itibapishi li a holitopa vhleha ma!



hush kullo cha ik huchi fitekachō kish, vltoba iksho ka hi osh Chitokaka hush in toksvli keyu kv̄t hush ithaiyana hokv̄t, Chitokaka im atoksvli yā lauachit hush toksahanlashke.

CHAPTA XVI.

Nan ik im iksho a kaniohmit apelacha he, mikmvt vbanumpa hv̄t i shaht holitopvt mahaya chi ka, nanasi isht apelacha he im anoli; 13 i kanvt nan i mihvt tabli mvt, isht aiyopichi kv̄t vbanumpa ha yakoke ahani tok.

1. YOHMI ka na yimmi ahli nan im itahobi imma hokvno, chuch Kaleshi a hiohli kak o nana im apesa li tok a, chohmit hush yumihechi ak inlashke.

2. Ona li ha yo nan itahobi kv̄t ik ai iksho ka chi ka, wek nitak vmonakma achufa hush aiyuka kv̄t, Chihowa hv̄t nan im ilayak a ataiyahli ka, it ilauechit ishit hush il im bohonlashke.

3. Atuk o ona likma, kvna ho vlhpesa hush ahni hokma, mihi yosh nana hush habenuchi tuk ash Chelusalem isht ona chi ka, holisso ha im atahli lish, pit yuhli lashke.

4. Yohmi kia ia li kak o vlhpesa hinla hokma, yummak ash ot si apihvt ia chi hoke.

5. Yohmi ka Masetonia yakni ya a hlopulli li ha yosh, hvchim ona la chi hoke, Masetonia yakni ya a hlopulli limak okvt.

6. Yohmikmvt hvch ibai anta la chi, ahli, hvshtula yak kia hvch ibai anta la chi chishke; yohmi ho anowa hopaki kanima yo ia la chi ka hvs si apelvcha hi oke.

7. Himonasi ya nowvt aya li hokvto, hvchi pisa la he keyu; amba Chitokaka yvt ik yohmi ahni hokma, ont hvch ibai anta li hopaka he keyu, ahni li hoke.

8. Yohmi kv̄t Efesus ak o anta li Pentekost ai onak mak a chi hoke.

9. Okhissa yvt chito, mikmvt vm ai ahla hi vt an tiwa, mikma a sanali vt laua hoke.

10. Yohmi ka Timohlivs vt ona hokmvt, nukshopa ikshot hvch iba takla anta chi ka hush pisashke: vno vt yummak inli chohmit, yummvt Chitokaka im atoksvli li ya toksahanli hoke.

11. Yvmohmi ka kvna kia ik shitelemo kashke: amba yvmmt ayvt vm vla chi ka, i kanvt hvsh apelvchashke: itibapishi li vhleha takla vla hi a hoyo li hoka.

12. Il itibapishi Apollos okvno iloh itibapishi vhleha ha ai itvpihvt hvchim ona he ak o ahni li fehna tuk; yohmi kia himonasi yokvno ona hi vt ik ahno kvmoimi tuk; yohmi kia ona he im ai vlhpiesa onakma, ona chi hoke.

13. Okhvt oh il apistikeli, ai yimmika ya kvllot ieshit hvsh hikiashke, hatak ahli il otvninchit, hvsh hlampkashke.

14. Nana hvsh a kaniohmi puta kvv nan it i hullo mak o ik ai yvmohmi.

15, 16. Stefanas in chuka chvfa, yvmmak osh Akaia ya nan ai vni vmmona yosh, na yimmi ahli vhleha ha apelvcha chi kvv okla il im issa tok; yohmi ka itibapishi li vhleha ma! yvmma chohmi, micha na piba toksvli, micha toksvlit hoyubli ayuka ka hvsh im antia chi ka, hvch it i kanvt hvchi atohno lishke.

17. Stefanas, micha Fatunatvs, mikmvt Akaikvs aiena kvv ai vla ka sai yukpvshke; nana ka hvch ik onancho ke tuk a okla onanchit atahli hoka;

18. Sa chukvsh, micha hvchishno aiena chukvsh a okla yukpali hatuk: yvmohmi hoka yvmma chohmi vhleha ha i kanvt hvsh ithaiyanashke.

19. Asia yakni hvch maya kvv pit hvchi aiokpvchishke. Akuila micha Plissilla ita tuklo kvv, ilap in hvch maya ka aiena kvv, Chitokaka ibai achvfa hvchia hoka pit hvchi aiokpvchi fehnvshke.

20. Itibapishi moma, kvv pit hvchi aiokpvchishke. Suk-sowa holitopa yo hvsh it aiokpvchashke.

21. Vno Pal nan isht aiokpvchi ka vno svbbak isht holis-sohonchi lishke.

22. Kvna hoh kia Chitokaka Chisvs Klaist a holitobli keyukmvt, mihi yosh Anahlema, Malanahla mak ashke.

23. Hvpin Chitokaka Chisvs Klaist nan isht i kana yosh hvchi anukfoyukashke.

24. Klaist Chisvs ibai achvfa hvchia ka nan isht i hullo li yvt mominchit hvchi anukfoyukashke. Amen.

HOLISSO ATUKLA PAL VT

CHUCH KOLINHILA

A HIKIA HO I HOLISSOCHI TOK.

CHAPTA I.

Pal vt ilap nan isht im apalvmi ka isht hopohohla kv̄t achi; mihmv̄t v̄banumpuli Kolinhl̄a ai asha ka nan isht hopohla tok ash inli hō isht hopohlahan li kv̄t Chihowa yā yak oke im ai ahni, 1; 15 nana hosh kaniohmi hō ik im v̄lo ki tok vt anoli; 23 i kana kak a tok.

1. CHIHOWA nan ai ahni atuk pulla mak o Chiv̄s Klaist im apostel Pal, micha il itibapishi Timohli ita tuklo kv̄t Chihowa in chvch, yvmmv̄t Kolinhl̄a a hikia, mikmv̄t na yimmi ahli moma yvmmv̄t Akaia moma ka ai asha ka aie-ninchit pit aiokpv̄chi kv̄t,

2. Piki Chihowa, micha Chisv̄s Klaist ita tuklo nan isht i kana, micha isht it i nanaiya ita tuklo kv̄t hv̄chi anukfoyuk-ashke, hv̄chim ahnishke.

3. Pin Chitokaka Chisv̄s Klaist Iki, Chihowa, nan i nuk-haklo fehna Iki, micha nan isht anuktanla moma in Chihowa yvt holitopashke.

4. Yvmmak osh nan isht il ai ilbv̄sha moma ka pi nukta-lahanli; yohmi hō pishno vt Chihowa hak o nan isht im anuktaiyala yā isht a pi nuktaiyala cha, kv̄na hoh kia ilbai-yasha hokma, e nuktalahanla hinlv̄shke.

5. Klaist pulla hatuk mak o nan isht ilbv̄sha yvt pim a laua; yohmi hokv̄t Klaist pulla hatuk mak o nan isht a pi nuktaiyala yak kia lauv̄shke.

6. Yohmi ka nan isht a pilbaiyasha hoh kia, hv̄chishno



ano nan isht hvchim ahopohla, micha nan isht hvchim ai okchaya chi kvt, nan ilbvsha yvmmak o pishno vt isht a pilbvsha tuk ak inli chohmi ka isht a hvch ilbvsha hokmak osh nan isht hvchim ai ahli hoke; anonti pishno vt isht a pi nuktaiyala hok mak heno, yvmmt nan isht a hvchim a hopohla, micha hvchim ai okchaya mak oke.

7. Yohmi ka nan ilbvsha puta ka hvsh ibai ishi, yohmi hatuk okvt na hopohla ma hvsh ibai isha chi ka il ithaiyana kak osh nan isht e hvchim anukfilli kvt kvlo fehnvshke.

8. Iloh itibapishi vhleha ma! nan isht a pilbvsha yvmmt Asia yakni ya a pi onvtula; yohmi mvt pim isht hlampko hash imaiyachi na na pi weki fehna mvt; okchaya he yak kia kil ahno ke tuk a, hvch ik akostinincho ka hi a e hvchim ahni keyu hoka:

9. Yohmi ka illa he anumpa il il ai eshi, yohmi kvt pishno ak inli ka il anukchieta he keyu; amba illi tanichi Chihowa yak a hetuk oke.

10. Yvmmak osh nan illi chinto fehna kash a pi hlakofichi tuk osh, a pi hlakofichi moma: yohmi kvt yvmmak ash osh pi a hlakofihinja chi ka yvmmak o il anukchieto hoke.

11. Hatak laua pulla kak o nan isht i kana pi onvtuyula tuk a, hvchishno ak kia itapelvt anumpa ilbvsha isht hvsh pi anumpohonli; yohmi ho pishno pulla kak o yak oke Chihowa ya im ahni kvt laua hi oke.

12. Isht il il akostininchi isht im ai atokowa kvt haknip imma isht hopoyuksa keyu, amba Chihowa nan isht i kana pulla hatuk mak o nan anukfila apissali achvfa, micha Chihowa anukfoyuka ai ahli hosh yakni paknaka il ai ahanta hatuk: yohmi hokvt hvchishno yak heno i shahlichit il a hvchi yvmohmi, ilvppak osh nan isht il il ai yukpa hoke.

13. Nana ka hvsh it im anumpuli; micha ahli hvsh akostininchi fehna tuk yvmmak keyukma nana inla yo e hvchi holissochi keyu hoke; yohmi hoka ahli ahnit, akostininchit mahayvt ont ai vli ka hvsh ona hi a hvchim ai ahni lishke:

14. Chitokaka Chisvs i nitak vt vlakma, nan isht pim ilaiyukpa hvchia ha chi kvt, yvmmak inli ho chohmit nan isht

hvehim ilaiyukpa pia ha chi ka, hvsh kanimi kv̄t ahli hvsh pi akostininchi ak inli tuk oke.

15, 16. Yohmi ka yakohmi tok ak o na yimmi hosh atukla ma nan isht ilaiyukpa ka hvsh isha hi a tikba hvchim ona la he ahnit, anonti ont ivt, Masetonia yakni ona li tuk mvt, anonti Masetonia yakni yash o akohchvt atuklant hvchim aya li hok mak osh, Chutia imma aya la chikma, hvs si apelvcha hi a vm anukfila tuk oke.

17. Yvmohmi kv̄t yakohmit vm anukfila mvt, vm anukfila hv̄t fitekvchi hosh yvmihchi li tuk o? yvmmak keyukmvt vno vto yau, yau, mikmvt keyu, keyu, achi la hi osh nana ka ahni li kv̄t, haknip nan ai ahni ho isht anukfilli li tuk o?

18. Yohmi ka Chihowa hv̄t ai ahli yatuk o, pim anumpa nan isht e hvchim achi tuk a yau yatuk osh anonti keyu, yatuk keyushke.

19. Uno, mikmvt Silfanvs, micha Timohlivs aiena pulla kak o, Chihowa Ushi Chisvs Klaist, yvmmv̄t hvchim anuhumpa kv̄t, yau yatuk osh, anonti keyu yatuk keyushke, amba yvmmak okv̄t yau yatuk oke.

20. Yvmmak atuk pulla mak o Chihowa hv̄t nana im ihisa tuk moma kv̄t yau okma, anonti yvmmak atuk mak o Amen oke, yohmi kak o pishno ma Chihowa nan isht im a holitopa yoke.

21. Yvmohmi ka Klaist a iloh ibai achvfa chi ka, hvpi hlampkohonchi cha, na pi a hvmmi kv̄t, yvmmv̄t Chihowa ak oke.

22. Mihmvt ilap immi pia ha chi ka, yvmmak ash osh pi ai ahlich̄i mvt, ai okchayvt bilia e pisa he pim ai ahlich̄i kv̄t, Shilombish a pi anukfohkechi tuk oke.

23. Yvmohmi hoka hvchi kanvt na hvchim anukfilli la chi kak osh, Kolinbla ya ak ono kisha hatuk a Chihowa hv̄t vmi shilombish a atokowvt vm ithana ya chi ka hohoyo lishke.

24. Na hvchi yimmi ka il i shahli hatuk keyu hoka, amba na hvchim ai yukpa apelvchi pia hoke; na yimmi pulla hatuk mak osh hlampkot hvsh hikia hoke.

## CHAPTER II.

Nana hosh kaniohmi kak o ik im ono ki tuk vt anoli, 1; 6 Chvch a a kohcha tok a i nukhanklot i kvshofa hi a im ahni; 10 ilap ak kia i kvshofi tuk a chohmachi: 15 kanima yo vbanumpa isht anum-pohonli ka Chihowa yvt im ai okpanchi.

1. YOHMI ka vm anukfila kvv na nukhaklo hosh, atuk-la ma ak hvchim ono ka chi, ilvppak o vno ak inli kvv vm anukfila hatuk oke.

2. Hvchi nukhaklochi li, yohmi hokma kvta hosh na sai yukpala hinla ho? amba vno yak atuk mak o kvna hosh nukhaklo tuk yvmmak inli kak a hinla keyu?

3. Yohmi ka ona likmvt, kvna ho ibai yukpa la hetuk, yvmmak ash ot nana a kaniohmi ka isht a nukhaklo la hinla kak osh, ilvppvt mihi ash inli ka isht hvchi holissochi li hatuk oke: hvsh moma nan isht hvchim ai-yukpa yvt vno a nan isht vm il aiyukpa ak inli hoke, ai ahnit hvsh moma ka hvchi yimmi lishke.

4. Na nukhaklo fehna, chukvsh ilbaiyvshvt nishkin okchi mvt laua aiena hosh isht hvchi holissochi li hatuk; hvchi nukhakla he yak atuk keyu, amba nan isht i hullo yvmma isht hvchi hoyullo li fehna hatuk a hvsh ithaiyana chi kak atuk oke.

5. Yohmi kia kvna hosh na nukhaklochi tuk okmvt, vno ak illa ho si anukhaklochi tuk keyu: hvsh moma ka ak hvchi kvllo ka chi kak osh ilvppa hvchim achi lishke.

6. Hatak yvmma chohmi kvno nan vlhpisa ilvppak o laua kvv im apesa tuk a, im ai vlhpiesa hoke.

7. Yohmi tuk a yvmma chohmi kash i kashofit hopohlvi kak o hvsh ahna he tuk oke; yvmmak keyukma yvmma chohmi kash ot na nukhaklot isht ai i palvmit kvnia hinla hoke.

8. Yvmohmi hoka nan isht hvsh i hullo kvv yvmmak ash o hvsh im otvnincha chi kak o hvchim ai ahni lishke.

9. Ilvppak a he mak o holissochi li akinli hatuk; nana



moma ka ai im antia hvchia hokmá, nana ka hvch imoma ka ithvna la chi hatuk oke.

10. Kvna hq nana ka hvsh i kashofi hokma, vno ak kia i kashofi li hoke; nana hatuk o i kashofi likmvt, hvchishno pulla kak o Klaist vlhtoba hosh yvmihchi li hoke.

11. Yvmmak keyukma Setan vt pi haksicha hinla, yvma nan ahni ik vlhpeso ya kil ithano keyu hoka.

12. Yohmi ka Klaist im vbanumpa isht anumpohonli la chi hosh, Tloas a ona li ma, Chitokaka yvt nan ai ahni hq, okhissa yvt an tiwa tok.

13. Itibapishi li Titvs a ak ahayucho hokvt, vm anukfila nuktela ik svm iksho ki tok: yohmi ka okla yvmmak ash aiokpvchit issa li mvt, yvmma a kohchvt Masetonia yakni ya ia li tok.

14. Yohmi hoka, yak oke ahnit, Chihowa ha kiloh aiokpvchi; yvmmak osh Klaist pulla hatuk mak o il imaiyacha chi ka pi apelahanchi; mikmvt kanima moma ka pishno pulla atuk mak o ilap a nan isht im ithvna i na balama otvnihinichishke.

15. Pishno vto Klaist ibai achvfa pia hosh kvna hosh okchaya chi, mieha illa chi aiena kak o Chihowa i nan isht balama champuli pia hoke.

16. Achvfa kano, illi bitema nan isht ai illa he i pia hoke, mikmvt inla yano okchaya na balama nan isht ai okchaya pia hoke. Yohmi ka kvta hosh ilvppa puyuta ka isht im ai vlhpiesa cho?

17. Laua hvt Chihowa im anumpa ik ai ahlecho ya e chohmi keyu; amba chukvsh ai ahli, yohmi kvv Chihowa im vlhtoka kvv, Chihowa itikba yo Klaist i hohchifo isht il anumpohonli hoke.

CHAPTA III.

Pal vt vbanumpa isht anumpohonli hq' Kolinhlia vt vbanumpa anukfolka kak o yvmmak ash Chihowa hvt pit pila hatuk a otvninchi tok, 1; 6 vbanumpa anumpula chi ka Chihowa yak osh ataiyahli tok a tuk, 12 vbanumpa hak osh holitopa kvv Moses nan apesa tok a i shahli.

1. PISHNO ak inli kv̄t atuklanchit̄ il il ahninchit̄ isht il ia hō? keyukmvt̄ inla maya ka chohmit̄, isht hvsh pī kana he holisso puta ka il isha he pim vlhpesa hō? yummak keyukmvt̄ holisso isht ai i kana ya e hvchim ai isha hi vt vlhpesa hō?

2. Hvchishno ak osh pī holisso hvchia hosh pī chukvsh a a holihiso tuk osh, hatak moma ka im otaiyanit̄ im ai it anuhumpa hoke:

3. Pishno yatuk mak o hvchishno vt̄ Klaist i holisso toba tuk otaiyanit̄ hvsh anohwa kv̄t, isht holissochi oka yo isht holihiso tok keyu, amba Chihowa okchaya imi Shilombish ak atuk; tvli patvssa yo a holihiso tok keyu, amba chukvsh nipi ak atuk oke.

4. Yohmi hatuk o Klaist pulla hatuk mak o Chihowa yak osh yumihihi tuk a pī yimmishke.

5. Pishno ak inli nana ka ai isht anukfillit̄ isht im ai ahla he il ahni kak osh pishno ak inli kv̄t il ona chi keyu hoke: amba Chihowa ak atuk mak o nana ka pim ai ahlit̄ il ona chi hoke.

6. Nan it im vlhpisa himona nan isht im vtta ai ahla he mak o yummak osh pī atokoli ak inli tok: holisso tikba yak o nan isht im vtta hō keyu, amba Shilombish ak oke; holisso tikba yash okvto vbi yoka, amba Shilombish okvto okchalinchi yoke.

7. Yohmi ka tvli yo ai in chuwa holisso isht ai illa he isht ai vtta yvt̄ holitopa; yohmi hō Moses yumma nashuka yvt̄ shohpalali hoka, Israēl ushi vhleha hv̄t nashuka yash o atokowt̄ pisa he keyu ki tok; yummak ash ot̄ ont̄ ai iksho ka hi atok oke;

8. Katiohmi hosh Shilombish nan isht ai vtta yokak heto holitopa kv̄t i shahla hetuk keyu hō?

9. Isht a palvma he nan vlhpisa isht ai vtta yvt̄ holitopa hokma, nan isht ai vlhpiesa isht ai vtta yokak heto holitopa kv̄t i shahli fehna he tuk keyu hō?

10. Nana kv̄t yakohmit̄ holitopa tok ilvppak ash ot̄ na holitopa yummvt̄ i shahli pulla kak o holitopa kv̄t ik alauwo ki tok.

11. Nana kv̄t ont ai iksho kak osh holitopa tok okma, nana kv̄t takali kv̄t holitopa i shahli fehna hinla hoke.

12. Yvmohmi hoka yvmohma chi ahnit na pi yimmi hosh anumpa otaiyani fehna hō isht il anumpuli hoke.

13. Yvmohmi kv̄t Moses atok ano chohmi keyu, yvm-mak okvto Islael ushi v̄hleha hv̄t nan v̄lhpisa yvmmak ash ot kv̄nia kia, a hlopullichit ai v̄hli pit atokowv̄t pisa keyu kak o, isht ompoholmo yō ilap nashuka yash isht ompohomo tok.

14. Yohmi kia yv̄mma im anukfila hash ot l̄upa yatok; himak nitak ak kia Testament sipokni im ai itim anumpuli hokvno nan ompoholmo mihi ash inli kv̄t ik i kv̄nio k̄isha hosh takali hoke; yohmi kia yvmmak ash ot Klaist ak o ont isht ai akshot kv̄nia hoke.

15. Yohmi ka himak ak kia Moses a ai itim anumpuli ka, nan ompoholmo yashot i ch̄ukv̄sh a on h̄lipia hoke.

16. Yvmohmi tuk o Chitokaka ya pit ai i filemv̄t im onakma, nan ompoholmo yash o isht i kancha hi oke;

17. Yohmi ka Chitokaka yv̄t, Shilombish yvmmak ash oke: yohmi ka kanima yō Chitokaka imi Shilombish v̄t ai otaiyanikma, mihi yō ai yuka keyu mak oke.

18. Yohmi ka nashuka ompoholmo keyut a pisa yō il a pih̄isa chohmit Chitokaka im aholitopa ya e pih̄isv̄t, yvm-mak ash inli hō hoyulba chi hosh momv̄t inlv̄t e toba kv̄t, Chitokaka imi Shilombish v̄t a p̄i yvmihchi kak o, holitopa kv̄t i shahlit il a mahaya hoke.

## CHAPTA IV.

Ai ahli, achilita hosh v̄banumpa ha isht anumpohonli tuk v̄t otv̄nin-chi, 1; 7 mihmv̄t nan im apalv̄mi puta tuk v̄t Chihowa yosh isht aholitopa he, 12 chv̄ch nan isht im a chukma he; 16 mikmv̄t ilap nan isht il ai yukv̄t im a bilia hi a tuk a, achi.

1. YAKOHMA chi mak o, nan isht i nukhaklo il ishi hatuk mak osh, nan isht ai v̄tta ilv̄ppak ash o isht il abanta kv̄t, pin takobi keyushke.

2. Isht a hofahya he nan isht im aluma puta ka e kanchi



myt; i kostinit nan isht akanomi ya il ai itynowa keyu, Chihowa im anumpa ha ik ahlechot il inlvchi keyu; amba Chihowa itikba ya nan ai ahli ya il otvninchi ka, hatak mo-ma nan isht il akostininchi yvt ahli, pim ahni hoke.

3. Yohmi kia pim vbanumpa hvt luma hokmyt, okpula he vhleha hak o in luma hoke.

4. Klaist, yvmmvt Chihowa Hoyulba ka, im vbanumpa holitopa in tohwikeli hvt on tomma chi keyu ka, na yimmi keyu yvmmak ash o im anukfila puta ka yakni ilvppa i shahli yoshi lvblichy hatuk oke.

5. Vbanumpa isht il anumpuli kv, pishno ak inli ho isht il anumpuli keyu, amba Klaist Chisvs Chitokaka yak atuk: yohmi hokvt pishno yokvto Chisvs pulla hatuk mak o hv-chin tishu pia hvt il otvninchishke.

6. Tohwikeli hvt ai okhlilika ya a kohchvt tomma chi ka, Chihowa yvmmak osh im apesa tok okvt, Chihowa im aholitopa nan isht ithaiyana im a tohwikeli hvt Chisvs Klaist i nashuka a minti mak o pima chi hosh pi chukvsh a a tom-mi hatuk oka.

7. Yohmi kia nan isht ai ahli chinto fehna kv pishno ak o keyu, amba Chihowa ak o immi ha chi ka, nan ilayak holitopa ilvppak ash o nan ai vlhto okfulush toba ho isht il ieshi hoke.

8. A palvmmi bano hosh pia folubli kia, atukoñofvt pi komunta keyu kisha; atia he pim okvpa, yohmi kia isht apelvchi yvt ik pim iksho ka chi kil ahno hoke.

9. Inla yvt pi palvmmichi, yohmi kia Chihowa hvt ik pisso; aka il itula; yohmi kia ik pi okpulo hoke.

10. Chitokaka Chisvs vt isht illi mak o pi haknip a isht ieshit il aya bilia; yohmi na Chisvs okchaya yosh pi haknip a ai otvna chi hatuk oke.

11. Chisvs vt okchaya kv illa he pi haknip a isht ai otahana chi ka, Chisvs pulla hatuk mak o okchayvt il anta kv, illa he pim vlhpihisa na bilia hoka.

12. Yohmi hoka nan illi yosh pi a toksahanli, yohmi kia nan okchaya yosh hvchi a toksahanli hoke.

13. Na yimmi im anukfila, Na sai yimmi yvmohmi hosh

anumpuli li hoke; achit holisso tok a yummak inli ho il ieshi hosh na pi yimmi ak inli, yvmohmi hokvt il anumpuli hoke.

14. Chitokaka Chisvs a tanichi tok yummak osh Chisvs pulla hatuk mak o pi tanicha he ak inli, mikmvt hvchishno a a pit aieninchit pi hiohlicha hi a il ithaiyana hoke.

15. Nana puta kvv hvchishno pulla hatuk mak o ai yakohmi ka, laua kvv yak oke ahnit, aiokpvchi pulla ho nan isht i kana laua kvv Chihowa yvt isht a holitopa chi hoke.

16. Yakohmi hoka pin takobi keyu hoke; yohmi kia hatuk pi pakna yokvto tikambit mahaya kia, hatak anukaka yokvto nitak osk nitak ma himonvt tohombvshke.

17. Yakosi itintakla ho na pim a palvmmi shohvla kia, na holitopa weki bilia nan imaiya fehna ka pim atahli hoke:

18. Nana puyuta yvmvvt otaiyani yak o e pihisa keyu; amba nana kvv otaiyani yak keyu; nana puta yvmvvt otaiyani yokvto a bilia keyu; amba nana puta yvmvvt otaiyani keyu kak osh a bilia yoke.

CHAPTER V.

Aiokchaya bilia pisa he anukfoyuka ahli, 1; 9 mihmvt Klaist im ai asha holitopa nan apesa itikba hikia chi kvv ithaiana, yohmi mvt im a holitopa he ahnit toksahanli; mihmvt ib ai achvvt nobwa, micha inla mvt okchaya chi ka anukfokihinchi.

1. ULHTIPO yakni pakna a pim aboha ilvppak okvt ont a yuhla kia, ibbak isht atoba tok keyu, vba a holitopa ya a bilia chuka, Chihowa hvv ikbi tok a, pin talaia kvv il ithaiyana hoka.

2. Ilvppak ash o il a foyuka kak osh ilbvshvt e hihila kvv, pim aboha, yvmvvt vba a minti mak o, isht e fohka he ahni fehvvt, e hohoyo hoke:

3. Yakohmit e foyuka mvhli hokmvt, haknip biekvv il otaiyana chi keyu.

4. Ulhtipo ilvppa il ai ahanta hokvto, nan i weki tikabit ilbvshvt e hihila; yohmi kia ik fohko ka hi ak o il ahni keyu, amba isht il a foyuka he ak oke; yohmi ho nana kvv



illa he imma hatuk okvto nan okchaya kak o ont ai iksho kak a chi hatok a il ahni hoke.

5. Yohmi ka nana kv̄t ilvppak a chi ka a pi atahli tuk vt Chihowa ak oke; yvmmak osh ai okchayvt bilia yvt pim ai ahla chi ka, Shilombish a pihima ak inli hoke.

6. Yvmohmi hoka yvmohmi pulla chi ai ahni fehna kv̄t, haknip o il ai anta takla hokvto, Chihowa ya i filvmmi hosh il anta kv̄t il ithaiyana hoke.

7. Na yimmi pulla kak osh il itvnohova, pisa kak o keyu hoka.

8. Yvmohmi pulla chi il ahni fehna, yohmi hokvt haknip a ai i filvmmi cha, Chitokaka yak o il ibai achvfa hi ak osh pim i shaiyahli hoke.

9. Yvmohmi hokvt ibai achvfa kak okmá, keyukmvt i filvmmi kak okmá, nana kia yvmmak ash e yukpala chi kv̄t e toksahanli hoke.

10. Ilap haknip aiyuka nana kv̄t ai yvmohmi tuk a nana achukma hokmá, keyukmvt okpulo hokmá, nana hoh kia, yvma yvmihchi tuk isht vintoba mak o moyuma kv̄t il isha chi kv̄t, Klaist im o binili nan ai apesa itikba ya e moma kv̄t ont il ai otaiyana chi pulla hoka.

11. Yvmohmi hoka Chitokaka isht im anukshopa hi a ithaiyana hosh, hatak puta kv̄t hlakofa he ahnit il in tohono; yvmohmi hokvt Chihowa ho il im otaiyani pulla; yohmi hokvt nan isht hvsh il akostininchi ma e hvchim otaiyani ak inli, ahni li hoke.

12. Isht hvsh pi ahninha hi a pishno ak inli kv̄t atukla ma isht e hvchim atahli keyu; amba chukvsh ak o keyu; ilap nashuka yo isht il aiyukv̄t ilauata vhleha yvma hvchishno vt i nan hvsh ok achā hi vt hvchi anukfoka chi kak osh, pishno ak o nan isht hvsh il aiyukpa kv̄t hvsh il auata chi kak o, e hvchim ahani hoke.

13. Pishno ak inli kak osh il il atampli fehna hokmá; nana hoh kia, Chihowa nan isht im a holitopa chi kak oke: keyukmvt pim anukfila nuktaiyala hokmá, nana kia hvchishno nan isht hvchim achukma chi kak oke.

14. Klaist nan isht pi hullo yak osh a pi anukfoyukvt pi



ai yimilihinchi hatuk oka ; yohmi ka achvfa kv̄t moma ka im illi hatok; yohmi hokma, moma kak osh illi yoke, ahnit yakohmichit isht pim anukfila hoka.

15. Yohmi ka moma kak o im illi hatuk oka, kv̄na hosh himmak ma okchayvt ahanta kv̄t, ilap nan ahni banot ahanta he keyu, amba vlhtoba hosh illi tuk osh, anonti falamvt tani tok yvmmak o holitobliehi hosh ahanta he vlhpesa hoke.

16. Yohmi ka himak a pilla ka haknip imma hatak nana kia il ithaiyana chi keyu: ahli, yohmi kia haknip imma Klaist okvno il ithaiyana tok: yohmi tok kia himak a pilla kvno yvmmak ash il ithaiyana chi keyu mak oke.

17. Yvmohmi ka hatak nana hosh Klaist a ibai achvfa hokmvt, mihi yosh nana toba himona yoke: na sipokni atuk vt ont ai ikshot kvnia na, yakeh! nana puta kv̄t himonvt toba hoke.

18. Yohmi ka Chihowa yvmmak osh Chisvs Klaist pulla hatuk mak o ilap a isht a pit i nanaiyvchi tok; mihmvt nan isht it i nanaiyvchi isht ai vta yo pi atokoli tuk mak osh, nana yakohmi puta ka yvmihchi yoke.

19. Yohmi kv̄t Klaist pulla ho Chihowa hv̄t yakni a ilap a isht il i nanaiyvchi kv̄t, yvmmak ash nan im ai ashvchi puta kash o isht in takalihinchi keyu; yohmi mvt nan isht it i nanaiya im anumpa ha pi anukfoyuki hatok.

20. Yvmohmi hoka Klaist vlhtobvt im anumpa isht aya pia hoke; yohmi ka pishno pulla hatuk mak o Chihowa hv̄t i kanvt hv̄chim anumpohonli chiyuhmi ma; pishno mvt Klaist vlhtoba hosh e hv̄chim asilhha ka Chihowa ya hv̄sh i nanaiyashke.

21. Yvmmak atuk mak o Chihowa nan isht im ai vlhpiesa e toba chi ka, yvmmvt nan ashvchi ithaiyana tok keyu ka, yvmmak ash o Chihowa yvt nan ashvchi yo pim ikbi tok.

CHAPTA VI.

Ilap, micha itapehvt toksvli aiena kv̄t Chihowa yak o iba toksahanli kv̄t achi, 1; 5 vbanumpa isht anumpohonlit nan isht im apalvmi,

micha toksahanli aiena kv̄t anoli; 14 Chihowa okchaya yō in tem-  
pel a tuk okv̄t, na holbvt toba puta nan akaniohmi ik v̄lhpeso puta  
ka ai i filv̄mma chi ka i miha.

1. YUMOHMI hoka pishno vt nan itiba toksv̄li pia  
hosh, Chihowa nan isht i kana hv̄sh habena kv̄t, pilla hv̄sh  
habena ch̄i keyu hō i kanv̄t hv̄chin tohono li hoke.

2. Ai okpancha he nitak vt takali ma chi hahaklo li tok;  
anonti isht ai okchaya nitak vt takali ma chi on chv̄vt chi  
apelahanchi li tok, yv̄mmvt achi hoka: yohmi hoka yakeh!  
himonasi ya aiokpahancha he nitak vt takali hoke; yakeh!  
himonasi yak osh isht ai okchaya he nitak vt takali hoke.

3. Ubanumpa isht ai v̄tta yvt ik hofahyo ka chi ka, nana  
kia isht ai ibetv̄bli ya kil i bohonlo hosh;

4. Nuktaiyav̄t achunanchi fehna, nan apalv̄mmi puta ka  
isht ai atukonufv̄t a hlakofa he keyu;

5. Fahama, aboha kv̄llo ma fohoka, nukkillit yahapa  
puta, toksahanlit hoyubli, nusi mvt ik im iksho, hohchahāfo,

6. Chukv̄sh kashofa, nan ithaiyana, i kanv̄t nuktaiyala,  
sv̄lahvt nokowa, Shilombish Holitopa, ilahobi keyu hosh  
nan it i hullo,

7. Nan ahli isht anumpa, Chihowa nan isht im ai ahli,  
isht impakimma, mikmvt isht afv̄bekimma ita tuklo kv̄t nan  
isht ai v̄lhpiesa i nan isht tanampi isht ai im v̄lh̄taiyaha;

8. Nan isht holitopa, anonti nan isht ik holitopo, nan ik  
achukmo isht annoa, anonti nan achukma isht annoa; na  
haksichi yō chiyuhmi, yohmi kia ai ahli bieka;

9. Ik ithano yō chiyuhmi, yohmi kia otaiyani achukma;  
illa he im ai v̄lhp̄ihisa, yohmi kia yakeh! pi okchaya moma;  
kostina h̄i osh nan i palv̄mmi, yohmi kia illi keyu;

10. Na nukhaklo yō chiyuhmi, yohmi kia na yukpa  
bieka; ilbv̄sha yō chiyuhmi, yohmi kia lava ka nan in  
lauahanchi; nan ik im iksho kamohmi hō chiyuhmi, yohmi  
kia nana moma kv̄t ai immi; nana kv̄t a pi yakohmi hokv̄t,  
Chihowa nan isht im v̄tta vt kaniohma hetuk a chohmit  
nana moma ka isht il ai otv̄nihinchi hoke.

11. Kolinhl̄ian hv̄chia ma! pitakha yvt hv̄ch̄i wakama, pi  
chukv̄sh mvt hv̄chim a chinto fehna hoke.



12. Pi chukvsh a ai iskitinosi ho hvsh pim a foyuka keyu, yohmi kia hvchi chukvsh okvno iskitinesi ho hvsh a pi foyuki hoke.

13. Yohmi ka mihi ash inli chohmi ho hvsh pi falaminchi cha, hvchi chukvsh a hvsh pin chitolashke; vm vlla chipunta chohmi ho im anumpvli li hoke.

14. Na yimmi keyu vhleha hokvno it ibai achvvt ikunla abana isht ik hvch abanaiyo kashke: nanta ho nan vlpesa kvv nan ik vlpeso ya it ibai ieshi ho? nanta ho tohwikeli hvv okhlili ha isht ai it ibai achvfa ho?

15. Yohmikma Klaist vt Belial a nanta ho isht ai itiba ola achukma ho? mikma na yimmi yvt nan ik yimmo ya nanta ho isht ai it ibai achvfa ho?

16. Yohmikma Chihowa in tempel vt na holvvv toba puta ka nanta ho isht ai it ibai achvfa ho? Chihowa okchaya in tempel hvchia hoka; yohmi ka Chihowa hvv, Yvmmak oka ai ahanta la chi, mikvvv a nohova la chi: yohmi cha in Chihowa sia hokma, anonti ilap vt vm okla ha chi hoke, achi tok oka.

17. Yvmohmi hoka yvmma a kohchvv hvsh mintashke; yohmi cha oh i filvmmi, mikvvv nana kvv ik kashofa ka hvsh potoli na; yohmik mak o hvch i kanvv hvchi ieshi la chi hoke, Chitokaka yvt achishke.

18. Yohmikvv hvch Iki toba likma, anonti hvchishno vt svso vhleha, svvotek vhleha hvsh toba hi oke, Chihowa nana moma i shahli hvv achishke.

CHAPTA VII.

Nan ashvchi ik im iksho ka he i miha, 1; 2 Klaist im vbanumpa ishi ai ahli yatuk ilap a okla aiokpancha chi ka i miha; Ilap nan im ai ashvchika isht ilekostinincha hi a i holisso vmonna kvv nukfokichichi tok o, Titvs vt ant im anoli ilvppak o nana kvv i palvmi ak inli kia isht hopohola tok vt pit im anoli.

1. YUMOHMI ka a kana holitopa vhleha ma! nana hash yakohmiechit pimihisa ka, haknip, micha hvvim anukfila nan isht ai liteha puyuta ka isht kiloh il a kashofi,



Chihowa ha holitohombli pulla hosh ont ai ahlit nan ai ashvchi ka ik pim iksho kashke.

2. Pi kanvt hvsh il anukfoyukashke; hatak nana kia kil vlhpesalo hatuk keyu; hatak nana kia il ai okpvnichi hatuk keyu; hatak nana kia haksichi hosh nan il im ishi hatuk keyu.

3. Anumpa hvchi onochi la hi osh ilvppa anumpuli li keyu; hvch ibai illi hokmá, okchayvt hvsh ibai ahanta hokmá, nana hi vt pi chukvsh a hvsh pim a foyuka hoke, tikba kash achi li tuk oka.

4. Yohma chi ahnit, na yimmi chintot hvchim anumpuli li hokvt otvpinchi li fehnvshke; nan isht hvchi ilauahanta li chinto hoke; na hopohla ma isht vm alotowa kv, na pim apalvmmi a moma ka isht a sai yukpa vm atampa fehna hoke.

5. Masetonia yakni ya ant e chukowa ha yatuk a pi haknip vt ik foho kvmohmi; yohmi hoka a pi afolubli moma ka nan isht a pi palvmmi; kocha ya ai itihimbi ma, pi anukaka ma, pi nukshohumpvshke.

6. Yvmohmi kia Chihowa hv kvna hosh im anukfila akanlosi puta hokvno nuktalali, yvmmak osh Titvs vt ayvt vla pulla ho pi nuktalali tuk.

7. Yohmi kv yvmvvt ayvt vla kak bano keyu, amba na nuktanla mihi yo yvmmak ash ot isht hvchi anuktanla pulla tuk osh, nan isht hv sa hullo kvlo, mihmv na hvchi nukhaklo, hvchim anukfila ha kvlochit isht hv si atakali aiena ka yvmmak ash ot ant pim anoli hoka: yohmi hoka nan isht sai yukpa vm i shahli fehna tuk oke.

8. Yohmi kv hvchi holissochit isht hvchi nukhaklochi li tuk vt sa nukhaklo tuk kia, himak ano sa nukhaklo keyushke; holisso yvmmak ash ot na hvchi nukhaklochi kia, hvshi kanvlli achvfa ho chohmi tok a akostinichi li hoke.

9. Himonasi ya sai yukpvshke, na hvchi nukhaklo kak keyu, amba na hvchi nukhaklot hvsh ile kostinichi kak atuk oke: pishno ak atuk mak o nana kia isht hvchi ai okpulo ka chi kv, Chihowa nan ai ahni ho na hvchi nukhaklo tuk oke.

10. Chihowa nan ai ahni ho na nukhaklo yokvto anukfohka cha, okchaya chi hosh ile kostininechi kv̄t nukhakla himma keyu hoke: amba yakni yo nan isht a nukhaklo yokvto illa hi osh anukfohka hoke.

11. Chihowa nan ai ahni ho na hv̄chi nukhaklo tuk vt ilvppak fehna ka ho pesá; tushpvt anukfohkvt nana isht hv̄sh ahanta tuk; ahli, na hv̄chi onvtula tuk ash hv̄sh il im i kanv̄llichī tuk, ahli, ile shitilemvt nan ai ashv̄chi hv̄sh i nukkilli tuk, ahli, na hv̄chi nukshopa tuk, ahli, yvmohmi pullakbano ahni fehnvt hv̄chi anukfoyuka tuk, ahli, nan a mosholit hv̄sh ahanta tuk; ahli, ik vlhpeso mak o i sanalit hv̄sh i nukkilli tuk, yohmi hokvt nan ilvppak ash hv̄sh ai itī kashofa kv̄t nana ilvppa puta kak o isht hv̄sh il otv̄ninchishke.

12. Yvmohmi ka hv̄chi holissochi li tuk vt kv̄na hosh nan ik vlhpeso ka yvmihchi tuk, mihmvt kv̄na hosh ik vlhpesot nan i palvmmi tuk pulla kak o yvmihchi li tuk keyu; amba Chihowa itikba yo tushpvt anukfohkvt isht e hv̄chim ahanta ka hv̄chim otaiyana chi kak atuk oke.

13. Yvmohmi hoka nan isht hv̄chi nuktanla ka isht a pi nuktaiyala hoke; ahli, yohmi hokvt Titvs yvm̄mvt im anukfila hv̄t hv̄sh moyuma kak o nan isht a nuktanla tuk okvt, na yukpa kak o pishno vt na pi yukpa pim atampa tuk oke.

14. Hv̄chishno pulla hatuk mak o isht im ilauata li tuk oh kia, sa hofahya keyu; yohmi ka ai ahli ho nana moma isht e hv̄chim anumpuli kv̄t, Titvs itikba yo na yukpvt il ilauata ha tuk a, yvmmak ash ot ai ahli bieka hoke.

15. Yohmi ka nukshohumpa, micha wv̄nihinchi ajena hosh yvmmak ash hv̄sh aiokpv̄chi cha, nana ka mominchit hv̄sh im antia tuk a ithaiyana momvt, yvmmak ash ot im anukfila isht hv̄chi kana kv̄t in laiyawa atampa hoke.

16. Yvmohma hoka nana moma ka hv̄sh ai ahli ka hv̄chi yimmi li kak osh na sai yukpa hoke.



mi ka hobacha he. 8 Chihowa nan isht i kana anukfoyuka pulla hosh; 14 Klaist a iakaia pulla hosh yvmihcha he; mikmvt nana ka yvknichi kvt ilap shilombish nan im achukmali pulla ka, achi.

1. YUMOHMI ka itibapishi li vhleha ma! Masetonia yakni chvch a hiohli ka Chihowa hvt ilap nan isht i kana yo ihima ma;

2. Nan imomaka pisa chinto a palvmmi kak o nan isht im il aiyukpa kvt lawa, yohmi mvt ilbvsha fehna yatuk vt ilap nan ahnit nan itahobi kvt, lauachi fehna tuk a isht e hvchim anolishke.

3. Nan isht il ilauechi, ahli, nan isht il ilauecha hi a im atampa ak inli kia, yvmihcha he ahnit, ilap inli nana im anukfila hatuk o atokowa anoli li hoke;

4. Nan isht i kana yash il ishi cha, na yimmi ahli vhleha isht im ia ka ibachvvt il apelvcha hi a, okla ai ahni fehnvt pim asilhha tuk oke.

5. Yohmi kvt ilvppak o okla yvmihchi tuk, yohma he ahnit pim anukfila tuk keyu; yohmi kia na tikba Chitokaka yoka okla il im issa cha, anonti Chihowa nan ai ahni pulla ho pishno ma pim il issa tuk oke.

6. Yohmi hatuk o nana ka isht wakaya hatuk okvt, Titvs ak osh nan isht i kana hvsh bohla he yvmmak ash kia hvchi ai itahobit tahla hi a, il im ahni tuk oke.

7. Yvmohmi hoka na yimmi, micha anumpuli imponna, micha nan ithana, micha tushpvt anukfohkvt nana ka isht ahanta, mikmvt hvsh pi hullo aiena, nana moma ma isht a hvchim vlhtaiyaha laua ka, chohmit nan isht i kana ilvppak kia hvchin lauashke.

8. Nan vlhpisa yo isht anumpuli li keyu, amba inla tushpvt anukfohkvt nan achunanchi yak oke; yohmi kvt na hvshi hullo ai ahli kak o otvninchi la he ak atuk oke.

9. Hvpin Chitokaka Chisvs Klaist, yvmmak okvt nan in laua yatuk kia, hvchishno pulla kak o ilbvsha yo toba tok; yvmmvt nan ilbvsha pulla hatuk mak o na hvchin laua chi hatok vt hvsh ithana hoke.

10. Yohmi ka tikba kash isht hvsh wakaya kvt, nana ka hvsh yvmihcha he ak illa keyu, amba afvmmi achvfa foka



kash yohmikbano ahnit, hvchi anukfoyuka ak inli tok, ilvp-  
pvt nan isht hvchim vlhpesa hoka, vno nana anukfilli li kv  
anoli lishke.

11. Yohmi hoka himonasi ya nana kv ai yvmohma he  
yatuk ash hvsh yvmihchashke: yohmik bano ahnit hvchim  
vlhtaiyaha hatuk okvno na hvchim asha ka isht hvsh ai ahli-  
chi kv, hvchim vlhtaiyaha ak inlashke.

12. Im anukfila ak osh nan tikba yohmikbano ahni ha  
yatuk okvno, hatak yummvt nana hō ishi tuk ash isht vlhpisa  
hō ima kv isht ai vlhpesa hoke, amba yummak ash ot nana  
hash ik isho ke tuk ak osh isht ik im ai vlhpiso chatuk keyu.

13. Hvchishno ak osh na hvchi weki, nan inla yvto nan  
ik ahalaio ka hi o miha li keyu.

14. Amba ai itilauashke, yohmi hoka himonasi ano na  
hvchin laua yak osh ilbvshvt na bvna yak o apelvcha chi;  
yohmi tukma ilap nan in laua yak kia ilbvshvt na hvchi bv-  
nakma hvchi apelvcha chi; yohmikma nana kv ai itilau kv;

15. Kvna hosh nana ka lauachit itahobi hatuk kia, atampa  
kv ik im iksho hoke; mihma kvna hosh ik lauachot itahobi  
hatuk kia, ak im ono keyu, achi hosh holisso ka chohmi  
hoke.

16. Yohmi ka achilitvt nana yummak ash isht hvchim  
vtta chi ka, Titvs im anukfila ha Chihowa hv anukfohki-  
chechi tuk a yak oke, im ahni lishke.

17. Yummak ash osh nan in tohono li ka aiokpanchi  
fehna mvhli hatuk; yohmi kv ilap inli nan im anukfila kv  
achilitvt, ila tushpa fehvvt hvchi maya hatuk oke.

18. Yohmi ma vbanumpa pulla hatuk mak o chvch hi-  
ohli moma ka im a holitopa il itibapishi ha, tuklonchit pit e  
pila hatuk.

19. Yohmi kv yummak bano hatuk keyu, amba Chito-  
kaka yummak ash inli kv isht a holitopa chi, mikmvvt nana  
kv yohmikbano ahnit hvchim vlhtaiyaha tuk vt otaiyana  
chi ka, nan isht i kana ilvppak okvt pishno pulla hatuk mak  
o ai yvmohmi tuk a yummak ash ieshit pi takla nowvt aya  
chi kv, chvch vhleha hō yummak ash ot ai im vlhtokowa  
ak inli tuk oke.

20. Nan isht i kana laua ilvppak ash yakohmichit isht il ahanta na kvna kia nan isht ik pi mihacho ka chi ka, ilvppa ahah! il ahani tuk oke.

21. Chitokaka itikba ak illa keyu, amba hatak puta itikba yak kia, nana kvt vlhpiesa ho isht iloh il otvnincha hetuk oke.

22. Yohmi kvt himonna imomaka e pihisa na nana lawa ka achunanchi yatuk il itibapishi, mihmak o ibafokit pit e pila tuk; yohmi ka hvchi yimmi chinto kvt nana ka achunanchi i shabli fehna chi pulla hoke.

23. Hvchishno yatuk mak o kvnia kia Titus a a ponakla he yoba ka, yvmmak okvt vm itapela, micha na svba toksvli yoke; yvmmak keyukmvt hvv itibapishi vhleha hash a ponakla he yoba ka; yvmmak okvt Klaist nan isht a holitopa chi ka, hvch hiohli puta ho ai im vlhtoka vhleha hoke.

24. Yvmohmi hoka nan isht hvsh i hullo, mikmvt hvchishno a nan e hvchi yimmit isht il ilauata hatuk ash atokolit ahlich i kvv, hvch hiohli puta, mikmvt ilvppak ash aiena ka hvsh im otvninchashke.

## CHAPTER IX.

Achakalinch i mvt peh pilla nan ima he ako anukfokichi, 1; 6 na holokchi nihi yo isht ita pesa hosh na hokchi tok aiyuk ali kak osh vma he, achi; 7 aiokpanchit nan ima kak o Chihowa yvt holitoblich i; 10 pilla nan isht i kana lauachi ya Chihowa hvv ilap nan isht i kana ya lauachit ima.

1. UBANUMPULI ahli vhleha nan isht im ahanta he imma yvmmak ash okvno, nan isht mihvt hvchi holisso chi la he vm vlhpesa keyu.

2. Yohmik bano ahni kvv hvchim vlhtaiyaha hatuk, mihma Akaia ai asha kak kia afvmmi achvfa foka kash nana kvv im vlhtaiyaha hatuk, mihi yash o Masetonia ai asha ka isht im ilauata li hatuk; yohmi hatuk o na hvsh a mosholi kvv kvv lauachit fehna ka yimitvchit anukfohkiechi ka ithaiyana lishke.

3. Yohmi ka ilvppak ash o hvchim vlhtaha chi ka, achi



tuk mak osh il itibapishi vhleha ha pit tihleli li tuk oke; yohmi ka nan isht e hvch ilauwaiyata tuk ash o ont ik ai ahlo keyu ka chi kak atuk.

4. Masetonia hatak ash ot si apihvt ona yoba cha, nana kvv ik hvchim vltaho ke tuk o ont ahayuchi na, na yimmit isht ilauwaiyata tuk mihi yo ai isht a pi hofahya hinla kvv, hvchishno ak a he okvno il achi keyu.

5. Yohmi ka il itibapishi vhleha hash ot tikba hvchim aya cha, nan isht hvsh i kana he vt isht anuhumpa tuk ash, tikbanli atahla he vlpesa ahnit, i miha li tuk; yohmi ka pilla nan isht i kana yvmmak a he ash ot vlhtaiyaha kvv, nan il ahayuchi bvna yo ik chohmo kashke.

6. Yohmi ka kvna hosh ik lauacho hosh hokchi hokvto, mihi yosh ik lauacho hosh vma chi ak inli hoke; mikma kvna hosh lauachi hosh hokchi hokvto, mihi yosh lauachi hosh vma chi ak inli, ilvppa achi lishke.

7. Kvna kia ilap im anukfila hak o na tikba nan isht ik ahni ha yosh hatak moma kvv nan ik ima; isht nukhaklo keyu, mikmvt yohma hi atuk ahni kak o keyu; aiokpanchit nan ima yak o Chihowa yvto i hullo hoke.

8. Yohmi ka Chihowa hvv nan isht i kana moma ka isht hvchim a lauacha hinla kvv im vlpiesa hoke; yohmikma nana moma ka isht hvch im vlhtaiyaha bievvt, na toksvli achukma moma mvt isht a hvchin laua hi oke.

9. Yvmvvt na fimmi hatuk; micha yvmvvt ilbvsha yo nan ima hatuk aiena kvv, nan ai vlpiesa ho yvmihchi tuk a takali na bilia hi hoke.

10. Yohmi ka kvna hosh na hokchi a na nihi im atahli yak osh hvchim ilimpa chi pska ma ik atahanli, micha hvchi na nihi hollokechi tuk ash ik ibakahanli, mikmvt na hvsh a kaniohmi ai vlpesa im vni ya i shahlichit ik ibafohoki; achi hosh holisso hoke.

11. Nana ka lauachit hvsh ima chi kvv, nana moma isht a hvchin laiyouwa ka yvmmak osh pishno pulla hatuk mak o, lava kvv Chihowa ha yak oke im ai ahna chi ka, nukfohkihinchishke.

12. Nan isht apehlvchi ilvppak oka isht ahanta kvv vba-



numpuli ahli vhleha nan ik im iksho kash o nan im atahli illa keyu, amba Chihowa ha lauachit yak oke im ai ahni vhleha ha isht a laiawa ak inlishke.

13. Klaist im vbanumpa ha im antia hvsh il anohonli; yohmi mvt ilap, micha hatak moma ka nan isht hvsh apelvchi na nan isht apelvchi ilvppak ash o imomaka pihisa pulla hosh Chihowa ya okla holitoblichishke.

14. Yohmi mvt vba isht hvchi anumpohonli pulla hosh Chihowa nan isht i kana fehna kvt hvchi anukfoyuka chi ka, ai ahnit isht hvchi hullo hoke.

15. Chihowa nan isht i kana yvt anumpa ho isht annoa he keyu hoka yak oke im ai ahni lishke.

## CHAPTER X.

Klaist im apostel atuk osh nana kvt vlhtoka, mikmvt shilombish imma isht im ai ahli kvt anumpuli.

1. YUMOHMI kvt Klaist chukvsh yohbi, micha chukvsh nukhobela iksho pulla ho, vno Pal sia hv hvchi kanvt hvchi tohono lishke; hvchi takla antakmvt, im anukfila akanlosi, amba hvchi filvmmikmvt, hvchi nukwaya iksho sia mak oke.

2. Yohmi kvt haknip imma nan ahni ho nana ka e yvmihchi tuk a kanimi kvt pi ahobachi, yvmmak okvno nukwaya ikshot i kvllo li kvt hvchi takla ont anta li hokmvt, nukwayvt ak hvchi kvllo ka he ak osh hvchim asilhha lishke.

3. Yohmi kvt haknip o il ai ahanta kia, haknip imma nan ahni yo ai isht e tanahampi keyu.

4. Nan isht e tanampi yokvto hatak osh nan isht tanampi yo chohmi keyu, amba Chihowa pulla hatuk mak o kvllo ai ahli hosh nan a holihta kvllo puta hatuk a yublichy yoka.

5. Nan anukfilli ik vlhpeso puta, mikmvt nan anukfilli chaha, yvmmak okvt Chihowa nan ithana ya i sanalit ilap inli ile chahvchi moma ka ishit e kanchi, mikmvt Klaist a im antia chi ka, nan isht pim anukfila moma ka e yukahanchi yoke.

6. Yohmi ka na hvsh im antia he tuk vt ont a hvchim ai

ahlikma, nan ik im antio moma kvno nana kv̄t isht ai im vlhpiesa mak o isht il i yvmihcha he vt pim vlhtaha hoke.

7. Nashuka yō chohmichit nana ka hvsh pihisa hō? Kvna kia Klaist immi sia, ahnit ilap inli il anukchieto hokmvt, atuklant ilap ak inli hosh ilvppak ash ik anukfilli, yvmmak ash ot immi sia, ahni ka, yvmmak inli hō chohmit pishno kia Klaist immi pia, il ahni hoke.

8. Yohmi kv̄t nana a pi vlhtoka tuk pulla hō nana ka i shahlichit isht ilauwaiyata li ka isht ik hvchi okpulo hosh, achukma i shahlit hvsh mahaya hi o, yvmmak ash Chihowa yvt pima hatuk oka, sa hofahya he keyu hoke.

9. Yohmi kv̄t holisso hō isht a hvchi nukshopli la he, ahni li tuk a ik si ahobo ka chi kv̄t, ilvppak o yvmihchi li hoke.

10. I holisso hokvto weki, micha kullo, yohmi kia ilap haknip fehna otaiyani hokmvt ik kullo, micha im anumpa mvt ik ahobo hoka, yvmmak ash ot achi.

11. Yvmma chohmi tuk ak osh ilvppa ik anukfilli, yohmi ka il i filvmmik mak osh holisso pulla hō anumpa yakohmi ka e yvmihchi kv̄t, pishno fehna il otaiyani hokmak heto, nan isht il anta kv̄t, yvmmak ash atuk ak inli hō e chohma hi oke.

12. Kanima kv̄t ilap inli il ahninchī vhleha, yvmma pishno vt isht il iba hotehnachit, isht il it apesa keyu; yohmi ka ilap inli ahninchit nan isht il apesa vhleha, micha ilap inli ka isht il it apihisa vhleha aiena hokvto hōpoyuksa keyu hoke.

13. Yohmi ka nan isht a pim vlhpisa yā ont atampa hokvno nan isht il ilauwaiyata he keyu; amba nan isht vlhpisa pulla yvmmv̄t hvchishno ak kia hvchim ona he, nan vlhpisa yō Chihowa yvt pim apesa tok ak oke.

14. Ik hvchim ono ke tuk ak inli hō chohmit nan isht a pim vlhpisa yā pit il atamplit il ile mahampli keyu; Klaist im vbanumpa isht anumpohonli ak inli hosh hvchishno a e hvchim ona hatok:

15. Nan a pim vlhpisa, yash pit atamplit hatak inla im a pilesa yokvno nana ka isht il ilauwaiyata he keyu; amba na hvchi yimmi hatuk vt i shahlit hlampko na nan isht a pim



v̄lhpisa hash o, h̄vchishno pulla h̄o isht a pi chito fehna he ak o il ahni.

16. Yohmikm̄vno h̄vsh ai asha ka misha v̄banumpa isht il anumpohonli kv̄t, hatak inla nan isht im ai v̄lhpisa ai v̄lhtaiyaha h̄o isht kil ilauwaiyato ka ch̄i hatuk.

17. Yohmi ka kv̄na hosh ilauwaiyata hokv̄to, mihi yosh Chitokaka ȳo isht ik ilauwaiyatá.

18. Kv̄na hoh kia ilap inli il ahninchī kak osh mihi yosh holitopa keyu, amba kv̄na h̄o Chitokaka ak osh ahninchik mak oh chatuk oke.

## CHAPTA XI.

Kolinhilia ya i hullo pulla hosh ilap inli il ahnichit v̄banumpeshi moma i shahli ka ili tilauechit anohonli: 9 v̄banumpa ha pilla isht im anumpohonli hatuk, v̄ba nan v̄lhpisa imma nan achi ka ai itilau.

1. NAN isht ilauwaiyata li kanomosi ka ant ik yohmí, h̄vs s̄vm ai ahnikbano h̄vchim ahni li; yohmi ka ant ik yohmí, h̄vs s̄vm ahna ch̄i pulla hoke.

2. Chihowa anukfoiyukv̄t nan isht i hullo mak o isht h̄vch̄i huhulo li hokv̄t: ohoyo himita hopoyuksa ahli hatak haleli keyu chohmi mak o, h̄vch ishit Chis̄vs a im otr̄ninchī la hi mak osh, i hatak ach̄vfa ch̄i ka h̄vch it im apob̄vchi li hatuk.

3. Yohmi tuk kia sinti okv̄t ilap kostini pulla kak osh If a haksichi tok a, chohmit na h̄vchim anukfila hash ot shanaia na nan anukfilli apissali ach̄vfa, yvm̄mv̄t Klaist ak o ai ach̄vfa yash o h̄vsh i fil̄mma hinla ka, sa nukshohumpa hoke.

4. Kv̄na hoh kia Chis̄vs inla yv̄mma isht il anumpuli tuk ash keyu h̄o isht anumpulit aya, micha Shilombish inla yv̄mma h̄vchi anukfoiyuka tuk ash keyu h̄o h̄vchi anukfoiyuka, yvm̄mak keyukm̄v̄t v̄banumpa inla yv̄mma h̄vsh aiokp̄vchi tuk ash keyu h̄o h̄vsh aiokp̄vchi hokm̄v̄t, ant ik yohmí, h̄vsh im ahni v̄lhpesa hoke.

5. Apostel moma i shahli fehna kak kia ik alauecho sia keyu, v̄m aboha hoka.



6. Yohmi ka anumpuli hokvt ik imponno sia, yohmi kia nan ithana kak o keyu ; yohmi kvt hvch itin takla ya nana moma ka achukmalit isht e hvchim otaiyani hatuk oke.

7. Nan isht hvchi holitopa chi ka il akanlosechi lish, Chihowa im vbanumpa ha pilla isht hvchim anumpohonli li kak osh nan ashvchi li hatuk o ?

8. Hvchi apelvchit nan isht hvchim ahanta la chi kvt, chvch hiohli inla yo nan im ihishi li kvt, ilap ak osh nan atobbi ho ishishi li hatuk.

9. Yohmi kvt hvch iba takla ahantvt na sa baiyunna kia kva hosh na hvchi kva tuk keyu ; nana kvt ik sum ono ke tuk okvno itibapishi li vhleha Masetonia minti hosh vm atahli tok ; yohmi hoka nana moma ka isht ak hvchim ile wekecho ke tuk ; yohmi hokvt yvmmak o a si yvmohma chi mak oke.

10. Klaist nan isht im ai ahli yvt a sa nukfoyuka hosh, nan isht ilauwaiyata li ilvppa kva hosh Akaia afullota anta kvt, svssacha he keyu hoke.

11. Nanta katiohmi ho ? hvchi hullo li keyu kak o ? Chihowa hv ithaiyanvshke.

12. Amba anumpa si onochi bvna kia, anumpa isht si onocha hi vt ik im iksho ka he ; micha nana ka isht ai ilauata hatuk vt pishno ak inli ho chohmit otaiyana chi kak o, a kaniohmit ahanta li hatuk vt, yvmmak o ai yvmohmit ahanta la chi hoke.

13. Yvma chohmi kvt vbanumpeshi ahli keyu hoke ; na haksichi yosh Klaist nan isht im vta ilahobi hoke.

14. Ilvppv a yakohmi ka anukhlakancha he vhpesa keyu ; Setan ak fehna ak kia inlv tobvt a tohwikeli ka im enchil ilahobi chatuk oka.

15. Yvmohmi hoka yvmmak ash in tishu vhleha ak kia inlv tobvt, nan isht ai vhpiesa in tishu vhleha ha holba hokvt na fehna keyushke ; yvma im ishtaiyopi yvt ilap vt nana a kaniohmi chatuk ak inli ho chiyuhma hi oke.

16. Hatak nana kia im anukfila iksho ik si ahno kashke : yvmmak keyukmvt im anukfila iksho si ahni hoh kia, vlv-

pesa vm ahní; vno ak inli kv̄t iskvtinosi ka isht ilauata lashke, anonti achi lishke.

17. Ilvppa puta anumpuli li kv̄t Chitokaka ak o iakaiya hosh anumpuli li keyushke; amba im anukfila iksho yo chohmit nukw̄aya iksho hosh isht ilauata ilvppa anumpuli lishke.

18. Lawa kv̄t haknip imma ka isht ilauata kak o, vno ak kia isht ilauata li ak inla chi chishke.

19. Hvchishno vto hvchi hopoyuksa kak osh, im anukfila iksho a yukpa hosh ant ik yohmí, hvsh im ahni hoka.

20. Hatak okv̄t yuka ho hvch ikbi hokmá, keyukmvt v̄pvt hvchi tahli hokmá, keyukmvt nana hvchim ai ishi hokmá, keyukmvt ile chahvchi hokmá, keyukmvt hvchi nashuka ya isso hokmá, nana kia ant ik yohmí, hvsh im ahni hoke.

21. Ik ahobo hatuk osh isht a hofahya hi o chohmichit anumpuli lishke. Yohmi ak inli hoh kia kanima kv̄t nana ka isht ik nukwayo kv̄t asha hokma, nan im anukfila iksho chohmit anumpuli hosh, vno ak kia isht ik sa nukw̄iyo ak inlishke.

22. Heblu okla ho? vno ak kia yvm̄mak o sia hoke. Israel okla ho? vno ak kia yvm̄mak o sia hoke. Eblaham ak o isht atia ho? vno ak kia yvm̄mak o sia hoke.

23. Klaist in tishu ho? im anukfila iksho chohmit anumpuli li kv̄t, yvm̄mak oka i shahli li hoke; yvm̄ma i shahlichit toksvli li hoke, atampa ho sa fahama hoke, aboha kv̄llo fohoka li chatuk, a sv̄lli naha kv̄t laua chatuk oke.

24. Chu okla ha pokoli ushta chi ma achvfa hosh iksho ho tahlapi ha im a sa fahama tok.

25. Hituchina ha fuli isht sa fahama tok, himonna ka tv̄li isht sa boa tok, hituchina ha, peni fohkv̄t aya li tok a okpulo tok, ninak achvfa nitak achvfa aiena ka okhvta pakna takakanli li tok.

26. Anowa hopaki kia himonna a nohova li, oka kia isht vm a palv̄mmi, na wehli kia isht vm a palv̄mmi, a yakni achvfa okla hak kia isht vm a palv̄mmi, vbanumpa ik ithano ma isht vm a palv̄mmi, tv̄maha anukaka kia isht vm a pa-

lvmmi, yakni haiaka kia isht vm a palvmmi, micha itibapishi li ilahobi vhleha kia isht vm a palvmmi;

27. Hoyohambli, na hotohompa, himonna nusi vm okpo-honlo fehna, himonna hohchvot, ituk shihinla, micha kapvssa ka, haknip bieka aiena hosh isht vm a palvmmi hatuk.

28. Nana ilvppa moyuma kvt kochanli a mintit a si onv-tohonla ma, nitak moma ka chvch hiohli puyuta nana isht anukfilli mvt a si onvtohonla hoke.

29. Kvta hak osh ik hlampko na vno ak osh sa hlampko ho? kvta hak osh ibetvbli na vno ak osh ik sa nuklibisho ho?

30. Nana ka isht ilauata la he vlhpesa hokmvt, nana kvt isht a ik sa hlampko imma kak o isht ilauata la chi hoke.

31. Chihowa pin Chitokaka Chisvs Klaist Iki, holitopa bilia yak osh, holabi li keyu ka ithaiyana hoke.

32. Hatak pehlichi miko Aletas nutaka ahanta tuk vt Tamaskvs a si ai yukachi bvna kvt, Tamasenes tvma ha tvshka chipota atonichi tok.

33. Yohmi na kishi ho fohkvt tvli holihta okhissushi a hlopullit aka ona hosh yvma ibbak a i hlakofi li tok.

## CHAPTA XII.

Isht il anumpohonli mvt vba atuchina ka nana kvt auet im atokvrt im otvni tok vt anoli, 1, 9 yohmi kia nan isht ik hlampko ak o isht aholitopa hi vt ahni, iki nan i kana mak o chohmit im aya chi kvt im anoli.

1. NANA ka isht ilauata la he okvto vm vlhpesa keyu ak inli chishke. Nana ka Chitokaka yvt sa pisachit vm otvni chi tok ak o isht anumpuli li la chi hoke.

2. Afvmmi auah ushta atampa kash hatak Klaist ibai achvfa ka ithanali tok; yvmmvt haknip o a fohka hokma nana tok chishba, ak ithanoshke; keyukmvt haknip a ai i filvmmi hokma nana tok chishba, ak ithanoshke; Chihowa ak osh ithana; yvmmak atuk ash o hoklit vba ont atuchina ka isht ona tok.



3. Hatak ymma chohmi ka ithana li tok, haknip o a fohka hokmá, haknip a ai i filvmmi hokmá nana tok chishba, ak ithanoshke; Chihowa ak osh ithana hoke.

4. Yvmmak ash o hoklit Palatais a isht ona na, anumpa he keyu puta hatak okvt anumpula he vllhpiesa keyu ho haklo tok.

5. Ymma chohmi kak o isht ilauata la chi hoke: yohmi kia vno ak inli hokvno isht ilauata la he keyu, amba nan isht ik sa hlampko puta kak a hi oke.

6. Isht ilauata ik sa bvna hoh kia, vm anukfila hokvto. iksho ka he keyu hoka; ahli ho miha la hi okvt; yohmi kia ilolambi lishke; keyukma hatak kvna kia sa kaniohmi ho sa pisa, micha a sa haklo kv, isht i shahlichit isht si anukfilla hinla hoke.

7. Micha nana vm otvni apakna pulla ho isht chahvt ak atapo ka chi kak o, kvti haknip shamvlli, Setan in tishu mak o ahama kv, isht chahvt ak atapo ka chi kak o, ishit sahaso ya chi hatok.

8. Ilvppa pulla kak o Chitokaka ya hituchina ha im asilhha li kv, ilvppak ash osh vm a filvmma chi kak atuk oke.

9. Mihma, Nan isht vm i kana yvt isht chim vllhpiesa hoke; nan vm isht hlampko yvt ik hlampko yak o isht im ai vlltaha yoka, vm achi tok. Yvmohmi hoka Klaist isht i hlampko yvt si onvtuyula chi ka, nan isht ik sa hlampko isht ilauata li kak osh vm vllhpiesa chi hoke.

10. Yvmohmi hoka Klaist pulla kak o nan isht ik sa hlampko puta, nan isht sa hofahyali puta, nan isht hotopa puta, na palvmmi atukonofa a hlakofa he keyu puta kak o, isht il ai yukpa li hoke, ik sa hlampko hok mak osh, sa hlampko hokvt.

11. Isht ilauahanta li kak osh ik hopoyukso yo toba lishke; hvs si atoblichit tuk oka; ahninchit isht hvs si anumpula he vllhpiesa tok oka: nana ho si ahomba keyu kia, apostel vllheha i shahli fehna kak kia asha ka hikia li keyu hoka.

12. Apostel isht atokowa yvt hvch itin takla ya ai

yvmohmi kv̄t, nan nuk̄taiyalv̄t achunanchi, nan isht atokowa puta, nan isht nukhlakvshli puta, na fehna yvmihchi puta aiena moma ka, isht ai yvmohmi mv̄hli tok.

13. Nanta hak ɔ chvch inla puta ka isht hvch ik a lauwo tuk oh cho? nana ka ak hvch̄i kv̄llo ilvppak atuk ak ɔ? vno fehna kv̄t hvchim ashvchi li tok ilvppak atuk ash hv̄s sa kashofashke.

14. Yakeh! ont isht atuchina mak ɔ hvch im ona la ch̄i kv̄t vm vlhtahvshke: yohmi kv̄t hvch̄i kv̄llo la ch̄i keyu; na hvchimmi hak ɔ keyu, amba hvchishno yak ɔ hoyo li hokv̄t. Ūlla yak osh īki micha ishki ita tuklo ka nana im ahayucha he vlhpesa keyu, amba īki micha ishki ita tuklo kak a hetuk oke.

15. Micha hvchishno pulla kak ɔ a lushumichit ik si ataha kia sai yukpa fehna hi oke: hvch̄i hullo li kv̄t isht i shahlich̄i li fehna kia, ik lauwo hvchim a holitopa li hoke.

16. Yohmi kia ant ik yohm̄i, hvch̄i kv̄llo li tok keyu: yvmohmi kia ī kostini li hatuk osh, a haksichit hvchim ishi li tuk ɔ, achi hoke.

17. Hvch̄i pila li tuk yvmmak ash ɔ kanimi ka nan isht hvch im ai ishit il ahayuchi li tuk ɔ?

18. Titv̄s vt hvchim ona he, ahni lish, itibapishi ma aieninchit pila li tok. Titv̄s vt na hvchim ai ishit il ahayuchi tuk ɔ? anukfila achv̄vt il itv̄nowa tuk keyu? ataya achv̄fa hɔ il ai itv̄nowa tuk keyu?

19. Anonti nana isht hvchim il il a miha, hvchim ahoba cho? Klaist a iba foyuka hosh Chihowa itikba ya il anum-pulishke, yohma kv̄t nana moma e yvmihchi kv̄t, p̄i holitopa fehna vhleha ma! isht hvsh a hlampka he ak oke.

20. Yvmmak keyukma ona likmv̄t, itachowa, it ī potv̄nno, it ī nokowa, it ī nukhobela, ashaka nana a mihachi, it̄i shukshov̄t na mihachi, ilefehv̄chi, itakvshkoa, hvsh aiena cha vlhpesv̄t hvsh maya na, hvchi ahayuchi la hetuk ash osh keyu hɔ hvchi ahayuchi li, yohmikmv̄t a kaniohmi li hv̄s sa pisa hetuk ash ɔ keyu hosh, hvchim otaiyani la he ká, ahnit sa nukshohumpa:

21. Yohmi ka anonti ona likma, an Chihowa yv̄t a hvchim

itin takla a si akanlosechi na nan ai ashvchi mashko tuk vt na liteha, micha na haui, micha chukvsh nan isht haui aiena ka yvmohmi tuk vt, i filvmmmit ik ile kostinincho kisha tuk o isht yahaya li yoba ná.

### CHAPTA XIII.

Nan ibetvblichí vhleha hv́t ile kostininchi keyu ka nana im apesa hi vt miha, 1; 5 nana ka a yimmi hatuk vt il imoma ka pisvt ik ono kisha h́o nan a kaniohmi atuk vt falamvt il a chukmala hi a achi.

1. ILUPPUT isht atuchina mak o hvchím aya lishke: Nan atokoli tuklo, tuchina itih h́o anumpa moma kv́t isht ai ahlashke.

2. Tikba hoka hvchím anoli li tok osh, anonti atukla mak o hvchi takla anta li chohmit tikbanli hvchím ano li lishke; yohmi kv́t himak a ik saksho hatuk osh tikba ka yoshuba tok ash, micha inla moma aiena ka pit i holissochi li, yohmi kv́t anonti ona likmvt, apoanchi la he keyu hoke.

3. Klaist vt isht si a hvchím anumpohonli tuk a atokowa hvsh hoyo hoka, yvmmv́t hvchishno yokvno ik hvchi hlampko keyu, amba hvchi ai a hlampko hoke.

4. Ik hlampko hosh ititaiyukhvna a takalit illi tok kia, Chihowa imi hlampko pulla h́o okchaya hoka, pishno ak kia yvmma iba chafvt ik pi hlampko; yohmi kia Chihowa imi hlampko yvt hvchi onvtula chi pulla ka, yvmmak ash iba chafvt pi okchaya chi hoke.

5. Ai yimmi' ka yoka hvsh ibai achvfakma, nana kv́t hvchishno inli hvsh ile pisashke; hvchishno inli imomaka hvsh pisashke. Hvchishno inli hvch ik ithano cho? Chisvs Klaist vt hvch iba foyvka ka, ik ai ahlo hvchia keyukmvt.

6. Yohmi ka pishno yvt ik ai ahlo pia keyu ka, hvsh ithana chi ka sa yimmishke.

7. Michá Chihowa ya pit im asilhha li kv́t, nan ik v́hpeso ka ik hvchi yvmohmo ka he ak oke: il ai ahli kv́t isht il otvna he ak keyu, amba ik ai ahlo yo pia e chiyuhmi kia, hvchishno yokvto nana achukma kak o hvsh yvmohma he ak oke.



8. Anumpa aḥli il i sanali kv̄t nana e kanihma he keyu, amba anumpa aḥli ya il apelvchi yak oka.

9. Ik pi hlampkokmvt, hvchi hlampko kak o, pi yukpa hokvt: anonti ai aḥlit hvchim vlhtaha he ilvppak kia e hvchim ai ahni hoke.

10. Yvmohmi ka ik saksho hosh ilvppa puta ka hvchi holissochi lishke, ilvppak atuk keyukmvt ont hvch iba takla anta likmvt, Chitokaka isht im ai aḥli isht hlampkochi la he, micha isht okp̄ni la he ak keyu hō vma tok ak o anumpa ishit halupvchi la hetuk yoba ká.

11. Ishtaiyopi ka itibapishi li vhleha ma! na hvchi yukpashke. Ai aḥlit hvchim vlhtahashke, ahopohla achukmvt hvchim anukfila achv̄vt, it i nanaiyvt hvsh ai ashashke; mikma Chihowa holitoblit nan isht it i nanaiyvchi yosh hvchi anukfoyuka chi hoke.

12. Suk̄sowa holitopa yo isht hvsh it aiokpvchashke.

13. Ūbanumpi yimmi aḥli puta kv̄t pit hvchi aiokpvchishke.

14. Chitokaka Chisvs Klaist nan isht i kana, micha Chihowa isht i hullo micha Shilombish Holitopa ai itibai achv̄fa aiena kv̄t hvsh moyuma ka hvchi anukfoyukashke. Amen.

## HOLISSO PAL VT

## CHVCH KALESHAN

YAKNI A HIOHLI HO I HOLISSOCHI TOK.

## CHAPTA I.

Hatak keyu, amba Chihowa pulla hosh vbanumpa isht anumpula chi ka atokoli tok a Pal vt achi, 1: 6 Kaleshan vbanumpuli vt chekosi vbanumpa ha i filami kak o okokko! ahnit miha; 11 hatak o keyu, amba Chihowa yo vbanumpa ha im ai ithvna; 14 nana ka ik vlhtoko kisha kvv hatak kaniohmi hatuk vt anoli, 17 yvm-mak atuk vt ont i himmak o im anukfila kaniohmi kvv anoli.

1. PAL apostel sia kvv hatak kaniohmi ho nan a si vlh-toka tok keyu, mikmvt hatak nan ahni hatok keyu, Chisvs Klaist, micha Iki Chihowa, yvm-mvt illi tok a falaminchit tanichi tok ita tuklo kak atok:

2. Yohmi ka itibapishi li vhleha si apehvt maya kvv, mo-mvt chvch Kaleshan yakni hiohli ka pit hvchi aiokprchi lishke.

3. Iki Chihowa, micha hvpin Chitokaka Chisvs Klaist ita tuklo nan isht i kana, micha isht it i nanaiya ita tuklo kvv hvchi anukfoyukashke.

4. Yvm-mak okvt Piki Chihowa nan ahni tok mak o yakni ik achukmo ilvppa a pi a hlakoficha chi hosh, nan il aiashv-chi pulla kak o yvm-mak okvt il im issa tok.

5. Chihowa Piki yvm-mak osh holitopvt bilia cha bili-ashke. Amen.

6. Chekosi fehna ho Klaist isht i kana isht hvchi hohoyo

tok a i filmmit, vbanumpa inla yo hvsh eshi ka, okokko! ahni lishke.

7. Yvmmvt vbanumpa keyu; amba kanimi kvv hvchi anuktuklochi cha, Klaist im vbanumpa ha shanaiyvchi bvna kvv ashvshke.

8. Yohmi kia pishno, keyukmvt vba yakni enchil ak ok-má nana hosh vbanumpa inla isht e hvchim anumpohonli tuk a keyu ho isht anumpulikmvt, okpulot taha he ik im vlvhpsá.

9. Tikba ka e hvchim achi tok a, anonti himak a mih mak inli ho hvchim achi lishke; Hatak nana kia vbanumpa hvsh eshi tok a inla yo isht anumpulikmvt, okpulot taha he ik im vlvhpsá.

10. Himak a hatak ak osh, keyukmvt Chihowa ak osh a kana he ahni li cho? hatak o yukpali sa bvna ho? hatak ak o yukpali li momakmvt, Klaist in tishu sia ha he keyu hokvt.

11. Amba itibapishi li vhleha ma! hatak nan ahni keyu ho vbanumpa isht anumpohonli li tuk vt hvch ithvnanchi lishke.

12. Hatak o im ai ishi li tuk keyu, micha im ai ithvna li tuk keyu hokvt; amba Chisvs Klaist ak osh vm otvninchi hatuk.

13. Nitak chashpo ma kaniohmit Chu okla im vbanumpa anukfoyukvt avvt, atablichit Chihowa in chvch a ilbvshalit, chukilissvchi li;

14. Yohmi kvv Chu im vbanumpa ithvna li kvv, vm okla achvfa ai itilau li laua ka i shaiyahlit, an tikba vhleha im anumpa vlvhpsa ik holisso atok a amosholi li fehnvt im antia li tok a, hvsh haklo tuk oka.

15. Yohmi tok kia Chihowa yvmmak osh hvshki im oshvto ya ai ishit sa kohchi cha, isht i kana isht sa hoyo tok,

16. Yohmi kvv vlvhpsa ahni cha, Ushi ya si ai otvninchi kvv, vbanumpa ik ithano vhleha ha vbanumpa isht im anumpohonli la chi ak atok; yohmi mak inli ho hatak nana kia it im anumpuli li tok keyu.

17. Mihmvt Cheluselem a ivt apostel vhleha sa tikba tok



a ont pisa li tok keyu; amba Alabia yak o ona li tok osh, anonti falamvt Tamaskvs a ona li tok.

18. Atuk osh afvmmi tuchina ma Pita ya pist ia hosh Cheluselem a ona li tok; mihmvt ibai anta li nitak auah tahlapi tok.

19. Yohmi kia apostel vhleha inla yano ak peso, Chemis Chitokaka itibapishi ak illa tok.

20. Chihowa itikba yo hikvt nana puta hvch i holissochi li kv, holabi li keyu ka ho pesa.

21. I himmak o Silia, micha Silisia foka ka ona li tok.

22. Micha Chutia hvch puta Klaist ibafoyuka yvt sa nashuka ya ik peso kisha tuk atok.

23. Amba chashpo ka pilbvshali tok yvmmak ash ot himak ano ai yimmi ka tikba ka okpvi tok vt isht anumpohonli ka haklo kak illa tok.

24. Micha vno ak atuk mak o Chihowa ya holitobli tok.

## CHAPTER II.

Atukla ma Cheluselem a ia tok, nana kv yvmma akaniohmi tok a anoli, 1: 11 Antiak a anta mvt, nana ka a yohma he vhpesa keyu kv Peta yvt yohmi na Pal vt im avmmi, mihmvt na yimmi kak keyu hokma, kvna hosh nan vhpiesa he keyu ka im anoli.

1. YOHMI tok a i himmak afvmmi auah ushta ma anonti vno, Banabas ita, tuklot Titvs a ilauinlit Cheluselem a il ia tok.

2. Yohmi ka Chihowa yak osh vm otvvinchi na ona lish, vbanumpa Chentail vhleha ha isht im anumpohonli li tuk vt isht im anumpuli li tok; yohmi kia vbanumpa tosholit aya li tuk a peh pilla na, anonti himmakma vbanumpa tosholit aya li kia peh pilla na, ahni li hatuk osh luma hosh hatak annoa achukma kak o im anumpuli li tok.

3. Yohmi ka Titvs vt si awant aya tuk vt, Klik atuk o, hakshuk tupa he i mihia kia, ik yvmohmo ki tok.

4. Yohmi ka yvmvt itibapishi ik ahlo takla iba chukowa kv, Klaist Chisvs puyulla ho a yuka keyut il ahashwa ka pim

akostinincha chi hosh lumvt piba chukowa tok; yohmi kvt falaminchit pi yukacha chi hatok; yohmi tuk kia ik yohmo ki tok oke.

5. Ubanumpa ahli yvt hvchin tonla chi kak o, yummak ash o hvshi kanvlli achvfa kia i nutakvt il a kanvlli tok keyu.

6. Amba, kvna hosh holitempa vhleha ahoba kvt, nana ho kaniohmi yoh kia, yummak okvto nan isht vm a kaniohmi keyu; Chihowa yvt hatak a nashuka yak o pisa keyu; holitempa ahoba yummak ash o it im anumpuli li tok a nana isht abafohki tok keyu.

7. Amba hakshup ik tapo vbanumpa in tosholi la hi vt si vlhtoka ma, hakshup tupa vbanumpa in toshola hi vt Pita ak osh vlhtoka tok a pisa mvt;

8. Pita ya hakshup tupa vbanumpa in toshola he atokoli tok mak osh vbanumpa isht ai ahlichi tok, anonti mih mak inli hosh vbanumpa Chentail a in tosholi li ka isht ai ahlichi tok oka.

9. Yohmi ka Chemis, Sefas, micha Chan, aiena kvt pehlichika yo ahoba hatuk osh isht i kana vma tok a pisa mvt, vno, micha Banabas, il ita tuklo kvt il iba holhtina chi kak o, ibbak isht impakimma ya pima tok; yohmikma vbanumpa ik ithano yak o im anumpulit il iakma, ilap vt hakshup tupa vbanumpa in toshola chi hatok.

10. Iibvsha ma il ithana he pim ahni tok; yummak okvno vno ak kia aiokpanchit achunanchi li tok.

11. Yvmohmi tok kia Pita yvt Antiak a ant anta ma, atokovt im asanali li tok, nan ik vlhpeso yohmi tok ak oka.

12. Chemis vt tohno tok a ik lo kisha kano, Pita yvt Chentail a ibai impa tok; yohmi tok kia ai vla ma, hakshup tupa ya i nukshopa hatuk osh, kohevvt il a filvmmi tok.

13. Mihma Chu inla ak kia nan il ahobi tok; yohmi kak o Banabas ak kia nan il ahobi ka iba taklvt yvmohmi tok.

14. Yohmi kia yohmit vbanumpa ieshit ai vlhpiesvt itvnohwa keyu ho pisa li mvt, momvt haklo ho, Pita ya, Chishno vt Chu chia hoh kia, Chentail nana a kaniohmi ka ish yvmohmi cha, Chu nana a kaniohmi ka chik yvmohmo

ho kak osh, nanta katiohmi ho Chentail vt Chu chohmit ahanta, he ish im ahni cho? im achi li tok.

15. Pishno vt Chu yosh il vtta tok, yohmi kv̄t Chentail nan ashv̄chi pia keyu,

16. Hatak vt v̄ba nan vlhpisa iakaiya kak osh isht ai vlhpiesa keyu, amba Chisvs Klaist ī yimmi hok mak osh isht ai vlhpiesa ka ithaiyana hosh, v̄ba nan vlhpisa yak ō keyu, amba Klaist ī yimmi mak ō isht a pi vlhpiesa chī kv̄t, Chisvs Klaist il ī yimmi tok; v̄ba nan vlhpisa iakaiya hokv̄no hatak nana hosh isht ai vlhpiesa he keyu hoka.

17. Yohmi ka Klaist ak ō isht ai vlhpiesa pi bunna hokv̄to, pishno vt nana ashv̄chi pia moma hatuk vt otaiyani; yohmi ka Klaist vt nan ai ashv̄chi in tishu ho? ik yvmohmo pullashke.

18. Nana ka okp̄ni li tukv̄t anonti ikbi likmv̄t, nan vlhpisa kobv̄ffi toba li hoke.

19. V̄ba nan vlhpisa pulla ho v̄ba nan vlhpisa ya im illi li kv̄t, Chihowa yak ō ai okchaya la he atok.

20. Klaist ā ititaiyukhv̄na iba takalit sv̄lli hoke: yohmi kia si okchaya hoke; yohmi kv̄t v̄no ak ō keyu, amba Klaist ak osh okchayv̄t sa foyuka hoke; himak ā okchayv̄t haknip a halaia li moma hokv̄to, Chihowa Ushi, yvm̄v̄t ā hullot si vlhtobv̄t illi tok ā ī yimmi li hosh si okchaya hoke.

21. Chihowa nan isht ī kana yā akshuchi li keyu; nan isht ai vlhpiesa hv̄t v̄ba nan vlhpisa yak ō isht atoba, yvm̄mak okmv̄no Klaist vt pilla illi tok.

### CHAPTA III.

V̄banumpa hā ī filv̄m̄mi ka nan i miha; 6 k̄v̄na hosh yimmi hokv̄to nan ai vlhpiesa; 9 mikmv̄t Eblaham ā ibaiyukpa; 10 na laua ho isht miha hosh ilv̄ppa anoli.

1. IM anukfila iksho Kalesan okla ma! hv̄chi nishkin a pisa yō Chisvs Klaist vt ititaiyukhv̄na atakalit illi tuk vt hv̄chi tikba yā ai anohowa tok ā, kv̄ta mak osh hv̄chi yoshubli na v̄banumpa ahli yā hv̄sh im antia he keyu cho?



2. Ilvppak illa hō hvchi ai ithvna sa bunnvshke ; vba nan vlhpisa ya hvsh iakaiya kak osh Shilombish Holitopa ya hvsh ieshi tok oh cho ? akchu ? haklot hvchi yimmi kak atuk o ?

3. Hvchim anukfila iksho fehna kv̄t hvsh yvmohmi cho ? Shilombish o anukfoyukv̄t isht hvsh ia kash ot, himak ano haknip o isht a hvchi vlhtaha cho ?

4. Nan laua hō isht hvchi ilbaiyasha ka peh pilla ha tok o ? peh pilla keyu hatok pulla hoke.

5. Yvmohmi ka Shilombish a hvch ima cha, hvch itin takla ya na fehna puta ka ai yvmihchi kv̄t, vba nan vlhpisa ya hvsh im antia tok ak o ? akchu ? vbanumpa haklot a hvchi yimmi kak atuk o ?

6. Yvmmak inli hō chiyuhmit Eblaham vt Chihowa ya i yimmi tok : mihmvt nan isht ai yimmi kv̄t ai vlhpiesa im vlhpisa tok.

7. Yvmohmi ka hvsh ithaiyanashke, yimmi puyuta yvmmak okv̄to Eblaham im vlla vhleha yoke.

8. Mihma Holisso Holitopa yvt Chihowa yvt vbanumpa ik ithano ya na yimmi pulla kak o isht ai vlhpiesacha hi a tikbanli pisa kak osh, Eblaham a vbanumpa ha isht im anum-pulit, Chishno ak o okla moma kv̄t na yukpa hi oke, achi tok.

9. Yvmohmi hoka kv̄na hosh yimmi yokv̄to, mihi yosh na yimmi Eblaham a iba taklv̄t na yukpa hoke.

10. Vba nan vlhpisa anukchieto aiyuka hokv̄to, na hotopa anumpa hv̄t onv̄tonla bieka hoka : holisso kv̄t, Kv̄na kia vba nan vlhpisa holisso atakali puta ka achunanchit ik im antio aiyuka hokv̄no, na hotopa anumpa hv̄t onvtuyula hoke achi hoka,

11. Amba hatak kv̄na kia Chihowa ai itikba yokv̄no vba nan vlhpisa ya isht ai vlhpiesa he keyu kv̄t otv̄nishke ; Hatak vlhpesa yokv̄to yimmi pulla kak osh isht ai okchaya hi oka.

12. Yohmi ka vba nan vlhpisa yvt ai yimmi ka yokv̄no ahalaia keyu, amba, Hatak vt yvmma yvmihchi hokv̄to, yvmmak o isht ai okchaya hi oke.

13. Klaist vt pi vlhtobvt na hotopa onvtula toba cha, vba

nan vlhpisa isht a hotopa ya a chumpvt pi falaminchi tok ; holisso kv̄t, Kv̄na kia iti a atakalikmvt, na hotopa anumpa hosh onvtula hoke, achi hoke.

14. Yvmohmi hō Chisvs Klaist pulla hatuk mak o Eblaham nan isht aiyukpa yvt Chentail a onvtula chī hatok ; yvmohmi hō pi yimmi pulla kak osh, Shilombish pim issa tok a il isha chī hatok.

15. Itibapishi li vhleha ma ! hatak nana a kaniohmi yo anumpuli lishke : peh hatak nana it im vlhpisa yoh kia kv̄llochi hama, hatak kv̄na hosh akshochi, micha ibafohka he keyu.

16. Yohmi ka Eblaham, micha im isht atiaka yak o nan im ihisa tok ; Laua nana hō ahobv̄chit isht atiaka vhleha, achi keyu ; amba achv̄fa chohmichit, Chim isht atiaka yak o, achi yvmmv̄t Klaist ak oke.

17. Yohmi ka ilv̄ppak o achi lishke, Nan itim vlhpisa Klaist isht anumpa yv̄mma Chihowa yvt kv̄llochi ha ya, av̄v̄m̄mi tahlepa ushta pokoli tuchina ha yo v̄ba nan vlhpisa toba tok vt akshocha he keyu, yohmi kv̄t nan im issa tok a ik ai ahlecho ka he atok keyu.

18. Ūba nan vlhpisa im antia pulla kak o nana ai isha he vlhpesa kv̄t ai yvmohmi hokma, nan im issa yak keyu hoka ; yohmi kia Chihowa yvt nan im issa tuk osh Eblaham a ima tok.

19. Yohmi ka v̄ba nan vlhpisa yvt nanta hō katiohmichi hatok oh cho ? Nan vlhpisa kobv̄ffi pulla kak o vlhpisa tok o, isht atiaka yv̄mma nana im ihisa tok vt v̄lak mak a he vlhpisa tok ; yohmi ka enchil vhleha hosh iti takla hikīvt tosholi ya i nutaka hosh nan vlhpisa ya anolit haiakv̄chi tok.

20. Yohmi ka ititakla hikīvt tosholi vt achv̄fa hō ititakla hikīvt tosholi chatuk keyu, amba Chihowa yv̄to achv̄fa hoke.

21. Yohmi kv̄no nan vlhpisa yvt Chihowa nan isht im issa tok a i sanali cho ? ik yvmohmo pullashke ; nan vlhpisa ima tok intonla kv̄t okchalinea hinla hokma, nan vlhpisa pulla kak o isht ai vlhpiesa hi atok o mv̄hlishe.

22. Holisso Holitopa yvt moma ka nan ai ashv̄chi i nutakv̄chit ompohomo hoke ; yohmi hō Chisvs Klaist i yimmi

pulla hō nan ai yukpa im issa tok a kva hosh i yimmikmt isha hi atok.

23. Yohmi kia ai yimmi ka yvt ik lo kisha ma, vba nan vlpisa ya il i nutakvt. il ai ashvt, ai yimmi ka yvt himmak o haiaka he yak o il anukchieta hi a pi atoblichitok.

24. Yvmohmi ka vba nan vlpisa yvt pi kostininchit yosh Klaist a pisht im ona na, na yimmi pulla hosh isht ai vlpiesa hi atok.

25. Yohmi tok kia ai yimmi ka yvt ai vla ha yokvno, kostininchit ya il i nuktaka keyu hoke.

26. Klaist Chisvs a i yimmi pulla hosh hvsh moma kv Chihowa im vlla hvchia hokvt.

27. Klaist a ishit hohchifot hvchi baptismo tok aiyuka hokvto, Klaist a isht hvsh foyuka hoke.

28. Chu okmá, Klik okmá, nana kv iksho; yuka yokmá, yuka keyu yokmá, nana kv iksho; nakni okmá, ohoyo hokmá nana kv iksho, amba hvsh moyuma kv achvvt Klaist Chisvs a hvsh ibafoyuka hoke.

29. Yohmi kv Klaist a immi hvchia hokmt, Eblaham isht atiaka hvchia, micha nan im issa tok a ai isha he vlpesa hvchia hoke.

#### CHAPTA IV.

Nan vlpisa i yuka pia hatuk a Klaist akosh na pi hlakofichi; mikmt Chihowa ushi vhleha pikbi, 1; 6 yvmma i chukvsh okvno Chihowa yvt ilap ushi imi shilombish o auct nukfokihinchi. 22 Akah micha Sela itatuklo kv nan isht vlpisa.

1. ANONTI ibai isha he vlpesa kv, vlla moma hokvto, nana moma kv immi hoh kia, yuka ha nan isht inla keyu hoke, achi lishke.

2. Amba kostininchit, micha apesvchi ya i nuta kv ahanta na, iki vt im apesa tok nitak a ona chatuk oke.

3. Yvmmak inli hō chiyuhmit, pishno ak kia vlla pia momo mt, yakni nan ai ithvna ai ishtia vmmona ya i nutakvt yukvt il ashwa tok.

4. Yohmi tok kia nitak ont vlpesa kv vla ma, Chihowa



yvt Ushi vt pila na, nan vhlpisa i nutaka toba hosh ohoyo ho a toba tok.

5. Uba nan vhlpisa i nutakvt asha tuk a falaminchit pi chumpa na, Chihowa ushi vhleha e toba chi hatok.

6. Yohmi tok a ushi vhleha hvchia hoka, Chihowa yvt Ushi imi Shilombish a hvchi chukvsh a anukfohki na Abba Iki achit tahpahanla hoke.

7. Yvmohmi hoka himak a pilla ka yuka chia keyu, amba ushi mak o chia hoke; yohmi kvv ushi chia hokmvt, Klaist pulla hatuk mak o Chihowa immi ha ai isha he vhlpiesa chia hoke.

8. Yohmi kia tikba ma Chihowa hvch ik ithano mvt, chihowa nana keyu ka hvsh i yuka tok.

9. Yohmi tok kia, himak a Chihowa ya hvsh ithana ha ya, yvmmak keyukmvt, Chihowa yak osh hvch ithana ha ya, katiohmi ho anonti nan ai ithana ai ishtia vmmmona isht hlampka he keyu, micha isht ai yukpa he keyu ka falamvt i nutakvt yuka hvchi bvna cho?

10. Nitak il aiyuka, micha hvshi talali, micha afvmmi vhlpisa aiena ka hvsh holitoblishke.

11. Peh pilla ho hvchin toksvlit isht a svlvvsha tuk yoba ka ahnit, ahah! hvchim ahni lishke.

12. Itibapishi li vhleha ma! hvchishno ak inli chohmi li hokvt, vno ak o hvsh chohma chi ka hvchim asilhha lishke: nan ik vhlpeso hvv sa yvmihchi tok keyu kvvmohmi hoke.

13. Vmmona hoka haknip ik hlampkot hoyubli hosh katiohmit vbanumpa ha hvchin tosholi li tok a, hvsh ithanvshke.

14. Micha imomaka pisa li yvt sa haknip a afoyuka ka ik shitlemot hvch ik sa kanchi ki tok; amba Chihowa im enchilchohmichit, Klaist Chisvsv mak o, chohmichit hvv sashi tok.

15. Yokmi kvno nan isht aiyukpa ya isht hvsh anumpuli tok mvt? hvsh yvmihcha hinla nana hokmvt, hvchi nishkin a hvsh kohchi cha, hvv svma hinla tok a, atokowa hvchim anoli lishke.

16. Yvmohmi ka avli ho hvchim anoli li kak osh hvchin tvnvp o toba li cho?

17. Hvchi hullo fehna ahoba kia vllhpesa keyu hoke; ahli, hvchi ataklvma he ahni na hvch ik sa hullo hosh, ilap ak o hvsh i hulla chi kak atok oke.

18. Yohmi kia nana achukma hokvno i hullo fehnvt bilia kak o vllhpesa hoke; micha hvchi takla anta li kak bano keyu.

19. Um vlla chipunta vhleha ma! ohoyo vlla esha chi nukhvmi ka a hvchim a chohmi li tuk atok o Klaist vt a hvchi atobak mak a chi hoke.

20. Himak a hvchi takla anta lish, vm anumpa ha inlanchi la he sa bvnvshke; a hvchi anukfilli la he ak ithanoshke.

21. Uba nan vllhpisa ya i nutaka hvchi bvnna kvv, vba nan vllhpisa ya hvchik haklo ho? oh vm anoli

22. Holisso kvv, Eblaham vt ushi in tuklo tok; achvfa kvv ohoyo yuka yak o ushi yokma, achvfa kvvto ohoyo yuka keyu yak o atok, achi hoka.

23. Yohmi ka ohoyo yuka ushi yvt haknip nana a kaniohmi chatuk a chiyuhmi tok; amba ohoyo yuka keyu ushi vto im issa tok ak atok.

24. Yvmvvt nan isht vllhpisa yoke: ilvppvt nan it im vllhpisa tuklo yoka; achvfa kvv nvni chaha Sainai a tovvv yuka ikbichi, yvmvvt Akah yak oke.

25. Akah ilvppvt nvni chaha Sainai yosh Alabia yak o hikia hosh, Chelusalem vt himak a talaia ka isht vllhpisa hosh, im vlla puta ka il ai eshit yuka hoke.

26. Amba Chelusalem vba yokvto yuka keyu hosh, e moma ka hvv ishki yoke.

27. Holisso kvv, Ulla ik chim iksho, vlla ish eshi chatuk keyu ma! chi yukpashke; vlla esha chi chi nukhvmi chatuk keyu ma! chitolit ish tahpahanlashke; ohoyo vlhtakla ya tuk kia vlla in laua kvv hatak im asha tuk kak kia, i shahli hokvt, achi hoka.

28. Yohmi ka itibapishi li vhleha ma! pishno vt Aisaak atok a, chohmit nan im issa tok ak o im vlla pia hoke.

29. Yohmi ka nitak yvmma haknip o kaniohmi chatuk a chohmit ai vta yvt Shilombish ai vta ya ilbvshali tok a, chohmit himak ak kia yvmohmi hoke.

30. Yvmohmi ka Holisso Holitopa yvt nan tuk achi hō ? Ohoyo yuka, micha ushi ita tuklo ka kohehit ish kanchashke: ohoyo yuka ushi vt ohoyo yuka keyu ushi ya nana ibai isha he vlhpesa keyu hoka.

31. Yvmohmi hoka itibapishi li vhleha ma! ohoyo yuka im vlla pia keyu, amba ohoyo yuka keyu ak oke.

## CHAPTA V.

Klaist pulla hatuk mak o yuka keyu toba tok vt yvmmak fehna hō ai itanohowa chi ka i miha, 1; 3 Chu okla nan im vlhpisa yokvno ik im antio ka chi, amba nan i hullo pullvt itanohowa he; 19 haknip imma atoksvli kvv kaniohmi ka anoli; 22 mihmvt shilombish imma nan vni ka anoli.

1. Y VMOHMI hoka a yuka keyu hō Klaist vt pisht ona tuk a kvllot hvsh hielashke, micha anonti yuka ikunla im abana ilvppa isht hvch ik il onochō kashke.

2. Yakeh! Pal sia hosh hakshup hvchi tupa hokma, Klaist vt nan isht hvchim ai achukma he keyu ka hvchim achi lishke.

3. Anonti hatak moma kvv hakshup tupa yvmmak okvto, nan vlhpisa moma ka yvmihcha he aheka in takanli ka atokolit im anoli lishke.

4. Kvna hvchia hosh nan vlhpisa yak o isht hvchi ai vlhpiesa hokma, Klaist vt nana isht hvchim ai achukma keyu; isht i kana ya i filvmmmit hvchi tula hoke.

5. Yohmi ka Shilombish pulla hatuk mak o na yimmi hosh isht ai vlhpiesa hi a il esha he ahnit, e hōhoyoshke.

6. Chisvs Klaist imma hokvno hakshup tupa yokmá, hakshup ik tapo yokmá, nana hoh kia nana a kanihma he keyu hoke; amba ai yimmi ka i hullo isht atoba yak oke.

7. Vlhpesa hosh hvsh maleli tuk; anumpa ahli ya hvch ik im antio ka chi ka, kvta hosh hvchi ataklvmmi tuk o ?

8. Hvchi anukfohki na vlhpesa hvsh ahni ilvppvt hvchi hoyo tok ak o a minti keyu hoke.

9. Isht shatvmmichi iskvtinosi kia yvmmvska ya mominchit shatvmmichi chatuk oke.



10. Chitokaka pulla kak o hvchi yimmi li kv̄t, nana inla hvch im anukfila he keyu ak oke ; amba kv̄na hatuk oh kia mihi yosh hvchi anuktuklochikm̄v̄t, nan vlhpisa yv̄t onvtula hi oke.

11. Yohmi ka itibapishi li v̄hleha ma ! vno yv̄t hakshup t̄v̄pa ya isht anumpuli li moma hokak osh, nanta katiohmi h̄o n̄an ilbv̄sha yv̄t si onvtula moma cho ? yv̄mmak okma ititaiyukhv̄na isht ai ibetv̄bli v̄t yokopa hoke.

12. Hvchi anuktoklochi v̄hleha hatuk v̄t chv̄ch a a t̄v̄p̄v̄t kv̄niakbano ahni lishke.

13. Itibapishi li v̄hleha ma ! a yuka keyu ȳo hvch isht on̄a tuk oke ; a yuka keyu yv̄to haknip yukpali keyu, amba it i hullot it apelahanchi yak oke.

14. Anumpa achv̄fa h̄o v̄ba nan vlhpisa a moma kv̄t isht ai ahli hoka ; yv̄mm̄v̄t ilv̄ppak oke, Chin chuka panta hatak a ish i hullo kv̄t chishno ak inli h̄o chim itilau-ashke.

15. Amba iti koblit, v̄p̄v̄t hv̄sh ititahli hokm̄v̄t, iti okp̄v̄nit hvch ik iti tahlo ka ch̄i kv̄t, ahah ! hv̄sh ahnashke.

16. Yohmi ka Shilombish iba foyukv̄t hv̄sh ayashke ; yohmi hokm̄v̄to, haknip nan ahni okpulo ya hvch ik ai ah-lecho ka ch̄i hoke.

17. Haknip nan ahni kv̄t Shilombish a im i sanalikma, Shilombish nan ahni kv̄t haknip a im i sanali hoke ; micha ilv̄pp̄v̄t it im inla hoke : yv̄mohmi h̄o nana yv̄mihcha he hv̄sh ahni kia hv̄sh yv̄mihcha he keyu hoke.

18. Amba Shilombish ak osh hvch isht aya hokma, nan vlhpisa ya hv̄sh i nutaka keyu hoke.

19. Yv̄mohmi ka haknip atoksv̄li ot̄ni yv̄mm̄v̄t ilv̄ppak oke : Haui toba, itin lumaka, na liteha, haui anukfilli,

20. Na holba aiokp̄v̄chi, ikh̄ish isht yushpakama, iti nukkilli, itachowa, iti shahshohlechi, anukhobela, iti yichi-na, ita kv̄shkov̄t nan vlhpisa i sanali, v̄banumpuli iksa iti filamohli,

21. It i pot̄v̄nno, hatak bika v̄bi, okishko shahli, okishkot t̄v̄ssahv̄t aya, micha. yv̄mma chohmi puta ka tikba ma hvchim anoli li ak inli tok kia, himak a atuklant hvchim

anoli li ka, ilvppa yvmihchi puta kv̄t Chihowa im apeli-chika yō isha he vlhpesa keyu hoke.

22. Amba Shilombish o isht ai vni hokvto, I hullo, nayukpa, it i nanaiya, nuktaiyalvt nokowa vlahā, anukfila yohbi, nana achukma yvmohmi, na yimmi,

23. Il aiokha bv̄nna keyu, ahah! ahnit il oktampli; yv̄mma chohmi ka onvtonla kv̄t nan vlhpisa yvt ikshoshke.

24. Yohmi ka kv̄na hosh Klaist a immi hokvto haknip, micha haknip nan isht i hullo, micha nan ai ahni okpulo ya haknip ash aieninchit ititaiyukhv̄na a takalichit illichī hoke.

25. Shilombish ak o il ai okchaya hokmvt, Shilombish a iba foyukvt il iba nohōwa mak inlashke.

26. Nana ik ahobo a holitopa ya ahnit it i nokowvchit, it i potv̄nnot kiloh ai asho kashke.

## CHAPTER VI.

Kv̄na hosh nana kv̄t ik im vlhpeso ka i kanvt nan im anukfilla he, micha nan i weki ka ib ai isha he i miha, 1; 6 v̄banumpa isht anumpuli yoka nana ka isht im vt̄vt̄vt̄ apelacha he i miha: nan vlhpisa chinto nitak yv̄mmak okrno momvt nan im vlhpisa hi a anoli.

1. ITIBAPISHI li vhleha ma! hatak kv̄na kia nan ai ashv̄chi ka iba chukowa hokma, Shilombish anukfoyuka hv̄chia hv̄t, chukv̄sh isht i nukh̄aklot yv̄mma chohmi kash falaminchit hv̄sh hilechashke; hv̄chishno kia nan ai ashv̄chi hv̄chi ai itula hinla kv̄t, hv̄sh il anukfihinlashke.

2. Nana isht a hv̄chi weki puyuta ka hv̄sh it̄i shaiyalashke; yohmi hosh Klaist i nan vlhpisa ya hv̄sh ai ahlichashke.

3. Hatak vt̄ nana keyu kia, na sa fehna ahni hokmvt, ilap inli hosh ile haksichi hoke.

4. Amba hatak puyuta kv̄t ilap nan isht ai vt̄ta yak o yakohmi ahnit, pisashke; yvmohmi hosh inla yō ai yukpa keyut, ilap ak inli tuk ak osh nan isht il ai yuhukpa chi hoke.

5. Hatak puyuta kv̄t ilap i shahpo illa hō shaiyala he oka.

6. Kv̄na hosh vbanumpa hā isht im vlv̄chi hokmv̄t, nan im av̄chi yvm̄mak ash nana hochukma puta ka it ibai eshashke.

7. Hv̄chik ile haksecho kashke; Chihowa hv̄t isht ik si yopulá, ahni keyu hoke; hatak vt̄ nana hō hokchi tuk mv̄t, yvm̄mak o vma hi oke.

8. Kv̄na hosh haknip ak o i hokchi hatuk okv̄to, haknip ak o isht okpula hi o vma hi oke; amba kv̄na hosh Shilombish ak o i hokchi hatuk okv̄to, Shilombish ak o ai okchaya bilia yō vma hi oke.

9. Yohmi kv̄t nana achukma isht il ahanta kv̄t ik pin takobo kashke; pi tikambi keyu hokmv̄t, nitak ont ai vlv̄piesakma, il ai vma hi okv̄t.

10. Yohmi hoka hatak moma ka nana il im ai achukma la hi vt̄ pin takalikmv̄t, e yvm̄ihchikmv̄t, na yimmi in chuka chv̄fa v̄hleha yokak heno i shahlichit il i yvm̄ihchashke.

11. Holisso chito kv̄t, kaniohmi hō vno sv̄bbak ak inli hō pit isht hv̄chi holissochi li tuk a hopesá.

12. Haknip ak o isht otv̄ni achukma he ahni aiyukali hokv̄to, hakshup t̄v̄pa he ak o hv̄chim ahnishke; yvm̄mak keyukmv̄t Klaist ititaiyukhv̄na ai illi pulla hatuk mak o na palv̄mmi pisa hinla kak illa kak osh yvm̄ohmi hoke.

13. Yohmi ka hakshup t̄v̄pa v̄hleha ilap inli kak kia v̄ba nan vlv̄pisa yā holitobli keyu: yohmi kia hv̄chi hakshup t̄v̄pa he hv̄chim ahni kv̄t, hv̄chi haknip ak o isht ilauata he ahni hoke.

14. Amba vno yokv̄to isht ak ilauato pulla he, pin Chitokaka Chisvs Klaist ititaiyukhv̄na atakalit illi tōk ak banashke: yvm̄mak atuk pulla mak o yakni vt̄ ititaiyukhv̄na v̄m ai illi, mikmv̄t vno yvt̄ yakni a im ai illi li hoke.

15. Klaist Chisvs imma hokv̄no hakshup t̄v̄pa, micha hakshup t̄v̄pa keyu aiena kv̄t nana keyu, amba himonv̄t toba ak illa hoke.



16. Laua kv̄t kaniohmi hosh anumpa v̄lhpisa ilv̄ppak ash im antiv̄t aya, micha Chihowa im Islael aiena hokvno isht i nanaiya, micha isht i nukhaklo ita tuklo kv̄t on̄tuyu-lashke.

17. Chitokaka Chis̄vs pulla hatuk mak o sa haknip a na m̄isa laua ka isht shaiyali li hoka; himak a pilla mvno hatak nana kia ik si ataklammo kashke.

18. Itibapishi li v̄hleha ma! pin Chitokaka Chis̄vs Klaist isht i kana yv̄t hv̄chimi shilombish a anukfoyukashke. Amen.

HOLISSO PAL VT

CHUCH EFESVS

A HIKIA HO I HOLISSOCHI TOK.

---

CHAPTA I.

Pal vt Efeshan okla pit ai okpuchi, 1; 4 vbanumpuli vhleha hvt yakni vt ik tobo kisha mak o vlhtahvt Chihowa im vlla vhleha toba tok, 11 Klaist pulla ho nan ai yukpa ai immi ha he im vlhpisa 13 Shilombish Holitopa yo isht ai ahlit kvllo; 17 mihmvt Chitokaka Chisvs Klaist im a holitopa vba ya pisa hi mak o vba anumpo-honli.

1. PAL, Chihowa nan ai ahni ha tuk pulla mak o Chisvs Klaist im apostel vt vbanumpuli ahli Efesvs ai asha, micha Klaist Chisvs i yimmi aiena ka pit aiokpuchishke.

2. Piki Chihowa, micha Chitokaka Chisvs Klaist ita tuklo nan isht i kana, micha isht it i nanaiya ita tuklo kvv hvchi anukfoyukashke.

3. Chihowa pin Chitokaka Chisvs Klaist Iki, yvmmak osh Chisvs ak atuk mak o vba nana ishit pi yukpahanli yvt holitopashke:

4. Yohmi hosh yakni in tolahpi vt iksho pilla ma, Klaist a a pi atokoli kvv, i hullot nan ai ashvchi iksho, micha liteha iksho hosh yvmma itikba il aya he ak atok oke.

5. Yvmohmi kak osh vlhpesa ahni pulla tuk mak osh, Chisvs Klaist atuk mak o ilap im vlla e toba he ak o, tik-banli pi atokoli tok,

6. Yohmi kvv isht i kana chinto yvt isht annohowa he,

yummak pulla hō Holitopa achvfa yumma a pi ahninchitok.

7. Yummak ash pulla im issish o isht a pi vlhtoba mvt, isht i kana yvt chinto pulla hatuk mak o nan pim ai ashvchi yvt pi kashofa hoke :

8. Yohmi kv̄t hopoyuksa biekv̄t im anukfila chinto hosh, isht i kana yumma chitolechit pih̄ima tok oke ;

9. Yvmihcha he il ai ahni tok vt vlhpiesa ahni pulla hosh, im anukfila luma hatok a pim otvninchi kv̄t ;

10. Yvm̄vt nitak vt ont ai vlhpiesakma, nana puta vba ai asha, micha yakni pakna ai asha aiena ka itahobit achvfa-lechit, Klaist yumma fehna ka i nutakacha he ak atok :

11. Yummak inli pulla hō il ai isha he vlhpesa e toba hi osh, ilap nan ahni bieka hosh nana moma ka yvmihchi chatuk im anufila hō, tikbanli pi vlhtoka tok :

12. Yohmi kv̄t na tikba Klaist a il anukchieto tuk pishno ak o im a holitopa yvt a pi annohōwa chi hatok.

13. Hvchishno ak kia anumpa ahli vbanumpa isht hvsh ai okchaya hvsh haklo hayvt, yummak ash hvsh anukchieto tuk ak inli ; hvchi yimmi ha yosh, yummak ash nana im ih̄isa tok Shilombish Holitopa yumma isht hvchim ai ahli tok,

14. Yummak okv̄t nana il ai isha he vlhpesa ka il isha he atokowa isht vlhpisa hosh mahaya tuk o falaminchit chumpv̄t a pim atahli tok a il ishi na, yumma im a holitopa yvt isht annohōwak mak a he oke.

15. Yvmohmi ka vno yak kia Chitokaka Chisvs a hvsh i yimmi, micha vbanumpa yimmi ahli moma ka hvsh i hullo ka, haklo li hayvt,

16. Yak oke ishit hvchi ahni li kv̄t, issa li keyu mvt, micha anumpa ilbvsha anumpuli likmvt, isht hvchi anohonli li hoke ;

17. Yohmi ka pin Chitokaka Chisvs Klaist in Chihowa, na holitopa puta Iki vt Shilombish isht a hopoyuksa, micha isht otvninchi hvch ima na yumma ithaiyanvt hvsh mahaya he ;

18. Nan isht hvsh anukfilli i holhponayo yvt in tohwikeli



na, ai okchaya hvsh pihisa hi o hvchi atokoli kv̄t kaniohmi, micha vbanumpa yimmi ahli ya isht a holitopa chinto il ai isha hi vt kaniohmi,

19. Micha ilap nan isht im ai ahli chinto a yvmihchi kv̄t, na yimmi vhleha pia ha ilap nan isht im ai ahli chinto fehna ka isht pi yvmihchi kv̄t kaniohmi aiena ka, hvsh a kostinicha he ak atuk oke.

20. Yvmmak ash o yvmihchi hosh, Klaist illi tuk a falaminchit tanichit, vba a holitopa ilap ak inli ibbak isht impakimma yo binilichit,

21. Hochitoka puta, nan vltoka puta, nan im ai ahli, nan i shahli puta, micha na hohchifo moma yvmmt yakni ilvppa a hohchihifo kak bano keyu, amba yakni yvmmt vla chi aiena ka i shaiyahli yak oke :

22. Yohmi kv̄t nana moma ka ymma iyi nutakvchi, mihmt chvch im ai achukma chi ka nana moma i noshkoba ha chi ka atokoli tok,

23. Yvmmak ashot ilap haknip oke, ilvppak osh kanima moma alotoli a isht alota mak oke.

CHAPTA II.

Im anukfila kaniohmi yosh il v̄tta tok, 1 ; 3 Chihowa nan isht i kana pulla ho kaniohmit pim anukfila ka anoli ; 10 nan achukma ka e yvmihcha he toba tok ; 13 Klaist il im antia hokmt, vba imma nan im vltaha hash il ahanta cha, Chihowa im okla achvfa mak o pia ha hi a tok.

1. YOHMI kv̄t na yoshuba, micha nan ai ashvchi isht hvchi illi yatuk a, hvchi okchalinchit tok oke.

2. Ilvppa chiyuhmi ka chashpo ma hvsh ai itvnowa kv̄t, yakni ilvppa ai yvmohmi cha tuk a yvmohmit shutik takla i miko, shilombish vbanumpa ik im antio puta anukfoyukvt isht aya kak o, iakaiya hosh hvsh itvnowa tok oke :

3. Yohmi kak o pishno ak kia chashpo ma iba takla pi haknip im anukfila ik achukmo iakaiyvt, haknip nan ai ahni, micha chukvsh nan ai ahni aiena ho e yvmohmi tuk oke ;

yohmi kv̄t chukvsh okpulo v̄mmona il ishi tok moma kv̄t im ai anukkilli pi onv̄tonla kv̄t, inla yak inli chohmi hoke.

4. Yohmi tok kia Chihowa nan i nukhaklo chinto im ai v̄lhtayak pulla hosh, nan isht i hullo chito h̄o isht pi hullo hatuk osh,

5. Nan ai ashv̄chi isht pilli moma kia, Klaist iba taklan-chit hv̄pi okchalinchī tok oke; isht i kana pulla h̄o hv̄chi okchaya hoke;

6. Micha Chisvs Klaist ibafohkit wakayv̄chit, v̄ba a holi-topa puta pi binilichi tok oke;

7. Yohmi hosh himak a pilla ma Klaist Chisvs pulla h̄o pi nukhaklo tuk vt, isht i kana chinto fehna ka isht otv̄ninchā chī hatok.

8. Na yimmi kak osh isht i kana pulla h̄o hv̄chi okchaya hoke; yohmi kv̄t ilv̄ppvt hv̄chishno na hv̄sh ahni kak keyu, Chihowa na hv̄ch ima kak oke.

9. Nan toksv̄li kak keyu, yv̄mmak keyukma kv̄na kia isht ilauata yoba ná.

10. Yv̄mma im a toba hv̄pia kv̄t, nan toksv̄li achukma isht il ahanta hi osh Klaist Chisvs ak o il a toba tok; yv̄mma il ai itv̄nowa hi o Chihowa hv̄t tikbanli apesa tok.

11. Yv̄mohmi ka nitak chashpo ma haknip i nuta yosh Chentail hv̄chia ma, nipi hakshup t̄pa ibbak isht toba hoh-chifo yv̄mmak okvt hakshup ik tapo hv̄chi hochifo hoke.

12. Yohmi kv̄t yv̄mma foka mv̄no Klaist ibafoyuka keyut, Israel okla ai achv̄fa hv̄sh ahalaia keyu, michā nan im issa tok isht it im v̄lhpisa hv̄ch ik ahalaio, aiokchaya pisa he ahni ik im iksho, Chihowa ik ithano yosh yakní a hv̄sh ai asha tok.

13. Yohmi tok kia himak ano Chisvs Klaist pulla hatuk mak o hv̄chishno vt tikba mv̄no hv̄sh mishemanchi tuk vt, Chisvs im issish o isht hv̄sh a bilika kv̄t hv̄sh ithaiyanashke.

14. Yv̄mmak osh pit i nanaiyv̄chi yosh, e tuklo ka achv̄fa pikbi cha, holihta nan isht pit i filv̄mmichi yatuk a ishit kanchi tok oke;

15. Yohmi kv̄t nan isht it i nukkilli nan isht v̄lhpisa yvt im v̄lhpisa tok, haknip isht ilv̄sha cha, ishit kanchi tok:

yohmi hosh tuklo ka hatak himona achvfa il ai ikbi cha, it i nanaiyvcha chi hatok:

16. Yohmi kvt ititaiyukhvna pulla ho tuklo ka haknip achvfa isht ikbit, yummak o it i nukkilli tuk a ai illichi cha, Chihowa ya it i kanvcha chi hatok:

17. Atuk osh mishemanchit hvsh ai asha, micha bilika ai asha aiena tuk a, anumpa isht it i nanaiyvchi isht anumpulit hvchim aya tok oke.

18. Yummak atuk pulla ho Shilombish achvfa hosh pi anukfohkichi ho, il ita tuklo kvt Uba Iki il im ohona hokvt.

19. Yakeh! yohmi ka himak a pilla ma ik ahalaio okla inla yo hvchia keyu, amba vbanumpuli ibai okla, micha Chihowa in chuka chvfa hvchia hoke.

20. Yohmi cha apostel, micha hopaii puta kvt in tolaphi yokma, Chisvs Klaist ak inli hosh noshkoboka chukbika tvli yo, onvtula hosh hvsh it abana hoke.

21. Yummak o ai it abana iti fohka achukma kvt, Chitokaka ibafoyukvt tempel holitopa tobtv isht mahaya hoke.

22. Yummak o hvchishno ak kia hvsh ai it abana cha, Chihowa im aboha imi Shilombish a foyuka hvsh toba hoke.

### CHAPTA III.

Chentail vt vbanumpa habena he atok, 1; 9 Pal vt im anumpohonla he vt vhtoka; 14 mihmvt Chihowa nan i hullo tok a okla akostinicha chi ka vba asihihla; 20 mihmvt nan isht aiokchaya chinto vt yakohmi ha tuk o Chihowa ya yakoke im ai ahni.

1. ILUPPA pulla kak o Pal sia hvvt Chentail hvchia hatuk mak o Chisvs Klaist i yuka sia hoke.

2. Chihowa nan isht i kana vhpisa ishit hvchim anum-puli la chi ho vma tok a, hvsh haklo mvhli tok a;

3. Yummvt Chihowa im anukfila luma hatok a kanioh-michit vm otvninchi tok a, anumpa ik lauwo ka tikba ka hvchi holissochi li tok oke.

4. Yummak o hvsh itim anumpulikmvt, Klaist im anuk-fila luma hatok a ithana li ka, hvsh akostinicha hinla hoke;

5. Yummvt nitak tikba ma hatak ushi vhleha ha im an-



noa tok a ohmi keyu ho, himak ano Shilombish vt apostel holitopa vhleha, micha hopaii puta aiena ka im otvninchi hoke;

6. Yvmohmi na Chentail vt vbanumpa pulla ho iba tak-lvt nan ai isha he vlhpesa toba, micha haknip ai achvfa toba cha, Klaist pulla ho nan im ihisa tok a ibai isha he atok:

7. Chihowa yvt ilap nan isht im ai ahli vm ai yvmihinchi pulla hosh, ilap nan isht i kana vma pulla ho, vbanumpa isht vtta toba li tok oke.

8. Uno vt vbanumpa yimmi moma ik lauwo ka ik a lauwo sia hoh kia, isht i kana ilvppa vma na Klaist nan isht yukupali kvna hosh ithvnt hlopullicha he keyu a, Chentail a isht im anumpuli la hi atok.

9. Mich a im anukfila luma hatok a itibai achvfa kvv ka-niohmi ka hatak moma ka pisachi la hi atok; yvmma yakni tobahpi a minti ka Chihowa hvv Chisvs Klaist nana moma ka isht ikbi tok vt, luhmit ieshi tok;

10. Yvmohma hi o himak ano hochitoka ilaiyuka, nan vlhtoka ilaiyuka, vba a holitopa ai asha kvv, chvch pulla atuk mak o Chihowa a hopoyuksa chinto kvv im otaiyana hi atok.

11. Yohmi kvv Chisvs Klaist pin Chitokaka isht yvmihcha he im anukfila bilia tok mak osh yvmihchishke.

12. Mihi yo i yimmi kak osh pi nukwaya keyut, pi hakla chi ahnit, pi anukfoyvkvv il im ohona hoke.

13. Yohmi ka hvchishno ak atuk mak o nan isht svlvsha ka, yvmmv nan isht a hvchi holitopa hokv hvchi chukvsh isht ik hvchim ello kashke.

14, 15. Ilvppa pulla kak o pin Chitokaka Chisvs Klaist, yvmmak o chuka chvfa vba yakni a ai asha, micha yakni ai asha a moyuma kvv ai a hohchifo Iki a i hvchukbehlipa li kvv,

16. Isht im a holitopa chinto fehna ka hvch ima na, imi Shilombish vt chukvsh isht hlampko isht hvchi hlampko-honchi;

17. Mich a na hvchi yimmi ho Klaist vt hvchi chukvsh a

anukfoyuka he yohmi lishke; yohmi ho nan isht i hullo a akshish a tobrt a hvchi kullo hosh,

18. Ubanumpuli ahli puta iba taklvt a prtha, micha afa-laia ka, micha hofobi, micha chaha aiena ka hvsh akostinincha hinla hoke.

19. Micha Klaist vt nan isht pi hullo ka ai ithvna he atampa ka hvsh ithvna hosh, Chihowa isht alotowa moma kvrt isht hvchi alotowa he ak atok.

20. Yvmmak osh ilap im isht hlampko isht pi hlampko-honchi kvrt, nana ho il asilhha, keyukmvt nan il anukfilli moma atampa fehna ka pim atahla hinla,

21. Mihi yosh Klaist atuk pulla mak o chvch isht a holi-topa na nitak ataha iksho, yakni ataha iksko kashke. Amen.

CHAPTA IV.

Itib achvfa he i miha, 1; 7 Chihowa hvt 11 in chvch vt nan isht hlampkot i shaht mahaya chi ka im okla ha shilombish holhpela il aiyuka ihima ka anoli; 17 nan a kaniohmi tikba yatuk a naksi ka bohli; 28 nana a kaniohma he vlhpesa ka yvmihchi, micha nan ik vlhpeso moma ka mokofa chi ka i miha.

1. YUMOHMI ka Chitokaka atuk mak o yuka sia hvt hvsh a yvmohma he hvchi vlhtoka tuk vt, ai vlhpiesvt hvsh ayvt,

2. Chukvsh akanlosi, micha chukvsh yohbi, micha anuk-hobela svlahvt, iti hullot, it im i nuktaiyavt;

3. Shilombish ai isht itibai achvft nan isht it i nanaiya isht iti talakchi kak o hvsh ai ahna he, hvchim asilhha lishke.

4. Yohmi ka haknip achvfa, micha Shilombish achvfa hosh aiasha, yvmmak inli ho chohmit hvsh a yvmohma he hvchi vlhtoka tok vt, ai okchaya pisa he hvsh ai ahni kvrt achvfa hoke.

5. Chitokaka yvt achvfa, na yimmi mvt achvfa, baptismo mvt achvfa,

6. Moma Iki achvfa, yvmmt nana moma i shahli; nana moma a hlopulli, hvsh moyuma ka hvchi foyuka hoke.

7. Yohmi ak inli kia e moma ka nan isht i kana pima kvt, Klaist i na hvlbina kaniohmi ho pi anukfohki kak oke.

8. Yvmohmi kak o vba ia mvt, yuka lawa yukachit isht ayvt, na hvlbina puta ka hatak puta ka ima tok, achishke.

9. Yohmi ka vba ia tok, achi kvt nanta hoh cho? amba yummvt tikba ma vba mintit aka yakni vla tok ak inli keyu?

10. Uba minti tok mihi yo ak inli hosh vba shutik pakna-ka pilla ona kvt, nana moma alotowa chi kak atok.

11. Micha kanimi kvt apostel; micha kanimi kvt hopaii; micha kanimi kvt vbanumpa tosholi; micha kanimi kvt iksa apesvchi; micha kanimi kvt nan ithvnanchi aiena ya chi ima tok:

12. Yohmi kvt vbanumpa yimmi vhleha ha ai ahlichha he, vbanumpa isht vtta he, Klaist haknip ithvnanchit hlampkohoncha hi ak atok oke.

13. Yvmohmi na e moma kvt mahayvt nan ai yimmi ka, micha Chihowa Ushi ai ithvna aiena ka ont il ai achvft, hatak im ahli e tobt, Klaist vt a kaniohmit ai alotowa fehna ka e chiyuhma hi oke:

14. Yvmohmi hosh himak a pilla ma vlla pia keyu hosh, oka piakvchi ka chohmit, anumpa il aiyukali mahli chohmi hatak vt nan isht i kostini o isht haksicha chi kvt, isht im aiihinchu ka ibafohkvt ke fullokancho kashke.

15. Amba i hullo hosh anumpa ahli anumpulit, nan okluha ka isht im a hofantit mahayvt, Klaist yummvt noshkoboka ya e chiyuhmashke.

16. Yvmmak o haknip moma kvt ai itifohka achukma, micha hakshish puta isht iti talakchi hosh moma kvt nana a kaniohma he vlhpisa kvt, ahlit yohmit it apelachi hosh haknip isht a chitot isht it i hullot mahaya hoke.

17. Yohmi ka ilvppa achi li mvt, anonti himak a pilla ma Chentail inla im anukfila ik ahobo,

18. Im anukfila okhlili, micha chukvsh vt okpulo fehna hatuk osh, nana ik ithano anukfoka kak osh, Chihowa im ai okchaya i filvmmmit yoshubvt aya;

19. Chukvsh svlahbot atvpa, na haui atampa, na liteha puta asitvt isht ahanta ka hvch ik ai itvnowo ka he



mak o, Chitokaka pulla hatuk mak o atokolit hvchim anoli lishke.

20. Amba hvchishno vt yvmohma hi osh Klaist a hvsh ithvna tuk keyu hoke:

21. Yohmi ka hvsh i haponaklo cha, Chisvs im anumpa ahli yo isht hvchim vlvchi tuk okmvt;

22. Tikba ma nana hvsh a kaniohmi tok vt hatak sipokni, yummvt na haksichi chukvsh okpulo isht yoshuba aiena kvno, naksika hvsh bohlashke:

23. Micha chukvsh isht hvsh anukfilli vt himonvt tobashke:

24. Micha hatak himona, yummvt Chihowa holba tobtv nan ai vlpiesa, micha nan ai ashvchi ik im iksho ahli mak o isht hvsh foyukashke.

25. Yohmi hokvt na holabi puta naksika bohliit anumpa ahli in chuka panta hatak a hatak moma kvv im anumpulashke; haknip il itib achvfa hokvt:

26. Hvchi nokowa kia, ik hvchi yoshubo kashke; hvsh nokowa moma na hvshi vt ik okvtulo kashke.

27. Micha nan isht a hullo okpulo ya hvchik i kanvlllo kashke.

28. Kvna kia hukopa tuk vt, himmak ma ik hukopo kashke; amba ik plesa cha nana achukma kak o ibbak isht tok-sahanli hosh, kvna kia ilbvshakma ima hi vt nan ahayuchashke.

29. Anumpa liteha yvt chitih ha ik kohchot, amba nana kvv achukma isht hlampka he, micha haklo puta kvv isht im achukma he ak ashke.

30. Micha Chihowa imi Shilombish Holitopa, yummak o hvsh ai okchaya he nitak pit isht hvchim vlpisa kvv, hvchik nukhaklocho kashke.

31. Chukvsh homi, micha it i nokowa, micha nukhobela, micha itachowa, micha anumpa ik achukmo nanumachi, micha nan ik achukmo puta aiena kvv naksika itonlashke.

32. Micha it i kanvt, chukvsh na hih isht iti ahnit, Chihowa hvv Klaist ak atuk mak o hvchi kashofi tuk a chohmit, hvsh it i kashohofashke.

## CHAPTER V.

Chihowa ya im antivt nan ai i hullo yo ai itanohowa he, 1; 3 im anumpa liteha hosh itanowa beka tuk vt naksika bohla he; 18 nan ish-kot haksia he imma ka ik ahalaio ka he, amba shilombish holitopa yo isht anukfoyukvt im vlhtaha he nan i miha; 22 Ohoyo hvt kaniohmit ahanta he, ilap i hatak a im antia he; 25 Klaist vt chvch a i hullo ka chohmit hatak vt im ohoyo ha i hulla he nan isht miha.

1. Y ŪMOHMI hoka vlla holitopa yo chiyuhmit Chihowa ya hvsh iakaiyashke.

2. Micha Klaist vt pi hullo cha, pishno ak atuk mak o nan ashvchi isht vlhtoba, Chihowa nan i balama, isht il im issa tok a chiyuhmit, ai it i hullot hvsh ai itvnowashke.

3. Amba haui toba, micha nana liteha puta, nan anushkunna atampa vbanumpa yimmi vt yohma he vlhpesa keyu ka, himonna kia yohmi tok achit ik hvchi annowo kashke.

4. Micha anumpa isht a hofahiya, anumpa makali anum-puli, na yopula, a yvmohma he ai vlhpiesa keyu ka hvch ik anumpulo hosh, amba Chihowa ya yak oke im ai ahni kak osh hvchim i shahlashke.

5. Hatak haui nana kia, hatak ik kashofo, hatak nan anushkunna atampa, yvmvvt na holbvt toba aiokpvchi, ilvppvt Klaist, micha Chihowa im apehlichika nan ai isha he vlhpiesa keyu ka hvsh ithana hoke.

6. Hatak nana kia anumpa ik achukmo isht ik hvchi haksecho kashke: ilvppa puyuta pulla kak o Chihowa nan isht i nukkilli yvt vbanumpa ik im antio hatak puta ka onvtuyula hoke.

7. Yvmohmi hoka yvmmak okvno hvchishno vt na hvch ik iba taklo yashke.

8. Tikba ma hvchi okhlili tok kia, himak ano Chitokaka hvsh a tohwikeli hokvt, tohwikeli vlla yo chohmit hvsh itvnowashke.

9. Shilombish isht ai vni hokvto nana achukma bieka, micha nan aivlhpiesa yvmohmi, micha anumpa ahli yak oke.

10. Yohmi cha nana h<sub>o</sub> Chitokaka yvt aiokpanchikma, hvsh akostinincha hi oke.

11. Micha okhlili ka a toksuli nan ik vno hvch ik iba taklo hosh, amba ik im ahninchot hvsh im alvmashke.

12. Alumaka h<sub>o</sub> nana kv<sub>t</sub> ai yvmohmi tuk a isht anum-puli illa kak kia, isht hofaya he vhpesa hoke.

13. Yohmi ka atokowa otvni kv<sub>t</sub> nan tohwikeli ak o isht otvni hoke: nana hosh nana ka otvninchikmvt, yvmmak osh tohwikeli hoke.

14. Yvmohmi kak o, Nusi tuk chia kv<sub>t</sub>, chi okchashke, micha illi tuk chia kv<sub>t</sub> falamvt ish tanashke, mikma Klaist vt tohwikeli chima ch<sub>i</sub> hoke, achi hoke.

15. Yohmi ka im anukfila iksho chohmi keyut, amba hopoyuksa chohmit ahah! ahnit hvsh itvnowashke.

16. Nitak vt ik hvch<sub>i</sub> kvnio hosh nan isht hvsh il im ahantashke; nitak hvsh ai ahanta kv<sub>t</sub> ik achukmo hoka.

17. Yvmohmi hoka ik hopoyukso y<sub>o</sub> hvchia keyu hosh, amba Ckitokaka im anukfila hv<sub>t</sub> kaniohmi ka hvsh akostin-inchashke.

18. Micha oka homi isht ik hvchi hakso, yvmmv<sub>t</sub> im ilayak isht yopomo yoke; amba Shilombish ak o isht hvchi alotowashke.

19. Uba isht taloa, micha Shilombish imma isht taloa aiena ka isht il ai anumpohonlit, chukvsh isht in champulit Chitokaka ya hvsh in talohowashke.

20. Nana puta ka pin Chitokaka Chisvs Klaist isht hochihifot Chihowa, yvmmv<sub>t</sub> Iki mak oka, yak oke ai ahnit, il aiokpahanchashke.

21. Chihowa i nukshohompa hosh hvsh it im antiashke.

22. Tekchi vhleha ma! Chitokaka chohmichit hvch<sub>i</sub> hatak a hvsh im antiashke.

23. Klaist vt hvch a i noshkobo ya yvmmak inli h<sub>o</sub> chohmit hatak vt ilap tekchi a i noshkoboka yoka: micha yvmmv<sub>t</sub> haknip ai okchaya mak oke.

24. Yvmohmi ka hvch vt Klaist a im antia ka yvmmak inli h<sub>o</sub> chohmit, tekchi vhleha hv<sub>t</sub> nana puta ka ilap i hatak a isht im antiashke.



25. I hatak vhleha ma! hvchi tekchi a hvsh i hullo kv̄t, Klaist vt chvch a i hullo hosh, il im issa tok ak inli ka, hvsh chiyuhmichashke :

26. Yvmohmi kv̄t oka isht achifvt vbanumpa isht kashofvt na hullochi cha,

27. Chvch holitopa, na liteha lapali iksho, shinowa, yvma chohmi nana kia iksho hō ilap itikba hilecha chī hatok; ahli a holitopa, imomokpulo keyu hō ilap itikba hilech, chī hatok.

28. Yvmmak inli hō chiyuhmit, hatak puta kv̄t ilap haknīp chiyuhmichit, tekchi vhleha hā i hulla he v̄lhpesa hoke. Kvna hosh tekchi a i huhullo kv̄t, ilap a i hullo hoke.

29. Kvna kia ilap haknīp a i nukkilli chatuk keyu hoka; amba Chitokaka yvt chvch a i yvmihchi ak inli hō chohmit, apovchit hiahnit ilaueli hoke.

30. Pishno vt yvma haknīp, nipi micha foni aiena ka ai achvfa pia hoka.

31. Ilvppa pulla kak o hatak vt iki, micha ishki ita tuklo ka issa cha, tekchi ak o asitia he, mikmvt tuklo ilvppvt nipi achvfa hi oke.

32. Ilvppvt na fehna chinto hoke: yohmi kia Klaist, micha chvch ita tuklo yvmmak o isht miha lishke.

33. Yohmi ak inli kia hvchishno hvsh puta aiyukali kv̄t ilap inli chiyuhmit hvchi tekchi a hvsh i hullashke; mikma tekchi vt yohmi ahnit, i hatak a holitoblashke.

## CHAPTA VI.

Ulla yvt ishki, micha iki ita tuklo ka im antia he vt v̄lhpesa, 1; 5 yuka hv̄t i shahli hā im antia he vt v̄lhpesa: 9 mikma i shahli hv̄t ai v̄lhpiesa mak o i yuka hā i yvmohma he v̄lhpesa; 10 na pi okchaya ilvppvt il itihimbi; 13 vbanumpuli vt nan isht ile atukkochi, 18 yohmi ka kanimihchit ilvppak ash isht aya he anoli.

1. ULLA vhleha ma! Chitokaka ak o hvch iki, micha hvch ishki ita tuklo hvsh im antiashke; ilvppak osh v̄lhpesa hoka.

2. Chiki, micha chishki ita tuklo ka ish holitoblashke, ilvppvt anumpa vllhpisa nan im issa ya apatoa vmmona.

3. Yohmi hosh chim achukmvt hopaki hō yakni paknaka ish ai ahantashke.

4. Mikma iki hvchia hvt hvchim vlla ya hvch ik nokowv-cho kashke: amba Chitokaka yak o anukfohkí, micha nan ai ahni yak o a fohkit hvsh hofantihinchashke.

5. Yuka vhleha ma! yakni ilvppak inli haknip isht hvchi nahullo ya i nukwiyvt wvniliinchit, chukvsh apissali kv, Klaist ak inli hō chohmichit hvsh im antiashke.

6. Yohmi kv hatak yukupali yō chohmit, nishkin pisa bano toksvli keyu; amba Klaist in tishu hō chohmit hvchi chukvsh fehna Chihowa nan ai ahni ya hvsh yvmihinchashke:

7. Yohmi kv aiokpanchit yuka a toksvli toksvit, Chitokaka yak o i yvmihchí, hatak ak o keyu;

8. Nana achukma nana hō hatak kvna kia yuka hokmá, yuka keyu hokmá, nana hoh kia yvmihchikma, yvmmak atuk mak inli hō Chitokaka ya im a habena hi a hvsh ithaiyanashke.

9. Mikma i nahullo hvchia hvt i nokowvt anumpuli iksho hosh, yvmmak inli hō hvsh i yvmmihinchashke: hatak iti shahshohlechit anukfilli keyu hosh, vba yakni hvchim i Shahli yvt binili ka hvsh ithaiyanashke.

10. Ishtaiyopi ka itibapishi li vhleha ma! Chitokaka a hlampkot im a hlampko chinto yō hvsh a hlampkashke.

11. Nan isht ahullo okpulo isht a yoshubli a im i sanalit hvsh hikia hinla kv, nan isht il atukkochi Chihowa yvt atahli tok a a moyuma ka hvsh foyukashke.

12. Nipi, micha issish o im i sanalit il itibi keyu, amba miko vhleha, nan vhltoke, hochitoka, yakni ai okhlili ka ilvppa pehlichí vhleha, shilombish okpulo vba itvnova puta aiena kak oke.

13. Yvmohmi ka nitak ik achukmo ka im ai i sanalit hikia, micha hvsh atahli hayvt, hvsh hikia hinla kv, nan isht il atukkochi Chihowa yvt atahli tok a moyuma ka hvsh il ai eshashke.

14. Yvmohmi ka anumpa ai ahli isht vskofaiyachit nana isht ai vlhpiesa ikkishi alata ho foyukvt,

15. Micha vbanumpa it i nanaiyvchi nan isht im vlbtaiyaha ma hvch iyi isht hoyulo hosh hvsh hikiashke.

16. Nan okpulo yvmma im iti naki ishit hulohushmi puta ka isht hvsh mosholicha hinla kv, moma pahnaka ya telihpa na yimmi ka mak o hvsh il ai eshashke.

17. Noshkobo isht ompoholmo ai okchaya, micha Shilombish i bvshpo falaia, yvmmvt Chihowa im anumpa mak oka hvsh ieshashke.

18. Shilombish anukfoyuka hosh anumpa ilbvsha puta im anumpohonlit, asihihla hosh achunanchit ahah! ahani, micha vbanumpa yimmi puta ka isht hvsh asihihlashke:

19. Micha vno ma isht hvs si anumpohonlashke: yohmi na itih kohchit anumpuli la hi a vma na vbanumpa luma ya tok a anohonli la chi kv, nukwaya ikshot sutih ha wakvm-mi lashke.

20. Yvmma pulla ho Uba Miko im anumpeshi talakchi sia hoke: si yvmohmi kia nukwaya ikshot anumpuli la he vlhpesa hokvt, anumpuli la hi a vba isht hvs si anumpohonlashke.

21. Amba nana vm a kaniohmi, micha nana isht anta li aiena ka hvsh akostinincha chi ak inli kvno, Tikikvs itibapishi a holitopa, micha Chitokaka nan im isht vtta ai ahli ak osh nana moma ka hvchim anola chi hoke.

22. Yvmohma chi kak o yvmma hvchi pila li tuk oke; yohmi na nana pim a kaniohmi ka hvsh ithana chi hatuk; mikma hvchi chukvsh a hopohlva chi hoke.

23. Iki Chihowa, micha Chitokaka Chisvs Klaist a minti na yimmi ka isht ai it i hullo, micha it i nanaiya aiena kv itibapishi vhleha ha hvchi anukfoyukashke.

24. Chitokaka Chisvs Klaist i hullo ai ahli moyuma ka nan isht i kana yvt anukfoyukashke. Amen.



HOLISSO PAL VT  
CHVCH FILIPPI

A HIKIA HO I HOLISSOCHI TOK.

CHAPTA I.

Filippi chvch hikia ka pit aiokprchi, 1. 6 Na toksvli achukma isht wakaya tok vt Chihowa hvt isht ai ahlichit im atahla chi ka yimmi. 12 Lom aboha kvllo afoyuka ka nan isht im anukfila he nana hosh akaniohmi tuk a anoli. 22 Klaist pulla kak o okchaya kak okma, keyukmvt illi kak okma nana hi vt im vhltaiahvt anta tok vt anoli.

1. PAL, micha Timohlivs, ita tuklo Chisvs Klaist in tishu hvt vbanumpa yimmi ahli vhleha Chisvs Klaist ibafoyuka Filippi ai asha, bishop puta, micha chvch nan isht im vtta puta aiena ka pit aiokprchi kv,

2. Piki Chihowa, micha Chitokaka Chisvs Klaist ita tuklo nan isht i kana, micha isht it i nanaiya aiena kv hvchi anukfoyukashke, hvchim ahnishke.

3. Hvchi anukfilli li aiyuka kv an Chihowa ya yak oke im aiahnit,

4, 5. Nitak na hvchi yimmi tok vhlit mintit ant himak ak o hvchim ilayak iti hopinhinlv, vbanumpa isht hvsh apelvchi kak o, anumpa ilbvsha isht hvchi anumpuli li puta kv chukvsh yukpvt isht hvchi asihihla li bilivshke.

6. Ilvppa fehna ka sai yimmi hatuk osh, Nan toksvli achukma isht a hvchi wakaya kv, ai ahlichit Chisvs Klaist i nitak a hvch isht ona he, ilvppa fehna ka sai yimmi hatuk oke.

7. Yvmohmit hvsh moma ka ilvppa hvchi anukfilli la he vlhpesa, sa chukvsh isht hvch ithaiyana li hokvt; vbanumpa isht anumpuli li, micha ai ahlichli li hosh sa talakchi aiena ka nan isht i kana hvs svb ai ishi hoka.

8. Chisvs Klaist hiahnit isht i hullo chohmit hvchi sa palata fehna ka, Chihowa yvt atokolit si anoli yoka.

9. Micha ilvppa asihhla lishke; yvmmvt Chihowa im anumpa ithanvt, hvsh akostininchi puta kak osh hvsh it i hullo kv, chitot isht i shahlit hvsh mahayashke.

10. Yvmohmi hosh nana kv it im inla ka imoma ka pisvt, achukmaka vlhpesa ahnit, ai ahli, isht im ai ibetvbla he iksho hosh Klaist i nitak a hvsh onashke.

11. Yvmohmit Chisvs Klaist ak atuk mak o nan ai vlhpiesa isht ai vni isht a hvchi alotowa na, Chihowa yvt isht a holitopvt isht anumpa he yak oke.

12. Yohmi ka itibapishi li vhleha ma! nana vm a kaniohmi tuk a vbanumpa hv isht i shahlit isht atoba tuk a hvsh ithana he, hvchim ai ahni lishke.

13. Yvmohmi ka Klaist pulla ho sai yuka kv miko atoni tvshka chipota i holihta, micha kanima moma ka ai otvnishke.

14. Mihma itibapishi li vhleha laua kv sai yuka kak o Chitokaka anukchieto kv, isht i shahlit nukwaya keyu fehnt, nukshopa mvt iksho hosh vbanumpa ha isht anumpohonlishke.

15. Kanimi kv isht a potvno, micha nan isht an chowa aiena ka bvna hosh Klaist a isht anumpulikma; anonti kanimi kvto a kana he ahni hosh yohmi hoke.

16. Achvfa kv nan isht an chowa kak o ahni hosh Klaist a isht anumpulit, chukvsh ahli keyu hosh, sai yuka ka ai vbechit svlvshali bvna hosh:

17. Amba achvfa kvto holitobli hosh, vbanumpa afvt isht anumpuli la he si vlhtoka tuk a ithana hatuk osh, yohmi hoke.

18. Yohmi kvno ik kaniohmi hoh kia peh ilahobi hokma ahli hokma, nana kia Klaist vt isht anumpa hoke; yohmi na yvma a sai yukpa ahli hosh, a sai yuhkpa chi hoke.

19. Anumpa ilbvsha isht hvs si anumpohonli; micha Chisvs Klaist imi Shilombish vt si apelahanchi aiena, ilvp-pak osh isht si okchaya hi a ithana li hokvt,

20. Yvmmak a he ahni li fehna kv̄t, nana kia isht sa hofahya he keyu, amba nukwaya iksho kvmohmit ai yv-mohmi chatuk vt, a moyuma chi hō si okchaya hokmá, svlli hokmá, nana kia Klaist vt sa haknip a isht a holitopa hi a ahni li hoke.

21. Ūno yak okvto si okchaya kv̄t Klaist ak okmvt, anonti svlli hoh kia nan isht vm ai achukma hoke.

22. Yohmi kia haknip ak o ai anta li hokmvt, a tok-svli li nan ai vni kv̄t ilvppak oke; yohmi kia kanimampo ahni la hinla kv̄t ak ithanoshke.

23. Yakni issvt ia lish, Klaist a ont ai ibachvfa li, yvm-mak ok mak o i shahli fehna hoka sa bv̄nna hatuk osh, nan a mia tuklo isht a svb bikeli hoka:

24. Yohmi kia haknip ai anta li kak o achukma kv̄t isht hvchim i shahli hoke.

25. Micha ilvppa sai yimmi ahli hatuk osh, nana a hvchi yimmi kv̄t i shahlit a hvchi yukpa kv̄t isht i shahla hi ak o hvsh moyuma ka hvchi takla ahanta la chi kv̄t, ithana lishke.

26. Yohmi ka vno pulla, micha hvchim ona li kak o Chisvs Klaist a isht hvsh il ai yukpa kv̄t i shahla he ak oke.

27. Nana hvsh a kaniohmi kv̄t Klaist im anumpa ak o isht ai vlhpesa kak banashke: yohmi na onvt hvchi pesa li hokmá, keyukmvt kanima aya li ik saksho hokmá nana kia na hvchim a kaniohmi puta yvmmv̄t shilombish achvfa, im anukfla achvfa hosh vbanumpa ai yimmi ka hvsh it iba fohort kv̄llot hvsh hieli hō hahaklo lashke.

28. Micha nana hoh kia hvchim i sanali puta ka ik hvchi nukhlakancho kashke: yohmikmv̄no yvmmak okvto ai ok-puloka hi yosh isht ai im atokowa, amba hvchishno ano isht ai okchaya he Chihowa a minti mak osh isht hvchim atokowa hoke.

29. Hvchishno vto Klaist pulla kak o yvmma hvsh i



yimmi kak bano keyu, amba yvmma pulla kak o nan isht hvsh im ilbvsha he hvchim vlhpisa hoka :

30. Yohmi kv̄t anumpulit it̄i kahanlot isht sv̄lbvsha yvmma hv̄s sa p̄isa tok, anonti himak a si onvtuyula ka hv̄s sa hahaklo ka yvmmak inli hosh hv̄chi onvtuyula hoke.

## CHAPTA II.

Klaist a iakaiv̄t im anukfila iti bai achv̄fv̄t il akanlosichi banot aish̄a hi a i miha, 1 ; 12 ilap nan isht aiokchaya a toksahanlit p̄ula h̄o chohmit yakni a im a tohwikela hi a im achi.

1. YOHMI ka Klaist atuk pulla mak o ahopohla yv̄t āsha hokma, i hullo kv̄t a nuktanla yv̄t āsha hokma, Shilombish ai itiba chv̄fa yv̄t āsha hokma, chukv̄sh isht i nukhaklot hi ahni yv̄t āsha hokma,

2. Hv̄chim anukfila hv̄t itilavit nana a miha chv̄fa holitoblit, chukv̄sh achv̄fa cha, hv̄chim anukfila ai achv̄fa hosh nan a sai yukpa ya isht hv̄s sv̄m alotolashke.

3. Anumpa isht itachowa shahli, keyukm̄vt ilefeh̄nv̄chi nanasi kv̄t ik vlhtaho kashke ; amba chukv̄sh akanlosi hosh moyuma kv̄t inla yv̄t achukma kv̄t ilap a i shahli h̄o anukfillashke.

4. Hatak moma kv̄t ilap immi kak o bano keyu, amba hatak moma kv̄t inla immi ak kia anukfillashke.

5. Klaist Chis̄vs anukfoyuka tok akinli nan anukfila ilvp̄v̄t hv̄chi anukfoyakashke.

6. Yv̄mm̄vt Chihowa hoyulba yatuk osh, Chihowa ya ile itilauechi kv̄t na wehpuli ya he ahni tok keyu.

7. Yohmi kv̄t il a kohchichit yuka ohmi h̄o il aieshit hatak chohmi hosh toba tok oke.

8. Micha hatak ohmi hosh haiaka m̄vt, il akanlosechit im antia kv̄t, ititaiyukhv̄na a takalit illi yoh kia isht illi kak atok.

9. Yv̄mohmi hatuk o Chihowa hv̄t holitoblich̄i feh̄na m̄vt, hochifo kv̄t na hohchifo inla moma ka i shahli h̄o ima tok oke :

10. Yv̄mohmi ka Chis̄vs hohchifo h̄a v̄ba yakni aisha,

micha yakni paknaka aiasha, micha yakni nutaka aiasha puta kvt i hvchukbihlepa he ;

11. Micha hatak isunlvsh puta kvt Iki Chihowa yvt isht a holitopa he mak o, Chisvs Klaist vt Chitokaka ya he, achit anohonlashke.

12. Yvmohmi ka a holitopa vhleha ma! hvs svm antia chatuk vt hvchi takla anta li kak bano keyu, amba himonasi yokak heno ik saksho ka i shahlichit hvs svm antia kvt, nukshumpvt wvnihinchi hosh hvchishno inli aiokchaya ya hvsh atahlashke.

13. Chihowa ak osh ilap nan isht im vllhpesa hosh ai ahni kak o ahnit, hvsh yvmihcha chi ka hvchi a toksahanli hoke.

14. Nana moma ka ik ahninchot na miha keyu, micha anumpa ita chowa mvt iksho ho hvsh yvmihchashke.

15. Anumpa nana kia hvchi onvtonla keyu, nan okpvti keyu, na liteha lapanli keyu hosh okla shana Iowa, micha nan ai ashvchi ai ititakla yo yvmma i pvla tohwikeli chohmit yakni paknaka ya hvsh ai ashvshke.

16. Micha anumpa okchaya ya hvsh otvvinchi na Klaist i nitak a pilla ho chahafa li tok keyu, micha pilla ho toksvli li keyu kvt sai yukpashke.

17. Ahli, na hvchi yimmit vba isht hvsh il ai okpvchi, micha nan isht hvsh ai ahanta aiena ont aiahla chi kak o, il imi kanchi li hokmvt, sai yukpvt hvsh moma ka hvch iba yukpa li hoke.

18. Yvmmak inli kak o yukpvt hvs svbai yukpa mak inlishke.

19. Yohmi kia chekikma Timohlivs a hvchi pila la chi, yvmohmi hosh hvchi a kaniohmi ka akostininchi lish, sai yukpa chi kvt, ahnit Chitokaka Chisvs a anukchieto lishke.

20. Nana a hvchi a kaniohmi ka anukfihinli fehna kvt hatak inla im anukfila yvmmak inli ohmi ho ik svm iksho hokvt.

21. Moma kvt ilap immi ak o hoyo mvt, nana kvt Chisvs Klaist immi hokvno ik hoyo hokvt.

22. Amba yvmma imomaka pisa tuk a hvsh ithana;

yvmmak okvt ushi yosh iki iba toksvli chohmit vbanumpa isht svb a toksahanli tuk oke.

23. Yvmohmi ka yvmmak o chekosikma sa kaniohma chi ka pisa likmvt, pila la chi ahni lishke.

24. Yohmi kv̄t vno yak kia chekosikma ona la chi, ahnit Chitokaka ya anukchieto lishke.

25. Yohmi ak inli kia Epafiotits, itibapishi li, itiba toksvli-li, micha tvshka chipota sv bika, micha hvchim anumpa shahli, micha nana a sa bvna tuk a isht vm anta chatuk, yvmmak o hvchi pila la he vlhpesa ahni li tuk oke.

26. Hvchi palata fehnvt, ilap vt abeka tuk a hvsh haklo tuk ak o nan a nukhaklo kv̄t chukvsh a alota fehna tok.

27. Abeka ho mvhlit illi naha fehna tuk, yohmi kia Chihowa hv̄t i nukhaklo tuk: yohmi kv̄t yvmmak bano keyu, amba vno ma a nukhaklo tuk: yvmmak keyukma svlvsha kv̄t it vlbehkvcha he atuk oke.

28. Yvmohmi kak o ahni fehnvt hvchi pila li tuk oke; yohmi na anonti hvchi pisa likmvt, hvchi yukpakma, vno vt a nukhaklo kv̄t ik lauwo ka he ak atuk oke.

29. Yvmohmi hoka Chitokaka ibafoyuka ka chohmichit chukvsh yukpa biekvt hvsh aiokpvchashke; mikmvt yvma chohmi kash hvsh holitohomblashke:

30. Klaist ak o in toksvli pulla kak osh ilap im ilhfiopak a na fehna ik ahno hosh, illi naha fehna kv̄t, isht hv̄s si apelacha he tuk ik ono ka vm atahla chi kak atuk oke.

### CHAPTA III.

Nan i hullo cha, nan avchi ik ahlo yokvno ahah! im ahna hi a i miha, 1; 8 Klaist pulla ha tuk mak o nan okluha ka ik ahobo ahna he: 18 haknip imma nan ahni ho iakaiya yokvno i filvma he nan i miha.

1. ISHTAIYOPI ka itibapishi li vhleha ma! Chitokaka ya hvsh ai yukpashke. Nana kv̄t mihi yo ash inli ho hvchi holissochi li kv̄t, vm ahchiba keyu mvhli, amba hvchishno yak osh isht hvchi a hlampka chi kak oke.

2. Ofi ya ahah! hvsh im ahnashke, nan ik vlhpeso yv-



mohmi ya ahah! hvsh im ahnashke, tvblit kanchi ya ahah!  
hvsh im ahnashke.

3. Pishno ak okvto hakshup tupa shilombish anukfoyu-  
kvt Chihowa holitoblich, micha Chisvs Klaist ai yukpa pia,  
yohmi kvt haknip a ai anukchieto keyu pia hoke.

4. Vno ak kia haknip a ai anukchieto la hinla tuk ak inli  
hoke. Kvna kia haknip a ai anukchieta hinla kvt ishi ka  
ahnikma, vno vt i shahli li hoke.

5. Nitak ont isht untuchina ma hakshup sa tupa tok, Is-  
lael isht ai unchululi, Benchamin apelhichi, Hebli ai ahli sia  
hoke: vba nan vlhpisa yak okmvno Falisi yo sia hoke.

6. Amosholi hosh chvch a i palvmnichit, vba nan vlhpisa  
isht ai vlhpiesa yvmmak okmvno anumpa nana kia si onv-  
tula he keyu ki tok.

7. Yohmi tok kia nana isht ahayuchi li yatuk vt, yvmmt  
Klaist pulla kak o a kvnia, ahni li tuk oke.

8. Ahli mvhlshke, yohmi kvt Klaist Chisvs an Chitokaka  
ithana achukma fehna kak o nana puta kvt peh ik ahobo  
ahni lishke; yvmma pulla kak o nana puta kvt isht a kvnia,  
mikmt yvmmak ash o chopilhvsh a chohmichi li, yvmoh-  
mit Klaist a asitvbi li,

9. Mikmt yvmma ibafoyuka la he, micha vno ak inli kvt  
vba nan vlhpisa yvmmak o isht ai vlhpiesvt il ai eshi li keyu,  
amba yvmmt Klaist a i yimmi kvt nan ai vlhpiesa na yim-  
mi pulla kak o Chihowa a minti yak oke:

10. Yvmohmi ka Klaist, micha yvmmt illit tani tok nan  
isht im ai ahli, micha yvmmt ai ilbvsha tok a iba takla kvt  
kaniohmi aiena ka ithana lish, yvmmt illi tok a hoyulba la  
chi kak a hetuk oke.

11. Ik kaniohmi kia illit tani ka ona li yoba ná, ahni li  
hatuk osh.

12. Himak okvno ona li mashko ahni li keyu, micha hi-  
mak ak kia ai ahli sa taha ahni li keyu; amba achunanchit  
iakaiya li, yvmohmi hosh yvmmak a he ak o Klaist Chisvs  
vt si atokoli tok yvmmak ash ieshi la he ak atuk oke.

13. Itibapishi li vhleha ma! ont ishi li tuk il ahni li ke-  
yu hoke; yohmi kia nana achvfa ilvppak o yohmi li, nana

puta olbul ai asha ka vmi haksi cha, nan tikba asha kak o subbak a pit wielit,

14. Achunanchit ai vbi ya mahaya li, nan vbi yummvt Klaist Chisvs pulla kak o Chihowa yvt vba et a hohoyo kak oke.

15. Yohmi ka ai ahli aiyyuka pia hokvto, yakohmit pim anukfilashke; yohmi ka nana ka kaniohmit hvchim anukfila kvv inla tuk okma, Chihowa yvt ilvppak oh kia hvchim otv-nincha chi koke.

16. Yohmi kia iloh ai ona mashko hatuk okvto, yummak ash inli ho kiloh ai itvnowa cha, nana yummak ash inli ho iloh anukfihinishke.

17. Itibapishi li vhleha ma! it apehvt na sa hobachi hvsh tobashke, micha pishno a hobachi hvsh ahni kvv yakohmit aya vhleha ha hvsh holitoblashke.

18. Lauvt aya kvv yvmma himonna hvchim anohonli li chatuk osh, anonti himak a nishkin okchi mihinti hosh, yummvt Klaist im ititaiyukhvna in tvnvp vhleha hoka, hvchim anoli lishke.

19. Yvmma ont im ishtayopi kvv aiokpuloka he, yvmma i shahli yvt ilap takoba ak inli, micha nan isht hofahya isht ile holitobli, yummvt yakni paknaka nana a halaia kak o asitia yoke.

20. Vba yakni okla ai achvfa pia hoka; yummak o a minta hi o pi Okchalinch Chitokaka Chisvs Klaist a e hohoyo hoke.

21. Yummvt imi hlampko ho isht yvmihchit nana puta ka imaiyachit il aiesha hinla hokvt, ilap haknip holitopa ya hoyulba chi ka yummak ash ot pi haknip akanlosi ya invcha hi oke.

#### CHAPTA IV.

Chitokaka ya a kvvlo fehnvt itanowa he i miha, 1; 4 vbanumpuli ahli mak osh aiasha he im apesa; 10 ilap a i kana tuk a na yukvvt yak oke pit im ai ahni fehna.

1. YUMOHMI ka itibapishi li a holitopa, micha i palata li, isht sai yukpa, micha isht sa holitopa hvchia ma! kvllot.

hiki<sup>vt</sup> Chitokaka ya hvsh ibai achvfashke, holitopa fehna vhleha ma!

2. Yuotias a ilbvshvt im asilhha li, micha Sintichi ma ilbvshvt im asilhha li ka, yvmmvt im anukfila it ibai achvfa hosh Chitokaka ya ibafoyukashke.

3. Mikmvt chishno itiba toksvli li ahli ak kia chim asilhha lishke, ohoyo yvmmvt vbanumpa ha isht svba toksvli tuk, micha Klement, micha svba toksvli vhleha inla aiena, yvmma hohchifo hv<sup>t</sup> holisso okchaya a takali ka, ish apelahanchashke.

4. Chitokaka ya hvsh ai yukpa na biliashke; micha anonti, Na hvchi yukpashke, achi lishke.

5. Nana ka isht hvsh il oktampli yvt hatak moma ka im otaiyanashke. Chitokaka yvt vla hosi hoke.

6. Nana kia isht ik hvchi ataklaiyamo kashke; amba nana puta ka anumpa ilbvsha anumpulit asih<sup>i</sup>hlvt aiokpahanchi hosh nana a hvchi bvna kv<sup>t</sup> Chihowa ya im annohowashke.

7. Micha Chihowa im isht it i nanaiya, yvmmvt im anukfila moma i shahli yvt hvchi chukvsh, micha hvchim anukfila aiena ka Klaist Chisvs pulla hatuk mak o atohona chi hoke.

8. Ishtaiyopi ka itibapishi li vhleha ma! nana hosh ahlikma, nana hosh holitopakma, nana hosh ai vlhpiesakma, nana hosh kashofakma, nana hosh aioklikma, nana hosh annoa achukmakma, nan ai vlhpesa inla yvt ashakma, anonti aiokpancha he vlhpesa kv<sup>t</sup> ashakma, ilvppa puta kash hvsh anukfihinlashke.

9. Nana puta yvmma hvs svm ai ithvna, micha hvsh ishi, micha hvsh haklo, micha hvs si a pisa aiena tuk vt hvsh. yvmohmashke; yohmikma Chihowa im isht it i nanaiya yvt hvch ibafoyuka chi hoke.

10. Yohmi kia himak ano polaka hvs si anukfilli tuk vt anonti okcha i shahli ka Chitokaka ya isht a sai yukpa fehnvshke; yvmmak a hi o isht hvs si anukfilli tuk kia, hvsh ai yvmihcha hinla kak osh ik hvchim iksho ki tok oke.

11. Nana kv<sup>t</sup> ik svm ono kak osh ilvppa achi li ho keyu: kaniohmi ho a hikia li hoh kia, yvmmak oka si a nuktaiyala he vt ithvntv<sup>t</sup> tahli li tuk okvt.



12. Kaniohmit nana ka ik svm iksho hosh aya li kvt ithana li, micha kaniohmit nana an laua hosh aya li kvt ithana li hoke; kanima moma, micha nana puta ka sa kaiya, micha sa hohchvfo, micha nan an laua, micha nana ik svm ono aiena hosh aya li kvt ithana li hoke.

13. Klaist pulla hosh sa hlampkohonchi kak o, nana moma ka yvmihchi la hinla hoke.

14. Yohmi ak inli kia ai vllhpiesa ho yvmohmit nana vm a palvmmi ka hvs svb anukhaglot hvs si apela tok oke.

15. Yvmohmi ka Filippian vhleha hvchia ma! vbanumpa hvt anumpa vmmona ka Masetonia ya akohchvt ia li ma, chvch nana kia nana isht apela he vma na ishi la hetuk ash imma ka yvmohmi keyu ma, amba hvchishno ak illa tuk vt hvsh ithaiyanashke.

16. Hlessalonika ya anta li ma, himonna ka pit hvs sa pila tuk osh, anonti nana ka a sa bvna tuk a pit hvs sa pila tuk oke.

17. Na hvlbina sa bvna kak o keyu; amba nana achukma hvsh yvmohmi tuk isht ai vni kvt hvchin laua he kak o ahni lishke.

18. Yohmi kia nana moma ka ishi lish, nan an laua hoke; si akotowa hoke, Epaflotitvs ibbak fohkit nana balama vba nan isht aiokpvchi Chihowa hvt vllhpesa ahni ya et hvs sa pila tuk a, vm vla tuk oke.

19. Yohmi ka an Chihowa holitopa fehna kvt Chisvs Klaist pulla kak o nana a hvchi bvna moma ka hvchim atahla hi oke.

20. Yohmi ka Chihowa, micha Piki yak osh holitopa na bilivt biliashke. Amen.

21. Vbanumpa yimmi Klaist Chisvs ibai achvfa vhleha ha hvsh aiokpvchashke. Itibapishi li vhleha hvt si apihvt maya kvt hvchi aiokpvchishke.

22. Vbanumpa yimmi moma kvt pit hvchi aiokpvchi; mihma Sesa in chuka chvfa yokak heto pit hvchi aiokpvchi fehnvshke.

23. Pin Chitokaka Chisvs Klaist isht i kana yvt hvsh moyuma ka hvchi anukfoyukashke. Amen.

HOLISSO PAL UT

CHUCH KOLOSSI

A HIKIA HQ I HOLISSOCHI TOK.

CHAPTA I.

Na yimmi ahlit maya pulla kak o Chihowa ya ai okpahanchi, 1: 9 nan isht i kana anukfohkvt i shahlit mahaya he isht anumpohonli; 14 Klaist holitopa he isht anumpuli; 21 mihmvt nana ka Klaist vt im ataiyahli tok a im anoli.

1. PAL, Chihowa nan ai ahni hatuk pulla mak o Chisvs Klaist im apostel sia, micha Timohlivs pitibapishi ita tuklo kv,

2. Ubanumpa yimmi ahli vhleha, il itibapishi ahli Klaist a ibafoyuka Kolossi ai asha ka pit aiokpvchi kv, Piki Chihowa, micha Chitokaka Chisvs Klaist ita tuklo nan isht i kana, micha nan isht it i nanaiya ita tuklo mak osh hvchi anukfoyukashke, hvchim ahnishke.

3. Chihowa, micha pin Chitokaka Chisvs Klaist Iki ya yak oke, im ahnit, vba isht e hvchi anumpohonli na bilia hoke;

4. Yohmi kv Klaist Chisvs a hvsh i yimmi, micha vbanumpa yimmi vhleha ha hvsh i hullo ka e haklo ha yokvt,

5. Ai okchaya bilia hvsh isha he vba hvch in tuyula pulla kak o e yohmishke; yummak oka vbanumpa ahli isht ai anumpa ho tikba kash hvsh haiyaklo tuk vt;

6. Mihi yosh hvchim vla tuk ak inli chohmit, yakni mo-ma ka im aya cha, nan vnit waya kv, nana ka hvsh haiya-

klot, Chihowa nan isht i kana ahli hvsh ithaiyana nitak atuk taiyakla kv̄t, nan vnit hvsh waya kak inli hō chohmi hoke.

7. Yvmmak ash inli hō Epaf̄las, tishu pi bika pi holitopa ya hvsh im ai ithvna tuk; yvmmak okv̄t Klaist im vbanumpa isht v̄tta hvchim ahli mak oke:

8. Yvmmak inli kak osh Shilombish a ibai achv̄fv̄t hvsh it i hullo ka pim anoli tok.

9. Yakohmi kak o nitak yvmma fehna ka e haiyaklo tuk taiyakla kv̄t, anumpa ilbv̄sha isht e hvchi anumpohonli kv̄t il issa keyu, mihmv̄t hvchi hopoyuksa bieka, micha shilombish im ahalaia ka ithv̄nv̄t, Chihowa nan ai ahni.ka hvsh ithana ka isht hvchi alotowa he ak o, il ai ahni hoke:

10. Micha nan toksv̄li achukma puta ka isht ai vni, micha Chihowa nan isht im ithana ya isht i shahlit isht ia hosh, Chitokaka ya ai im vlhpiesv̄t nana moma ka isht yukpali cha;

11. Chihowa imi hlampko holitopa isht hlampko fehna hosh, nukchintot achunanchit, nan ilbv̄sha yv̄t onvtuyula kia nuktaiyav̄t vlhpesa ahnit yukpa banot;

12. V̄banumpa yimmi yv̄t v̄ba atohwikeli ai isha he vlhpesa hosh ai asha ka ai il iba takla hi a pi ai atahli tok, Piki yvmma yak oke hvsh im ai ahna he ak o, il ai ahni hoke;

13. Yvmmak okv̄t aiokhlili ka isht im ai ahli ya a pi a hlakofichi mv̄t, anonti kanv̄llichit ilap Ushi holitopa im ap ehlichika ya pisht ona tuk oke;

14. Yvmmak o im issish isht vlbi ai okchaya, nan ai ashv̄chi isht kashofa mak o il eshi hoke:

15. Yvmmv̄t Chihowa ya pisa he keyu ka hoyulba kv̄t, nana toba tok puta ka V̄ttahpi yoke.

16. Yvmmak atuk mak o nana moma toba kv̄t nana v̄ba aiasha, micha yakni paknaka ai asha, nana ka pisa he, micha nana ka ik peso ka he, miko yohmá, nan i shahli yokmá, hochitoka yokmá, nan vlhtoka yokmá, aiena mikmv̄t nana moma kv̄t yvmmak atuk mak o toba kv̄t, yvmmak ash o in toba tok.

17. Yohmi ka yvmmak ash osh nana moma ka in tikba yoke, mihma yvmmak o nana moma kv̄t a takala he atok v̄t ont ai yvmohmit isht ai it im vlhpesa hoke.



18. Yohmi ka yummak osh chvch haknip a i noshkobo yoke: yummvt nana moma ka ai in tikbvt holitopa cha, ai isht ia vmmona illi tuk osh falamvt tani vhleha ha im Ut-tahpi yoke.

19. Iki vt vlhpesa ahni kvt, yummak ash o nan isht ai vlhtaha yvt afoyuka he, ahni tok:

20. Yohmi kvt ititaiyukhvna issish a hlatapa tok pulla ho it i nanaiyvichi ikbi cha, yummak pulla ho nana moma ka isht il ai i kanvcha hi vt ahni tok; yummak pulla ho nana yakni ai asha yokmá, nana vba yakni aiasha yokmá, nana kvt yvmohmi hoke.

21. Yohmi ka hvchishno vt tikba kamo ik ahalaio yosh nana ashvchi toksvlit hvchim anukfila isht in tanampi atuk kia, himak ano hvch il i kanvchi tuk oke,

22. Ilap haknip nipi illi kak o himak ano hvch il i kanvchi tuk; yvmohmi hosh nan ai ashvchi iksho, micha liteha a lapali iksho, micha anumpa nana kia hvchi onvtula he keyu ho ilap a itikba ya hvchi hilecha hi atok:

23. Nan ai yimmika ya a kvllot nan anukfilli fitikvchi iksho, micha nana ka yohma he ahni, vbanumpa a takali yvmma hvsh haiyaklo ma, yummak ash ot okla moma shutik nuta aiasha ka im anuhumpa tuk a hvch ik i filvmmo ka chi mak o, Pal sia hvt vbanumpa isht vtta toba li tuk osh;

24. Himak a hvchishno pulla kak o, nan isht a palvmmi puta kvt sai yukpa hoke; micha Klaist ai ilbvsha tok a sa haknip isht svlvsha kvt ik ono kisha ka, haknip yummvt chvch pulla kak oka, isht alotolit isht mahaya li hoke.

25. Hvchishno pulla ho Chihowa hvt nana ai ahnit vm apesa kvt, Chihowa im anumpa mominchit isht anumpuli la he ak o vbanumpa isht vtta si atokli tok.

26. Anumpa yummvt nitak bilia kash, micha hatak chash-po asha ka in luma hatok kia, himak ano vbanumpa yimmi puta ka im otvni yak oke.

27. Yummak ash o Chihowa hvt anumpa luma hatok ilvppak ash isht a holitopa chinto kvt Chentail ai itintakla otvni kvt kaniohmi ka im otvnincha he ai ahni tok; yummvt Klaist hvchi anukfoyuka a holitopa isha he isht ai ahni yoke.

28. Yvmma isht il anumpohonlit e hopoyuksa biekv̄t, hatak moma kv̄t ahah! ahna hi a il im ahanchi mvt, hatak moma ka il im abahanchi hoke; yvmohmi hosh Chisvs Klaist pulla hatuk mak o hatak moma ka ai ahlichit e hilecha chi hatuk.

29. Yvmmak a chi mak osh vno ak kia imi hlampko isht sa hlampkohonchi fehna kak o amosholit toksahanli li hoke.

## CHAPTER II.

Ai vlhpiesa banot chvch a ai asha he i miha, 1: 8 hatak nan im anuk-fila, micha nana kv̄t Klaist a isht a hvch a filvmmicha hi okvno hvsh i filvmma he anoli.

1. HUCHISHNO, micha Laotisea ai asha, micha laua kv̄t kaniohmi hosh sa nashuka ya ik peso kisha puta ka anukfihinlit, isht svlvvsha fehna ka hvsh ithaiyana hi a hvchim ahni lishke:

2. Yvmohmi ho chukvsh vt it i hullot itrshekonompa hosh chukvsh vt hopohohlashke: yvmohmi hosh ai yimmi ahli isht ai yukpa chinto ka ai ahlit ithana he, yohmi hosh Chihowa yvmmt Iki, micha Klaist isht anumpa luma hatok ma otvnihincha he ak atok;

3. Klaist ak o na hopoyuksa, micha nan ithana ita tuklo im isht ilaiyukpa moma kv̄t a luma hoke.

4. Micha hatak nana kia anumpa isht yimmichi isht hvchi haksicha hinla kak o ilvppa achi lishke.

5. Haknip okvno isht ik saksho kia, shilombish okvno isht hvch ibafoyukvt ai vlhpiesa hvsh yvmohmi, micha Klaist a i yimmi ka a kvllot hvsh hielī ka hvchi pihisa li kv̄t sai yukpa hoke.

6. Yvmohmi ka Klaist Chisvs Chitokaka ya hvsh i yimmi hatuk okvt, yvmohmit hvsh iba nohowashke:

7. Micha hakshish atobvt kvllot ontalaivt a hvchim ai vlvchi tok mak o, ai yimmika a kvllot im ai vlhtaha fehnt, yak oke hvsh ai ahnashke.

8. Ahah! hvsh ahnashke, keyukma hatak nana kia hatak

im anumpa chashpo isht auehinchí iakaiya, micha yakni nan ai ithvna isht ia vmmona iakaiya cha, Klaist a ik iakaiyo yvt anumpa inla, micha anumpa isht haksichi aiena ka isht hvchi okpvnichi ná.

9. Klaist ak osh Chihowa yvt akaniohmi ka isht alotowa kv̄t:

10. Hochitoka, micha nan vlhtoka puta i noshkoboka yvm̄mak o isht hvchim ai vlhtaha hoke:

11. Yvm̄mak pulla hō hvchishno ak kia ibbak o hakshup isht t̄pa keyu hō hakshup isht hvchin t̄pa tok: yvmohmi hosh Klaist hakshup t̄pa pulla hō haknip nan isht ashvchi yash naksika hvsh bohli tuk oke:

12. Na baptismo hō hvsh iba hollopi tuk, Chihowa yvt toksv̄lit yvm̄vt illi tuk a falaminchit tanichi tok ak o, hvchi yimmi hosh yvm̄mak ash awant hvsh tani hoke.

13. Yohmi kv̄t hvchishno vt nana hvsh ai ashvchi isht illi, micha hvchi haknip hakshup ik tapo atuk a nana hvsh ai ashvchi puta ka hvchi kashofi cha, yvm̄mak ash iba taklv̄chit hvchi okchalinchi tuk oke:

14. Nan isht vlhpisa ibbak isht holisso a kashofi tok, yvm̄vt p̄i sanali, micha pim ai vlhpiesa keyu hosh pi ai ititakla hikia tok a ishit kanchit, im ititaiyukhvna ya ahonv̄hlichí tok oke:

15. Yv̄mma pulla hō hochitoka, micha isht im ai ahli puta aiena ka wehpulit, haiakv̄chit pisachit isht ai yukpa tok.

16. Yvmohmi hoka hatak nana kia impa ak ok má, nan ishko ak okmá, impa holitopa nitak ak okmá, hvshi talali ak okmá, nitak hv̄llo puta ak okmá, nana kia nan isht apesvt ik hvchi onochó kashke.

17. Yvm̄vt nana kv̄t vla he isht vlhpisa yoke: amba haknip okv̄to Klaist ak oke.

18. Hatak nana kia ilap ahnit il akanlosechit, enchil v̄hleha hā aiokpv̄chit nana pisa chatuk keyu kv̄t, afvnalit haknip im anukfila isht ilefehv̄chi, yvmohmit noshkoboka ya halv̄lli keyu kv̄t, na hvsh asitv̄ba he tuk a, ik hvchim esho kashke.

19. Yvm̄mak o haknip moma itachakli, micha hakshish



aiena kvt isht ai iti talakchit isht hlampkot, Chihowa hvt ahni hō tobtv ia hoke.

20. Yohmi ka yakni ai ithvna isht ia vmmōna ai i filvmit, Klaist a hvsh ibai illi tok okmvt, nanta katihmi hō yakni hvsh ibafoyuka chohmit, nan isht vlhpisa hatak vt apestv ithvnanchi ka hvsh i nutaka cho?

21, 22. Ilvppa chohmi ka, Ish potoli ná; vpvvt ish pisa ná; ish pvshohli ná, moma kvt ieshi kvt okpula he bieka hoka.

23. Nana yvmma puta hokvt hopoyuksa ahoba ho mvhli, ilap ahnit vba aiokpvchit il akanlosechit hahnip a ilbvshali; yohmi kia holitoblichy keyu, peh haknip ak o im achukmali hoke.

### CHAPTER III.

Pim anukfila nan isht hih il ahni a kanima yo il a bohla hi a pim anoli, 1; 5 na liteha isht im anukfila puta ka illichy he vlhpesa ka i miha; 9 nan ahli anumpuli; 12 i kanvt nan iti nanaiyachi; 14 vba isht talohvvt isht i shahlit hvsh iti hlampkochashke; 18 hatak im ohoyo; 10 hatak ohoyo im asha; 20 vlla, 21 iki 22, yuka aiena kvt nan a kaniohma hi vlhpesa ka isht anumpuli.

1. YOHMI ka Klaist a hvsh iba tani tuk okmvt, Klaist vt a binili vba Chihowa ibbak isht impakimma nana ai asha kak o hvsh hohoyashke.

2. Hvchim anukfila ha nana kvt vba ai asha kak o hvsh onochi cha, nana kvt yakni paknaka ai asha kak o keyu kashke,

3. Hvch illi; yohmi hosh hvchi okchaya yvt Klaist a iba lumvt Chihowa ya ibafoyuka hoke.

4. Klaist yvmmvt il ai okchaya yosh haiaka, yohmikma hvchishno ak kia a holitopa hosh yvmmak ash awant hvsh haiaka hi oke.

5. Yvmohmi ka hvchim i nana kvt yakni ai asha ka hvsh illihinchí; havi toba, chukvsh liteha, anushkunna atampa, haknip nan ahni okpulo, nana ahayuchi bunna atampa, yvmmvt na holvvt toba aiokpvchi yoke.

6. Na yakohmi pulla kak o Chihowa nan isht i nukkilli vt nan ik im antio hatak puta ka onvtuyula hoke:

7. Yvmma chohmi ka hvchishno ak kia chashpo ma hvsh ibafoyuka kv̄t hvsh ai itvnowa tok.

8. Yohmi tuk kia himak okvno hvchishno vt nokowa, nukhobela, i nukkilli, ik ahobalot anumpuli, anumpa isht hofahya, hvch itih h̄a akocha ilvppa moma kak kia hvsh kanchashke.

9. Hvsh it i holabi ná, hatak sipokni ya shufit nana a kaniohmi chatuk puta ka hvsh kanchi ch̄a;

10. Hatak himona yo isht hvsh foyuka tuk okvt, yvmmak okvt nan ithana ka isht a himonvt, Ikbi tok a hoyulba hosh himonvt toba tok:

11. Yvmmak oka Klik, micha Chu yo keyu, hakshup t̄pa, micha hakshup ik tapo yo keyu, Bvlbaha, micha okla nukshopa yo keyu, yuka, micha ik yuko yo keyu, amba Klaist vto nana moma ka im i shahli, micha moma ka ibafoyuka hoke.

12. Yvmohmi hoka Chihowa im vlhtoka nan ashvchi iksho, holitopa hvchia hokvt hiahni, i kana, anukfila akanlosi, chukvsh yohbi, anukhobela svlahvt nuktaiyala aiena kak o hvsh foyukashke.

13. Hatak kv̄na kia isht itachowa im ashakmvt, itin lumvt hvsh it i kashofashke; Klaist vt hvchi kashofi tok oka, yvmmak inli h̄o chohmit hvsh yvmohmashke.

14. Michā ilvppa moma paknakachi kv̄t nan isht i hullo, yvmmak osh ai vlhtaha ai ahli ka isht iti talakchi yoka, isht hvsh foyukashke.

15. Michā it i nanaiyvchi Chihowa a minti vt hvchi chukvsh a foyukvt nana hvchim apesashke, yvmmak a he ak o haknip achvfa hvsh toba chi hosh hvchi vlhtoka tok oke: micha yak oke, hvsh ahnashke.

16. Klaist im anumpa hv̄t a chitot hvchi foyuka na isht a hvchi hopoyuksashke; vba isht taloa, micha shilombish imma isht taloa aiena ka isht it im avchit, isht it i nukfohkit, nana aiokpahancha he hvchi chukvsh a foyukvt Chitokaka ya hvsh in talohqashke.

17. Micha anumpa hokmá, na kanihmi hokmá, nana hoh kia hvsh yvmohmikmvt, Chitokaka Chisvs hochihifot yvm-mak atuk mak o Iki Chihowa ya yak oke im ai ahnit, mominchit hvsh yvmihinchashke.

18. Tekchi vhleha ma! Chitokaka im ai vlhpiesa mak o hvchi hatak a hvsh im ile nutakvchashke.

19. I hatak vhleha ma! hvchi tekchi a hvsh i hullashke; yohmi kvv chukvsh homit hvch ik i kvllo kashke.

20. Vlla vhleha ma! nana móma ka hvch iki, micha hvch ishki ita tuklo ka, hvsh im antiashke; ilvppak osh Chitokaka ya im ai achukma ahli yoka.

21. Iki vhleha ma! hvchim vlla vhleha ha hvsh nokowvchi ná; yohmikma im ai ahli la he keyu ahnit, chukvsh iella hinla yoba ká.

22. Yuka vhleha ma! hvchi haknip i nahullo vhleha ha nana puta ka hvsh im antiashke; nishkin pisa toksvli hatak ak o yukpali chohmi keyu, chukvsh achvfa ai apissali hosh Chihowa ya hvsh i nukshoyupashke.

23. Yohmi kvv nan toksvli nana ho hvsh yvmihchikmvt, chukvsh ai ahlit Chitokaka pulla, micha hatak keyu ho hvsh i yvmihchashke.

24. Chitokaka yak o ai isha he ai vlhpesa isht hvchim vlhtoba he vt hvsh ithaiyanashke: Chitokaka Klaist ak o hvsh in toksahanli hokvt.

25. Amba kvna hosh nan ik vlhpeso yohmikmvt, nan ik vlhpeso yohmi tuk ak osh isht im vlhpisa hi oke: iti shah-sholichit kvna kia im anukfilli kvv iksho hoka.

#### CHAPTA IV.

Nan i shahli vt nana a kanihoma he vlhpesa ka achi, 1. 2 Vba a sihihla bilia he im achi; 5 chvch ik ibafoko itanowa ka nan vlhpesa biekvt im itvnohowa he; 10 nana ka i shahlit mahaya he ahnit im achi.

1. I NAHULLO vhleha ma! hvchi yuka vhleha nan isht im vlhpesa, micha nan isht im itilau ai aiena ka hvsh



imashke; micha hvchishno ak kia hvchi shahli hvt vba yakni binili ka hvsh ithaiyanashke.

2. Anumpa ilbvsha anumpohonlit, yvmmak ash o ai okchvt yak oke hvsh ahanashke.

3. Yohmi mak inlit Klaist im anumpa luma yatok, micha yvmma pulla kak o sa talakchi ak inli tuk vt isht anumpuli la he, okhissa ya Chihowa yvt pin tiwa hi a, isht hvsh anumpohonli mak inlashke.

4. Yvmohmi ho anumpuli la he vlhpesa hatuk vt, otvninchi lashke.

5. Kocha ai asha ka i hopoyuksvt itvnowvt, nitak ik hvchi kvnio hosh nan isht hvsh il im ahantashke.

6. Hvchim anumpa puta kvt Chihowa nan isht i kana ai ibafoyuka biekvt hvpi ho isht yvm mashke; yohmi hosh kaniohmit hatak puta anumpa falama ka hvsh ima he vlhpesa kvt hvsh ithaiyana hoke.

7. Nana vma kaniohmi ka Tikikvs, ilvppvt itibapishili holitopa, micha vbanumpa isht vttai ahli, micha tishu sa bika Chitokaka ibafoyuka yak osh hvchim anola chi hoke.

8. Yvmmvt yvmohma chi kak o hvchi pila li tuk: yohmi ka nana hvchim a kaniohmi ka akostininchi cha, hvchi chukvsh a hopohlva chi kak atuk;

9. Micha Onesimvs itibapishi li ai ahli holitopa, yvmmvt hvchishno ak inli ka aieninchit hvchi pila li hatuk. Yvmmak osh nana moma ilvppa a kaniohmi ka hvchim anola chi hoke.

10. Alistakvs, svbai yuka yvt pit hvchi aiokpvchishke: micha Makvs, Banabas in tek ushi mvt pit hvchi aiokpvchishke; yvmmak oka isht anumpa vlhpisa ha hvsh ishi tuk vt hvchim onakma, hvsh aiokpvchashke.

11. Micha Chisvs, yvmmvt Chvstvs hohehifo hvt pit hvchi aiokpvchishke; yakohmi kvt hakshup tupa yoke. Ilvppak illa hosh Chihowa im apehlichika a svba toksahanli yosh nan isht sa hopohghla yatuk oke.

12. Epafias, yvmmvt hvchishno mak inli, Klaist in tishu hosh pit hvchi aiokpvchishke, micha Chihowa nan ai ahni moma ka a kvllot ai ahli hvsh hikia hi a anumpa ilbvsha achunanchit isht hvchi anumpohonli bilia yoke.

13. Hvchishno, micha Laotisea ai asha, micha Hielapolis ai asha aiena ka hvchi anukfihinli fehna ka im atokowa anoli sia hoke.

14. Luk, alikchi holitopa, micha Temas, ita tuklo kv̄t pit hvchi aiokpv̄chishke.

15. Itibapishi v̄hleha hv̄t Laotisea aiasha, micha Nimfas, micha in chuka chv̄fa hv̄ch ai asha aiena ka pit hv̄sh aiokpv̄chashke.

16. Micha holisso ilv̄ppa hv̄sh it im anumpulikm̄vt, anonti Laotisea hv̄ch ak kia ai it anumpa hi a hv̄sh apesashke: mikm̄vt holisso Laotisea a minti ak kia hv̄sh it im anumpulashke.

17. Micha Achippvs a Chitokaka yak o v̄banumpa isht ai vtta ish im ai eshi tuk vt ahah! ahnit ish ai ahlichashke, hv̄sh im achashke.

18. Ūno sv̄bbak ak inli ho Pal sia hv̄t pit isht hv̄chi aiokpv̄chi lishke. Sa talakchi ka hv̄sh ithaiyanashke. Isht i kana yvt hv̄ch anukfoiyukashke. Amen.

HOLISSO vMMONA PAL vT

# CHŮCH HLESSALONIKA

A HIKIA HO I HOLISSOCHI TOK.

## CHAPTA I.

Chrch Hlessalonika a hikia ka ithanvt vba isht anumpohonlit yak oke im ai ahni, 1; 5 mihmvt Chihowa anukfoyuka ahli ahnit i yimmi kvt isht anumpuli.

1. PAL, micha Silfanvs, micha Timohlivs aiena kvt Hlessalonian chrch Iki Chihowa, micha Chitokaka Chisvs Klaist ibafoyuka ya pit hvchi aiokpvchi kvt, Piki Chihowa micha Chitokaka Chisvs Klaist ita tuklo nan isht i kana, micha nan isht it i nanaiya ita tuklo kvt hvchi anukfoyukashke hvchim ahnishke.

2. Anumpa ilbvsha il anumpulikmvt, e hvchi anohonlit, Chihowa ya yak oke hvsh moma ka isht e hvchim ahani hoke;

3. Pin Chitokaka Chisvs Klaist ibafoyukvt na hvchi yimmi kvt na hvsh yvmihchi, micha na hvsh i hullo aiena kvt na hvsh toksahanli, micha ai okchaya pisa he ahnit nuktaiyalvt hvsh achunanchi aiena ka Chihowa Piki itikba ya ithaiyanvt e bilia hoke;

4. Micha itibapishi li vhleha ma! Chihowa i holitopvt im ai vlhtoka hvchia ka il ithaiyana kak oke.

5. Pim vbanumpa hv anumpa illa hosh hvchim aya tok keyu, amba nan isht ai ahli, micha Shilombish Holitopa ai



itibafoyuka aiena na na hvchi yimmi fehna tok ; yvmohmit hvchishno ak atuk mak o kaniohmit hvchi takla il aya tok a hvsh ithaiyana ak inli hoka.

6. Yvmohmi cha nan isht ai ilbvsha lawa kia, Shilombish Holitopa ai yukpvt vbanumpa ha hvsh aiokpvchi cha, pishno, micha Chitokaka ya im antia hvsh toba tuk oke :

7. Yvmohmi hokvt na yimmi moma Masetonia, micha Akaia aiena ai asha kv̄t im ai ithv̄nvt iakaiya hi o hvchia hoke.

8. Hvchishno ak o mvhli ho Chitokaka im anumpa anoa kv̄t Masetonia, micha Akaia ak bano keyu, amba kani-ma moma kak kia, Chihowa hvsh i yimmi kv̄t annovshke ; yohmi ka pishno vt nana il acha he v̄lhpesa keyu hoke.

9. Michā yv̄mma chohmi puta kak osh pi anoli kv̄t, kaniohmit e hvch iba chukowa tok ; micha kaniohmit Chihowa ahli okchaya ya hvsh im antia chi hosh, na holba ya i filv̄mmit Chihowa hvsh im ona tuk a anoli hoke.

10. Yohmi cha Ushi Chisvs vt illi tuk a falaminchit tani-chi tok a, mihi yosh vba yakni minta chi ka hvsh hohoyo ka, yvmak osh nan isht i nukkilli minti ka pi ahlakofichi tok mak oke.

## CHAPTA II.

Vbanumpa hv̄t kaniohmit Hlessalonika ya ai anuhumpa ma, kaniohmit okla aiokpvchi tok a anoli, 1 ; 18 pisa ka b̄v̄nna fehna, yohmi kia nana hosh kaniohmi kak o ik im ono kv̄t anoli.

1. ITIBAPISHI li v̄hleha ma ! hvchishno ak kia kaniohmit e hvch iba chukowa ma, yv̄mm̄vt pilla tok keyu ka, hvsh ithaiyana hoka :

2. Yohmi ka tikba ka pilbvsha, micha Filippi okla hv̄t pi hofahyali aiena tok a hvsh ithaiyanv̄shke ; yohmi ha ya pin Chihowa pulla ho a nukwaya keyut, achunanchit a lushummit vbanumpa ha isht e hvchim anumpohonli tok.

3. Vbanumpa isht e hvchim anumpohonli kv̄t, anumpa yoshubli, micha chukv̄sh litehli, micha i kostinit haksichi atok keyu hoka ;

4. Amba Chihowa ak osh vlhpesa ahnit vbanumpa ha pibbak fohki tok oka, yvmohmit il anumpuli hoke: hatak ak o e yukpali keyu, amba Chihowa pi chukvsh a pisa yak oke.

5. Micha nitak nan ash o na fehnvchit il anumpuli tuk keyu, nan isht ahayuchi bvnna hosh, nan il ilahobi ha tuk keyu ka hvsh ithana hoke: Chihowa mvt pisa yoke.

6. Micha hatak ak o a holitopa e hoyo tuk keyu, hvchishno, micha inla yak oh kia tok keyu, Klaist im apostel pia hvt hvchi wekit na hvch im a hoyocha he vlhpesa kia, e yvmohmi tuk keyu.

7. Amba hvchi takla il ashwa mvt, ik kvllot, vlla ilauei vt ipetvt hofantichi chatuk a e chohmi tuk oke:

8. Yvmohmi hosh hiahnit e hvchi palata fehna hokvt, vlhpesa ahnit Chihowa im anumpa ak bano keyu, amba pimi shilombish ak kia aieninchit e hvch ima hinla tuk, hvsh pi holitopa fehna hoka.

9. Itibapishi li vhleha ma! toksahanlit hoyvblit pilbvsha tok a hvsh ithana hoke; achvfona kia e hvchi weka chi keyu kv, ninak, micha nitak, aiena ka toksahanlit Chihowa im anumpa ha isht e hvchim anumpohonli tok.

10. Hvchishno, micha Chihowa ak kia kaniohmit chukvsh kashofvt ai vlhpiesa, micha anumpa onvtula he iksho ho na yimmi vhleha hvchia ha hvchi takla il ashwa tok a atokolit pi anoli hvchia hoke.

11. Atohnochit, micha hopohlvlit iki yosh im vlla im anumpuli ak inli ho e chohmi tuk a hvsh ithaiyana,

12. Yohmi hokvt vba apehlichika holitopa ya hvsh esha chi ka, Chihowa, yvmmak osh hvchi hoyo tuk a, hvsh im ai ahla he ak atuk.

13. Chihowa im anumpa ha hvsh pi haponaklo mvt, im anumpa nana ho chohmichit hvsh ishi keyu kv, amba ai ahli hoka, Chihowa im anumpa hoke, yvmmt na yimmi hvchia puta ka ai ahlit hvchi atahli tuk ilvppa pulla aiena kak o Chihowa ya yak oke il im ahni kv, il issa keyu hoke.

14. Itibapishi li vhleha ma! hvchishno vt Chihowa in chvch puta Klaist ibafoyuka hosh Chutea aiasha ka, iakai-

ya hvsh toba tuk oke; hvchishno ak kia Chu okla hv<sub>t</sub> yvmihchi tok a, hvchim okla hv<sub>t</sub> chohmichit hvch ilbvshali tok oka:

15. Yvmmvt Chitokaka, micha ilap i hopaii puta atuk ak kia vbi tok osh, pishno ma pilbvshali tuk oke: mihmvt Chihowa yo yukpali keyu mvt, hatak moma ka im inla hoke:

16. Il im anumpuli na Chentail vt okchaya chi ka pim alvmmi hoke; ilap nan ashvchi alotola chi kak osh yvmohmi bilia chatuk okvt, nan isht i nukkilli vt onvtula kv<sub>t</sub> ont im ai okluha hoke.

17. Yohmi ka itibapishi li vhleha ma! nitak ik hopako ka nashuka yokvno hvchi filvmmichit pi ai ishi tuk, chukvsh ak okvno keyu, yvmohmi ho isht i shahli fehvt hvchi nashuka ya pisa pi bvna fehna tuk oke.

18. Yvmohmi kak osh himonna, micha a tukla foka ka e hvchim ona he, Pal fehna sia hv<sub>t</sub> vm anukfila tuk; yohmi tuk kia Setan vt pi ataklvmmi tok.

19. Yohmi ka nanta hak o il isha he il ahni ho? nanta hak o isht pi aiyukpa yo? nanta kak osh pim iachuka isht pi aiyukpa yo? Pin Chitokaka Chisvs Klaist vt vlakma itikba ya hvchishno yak a he keyu?

20. Hvchishno ak o isht pi a holitopa, micha isht pi aiyukpa yoka.

### CHAPTA III.

Timohli a pit i pila kv<sub>t</sub> Tlessalonian a i hullo; micha nan ai vhlpiesa ho okla yvmohmi ka isht yukpa kv<sub>t</sub>, otvninchi hatok, 1; 10 vba isht anumpohonli, micha im ona hi a ahni fehna aiena.

1. YVMOHMI hoka pi nuktaiyala he keyu kit taha mvt, Ahlens a pishno bano hosh il ashwa he vhlpesa il ahni tok.

2. Micha Timohlivs, pitibapishi, Chihowa nan isht im vta, Klaist im vbanumpa a piba toksvli, vt hvchi ai yimmi ka ya a hvchi hlampkohonchit hvchi hopohlva chi ho, e pila tuk oke:



3. Yohmi na hatak kvna kia nan ai ilbvsha yakohmi ka isht ik a shanaiewo kashke; hvchishno ak kia yakohma hi vt isht pim vlhpisa tok a hvsh ithanvshke.

4. Hvchi takla il ashwa mvhli mvt, nan isht ilbvsha ya e pisa hi vt tikbanli hvchim anoli tok fehna kv ant ai yvmohmi tuk a, hvsh ithaiyanvshke.

5. Yakohmi kak o sa nuktaiyala he keyu kit taha mvt, na nukpvlichit vt kaniohmit haksichi tuk yoba ka, yohmi na e toksvli tuk vt peh pilla na, ahni li hosh, hvchi ai yimmi ka akostininchi la chi hosh pila li tuk oke.

6. Yvmohmi tuk kia himak vno Timohliis vt hvchi a kohchvt pim vla cha, a hvchi ai yimmi, micha hvsh iti hullo annoa achukma ka isht pim vla, mihma hvsh pithaiyana a bilia, hvchi pisa pi bvna ka, hvchishno mvt pi pisa hvchi bvna fehna ak inli tuk a, e haklo tuk oke.

7. Yvmohmi kv itibapishi li vhleha ma! a pilbvsha putvt nana kv pim atukonofa kia a hvchi yimmi ka pulla kak o isht pi a hopohla tuk oke.

8. Chitokaka ya ibafoyuka kvllot hvsh hielikma, himak a pi okchaya mak okvt.

9. Hvchishno pulla kak o pin Chihowa itikba ya na yukpa puta isht pi aiyukpa kv, yak oke ahni katiohmi ho hvchishno pulla kak o anonti Chihowa ya il ima hinla?

10. Ninak, micha nitak moma anumpa ilbvsha achunanchit il asihhla kv, yvmvt hvchi nashuka ya e pisa cha, na hvchi yimmika yvt nan ik ai ono ketuk a il ai ahlichia he ak oke.

11. Yohmi ka Chihowa ilap vt Piki, micha pin Chitokaka Chisvs Klaist vt il atia chi ka apissvlichit pisht hvchim onashke.

12. Micha Chitokaka yvt hvsh it i hullo ka i shahlit isht ia, micha hatak moma hvsh i hullo ka i shahlit isht ia, a chinto ka hvchim ahnashke; pishno e hvchi hullo ka hvsh chohmashke:

13. Yvmohmi ho pin Chitokaka Chisvs Klaist vt vbanumpa yimmi puta pehliechit vlakma, nan ashvchi ikshot,

anumpa hvchi onvtula keyut, Chihowa, Piki mak o itikba ya hvsh hielā hi o, mihi yosh hvchi chukvsh a hlampkohon-chashke.

# CHAPTER IV.

Chihowa anukfoyuka kv̄t i shahlit mahaya hi a atohnohonchi, 1 ; 9 iti hullo, 11 nuktanlv̄t ilap nan isht ai v̄tta he tok akbano hō ahni; 14 illit falamv̄t tani, mikmv̄t anonti Klaist v̄t minta hi a isht anum-puli.

1. YUMOHI ka anonti itibapishi li v̄hleha ma! Chitokaka Chisv̄s puyulla hō isht e hvchim anumpohonli kv̄t, yvmmv̄t kaniohmit ayv̄t Chihowa ya hvsh yukpala hi osh hvsh pi a haponaklo tok v̄t, yvmohmit chitot isht i shahli fehnv̄t hvsh mahaya he ak o e hvchim asilhhvshke.

2. Chitokaka Chisv̄s pulla hō anumpa v̄lh̄pisa nana hō e hvch ima tok a hvsh ithaiyana hokv̄t.

3. Nan ashvchi ik hvchim iksho ilv̄ppak osh Chihowa im anukfila hoka, yvmmv̄t na haui hvchik ahalaio ka he ;

4. Micha hvsh moyuma kv̄t nan ashvchi iksho, micha holitobli hosh, kaniohmit im ai v̄lhto ya iesha he v̄t ithana hi ak oke.

5. Haknip nan ai ahni isht haui toba keyu hosh, Chentail v̄t Chihowa ik ithano ka ik chohmo kashke :

6. Hatak nana kia atabl̄it itibapishi hā nana hoh kia ik haksecho kashke ; Chitokaka yv̄t yv̄mma chohmi ka im apesv̄t na hotopa onocha he oka, yv̄mma chashpo ma ahah ! hvsh im ahna he, atokolit e hvchim anoli tok.

7. Chihowa yv̄t a liteha yō a pi atokoli tok keyu, amba nan il ai ashvchi iksho ka hi ak atuk oke.

8. Yvmohmi ka kv̄na kia shitilemakmv̄t, hatak o shitilema keyu, amba Chihowa yvmmv̄t ilap Shilombish Holitopa ya pima tok ak oke.

9. Amba itibapishi it i hulla he imma hokv̄no isht hvchi holissochi la hi a hvsh ahna he keyu : hvchishno ak inli hosh it i hulla hi okv̄to Chihowa yak o hvsh im ai ithv̄na tuk oka.

10. Yohmi kv̄t il itibapishi moma Masetonia moma ai asha ka hvsh i yvmohmi mv̄hli hoke : yohmi kia il itibapishi v̄hle-

ha ma! isht i shahlit hvsh mahaya hi ak o e hvchim asilh-hvshke.

11. Micha na fehna ahnit nuktaiyalt, nana ilap isht ai vttā he biekā hō yvmihchi, micha ilap ibbak ak inli hō isht toksahanla hi ilvppak o e hvchim apesa tok ak oke:

12. Yvmohmi hosh kocha āsha ka ai vhlpiesa hō hvsh i yvmohmi cha, nana kia ik hvch im ono kv̄t iksho kashke.

13. Yohmi kia itibapishi li vhleha ma! nusi vhleha ak okvno hvch ik im ithano ka he ahni li keyu, inla yvt nana ai okchaya pisa he ik ahno yō, chohmit ik hvchi nukhaklo ka he ak oke.

14. Chisvs vt illi tuk osh falamvt tani tok a pi yimmi hokma, yvmmak inli hō chohmit kv̄na hosh Chisvs a ibafoyukvt nusi tok okvno Chihowa hv̄t iba tanicha hi oka.

15. Chihowa im anumpa pulla hō ilvppa e hvchim achi hoka, yvmmt Chisvs vt v̄lakma, pishno vt pi okchayvt il āsha tuk vt, nusi tok a il in tikba he keyu hoke.

16. Chitokaka yvt ilap ak inli hosh na shakapa, enchil i miko im anumpa ola, micha Chihowa im isht pufa chinto ohonla hō a pehliechit vba mintit v̄la hi oka; mikma Klaist a ibafoyukvt illi tuk vt tikba tana hi oke.

17. Yohmi mak inli hō pi okchayvt il āsha kv̄t, hoshonti ataya shutik takla Chitokaka yā il ai afama chi ka, yvmmak ash aieninchit pisht ia hi oke: yvmohmi hō Chitokaka takla yā il āsha na bilia hi oke.

18. Yvmohmi hoka, anumpa ilvppa puta kak o isht hvsh it i hopohlahanlashke.

## CHAPTER V.

Nan vhlpisa chinto nitak a kaniohmit Klaist vt v̄la he anoli, 1; 12 nan im av̄chi, micha nana ka achukma he bano hō ahnit, apesahanchi puta ka holitobla he i miha; mihmvt nan inla isht ai im anukfila he vhlpesa ka aieninchit achi.

1. YOHMI kia itibapishi li vhleha ma! himak a pilla nitak nan a kaniohma he puta imma hokvno isht hvchi holis sochi la hi a hvsh ahna he keyushke.



2. Chitokaka i nitak vt hukopa yosh ninak o aya ho chohmit vla hi okvno, hvchishno ak inli kvv hvsh ithana fehna hoka.

3. Achukma bieka, tvnvp vt iksho, okla ahanchikma, yohmikmak o yohma chi ik ahno takla ho na palvmmi kvv onvtula kvv, ohoyo vlla esha chi kvv nukhvmi ka chiyuhma hi oka; mikma hlakofa he keyu hoke.

4. Yohmi kia itibapishi li vhleha ma! hukopa yo chohmit nitak yvmmvt hvchi sakka chi ka, ai okhlilika yo hvsh aya keyushke.

5. Hvsh moma kvv atohwikeli ka im vlla hvchia, micha nitak im vlla hvchia hoke; ninak, micha ai okhlileka yo pia keyu hoke.

6. Yvmohmi ka inla yo chohmit ik hvpi nuso kashke; amba okchvt ahah! il ahnashke.

7. Kvna hosh nusi hokvto ninak ak o nusi; mikma nan ishkot haksi hokvto ninak ak o haksi hoka.

8. Amba nitak o pia hokvto ahah! ahnit, na yimmi ikkishi alata, micha nan i hullo ma isht hvsh foyuka, micha noshkobo isht ompoholmo ai okchaya pisa he ahni ya il ieshashke.

9. Chihowa yvt ai i nukkilli yo a pim apesa tok keyu, amba pin Chitokaka Chisvs Klaist pulla ho ai okchaya il isha chi hatok oka.

10. Yvmmvt pi vlhtobvt illi tok, yohmi ka pi okcha hokma, pi nusi hokma, nana kia iba takla il ahanta hi atok.

11. Yvmohmi hoka hvsh yvmohmi ak inli hatuk vt, it im anumpulit iti hopohlahanlit, hvsh iti hlampkohonchashke.

12. Micha itibapishi li vhleha ma! hvchin toksahanlit, Chitokaka pulla ho hvchi pehliechit, ahah! hvsh ahna he hvchi anukfohki ya, hvsh ithaiyana he;

13. Micha toksahanli pulla kak o holitoblit hvsh im anukfilli fehna hi a e hvchim asilhhvshke. Micha hvchishno bika hvsh it i kanashke.

14. Yohmi ka itibapishi li vhleha ma! ilapunla yvt isht im ahleka hinla ka hvsh im anoli, chukvsh ielli ma hvsh hopohlahanlit, chukvsh ik hlampko hvsh hlampkohonchit,

hatak puta ka chukvsh isht hvsh i nuktaiyala he ak o e hvchi nukfolikishke.

15. Yohmi ka hvsh ahni na kvna kia nana ik achukmo ka nana ik achukmo mak inli ho hatak nana kia ik i yvmihcho kashke; amba hvchishno ak inli, micha hatak puta ka isht im achukma kak o hvsh iakaiya na biliashke.

16. Hvchi yukpa na biliashke.

17. Anumpa ilbvsha hvsh anumpuli kvv hvch ik isso kashke.

18. Nana puta ka yak oke, hvsh ai ahnashke; Klaist Chisvs pulla kak o Chihowa hvv ilvppa hvchim ai ahni hoka.

19. Shilombish a hvsh mosholichi na.

20. Shilombish anukfoyukvv anumpuli ka hvsh shitilema na.

21. Nana moma ka imomaka hvsh pisashke; nana kvv achukma ka kvvlochit hvsh ieshashke.

22. Nana ik achukmo ahomba moma ka ik hvchi ahalaio kashke.

23. Mikma it i nanaiya yvv a mihinti Chihowa ak inli hosh ai oklvhvchit hvchi kashofashke; micha Chihowa ya im asihila li kvv, hvchi shilombish, micha hvchim anukfila, micha hvchi haknip aiena kvv anumpa onvtula ikshochit hvchi ieshit, pin Chitokaka Chisvs Klaist vv ai vla hi a hvch isht onakbano ai ahni lishke.

24. Nana miha kvv ai ahlichy yosh hvchi hoyo kvv, yvm-vvv yvmihcha chi ak inli hoke.

25. Itibapishi li vhleha ma! anumpa ilbvsha isht hvsh pi anumpohonlashke.

26. Hvsh itibapishi puta ka suksowa holitopa yo isht hvsh ai okpvchashke.

27. Chitokaka pulla ho holisso ilvppa il itibapishi holi-topa vhleha ha hvsh im it anumpohonla he ak o hvchi miha lishke.

28. Pin Chitokaka Chisvs Klaist nan isht i kana yvv hvchi anukfoyukashke. Amen.

HOLISSO ATUKLA PAL VT

## CHUCH HLESSALONIKA

A HIKIA HO I HOLISSOCHI TOK.

## CHAPTA I.

Hlessalonian okla hvt vbanumpa anukfohka ai ahli ahnit, yimmit miha, 1; 7 nan i pulammit maya ka vba afoha he isht hopohlahanli; mihmvt nana kv̄t isht ai vhlpiesa ho nan vhlpisa pulammi kv̄t i nukkilli vhleha ha onvtuyula he isht miha.

1. PAL, micha Silfanvs, micha Timohlivs pia hvt Chvch Hlessalonika a hikia Piki Chihowa, micha Chitokaka Chisvs Klaist ibafoyuka ka pit il aiokpv̄chi kv̄t,

2. Piki Chihowa, micha Chitokaka Chisvs Klaist ita tuklo nan isht i kana, micha isht it i nanaiya ita tuklo kv̄t hv̄chi anukfoyukashke, e hv̄ch im ahnishke.

3. Hv̄chi ai yimmi ka yvt chitot isht i shahli fehna, micha hv̄sh moma kv̄t hv̄sh it i hullo kv̄t laua fehna hoka, itibapishi li vhleha ma! isht ai vhlpiesa ho hv̄chishno pulla kak o Chihowa ya yak oke il im ai ahni na bilia hi atuk oke:

4. Yvmohmi kv̄t pishno vt ai ilbv̄sha, micha na palvmmi puta aiena kv̄t hv̄chi onvtuyula kv̄t, hv̄chi nuktaiyalvt, na hv̄chi yimmi kak o, Chihowa in chvch puta ka a hv̄chi anolit isht e hv̄ch ilauata hoke.

5. Yvmmak okvt Chihowa hvt ai vhlpiesa apesvt onochi ka isht otvni, yohmi ho Chihowa im apehliche ka ya hv̄sh isha he vhlpiesa ka hv̄chi ahna hi atok, yvmmak a he mak o hv̄ch ilbaiyv̄sha hoka.



6. Chihowa hvt hvch ilbvshali ya i falaminchit na palummi ho onocha hi vt vlhpesa;

7. Micha hvchishno vt hvch ilbvsha kvv, hvsh pibafoha hi a hvchim ahna hi vt vlhpesa hoka, nitak yvmma fehna Chitokaka Chisvs vt enchil hlampko puta ka il ai eshit,

8. Uba mintit luak libbi biekvt haiakvt, Chihowa ik ithano, micha Chitokaka Chisvs Klaist im vbanumpa ik im antio aiena ka isha he vlhpesa mak o im apesvt onochikma;

9. Yvmmak okvt Chitokaka, micha nan isht im ai ahli holitopa itikba ai i filvmmi na palvmmi a bilia isht im vlhtobvt ilbvsha he;

10. Yvmmak okvt vla cha, vbanumpa yimmi puta ka isht a holitopa he, mikma i yimmi puta kvv okokko! ahnit aiokpahancha he nitak yvmmak ok mak o yakohma he, atokolit il anoli tok a hvchi yimmi tok oka.

11. Yvmohmi hoka anumpa ilbvsha isht e hvchim anum-pohonli na bilia kvv, pin Chihowa yvt nan isht ilaiyukpa ilvppak ash hvsh isha hi a vlhpesa hvchi ahni cha, ilap nan isht i kana aiokpancha he achukma moma, micha ai yimmi a toksvli nan isht im ai ahli aiena ka isht hvchim atahli hokbano il ai ahni hoke.

12. Yvmohmi ka pin Chitokaka Chisvs Klaist hohchifo hvt, hvchi a holitopakma, pin Chihowa, micha Chitokaka Chisvs Klaist nan isht i kana pulla ho yvmmak ash hvchi a holitopashke.

CHAPTA II.

Nan ai ahli ya a kvllot iesha hi a i miha; nan ai ahli laua kvv ai i filvmma he, mikma Klaist i sanali vt Chitokaka yvt ik lo kisha ka, otaiyana hi a anoli;15 vba isht anumponhli.

1. YOHMI ka itibapishi li vhleha ma! pin Chitokaka Chisvs Klaist vt vla he, micha il im itvnaha he ak o isht e hvchim asilhhvshke.

2. Yohmi ka chekosi, shilombish tikbanli anoli yokma, vbanumpa tosholi yokma, pi holisso hak okma, nana hoh

kia Klaist i nitak vt auet olanlosi hvchi chohmit, hvchim anukfila hut ik shanaïowot ik hvchi komunto kashke.

3. Hatak nana kia kaniohmit ik hvchi haksecho kashke: vbanumpa ha i filvmmmit ik asho kisha, micha nan okpuni ushi, hatak nan ashvchi yvmmvt ik haiako kisha ka, nitak yvmmvt vla he keyu.

4. Yvmmak okvt Chihowa bohchifo, micha i shahli ikbit aiokpvchi puta ka i sanalit ile chahvchit, il i shahlichî yoke: yohmi hosh yvmmvt Chihowa chohmit, Chihowa in tempel a binilit, Chihowa ile mihvt ile haiakvchi hoke.

5. Hvchi takla anta li moma mvvt, ilvppa puta ka hvchim anoli li tok a hvch ik ithaiyano ho?

6. Yohmi ka himak ano nitak vt im vlhpiesakmvvt otvna hi a, nana hosh halvlli ka, hvsh ithaiyanvshke.

7. Na luma chito ik vllpeso yvt tobvt isht ia mashko hoke: himak a halvlli kvv halahanla chi; atuk o yvmmak ash o ishit i kanvllichik mak a hi oke.

8. Mikma yohmikmak o nan ashvchi yvmmak ash ot otvna hi oke; yvmmak oka Chitokaka yvt itih ilhfiopak isht illichâ he, micha shohpakali hosh ant haiakakmvvt, yvmmak ash o akshocha hi oke.

9, 10. Yvmmak okvt Setan nan akaniohmi yo iakaiya kvv, nan isht im ai ahli, nan isht atokowa puta, micha na holabi isht nukhlakancha, mikmvvt nan ik vlhpeso isht yoshubli aiena ho il ai ishit illi na bilia he puta ai itin takla ya ayvt otaiyani yvmmak a he oke; okchaya hi atuk kia vbanumpa ahlika ya holitoblit ik yimmo tok okvt.

11. Mikma yakohmi kak o Chihowa yvt nan isht a yoshuba kvvlo kvv ik onvtula im ahni na na-holabi kia i yimma he:

12. Yvmohmi pulla hosh anumpa ahli ik yimmo hosh, amba nan ik vlhpeso aiokpanchi tuk vt momvt nan im vlhpisvt na hotopa hi atok.

13. Yohmi kia itibapishi li Chitokaka i holitopa hvchia ma! hvchishno pulla kak o Chihowa ya yak oke il im aiahnit bilia he vlhpesa hoke. Shilombish isht a kashofa, micha anumpa ahli yimmi pulla hosh hvchi okchaya he ai vmona ka hvchi atokoli tok oke:

14. Yummak a hi o pin Chitokaka Chisvs Klaist isht a holitopa ya hvsh isha hi a, yummak ash ot pim vbanumpa isht hvchi hohoyo tok oke.

15. Yvmohmi hoka itibapishi li vhleha ma! kvllot hvsh hielashke, micha anumpa vllhpisa puta vbanumpa toshowa hokmá; keyukmvt pi holisso hokmá, nana ho hvsh ai ithv-na tuk vt hvsh ieshashke.

16. Mikma pin Chitokaka Chisvs Klaist ilap inli, micha Piki Chihowa, yvmvvt pi hullo, micha nan isht i kana pulla hosh chukvsh isht a nuktaiyala bilia, micha nana isha he ahni achukma ya pihima tok vt,

17. Hvchi chukvsh a hopohlvi cha, anonti anumpa achukma puta, micha nan toksvi achukma aiena ka isht a hvchi hlampkohonchashke.

### CHAPTER III.

vba isht anumpohonla hi a im a sihlha, 1; 6 nan ai vllhpiesa ik shana-iowo ka he i miha; nan in takobi, micha nan ik vllhpeso aiena ka ik ai itapeho ka he, 16 isht aiyopichi kvv vba asihlha.

1. ISHTAIYOPI ka itibapishi li vhleha ma! anumpa ilbvsha isht hvsh pi anumpohonli na Chitokaka im anumpa yvt mvlihinlit ayvt, holitopa kvv, hvchim ai yvmohmi kak inli ho chohmashke:

2. Yohmi ho hatak ik vllhpeso, micha hatak nan ashvchi atampa aiena ka il i hlakofa he ak o, hatak moma kvv ai yimmi ka ishi keyu hoka.

3. Yohmi kia Chitokaka yvt na mihvt ai ahlich, yummak osh hvchi hlampkochi cha, nan okpulo ya hvchi a filvmmi-chit hvch iesha hi oke.

4. Micha hvchishno pulla hokvno Chitokaka ya isht il anukchieto kvv, nana e hvchim apesa tok a hvsh yvmihchi kvv, anonti hvsh yvmihinja chi mak oke.

5. Mikma Chitokaka yvt hvchi chukvsh a apissvlechi na Chihowa ya hvsh i hullo, Klaist atok a chiyuhmit nuktaiyalt hvsh achunanchashke.



6. Yohmi ka itibapishi li vhleha ma! pin Chitokaka Chisvs Klaist a hochihifot isht e hvchim apesa kv̄t, itibapishi kv̄na hosh ai vlhpesa keyu hō aya, micha anumpa vlhpisa pim ai ishi tok ak keyu hokvno, hvsh i filvmmashke.

7. Hvchishno ak inli kia kaniohmit hvsh pi ahobacha he vlhpesa kv̄t hvsh ithanvshke: hvchi takla il ashwa mvt, ai vlhpesa keyu ka a pi yvmohmi tok keyu:

8. Michā pilla hatak inla i pvska e pa tok keyu, amba nina, micha nitak moma ka toksvlit, hoyublit pi palvmmi tok, yvmmv̄t hvsh kaniā kia nana kv̄t ik hvchi kv̄nio ka chi kak atok.

9. Yohmi kv̄t e yvmohma he vlhpesa keyu nana tok keyu: amba hvsh piakaiya hi o e hvchim ile haiakv̄chi hatuk oke.

10. Hvchi takla il ashwa mvt kv̄na kia toksvla he keyukmv̄t impa he vlhpesa keyu, ilvppak oka e hvchim apesa tok.

11. Kanimi kv̄t hvchi takla ai vlhpesa keyut aya mvt, toksvla he keyu kv̄mohmit, nan isht ahalaia keyu kia isht vtvtv̄t fullokahanchi ka e haklo hoka.

12. Yvmma chohmi puta kv̄t nuktanlv̄t ahanlv̄t, toksvlit, ilap i pvska vpa he ak o im apesv̄t, pin Chitokaka Chisvs Klaist puyulla mak o il in tonohonchishke.

13. Yohmi kia itibapishi li vhleha ma! nana achukma ka hvsh yvmohmi kv̄t ik hvch in takobokashke.

14. Michā hatak nana hosh pim anumpa holisso ilvppa ik im antiokma, yohmi hvsh ahni cha, takla hvch ik ayo ki hafayashke.

15. Yohmi kia hvchin tv̄nv̄p o ahnit hvchik anukfillo hosh, amba itibapishi ha chohmichit nana hvsh i mihashke.

16. Chitokaka it i nanaiyv̄chi ilap ak osh ik kaniohmi kia isht it i nanaiya ya hvch ima na biliashke. Chitokaka yvt hvsh moma ka hvch ibafoyukashke.

17. Pal sia hv̄t sv̄bbak fehna hō isht hvchi aiokpv̄chi li ka, yvmmv̄t a holisso puta ka isht ithv̄na mak oke: yakohmi hō holissochi lishke.

18. Chitokaka Chisvs Klaist nan isht i kana yvt hvsh moyuma ka hvchi anukfoyukashke. Amen.

HOLISSO VMMONA PAL VT

TIMOH LI YA

I HOLISSOCHI TOK.

CHAPTA I.

Timohli a pit aiokpvchi, mihmvt nana ka isht atokoli tok vt isht i mihila, 1; 5 nana ho isht ai vllhpisa hosh nan vllhpisa yatuk a anoli; 11 ilap vbanumpa nukfoka tok vt anoli.

1. PI Okchalinchí Chihowa, micha ai okchaya bilia e pihisa he ahnit il anukchieto, Chitokaka Chisvs Klaist ita tuklo ka im anumpa pulla ho, Chisvs Klaist im apostel Pal vt;

2. Nan ai yimmi pulla ho svso fehna Timohli ya pit aiokpvchi hoke; Isht i kana, isht i nukhaklo, micha isht it i nanaiya aiena kvť Piki Chihowa, micha pin Chitokaka Chisvs Klaist ita tuklo ka a mihinti kvť chi anukfoyukashke.

3. Masetonia ya ia li mvt, Efesus a ish anta cha, kvna kia nana inla isht ik abacho ka chi ka,

4. Mikmvt anumpa ik ahobo, micha in tikba ai unchululit isht auehinchí isht annoa ataha iksho, yvmmak okvt Chihowa holitobli nan isht ai yimmi i shahlichit nukfohkicha he keyu hosh, iti posilhhvchit ai asha hi a anukfohkichi yvmmak oka isht ik ahanto ka chi ka, ish im apihisa he chim ai ahni li tok a, ish yvmihchashke.

5. Uba nan vllhpisa yokvto chukvsh kashofa, micha im anukfila achukma, micha na-yimmi ai ahli aiena hosh it i hulla he ak o, hoyo hoke:

6. Kanimi kv̄t ilv̄ppa puta kak ō i filv̄mmit, naksika ia cha, anumpa nan ik ahobo anumpuli hoh mak osh ;

7. Ilap okv̄t nana hō okla miha, micha nana hō kv̄llochit miha aiena kv̄t akostininchi keyu kia, v̄ba nan v̄lhpisa ithv̄nanchi ō toba bv̄nna chatuk oke.

8. Yohmi ka hatak okv̄t ai v̄lhpiesv̄chi hosh isht vt̄ta hokma, v̄ba nan v̄lhpisa yv̄t achukma hoka il ithanv̄shke.

9. Ūba nan v̄lhpisa yv̄t hatak v̄lhpesa yak ō in toba tok keyu, amba v̄ba nan v̄lhpisa ik ahninchot ik im antio, Chihowa ik holitoblo, nan ashv̄chi, Chihowa ik im antio, v̄banumpa ik ahobalo, iki puta v̄bi v̄hleha, ishki puta v̄bi v̄hleha, hatak b̄ika v̄bi v̄hleha.

10, 11. Haui puta, kv̄na hosh ilap inli kv̄t nakni b̄ika isht ile litehli v̄hleha, hatak b̄ika hv̄kopa v̄hleha, holabi v̄hleha, anumpa kv̄llo il onochit ik ahlo v̄hleha, mikmv̄t ilap inli isht ilaiyukpa Chihowa im anumpa holitopa, isht v̄m atokowa tok, nan ai ahli yv̄mma i sanali kia yv̄mohmi v̄hleha aiena kak atok, ilv̄ppa il ithaiyanv̄shke.

12, 13. Yohmi ka tikba ma v̄banumpa ik ahobalo, micha na yimmi v̄hleha i palv̄mmihinchi, micha chv̄kv̄sh hotopahanli sia yatuk kia, ai ahli la he v̄m ahnit, pin Chitokaka Chisvs Klaist mihi yosh sa hlampkohonchi cha, v̄banumpa isht im vt̄ta yō sa hilechi tok ; yohmi ka nan ik yimmot nan ak ithano hatuk osh, nana ka yv̄mihchi li tuk osh nan isht i nukhaklo a ahayuchi li tuk vt̄, yak oke im ahni lishke.

14. Yohmi ka pin Chitokaka nan isht i kana yv̄t lava fehna hatuk ō, Klaist Chisvs ai ibafoyuka hosh na sai yimmi cha, nan isht i hullo li tok oke.

15. Nan ashv̄chi v̄hleha yv̄mma v̄no ak osh moma i shahli li yatuk a, okchalinya ch̄i hosh Klaist Chisvs vt̄ yakni pakna v̄la tok, anumpa ilv̄ppvt ai ahli fehna ka v̄lhpesa ahnit, aiokpancha he v̄lhpiesa hoke.

16. Yohmi ka nan ashv̄chi moma i shahli v̄no yak atuk osh nan isht i nukhaklo yā ahayuchi li tok, ilv̄ppak ō himak a pilla ai asha kv̄t yv̄mma i yimmi cha, ai okchayv̄t bilia isha ch̄i ka, Chisvs Klaist vt̄ v̄no ak ō nan isht ahobv̄cha he ak osh ilap nan isht i sv̄lahvt̄ i nukhaklo yā otv̄nihincha ch̄i ha tok.



17. Yohmi ka Mikō okchayvt a bilia, illa he keyu, na holhponayo hvt pisa he keyu, Chihowa hopoyuksa yak bano kak o ahninchit holitohombli na bilia hosh ik biliá. Amen.

18. Tikba nan atokowa isht a chi anoli kv̄t, tikbalichit isht chi otv̄nihinchi yv̄mmak atuk pulla mak o, tv̄shka ahli achukma hosh ish tanahampa chi ka, sv̄so Timohli ya nan isht ish ahanta he ilv̄ppa chi atokoli lishke :

19. Ilv̄ppak ash im ai ahli achukma kv̄t isht il akostininchi achukma ka ish ieshashke : yakohmit isht il ithaiyana he tuk ash osh kanimi kv̄t kanchi kv̄to, nan ai yimmi ka yash o it a yuhli yoke.

20. Yohmi ka kanimi kv̄t Himenevs, micha Aleksanta ita tuklo kak atuk ; yv̄mmvt v̄banumpa ik ahobalot nan ik mihacho ka chi ka yv̄mmak o ithv̄na chi ka, Setan a im issa li tok oke.

CHAPTA II.

Hatak moma ka v̄ba isht anumpohonla he, mihmvt nana kv̄t kaniohmi kak o yakohma hi a anoli, 1 ; 9 kaniohmit ohoyo hvt shema he : 12 ohoyo hvt v̄ba anumpa isht anumpula he keyu, yohmi kia na yimmi ahli hokmvt, okchaya he.

1, 2. YOHMI hoka nana ish a yvmohma he v̄mmona kv̄t, Chihowa hvt hatak puta ka i nukhaklo ka yak oke pit im ai ahnit, anumpa ilbv̄sha ish anumpuli kv̄t, Chihowa hvt hatak puta i kanvt, miko v̄hleha, micha nan v̄lhtoka v̄hleha aiena ka hopoyuksiacha he ak o ish im asih̄hla he chi atohno lishke ; yohmi kv̄t Chihowa ya e holitobli, micha hatak nana il ai it i kaniohmi puta kv̄t ahli achukma hosh il ahanta hokmak osh pi okchaya takla kv̄t, it i hullot it i kanvt il ahashwa hinla hoke.

3. Ilv̄ppak okvt achukma hoke ; yohmi ka pi Okchalinchī Chihowa hvt pisa kv̄t ahninchī hoke :

4. Yv̄mmak okvt hatak puta kv̄t v̄banumpa ahli yoka nukfoyuka cha, okchaya he ak o im aiahni hoke :

5. Yohmi ka Chihowa hvt achv̄fa, micha hatak, Chihowa ita tuklo it i nanaiyv̄chi yvt achv̄fa, hatak Klaist Chisvs ak oke.

6. Yv̄mmak okvt moma ka v̄lhtoba mak osh ilap inlit il

im issa kv̄t, anumpa aḥli ilv̄p̄p̄t ont ai v̄lhp̄iesakma anohowa hi a tok oke.

7. Yvm̄mak atuk mak ɔ apostel, micha v̄banumpa isht vt̄ta ita tuklo ka si v̄lhtoka tok oke; yohmi kv̄t anumpa aḥli, micha na yimmi imma aiena ka Chentail okla im av̄v̄chi sia hosh, holabi keyu hosh Klaist isht anumpa aḥli mak ɔ anum-puli lishke.

8. Yohmi ka anuktuklo, micha anukhobela aiena iksho hosh, ibbak m̄vt kashofa achukma biega hosh v̄ba pit welit, kanima moma ka hatak puta kv̄t anumpa ilv̄v̄sha ai anum-pohonla hi a im ai ahni lishke.

9. Anonti yvm̄mak ash inli h̄o chiyuhmit, ohoyo puta kv̄t ilefoka ai v̄lli chito, p̄v̄l, tv̄li holisso lakna aiena ka isht ik shemo ka he, micha p̄ashi aiena ka yikyuchit ik shemacho ka he; amba im anukfila puta kv̄t ile oktamplit, hatak ma ik ai okchifelo hosh nuktanlv̄t, ilap isht a shema he ai v̄lhp̄iesa ka isht shema he im ai ahni lishke.

10. Amba ohoyo puta kv̄t Chihowa holitobli kv̄t, si anuk-foyuka ahnit il anoli kv̄t, ai yvmokma he v̄lhpesa, nan isht vt̄ta achukma kak ɔ yvmohmashke.

11. Ohoyo hv̄t ai aḥlit im antīvt, lum̄vt maya hosh nana ka ith̄vnashke.

12. Yohmi ka hatak a ohoyo hv̄t i shahlit, nana ka im av̄v̄chit ahanta he ak im ahnoshke; amba lum̄vt ai asha he im ai ahni lishke.

13. Yohmi ka Alvm̄ ak osh If a tikba toba hatok oka.

14. Mihma Setan vt̄ Alvm̄ a haksichi tok keyu, amba ohoyo hak ɔ haksichi na ai ashv̄chika ya yvmohmi tok.

15. Yohmi kia v̄lla ishi kv̄t okchaya he, yohmi kv̄t na yimmi kv̄t ik isso hosh, i hullo, micha chukv̄sh kashofa h̄o isht holitoblit, ile oktampli hok mak osh okchaya hi oke.

### CHAPTER III.

Bishop, micha iksa nan isht im vt̄ta, micha im ohoyo aiena kv̄t nana hosh im v̄lhtaiyaha he,<sup>1</sup> 15 Chihowa in chv̄ch, micha nan ai aḥli vt̄ ai v̄lv̄v̄chi ka isht im anum-puli.

1. ANUMPA ilvppvt ai ahlishe, yohmi kv̄t hatak kena hosh bishop nan ai isht vtta ishi bunnakmvt, nan ai isht vtta achukma hō ishi bunnā hoke.

2. Yohmi ka bishop vt anumpa ik achukmo nana kia onvtula he keyu, tekchi achvfa ī hatak, nana ka ahah ! ahni, ile oktampli, nana a kaniohmi mvt achukma, hatak ik ithano moma ka ī kana, nana im av̄chi kv̄t imponna,

3. Oka homi ishko shahli keyu, na fahama keyu, ai vlhpiesa keyu isht a hofahya he nan isht ahayuchi bunnā keyu; amba nuktanlv̄t, ik itachowo, tv̄li holisso ī hullo keyu;

4. Yohmi kv̄t ilap in chuka chvfa ya pehlichī kv̄t imponna, im vlla v̄hleha hv̄t im antia achukma chī ka yopunla keyu hosh im anukfila nuktanla achukma hosh nana im apihisashke :

5. Yohmi ka hatak in chuka chvfa pehlichī ik ithano kv̄t, katiohmit Chihowa in chvch a apesv̄chi imponna hinla hō ?

6. Himona vbanumpuli toba keyu hashke; yohmi hatuk mvt ilefehnv̄chi isht a wakayvt hikia hokmvt, nan isht ahullo okpulo nan isht ilbv̄sha im vlhpisa tok a chiyuhmit im vlhpisa hinla hoke.

7. Anonti vbanumpuli keyu aiasha im annoa achukma kv̄t ieshashke; keyukmvt isht a hofahya, mieha nan isht ahullo okpulo nan isht haksichi aiena ka pit itula hinla hoke.

8. Anonti chvch nan isht im vtta yvt yopunla iksho hosh im anukfila nuktanla achukmashke, im anumpa tuklo keyu, oka homi ishko shahli keyu, ai vlhpiesa keyu isht a hofahya he nan isht ahayuchi bunnā kv̄yu;

9. Nan ai yimma hi vt vbanumpa a luma hatok a im anukfila kashofa achukma hosh isht ieshashke.

10. Yvmmak ash o tikba imomaka pisashke; yohmi kv̄t anumpa ik achukmo onvtuyula iksho hok mak osh, chvch nan isht im ai vtta ya isht vttashke.

11. Tekchi ak kia yopunla keyu hosh im anukfila nuktanla, hotopali bunnvt na-mihachi keyu, nana ka ahah ! ahni, nana moma ka ai ahli banashke.

12. Chvch nan isht im vtta yvt tekchi achvfa ī hatak osh,



im vlla vhleha, mīcha ilap in chuka chvfa ya ai vllhpiesa hosh pehlichashke.

13. Yohmi ka chvch nan isht im vtta nan-ai isht-vtta isht vtta ai ahli yvmmak osh ilap isht hohehifo achukma ka ishi hoke; yohmi cha Klaist Chisvs isht ai yimmi kv̄t nukwaya iksho hosh anukfoykvt ahantvshke.

14, 15. Chekosikma chim ona la chī, ahni li; yohmi kia anta hī hopaki hokma, Chihowa im aboha anukaka, yvm̄vt Chihowa okchaya in chvch okvt, vbanumpa ahli ka in tonik, micha in tolahpi yoka, ish a kaniohma he puta kv̄t ish ithaiyana he mak o, ilv̄ppa puta ka pit chī holissochi lishke.

16. Mikma moyuma kv̄t ilv̄ppa ai ahli ai ahnishke; vbanumpa nan otvninchi kv̄t na chinto fehna; yohmi kv̄t Chihowa hv̄t haknip o isht otv̄nit, Shilombish Holitopa ka isht ai ahlit, enchil vhleha hā im a haiakvt, Chentail vhleha hā isht im anuhumpa tok, mihma yakni paknaka ya ai i yihimmi tok o, vba a holitopa ka ik chukowá im ai ahni na pit chukowa tok.

#### CHAPTA IV.

Nan ai yimmika ya i filv̄mmit akakoha hi a tikbanli anoli, 1; 6 nana ka a yvmohma he vllhpiesa ka mominchit yvmihcha hi a anumpa vllhpisa il aiyukali isht i miha.

1. SHILOMBISH Holitopa yvt otvninchi fehna hoshi anoli kv̄t, himak a pilla ka kaniohmi kv̄t vbanumpa yim̄mi tuk vt issa cha, shilombish na yoshubli im antiv̄t, nan isht ahullo okpulo vhleha imma isht vl̄bv̄chi ka yimmit,

2. Nan ilahobi holabi hosh anumpohonli kv̄t, isht il akostininchi mvt tv̄li lv̄shpa isht luv̄t yikotvt kv̄nia hatuk osh;

3. Nan-itauwaya im ol̄vbichi, micha ilhpak kaniohmi ka ik po ka he aiena ka im apihisa he; ilhpak yvmmak oka anumpa ahli ithana, micha i yimmi aiena hokv̄to yak oke ai ahnit, habena he mak o, Chihowa hv̄t ikbi tok oke.

4. Yohmi ka Chihowa hv̄t nana moma ikbi tok a achuk-

ma bano, yak oke ai ahnit habena hokvto, ik ahnincho ka hi a nana kv̄t ikshoshke.

5. Yohmi ka Chihowa im anumpa, micha anumpa ilbvsha ita tuklo atuk mak o yvm̄mak ash ot isht a pim v̄lhpiesa hoke.

6. Ilvppak o itibapishi v̄hleha hv̄t ithaiyana he mak o ish nukfoiyuki hok m̄vt, Chisvs Klaist im anumpa isht v̄tta achukma chia mak a he, na yimmi, micha nan v̄lv̄vchi achukma ita tuklo isht anumpa ka isht chim v̄lv̄vchit a chi anukfoiyuka hoke.

7. Anumpa kv̄llakshi shukanumpa, ohoyo sipokni nan anoli chohmi ka chik ahnincho hosh, amba Chihowa holitoblit isht ahantashke.

8. Haknip nan isht v̄tta isht ai achukma hokvto mishema he keyu hoke: amba Chihowa holitobli nana moma ka isht im ai achukma kv̄t, yakni paknaka nan ai isht ai yukpa, micha yakni inla v̄la he mihinti ita tuklo ka isht ai yukpa he im issa hoke.

9. Anumpa ilvppvt ai ahli fehna ka, v̄lhpesa ahnit, ai okpancha he v̄lhpiesa hoke.

10. Yohmi ka ilvppak osh yohma ch̄i ho, e toksv̄lit pi hoyv̄blit, isht a hofahya anumpa aiena kv̄t pi onv̄tohonla kv̄t, Chihowa okchaya ak o il anukchieto ka; yvm̄mak osh hatak moma okchalinihi, yv̄mma i yimmi hok mak heno ahli fehna hosh okchalinihi yoke.

11. Ilvppa puta ka im apesv̄t ish im abahanchashke.

12. Chi himita kak o isht ik ch̄i yukpo kv̄t kv̄na kia ik anto kashke; amba nan ish a kaniohmi, ish anumpuli moma, ish i hullo, chukv̄sh nan isht ish ai ahni, na chi yimmi, haui imma anukfila iksho, ilvppa puta ka ish yvm̄ohmi pulla na na-yimmi v̄hleha hv̄t chim ai ithv̄v̄t chiakaiyashke.

13. Holisso it im annmpulit nan atohnochit, v̄banumpa im av̄vchit isht ish ahanta na ona lashke.

14. Na hv̄lbina chimmi ha he nitak hopaki pilla kash anohowa tok o, v̄banumpa isht v̄tta v̄hleha hv̄t ibbak chi onochi na chim ai ahli tok vt, chi anukfoiyuka kv̄t isht chik ahanto ki ná.

15. Ilvppa ish anukfihinli cha, chim anukfila ha a mominchit isht ish ahantvt, nana ka i shahlit ish mahaya ka nana moma ka ai otvnashke.

16. Ahah! ish il ahnashke, micha nana ish abahanchi kv̄t ahah! ish ahnashke: yohmi kv̄t yv̄mma achunanchit isht ish mahayashke: ilvppak o ish yvmohmi hokmak osh, ish ile okchalinchikmvt, anonti inlv̄t chi haklo aiena ka ish okchalinea hinla hoke.

## CHAPTER V.

Hatak ilaiyuka ka kanimihchit nan i miha he anoli, 1: 5 ohoyo i hatak illi ya nan isht i miha: 17 ik̄sa nan isht im v̄tta, 23 Timohli abekoma chohmi aiena ka nan isht miha, 24 kanimi ka nan im ashv̄chika yvt tikba ivt nan v̄lhpisa ka ona, mikma kanimi nan im ashv̄chika yvt himmak o iakaiv̄t nan v̄lhpisa ka ona.

1. **HATAK** asv̄nochi ka anumpa kv̄llo isht chik im alv̄mmicho hosh, amba īki chohmichit i kanvt nana ish i mihashke; micha hatak himita v̄hleha hokv̄no itibapishi chohmichit i kanvt nana ish i mihakmvt,

2. Ohoyo sipokni v̄hleha hokv̄no ishki chohmichit i kanvt nana ish i mihakmvt, anonti ohoyo himita v̄hleha hokv̄no havi imma anukfilli ik̄sho hosh, in tek chohmichit i kanvt nana ish i mihashke.

3. Ohoyo i hatak illi v̄hleha hv̄t i hatak illi ahli pulla ka ish holitoblashke.

4. Amba ohoyo i hatak illi kaniohmi kv̄t im v̄lla, keyukmvt ipok v̄hleha hv̄t asbakmvt, vmmona nan ithv̄na kv̄t, in chuka mayvt nana achukma ka yvmohmashke; micha ipokni, ishki chohmi ka falaminchit im atobbashke: ilvppvt achukmv̄shke, yohmi kv̄t Chihowa itikba ya ai v̄lhpiesa hoke.

5. Yohmi ka ohoyo i hatak illi ahli pulla, micha v̄lhtakla hokv̄to, Chihowa ak o anukchieto kv̄t, nitak, ninak ita tuklo ka anumpa ilbv̄sha anumpohonlit a bilia hoke.

6. Amba ohoyo i hatak illi yvt haknip nan isht ai yukpa isht ai yukpvt ahanta hokv̄to, okchaya takla kv̄t illi yoke.



7. Yohmi ka ilvppa puta ka ish im apihisa na anumpa ik achukmo kv̄t ik onvtulo kashke.

8. Amba kanimi kv̄t ilap immi, micha ilap in chuka chvfa a fehna aiena ka ik im atahlo hokmvt, vbanumpa ha ik holitoblo kv̄t, nan ik yimmo ak kia ik achukmo kv̄t i shahli hoke.

9. Ohoyo i hatak illi yvt afvmmi pokoli hannali ka ik ono hokvto, ik iba holisso kashke,

10. Yvmmv̄t hatak achvfa tekchi atok, nan isht vtta achukma ka isht annoa achukma, vlla achukmalit hofanti-hinchi, hatak ik ithano nowvt aya ka nan im atahanli, vbanumpuli holitopa iyi kia im achihiḡa, ilbvsha ya apelahanchi, nan isht vtta achukma puta ka achunanchi biekv̄t isht ahanta cha tuk mak osh iba holissashke.

11. Amba ohoyo i hatak illi himita vhleha hokvno ish im olvbichashke; yvm̄mak okvto Klaist im antia ik bvnnot, yakni paknaka nan isht ai yukpa ahnit isht iakmvt, hatak auwaya bvnna hinla hoke:

12. Yvm̄mak okv̄t na yimmi vmmona tuk vt issa hokv̄t, isht ilbvsha anumpa hv̄t onvtuyula hoke.

13. Mikmvt anonti nan isht vtta intakobi kv̄t, chuka abaiyv̄chi banot itvnohova; micha nan isht vtta intakobi kak bano keyu, amba anumpa chukushpali aiena, micha inla nana im a kaniohmi kak bieka isht ahantv̄t, nana isht anumpula he v̄lhpesa keyu kia isht anumpuli hoke.

14. Yohmi hoka ohoyo i hatak illi himita vhleha hv̄t hatak auwayakmvt, vlla ishki tobv̄t, chuka apesv̄chit anta kv̄t, nana ik achukmo nana kia yvmohmi na vbanumpa i sanali vhleha hv̄t hofahyalit isht ik anumpulo ka he, im ai ahni lishke.

15. Himak a kaniohmi hokvto naksika filvmm̄it Setan a iakaiyv̄t ia mashko hoke.

16. Yohmi ka hatak, keyukmvt ohoyo na yimmi kanimampo kv̄t ohoyo i hatak illi yvt i kanomi hv̄t asha hokmvt, yvma apelahanchi na chvch ak okvto nan isht ik i kv̄nio kashke; amba ohoyo i hatak illi ahli pulla hokvno apelv̄chashke.

17. Iksa pehlichī v̄hleha hvt achukmalit iksa pehlichī kak osh holitopa kv̄t ī shahlikma, anontī v̄banumpa ithv-nanchit isht anumpulī hokak hetō ī shahli feh̄nvt holitopashke.

18. Yohmi ka Holisso Holitopa yvt achi kv̄t, Wak toksvli vt onush nihechi ka itih h̄a chik takecho kashke: micha, Na toksvli vt im v̄lhtoba he ak osh ai v̄lhpiesa hoke, achishke.

19. V̄banumpa isht v̄tta yvt nan ik achukmo kia yvmohmi tok annoa ka ik chi yimmo kashke; amba nan atokowa anoli tuklo, tuchina kanima hosh anoli hok mak ashke.

20. Amba ashv̄chi hatuk o mv̄hli hokmv̄no, momvt p̄isa h̄o, ish im alv̄mmichashke, yohmi na inla āsha kv̄t nukshopa mak inlashke.

21. Nana chim apih̄isa li kv̄t, Chihowa, micha Chitokaka Chisvs Klaist, micha enchil v̄lhtoka v̄hleha aiena ka itikba hikia li hosh, ilv̄ppa ish holitobli kv̄t it ī shahsholechit, hatak achv̄fona h̄o ī kana ī shahlichit nana isht chik im ahanto ka he ahni lishke.

22. Hatak kv̄na kia himak fokalechit ibbak onochit, inla nan ai ashv̄chi ka chik iba taklo kashke: yvmohmi kv̄t a kashofa hosh ish ahantashke.

23. Himmakma oka kapv̄ssa chik ishko hosh, amba chik-foka ak atuk pulla mak o, micha chi abeka shahli aiena hokvt oka-paki kanomosi ka ish ishkashke.

24. Hatak kaniohmi nan ai ashv̄chi yvt tikbanli otv̄nit, nan ai v̄lhpisa itikba ȳa oh̄ona hoke; mikma hatak kaniohmi hokv̄no iakaiya hoke.

25. Anontī h̄atak kaniohmi nana achukma a yvmohmi kv̄t tikbanli otv̄ni akinlishke; mikma ik yohmo ke tuk vt luma he keyu hoke.

## CHAPTA VI.

Yuka hvt nana ka isht ahanta he v̄lhpesa ka anoli, 1: 3 ilap vt nan isht ithvnachi tuk a keyu h̄o kv̄na hosh isht ithvnachi hokv̄no ī filv̄mma he. 6 Chihowa anukfoyuka hokv̄to nan il ahayuchi,

10 tvi holisso i hullo kv̄t nan ik vlhpeso yō hakshish; 11 nana hō Timohli vt i filvmmi cha, anonti nana hō im'antia he: 17 nan in-lava ya nana hō im acha hi a im achi.

1. YUKA puta ikunla abana nuta ahanta kv̄t, ilap i na hullo isht a holitopa he vlhpiesa ka isht holitobli na Chihowa hohchifo, micha im vbanumpa aiena kv̄t isht ik kvllaksho kashke.

2. Mikma i na hullo vbanumpuli yosh asha hokvt itibapishi hokvt, isht ik i ahno ka he vlhpesa keyushke; amba i na-hullo yvt na-yimmi, micha Chihowa i holitopa, micha nana isht ai yukpa vba minti ka it ibai ishi yoka, aiokpanchit nana ka isht im ahantashke. Ilvppa puta kak o im avchit ish atonohonchashke.

3. Yohmi ka hatak kanima hosh nana inla hō avchi, micha isht ai achukma anumpa Chitokaka Chisvs Klaist im anumpa, micha Chihowa holitobli nan isht vlbahanchi aiena ka vlhpesa ik ahnot,

4. Ilefehnvchi isht alotvt, nan ithana keyu, amba tasimbot nan isht a ponaklo ak bano isht anumpohonli; micha anumpa isht itachowa aiena yvmmak o a minti hosh nan it i potvno, it i nukowa anumpa, kanimanchit isht anumpuli, anukfila okpulo,

5. Michā hatak im anukfila ik achukmo, micha vbanumpa ahli kv̄t ik im iksho cha, nana ahayuchi kak osh Chihowa holitobli im ahōa hosh, it i kvllot anumpuli aiena hoke; yvmma chohmi ka ish il i filvmmichashke.

6. A nuktanla hosh Chihowa holitobli kv̄t nana a fehna ahayuchi hoke.

7. Yohmi ka yakni ilvppa nana il ishi hosh e la tok keyu; yohmi kv̄t nana ishit il ia he keyu kv̄t ai ahlishke.

8. Yohmi kv̄t nan ilhpak, micha ilefoka aiena il ishi kv̄t, yvmmak oka isht pim ai vlhpiesashke.

9. Amba nan in laua he ak bano bv̄nna fehna hokvto, nan isht hokli, nan isht anukpuli, micha anukfila ik hopoyukso, micha anukfila okpulo isht ile okpvni aiena ka chukowa, yvmmak ash ai okpuloka chinto ka hatak a okai ahambi hoke.



10. Yohmi ka tvli holisso i hullo kak osh nan ik achukmo moma ka hakshish isht a toba hoke; yvmmak o kaniohmi kvt anuksitvt hohoyo kak osh, vbanumpa ha i filvmmi cha, nan isht a nukhaklo laua ka isht ile nvhlit ile hlopullihinchi tok oke.

11. Amba chishno Chihowa immi chia ma! ilvppa puta kano ish i filvmmashke: micha ai vlhpiesa yvmohmi, Chihowa holitobli, na yimmi, i hullo, nuktanlv achunanchi, anukfila yohbi aiena hak o ish hohoyashke.

12. Na-yimmi isht itibi achukma yvmmak o isht ish itihimbashke; ai-okchayvt bilia ak o kvlllo hosh ish ieshashke, yvmmak o chishno ak kia isht chi vlhtoka tok, micha nan atokowa anoli lawa ka itikba yo vbanumpa yimmi isht anoli achukma ka ish il apesa tuk mak oke.

13. Chihowa yvmmak osh nana moma ka ik okchaya, im ahni na okchaya, micha Chisvs Klaist, yvmmak okvt Pontivs Pailat itikba hikia mvt, ai atokowa ahli achukma ka il anoli tok ita tuklo itikba ya hikia li hosh nana chim apihisa li kvt;

14. Chishno yvt na-liteha iksho, anumpa ik achukmo chi onvtula he kia iiksho hosh, nan vlhpisa ilvppa holitoblit ish ahanta na pin Chitokaka Chisvs Klaist okvt haiakashke:

15. Ai yvmohma he apesa tok nitak yvmma ilap ak bano hosh ithana hosh yvmmak oka haiakvcha he; yohmi kvt ilap ak osh nayukpa Miko ak bano, miko moma ka i Miko, micha chitokaka moma ka in Chitokaka yoke.

16. Yvmmak okvt ai illa hi vt ik im iiksho, micha tohwikeliki yvmmak oka hatak nana hosh ai ona he keyu ho anukaka ai ahanta hoke; yohmi ka yvmmak oka hatak nana hosh pisa chatuk keyu, micha pisa hi o keyu; yvmmak okvt isht a holitopa, micha nana moma isht imaiya bilia ita tuklo kvt immi hashke. Amen.

17. Himonasi im ilayak laua aiasha ka nana ish im apihisa kvt, im anukfila chahvt ik ai asho ka he, micha im ilayak ai ahli keyu ka ik anukchieto hosh, amba Chihowa okchaya, yvmmak osh nana isht pim ai achukma he moma ka laua-chit pihima kak ashke:

18. Yohmi kv̄t nana achukm̄li kv̄t nan isht vtta achukma ka isht ahanta fehna kv̄t, hopela hi vt im vlht̄aha, habenv̄cha he vt ahni kv̄t;

19. Nitak himak a pilla mihinta he ak pulla tuk mak o im ilayak achukma ilap immi mak osh intolahpi bohonli na ai okchayvt bilia ya isha he mak o, ish i mihhashke.

20. Timohli ma! nana chim vlhpih̄isa tok vt ish holitobli kv̄t, vbanumpa isht ik ahalaio isht anumpa, isht ik ahobo anumpa, micha nan ithana ahli keyu it i chilitvt isht it im anumpuli aiena ka chik ahalaio kashke.

21. Yohmi ka kaniohmi kv̄t yvm̄mak o iakaiya miha hosh, vbanumpa ha i shanaiyvt ashv̄chi tok oke. Isht i kana yvt chi anukfoiyukashke. Amen.

## HOLISSO ATUKLA PAL VT

## T I M O H L I Y A

## I HOLISSOCHI TOK.

## CHAPTER I.

Timohli i hullo kv̄t Pal vt isht anumpuli, 1 ; 6 Chihowa nan isht i kana anukfoyuka tok vt i shahlichit isht im anukfihinla hi na im achi.

1. CHIHOWA nana ai ahni hō Chisvs Klaist im apostel Pal vt ai okchaya Chisvs Klaist vt ataiyahli tok a anohonla chi hosh iso i holitopa fehna Timohli ya aiokpvehishke ;

2. Nan isht i kana, isht i nukhaklo, micha isht it i nanaiya aiena kv̄t Iki Chihowa, micha pin Chitokaka Chisvs Klaist ita tuklo ka a mihinti kv̄t chi anukfoyakashke.

3. Chihowa ya yak oke im ai ahni li kv̄t, an tikba vhleha hv̄t kaniohmit aiokpahanchi beka tok a chiyuhmit anukfila kashofa hō isht aiokpahanchi li kv̄t, ak isso hosh nitak, ninak moyuma ka anumpa ilbusha anumpohonli likmvt, chithaiyana lishke :

4. Yohmi kv̄t chi nishkin okchi mihinti tok a ithaiyana li mvt, chi pisa sa bv̄nna fehna, yvmohmit sai yukpa ai ahli fehna hokbano ai ahni lishke ;

5. Yohmi kv̄t na yimmi ai ahli kv̄t chi anukfoyuka ka ithaiyana li mvt, chipokni Lois ak o v̄mmona ka yvm̄mvt anukfoyuka tok osh, anonti chishki Yunis a anukfoyuka tok osh, chishno ak kia chi anukfoyuka ka sai yimmi akinlishke.

6. Yvmohmi hoka sv̄bbak chi onochi li tok ak o nana



Chihowa ish i habena tok vt chi anukfoyuka, yvmma achukmalit ish okchvla chi mak o chim anohonli lishke.

7. Yvmohmi ka anukfila isht nukshopa keyu, amba isht hlampko, mikmvt isht i hullo, mikmvt isht a hopoyuksa aiena anukfila ho Chihowa hvt pima tok oka.

8. Yohmi ka pin Chitokaka im anumpa atokowa, mikmvt yvmma atuk pulla mak o yuka sia aiena ka chik i hofahyo hosh; amba vbanumpa ak atuk pulla mak o nan isht palvmmi puta ka Chihowa hvt chi hlampkohonchi mak o isht ish ibai ilbvshashke;

9. Yvmmak osh pi okchalinchi cha, vba nan isht ilaiyukpa holitopa ho il iesha he mak o pi atokoli kvt, pishno nan il ai isha he ai vhlpiesa kak o yohmi keyu, amba ilap nan isht im anukfihinla hosh, yakni ik tobo pilla kash inli ho ilap isht i kana ya Chisvs Klaist ak atuk pulla mak o pihima kak a tok oke:

10. Amba pi Okchalinchi Chisvs Klaist vt vla kak osh himonasi kvno isht i kana ya otvninchi kvt, nan-illi ho imaiyachit kanchi cha, ai okchaya micha ai illa he keyu aiena ka vbanumpa ak pulla kak o isht otvninchishke:

11. Yvmmak atuk pulla mak o vbanumpa isht vtta, micha apostel, micha Chentail vhleha nan im avvchi aiena si vltoka tok oke.

12. Yvmmak atuk pulla mak o na-palvmmi puta ilvppa aiena ka pihisa li; yohmi ak inli kia sa hofahya he keyu; kvna ho i yimmi li hatuk vt ithana li hokvt; mikma nana ka isha chi ho ibbak fohki li tok a ishi na nitak yvmma ona he bano ka i sai yimmishke.

13. Anumpa ai ahli achukma is si a haklo tok vt, Chisvs Klaist isht i yimmi, micha isht i hullo aiena ka kvllot ish ieshashke.

14. Shilombish Holitopa pi anukfoka kak osh chi apihinla na nana achukma ish iesha chi ho chima tok a ish ieshashke.

15. Chishno yokvt ilvppa ish ithana; yohmi kvt Asia ai asha tuk vt moyumvt a filvmmiit kvnia tok: yvmma iba foka kvt Fichellvs, micha Hemochenes ita tuklo kak oke.

16. Onesifolvs in chuka chvfa yoka Chitokaka yvt i nuk-

naklok bano, yummak okvt sai yukpahanli beka tok oka, mi cha yukvt sa talaiyakchi ka ik sa hofahyo ki tok.

17. Amba Lom a ont anta mvt, achunanchi fehna hosh sa hohoyo cha, si ahayuchi tok.

18. Chitokaka yokvt vlhpesa im ai ahni na nitak yummak oka Chitokaka yvt i nukhaklo ka ahayuchi hok bano; micha Efesus a ont anta li ma, nana lawa kaniohmi ka isht si apelahanchi tok a, chishno yokvt ish ithana fehnvshke.

## CHAPTA II.

Timohli vt achunanchit Chitokaka in tishu ai ahla chi ka Pal vt i miha, 1; 16 nana ho ahah! ahna he; 24 mikmvt Chitokaka in tishu hvt kaniohmit ai vlhpiesvt im anukfila he im anoli.

1. YOHMI ka svso chia hvt Chisvs Klaist nan isht i kana yoka isht ish hlampkashke.

2. Nan-atokowa anoli lawa itikba yo chishno yokvt nana ka is si a haiyaklo tok vt, yummak oka hatak ai ahli achukma inla ai asha ka nan im avcha he ai vlhpiesa ak inli kak o ish imashke.

3. Yohmi ka Chisvs Klaist in tvshka achukma chia hokvt na palvmmi ish pihisa kv, vlhpesa ish ai ahnashke.

4. Hatak kvna kia tvshka toba hokvto, yakni ilvppa nana a kaniohmi ka isht ataklvma keyu hoke: tvshka atokoli tok ak o yukpala chi hosh yvmohmi hoke.

5. Mikma it i shahliche a bvna hosh hatak vt achunanchi ak inli mak osh, nan vlhpisa yak o holitoblit achunanchi keyu hokvto, iachukola he keyu hoke.

6. Yakni okchali yvt vmmona ka toksuli ha yak osh nawayaya yoka ai vpashke.

7. Nana chim ahanchi li ka ish anukfihinlashke; mikmvt nana moma ka ish ithaiyana chi ka Chitokaka yvt chi anukfohki hokbano.

8. Um vbanumpa hak atuk mak o Lewi isht ai unchululi Chisvs Klaist vt illi tuk vt, falamvt tani tok a ish ithaiyanvshke:

9. Yvmmak atuk pulla mak o nan-ishtakanomi yo chiyuhmit na-palvmmi ka pihisa li hosh, polaka sa talaiyakchi tuk oke: yohmi kia Chihowa im anumpa hokvto talakchi keyu hoke.

10. Yohmi ka ai-okchaya pisa he vlhtoka tok vhleha atuk pulla kak o na-palvmmi puta pihisa li kv, yvmmak kia Chisvs Klaist vt ai-okchaya ataiyahli tok a, micha nan isht a holitopa aiena ka isha chi ka si yvmohmi hoke.

11. Ilvppv anumpa ai ahli yoke: il ibai illi hokmvt, il ibai okchaya chi ak inli hoke.

12. Nuktanlv il achunanchi hokmvt, il iba mika he ak inli hoke: Klaist a ak ithanoshke, il achikma, ilap ak kia ik pithano ak inla hi oke:

13. Kil i yimmo kia, ilap okvto ai ahlit ahanta: yohmi kv ik ile holitoblo ka he keyu hoke.

14. Ilvppa puta ka ithana chi mak o ish ithvnanchashke: yohmi kv anumpa illa nan isht achukma he keyu, amba haklot maya kv isht ai okpula hi okvno isht itachowvt ik ai asho ka hi o, Chitokaka itikba ya anumpa ai ahli ka isht ish im apihisashke.

15. Ulhpiesa chi ahni ho Chihowa itikba ya ish hikia chi kv ish achunanchashke; yohmi kv ish a toksvli tuk vt isht chi hofahya he keyu hosh anumpa ai ahli yoka, moyumvt ai isha he ai vlhpiesa ka, ish ita kvshkolashke.

16. Yohmikmvt vbanumpa isht ik ahalaio isht anumpa, isht ik ahobo anumpa puta kvno ish apakfopashke; yvmmak okvt Chihowa ik holitoblo i shahli ka ikba hinla hoke.

17. Mikmvt im anumpa hv kanka yo chiyuhmit okpahana hi oke: yvmmak oka iba fokv kv Himenevs, micha Filetvs ita tuklo kak oke.

18. Yvmmak okvt nan ai ahli ka i filvmmi kv, illi falamvt tani yvt ant ia tok ahanchi kak atok; mihmvt na yimmi kaniohmi ka okvni hoke.

19. Yohmi kia Chihowa im intolahpi yvt kvlllo ai ahli hoke: anumpa ilvppak osh ai o holisso kak o, Ilap immi ka Chitokaka yvto ithana hoke. Mikmvt Klaist hohchifo hohchihifo kv moyumvt nan ai vlhpesa keyu ka i filvmmashke.



20. Yohmi kia chuka chinto anukaka ya nan ai vlhto tvli holisso lakna, micha tvli hvta isht a toba aiena kak bano hosh fok̄a chatuk keyu, amba iti, micha lukfi isht a toba kak kia aiena ak̄ inli chatuk; yohmikma kaniohmi kvto isht a fehnakma, kaniohmi kvto isht a kvllakshi chatuk oke.

21. Yohmi ka ilvppak ash kvna hosh ai i filvmmi hok mvto, nan ai vlhto holitopa hosh kashofvt, i shahli h̄a isht im ahanta ch̄i kv̄t im vlhtaha hosh, nan toksvli achukma puta ka isht ahanta ch̄i kv̄t im vlhtaha hoke.

22. Haui anukfila himita immi h̄a tushpvt ish i filvmmi mak inlashke; amba nan ai vlhpiesa, nan ai ahli, it i hullo, micha it i nanaiya aiena ish yvmohmi kv̄t, chukvsh kashofa Chitokaka isht a hochihifo kak o ish ibai achvfashke.

23. Amba isht a hopoyuksa he keyu anumpa tasimbo yokvno chik ahalaio kashke; mikmvt yvmmak okvt itachowa ikbi yoka ish ithanashke.

24. Mikmvt Chitokaka in tishu hokvt itachowa he vlhpesa keyu, amba hatak moma i kana, nan im abvchi kv̄t imponna, nan im okpulōt isht ilbvsha kia, nuktanla aiena vlhpesa:

25. Im anukfila yohbi hosh vbanumpa i sanali vhleha yoka nan im abvchi vlhpesa; yohmik mak o Chihowa hv̄t nukfohki na ile kostininchit, vbanumpa ai ahli ka achukmalit ithana yoba ná:

26. Yohmikmvt nan isht a hullo okpulo i nan isht hokli ya ai i hlakofa hinla; yvmmak osh ilap ai ahni hosh yvmmak ash o yukahanchi hatuk oke.

### CHAPTER III.

Nan ik vlhpeso nitak vt vla hi a tikbanli anoli, 1; 6 vbanumpa in tvnvp vhleha h̄a otv̄n̄inchi; 10 Timohli vt ilap ak o nan im ai ithv̄nvt iakaiya he isht miha; 16 mihmvt Holisso Holitopa ya ahnichit isht anumpuli.

1. ILUPPA ish ithana mak inlashke: yohmi kv̄t nitak ishtaiyopit mahayakma, nitak yvmmv̄t nan isht a palvmmi alotowa hi oke.

2. Yohmi ka hatak vt ilapunla he, tvi holisso i hullo, nan isht ilauata, ilefehnvchi, vbanumpa ik ahobalo, iki, ishki ita tuklo ik im antio, Chihowa ya yak oke ik im ai ahno, Chihowa ya ik holitoblo,

3. Im vlla i hullo ik im iksho, nan it im vlpisa kobvffi, inla aholvbechi, ile oktampli ik ithano, anukfila yohbi iksho, hatak hochukma moyuma ka ik i hullo,

4. Ilap i yimmi tuk kia haksichi, ahah! ik ahno, anukfila chaha, haknip nan isht ai yukpa yak bano ho i hullo kvv Chihowa ya im i shahli;

5. Chihowa ya holitobli ilahobi kia, ai ahli ka ona hosh yohmi keyu ka he: yvmma chiyuhmi hokvno ish i filvm-mashke.

6. Yohmi ka ilvppa chiyuhmi kak osh chuka ya chukovvt, ohoyo im anukfila iksho, ai ashvchika isht ompoholmot kvnia, anukfila ik achukmo ilaiyuka ka im antivt ahantvt;

7. Nana ka ithahanvt bilia kia, anumpa ai ahli kvno achukmalit ithvna he keyu puta ka yukahanchi hoke.

8. Yohmi ka Channes, micha Chambles ita tuklo kvv Moses a i sanali tok oka, ilvppak ash kia hatak im anukfila okpulot kvnia, na yimmi kvv ai vlpesa keyu hosh anumpa ai ahli ya i sanali mak inlishke.

9. Yohmi kia himak a pilla ma achakalit ia he keyu; yohmi kvv Channes micha Chambles ita tuklo atok a chiyuhmit, yvmmvt nana a kaniohmi kvv ai vlpiesa keyu kvv hatak puta ka im otvna chi mak inlishke.

10. Amba nana abahanchi li, kaniohmit ahanta li, nan isht vm anukfihinla, nan isht ai ahanta la he tuk vt ai ahli li, nan ilbvsha pihisa li kvv sa nuktaiyala, nan i hullo li, nuktanlvv achunanchi li,

11. Antiak, Ikonivm, Lista aiena ka ahanta li ma, kani-mihchit a sa hotopahanli na svlbahasha, nan isht ilbvsha kaniohmi ho pihisa li tok a chishno yokvt ish ithana feh-vvshke: yohmi kia Chitokaka yokvt yvmma moyuma ka a sa hlakofihinchit tok oke.

12. Ahli mvhli, Chisvs Klaist ibai achvfa hosh Chihowa

im ai ahli bvnna moyuma kv̄t nan isht a hotopa he pihisa pulla hi oke.

13. Amba hatak ik vlhpeso, micha na yoshubli aiena kv̄to nan ai vlhpesa keyu yohmi kv̄t i shahlit mahaya hi oke: yohmi kv̄t ilap vt yoshuhumba hatuk osh inla ya yoshuhumbla hi oke.

14. Amba nana ka chishno yvt ish ai ithvna tuk vt, ai ahlit chi yimmi hatuk okvt ish mahayashke: yohmi kv̄t kv̄na hō ish im ai ithvna tuk vt ish ithaiyanvshke.

15. Mikmvt yvmma ish ithana kv̄t vlla chi tomba kash inli hosh Holisso Holitopa ak o ish ai ithvna tok; yvmmak okvt chi hopoyuksacha hinla hō Chisvs Klaist a i yimmit isht chi okchaya hi oke.

16. Holisso Holitopa moma ka Chihowa hv̄t nukfohkichi hō holissohonchi tok oka; nan isht vlv̄vchi, nan isht ai atokowa, nan isht kostinichi, nan ai vlhpiesa aiena isht pithvnanchi achukma hoke.

17. Yohmi hatuk o hatak Chihowa immi hv̄t ai ahli hosh, nan toksvli achukma puta ka isht ahanta chi kv̄t im vltaha achukma hinla hoke.

#### CHAPTA IV.

Ai ahlit nan a kaniohma he vlhpesa kv̄t yvmihcha chi ka i miha, 1; 6 ai illa he nitak vt im atikeli, mihmvt vba achukma ka pisa chi im ai ahli kv̄t im anoli; 9 chekosi im v̄la chi ka i miha; 16 nan i palvmmi vmmona ka nana kv̄t kaniohmit onotuyula tok a anoli.

1. CHIHOWA, micha Chisvs Klaist yvmmak osh ilap apelhlichika ishit haiakakmvt, okchaya, micha illi tok aiena ka nan im apihisa he itikba ya hikia hosh na chi miha lishke.

2. Yohmi kv̄t vbanumpa ha isht ish anumpohonlashke, yohmi kv̄t nitak ai yvmohma he ai vlhpiesa, ai vlhpiesa keyu aiena ka ish achunanchashke; ai atokolit im anumpohonlit, im alvmminchit nuktaiyala hosh nana ka ish im abahanchit ish atohnohonchashke.

3. Yohmi ka vbanumpa ai ahli ka haklo ik bvnno ka hi a



nitak vt v̄la hi oke : haksobish yauohlich̄i ishi cha, ilap im anukfila okpulo ilaiyuka im antia kak osh nan-abvchi l̄awa ka il im it̄nahanla hi oke :

4. Mikmvt v̄banumpa ai āhli ka haksobish a isht ī fil̄m-mit kv̄nia cha, anumpa ik ahobo yak o haklo br̄nna toba hi oke.

5. Amba chishno yok̄vto nan okl̄uha ka ahah ! ahnit, nan ilbr̄sha chi on̄vtuyula kia chi nuk̄tanlv̄t, v̄banumpa isht anumpuli ȳvt nan isht ai vt̄ta he tuk a isht ahant̄vt, v̄banumpa isht ish ahanta hi atuk vt ish ai āhlich̄i fehnashke.

6. Yohmi ka sv̄lla ch̄i kv̄t anumpa hv̄t si on̄vtula h̄o, a sv̄lla ch̄i kv̄t atukonofv̄shke.

7. Itibi achukma ka itihimbit atahli lishke, nan isht ai ahanta la hi atuk vt atahli lishke, v̄banumpa sai yimmi kv̄t ai āhli hosh achun̄anchi lishke :

8. Yohmi hoka h̄im̄ak a pilla ma nan isht ai vl̄hpiēsa ia-chukoli la he vm̄mit ituyula, ȳmma nan ai āhli apesa, Chitokaka ȳvt nitak ȳmm̄ak fehna ka v̄ma hi oke : yohmi kv̄t v̄no ak bano h̄o v̄ma he keyu, amba ilap vt v̄la ka ī hullo moyuma aiena ka ima hi oke.

9. Chekosi chim vl̄htaha pulla cha, ai ahanta li ka ish lashke.

10. Yohmi ka Temas v̄to himonasi yakni il̄vppak inli kak o ī hullo hatuk osh, sv̄sv̄t ia tok : yohmi tuk osh Hlessalonika ya ia tok : Klesens v̄to Kaleshi yak o ia ma, Tit̄vs v̄to Talmasia yak o ia tok.

11. Luk ak bano hosh si awant anta hoke ; Mak ano ilauelit ish lashke ; ȳmm̄ak ok̄v̄t v̄banumpa isht ai vt̄ta ya a si apela hinla hoka.

12. Yohmi ma Tikik̄vs ano Efes̄vs a ia ch̄i h̄o tohno li tok.

13. Now̄vt aya anchi chito ya Kap̄vs Tloas anta ka ibbak fohki li tok a ish mintikmvt, isht is sv̄m v̄lashke ; yohmikmvt holisso moma, micha tv̄lhko holisso yokak heno isht ish la pullashke.

14. Aleksanta tv̄li lakna nan isht ai ikbi ȳvt nan ik achukmo ilaiyuka si on̄ohonchi tok : ilap nana a kaniohmi tok ak o Chitokaka yok̄v̄t isht im atobbashke.

15. Yvmmak oka ahah ! ish im ahni mak inlashke ; yvm-mak okvt pim anumpa moyuma ka i sanali fehna hatuk oka.

16. Ummona isht il anumpuli li kvno hatak achvfa kia si awant hikia tok keyu ; amba hatak moma kvv svsvt ia tok ; yvma yvmohmi tok vt isht ik onvtuyulo hok bano ai ahnit, Chihowa ya im ilbvsha lishke.

17. Yohmi kia Chitokaka yvt si awant hikia tok ; micha sa hlampkohonchi na vbanumpa isht anumpohonli li chatuk vt ai ahli fehnvt vno ak o isht ai otvni ho, Chentail moyuma kvv haiyaklo tok : yohmi ma koi chito itakha ya sa kohchi tok.

18. Yohmi ka Chitokaka yvt nana a kaniohmi ik achukmo moyuma ka a sa hlakfihinchi cha, sai okchalinchit ilap vba apchlichika ya isht sai ona hi oke : yvma isht a holitopa yokvt immit biliashke. Amen.

19. Pliska, micha Akuila, micha Onesifolvs in chuka chvfa aiokpvchi.

20. Elastvs vto Kolinhla yak o anta tok ; amba Tlofimvs vto abeka hosh Miletvm ak o itonla ho issvt minti li tok.

21. Chim vlhtaha pulla cha, ik hvstulo kisha ho ish lashke. Eubulvs vt pit chi aiokpvchishke, micha Putens, Linvs, Klautia, micha itibapishi moyuma kvv pit chi aiokpvchi mak inlishke.

22. Chitokaka Chisvs Klaist vt chimi shilombish a ibafoyukashke. Isht i kana yvt chi anukfoyukashke. Amen.

HOLISSO PAI VT

TITVS A

I HOLISSOCHI TOK.

CHAPTA I.

Titvs a pit aiokpvchi, mihmvt nana kaniohmi hq Kleti a anta he im ahni tuk,vt anoli, 1; 6 vbanumpa isht vtta yvt kaniohmit nan im ai vhltaiyaha he; 11 nan ik vlhpeso anumpulit nan ithvnanchi itakha yvt issa he isht anumpuli.

1. PAL, Chihowa in tishu, micha Chisvs Klaist im apostel okvt, vbanumpa ha anohonli na okchayvt bilia he Chihowa hvt im ahni tok vhleha hvt yimmi cha, anumpa ai ahli ka achukmali fehnvt ithvnvt, Chihowa ha isht a holitobla hi atok;

2. Yohmi cha ai okchayvt bilia pisa he ai ahna hi atok, yvmmak oka Chihowa holaba he keyu yvt, nana puta kvtk ik tobo pilla kash inli hq, im ihisa tok;

3. Yohmi tok osh ont ai vlhpiesa ma nan im ihisa tok vt vbanumpa isht anumpohonli hq isht otvnihinchi; yvmma vno ak osh isht anumpohonli la he vm vlhpisa kvtk, Chihowa pi Okchalinchin nan apihisa tok mak o yvmohmishke.

4. Yohmi kvtk nan isht a pi yimmi pulla kak o svso, Titvs a, pit chi aiokpvchi lishke: Nan isht i kana, i nukhaklo, micha isht it i nanaiya aiena kvtk Piki Chihowa, micha pi Okchalinchin Chitokaka Chisvs Klaist ita tuklo ka a mihintik kvtk chi anukfoyukashke.



5. Kleti a ish anta he chim ai ahni li kv̄t ilvppak atok; nana kv̄t ik vlhtaho puta tuk a achukmalit isht ish ahanta kv̄t, chim apesa li hatuk oka, vbanumpa isht vta ya tvmaha puta ka ish ai atokohonlashke.

6. Kanimā ka anumpa ik achukmo kv̄t onvtonla he keyu, ohoyo achvfa i hatak, im vlla mvt vbanumpa yimmi nan isht yopomo anumpa kia onvtonla he keyu, micha ilapunla keyu hok mak o ish atokolashke.

7. Yohmi ka bishop vt Chihowa nan im apesvchi yatuk osh, anumpa ik achukmo kia onvtula he keyu ho pullashke: ilap ai ahni keyu, nokowa shahli keyu, oka homi ishko shahli keyu, na-fahama keyu, ai vlhpiesa keyu isht a hofahya he nan isht ahayuchi bvnna keyu;

8. Amba hatak ik ithano i hullo, hatak achukma puta ka i hullo, kostini, ai vlhpiesa, Chihowa holitobli, ile oktampli;

9. Mikmvt anumpa ai ahli im vlbahanchi kash o kvllot halvlli hosh, nan isht vlrvchi ai ahli ka isht im abahanchit, vbanumpa i sanali vhleha ha nan i mihvt im alvmmminchi mak inlashke.

10. Yohmi ka ilapunla, nan ik ahobo isht anumpuli, micha na haksichi yvt laua fehna hosh ai asha hoka, mikmvt hakshup tupa vhleha hokak heto laua hoke:

11. Yvmma itih hv̄t vlhkuma pullashke, yvmmak osh chuka chvfa moma ka ai ahli ka i filvmmihinchī kv̄t, ai vlhpesa keyu isht a hofahya he nan isht ahayuchi bvnna kak osh, yohma hi atuk keyu kia nana ka abahanchishke.

12. Ilap ai achvfa, ilap i hopaii atuk ak inli hosh na miha kv̄t, Kletian vhleha hv̄t holabi kak bano chatuk, nampoā okpulo, intakobi, isikopa aiena hoke, achi tok.

13. Anumpa atokowa ilvppv̄t ai ahli hoke; yohmi hoka vbanumpa yimmi kv̄t ai ahla chī mak o, hotopalit ish im alvmmminchashke:

14. Yohmikmvt Chu im anumpa ik ahobo, micha anumpa ai ahli ka i filvmmi hatak nan apihisa aiena ka chik im antio kashke.

15. Yohmi ka kashofa hokvno nan okluha kv̄t i kashofa hoke; amba ik kashofo, na yimma he keyu hokvno nana kia

ik i kashofo hoke; amba nan ahni, micha isht il akostininchi aiena kvt litehvt kwnia hoke.

16. Yohmi kvt Chihowa ha ithana, miha kvt il otvnninchi ak inli kia, nana a kaniohmi puta kvt isht ik holitoblo, na yimma he keyu, mikmvt nan toksvli achukma puta ka ik ai ahlo hoka i yuwala he vlhpesa hoke.

CHAPTER II.

Nana ho isht anumpulit abahancha hi a, mikmvt kaniohmit ai vlhpiesvt aya hi a Titvs a im apesa, 1; 9 yuka, micha hatak moma kvt nan akaniohma he vlhpesa ka anoli.

1. AMBA chishno yoktto nan okluha kvt nan isht vlbrchi achukma ka isht ai ahli kak o isht ish anumpohonlashke;

2. Yohmi kvt hatak asvnochi puta kvt ahah! ahni, yopunla iksho hosh im anukfila weki achukma, kostini, vbanumpa yimmi, it i hullo, nuktanlvt achunanchi aiena kvt ai ahlashke:

3. Mikma ohoyo asvnochi puta kvt vbanumpuli yokvt ai yvmohmi vlhpiesa kak o yvmohmi mak inlashke; inla aholvbechi keyu, oka homi yoka i yuhuka keyu, nana hochukma ka abahanchashke:

4. Yohmi kvt Chihowa im anumpa hvt ik kvllaksho ka chi ka, ohoyo himita puta kvt ile oktampili, i hatak i hullo, im vlla ya i hullo aiena;

5. Mikmvt kostini, haui anukfila iksho, ilap in chuka anvt, nan isht ahanta, hochukma, ilap i hatak im antia achukma aiena chi ka im abahanchashke.

6. Hatak himita puta mvt ile oktampila chi ka nan ish i mihaha mak inlashke.

7. Nan okluha ish a kaniohmi kvt nan toksvli achukma puta isht ai ithvna yo ish il otvnihinhashke: nan ish abahanchi kvt ai ahli kak bano, yopunla keyu hosh anukfila weki achukma hosh ish im abahanchashke;

8. Yohmi kvt anumpa achukma isht ai i sanala he iksho

hō ish abahanchashke; yohmi na kvna hosh chī sanali hatuk mvt, nan ik achukmo nana kia isht chi anumpula he iksho kv̄t hofahyashke.

9. Yuka puta kv̄t ilap ī na-hullo yoka im antia, michā nan okluha ka isht ai yukpali, a sanalit ik anumpulo ka he;

10. Micha ik hukopo, amba nan okluha ka ai ahli achukma he; yvmohmi cha Chihowa pi Okchalinchi im anumpa hā nan okluha ka isht a holitobla chī ka ish ī mihīhashke.

11. Yohmi ka Chihowa isht ī kana yak osh ai okchaya ishi kv̄t hatak puta ka im otvni tok oka,

12. Yvmmak osh pim abahanchi kv̄t, Chihowa isht ik holitoblo puta, yakni ilvppak inli anukfila okpulo ilaiyuka ka isht kil ahanto ka he, amba ile oktamp̄li, hatak bika it im ai ahli achukma, micha Chihowa ya holitobli hosh himonasi yakni ilvppa il ahanta he;

13. Mikmvt ai okchayvt isht il ai yukpa bilia, micha Chihowa Chitokaka, pi okchalinchi Chisvs Klaist vt isht a holitopa ieshi hosh haiaka hi a pit hohoyot il ahanta he;

14. Yohmi kv̄t yvmmak ash osh ai ashvchika puta ka a pi hlakofihinchi cha, pi kashofi na ilap immi okla holitopa fehna e toba cha, nan toksvli achukma puta ka a yiminta hosh isht il ahanta he mak o, pi vlhtoba hosh illi tok.

15. Ilvppa puta kak o ish anumpulashke, yohmi kv̄t Klaist im anumpa ai ahli ka nan isht a mihvt ish im olahambashke. Yohmi na hatak nana kia ik chi shitilemo kashke.

### CHAPTA III.

Nana hō ithvnancha he, mikmvt nana hō ik ithvnancho ka he aiena ka Titvs a im avrchi, 1; 12 im vla hi a pit ī miha.

1. MIKO, nan apesa, nan vlhtoka vhleha moyuma ka im antia achukma, nan toksvli achukma puta ka isht ahanta chī kv̄t im vlhtaha he,

2. Hatak nana kia kvllakshichit isht ik anumpulo, it ī nokowvt ik itachowo, amba anukfila yohbi, hatak moma ka ī kana aiena he mak o, ithana chī ka ish im anohonlashke.



3. Yohmi ka pishno ak kia tikba hokvno nana kil ithano, Chihowa kil im antio, pi yoshubvt, anukfila okpulo ilaiyuka, micha haknip isht ai yukpa aiena ka i yuhukvt, hotopali bvnna, it i potvno aiena isht il ahanta kv, nan isht ik pi ahobo fehna hosh it i nukkillit il ahanta tok.

4. Yohmi tok kia Chihowa pi okchalinchi yvt hatak isht i kana, micha isht i nukhaklo aiena kv otaiyani ha yano,

5. Nan ai vlhpiesa isht ahantvt il atahli tok ak o keyu, amba pi nukhaklo kak osh himona toba isht vlhchihifa kv, Shilombish Holitopa yak o himona isht a toba ho isht a pi okchalinchi tok oke;

6. Yohmi kv yvmmak ash o Chisvs Klaist pi okchalinchi yvt nan atahli tok ak pulla kak o, lauachi fehna hosh pi o fohobli tok:

7. Yohmi na isht i kana yo isht a pi vlhpiesa hosh, ai okchayvt bilia il isha he pim ai vlhpiesa hosh e toba hinla hoke.

8. Anumpa ilvppvt ai ahli yoke, yohmi kv nana yvmmak ash puta ka kvlochi fehna hosh isht ish anumpohonla he chim ai ahni li; yohmi na Chihowa i yimmi tok vlheha hv ahah! ahnit, nan toksvli achukma puta ka achunanchit isht ahantashke. Nana ilvppa puta kv achukma, micha hatak a isht im achukma hoke.

9. Nan isht a ponaklo isht ik ahobo, in tikba ai unchululit isht auehinchi isht annoa, nan isht itachowa, micha Chu i nan vlhpisa isht itachowa aiena ka chik ahalaio kashke; yvmvt nan isht ik ahobo, micha nan isht ai achukma hi vt iksho hoka.

10. Hatak kvna hosh vbanumpuli iksa i sanalit it a kvshkoli bvnna hokma, vmona, micha atuklant ish im olabi ha yoka yvmihchi kv imoma hokma, chik aiokpancho kashke.

11. Yvmma chiyuhmi hokvto ai ahli ka i filvmmiit kvnia hosh, nan ashahanchi kv, ilap inli kv ik ai ahlo kv otvnnichi hoka ish ithaiyanashke.

12. Tikikvs, Atemas, kanimampo ka pit chim pila li hokma, Nikopolis ak o anta li hoka ik kaniohmi kia ish la pulashke: hvshtula ya yvmmak o anta la chi hoke.

13. Nan vlhpisa imponna Senas, micha Apollos ita tuklo kvt im vlhtaha achukma cha, nana a bvnna kvt ik im iksho ka chi ka ish im atahli cha, auet ish pilashke.

14. Mikma pimmi yokvt nan isht ai vni ik im iksho hosh ik anto ka chi kvt, nana ka ai yvmohma he ai vlhpiesa nan toksvli achukma puta ka achunanchit isht ahanta chi kvt, moyumvt ithvna mak inlashke,

15. Si apiha kvt moyumvt pit chi aiokpvehishke. Na yimmi pia ha pi hullo ka moyuma ish aiokpvehashke. Isht i kana yvt hvsh moyuma ka hvchi anukfoyukashke. Amen.

HOLISSO PAL VT

FILEMON A

I HOLISSOCHI TOK.

Filemon a pit aiokpuchi, mihmvt na yimmi, micha nan isht i hullo aiena kvt anukfoyuka ka haklo mvt, na yukpa; yohmi hosh in tishu Onesimvs a nana ka i kashofi cha, atuklanchit i hullot aiokpucha chi ka ahni fehnvt miha.

1. PAL, Chisvs Klaist ak atuk pulla mak o yuka, micha il itibapishi Timohli yvt pi holitopa, il itiba toksvli Filemon,

2. Mikmvt pi holitopa Affia, micha tvshka il itilau i Achipvs, micha chvch chin chuka a sha aiena ka pit hvchi aiokpuchishke :

3. Nan isht i kana, micha isht it i nanaiya ita tuklo Piki Chihowa, micha Chitokaka Chisvs Klaist aiena ka a mihinti kvt hvchi anukfokashke.

4. Anumpa ilbvsha anumpohonli likmvt, chithaiyana li kvt,

5. Chitokaka Chisvs Klaist oka ish i yimmi, micha vbanumpuli vhleha ha ish i hullo aiena ka hahaklo li kak osh, Chihowa ya yak oke im ai ahni lishke.

6. Na yimmi chi anukfoyuka kvt ai ahli fehnvt otahani na Chisvs Klaist isht a holitopa he mak o, nana achukma puta kvt chi anukfoyuka ka ai ithaiyana hokbano, ai ahnit asilhha lishke.

7. Yohmi ka chishno ak atuk pulla mak o vbanumpuli vhleha chukvsh vt yuhukpa hoka, isht ish i hullo ka isht a pi nukvla, micha isht a pi yukpa chintoshke, itibapishili ma !



8. Yohmi ka Klaist immi sia hokvt nana ka nukwāya iksho kamohmi hosh a chim ai vlhpiesa ka chim apesa la he vlhpiesa kia,

9. Pal sipokni, micha Chisvs Klaist ak atuk pulla mak o yuka ma aiena mih sia hash osh, isht i hullo li pulla atuk mak osh chim asilhha li kak osh vm i shahlishke.

10. Yuka hosh anta li mvt, tobachi li tok svso, Onesimvs ak atuk pulla mak o chim asilhha lishke.

11. Yvmmak okvt tikba hokvno nan isht chim ai achukma iksho ki tok kia, himonasi kvno chishno, micha vno il ita tuklo ka isht pim ai achukma fehnvshke.

12. Yvmmak oka falaminchit pila lishke; sa chukvsh chiyuhmi hoka i kanvt ish ishashke.

13. Yvmmak okvt si awant antvt, vbanumpa ak atuk pulla mak o yuka hosh anta li ka, chishno ak a he tuk mak o chi vlhtoba hosh nana kia isht vm ahanta he im ai ahni la he vlhpesa kia;

14. Yohmi kia chishno chim anukfila keyu ka, nana kia yvmohmi la he ak ai ahno: yohmi na nana achukma ish yvmohmi kv ik kaniohmi kia ish yvmohma hi atuk o keyu, amba chishno inli chim anukfila kak ashke.

15. Yohmi ka yvmmak okvt hvshi kanvli achvfa chohmi itin takla hō chī filvmmi na yvmmak ash ish īshi na bilia hi atuk yoba ká;

16. Yohmi ka yuka keyu, yuka kano i shahli, vno yvt itibapishi li a holitopa hō fehna, amba chishno yokak heno a chimmi, micha Chitokaka ibai achvfa hokvt chī holitopa kv i shahli fehna hinla keyu?

17. Yohmi ka chibai achvfa li ka is si ahni hokmvt, vno ak a he tuk ma chiyuhmichit i kanvt ish ishashke.

18. Nana kia chim okpvni tok, micha aheka kia chin takanli hokma, vno ak o aheka is svm ikbashke.

19. Pal sia hv vno svbbak ak inli hō isht holissochi li kv, atobbi la he mak oke; yohmi kia is svm aheka kv chishno yak fehna kak kia is san takanli ak inli ak chim achoshke.

20. Ahlishke, itibapishi li ma! Chitokaka ish ibai achvfa

hoka nana isht chi a sai yukpashke; Chitokaka ish ibai achvfa hokvt is sa nuktalalashke.

21. Is svm antia hinla ka chī yimmi li, micha nana achi li ka ī shahli ak inli ish yvmihcha chī ka ithana li aiena hatuk osh, chī holissochi li tuk oke.

22. Yohmi kia ai-vtta la chikma, aieninchit is svm atah-lashke: yohmi kv̄t anumpa ilbvsha ish anumpohonli hatuk mak o chim ona la he ai ahni lishke.

23. Chisvs Klaist ak atuk mak o yuka sa bika Epafas vt pit chi aiokpvchishke.

24. Makvs, Alistachvs, Temas, Lukas it ibai toksvli li v̄hleha aiena kv̄t pit chi aiokpvchishke.

25. Pin Chitokaka Chisvs Klaist isht ī kana yvt chi Shilombish a ibafoyukashke. Amen.

## HOLISSO PAL VT

## HEBLU OKLA HA

## I HOLISSOCHI TOK.

## CHAPTA I.

Klaist vt Iki Chihowa ya itilau i kvt annoa, 1: 4 enchil puta i shahli fehna; 14 enchil vhleha hvt nan isht ai vtta ka anoli.

1. CHIHOWA hvt nitak chashpo ilaiyuka, micha a kaniohmi mvt ilaiyuka hosh pin tikba vhleha hopaii vhleha ak o isht ai im anumpohonli kvt,

2. Polaka ilvppvt ai ishtaiyopi mak o ilap Ushi yo isht a pim anumpohonli kvt, yvmmak osh nana moma ka iesha he im ai vlhpiesa mak o atokoli tok; micha vba yakni, micha yakni ilvppa a moyuma ka yvmmak ash o isht ai ikbi ak inli tok:

3. Yvmmak ash osh Chihowa isht a holitopa shohmalali, micha Chihowa mih fehna yatuk, micha nan okluha ka im anumpa kvlio ai ahli kak o isht ieshi hosh ai ashvchika isht a pi kashofa hi a ataiyahli tok osh, Nan okluha imaiya vba chaha moma i shahli ka a binili im isht impak imma ak o binili tok.

4. Nan iesha he im ai vlhpiesa hatuk vt ieshi hatuk osh, ilap hohchifo isht a holitopa kak osh enchil vhleha ha i shahli fehna hatuk osh kaniohmit holitopa kvt ymma i shahli fehna hoke.

5. Nitak nanta kash o enchil vhleha ha achvfona kia, Chishno yvt svso chia mak o himak nitak a chi tobachi



lishke; micha anonti ilap vt, Uno yak o Svso hachi, mikmvt, vno yvt Iki sia hachi hoke, im achi tok o?

6. Michā anonti, Tobahpi yash o yakni paknaka ya isht vla mvt, Chihowa im enchil vhleha hvt moyumvt aiokpa-hanchashke, ahanchishke.

7. Mikmvt enchil vhleha hano isht anumpuli kv̄t ilvppak o achishke, Yvmmvt im echil vhleha hokvno mahli chiyuh-michit, mikmvt in tishu hano luak libbi chiyumichi hoke.

8. Amba Ushi yokvno ilvppak o im achishke, Chihowa ma! ish ai o binili holitompa kv̄t hikia bilivt peh bilivshke: nan ai vlhpiesa tvbi yak osh ish aephlichika yoka in tvbi yoke:

9. Chishno yokvt nan ai vlhpiesa kak o ish i hullo cha, nan ik vlhpeso yokvno ish i nukkillishke; yohmi ka Chihowa, chin Chihowa yak osh nan isht ai yukpa bilia ya laua i shahli ho isht chi ahvmmi kv̄t, ish ai itilaui tuk a i shahli chikbi tok.

10. Michā Chitokaka chishno yak osh vmmona kash inli ho yakni ilvppa intolahpi ka ish boyuhli tok; mihmvt nana moma vba shutik ai asha ka, chibbak ak osh ihikbi tok.

11. Yvmmak okvto ont ai okpulo kv̄t taha kia, Chishno yokvto ish ahanta he; mikma yvmmak okvto moyumvt sipokni kv̄t na fohka yo chiyuhma hi oke:

12. Mikma anchi yak inli ho chohmichit ish pohla he; mikma yvmmak ash ot inlv̄t toba he: yohmi kia Chishno yokvto mih yash inli chia, micha chim ahvmmi hokvt ont ataha he iiksho hoke.

13. Yohmi kia nitak nanta kash o enchil vhleha achvfona kia, Svbbak isht impak-imma ak o ish a binili na chin tvnvp vhleha hoka chiyi ai o hikia yo ikbi li hayashke, im achi tok o?

14. Yvmmak ash ot moyuma kv̄t nan isht ahanta shilombish osh ai okchaya pisa he im ai vlhpiesa vhleha yvmmak o nan isht im ahanta chi vlhtoka yo keyu?

## CHAPTA II.

Klaist a il im antia he tuk, 1 ; 9 pi okchalinchā chī kvt hatak o toba tok oka ; 14 yohmi kvt nana kvt a yakohma he vlhpesa tok mak osh hatak o toba tok.

1. YOHMI hoka nana e haiyaklo tuk puta kvt ahah ! ahni fehna hosh il anukfihinla hetuk, e yvmohmi keyukmvt, nitak kanima ka pī kvnia hinla hoke.

2. Yohmi ka enchil vhleha hvt anumpa anumpohonli tok a ai ahlit kvllō hatok okma, micha kvna hosh anumpa yvm-mak ash o kobahafi, micha ik im antio puta ka isht vlhtoba kvt isht ai vlhtoba he vlhpiesa hō ihishi tok okma :

3. Ai-okchaya chinto yakohmi ka kil anukfihinlokmt, katiohmit pi hlakofa hinla cho ? yvmma vmmona ka Chito-kaka yak osh isht anumpohonli tok o, anonti yvmma i hapo-naklo tok puta kvt ai ahlichī mak osh pim anohonli tok :

4. Chihowa hak kia atokowa ibai anohonli kvt, nan isht atokowa, nan isht anukhlakvshli, micha nan isht ai ahli ilai-yuka, micha Shilombish Holitopa na hopela aiena ka ilap im anukfihinla hosh isht ai ahlichī tok :

5. Yohmi ka yakni talaia he isht il anumpuli ka, enchil vhleha hokvno i nutaka apihisa tok keyu hoke.

6. Amba achvfa kvt kanima ka atokoli hosh ai anumpuli kvt, Hatak vt nanta hō yvmmak oka chishno yokvt isht chim anukfihinla hō ? micha hatak ushi yoka, chishno yokvt ish i nohowa hō ? ahanchi tok.

7. Yvmmak oka enchil vhleha hokvno lumvt ik lauwo hō ish ikbi tok osh, isht a holitopa chinto ka isht ish iachukolechi, micha nan okluha chibbak vt ihikbi tok a i shahli hō ish ikbi tok :

8. Chishno yokvt nan okluha kvt iyi nuta aiasha cha, im antia hi a ish apesa tok. Yakohmichit moyuma ka im i nutakvchi ha yokvt, nana kia ik im i nutakacho ka achvfa kia iksho ki tok. Yohmi kia nan okluha kvt ik im i nutako kisha hō himonasi ka e pihisvshke :

9. Yohmi kia Chisvs, yvmmak okvt enchil vhleha hā lumvt ik lauwo hosh toba tok kia, nan-illi isht ilbvsha ka pihisa kak osh isht a holitopa chinto ka isht iachuka ka e pihisvshke; yohmi na Chihowa isht i kana pulla hatuk mak o yvmmak ash ot hatak moyuma ka vlhtoba hosh illa hi atok.

10. Yvmmak pulla hosh nan okluha ka ihikbi tok, mih fehna kash inli atuk pulla mak o nan okluha kv̄t toba tok, yvmmv̄t yvmihcha he im ai vlhpiesa hosh ushi vhleha laua ka isht a holitopa ka pehlichit isht ohona kv̄t, yvmmak ash isht ai okchaya i kv̄pitv̄ni hv̄t nan isht ilbvsha puta ka pihisa hosh isht ai ahla hi a im apihisa tok oka.

11. Yohmi ka na-kashofi, micha nan ai ashvchika i kashofa aiena kv̄t it ibai achvfa hoke; yakohmi hoka ik hofahyo hosh itibapishi vhleha hochihifo kv̄t,

12. Itibapishi li vhleha hā chi hohechifo hā otv̄ninchit im anohonli la chi; itibapishi li vhleha hā ai iklv̄nna hikivt talahov̄vt chi aiokpahanchi la chi hoke, ahanchishke.

13. Mikmv̄t anonti, Yvmmak o anukchieto la chi hoke, achishke. Anonti, Ūno, micha vlla vhleha hā Chihowa hv̄t ahama tok oka pisá, achishke.

14. Yohmi hoka vlla vhleha hash osh haknip, issish aiena ka ibai ishi hatuk o, ilap ak kia anonti yvmmak ash ibai ishi tok ak inli hoke: yohmi na vlhtobvt illi pulla hosh nan-illi ishi, yvmmv̄t nan isht ahullo okpulo ak atuk a imaiyachi cha;

15. Yvmmv̄t nan-illi i nukshopa kak osh, okchaya takla kv̄t yuka tōbvt kv̄nia chatuk a mominchit hlakoficha hi atok.

16. Yohmi ka ahlishke, yvmmv̄t enchil vhleha hā halanli tok keyu; amba Eblaham isht ai unchululi hak o halanli tok.

17. Yvmohmi ka nan okluha ka ai yvmohma he ai vlhpiesa hosh itibapishi vhleha ak inli hō chiyuhmit toba hi atok; yvmohmi hosh i kana fehmv̄t na-holitompa isht v̄tta chinto ai ahli fehna hosh Chihowa nan isht im ahanta kv̄t, okla puta nan ai ashahanchi tok isht vlhtohomba he ikbi mak osh isht ahanta hi atok.



18. Yohmi ka ilap ak kia imomaka pisa kvt, na-palvmmi pihisa hatuk okvt, kvna hosh imomaka pisa hokvno apelvcha hi vt ithana hoke.

### CHAPTA III.

Klaist vt holitopa kvt Moses a i shahli, 1: 7 yohmi hoka kil i yim-mokmvt, Isael chukvsh kvllo vt na palvmmi isht onvtula he im vllhpisa tok a i shahlit pi onvtula he bano hoke.

1. YUMOHHMI hoka itibapishi holitopa vhleha vba nan isht ilaiyukpa et annohowa ka ibai ishi hvchia ma! Apostel, micha Na-holitompa isht vtta chinto, Chisvs Klaist a il ithai-yana, il il apihisa tok a hvsh anukfihinlashke.

2. Moses vt ilap in chuka ai achvfa moyuma ka im ai ahli bano tok a, chiyuhmit yvmmak ash osh ilap a atokoli tok a im ai ahli bano tok.

3. Yohmi ka hatak ilvppvt isht a holitopa i shahli ho isht a holitopa kvt Moses a i shahli kvt, chuka yoka kvna hosh ikbi tok ak osh holitopa kvt, chuka yash i shahli chatuk a chiyuhmi hoke.

4. Yohmi ka chuka toba moyuma ka ikbi vt asha bano chatuk; amba nana moma ihikbi tok vt Chihowa ak oke.

5. Yohmi ka tishu ho chiyuhmit Moses vt ilap in chuka ai achvfa moyuma ka im ai ahli bano kvt, nana isht anu-humpa he mak o atokolit anohonli tok:

6. Amba Klaist vto Ushi yosh in chuka achvfa pehliechi ho chiyuhmit ai ahli tok; yohmi ka ai okchaya ya na-yuk-pvt e hohoyo hosh Chisvs Klaist il anukchieto kvt, achu-nanchi ai ahli hosh ai vhli ka il ona hokmvt, yvmmak ash in chuka pia hoke.

7. Yvmohmi hoka Shilombish Holitopa yvt abanchi kvt, Himak nitak oka im anumpa hoka hvsh haiyaklo hokmvt,

8. Hvchi chukvsh oka hvch ik kvllocho kashke: yohmi kvt isht a nokowvchi, yvmohmit nana ka imomaka pisachi hosh yakni haiaka itvnova tok a hvch ik chiyuhmicho kashke.

9. Nitak yvmmak ash hvch iki vt ik sai yimmo kvt imo-

maka sa pisvchi tok; micha nana a kaniohmi li puta ka pihisa na afvmmi pokoli ushta tok.

10. Yvmohmi hoka okla yvmmak ash isht vm ahchibvt kvnia tok: mihmvt, Yvmmvvt chukvsh anukaka ya isht ashvchi bilia, micha vm anumpa vlpisa puta ka ik ithanoshke, achi li tok.

11. Yohmi kvv sa nukhobela hosh anumpa kvllo il onochit anumpohonli li hoka, Um afoha yoka chukowa himma keyu mak oke.

12. Itibapishi li vhleha hvv ahah! hvsh ai ahnashke, chukvsh okpulo, nan ik yimmo Chihowa okchaya ya isht hvsh ai i filvmma hinla kvv, hvsh kanima ka ik hvchi anukfoyo kashke.

13. Amba himak nitak achi itin takla kak o nitak puta ka nan it i mihvt hvsh iti hlampkohonchi pulla ho, hvsh kanima kia nan ai ashvchi isht a haksit ik hvchi kvllo kashke.

14. Yohmi ka na pi yimmi vmmona tok vt ai ahli biekvt mahayvt ont ai vhli ka il ona hokmvt, Chisvs oka ibai achvfa vhleha e toba hoke.

15. Himak nitak achi itin takla kak o, Himak nitak oka im anumpa hoka hvsh haiyaklo hokmvt, isht a nokowvchi yvmohmi tok a, chiyuhmit hvchi chukvsh oka hvch ik kvvlocho kashke.

16. Yohmi ka kaniohmi kvv haklo hayvt nokowvchi tok: yohmi kia Moses vt pehlichit Echip a kohchi tok a moma hosh yohmi tok keyu hoke.

17. Amba afvmmi pokoli ushta ka kvvta hak o isht im ahchibvt kvnia tok o? nan ashvchi tuk osh haknip illi vt yakni haiaka ya ai itohonla ak atok keyu cho?

18. Yohmi ka kvvta hak osh im afoha yoka chukowa himma keyu ho anumpa kvllo il onochit anumpohonli tok o? amba ik i yimmo ke tuk vhleha ak atok keyu cho?

19. Yohmi ka ik i yimmo pulla kak osh chukowa he keyu ki tok a eho pisvshke.

## CHAPTER IV.

Ubanumpuli a-foha he vltaha tok a na yimmi pulla hokmak osh isha he, 1: 12 Chihowa im anumpa hvv aighli fehna; 14 Na holitompa chinto isht pim vttta yvt Klaist Chisvs Chihowa Ushi, 16 nan isht ai i kana ai o binili holitompa nukwaya keyu hosh il ohonashke.

1. YUMOHMI hoka im afoha e chukowa he pim issa tok a takali moma hoka, hvsh kanima kvv hvch ik ono ahoba hinla ka, ahah! il ai ahnashke.

2. Isht ai yukpa anumpa yash ot pishno ak kia pim annohwa kvv, yvmmvt im annohwa tok ash o chiyuhmi tok: yohmi kia anumpa im annohwa kvv nan isht im achukma tok keyu kvv, anumpa hahaklo yvmmak okvt na yimmi ya ibafoki keyu ak atok.

3. Yohmi ka, Si anukhobela hosh anumpa kvvlo il onochit anumpohonli li hoka, yvmmak okvt vm afoha yoka chukowa he keyu, ilap vt achi tok: yohmi ak inli kia pishno il i yimmi hatuk okvto yakni toba vmmona pilla kash nan toksvli puta kash ot ont vltaiyaha tok im afoha yoka e chukowa hoke.

4. Ilap vt yakohmichit nitak isht untuklo ka ai atokowa kanima ka isht anumpuli tok: yohmi kvv Chihowa hokvt ilap a toksvli puta hoka ataiyahli kak osh nitak isht untuklo hokvno foha tok.

5. Mihmvt ilvppak o, Vm afoha yoka chukowa he keyu, anonti achi tok.

6. Yakohmi hoka afoha yoka kanihmi kvv chukowa chi pulla ka takanli moma hoka, yohmi ka isht ai yukpa anumpa im annohwa vmmona tok vhleha hokvto afoha yoka ik chukowo kvv na-yimma he keyu kak atok.

7. Anonti Lewi ak o isht ai anumpulit nitak kanihmi ho atokolit, Himak nitak a ahanchi, nitak yvmmak atok a hopakit taiyaha, achi hoka, Himak nitak a vm anumpa hvsh haiyaklo hokmvt, hvchi chukvsh oka hvch ik kvvlocho kashke.

8. Yohmi ka Choshua vt yvmmak ash afoha ya ima ha-



tok okma, i himmak okvno nitak inla hō isht anumpula hi atok keyu hoke.

9. Yvmohmi hoka Chihowa im okla vhleha hokvto afoha yvt in takanli hoke.

10. Yohmi ka kvna hosh Chihowa im afoha yoka ont chukowa hokvto, ilap inli toksvli kash issa kv, Chihowa hv ilap toksvli tuk vt issa ak inli tok ash inli hō chiyuhmi hoke.

11. Yohmi hoka afoha yvma e chukowa chi kv il achu-nanchi fehnashke; ik yimmo hosh itohonla tok ash o chiyubmit hatak kvna kia ik itulo kashke.

12. Yohmi ka Chihowa im anumpa hv okchaya, micha isht ai ahli fehna, micha halupa kv bvshpo falaia itahlakla halupa yak kia i shahli hosh hlopullichit bvshli kv, ilhfipak, micha shilombish ita tuklo ka it i filvmmichi, anonti itachakli, micha lupi ita tuklo ka it i filvmmichi, micha chukvsh anukaka nan isht ahni, micha nan isht anukfilli puta ka akostininchit nan im apesa yoke.

13. Nana toba moma kv achvfa kia itikba ya ik im ai otano kv iiksho; amba nana ka il it i kaniohma chi yvma i holhponayo hokvno nan okluha kv ik ompoholmo i bieka hokè.

14. Na-holitompa isht vtta chinto pim anta, Chihowa Ushi, Chisvs okv vba yakni oka ona tok oka, nana ka il il apihisa tok vt il ai ahlashke.

15. Yohmi ka na holitompa isht vtta chinto nan isht a pilbvsha ka ik piba nukhaklo ka hi osh pim anta keyu; amba nana a kaniohmi puta ka imomaka pisa kv, pishno ak inli hō chiyuhmi kia ai ashvchi yak osh ik im iksho ki tok.

16. Nan isht i nukhaklo il ishi cha, ont ai vlhpiesa pi apela chi ka isht i kana il ahayucha chi kv, isht ai i kana ai o binili holitompa nukwaya keyu hosh il onashke.

CHAPTA V.

Chihowa yvt Klaist a holitobli; mikmvt na holitompa isht vtta i shahli yo atokoli, 1; 14 Heblu okla hv nan ai ahli ilvppa ithvna he tuk vt a haksichi ka Pal vt nan i miha.

1. YOHMI ka na holitompa isht vtta chinto puta hatak a a kohchit ihishi ka, hatak ak atuk pulla mak o nana Chihowa immi ha isht ahanta chi kvt, vlhtoka tuk osh nan ai ashvchi isht vlhtoba he puta, micha na hvlbina aiena ka isht im ona hi atok:

2. Ilap ak kia nan isht ai ibetvbla hi vt isht apakfoyupa ak inli hokvt, nan ik ithano, micha yoshuba vhleha aiena ka yvmmvt i nukhakla he bano hoke.

3. Mikmvt nana kvt ai yakohmi hokvt, ilap nan ai ashvchi isht vlhtoba he yak kia, aieninchit okla nan ai ashvchi isht vlhtoba hi a isht im ona hi atok oke.

4. Hatak nana kia ilap ak inli kvt nan isht a holitopa ilvpa isha he keyu, amba Alon atok a chohmichit Chihowa ak osh atokoli hok mak oke:

5. Yohmi ka Klaist ak kia ilap ak inli hosh na holitompa isht vtta chinto toba chi kvt isht ile holitoblichit tok keyu: amba, Chishno vt Svsso chia ho himak nitak oka chi tobachi lishke; im achi kak atok oke.

6. Anonti, Chishno yokvt Melkisetek atok a chiyuhmit na holitompa isht vtta hosh ish ahanta na bilia hi oke, inla kanima ka ai achi ak inli tok.

7. Yvmmak ash ot hatak haknip ieszit yakni paknaka ilvppa ahanta mvt, nishkin okchi mihintit, chitoli fehna hosh pahayvt, nan-illi im a hlakoficha hinla ka im ilbvsha fehnvt anumpohonli tok: yohmi ka Chihowa ha holitobli hatuk mak o, Chihowa hvt i haponaklo tok:

8. Yvmmak ash ot Ushi atuk ak inli kia, na palvmmi pi-hisa kak osh im antia kia isht ithvna tok:

9. Mihmvt nana kvt ai ahlit im vlhtaiyaha kak osh, im antia puta hokvno ai okchayvt bilia ya im atahli yoke:

10. Yohmi kvt Melkisetek atok a chiyuhmit na holitompa isht vtta chinto hosh Chihowa hak o im ai vlhtoka tok.

11. Melkisetek ash isht il anumpula chi kvt pin laua: yohmi kia nana ka akostininchi hvchi svlaha hoka, tosholi ka kvlllo hoke.

12. Yohmi ka yvmmak atok a hopakit taiyaha hoka nan im avvchi yosh hvsh ahanta he vlhpiesa kia, kanima kvt

Chihowa im anumpa ai isht ia vmmona ka anonti hvchim avcha hi a vlhpesa pulla hoke: yohmi kv̄t ilhpak kv̄llo vpa chatuk okvno hvch ik chohmo, amba pishukchi ishko chatuk ak o chiyuhmi ho hvsh tovrshke.

13. Yohmi ka pishukchi ishko puta hokvto nan isht ai vlhpiesa anumpa hoka akostinincha hi a ik ona, vl̄osi yokvt.

14. Amba ilhpak kv̄llo vt asvnochi vhleha hak o im ai vlhpiesa hoke; yvmmak ash ot nana ka ai yvmohomi kak osh im anukfila isht toksahanli hosh nan achukma, ik achukmo ita tuklo ka isht akostininchi hoke.

## CHAPTA VI.

Nan ai yimmika ya ai i filvmm̄it aka ik kaho ka chi, 1: 11 amba kv̄l̄lot hiela chi: 12 nana ka achunanchit nuk̄taiyav̄t Chihowa ya aokpv̄cha chi ka i miha: 13 Chihowa im anumpa hv̄t ahli hoka.

1. YUMOHMI hoka Klaist ai isht vlv̄chi vmmona hokvno e boyuhli cha, ai ahli fehv̄t itikba il ia hosh nan toksv̄li isht ai illi ai i filvmm̄it ile kostininchi, micha Chihowa isht i yimmi;

2. Baptismo nan isht vlv̄chi, micha ibbak onohonchi, micha illi tok vt falamv̄t tani, micha hatak puta nan im vlhpisv̄t bilia he aiena ka intolahpi ka atuklanchit keho bohlo kashke.

3. Micha Chihowa ak osh vlhpesa ahni hokma, ilv̄ppa e yvmohma he mak oke.

4. Yohmi ka kv̄na hosh himonna ha im vlv̄chit, na-hvlbina vba yakni minti ka akostininchi, micha Shilombish Holitopa ya ibai ishi tok okvto,

5. Mikv̄t Chihowa im anumpa achukma, micha vbanumpa nitak nan isht ai ahla he aiena ka anukfoyuka ha yak okvto,

6. Yvmmak ash osh vbanumpa ha i filvmm̄i hokv̄t kaniohmit atuklant himonv̄t toba cha, ai isht ile kostinincha hinla kv̄t iksho kamohmi hoke; yohmi kv̄t ilap ash inli hosh Chihowa Ushi ya himonv̄chit ititaiyukhv̄na ya ai vbi kv̄t, otv̄ninchit hofahli hokv̄t.

7. Yohmi ka yakni ak osh uhumba aiyuka ka ai ihishko



hosh yakni a toksvli yummak atuk vt ai isha he vllhpiesa ho offohonchi cha, nan isht ai yukpa Chihowa a mihinti ka ishi hoke :

8. Amba bafvlli halupa ilaiyuka offohonchi hokvno nan ik ahobo hatuk o, isht ai okpuloka he anumpa hvt onvtuyula hosi; yummvt ont im ishtaiyopi hokvto lua he mak oke.

9. Yakohmichit il anumpuli hoh kia, amba holitopa vhleha ma! hvchishno yokvno nana achukma i shahli, micha ai okchaya nana kvv ai ahalaia kak o a hvchi yvmohmi ka, pi yimmishke.

10. Yohmi ka Chihowa hvt ik ai vllhpeso hokmá, nanta tuk osh nan toksvlit holitoblit ilap hohchifo imma ka nan isht hvsh im ahanta tuk a imi haksa he keyu, vbanumpuli vhleha ha nan isht hvsh im ahanta-tuk osh, isht hvsh ahanta kvv imoma hoka.

11. Mikmvt ai okchaya ishi la he ai ahnit, ai ahlit hvchi yimmi hosh ont ai vlli ka hvsh ona chi kvv, nana hvsh a kaniohmi kash ot moyuma kvv hvsh achunancha he e hvchim ai ahnishke.

12. Yohmi hosh ik hvch intakobo kashke; amba kaniohmi kvv na yimmi kak osh nana ka nuktaiyalvt hohoyo hosh, nana im ihisa tok ash ont ieszhi vllhpesa tok ak o hvsh hobachashke.

13. Yohmi ka Chihowa hvt Eblaham a nana ka im ihisa hokvt ilap inli ho ai isht anumpa kvvlo il onochi kvv, i shahli kanima ai isht anumpa kvvlo il onocha he keyu kak atok,

14. Ahlishke yukpahanlit chi yukpali la he, mikmvt lauahanchit chi lauachi la hi oke, ahanchi tok.

15. Yakohmit nana ka nuktaiyalvt hohoyo hatuk osh, nana ka im ihisa tok ash ishi tok.

16. Yohmi ka hatak okvto i shahli ho ai isht anumpa kvvlo il onohonchi chatuk vt ai ahli; micha nan isht ai ahlich anumpa kvvlo il onochi kak osh itachowa puta hokvno ont im ai vllichi chatuk bano hoke.

17. Yvmohmi ka Chihowa hokvt nana ka im ihisa tok a ont isha he im ai vllhpiesa vhleha hoka ilap nana im anukfihinla tok vt kaniohmit ai inla himma keyu ka, achukmalit i

shahlichit im otv<sup>n</sup>inchi b<sup>n</sup>na hosh, anumpa kullo y<sub>o</sub> il ono-  
chit isht ai a<sup>h</sup>lichit tok:

18. Yohmi ka nana kani<sup>o</sup>hmit ai inli himma keyu tuklo  
y<sup>u</sup>mmak oka Chihowa hok<sup>u</sup>t isht a holaba himma keyu  
hoka, vba isht il aiyukpa pim ihisa tok ash il isha ch<sup>i</sup> hosh  
a hlakofi y<sub>o</sub> il o chahafa k<sup>u</sup>t, nan isht a nuk<sup>t</sup>aiyala chinto il  
iesha he ak atok.

19. Nana pim ihisa tok ash il isha he il ai ahni kak osh,  
isht a kullo ai a<sup>h</sup>li kan<sup>u</sup>lla he keyu y<sub>o</sub> shilombish vt im iti-  
laui, micha y<sup>u</sup>mmak osh, aholitopa fehna isht ompoholmo  
anukaka yoka chukowa mak oke.

20. Y<sup>u</sup>mmak oka pin tikba-heka, Chis<sup>u</sup>s vt chukow<sup>u</sup>t,  
Melkisetek atok a chiyuhmit na holitopa isht v<sup>t</sup>ta chinto  
bil<sup>i</sup>a toba tok oke.

## CHAPTA VII.

Melkisetek atok a chohmit Klaist Chis<sup>u</sup>s vt nan isht v<sup>t</sup>ta holitopa, 1,  
11 Alon na holitopa isht v<sup>t</sup>ta yatok a i shahli fehna.

1. YOHMI ka Melkisetek ilv<sup>u</sup>ppvt Salem i miko, Chi-  
howa holitopa fehna i na holitopa isht v<sup>t</sup>ta yosh, Eblaham  
vt miko v<sup>h</sup>leha ont v<sup>b</sup>it falamvt aya ma y<sup>u</sup>mmak ash ot ont  
afama mvt, yukpali tok.

2. Y<sup>u</sup>mmak ash o Eblaham vt moyuma ka a kashapa ont  
isht pokoli ka ima mak inli tok: v<sup>u</sup>mmona hoka toshowak-  
mvt, Nan ai v<sup>h</sup>lpiesa i miko, mikmvt anonti y<sup>u</sup>mma acha-  
kaya k<sup>u</sup>t Salem i miko, y<sup>u</sup>mmvt nanaiya i miko achi hoke,

3. Iki iksho, ishki iksho, isht ai unchululi iksho, nitak ai  
isht ia v<sup>u</sup>mmona tok vt iksho, micha im ilhfiopak vt ont ai  
v<sup>h</sup>li tok vt iksho, amba Chihowa Ushi yak o chiyuhmi hosh  
na holitopa isht v<sup>t</sup>ta yosh ahantvt bil<sup>i</sup>a hoke.

4. Yohmi ka hatak ilv<sup>u</sup>ppvt a chinto kani<sup>o</sup>hmi h<sup>o</sup>, iki  
chinto Eblaham ash ot nana ka in t<sup>u</sup>nvp a im ai ishi tok ash  
achukma i shahli kak o a kashapa ont isht pokoli ka ima  
tok a, hvsh anukfillashke.

5. Yohmi ka Lefai ushi v<sup>h</sup>leha atuk vt na-holitopa isht

vtta vlhtoka kv̄t, okla yvmmv̄t itibapishi; micha Eblaham ak ̄ isht atiaka yak inli kia, vba nan-vlhpisa in tonla hatuk osh, a kashapa ont isht pokoli ka im ai ishi beka mvhlshke:

6. Amba yvmmak ash ̄ ilap okv̄to ai isht unchululi h̄o keyu kia, a kashapa ont isht pokoli ka Eblaham a im ai ishi mv̄t, nana im ih̄isa tok ash ̄ yukpali tok.

7. Mikmv̄t i shahli hak osh ik lauwo ka yukpali hoka ik ai ahlo, acha hi yv̄t ikshoshke.

8. Mikmv̄t ilvppak okv̄no hatak vt illa he kia a kashapa ont isht pokoli ka ishi; amba yvmmak okv̄no yvmmv̄t ishi kv̄t okchayv̄t ahanta ka, nana kv̄t isht ai atokowa hoke.

9. Yohmi ka Lefai yokv̄t a kashapa ont isht pokoli ka ih̄ishi kia, Eblaham ak ̄ isht ai unchululi hokv̄t, a kashapa ont isht pokoli ka Eblaham a ibai atobbi ak inli tok, yvmma chiyuhmi achi la hinla ak inli hoke.

10. Yohmi ka Melkisetek vt yvmmak ash ̄ afama ma, yvmmv̄t īki ikfeks̄a anukaka yak ̄ fok̄a moma hatok.

11. Yohmi ka Lefai na-holitompa isht ai vtta yokv̄t ai ahli bieka hatok okma, yvmmak ̄ okla hv̄t i nuta ai asha hosh vba nan vlhpisa puta ka ih̄ishi hatok oka, Melkisetek atok a chiyuhmit na holitompa isht vtta inla hokv̄t na ka-tihmi h̄o vlhtoka he vlhpesa moma h̄o? micha Alon na holitompa isht ai vtta yatok a chiyuhma he keyu h̄o?

12. Yohmi ka na holitompa isht ai vtta inla hosh vlhtoka hatuk ̄, anonti nan vlhpisa yash ot inlv̄t toba he vlhpiesa hoke.

13. Yohmi ka yvmma nana puta ilvppv̄t isht anuhumpa hokv̄to, oklushi inla h̄o ibai achv̄fa hatok; yvmmak okv̄to hatak achv̄fa kia alta ya nan isht ai vtta beka tok keyu hoke.

14. Yohmi ka Chuta yak ̄ pin Chitokaka yv̄t a tobv̄t kohcha tok vt ai atokowa; oklushi yvmmak oka na holitompa isht ai vtta imma nana kia Moses vt isht anumpuli tok keyu hoke.

15. Mikmv̄t nana ai atokowa hokv̄t i shaiyahli fehna imoma ka, Melkisetek atok a hoyulba hosh na holitompa isht vtta inla kv̄t hikia hoke,

16. Yvmmak okv̄to haknip nan im vlhpisa imma h̄o isht



vlhtoka tok keyu, amba okchayvt bilia im ai vlhpiesa hatuk osh vlhtoka tok oke.

17. Yohmi ka yummvt atokolit anoli hosh, Chishno yokvt na-holitompa isht vtta Melkisetek atok a chiyuhmit bilia chia hoke, ahanchi tok.

18. Yohmi ka nan vlhpisa yummak ash osh nana ka isht ai achukma, ai ahli ka ik ono hatuk osh akshu tok vt ai ahlishke.

19. Nan-vlhpisa yummak ash okvto nana kia ai ahlichi tok keyu hoke: yummak atuk mak o nana achukma i shahli ho pim ataiyahli hosh vla hatok pulla kak o, Chihowa i bilikasi ka il ona hoke.

20. Mihma yummak ash ot anumpa kvllo il onoyuchi keyu iksho ho yummak ash ot na holitompa isht vtta toba tok oka:

21. Yohmi ka anumpa kvllo il onochi kia iksho ho yummvt na holitompa isht vtta vhleha tohomba tok oka: amba ilvppak okvno anumpa kvllo il onochi hosh nana im ahanchi kv, Chitokaka yak osh anumpa kvllo il onochi kv, inlv im anukfila he keyu mak osh, Chishno yokvt na holitompa isht vtta Melkisetek atok a chiyuhmit bilia chia hoke, ahanchi tok:

22. Yakohmi hosh Chisvs okvt nan it im vlhpisa achukma i shahli yoka ai ahlichi toba tok oke.

23. Yohmi ka yummak ash okvto na holitompa isht vtta yvt lawa mvhli tok: yohmi kv yummak okvto nan illi ak atuk pulla mak o ahantvt bilia beka tok keyu hoke.

24. Amba hatak ilvppak okvto okchayvt bilia hatuk osh na holitompa isht ai vtta inla himma keyu ho ieshi hoke.

25. Yumohmi hokvt anonti ilap ak o anukehieto hosh Chihowa hoka im ohona hokvno mominehit okchalinea he bano hosh, yummak oka apelvchit isht anumpohonli hosh ahantvt bilia hoka.

26. Yohmi ka na holitompa isht vtta chinto, yummak okvt ai ashvchika ik im iksho, nan ik okpano, na liteha iksho, nan ashvchi vhleha ha ai i filvmmi, micha chaha kv vba yakni yak kia i shahli, yummak chiyuhmi hosh pim ahanta he ai vlhpiesa hatok:

27. Yohmi ka na holitompa isht vtta pehlichi chinto vhleha hokvto nitak moma ka ilap nan ai ashvchi isht vlhtoba ka tikba pit im issa ha yosh, okla nan ai ashvchi isht vlhtoba ka pit im issa beka tok o, yvmmak okvto chiyuhma he im vlhpesa keyu, nan ai ashvchi isht vlhtoba il im issa mak osh ilvppak oka himonna ma yvmohmi tok okvt.

28. Yohmi ka nan vlhpisa yvmmak ash ot hatak ibetvbla he im vlhtayak kia na holitompa isht vtta chinto atokohonli; amba anumpa kvllo isht ai ahli tok ash ot vba nan vlhpisa yvmmak ash ot toba ha yak o, Ushi ya atokoli ho, yvmmvt na holitompa isht vtta ai ahlit bilia he mak oke.

### CHAPTA VIII.

Klaist ak osh na holitompa isht vtta i shahli bilia, yohmi ka Klaist vt vla ha yokvno Alon isht ai unchululi kvv na holitompa isht vtta vlhtoka he keyu mak oke, 1 : 7 yvmmak inli chohmit Chihowa yvt nan vlhpisa himona ikbi ha yokvno Islael vt Echip a kohchvt minti ma, nan vlhpisa toba tok vt kashovvt taha hoke.

1. NANA isht il anumpohonli kash puta ka ilvppak osh moma i shahlshke : Na holitompa isht vtta chinto yakohmi hosh vba yakni Chihowa Chitokaka yvt a binili kak o isht impak imma yo pi binili hosh ;

2. Vba aholitopa, micha vlhtipo ai ahli fehna ka hatak ak atok keyu, amba Chitokaka yak osh ikbi tok, yvmmak o nan isht ai ahanta hoke.

3. Yohmi ka na holitompa isht vtta chinto puta kvv na hvlbina, micha nan ai ashvchi isht vlhtoba puta aiena pit im issa chi hosh vlhtoka chatuk oka ; hatak ilvppak kia anonti nana im ai asha tuk osh pit im issa he im vlhpiesa hoke.

4. Yohmi kvv yakni ilvppak o ahanta hokmvt, na holitompa isht vtta ya hi o keyu, vba nan vlhpisa yak atuk pulla mak o na hvlbina pit im issa hosh na holitompa isht vtta vhleha hvv ai asha hoka :

5. Yvmmak okvt nan isht ahanta kvv vba yakni nana ai asha kak o isht vlhpisa, micha isht a hoyulba mak o isht ai yvmihchi hoke : yohmi ka Moses vt vlhtipo ya ikba chikma,

Chihowa hvt nan i miha kvt, Ahah! ahnit nan isht a holba nvnih paknaka chim ai otvni tok ak o chiyuhmi ho nan okluha ka ish ikbashke, achi tok oka.

6. Yohmi tok kia himonasi hokvno yvmmak okvt nan it im vlhpisa achukma i shahli, nana achukma i shahli anno-howa puta isht ai ahli tok a, it i nanaiyvchi yosh nan isht ai vtta holitopa i shahli fehna ho ieshi mak inlishke.

7. Yohmi ka nan it im vlhpisa vmmona yvmmvvt nan isht ik ono iksho hatok okma, anonti atukla kvt ai yvmohma hi ya hoya hi atok keyu hoke.

8. Yohmi ka yvmmvvt nan isht ik ono ka pisa kak osh Chitokaka yvt achi kvt, Yakeh! · Israel in chukachvfa, micha Chuta in chukachvfa aiena ka nan it im vlhpisa himona im apihisa la he nitak vt vla hi oke,

9. Iki vhleha hoka ibbak halvllit pehliechit, nitak kaniohmi kash Echip yakni yoka a kohchi li mvt, nan it im vlhpisa im apihisa li tok okvno chiyuhma he keyu; yvmmak okvt nan it im vlhpisa im apihisa li tok ash foyukvt mahaya keyu hatuk o, ak ahnincho ki tok, Chitokaka yvt achishke, im ahanchi tok.

10. Yohmi ka nan it im vlhpisa ilvppak o nitak himak a pilla mak o Chuta in chukachvfa yoka im apihisa la hi oke; yohmikmvt a nan vlhpisa puta yoka anukfokibinchi likmvt, chukvsh oka ai o holissohonchi la hi oke; mikmvt in Chihowa sia hahe, mikma vm okla hahi oke. Chitokaka yvt ahanchishke.

11. Yvmohmikma hatak puta kvt in chuka panta, micha hatak puta kvt itibapishi aiena ka nan im avvchit, Chihowa hoka ish ithaiyanashke, im ahancha he keyu; moma ik lauwo, micha moma i shahli aiena kvt svthana hi oka.

12. Yohmi ka ik vlhpeso ai yvmohmi puta ka i nukhaklo la he, mikmvt nan ai ashvchi, micha vba nan vlhpisa kobahafi puta ka himak a pilla ak ithaiyano ka he mak oke.

13. Nan it im vlhpisa himona yvmmak achi kak osh, vmmona tok vt sipokni yo chohmichi hoke. Yohmi ka nana kvt okpulot sipoknit isht ai aiena hokvto, ont ik ai iksho kamohma chi kvt vlhtaiyaha hoke.



## CHAPTER IX.

Vba nan-vlhpisa yokvto issish a hlatahampla hi a im apesa 1; 11  
 amba Klaist vt ilap issish, micha ilap fehna isht a hlakofa hi o ile  
 kanchi tok vt mihi yosh holitopa fehna: 15 nan vlhpisa himona  
 ai ahlich hosh Klaist vt illa he vlhpiesa hatok.

1. YOHMI ka nan it im vlhpisa vmmona yummak ash  
 ot Chihowa aiokpvchi nan isht vlhpisa puta, micha aholito-  
 pa yakni ilvppa ahalaiya aiena ka ishi tok vt ai ahlishke.

2. Yohmi ka vlhtipo yokvt toba tok: vmmona yumma  
 anukaka yak o pva ai o hikia, micha ai impa, micha pvska  
 otvni aiena kv ash beka tok, yummak osh aholitopa hoh-  
 chifo hoke.

3. Mihma nan-tvna isht ompoholmo vba takali atukla  
 mish asha ka, vlhtipo yokvto aholitopa moma i shahli hoh-  
 chifo hoke:

4. Yummak oka anukaka ya na balama aluachi tvli ho-  
 lisso lakna isht toba, micha nan it im vlhpisa yash im itombi  
 yokvt tvli holisso lakna yosh isht ompoholmot apakfoyupa,  
 yummak o tvli holisso lakna nan ai vlhto manna yosh vlhto,  
 micha Alon in tvbi yvt bikobli tok, micha tvli patvssa tuklo  
 nan it im vlhpisa yvt ai o holihiso tok aiena kv foyuka hosh  
 taloha tok:

5. Mihma paknaka ya Chelubim holitopa vhleha hv isht  
 ai i kana ai o binili ya o hoshontikahanchi tok, yummak oka  
 himonasi ka achvfa aiyukvt isht il anumpula he keyushke.

6. Yohmi ka nana puta kv yakohmit vlhtaiyaha ha yak  
 o, na holitompa isht vtta yak osh vlhtipo vmmona anukaka  
 yak o chukovvt, Chihowa aiokpvchit a hlopulli beka tok:

7. Amba atukla hokvno na holitompa isht vtta chinto kak  
 osh ilap bano hosh afvmmikma himonna ho chukowa kv,  
 issish ik esho keyu hosh yummak o ilap nan ai ashvchi, mi-  
 cha okla nan ai ashvchi aiena ka isht vlhtoba mak o pit im  
 issa beka tok:

8. Shilombish Holitopa yak osh vlhtipo vmmona yash

ot hikia imoma hokvno, aholitopa moma i shahli anukaka a chukowa yokvt ik otano kisha hō ilvppak o otvnninchi tok:

9. Yvmmak osh nitak yvmmak fehna ka nan isht vlhpisa hatok; yvmmak ash o na hvlbina, micha nan ai ashvchi isht vlhtoba ita tuklo ka im ihisa tok: yohmi ka yvmma isht ahanta hokvno yvmmak okvt nan isht il akostininchi imma hokvno nukvtla ai ahli yo im ikba he keyu hatok.

10. Yvmmak okvt nan ilhpak, micha nan ishko puta, micha il achifa ilaiyuka, micha haknip imma nan isht vlhpisa puta aiena kak illa hosh im vlhpihisa na nan ai vlhpesa nitak vt vla hi atok.

11. Amba Klaist vt vla hokvt vlhtipo chito, micha vlhta-ha achukma kv̄t i shahli, ibbak isht a toba keyu, yvmma achi kv̄t nan toba ilvppak o chohmi keyu, na holitompa isht vtta chinto hosh nana achukma vla chi puta ka isht ahanta kv̄t;

12. Issi kosoma, micha wak ushi issish o keyu, amba ilap im issish ak inli hō isht a pi vlhtombvt bilia ya isht a pim ataiyahli hā yosh, aholitopa yoka himonna achvfa chukowa tok.

13. Yohmi ka wak nakni, micha issi kosoma issish, micha wak tek himita hullushmi hituk chubbi ya ik kashofo ka ai o fimimpa kak osh kanimihchit haknip a kashofi hatok okma;

14. Shilombish okchayvt bilia anukfoka pulla hatuk osh isht ik ai ono kia iksho hosh Klaist vt Chihowa yoka pit il im issa tok; yvmma im issish okak heto i shahlichī fehna hosh nan a kaniohmit isht ai illi ya a hvchi filvmmichit, isht hvsh il akostininchi yoka hvchi kashofichi na Chihowa okchaya yoka hvsh holitobla hinla hoke.

15. Yohmi ka yvmmak okvt nan it im vlhpisa vmmona nuta ai ashvt nan ai ashahanchi tok vt isht vlhtoba chi mak o, illi pulla hatuk mak osh nan it im vlhpisa himona yoka ai ahlichī toba hō, im annohowa tok puta hokvt ai okchayvt bilia isha he im ai vlhpiesa im ihisa tok a isha hi atok.

16. Nan it im vlhpisa yvt tobakma, nan it im vlhpisa isht ai ahli kv̄t illi kak o pulla chatuk mak inlishke.

17. Yohmi ka nan it im vlhpisa isht ai ahli yash osh okchaya imoma hokvno isht ik ai ahlo kamohmi, amba illi ha yak o isht ai ahli chatuk oke.

18. Yvmohmi hoka nan it im vlhpisa vmmona hokvt issish iksho ho isht ai ahli tok keyu hoke.

19. Yohmi ka Moses okvt vba nan vlhpisa yvt nana apihisa ka mominchit okla puta ka isht im anumpohonlit taiyahli mvt, wak ushi, micha issi kosoma ushi issish ita tuklo, oka kapvssa, micha chukfi hishi humma, micha hissop aiena ho ieshi cha, holisso, micha okla moma aieninchit isht o fimmi mvt,

20. Ilvppak osh nan it im vlhpisa issish mak o Chihowa yokvt hvchim apihisa tuk oke, achi tok.

21. Anonti yvmmak ash ot vlhtipo, micha Chihowa isht aiokpvchi ai-vlhto aiena ka issish isht o fimmi mak inli tok.

22. Yohmi ka vba nan vlhpisa yak atuk pulla mak o nan okluha kvv moma chohmit issish isht a kashofa hoke; micha issish hlatahampa keyu hokvno nan ai ashvchika isht a kashofa iksho hoke.

23. Yohmi hoka nana vba ai asha puta ka isht vlhpisa puta kvv ilvppak ash o isht a kashofa hi atuk; amba nana vba ai asha yvmmak oka nan ai ashvchika isht vlhtoba achukma kvv ilvppak ash o i shahli ho isht a kashofa hi atuk oke.

24. Yohmi ka Chisvs vt aholitopa puta ibbak isht a toba, yvmmak o ai ahli fehna ka isht vlhpisa hatok ak o chukowa tok keyu; amba pishno ak atuk pulla mak o Chihowa itikba ya himonasi kvno ai otaiyana chi kak osh vba yakni fehna ka chukowa tok:

25. Na holitompa isht vtta chinto yokvto aholitopa yoka afvmmikma in issish o isht chukowa beka tok, chiyuhmit himonna ilap ash il im issa hi atok keyu hoke:

26. Yohmi tok okma, yakni intolahpi toba vmmona tok takla ka himonna ihinla hi atok pulla; amba himonasi kvno himonna achvfa ho yakni ont ishtaiyopi yak o ant ai otaiyani kvv, nan ai ashvchi isht kanchi mak osh ilap il im issa hosh illi tok.



27. Yohmi ka hatak puta kvt himonna ho illa hi vt im vlhpihisa tok; amba misha pilla hokvno nan im vlhpisa nitak osh vla hi oke:

28. Yvmma chiyuhmit Klaist ak kia lawa nan im ai ashvchi isht kancha chi mak osh himonna ma il im issa tok: yohmi kvt yvmma hohoyo vhleha hokvno nan ai ashvchi ik im iksho hosh atukla okchalinya chi hosh otaiyana hi oke.

CHAPTA X.

Vba nan-vlhpisa ho na nipi vba isht aiokpvchi hokvno nan ashvchi isht kancha he keyu, 1: 10 amba Klaist haknip osh himonna la nan vlhtoba hosh illi ha yokvt nan ashvchi ya isht kanchi; 19 achunanchit nan ai yimmika ya kvllot ieshit Chihowa ya aiokpahancha he i miha.

1. YOHMI ka vba nan vlhpisa yokvt nana achukma puta vla he ak o isht vlhpisa hatok; yohmi kvt nana yvmmak o isht a holba ai ahli keyu hokvt, nan ai ashvchi isht vlhtoba puta yvmma afvmmi aiyuka ka pit im ihisa na bilia mak o isht ahanta vhleha hoka nuktalalit ai ahlicha himma keyu hoke.

2. Yohmi tok okma, ilvppak oka pit im issa kvt issa hi atok keyu? yohmi ka aiokpvchi yakohmi vhleha hokvt himonna kashofa ha yokvt, nan ai ashvchi puta isht il akostinichi yvt ik im iksho ka hi atok oka,

3. Amba nan ai ashvchi isht vlhtoba yvmmak ash o afvmmikma anonti nan ai ashvchi isht ai otaiyani beka tok.

4. Yohmi ka wak-nakni, micha issi kosomushi issish aiena kvt nan ai ashvchi puta ka isht kancha he keyu kamohmi hoka.

5. Yvmohmi hoka yakni ilvppa vla mvt, Nan ai ashvchi isht vlhtoba, micha vba isht aiokpvchi aiena hokvno chik ahno tok; amba haknip o is svm ikbi tok, achi tok:

6. Nan ai ashvchi isht vlhtoba lua yokvno isht a chi yukpa tok keyu hoke.

7. Yohmi hatuk oka, yakeh! nan isht si annohowa ho-

lisso a foyuka hoka nan ish ai ahni tok a ataiyahli la chi hosh vla li hoke, Chihowa ma! achi li tok.

8. Tikba kash nan ai ashvchi isht vlhtoba, micha vba isht aiokpvchi, micha nan ai ashvchi isht vlhtoba lua aiena ilvppa vba nan vlhpisa yak atuk pulla kak o isht ahanta hoka, chik ahno mvt, anonti yvmma isht a chi yukpa keyu ki tok, achi tok.

9. Yohmi mvt, Yakeh! nan ish ai ahni tok a ataiyahli la chi hosh vla li hoke, Chihowa ma! achi kvt, nana vmmona kash o isht kanchi hosh nan atukla kash o ai ahlicha chi hatok.

10. Nan ai ahni tok yvmmak atuk pulla kak o Chisvs Klaist vt himonna achvfa ma, haknip a im issa tok ak o isht a pi kashofa hoke.

11. Yohmi ka na holitompa isht vtta puta kvt nitak moma ka hikivt nan isht ahanta kvt, nan ai ashvchi isht vlhtoba mih ash inli, yvmmvt nan ai ashvchi isht kancha himma keyu ka, himonna pit im ihisa chatuk:

12. Amba hatak ilvppvt o nan ai ashvchi isht vlhtoba achvfa ka, im issa ha ya tok vt, Chihowa ibbak isht impak imma ak o binilit bilia hoke:

13. Himak a pilla mahaya hokvno in tvnvp vhleha hokvt ilap iyi ai o hikia yo toba he, ai ahnit ahanta hoke.

14. Yohmi ka nan ai ashvchi isht vlhtoba achvfa ho kashofa vhleha yvmmak okvno isht nuktalalit ai ahlichit bilia hatok.

15. Yvmmak oka anonti Shilombish Holitopa yak kia nan atokowa pim anoli hoke; yohmi kvt anonti tikba ka achi ha yak osh,

16. Nan it im vlhpisa ilvppak o nitak yvmma i himmak okvno it im apihisa likmvt, chukvsh fehna ka a nan vlhpisa yoka nukfohkihinchil la he, micha im anukfila fehna ka ai o holissohonchi la he;

17. Mikmvt nan im ai ashvchi, micha vba nan vlhpisa kobahafi tok puta ka himak a pilla ma ak ithaiyano ka hi oke, Chitokaka yvt achishke, achi tok.

18. Yohmi ka ilvppa isht a kashofa kvt asha hokvno,

anonti nan ai ashvchi isht vlhtoba himmakma im issa he iksho hoke.

19. Yvmohmi hoka itibapishi li vhleha ma! Chisvs im issish ak atuk pulla kak o nukwaya iksho hosh aholitopa fehna ka e chukowa hoke:

20. Yohmi kv̄t aholitopa isht ompoholmo takali yv̄mma achi kv̄t haknip ak oke, yv̄mmak atuk pulla kak o hina himona, micha okchaya holitoblichit pim apesa tok o e chukowa hoke.

21. Yohmikmvt na holitompa isht vtta chinto Chihowa im aboha i shahli hosh pim ahanta hokvt;

22. Chukvsh ai ahli, micha i yimmi ai ahli fehna, pi chukvsh mvt issish o fimmvt, isht il il-akostininchi ik achukmo ka ai i filv̄mmit, pi haknip okvt oka kashofa achukma isht vlhchifa tuk aiena ho isht i bilikasi il onashke.

23. Nana pim ihisa tok vt ai ahli yoka, nana pi yimmi il il apihisa tok vt shanaia iksho hosh il ai ahlashke:

24. Micha nana ka isht it anukfilli hosh iloh it i hullot, micha nan isht vtta achukma puta ka e yvmohma chi kv̄t, il itaiyimitachashke:

25. Kaniohmi kv̄t ai yvmohmi chatuk a chiyuhmit il itv̄naha he tuk vt kil isso kashke: amba nana ka it i mihvt, nitak yv̄mmvt vla hosi ka hv̄sh pisa kak osh, i shahlichī fehvt hv̄sh yvmohmashke.

26. Yohmi ka nan ai ahli ka il ithaiyana ha yokvt, pishno inli pim anukfila hosh il ashvchi hokm̄vno, nan ai ashvchi isht vlhtoba yvt himmakma takanli keyu hoke;

27. Amba isht a nukshobla he na palv̄m̄mi vlhpisa, micha isht i nukkilli luak aiena ka hohoyot ahanta he; yv̄mmvt v̄banumpa ai ahli i sanali vhleha hoka okp̄vnit t̄vmola he ak osh takanli hoke.

28. Moses i nan vlhpisa yoka ik holitoblo hatuk vt nan atokowa anoli tuklo, tuchina, kanima kv̄t pisa ho isht i nukhaklo kia iksho ho, illi hatok oke.

29. Yohmi ka kv̄na hosh Chihowa Ushi yoka iyi nuta bohliit a hv̄hlih̄inchi, micha nan it im vlhpisa issish yv̄mmak o isht a kashofa tok ash osh nana ik holitopo isht ahobvchi,



micha nan isht i kana Shilombish Holitopa ya nan isht ik ahobalo hatuk okvto, nan isht ilbvsha yvt i shahli katiohmi ho isht ilbvsha he, hvchim ahoba ho?

30. Yohmi ka, Ai vlhpiesa isht atobba hi okvt vmmi hoke, ilvppak ash achi tok yvmmak okvno il ithana; falaminchit atobbi la he, Chitokaka yvt achishke. Mikma anonti, Chitokaka yvt im okla vhleha hoka nan im apesa hi oke, achi kvv takanlishke.

31. Chihowa okchaya yoka nan im vlhpisa chi hosh ibak a foyuka kvv nana ka isht a nvkshopa he vlhpesa hoke.

32. Yohmi kia nitak tok ash o hvsh ithaiyanashke, yvmmak amo nana ka hvsh ithaiyana ha yokvto, na palvmmi chinto puta ka it i kahanlot isht hvch ilbahasha tok:

33. Yohmi kvv isht a hofahya, micha na palvmmi puta hvchi onvtuyula hosh okla a yopissa mak o hvsh tohomba kvv hvchi yvmohmi; micha kanimikma yvmma yvmohmi puta kash o ibai achvfa hvsh tohomba kvv chiyuhmi mak inli tok oke.

34. Yohmi ka yuka talakchi yosh ahanta li ma, hvs svba nukhaklo tok; micha hvchim ilayak puta ka hvchi wehpohonli kia, vlhpesa ahnit hvchi yukpa kvv nana okpula he keyu, micha achukma i shahli hosh vba aholitopa yoka hvchin tuyula kvv, hvsh il ithana hatuk okvt.

35. Yvmohmi hoka na yimmi hvchi anukfoyuka kash osh hvch ik kancho kashke: yvmmak osh nan isht vlhtoba nan isht il aiyukpa chinto ho ieshi hoke.

36. Yohmi ka nuktaiyalvt achunancha he hvchim vlhpiesa; yohmi hosh Chihowa nan ai ahni tok a hvsh ataiyahli ha yosh, nana auet hvchim ihisa tok ash hvsh iesha hi atok.

37. Himak a pilla chekosi fehnakma vla hi atok vt, vla chi kvv svlaha hosh vla chi keyu hoke.

38. Yohmi ka ai vlhpiesa yokvto na yimmi pulla kak osh okchaya chi; amba hatak nana hosh falama hok mvno, sa shilombish vt isht im ai yukpa hi vt iksho hoke.

39. Amba pishno vto falama cha, nan isht ai ilbvsha bilia pihisa he vlleha yvmmak okvno il ibai achvfa keyu, amba na yimmi cha, shilombish okvt okchayvt bilia yvmmak o il ibai achvfa hoke.

## CHAPTER XI.

Na yimmika yvt nana hatuk a anoli, 1; 7 nayimmi isht ai vni kv̄t vbanumpuli tikba ash ot nan im anukfila na otrui tok a anoli.

1. NA yimmi kak osh nana il isha he ai ahnit e hohoyo ka nan isht pim ai ahli yoke; micha nana ke peso ka nan isht ai atokowa yoke.

2. Yummak atuk pulla kak o hatak tikba vhleha hokvt nan annoa achukma ka isht ai atokowa tok oka.

3. Na pi yimma pulla kak osh yakni puta kv̄t Chihowa im anumpa hak o isht a toba tok a isht il akostininchī hoke; yohmi hatuk o nana puta e pihisa kv̄t nana puta otaiyani kak o isht atoba tok keyu.

4. Na yimmi pulla kak osh Ebel okvt vba isht aiokpuchi achukma kv̄t Ken immi ya i shahli fehna ho Chihowa hoka ont im issa tok; yummak ash o nana ka ai vllhpiesa kv̄t isht atokowa kv̄t, i na hvlbina puta ka Chihowa hokvt atokolit im aiokpanchi tok; micha yummak atuk pulla kak o illi tok kia anumpuli kv̄t imomvshke.

5. Na yimmi pulla kak osh Enok vt toshowa kv̄t nan-illi ik peso ka chi kak atok; micha Chihowa ak osh tosholi hatuk oka, iksho ki tok: ik toshowo kisha kv̄t Chihowa yoka yukpali tok, nan isht atokowa ilvppak o ishi hatok okvt.

6. Amba na yimmi iksho hokvno kaniohmit yukpala himma keyu hoke; yohmi hoka kv̄na hosh Chihowa im onakmvt, yummak osh ahanta, micha yummak okvt ilap o achunanchit hohoyo puta hokvno nan im atobbi aiena ka yimmi pullashke.

7. Noah yoka Chihowa hv̄t nana im anohonli ma, nana ka ik peso kisha ak inli kia, nvkshopvt holitobli hokvt, i yimmi pulla hosh in chuka-chufa yvt isht ai okchaya hi a peni chito ya ikbi tok; micha yumma yvmohmi kak osh okla puta ai asha tok ash na palvmmi vllhpisa hv̄t onvtula he vllhpesa ka isht otrninchi tok; micha na yimmi isht ai vllhpiesa iesha hi vllhpesa hosh toba tok.

8. Eblaham okvt yakni inla yvmma i himmak o immi tobvt isha hi o, ivt ona chi ho i howa ma, yimmi pulla kak osh im antia tok; micha yvmmak o ia li, ahni keyu kia, kohchvt ia tok.

9. Na yimma pulla kak osh yakni im issa tok ash ont ahanta kv, yakni vt immi keyu ho chiyuhmi hosh Aisaak, micha Chekob ita tuklo, yvmvvt nan im issa tok mihi ash iesha he im ai vlhpesa ak inli ka ai itapehvt vlhtipo anukaka yo ahashwa tok:

10. Tvamaha chito intolahpi yvt kullo achukma yvmmak oka Chihowa hak osh apesvt bohli, micha ikbi yak o hohoyo hatok okvt.

11. Na yimmi pulla kak osh anonti Sela ilap inlit isht hlampko ishi hosh chakali cha, vlla sholi tok, ai yvmohmi chatuk a ont ivt kvnia kia, yvmmak ash ot nan im issa tok a ai ahli yoke ahnit i yimmi hatok okvt.

12. Yvmohmi hoka achvfa, yvmvvt illi ak o chiyuhmi kia, laua kv fochik vba shutik ai asha ka itilau, micha shinuk a holhtina iksho okhvta ontalaka ai asha kak o chiyuhmi hosh a toba tok.

13. Ilvppvt momvt yimmi imoma hosh illi tok; nan im ihisa tok a ishi tok keyu; amba yvmvvt hopaki fehna moma ho pihisa kv, yvmma yimmi ai ahli fehvt anukfoyuka hosh, yakni paknaka ai asha kv, peh nowvt aya, ai anta na hopaka he ik im iksho yosh il anohonli tok.

14. Kvna hosh yvmma chohmi ka achi hokvto, ai ahanta he yakni yo hoyo kv otvninchi fehna hoka.

15. Yohmi ka yakni yvmma a kohchvt minti tok vt anukfihinli hatok okmvt, a falama hi vt takanli akinli tok mvhlishke.

16. Amba himonasi kvno yakni achukma i shahli, yvmvvt vba yakni yak o bvna hoke: yvmohmi hoka in Chihowa isht a hohchihifo kv, Chihowa hv hofahya keyu, yvmmak oka tvamaha chito yo im ataiyahli hatok okvt.

17. Na yimmi pulla kak osh Eblaham okvt nana ka imomaka pisa ho, Aisaak a im issa tok; micha nana im



ihisa puta kash ishi hatuk okvt ushi yvmmak i bieka tuk vt im issa tok.

18. Yvmmak o isht anumpa hosh Aisaak ak o chi unchululi kvt isht a toba hi oke, achi tok.

19. Chihowa yokvt, illi tuk kia, falaminchit tanicha he bano hoka, ai ahni pulla hatuk mak osh yvmmtv illi tuk a chiyuhmichit falaminchit ishi tok.

20. Na yimmi pulla kak osh Aisaak okvt Chekob, Esau ita tuklo kvt i himmak nana im akaniohma hi oka im anolit yukpali tok.

21. Na yimmi pulla kak osh Chekob okvt illit isht mahaya mvt, Chosef ushi a ita tuklont yukpali tok; mihmvt in tvbi wishakchi ak o on hlipia hosh Chihowa ha aiokpvchi tok.

22. Na yimmi pulla kak osh Chosef okvt illi mvt, Israel im vlla vhleha hokvt wihvt itvnowa hi oka isht anumpuli tok; micha ilap foni yoka kanimihcha hi oka im apesa tok.

23. Na yimmi pulla kak osh Moses okvt vttahpi mvt, vlla aiokli fehna ho iki, ishki ita tuklo kvt pisa hatuk osh, luhumi na hvshi tuchina ona tok; micha miko i nan vlhpi-sa ya i nukshopa tok keyu.

24. Na yimmi pulla kak osh Moses okvt asvnot taiyaha mvt, Feleo ushetik ushi isht a hohchifa he ik ai ahno kvt;

25. Chihowa im okla vhleha hak o na palvmmi isht ibai ilbvsha kak osh nitak kanomosi takla, nan ai ashvchika ai isht ilaiyukpvt ahanta hi atuk vt im i shahli tok:

26. Yohmi kvt Klaist a i yimmit isht a hofahya yak osh nan isht ilaiyukpa chinto kvt Echip anukaka nan im ilayak puta ai asha ka im i shahli tok; nan isht vlhtoba nan isht ilaiyukpa yak o hohoyo tok okvt.

27. Na yimmi pulla kak osh yvmmak ash ot Echip a issa kvt, miko yokvt isht i nukkilli ya i nukshopa tok keyu; yohmi kvt nishkin vt pisa he keyu yvmmak okvno pisa kash chiyuhmit nuktaiyalvt achunanchit ahanta tok.

28. Na yimmi pulla kak osh yvmmak ash ot vbanvblit ont ai, micha issish isht o fimmi aiena ka holitobli na, vttahpi ahambi yvmmtv ik halelo ka chi hatok.

29. Na yimmi pulla kak osh okla hvt okhvta humma yvt yakni shila chiyuhmi h<sub>o</sub> a hlopulli tok; yvmma Echip okla hokvt hobachi hosh okai illit taiyaha tok.

30. Na yimmi pulla kak o Cheliko tvli isht a holihta yokvt okla apakfohempa na nitak untuklo ma aka itula tok.

31. Na yimmi pulla kak osh Lehab ohoyo haui yatuk vt, yimma he keyu vhleha hoka ibafokvt illi tok keyu, na tikba pisa vhleha hoka i kanvt ilap in chuka yoka ik chukowá, im ahni hatok okvt.

32. Micha himmakma nanta hak o achi la chi? Yohmi kvt Keteon, Balak, Samson, Chefhli, Lewi aiena, micha Samuel, micha hopaii vhleha aiena ka isht anolit ont taiyahli la he keyu hoke:

33. Yvmmak okvto na yimmi pulla kak osh apehlichika puta imaiyachi, nan ai vlhpiesa ka yvmihinchi, nana im ihisa tok a ihishi, koi hochito itakha ya akvmmi aiena tok;

34. Luak libbi isht lua mosholihinchi, bvshpo falaia halupa ai i hlakohofi, tikambi tuk vi hlampko, itibi kvt kvllot isht i shahlit mahaya, oklushi inla in tvshka chipota ya falaminchit tihlihinli aiena tok.

35. Ohoyo vhleha ha im illi tuk vt anonti falamvt okchaya na ihishi tok; mihma inla yvt a hlakofa he im issa kia, vlhpesa ik ahno hosh nan isht a hotopa; issikkopa pihisa, yohmi kvt falamvt tani achukma i shahli h<sub>o</sub> isha he ak atok:

36. Mihma inla yvt isht ik ahobalo anumpa okpulo fehna, micha fvma isht a hotopa fehna puta, mihmvt anonti talakchit aboha kvllot fohoka aiena ka isht ai imomaka pihisa tok:

37. Okla tvli isht bohowa, bvshvt ita hokohofa, isht ai imomaka pihisa, bvshpo falaia isht ai ihinli: chukfi vlhpoba hakshup, micha issi kosoma hakshup aiena h<sub>o</sub> foyukvt yakni haiaka ai itvnowa, nana ik im iksho kamohmi hosh, nan ilbvshvt issikkopa aiena tok;

38. Yvmmak oka yakni yvt immi ha he ik ono hatok;

yakni haiaka nvni<sup>h</sup> anuka, micha tvli chiluk, micha yakni chiluk anuka aiena ka okla ashvt itvnova tok.

39. Mihmvt ilvppvt moyumvt na yimmi pulla kak osh nana annoa achukma ka isht ai atokowa kia, nana im ihisa tok a ik isho ki tok.

40. Chihowa hak osh nana inla achukma ho pim ataiyahli ka, okla pibai achafa keyu kv<sup>t</sup> ai ahli<sup>t</sup> im vltaha hi atok keyu hoke.

CHAPTA XII.

Chihowa anukfoyukvt achunanchit nayimmi ka il ai itvnova he achi, 1; 22 kvna hosh nan vllpisa himona aiokpvchi kv<sup>t</sup> isht ai yukpa ahalaia he vllpesa ka anoli.

1. YUMOHMI ka nan atokowa anoli puta kv<sup>t</sup> hoshonti chinto ka chiyuhmit yakohmi hosh isht a pi apakfoyupa ak inli hokvt, na weki puta, micha nan ai ashvchi yvt nan isht ahomba iksho isht a pi apakfoyupa a moma ka naksika e boyuhli cha, a mvlela he pit tikba ituyula ka nuktaiyalvt achunanchit e mvllihinlashke,

2. Chisvs nan isht a pi yimmi ka pi nukfohkichi, micha atahli, yvmmak osh nan isht ilaiyukpa yvt itikba auet takali kak osh vllpesa ahnit, ititaiyukhvua ya takalit, nan isht a hofahya nan isht ik im ahobo tok osh, Chihowa ai o binili holitompa isht impakimma yak o binili ka hvsh pihishashke.

3. Yohmi ka hvchim anukfila hv<sup>t</sup> tikambit vm ai ahla he keyu, ahnit taha yoba hinla kv<sup>t</sup>, nan ashvchi vhleha hv<sup>t</sup> ilap a i sanahanli kia yvmmak oka vllpesa ai ahni tok a hvsh anukfihinlashke.

4. Hvchishno yokto nan ai ashvchika ya i sanali kvlllo fehnvt hvsh ilafoa na issish isht ik hlatapo kishvshke.

5. Mich<sup>a</sup> isht a nuktvla he anumpa hv<sup>t</sup> hvchim anum-puli kv<sup>t</sup> vlla yo chohmichit, Svso ma! Chitokaka i nan isht kostin<sup>i</sup>nchi ya chik ahobalo ki na; micha yvmvt chi kostin<sup>i</sup>nchikma, vm ai ahla he keyu, chik ai ahno kashke, achi ka chimi haksi tok o?



6. Yohmi ka Chitokaka yvt kvna hō i hullo hokvto kostininchī hoke; micha ushi puta ka ahninchī hokvto fvmmi hoke.

7. Hvchi kostininchī ka nuktaiyavt vhpesa hvsh ahni hokma, Chihowa hak osh ushi yō chohmichit hvchī yvmih-chī hoke; ushi nanta hō iki vt kostininchī keyu ka anta hatuk o?

8. Amba nan isht kostininchī yvmmak oka moyuma kv̄t ibai ishi chatuk bano, yvm̄vt ik hvchim iksho hokm̄vto, ushi vhleha hvchia keyu, amba iki iksho hvchia hoke.

9. Mihm̄vt anonti p̄iki vt haknip asha pishno chohmi hosh pi kostininchī chatuk; mihma ymma e holitobli tuk vt shilombish puta Iki yokak heno i nutakvt il ai asha cha, pi okchaya he ak osh pim i shahla hinla keyu hō?

10. Yohmi ka yvmmak okvto nitak kanomosi takla hō ilap ai ahni hosh pi kostininchī chatuk mvhlishe: amba yvm̄vto nan isht pim ai achukm̄vt, ilap nan ai vhpiesa kak o il ibai isha he ak atok oke.

11. Yohmi ka himonasi ka isht a kostininchī hokvno isht ai yukpa he ik ahobo, amba nukhaklochi; yohmi ak inli kia ymma isht ai yvmohmi vhleha hokvno i himmak o nan isht ai vhpiesa nan vni achukma ka i wayvchi hoke.

12. Yohmi hoka hvch ibbak vt aka pit takali ka ho wakeli, micha hvch iyikalaha ik hlampko ka apissvlechit ho hilechi;

13. Micha hvch iyi ya hina apissa hō hvsh im ikbashke, keyukma hanali okpulo yvto tahlofa hinla hoke; amba yvm̄vto ik yohmo hosh hlakofi kak o ahni fehna hetuk oke.

14. Achunanchit hatak puta ka it i nanaiyvt, nan ai ashvchi iksho ya hvsh ieshashke, yvm̄vt iksho ka hatak nana kia Chitokaka ya pisa he keyu hoke.

15. Nana ka ahah! hvsh ai ahnashke, keyukma hatak kanima kv̄t Chihowa yvt isht i kana ya i hlakofi yoba ná; mikm̄vt na homi okpulo hakshish kia offot kohcha cha, hvchi ataklvmmi na lawa kv̄t isht ai okpula hinla hoke.

16. Anonti hatak hauī, micha vbanumpa ik ahobalo ka-

nima kvt, Esau yokvt ilhpak himonna vpa yokak o vttahpi nana kvt ilap ai immi hatuk vt kanchi tok a, 'chohma hinla kvt anta yoba ká.

17. Yohmi ka kaniohmit i himmak okvno nana isht ai yukpa he anumpa tok a isha he ai ahni kia, vlhpesa ik im ahno tok a hvsh ithana; yohmi ka im anukfila ha inlvcha he yvmmak o achunanchit nishkin okchi mihinti hosh asi-hihla ak inli kia, ik ahayucho ki tok.

18. Yohmi ka nvnihi yvmma potola hinla, micha luak isht luhuwa, hoshonti lusa, micha okhlilika, micha apeli chinto aiena ho hvsh ona keyu,

19. Yohmi kvt isht-pufa yvt ohonla, micha anumpa vlhpisa puta isht anumpohonli ma, yvmma okla hvt haiyaklo mvt, anumpa yvmmvt himmakma ilap a isht ik im anum-po ka chi ka asilhha tok:

20. Yohmi kvt nana im anuhumpa kvt kaniohmit vlhpesa ahnit okla haponakla he keyu hatok; yohmi ka nan vlhpoba yak oh kia nvnihi ha haleli hokmvt, yvmmvt tvli isht bovt illa hi atok, keyukmvt iti falaia tvli halupa achaka yo isht bahvt hlopulla hi atok:

21. Michi na pisa yvmmvt isht a nukshopa fehna he vlhpiesa hatuk o, Moses vt, Sa nukshopa fehna hosh sa vvnihinchishke, achi tok:

22. Amba hvchishro yvto nvnihi Saion, micha Chihowa okchaya in tmaha chinto, Chelusalem vba talaia, micha enchil vhleha, a holhtina iksho kamohmi, itahoba chinto ai asha,

23. Michi vttahpi im iksa hohchifo hvt vba a holitopa yak o a holihiso, micha Chihowa moyuma ka nan im apesa, micha hatak vlhpiesa puta imi shilombish vt ai ahli toba tok,

24. Michi Chisvs nan it im vlhpisa himona ya ai-ahlich, michi issish nan isht o fimmi, yvmmak osh Ebel vt a yvmohmi tok a nana achukma i shahli ho isht anumpuli aiena ho hvsh ona hoke.

25. Ahah! ahnit yvmmvt anumpuli ka hvch ik i haponaklo ki ná. - Yohmi ka yakni paknaka ai anumpuli ka ik i

haponaklo mvt hlakofi tok keyu ka, yummvt vba a holitopa yak o auet anumpohonli ho il i filvmmi hokak heto, pi hlakofa he keyu fehna hoke :

26. Yummak o im anumpa hosh nitak yummak ash yak-ni ya winalihinchí tok ; amba himonasi kvno yummvt nana anoli kvť, Anonti himonna ha yo yakni ak bano keyu, amba vba yakni yak kia winalihinchí li mak inli, achishke.

27. Mikma, Anonti himonna ha yo achi, anumpa ilvppvt nana puta kvť winakahancha hinla kvťo, toba hatuk osh, ont akshot taha chí ho isht otvni na nana puta kvť winakahancha he keyu kak osh asha moma chí hatok.

28. Yvmohmi ka apehlichika yummvt aksha he keyu mak o il ishi hokvt, Chihowa yvt isht i kana yoka il ieshi pulla hosh, holitoblit i nukshopa ai ahli ai vlhpiesa hosh Chihowa yoka nan isht il im ahantashke.

29. Pin Chihowa yokvt luak nan okpvnit kahanchi yoka.

### CHAPTA XIII.

Nana ka a yvmihcha he vlhpisa kaniohmi ka anoli, 1 : 7 im vbanumpa isht anumpuli vlheha ha holitobla he i miha : 9 nan ithvnanchi inla hokvno ik i haponaklo he, 16 vbanumpa hvť holitopa, hi ahnit nan isht apelvchi : 17 nan vlhpisa ya im antia he aiena ka i miha : mihmvt isht aiypichi kvť vba isht anumpuli.

1. ITIBAPISHI it i hullo kvť mahaya pullashke.

2. Hatak ik ithano ya i kanvt apelvcha he tuk vt ik hvchimi hakso kashke ; yvmma ai yvmohmi kak osh kaniohmi kvť ik ithano kia, enchil a aboha ya ik chukowá im ahni cha apelvchi tok oka.

3. Talakchi puta ka ibai achvfa ho chiyuhmit, micha na palvmmi isht ilbvsha yvmma puta ka hvsh ithaiyanashke ; hvchishno yak kia hvchi haknip vt hvchi shilombish ai itifo-ka moma hokvt.

4. Nan itauwaya yokvt hatak moma ka isht im ai vlhpiesa, micha topa yvt okpulo keyu kvť isht a holitopa hoke ; amba itauwaya yvt ik it im ai ahlo puta, micha hauí puta aiena kvno Chihowa hvť nan im apesa hi oke.



5. Nana hvsh it i kakiohmi kv̄t nana it im anushkunna kv̄t ik hvchim iksho kashke; micha nana kaniohmi hosh hvchim aśha hokmv̄t isht hvchim v̄lhpiesashke; yvm̄mv̄t, Chissv̄t ia la himma keyu, micha hvchi kanchi la himma keyu, ahanchi tok oka.

6. Yvmohmi hoka Chitokaka yak osh na si apela yoke, micha hatak vt nana hō sa kanimihcha hinla hokvno i sa nvkshopa he keyu, pi nukwaya iksho hosh il acha he bano hoke.

7. Hvchi pehlichī yvm̄mak oka hvsh itaiyanashke; yvm̄mak osh Chihowa im anumpa hoka isht hvchim anumpohonli tok; yvm̄mv̄t na yimmi tok ak o hvsh hobachi cha, nana a kaniohmi tuk ash ai v̄hli ka hvsh anukfihinlashke.

8. Chisvs Klaist okv̄t pilashash kaniohmi tuk vt, himak nitak a mih ash inli, micha peh bilia yoke.

9. Nan isht v̄lv̄chi ilapissa, micha ilaiyuka ka isht hvchi filemoa ná; Chihowa hv̄t isht i kana hak o chukvsh vt isht ai āhli ka nana achukma hoke: nan ilhpak ak keyu, yvm̄mak okv̄to yv̄mma isht ai ahanta kia nana im achukmali tok keyu hoke.

10. Pishno v̄to alta yv̄t p̄i hikia; yvmohmi ka v̄lhtipo chash o nan isht ai ahanta yvm̄mak okv̄to ai impa im ai v̄lhpesa keyu hoke,

11. Yvmohmi ka anonti nan v̄lh̄poba yvm̄mak o issish o isht nan ai ashv̄chika ak pulla kak o na holitompa isht v̄tta chinto yv̄t a holitopa ya ishit chukowa hō, nipi ash ot abinanchi ka misha yō a hulukmi beka tok.

12. Yvmohmi ka Chisvs ak kia ilap im issish ak o okla isht kashofa ch̄i kak osh, holihta isht v̄lhkv̄ma misha yō ai ilbvshv̄t illi tok.

13. Yohmi hoka ilap vt nan isht hofahya tok chiyuhmi hō ieshi hosh, abinanchi yak o kiloh ia cha kiloh im oná.

14. Ilv̄ppak okv̄no tv̄maha chito talaia bilia hi vt ik pim iksho, amba himmak v̄la he achv̄fa kak o e hoyo hokv̄t.

15. Yohmi ka yvm̄mak atuk pulla kak o Chihowa isht a holitopa he pitiv̄lbi isht a waya ka yvm̄mak o pit il im ih̄isv̄t bilia cha, ilap hohchifo h̄a yak oke ai ahnit, il aiokpahanchashke.

16. Micha nana achukma isht ahanta cha, vbanumpa nan isht apelvcha he aiena tuk vt hvchimi haksi ná: nana isht it i hullo yvmma chohmi kak o Chihowa yokvt isht im vlpesa fehna hoke.

17. Hvchi pehliechi ka holitoblit hvsh im antia pullashke; hvchimi shilombish isht im anukfihinla kvrt, nana il anohonli pulla chi ho chiyuhmit, na yukpa hosh yvmohmi hokbano, nan isht a nukhaklo keyu, yvmmak okma nan isht a hvchi yukpa he keyu hoka.

18. Anumpa ilbvsha isht hvsh pi anumpohonlashke; yohmi kvrt nan okluha ka ai isht il akostininchi achukma ho il ieszit ai vlpiesa kak bano hosh il ahanta he il ai ahnishke.

19. Yohmi kia ilvppak o yohmik bano hvchim ahni li i shahli hokvto, chekosi a holhtofa cha, falamvt hvchim ona li hok bano, ai ahni lishke.

20. Yohmi na nan it i nanaiyvchi Chihowa yvmmak osh nan it im vlpisa bilia issish ak atuk pulla kak o Chukfvlhpoba apesvchi chinto, pin Chitokaka Chisvs okvt illi tuk a falaminchit tanichi tok okvt,

21. Ilap nan ai ahni ka hvsh yvmihcha chi ka nan toksvli achukma puta ka hvchi anukfohkihinchit isht hvchim ai ahlichy ho, ilap nan isht im vlpiesa fehna ka Chisvs Klaist ak atuk pulla kak o hvsh yvmihinchashke; yvmmak pulla kak o isht a holitopa yokvt immi bilivt peh biliashke. Amen.

22. Mikvvt itibapishi li vhleha ha nan isht atohnochi anumpa achukma ka vlpesa ahnit hvsh aiokpvchi hokbano hvchim ai ahni lishke: anumpa kanomosi hvchi holissochi li tuk okvt.

23. Yohmi ka il itibapishi Timohli vt ik ia im ahni na ia tuk oka hvsh ithanashke; yvmmvt chekosikma vla hokma, awant ont hvchi pisa la chi oke.

24. Hvchi pehliechi puta, micha vbanumpuli moyuma ka hvsh aiokpvchashke. Itali okla hv hvchi aiokpvchishke.

25. Isht i kana yokvt hvsh moyuma ka hvchi anukfoyukashke. Amen.

# CHEMIS

I HOLISSO HOKE.

## CHAPTA I.

Na pi palvmmi kvt nan isht il aiyukpa he tuk, 1 ; 3 mikmvt nan isht il ahopoyuksa Chihowa ya il im asilhha he tuk ; 13 nan isht a pi palvmmi kvt na pim ashvchika yvt Chihowa yak o a mintishke, il acha he keyu ; 22 vbanumpa ha im antia yo hvpia hashke. 27 Vbanumpa nukfohka ahli kvt nana ha tuk a anoli.

1. CHEMIS, Chihowa, micha Chitokaka Chisvs Klaist in tishu hvt Islael isht atiaka akvshkoa auah tuklo kvt ita fimimpvt kanima moma maya puta ka, pit aiokpvchi hoke:

2. Itibapishi li vhleha ma ! nan isht imomaka pisa ilaiyu-ka puta ka hvsh pihisakmvt, na yukpali i shahli nana kak o hvchim itilauashke :

3. Na hvchi yimmi nan isht imomaka pisa yak osh nuk-tanlv t achunanchi ya anukfohkichi hoka hvsh ithaiyanashke.

4. Yohmi kia hvchishno vt hvchi aiahli hvchi vlhtaha ka nan isht ik ai ono kvt ik hvchim iksho ka hi a, nuktanlv t achunanchi yak osh a kaniohmi he tuk vt ont aiahli pul-lashke.

5. Hvsh kanimi kvt isht a hopoyuksa hi vt ik hvchim ik-sho hokmvt, Chihowa hak o, yvmmak osh hatak moma ka ai okpanchit ima, micha nan isht ik mihacho chatuk ak o, im asilhhashke. Yohmikma yvmmak oka ima he bano hoke.

6. Yohmi kia na yimmi hosh nan isht anuktuklo nana kia ikshot asilhhashke ; kvna hosh anuktuklo hokvto, okhuta oka



banvtha h<sub>o</sub> mahli hvt shalit isht ia na poakahanchi kak o, chiyuhmi hoka.

7. Yohmi hokvt hatak yvmmak okvt Chitokaka ya nanasi kia im a habena hi a ik im ahobo kashke.

8. Hatak im anukfila tuklo yvt nana a kaniohmi puta kvt fitikahanchi hoke.

9. Il itibapishi hvt ilbvsha yatuk osh holitopa kvt na yukpashke.

10. Yohmikma nan in laua yatuk osh akanlosit toba kvt na yukpashke: yohmi kvt yvmmak okvt ont iksho kvt haiyukpulo pakanli ak o chiyuhma chi hokvt.

11. Hvshi vt na hushma he lvshpa ka il ai ishit kohcha mak inli hosh haiyukpulo puta ka bvshechikma, pakanli asha tuk vt chilofa na pisa aiokli tuk vt okpulo chatuk; yohmi ka hatak nan in laua ahanta kak kia yvmmak inli h<sub>o</sub> chiyuhmit nana a kaniohmi yatuk vt ont ai iksho ka hi oke.

12. Hatak nana hosh nan isht imomaka pisa ya pisa cha, ai ahli hlopulli hokvto na yukpvshke; yvmmak okvto ai ahlit hlopulli ha yokvto, ai okchaya iachuka holitompa Chitokaka yvt, k<sub>v</sub>na hosh ilap a holitoblikma, ima hi vt miha tok mak o isha hi okvt.

13. Hatak nana kia nan isht anukpvli pisa hokvt, Chihowa hak osh sa nukpvlechi h<sub>o</sub>, ik acho kashke; Chihowa hvt nan ik vlhpeso ya ishit nukpula he keyu, mikmvt ilap vt hatak nana kia isht nukpvlecha hi o keyu hoka.

14. Amba ilap chukvsh nan ahni yak osh halvllit ishit mahayvt yukachi hok mak o, hatak moma kvt nukpvli hoke.

15. Yohmi tuk mak o chukvsh nan ahni ash osh chakali mvt, nan ai ashvchika y<sub>o</sub> cheli hoke; atukma nan ai ashvchika ash osh ont ai vlhtaha hokvto, nan illi h<sub>o</sub> ikbi hoke.

16. Itibapishi li a holitopa vhleha ma! hvch ik yoshubo kashke.

17. Na hvlbina achukma, micha na hvlbina ai ahli puta hokvto vba ak o a minti; yohmi kvt yvmmak okvt inlv<sub>t</sub> takohli, micha ilaiyuka kia ik im iksho, nan tohwikeli puta iki ak o a minti hosh aka vla hoke.

18. Immi ha hi osh ikbi tok puta nan i wayahpi e chiyuhma hi o, ilap ahni hosh anumpa ai ahli yo ishit tobahanchi tok.

19. Yohmi hoka itibapishi li a holitopa vhleha ma! hatak moyuma kv̄t tushpa hosh haponaklokmt̄, sv̄laha hosh anumpuli cha, nukhobela mvt sv̄lahashke :

20. Hatak nukhobela im anukfila hv̄t Chihowa holitobla hi a nukfokkichi chatuk keyu hoke.

21. Yohmi hoka na liteha okpulo puta, micha nan ik ai vlhpeso ilaiyuka puta ma mominchit naksika hv̄sh bohli cha, anukfila yohbi hosh anumpa hollokechi, yvm̄mak osh hv̄chim i shilombish puta okchalineha hi vt im vlhpiesa ka hv̄sh ih̄shashke.

22. Yohmi kv̄t anumpa ha haklo illvt hv̄chishno inli isht hv̄chik ile yoshublo kish, amba holitoblit im antia yo hv̄chia hashke.

23. Kv̄na hosh anumpa ha haponaklo kia, holitoblit im antia keyu hokmt̄, yvm̄mt hatak osh a pisa ya ilap nashuka ak inli ka ai il a pisa ka chohmi hoka.

24. Yvm̄mak ash ot ilap inli ka ile pisa cha, kanima iakmt̄, mih mak inli ho hatak kaniohmi atuk ash osh imi haksi chatuk oka.

25. Amba kv̄na hosh a yuka keyu nan vlhpisa ahli ka pihs̄vt achunanchi hokv̄to, yvm̄mt anumpa ha peh haklot imi haksi keyu hatuk osh, amba holitoblit na toks̄vli isht ahanta hokv̄to, hatak mihi yosh yakohmit ahanta kv̄t nan isht ilai yukpa hi oke.

26. Hatak nana hosh hv̄chi takla anta kv̄t vbanumpuli yo ahoba kia, ilap isunlush a ik apesacho hosh, amba ilap chukv̄sh ash inli ka haksiehit ahanta hokv̄to, hatak ilv̄ppvt vbanumpa yimmi kv̄t im ahli keyu hoke.

27. Na yimmi ahli, litcha ikshot, Iki Chihowa itikba takali kv̄t, vlla vlhtakla vhleha, micha ohoyo i hatak illi puta aiena ka nana kv̄t im a palv̄mmit aiasha ka, i now̄vt aya, mikmt̄ yakni a isht ik ile litehacho aiena ilv̄ppak oke.

## CHAPTER II.

Ubanvmpuli vt nan in laua ya holitobli cha, anonti itibapishi ilbvsha ya kanimanchi ka vlhpesa keyu, 1; 13 amba i hullot it i nukhakla he tuk; 17 na yimmi kv̄t isht ai vni kv̄t ik im iksho hokvto illi yoke; 21 Eblaham na yimmi kv̄t yv̄mma chohmi tok keyu.

1. ITIBAPISHI li vhleha ma! pin Chitokaka Chisvs Klaist Chitokaka holitopa ya hvsh i yimmi kv̄t, hatak oka iti shahsholechit isht holitoblit hvch ik ahanto kashke.

2. Hatak vt na fohka hochukma ho fohka cha, tvli holisso lakna ibbak ushi abeha abehkv̄chi hosh, hvchim ai itvnaha ya vla ma; anonti hatak ilbvsha mv̄t nafohka hlipa ya fohka hosh vla;

3. Yohmi hokma nafohka hochukma ho fohka kak ash o hvsh holitobli cha, yv̄mmak ash o, Aiasha achukma ilvppak o binili, hvsh im achi: mikmv̄t ilbvsha ash o, Yv̄mmak o ish hikiashke; keyukmv̄t ai asha li nutaka ilvppak o ant ish ashashke, hvsh im achi;

4. Yohmi kv̄t yv̄mmv̄t hvchishno inli hvsh il iti shahsholechi, micha anukfila ai vlhpesa keyu nan isht im anukfilli yo hvsh toba ho keyu?

5. Itibapishi li a holitopa vhleha ma! hvsh haponaklashke; yakni pakna ilvppa ilbvshvt aiasha kv̄t ai yimmi ka yo nan isht ai in laua chi, micha kv̄na hosh ilap a holitobli tuk ma, vba apehlichika yo ima hi vt miha tok mak o immi ha chi ka, Chihowa hv̄t atokolichi tok keyu?

6. Amba hvchishno yokvto ilbvsha ya hvsh kaniman-chishke. Hatak nan in laua vhleha hv̄t hvchishno a hvch ilbvshachit, nan ai apesa kia hallv̄lit hvch isht ohona chatuk keyu?

7. Na hohchifo holitopa yv̄mmak o isht a hvchi hohchifo hatuk ash ik ahobalot okla nanumahanchi keyu?

8. Uba nan vlhpisa i noshkoboka, Holisso. Holitopa vt, Chin chuka panta hatak a ish i hullo kv̄t chishno inli kak o ish itilauechashke, achi kak o, hvsh ai ahlichhi hokmv̄t, vlhpesa ho hvchi yv̄mohmi hoke:



9. Amba hatak puta ka iti shahsholechi hosh hvsh ah-ninchi hok mvto, hvsh ashvchi; yohmikmvt nan vlhpisa kobvffi mak o nan vlhpisa yash ot isht a hvchi atokowa hoke.

10. Kvna hosh nan vlhpisa ya mominchit ai ahlich i hosh, anonti achvfona ka kobvffi hokvt, mominchit kobvffi mak oke.

11. Hvsh iti lumaka ná, achi mvt, anonti kvna kia ish bi ná, achi ak inli tok oka. Yohmi ka hvch ik iti lumako hoh kia, hatak a ish bi hokmvt, nan vlhpisa kobvffi o ish toba hoke.

12. Hvsh anumpuli, micha nana hvsh a kaniohmi puta kv, a yuka keyu nan vlhpisa ho kvna hosh nan isht im vlhpisa hi vt kaniohma he vlhpiesa ka, hvsh chiyuhmashke.

13. Kvna hosh inla ya ik i nukhaklo ke tuk okvto, ilap mvt i nukhaklo iksho ho nan im vlhpisvt na palvmmi pisa he; mikma nan i nukhaklo yokvto nan im vlhpisvt im a palvmmi a ik i nukshopo hoke.

14. Itibapishi li vhleha ma! hatak vt ai yimmika yvt anukfoka miha kia, na toksvli kv ik im iksho hokvto, yvm-mvt nanta ho isht im ai achukma hinla ho? Ai yimmika illa kvt yvmma okchalinya hinla ho?

15. Iksa ibafohka itibapishi, in tek kanima hosh nipi bano cha, nitak yvmma nana vpa he kia ik im iksho;

16. Yohmikma hvsh achvfona kv yvmmak ash o haknip a nan isht apelvcha he ai vlhpesa ka hvsh ima keyu nana kia, Hvchi libishvt, hvchi kaiya hosh na yukvrt hvsh itno-washke, hvsh im achi ka, nanta ho isht ai achukma hinla cho?

17. Yohmi ka ai yimmika yak kia yvmmak inli ho chohmit, na toksvli hv ik im iksho ho, yvmmak illa hokmvt, illi hoke.

18. Ahli, kvna kia, Chishno vto ai yimmika yosh chi nukfoka ma, anonti vno vto na toksvli ak o isht ahanta lishke; nana ka isht ish ahanta keyu hosh nan isht a chi yimmi ha is svn otvninghikma, anonti vno vto nana ka isht ahanta li hosh nan isht a sai yimmi kv chim otvninghi lashke.

19. Chihowa hvt achvfa ka hvchi yimmi kv̄t, vlhpiesa hō hvchi yvmohmishke : nan isht ahullo okpulo vhleha ak kia yimmi cha, wvnihinchi hoke.

20. Yohmi kia ai yimmika yokv̄t, na toksvli hvt ik im iksho yokv̄to, illi mak atuk a, hatak ik hopoyukso chia hvt akostininchi ka ish ahni cho ?

21. Pin tikba Eblaham vt ilap ushi Aisaak a alta pakna vba isht ai okpv̄chit isht ahanta kak osh isht ai vlhpiesa tok keyu ?

22. Yvmmak okv̄t nan ishi ahanta ka ai yimmika yokv̄t kaniohmit ibai isht ahanta tok, micha nan isht ahanta pulla hō ai yimmika yv̄t isht ai ahlit kv̄nia tok a ish akostininchi cho ?

23. Micha Eblaham vt Chihowa hā i yimmi tok ; mihmvt yvmmv̄t nan ai vlhpiesa hā isht im vlhpisa tok, achi Holisso Holitopa vt ont ai ahli tok ; mihma yvmmak ash osh Chihowa i kana isht hohchifo tok.

24. Yohmi hoka na yimmi illa kak keyu, amba nana ka isht ahanta kak o pulla hosh hatak vt kaniohmit isht ai vlhpiesa ka hvsh akostininchishke.

25. Yohmi ka yvmmak inli chohmi hosh ohoyo haui Lehab vt nan isht ahanta ilv̄ppa pulla hosh okla yakni pisv̄t aya tuk a pēhlichit ishi tuk osh, hina inla hā pit tihleli hosh isht ai vlhpiesa tok keyu ?

26. Hatak haknip vt, shilombish vt iksho hokv̄no, illi yō chatuk a, na yimmi hak kia nan isht ahanta kv̄t ik im iksho hokv̄to, illi ak inli hoke.

### CHAPTER III.

Ai o walampli hosh inla ya na kil i miho ka he tok, 1 ; 5 pisunlv̄sh a il im alv̄mmashke, haknip a ai achvfa kitinosi kia, nan achukma hokmā, ik vlhp̄eso chinto hokmā, nana ka yvmihcha he bano ; 13 na hopoyuksa ahli hokv̄to im anukfila yohbit nanaiya, nukhobela kv̄t ik im iksho chatuk.

1. ITIBAPISHI li vhleha ma ! nan isht vlhpisa chinto i shahli mak osh pi onvtula hinla ka hvsh ithana kv̄t, nan ithananachi a lauv̄t hvch ik tobo kashke.

2. E moma kv̄t nana ka il ai ibetv̄bli kv̄t laua hoke. Hatak nana hosh anumpa h̄a isht ik ibetv̄blo hokmv̄t, mihi yosh hatak ai aḥli, micha haknip a mominchit apesahancha hinla hoke.

3. Yakeh! pim antia ch̄i ka issuba itih h̄a kapali a e fohki chatuk; micha haknip a mominchit e fullolichi hoke.

4. Yakeh! anonti peni hochito, yumm̄v̄t na hochito fehna h̄o mahli kv̄llo hosh shalit isht ihiya kia, apesv̄chi mak osh kanima h̄o ia hi a ahnikma, isht afana yv̄t iskv̄tinosi kia fullolichi chatuk oke.

5. Yummak inl̄i h̄o chohmit isunlv̄sh vt nana iskv̄tinosi ak inli kia, nan aiaka mak o ai isht il atambli chatuk: mikma yakeh! lvak vt iskv̄tinosi kia iti laua chinto luachi chatuk.

6. Yohmi ka isunlv̄sh vt luak, micha ai ashv̄chi yakni mak oke: yohmi hosh isunlv̄sh vt pi haknip a ibai achv̄fa hatuk osh haknip a mominchit okpahani; micha yumm̄v̄t ai okpuloka luak mak o isht libbi hatuk osh, hatak isht ai unchululi puta ka libbichi chatuk oke.

7. Nampoia ilaiyuka, micha hushi, micha nana hosh aka a ita balv̄lli, mikmv̄t okhv̄ta anuka ai asha puta kv̄to kostini chatuk: hatak isht ai unchululi puta kv̄t yummak okv̄no kostinichi chatuk oke:

8. Amba isunlv̄sh ak okv̄no hatak naha hosh kostinicha hi o keyu; yummak okv̄t nan ik v̄lhpeso, kostina hi o keyu, hatak isht illi banot alotowa hoke.

9. Yummak o Iki Chihowa h̄a isht il ai okpahanchikmv̄t; anonti yumm̄v̄t Chihowa h̄a holba hosh toba tok hatak puta kash yummak ash inli h̄o anumpa okpv̄lo isht e mihachishke.

10. Itakha mih achv̄fa holitoblit isht ai okpv̄chi, mikmv̄t anumpa okpulo isht mihachi aiena hosh akohonchv̄shke. Itibapishi li vhleha ma! ilv̄ppa puta kv̄t yakohma he tuk o keyushke.

11. Kv̄li hv̄t akocha achv̄fa ka oka champuli, takba aiena h̄o akohonchi chatuk o?

12. Itibapishi li vhleha ma! fik vpi vt alif vni yo vna hinla h̄o? keyukmv̄t pak-vpi vt fik o vna hinla cho? ym-



mak inli chiyuhmit kvli nanta hak osh hvpi oka, micha oka kashaha aiena ka kohonchi chatuk keyushke.

13. Kvta hak osh hatak hopoyuksa, micha nan ithana anukfohka achvkma kvv hvchi takla ahanta cho? mih mak osh hopoyuksa chukvsh yohbi hosh nana kvv ai vlhpiesa ho yvmohmi kvv na toksvli ha isht otvnihashke.

14. Amba it i potvno homi, micha itachowa aiena hosh hvchi chukvsh a foka hokmvno, isht hvch ik ilauato, mikmvt nan ahli ka hvch ik a holabo kashke.

15. Na hopoyuksa ilvppak okvto vba ak o a minti keyu, amba yakni, hatak, micha nan isht ahullo okpulo aiena kak o immi hoke.

16. Kanima yo it i potvno, micha itachowa aiena kvv ashakma, ai itasheha, mikmvt nana a kaniohmi ik vlhpeso moma aiena kvv yvmmak oka a takali hoke.

17. Amba na hopoyuksa vba ak o a minti hatuk osh vmona ka hanta achvkma tuk mvt, anonti it i nanaiyachi, yohbi, ilap nan ahni ak bano keyu, nan i nukhaklo, micha nan ai vlhpiesa yohma he aiena kvv alotowa, iti shahsholechi iksho, micha peh il ahobi vt ik im iiksho chatuk oke.

18. Mikma nan ai vlhpiesa vni a nanaiyachi vhleha yvmak osh im anukfila nuktaiyala hosh hohokchi hoke.

#### CHAPTA IV.

Nan ashvchi il-aiyuka ka abah! im ahna he i miha, 1; 13 mihmvt nan okchaya ilvppvt ont ataha kia kil ithano, yohmi hokvt pishno, micha nana ho il, ieshi moma kvv Chihowa hosh nan ai ahni kak a chi ka il im asilhashke.

1. IT in tanampi, micha itibi puta kvv hvchi takla ya takali kvv, katima ko a toba cho? hvchishno hvchi haknip isht ai yukpa he ahni kvv hvchi haknip a a tanahampi kak o a toba ilvppak o keyu?

2. Nana ka hvchi bvna fehna ho kak osh hvch ik esho; hvsh bi mvt, ishi ka hvchi bvna kia, hvsh isha hi o keyushke; itibit it in tanampi aienvt hvsh aiasha kia, hvch ik asilho kak okvt, hvch ik eshoshke.

3. Hvsh asilhha kia, hvch ik esho ; yvmmak oka hvchishno hvchi haknip isht ai yukpa he ahni pulla kak o isht yopomot hvsh tahla chi kvt, ai vlhpiesa keyu ho hvsh asilhha hokvt.

4. Hatak hau, ohoyo haui vhleha hvchia hvt yakni anushkunna hokvto, Chihowa ha in tanampi chatuk a, hvch ik ithano cho ? Yohmi hoka kvna hoh kia yakni a it i kanvt ahanta chi mak okmvt, Chihowa ha in tvnvp oke.

5. Chukvsh pi anukfoka kak osh il it i potvna hi a ahni ka Holisso Holitopa vt achi ka, ik ahlo ho hvchim ahobo cho ?

6. Yohmi kia yvmmak okvto i shahlichit isht i kana ya ima hoke ; yohmi hatuk osh Chihowa hvt ilefehnvchi puta ka i sanalikmvt, amba chukvsh akanlosi yokvno i kanvt ape-lahanchi, achi hoke.

7. Yohmi hoka Chihowa ak o hvsh il im issa cha, hvsh im antiashke. Nan isht a hullo okpulo a hvsh i sanalashke, yohmikma yvmmak okvt hvch i kanulla hinla hoke.

8. Chihowa ai i bilika pit hvsh kanvllashke, yohmikma ilap mvt hvchi bilincha chi hoke. Nan ashvchi vhleha hvchia hvt hvch ibbak a hvsh kashofikma, anonti im anukfilamia tuklo hvchia mvt hvchi chukvsh a hvsh kostininchashke.

9. Il ilbvshachit nukhaklot yaiyvt hvsh ai ashashke ; yukpvt hvsh ai asha tuk a na yaya tobakma, na hvchi yukpa yatuk vt chukush isht nukhaklo yo tobashke.

10. Chitokaka itikba ya a hvsh il akanlosechashke ; yohmikma yvmmak okvt halvllit hvchi wakela chi hoke.

11. Itibapishi li vhleha ma ! hvchishno hvchi bika ya nan it i mihachit hvch ik anumpulo kashke. Kvna hosh itibapishi ha na mihachit anumpuli kvt itibapishi hash o anumpa onochi hokvt, nan vlhpisa ak o nanumachi, micha nan vlhpisa hash o kanimanchi mak oke ; amba nan vlhpisa ya ish kanimanchi hokmvt, nan vlhpisa ya holitobli mak o chia keyu, amba nan vlhpisa kanimanchi mak o chia hoke.

12. Nan vlhpisa ikbi vt yvmmak okvto okchalinchi, micha vbi aiena kvt im ai vlhpesa he bano mak osh achvfa kvt

ashvshke; chishno ak osh kvta chia hatuk osh inla ya anumpa ish onochi cho?

13. Inta! himak nitak, onna ha kanima ka tvmaha yvm-mak o il ona cha, afvmmi achvfa ka yvmmak o ashvvt, nan ita tovt nan isht ahayuchit il ahashwashke, achi hvchia ma!

14. Onna ha nana a kaniohma hi a hvsh ithana keyu kv. Hvchim ilhfopak vt nanta ho? oka shobulli yvmmak okvt chekosi takla hokvno otvni tuk osh kvnia chatuk a, yvm-mak o itilau hoke.

15. Yohmi hoka Chitokaka ak osh yvmma ahni hokma, pi okchaya cha ilvppa, keyukmvt yvmma kanima ka pi yvmohma chi chishke, hvsh acha he tuk oke.

16. Amba himak okvno hvchishno hvsh il atambli kak osh isht hvchi yukpvshke; nan isht ai yukpa yvmma chohmi puta kv vlhpesa keyu bano hoke.

17. Yohmi hatuk o kvna hosh nana ai vlhpesa ka yohma hi vt ithana hosh, yvmmak ash ik yohmo hokvto, mihi yosh ashvchi mak oke.

## CHAPTER V.

Chihowa yvt na palvmmi isht im atobbi yoka, hatak nan in laua nan ashvchi vt i nukshohompashke, 1, 7 Chob atok a nan im ai ithvvt nana kv ik pvlvmmi kia nuktaiyala he tuk; 13 nana kv palvmmi ka anumpa ilbvsha yo anumpohonlikmvt, anonti nana kv isht im achukmakmvt vba taloa isht talohowashke; 16 pishno na kil aiahlo nukhaklot il itim anohonla he tuk, micha vba isht it anumpohonla he tuk, 19 itibapishi nan ashvchi tuk a fvlvminchit nan ai ahli ka a hilechi aina hi a isht anumpuli.

1. INTA! hatak nan in laua hvchia ma! na palvmmi hvch on itula chi kv, nishkin okchi mintit chitoli hosh hvsh yahayashke.

2. Nana laua hvchim ai asha tuk vt toshbit taha ma, hvchi na fohka puta ka shvshi ai vpa bano hoke.

3. Hvchin tvli holisso lakna, micha hvchin tvli holisso hvta aiena kv lakvvt taha: yohmi kv lakna yvmmak atuk vt nan isht hvchi atokola he; mikmvt luak o chiyuhmit



huchi nipi a ahampa chi hoke. Nitak hvchim ishtaiyopik mak a hi a hvchim ilayak a hvsh itahobi tuk oke.

4. Yakeh! toksvli vhleha hvchim osapa puta nana ai vmo tuk isht vltoba he tuk, yvmmak oka hvchishno ak osh nana ik vlpesalot falaminchit hvsh ishi tuk a, pahayvshke: yohmikma nan vmo tuk vhleha paya kvt Sabaolh Chitokaka haksobish a ont chukowa hoke.

5. Nan isht aiyukpa il impa in lauvt, haui toba hosh yakni pakna ya hvsh maya tuk: vlpoba illa chi hokvt ilphihinta chatuk mak o, itilauECHIT hvchi chukvsh a hosh ipihinta tuk oke.

6. Hatak ai vlpiesa yatuk a anumpa onochit hvsh bi tok; yohmi kia yvmmak okvt ik hvchi sanalo kisha hoke.

7. Yohmi hoka itibapishi li vhleha ma! nukchintot hvsh hoyo na Chitokaka yvt vlashke. Yakeh! hatak osapa toksvli vt nan vni hochukma yakni a waya ka anukfillit hohoyo; yohmi kvt yvmma ahni kvt nukchintot falaiachi hosh, vmona micha ont ishtaiyopi aiena ka im on umba chatuk oke.

8. Yohmi ka hvchishno ak kia nukchintot hvchi chukvsh a ai ahlichit hvsh hlampkochashke: Chitokaka vt ai vla he tuk vt atukonofvt taha hoke.

9. Nanasi kia isht hvch ik it i potvno kashke, itibapishi li vhleha ma! yvmmak keyukmvt nana isht hvchim vlpisa hinla hoke. Yakeh! nan apesa yvt okhissa itikba ya hikia hoke.

10. Itibapishi li vhleha ma! hopaii Chitokaka i hohchifo pulla hatuk mak o anumpohonli tok vhleha hvt na palvmmi pisa, micha nukchinto tok puta mak o nan isht ithanvt hvsh hobacha chi kvt hvsh anukfillashke.

11. Yakeh! kvna hosh nuktanltv achunanchi mak o yvmmak okvt na yukpa, il ahni chatuk. Chob vt nuktanltv achunanchi tok okvno hvsh haklo chatuk: yohmi cha Chitokaka nana ai ahni tok ash hvsh akostininchis: yohmi kvt Chitokaka yvt nan i nukhaklo fehna, micha i kana fehna hoka hvsh akostininchishe:

12. Yohmi kia itibapishi li vhleha ma! ik kaniohmi nana kia vba shutik, keyukmvt yakni, keyukmvt anumpa kvlllo

isht ai vlhpisa inla nana kia anumpa kullo ai isht hvch ik il onochi kashke: amba yau, hvsh achikma, ik ai ahli; mikmvt keyu, hvsh achikma, keyu mak ashke: yummak keyukma nan isht hvchim vlhpisa hvrt hvchi on itula hi oke.

13. Kvna kia na palvmmi pisa kvrt hvchi takla ahanta cho? yohmikmvt vba pit anumpohonlashke; kvna kia na yukpa kvrt asha? yohmi hokmvt vba isht taloa mak o isht taloashke.

14. Kvna kia abeka kvrt hvchi takla ahanta cho? yohmi hokmvt ilap ak osh iksa pehlichu vbleha ha hoyashke: yohmikma yummak ash osh vba isht anumpulit, Chitokaka i hohchifo ho nan ahama ya okla ahvmmichashke.

15. Yohmi hokma na yimmi hosh vba isht anumpuli pulla kak osh abeka ya hlakoficha he; mikma Chitokaka yvt yummak ash tanicha hi oke: mikma nana ho ai ashvchi tuk ok mak heno i kashofa he mak oke.

16. Nan hvsh ai ashvchi pvtu ka hvchishno bika yvt hvsh it im anohonlashke; mikmvt hvchi hlakofa chi kvrt, vba isht hvsh it im anumpuli pullashke. Hatak ai vlhpiesa hosh na yimmi hosh vba pit anumpohonli kvrt nana ka ai ahlichu fehna chatuk oke.

17. Elias vt hatak im anukfila im a kaniohma he vt hvpihno ak inli chohmi tok; yohmi hatuk osh ik umbo ka hi a ai ahli fehvt vba pit anumpohonli tok; yohmi ma yakni yvma ik ai umbo ho afvmmi tuchina cha hvshi hannali aiena tok.

18. Yohmi ma anonti yummak ash inli hosh vba pit anumpohonli ma, Chitokaka yvt umbachi na yakni a nana kvrt a wahaya tok.

19. Itibapishi li vbleha ma! hvsh kanima hosh vbanumpa ha i filvmmi hvsh aya na anonti achvvt nukfohkichit falaminchi hokma,

20. Kvna hosh hatak nan ashvchi vt yoshubvt ataya tuk a nukfohkichit falaminchi hokvt, yvmmvt hatak shilombish a ai illi ya a hlakoficha he; mikmvt nan ai ashvchika laua ho ompohoma he aiena hoka ithaiyanashke.



# PITA

## I HOLISSO UMMONA HOKE.

---

### CHAPTER I.

Shilombish nan isht i kana laua pulla kak o Chihowa ya aiokpahanchi, 1; 10 Hopaii vhleha pulla ho Klaist isht im ai okchaya yvt tikbanli anohowa tok a anoli; 13 Chihowa im anumpa ho isht ai vtta hatuk okvt, nan ashvchi ikshot maya chi ka i miha.

1. PITA, Chisvs Klaist im apostel okvt i yakni keyu ai it a fimimpvt Pontvs, Kaleshi Kappatosia, Asia, micha Bihlinia aiena ai asha ka pit ai okpvchi kv,

2. Iki Chihowa hak osh tikbanli ithaiyanvt, okchaya he atokoli tok yvmmak oka Shilombish Holitopa yak osh kashohofi na, nana ka im antia ho Chisvs Klaist im issish isht o fima tok hvchia hoka; Nan isht i kana yvt hvchi anukfoyuka, micha nan isht it i nanaiya yvt hvchin lauashike.

3. Pin Chitokaka Chisvs Klaist Iki, micha in Chihowa hokvt holitopashke, yvmmak osh pi nukhaklo chinto hatuk osh, Chisvs Klaist vt illi tuk kia, falaminchit tanichi kak osh anonti himonvchit pikbi tok o, na yukpa fehna hosh,

4. Ai ahanta okpula himma keyu, micha liteha he keyu, micha aksha he keyu ho e hohoyo ka, hvchimmi hosh vba yakni ya ai vlhtaiyaha hoke;

5. Yvmmak oka na yimmi pulla kak o Chihowa imi hlampko kv ishi na ai okchaya nitak ishtaiyopi otaiyana chi ka ona hoke.

6. Yvmmak oka nan isht a hvchi yukpa fehna; yohmi kia yakosi itintakla ka ai yvmohma he vlhpesa ho isht



imomaka pisa ilaiyuka hvsh pihisa kak osh isht a hvchi nukhaklo hoke:

7. Yohmi kia na hvchi yimmi ka isht imomaka pihisa kak osh holitopa kvt, tvli holisso lakna okpulo chatuk, yvmmak oka luak isht imomaka pisa chatuk ak kia i shahli fehna hokvt, Chisvs Klaist vt haiakakma, isht a holitopa, micha annoa chinto aiena kvt isht a hvchi otaiyani hokbano;

8. Yvmmak oka hvch ik peso kia, hvsh i hullo; yvmmak ash himonasi ka hvsh pisa keyu ak inli kia, hvch i yimmi hosh, nan isht ilaiyukpa annoa he keyu, micha isht a holitopa alotowa aiena ka isht a hvchi yukpa:

9. Na hvchi yimmi isht vlhtoba ka hvsh ihishi kvt, hvchi shilombish isht ai okchaya yak fehna hoke.

10. Ai okchaya yvmmak o-hopaii vhleha hvt a ponahaklo, micha achunanchit hohoyo tok, isht i kana yosh hvchim vla hi oka yvmmv t tikbanli anohonli kvt;

11. Nitak katiohmi, micha nitak nanta, Chisvs imi Shilombish vt yvmmak ash anukfoyuka hatuk vt Chisvs vt isht ai ilbvsha he puta, micha yvmohmi hosh isht a holitopa he aiena ka tikbanli atokolit anoli tok a, ai ahnit hohoyo tok.

12. Yvmmak ash o im otaiyani kvt, ilap ak atuk ak o yohmi keyu; amba pishno ak atuk mak o nana ka otvni-hinchi tok yvmmak ash himonasi ka vbanumpa ha Shilombish Holitopa vba yakni mihinti hosh awant aya ho, isht hvchim anumpohonli kash osh hvchim anohonli tok; nana yvma puta kash enchil vhleha hokvt akostininchi bahana fehna hoke.

13. Yvmohmi hoka hvchi chukvsh a okchvlt aiksiachi cha, ahah! ahnit, Chisvs Klaist vt ant haiakakma, isht i kana yosh hvchim vla hi okvt ai ahli bano hosh hvsh hohoyashke.

14. Yohmi kvt vlla nan im antia yo hvsh chiyuhmit, tikba hokvno nana hvch ik ithano hosh chukvsh nan ahni kak o hvsh yvmohmi beka tok vt, hvch ik ile hobacho kashke:

15. Amba hvsh im antia chi hvchi hōwa tok, yummvt nan ai ashvchika ik im iksho hoka, nan ai ashvchika ik hvch im iksho ak inlashke :

16. Ūno vt nan ai ashvchika ik svm iksho hoka, nan ai ashvchika ik hvch im iksho kashke ; achi hosh holihiso hoka ;

17. Yohmi ka Iki ak o hvsh im asithha hokmvt, yvm-mak okvt hatak it i shahshohlechi iksho hosh hatak puta kvt ilap a kaniohmi tuk ak o isht im apesa yoka, ilvppa hvsh ai ahanta takla kvt hvsh holitoblashke :

18. Yohmi kvt hvch iki vhleha hak o hvsh im ai ithvna tok nana hvsh a kaniohmi ik achukmo yoka a hvchi filvm-michi kvt nana okpula he tvli hvta, micha tvli holisso lakna chiyuhmi hō isht hvchi vlhtoba tok keyu kvt hvsh ithanushke ;

19. Amba Klaist im issish holitopa Chukfulhpobushi ai okpuloka iksho, micha liteha iksho yak a tok ;

20. Yvmmak osh yakni intolahpi vt ik tobo pilla kash o tikbanli vlhtoka tok osh, hvchishno yak atuk pulla kak o himak ont ishtaiyopi ilvppa otaiyani tok oke ;

21. Hvchishno yvt yvmmak atuk pulla kak o Chihowa ha hvch i yimmi pulla kvt, yvmmak osh illi tuk a falamin-chit tanichi cha, isht a holitopa ka ima tok oka ; ai okchaya ya Chihowa yak o im ai ishi la he ai ahnit, hvch i yim-mashke.

22. Yvmohmi ka Shilombish ak osh hvchi anukfoyuka hō vbanumpa ai ahli ka hvsh im antia hosh, hvchi shilombish a hvsh kashofi hatuk osh, itibapishi vhleha hoka ilahobi keyu hosh isht i shahlichei fehna hosh hvsh it i hullashke ;

23. Chihowa im anumpa, yummvt mahayvt bilia yak atuk pulla kak o na nihi okpula he keyu yō atuklant isht hvsh a toba hoke.

24. Yohmi ka haknip puta kvt haiyukpulo yak o chiyuhmi, micha hatak isht a holitopa moma kvt haiyukpulo pakanli yak o chiyuhmi hoke. Haiyukpulo yash ot bvshikma, pakanli yash ot liwelit taha hoke.

25. Amba Chihowa im anumpa hokvto mahayvt bilia hoke. Yohmi ka anumpa ilvppak o vbanumpa hvt isht a hvchim anuhumpa hatuk oke.

## CHAPTER II.

Nan ik vhlpeso isht im anukfila puta ka naksika bohla chi ka i miha, 1; 5 Klaist akosh tikba intola yo okla ai itabana hatuk a anoli; 11 haknip imma nan isht im anukfila yokvno kano pit kancha chi ka achi; 13 yakni pakna nan apesa maya ka im antia he; 18 yvka hvt kaniohmit i nahollo ya im antia hi a ithvnachi.

1. YUMOHMI hoka isht i nukkilli, na haksichi, nan ilahobi, na potvno, anumpa chukushpuli puta a moyuma ka mokofit naksika hvsh boyuhli cha;

2. Ullosi himona vtta chiyuhmit, yvmmak o isht a hvchi hofahantit ai okchaya ya hvsh ona chi mak osh, vbanumpa pishukchi ai ahli kak o bvna fehnvt hvsh hohoyashke.

3. Chitokaka yvt hvchi kana achukma fehna ho hvsh akostininchi ai ahli hatuk okmvt;

4. Yvmmak okvt tvli okchaya chiyuhmi ho hvsh im ohona ka, hatak okvto ik ahnincho fehna tok kia, Chihowa hokvto holitobli fehnvt atokoli tok;

5. Hvchishno ak kia tvli okchaya chiyuhmit, shilombish chuka hvsh toba hosh, na holitopa isht vlla holitopa yosh Chisvs Klaist ak atuk pulla kak o, Chihowa hokvt im vhlpiesa ho, chukvsh isht aiokpvchi puta ka pit hvsh im ihisa hi a tok.

6. Yvmohmi hoka anonti Holisso Holitopa ya a foyuka kv, Yakeh! chukbi in tola tvli vlhtoka, holitopa fehna ho Saion a a bohli lishke: yohmi ka kvna hosh yvmmak oka i yimmi hokvt hofahya he keyu hoke, achi tok.

7. Yohmi hoka yvma i yimmi hvchia hokvno hvchi holitopa fehna; amba ik im antio yokvno, chuka ikbi vhleha yash ot tvli ya ik ahnincho ki tok, yvmmak ash inli hosh chukbi in tola noshkoboka yo toba hoke.

8. Micha ik im antio yo vbanumpa isht ai ibetvbli yvmak fehna kak osh isht ai ibetvbla he tvli, micha isht ai



okpula he tvli chito aiena ho, yummak o ai yvmohma he im vlhpihisa tok.

9. Amba isht atiaka vlhtoka, miko i na holitompa isht utta; oklushi holitopa, Chihowa immi ai ahli fehna hvchia hoke: yohmi ka yummak osh hvchi howwt ai okhlilika ya a kohchit im atohwikeli chinto ka hvchi foyuki tuk o, ilap isht aiokpahancha he a puta ka otvnochit hvsh anghonla he a tok:

10. Yohmi kvv nitak tikba hokvno Chihowa im okla hvchia ha tok keyu kia, himak ano Chihowa im okla hvchia hoke; isht i kana ya hvch ik esho ki tok kia, himak ano isht i nukhaklo ka hvsh ishi tuk oke.

11. A holitopa vhleha ma! nana hvchim ai ahni li kvv hatak ik ithano, micha ilap i yakni keyu ai itvnowa chiyuhmit, haknip imma nan ahni, yummvt shilombish in tanampi yoka hvsh i filahamashke:

12. Nana hvsh a kaniohmi kvv achukma hosh vbanumpa ik ithano okla ha iba takla hvsh ahantashke: yohmi na nana ik achukmo yvmihchi chohmichit hvchi sanalit anum-pohonli kia, nana achukma puta hvsh yimihinchu ka pihisakmvt, Chihowa yvt i nowwt aya nitak oka yumma okla holitoblashke.

13. Chitokaka yak atuk pulla mak o hatak i nan vlhpisa puta ka hvsh im antiashke: miko yok ma moma i shahli yo chohmichit hvsh holitoblashke.

14. Michu nan vlhtoka vhleha nana ik achukmo yvmohmi puta hokvno nan vlhpisa onochikmvt, nana achukma yvmohmi yak okvno aiokpvcha chi ho, miko yvt atokohonli tok a hvsh holitoblashke.

15. Yohmi ka nana kvv ai vlhpiesa ho hvsh yvmohmi hosh hatak im anukfila iksho nan ik ithano itih puta ka hvsh i kamala he yak o, Chihowa hokvt ai ahni hoke:

16. Yuka keyu hvchia kia, hvsh yvmohmi kak osh nan ik vlhpeso ya isht hvsh ompohomo na: amba Chihowa in tishu vhleha mak o hvsh chiyuhmashke.

17. Hatak puta ka hvsh holitoblashke. Hvsh itibapishi

vhleha ha hvsh i hullashke. Chihowa ya i nukshopvt hvsh holitoblashke. Miko yoka hvsh holitoblashke.

18. Yuka hvchia hv isht a holitopa he vlhpesa ho hvchi nahullo yoka isht hvsh im antia kv achukma, micha im anukfila yohbi aiena kak bano keyu, amba hvch i kvlo aiena ka hvsh im antia ak inlashke.

19. Yohmi ka hatak vt chukvsh ak osh Chihowa ya isht im vlhpiesa kak osh isht a nukhaklo ya vlhpiesa ahnit, ai vlhpiesa keyu ho isht ilbahasha hokma, ilvppvt isht i kana hoke.

20. Yohmi ka nana ai vlhpiesa keyu ho hvsh yvmohmi tuk osh vlhpiesa ahnit, isht hvchi bohowa hokmvt, yvmmt nan isht annoa achukma nanta ho? amba nana ai vlhpiesa ho hvsh yvmohmi tuk kia, vlhpiesa ahnit isht hvch ilbahasha hokvno, ilvppak o Chihowa hokvto isht im vlhpiesa hoke.

21. Yohmi ka ilvppak o hvsh yvmohma he osh hvchi vltoka tok; pishno ak atuk pulla mak o Klaist ak kia ilbahasha kv, ilap a nohwa tok a il iakaiya he mak o pim abahanchi hatok oka:

22. Yvmmt nan ashvchi tok keyu, haksichi kia itih ha foyuka tok keyu:

23. Yvmmt ilap a isht ik ahobalot anumpuli mak o, afa-laminchit isht ik ahobalot anumpuli keyu; na palvmmi onochi ma, na palvmmi onocha hé kia miha tok keyu; amba ai vlhpiesa apihisa yak o il im issa tok:

24. Yvmmak osh nan il ai ashvchika ya ilap haknip fehna ak o ilap inlit il onochi hosh iti ya takali tok: yohmi ho nan ai ashvchika puta il im ihinli hosh, nan ai vlhpiesa ya il im okchaya chi ha tok: yvmmt fahama tok ak o isht hvchi hlakofi hoke.

25. Yohmi ka chukvhlhpoba tamoa chiyuhmit hvsh itvnowa tok kia, himonasi kano chukvhlhpoba Apesvchi micha hvchimi shilombish ma Nan im atahli yoka falamvt hvsh im ona hoke.

CHAPTA III.

Hatak vt im ohoyo itatuklo kv̄t nan v̄lhpiesa h̄o itim anukfil̄vt ita-  
pela he im abv̄chi, 1; 8 it ī hullot it ibai achv̄fa he; 14 na palv̄m-  
mi ka isht it ibai il bv̄sha he; 19 Oka falama yvt ik ayo k̄isha ma  
okchayvt aiasha tuk ā Klaist vt nan i kanimihchi tok ā anoli.

1. ANONTI tekchi hv̄chia hv̄t hv̄chi hatak oka hv̄sh im  
antiashke; yohmi na kanima kv̄t v̄banumpa h̄a ik ahnincho  
hokmv̄t, v̄banumpa hash ik haklo kia, tekchi ak osh nana a  
kaniohmi kak o, yvm̄mv̄t v̄lhpesa ahnit isht anukfohka ak  
inli yoba na;

2. Yohmi kv̄t haui imma ai yvmohmi ik hv̄chim iksho,  
micha hv̄sh holitobli aiena ka pih̄isa kak osh yvmohma hinla  
hoke.

3. Yv̄mma isht shema yvt pashi tanv̄ffo, micha tv̄li ho-  
lisso lakna isht shema, micha na fohka fohka aiena paknali  
isht shema yvm̄mak okv̄no keyu:

4. Amba chukv̄sh anukaka a toba hatak luma okpula  
himma keyu, anukfila yohbi, micha nuktanla isht shema yo  
fehna yvm̄mak ashke; ilv̄ppak osh nan ai v̄lli chinto fehna  
Chihowa hv̄t ai ahni hoke.

5. Nitak tikba ma ilv̄ppak o yakohmit ohoyo hochukma  
Chihowa ī yimmi ak inli hosh, isht ile shemahanchi kv̄t, ilap  
ī hatak ā im antia ya tok.

6. Sela ak oh kia Eblaham ā ī shahli hochihifot im antia  
tok: yvm̄mak o ushetik hv̄chia hoke, nana ai v̄lhpiesa ka  
hv̄sh yvmohmi takla, micha isht a nukshopa he kia hv̄ch ik  
ī nukshopo hokmv̄to.

7. Anonti ī hatak hv̄chia hv̄t nana ka ithaiyana hosh ibai  
ahantv̄t, hlampko ik hv̄chi lauwo mak ō chiyuhmichit, isht ī  
kana ai okchaya bilia hv̄sh it ibai isha he mak okv̄t, hv̄chi  
tekchi ā hv̄sh holitoblashke; yohmi h̄o anumpa ilbv̄sha  
hv̄sh anumpohonli kv̄t ik ai ataklamo kashke.

8. Ai ishtaiyopi ka moyumv̄t hv̄chim anukfila hv̄t ai  
achv̄fa cha, it ī nukhaklot, itibapishi vt ī hullo chiyuhmit,  
inla ī kanv̄t chukv̄sh akanlosi mv̄t aienashke.



9. Micha nana ik achukmo hvchi yvmihchikma, nana ik achukmo yo hvch ik falamincho kashke: micha isht ik hvchi ahobalokma, isht ik ahobalo yo hvch ik falamincho kashke; amba ilvppa ik holbo i kanvt hvsh im anumpulashke; ilvppak o hvsh yvmohma hi osh hvchi vlhtoka tok vt hvsh ithana hokvt, yohmi hosh nan isht ai yukpa ya hvsh pisa he vlhpesa yatok.

10. Yohmi ka kvna hosh, Si okchaya cha, nitak hochukma ho pihisa li hokbano ai ahnikmvt, isunlvsh oka nana ik achukmo ka i filvmmminchi cha, itivlbi yoka na haksichi ya isht ik anumpulo kashke.

11. Nan ik achukmo kvno i filvmmi cha, nana achukma kak o yvmihinchashke; it i nanaiya yak o hohoyot, achunanchit iakaiyashke.

12. Yohmi ka Chitokaka nishkin okvt ai vlhpiesa yokvno o wakaya, micha haksobish okvt im anumpa ilbvsha puta ka in tiwa hoka; amba nana ik achukmo yvmihchi puta hokvno Chitokaka nashuka yvt i sanali hoke.

13. Micha nana achukma yvmihchi yak o iakaiya vhleha hvchia hokma, kvta hak osh hvchi hotopala hinla ho?

14. Amba nan ai vlhpiesa yak atuk pulla mak o isht hvsh ilbahasha hokmvt, hvchi yukpa hoke; micha nan isht nukshobli yoka i nukshopvt isht hvch ik komunto kashke;

15. Amba Chitokaka Chihowa yak o i nukshopvt hvchi chukvsh isht hvsh holitoblashke; micha ai okchaya pisa la he ai ahnit hvchi anukfoyuka a kaniohmi ka hvchi ponohaklo puta ka anukfila akanlosit, holitoblit anumpa falama ka hvsh ima chi kv hvch im vlhtaha kak banashke.

16. Isht il akostininchi achukma ho hvsh ieshashke: yvmohmi ho nana ik achukmo yvmihchi chohmichit nana ik achukmo isht hvchi anumpohonli kv, Klaist a anukfoykvt nana achukma hvsh yvmohmi ka, anumpa ahli keyu hvchi onochi tuk vhleha hv isht a hofahyashke.

17. Yohmi ka Chihowa hak osh ik yohmi ai ahni hokma, nana achukma ho yvmohmi cha, isht ilbvsha kak osh achukma kv, nana ik achukmo ho yvmohmit isht ilbvsha ka, i shahli hoke.

18. Yohmi ka Klaist ak kia himonna ma nan ai ashvchika pulla kak o ai vlhpesa yvt ik ai vlhpeso yak o vlhtobvt isht ilbvsha tok; yohmi hosh pi pehliechit Chihowa ya isht pim ona chi ha tok: haknip okvto illi ha tok kia, amba shilombish okvto okchaya tok:

19. Yvmmak ash o shilombish yuka vhleha ai asha ka ivt ont isht im anumpohonli ak inli tok:

20. Yvmmak okvt nitak tikba ma peni yokvt toba itin takla Noah okvt ahanta nitak yvmmak ash fehna kvno, Chihowa hvv i nukhaklot isht i nukkilli onochi svlaha hosh ahanta ma, im antia he keyu ki tok; peni yvmmak ash o kanimosi yvmmvt shilombish untuchina hosh oka ya isht a hlakofi tok.

21. Yvmmak ash o chiyuhmi hosh himonasi ak kia baptismo yvt, yvmmak osh haknip liteha yoka isht kanchi keyu, amba Chihowa itikba isht il akostinichi achukma ai yvmohma he il apihsvt, Chisvs Klaist illi tok kia falamvt tani tok pulla kak o yvmohmi kak osh pi okchalinchii ak inli hoke.

22. Yvmmak okvt vba yakni yoka ona tuk osh, Chihowa im isht im pakimma yak o binili hoke; yvmmak oka enchil, micha miko, micha nan vlhtoka puta kvv i nutvt im antia he ya tok.

CHAPTA IV.

Nana moma kvv ont ai vlla chi kvv olanlosi vla hoka, Klaist iakaiya pullvt nanashvchi issvt ai i filvmmi itanowa he i miha, 1; 12 nan i palvmmi puta ka hopohlvi.

1. YUMOHI ka Klaist vt hvchishno yak atuk pulla kak o haknip a isht ilbahasha tok a, chiyuhmit hvchishno yak kia im anukfila hatok chiyuhmi ka hvsh il ataiyahli mak inlashke: yohmi ka haknip a isht ilbahasha tok vt nan ai ashvchi ya issvt ai i filvmmi ha tok oke:

2. Yohmi kvv yvmmvt haknip vt okchaya ai itin takla kvv hatak haknip imma nan ahni isht ahanta he a tok keyu, amba Chihowa nan ai ahni kak a hi a tok.



3. Yohmi ka pi okchayvt il ahanta tok ash ai vhl<sup>i</sup> itin takla kak kia, haui imma anukfilli, chukvsh nan ahni, oka homi ishkot hoita, isht a haksichit tasimbot atampa, micha na holba nan isht ik ahobo puta ka isht il ahanta kv<sup>t</sup>, vbanumpa ik ithano vhleha nan ai ahni hokvno il a yvmihcha hi ya ona tok oke.

4. Yvmmak oka isht ahanta hosh ilap vt nan ik achukmo puta ka isht afekommit a tasimbo atampa ka hvch ik ibafoko kak o okokko! ahnit, isht im anukfila hosh nan ik achukmo kia isht hvchi anumpohonli hoke.

5. Yvmmak okvt illi, okchaya aiena ka nan im apesa he im vlhtaiyaha yak o ilap nana a kaniohmi tuk vt il im ai anola hi oke.

6. Yohmi ka ilvppak a he mak o illi tok vhleha yvmmak kia vbanumpa hv<sup>t</sup> isht im anuhumpa ak inli tok; yohmi ma hatak haknip imma nan ahni yokvt nana ka im apihisa kia, Shilombish Holitopa yak osh apelahanchi ho Chihowa ya holitobla hi a tok.

7. Amba nan okluha kv<sup>t</sup> ont ai vhl<sup>a</sup> chi kv<sup>t</sup> atukonofvshke; yvmohmi hoka nana ka hvsh ile oktambli cha, ahah! ahnit, anumpa ilbvsha hvsh anumpohonlashke.

8. Mikmvt hvchishno inli hvsh iti hullo ai ahli fehna hosh nan okluha ka hvchim i shahli hosh hvsh ieshashke: yohmi ka it i hullo yak osh nan ai ashvchika lava kia ompohoma hi oke.

9. Ik im vlhpesot anumpuli iksho hosh it i kanvt hvsh it apelvchashke.

10. Hatak puta kv<sup>t</sup> isht i kana hvlbina ishi ha tok mvt, yvmmak ash inli ho isht iti apihinla kv<sup>t</sup>, Chihowa isht i kana ilaiyuka nan im apesvchi achukma yak o chiyuhmashke.

11. Hatak kanima hosh anumpuli hokmvt, Chihowa im anumpa hv<sup>t</sup> avrchi kak o anumpulashke; hatak kanima hosh vbanumpuli ilbvsha ya nan isht im ahanta hokmvt, Chihowa hv<sup>t</sup> kanimihchit hlampkochi kak o isht ahantashke: yohmi na Chihowa hv<sup>t</sup> Chisvs Klaist ak atuk pulla kak o nan okluha ka isht a holitopashke, yvmmak o isht a holitopa, mikot ahantvt bilia yvt immit biliashke. Amen.



12. A holitopa vhleha ma! isht hvchi imomaka pisa chi luak nan isht imomaka pisa imma hokvno, okokko! ai ahnit, nana ilapissa fehna kaniohmi hosh a hvchi yomohmi ka ik hvchim ahobo kashke.

13. Amba Klaist vt ilbvsha puta tok a chiyuhmit hvsh ibai ilbvsha ak inli hokvt, hvchi yukpashke: yohmi kvv ilap isht a holitopa hokvt otaiyanikma, hvchishno yak kia nan isht il ai yukpa chinto ho isht a hvchi yukpa mak a hinla hoke.

14. Klaist hohchifo ak atuk pulla kak o isht ik hvchi ahobalo hokma, hvchi yukpa hoke; yohmi kvv isht a holitopa Shilombish, micha Chihowa imi Shilombish vt hvchi onvtuyula hoke; yvmvto Klaist a isht ik ahobalot isht anumpohonlikma, amba hvchishno yokvto hvsh holitobli hoke.

15. Yohmi kia hvsh kanimi kvv hatak bika vbi, na hukopa, nan ik achukmo yvmihchi, micha hatak inla nan im a kaniohmi ka ataklvmmi aiena hokvno chiyuhmit ik hvch ilbvsho kashke.

16. Amba hatak kanima kvv vbanumpuli yo chiyuhmit ilbahasha hokmvt, ik hofahyo kashke: amba ilvppa yakohmi hokvt Chihowa yak o holitoblashke.

17. Yohmi ka Chihowa im aboha yak o nan vhlpisa yvt ai onvtulvt isht ia chi pulla ka nitak vt vla hoka; yohmi ka pishno ak o tikba ai isht ia hokma, Chihowa im vbanumpa ik im antio vhleha ont im ai vhli kvv katiahma hi o?

18. Mich a vhlpiesa yokvt palvmmi ho okchaya hokma, Chihowa ik holitoblo, micha nan ashvchi aiena kvto katima ko ai otaiyana hi oh cho?

19. Yvmohmi hoka Chihowa nana ai ahni ho im antia kvv ilbahasha vhleha hokvto, nana achukma ho ai yvmohmit nana Ihikbi ai ahli yoka ai ahnit, ilap shilombish a iesha chi ho, im ihisashke.

CHAPTA V.

Chukfvlhpoba ushi a achukmvt vbanumpeshi vta yvt ipihinta chi ka i miha, 1; mihmvt itibapishi himithoa yvt nan im antia he, mikmvt moma kvv il oktamblit yichinut Setan a i sanala he i miha.

1. **ŪBANUMPULI** iksa apesvchi vhleha hvch itin takla aiasha ka nana atohnochli li kv̄t, vno ak kia vbanumpuli iksa ibai apesvchi, micha Klaist vt ilbāhasha tok puta atokowa anoli, micha na holitopa kv̄t otaiyana hi oka ibai isha he ak inli sia hoke.

2. Chihowa in chukfvlhpoba hvch itin takla ai asha ka hvsh ipihinta kv̄t, yohmi la he atuk okvt ik kaniohmi kia ahni keyu, amba yohmi likbano ahnit, ai vlhpiesa keyu isht a hofahya he nan isht ahayuchi bvnna keyu, amba hvchim anukfila hv̄t vlhtaha achukma hosh apesvchit hvsh pehlichashke.

3. Yohmi kv̄t Chihowa immi hoka i shahli chiyuhmit ahanta he keyu, amba chukfvlhpoba ya nan isht im vlv̄chi ya he tuk.

4. Yohmi ka chukfvlhpoba apesvchi Miko yvt ant il otv-ninchikma, isht a holitopa iachuka okpula himma keyu mak o hvsh isha hi oke.

5. Yvmmak i chiyuhmit himita hvchia hv̄t asvnonchi ya hvsh im antiashke; ahli, moyuma kv̄t hvsh it im antia cha, im anukfila akanlosi ho isht hvsh shemashke: yohmi ka Chihowa hokvt ilapunla yano i sanali cha, im anukfila akanlosi yokvno isht i kana ya ima chatuk oka.

6. Yvmohmi hoka Chihowa ibbak hlampko nuta ya hvsh im il akanlosechashke; yohmi na ont ai yvmohma he ai vlhpiesak ma vba hvchi wakeli mak inlashke:

7. Anukfila isht a hvchi komunta puta ka yummak o hvsh onochashke: yohmi ka yvmv̄t hvchi anukfihinli hoka.

8. Ahah! ahnit, hvchi okchashke, hvchi sanali nan isht ahullo okpulo yvt kv̄na kia isht nanv̄bli bvnna kv̄t, hohoyot, koi chito wohoha chiyuhmi hosh nohova hoka.

9. Yvmmak oka na yimma kv̄llo ai ahli hosh hvsh i sanalashke: hvsh itibapishi vhleha yakni ilv̄ppa ai asha hokvt, na palv̄mmi yvmmak o chiyuhmi puta ka pihisa ha tok oka, hvsh ithaiyanashke.

10. Amba Chihowa isht i kana chinto yvmmak osh Chisvs Klaist ha tok pulla mak o ilap isht aholitopa bilia yoka il esha he mak o pi atokoli tok vt, yakosi itin takla hvsh

ilbahasha ha yak o, ai ahlichit kvloochit hilechit, hlampko-honchit, chukvsh fitikvchi iksho ho hvchi anukfokihin-chashke.

11. Yvmmak o isht a holitopvt, mikot bilia yvt immit biliashke. Amen.

12. Silfanvs hvsh itibapishi ai ahli ahi li ha tuk osh, anumpa kanomosi ka holissochit ima li ho, isht hvchim ia tok; yohmi kvv nana hvchi miha li kvv, hvsh' a hikia yvm-mak osh Chihowa hvv isht i kana ai ahli mak o, atokolit hv-chim anoli lishke.

13. Ubanumpuli iksa Babulon hikia kvv, hvch ibai vlhtoka ha tok vt hvchi aiokpvchishke; mikma svso Makvs vt yoh-mi ak inli.

14. It i hullo it i suksowa isht hvsh it aiokpvchashke. Klaist ibai achvfa hvsh moyuma ka isht it i nanaiya kvv hvchi anukfoyukashke. Amen.



## II. P I T A

## I HOLISSO. ATUKLA HOKE.

## CHAPTA I.

Nan isht il aiyukpa chinto nan hq vbanumpuli vt isha chi hosh vlh-toka ka anoli, 1; 5 nan ai vlhpiesa a yvmihcha he moma ka yv-mihchi, yohmi pulla hosh ai okchaya pisa chi kvt ai ahlichia chi i miha: 14 ilap vt illa chi nitak vt ai vla hosi ka anoli; mihmvt Klaist i yimmit akvllot hiela hi a i miha.

1. SAIMON Pita, Chisvs Klaist im apostel, micha in tishu hokvt pin Chihowa, micha pi Okchalinchi, Chisvs Klaist vt nan aivlhpiesa yvmohmi tok pulla mak o, na yim-mi pi holitopa itilau i ka ahayuchi tok vhleha yvmmak o pit aiokpuchi kvt,

2. Chihowa, micha Chisvs pin Chitokaka hvsh ithaiyana kak osh nan isht i kana, micha isht it i nanaiya aiena kvt hvchin lauashke;

3. Yohmi kvt ilap ai ahli kak osh nan okluha isht ai ok-chaya, micha Chihowa isht holitobli imma aiena ka pihima kvt, ilap ithvna kak osh nan ashvchi ik pim iksho hosh isht a holitopa ya e pihisa he mak o, pi atokoli tok:

4. Yvmmak o nana holitopa, micha achukma chinto puta ka isht a pihima; yohmi kvt ilvppak atuk pulla kak o nan okpulo chukvsh nan ai ahni yatuk pulla kak o yakni ilvppa ai asha ka hvsh i filvmmi hosh, Chihowa im anukfila ha hvsh ibai isha chi ha tok.

5. Mich a ilvppa atuk pulla kak o achunanchi fehna hosh na hvchi yimmi ya nan vlhpesali ya isht hvsh otvmin-

chashke: micha nan vlhpesali ya nan ithana ya isht hvsh otvninchashke.

6. Micha nan ithana ya ile oktampli ya isht hvsh otvninchashke: micha ile oktampli ya nuktaiyalvt achunanchi ya isht hvsh otvninchashke; micha nuktaiyalvt achunanchi ya Chihowa isht holitobli ya isht hvsh otvninchashke.

7. Micha Chihowa isht holitobli ya itibapishi vbanumpuli it i hullo ya isht hvsh otvninchashke; micha itibapishi vbanumpuli it i hullo ya hatak moma i kana ya aieninchit isht hvsh otvninchashke.

8. Yohmi ka nana ilvppa puta kv̄t hvchi anukfoyuka kv̄t isht i shahlit lauv̄t ia hokmv̄t, pin Chitokaka Chisvs Klaist hvsh ithaiyana kv̄t, in takobit hvch ik vno ka hi o hvch ikbi keyu hoke.

9. Amba mana ilvppa puta ka ik im iiksho hokmv̄to, nishkin tamoa hosh mishema pit pisa he keyu, micha tikba ilap nan ai ashvchika yvt i kashofa ha tok vt imi haksi hoke.

10. Yvmohmi hoka na hvchi vlhtoka, micha na hvchim annoa aiena kv̄t hvchim ai ahla chi kv̄t ai yiminta hosh hvsh achunanchashke: yohmi ka nana ilvppak o hvsh yimihchi hokmv̄to, chi tula himma keyu hoke:

11. Hvsh yakohmi hok mak o pin Chitokaka, micha pi Okchalinski Chisvs Klaist apehliechi ka bilia ya im vltaha achukma hosh ik chvkowá, hvchim ai ahni fehna hi oke.

12. Yvmohmi hoka nana ilvppa puta ka hvsh ithaiyana, micha vbanumpa hvchi yimmi kv̄t kv̄llot hvsh a hikia ak inli kia, hvsh ithaiyana chi ka himonna hvchi anukfokihinchit li kv̄t an takoba he keyu hoke.

13. Ahli, vlhtipo ilvppa anukaka ahanta li takla kv̄t, hvsh ithaiyana chi kak o hvchi anukfokihinchit hvchi okchvli li kv̄t ilvppvt ai vlhpiesa, ahni lishke.

14. Chekosikma vm vlhtipo ilvppa mokofit boyuhli la chi pulla ithaiyana li kv̄t, pin Chitokaka Chisvs Klaist ak kia vm otvninchi akinli ha tok ak oke.

15. Yvmohmi hoka a svlli ha kia, nana ilvppa puta ka hvsh ithaiyana bieka hi ak o hvchim ai ahni li kv̄t achunanchi la hi oke.

16. Pin Chitokaka Chisvs Klaist vt vla tok, micha nan im ai ahli tok aiena ka e hvchim anohonli mvt, anumpa nan isht ik ahobo nan isht haksicha he nana h<sub>o</sub> il iakaiya ha tok keyu, amba ilap isht a chinto ka nishkin isht ai atokoli pia ha tok.

17. Yohmi ka, Ilvppak osh Suso a holitopa yoke, yummak o nan isht vm vlhpiesa hoke, ahanchi anumpa yosh Holitopa chinto ka a minti hosh im vla kak osh isht a holitopa, micha isht annoa achukma ka Iki Chihowa yak o im ai eshi tok.

18. Mihma itvpehvt nvnih paknaka holitopa yak o e hieli h<sub>o</sub>, anumpa ilvppvt vba yak o minti hosh vla h<sub>o</sub> e haiyaklo tok.

19. Hopaii im anumpa hak osh isht ai atokowa i shahli hvt pin tonla ak inlishke: yummak oka p<sub>u</sub>la hosh ai okhlilika y<sub>o</sub> hikia chiyuhmi h<sub>o</sub> hvsh anukfihinli na onnvt taha, micha onnahnli fochik vt hvchi chukvsh a a kohcha hi okvt hvchim vlhpiesa hoke.

20. Hopaii im anumpa hvt ilap im anukfila ha tok keyu ka tikba ilvppa hvsh ithanashke.

21. Yohmi ka hatak nana ai ahni h<sub>o</sub> nitak tikba kash hopaii im anumpa hvt vla tok keyu, amba hatak holitopa yosh Chihowa nana ai ahni pulla h<sub>o</sub> Shilombish Holitopa yak osh nukfokihinchi h<sub>o</sub> anumpohonli tok.

## CHAPTER II.

Vbanumpa ithvnachi ik ai ablo vt wakaya he, atuk kia yummak ashot in antia pit a moma ka Chihowa yvt okpvnit tahla he; amba hopoyuksa vhleha hokvno okchalinya he tikbanli anoli, 1; 10 nan ithvnanchi ik vlhpeso ilvppak ash achukmvt anoli.

1. YOHMI kia hopaii ai ahli keyu vhleha hvt okla ai itin takla y<sub>a</sub> ai asha ak inli beka tok a, anonti nan ithvnanchi ai ahli keyu kvh hvch itin takla ai asha he ak inli; yummak okvt isht okpula he ai ahli isht anumpa keyu puta ka lumvt isht hvch iba chukowa mvt, ilap a chumpa tok, Chitokaka



kanchi hosh isht ai okpulo ya tushpa fehnvt isht il onochia hi oke.

2. Mikma lawa kv̄t yvmmvt nan isht ai okpuloka he ai yvmohmi puta ka hobacha he; yvmmvt yvmohmi kak o hina ai ahli yvt nan isht ik ahobot isht anumpa hi oke.

3. Micha yvmmvt nan ahayuchi bv̄nna kak osh isht haksichi anumpa ho nan isht itatoba yo isht hv̄ch ikba hi oke; yvmma nan isht im vlhpisa tok a hopaki kia sv̄laha he keyu, micha yvmma isht ilbv̄sha hi vt nosilhha keyu hoke.

4. Yohmi ka Chihowa yvt enchil vhleha hv̄t nan ashv̄chi ma ik il atombo hosh, amba ai okhlilika tv̄li itatak̄vli isht takchi cha, ai okpuloka ya pit ashachi kv̄t yvmma ai asha na nan vlhpisa hi vt ai ona hi a tokma;

5. Micha yakni vmmona ka ila tomba tok keyu, Chihowa holitobla he keyu vhleha yakni paknaka ai asha tuk ash oka falama yo isht onochi tok: yohmi kia Noah hatak isht untuchina nan ai vlhpiesa isht anumpohonli yano okchalinchitok.

6. Chihowa ik holitoblo himak a pilla ai asha he ak osh isht im vlbv̄cha hi o ihikbi hosh, tmaha hochito Sotom micha Komola ita tuklo ka hushmit hituk chubbi, banochi kv̄t, okpulo ai ahli mak o im apihisa tok.

7. Mihmvt hatak achukma Lot okvt, hatak haksi nan a kaniohmi liteha ya isht nukhaklot ik im achukmot ahanta tuk a, a hlakofichi tok.

8. Yohmi ka hatak ai vlhpiesa yvmmvt yvmma ai itintakla ahantvt, nana ka pihisa, micha hahaklot, nan ai vlhpiesa keyu ai yvmohmi kak o onna hosh onnakma chukv̄sh vt isht a hotoyupa tok:

9. Chitokaka yokvt Chihowa i hullo yokvno isht imomaka pisa ya kanimihchit akohchi kv̄t ithana; micha ai vlhpiesa ka yvmihinchha he keyu yokvno kanimihchit ishi na nan im vlhpisvt isht ilbv̄sha chi nitak vt ai ona hi oka ithana hoke:

10. Micha haknip isht ai yukpa anuksitia hosh chukv̄sh nan ai ahni kak bano iakaiya, micha nan vlhpisa yo ik holitoblo aiena kak fehna ho kak heno i yvmihcha hi oke.

Ilapunla, ilap nan ai ahni kak bano, nan vlhtoka puta ka nan isht ik ahobalot anumpuli kvt ik nukshoposhke.

11. Yohmi kia enchil vhleha hokvto isht ai ahli, micha isht hlampko aiena kvt yvmma i shahli fehna kia, Chitokaka itikba ya isht ik ahobalo anumpa kia yvmma ai onochi keyu hoke.

12. Amba ilvppvto nampoa nan ithana keyu ilap nan ahni bano hosh itvnova ka, ishit okpvna hi o toba tok chiyuhmit nana ka akostininch i keyu kvt, isht ik ahobalot anumpulishke; yohmi kvt ilap im anukfila okpulo nan isht ai yvmohmi kak osh isht ai okpulot kvnia chi hoke:

13. Micha yvmmvto nitak kia nan impvt, nan ishkot isht a haui kvt nan isht ilaiyukpa yo im ahobvt ai asha kia, nan ai vlhpiesa keyu ai yvmohmi isht vlhtoba ka isha chi hoke: yvmmvt na liteha okpulo, na hofahyali yosh yvmmvt hvch ibai impa itin takla kvt na haksichi kak osh nan isht ilaiyukpa hoke:

14. Yohmi kvt nishkin mvt isht a haui yak osh alotowa, micha nan ashvchi kvt issa keyu hosh, hatak im anukfila fitikvchi ya haksihinch i hoke; micha nan ahayuchi bvna atampa isht ai yvmohmi puta ka chukvsh isht a tokshanli hosh, isht ai ilbvshvt onvtula he vlhpiesa vlla vhleha hoke.

15. Yvmmak okvt hina ai vlhpiesa issa cha, yoshubvt kvnia hosh Boso ushi, Belam, yvmmvt nan ai vlhpiesa keyu isht vlhtoba yak o anuksitia hosh nan a kaniohmi tok ak o iakaiya hoke:

16. Yohmi kia Belam ash ot nan ai vlhpiesa keyu yvmohmi kvt ik vlhpieso ka im otvninch i kvt, issuba haksobish falaia anumpula he keyu kia, hatak im anumpa ho anumpuli hosh, hopaii im anukfila tasimbo yash im olvbi tok.

17. Ilvppvt kvli oka iksho puta, micha hoshonti ha apeli vt isht aya mak oke: yvmmak okvno okhlili chinto yak osh immit bilia hi osh takali hoke.

18. Yohmi ka yvmmak okvt nan isht ik ahobo isht anumpa ilauatvt anumpohonlikmvt, haknip imma nan ahni, micha haui anukfilli isht alotowa kak osh nan ashvchi aiasha

yumma yakosi itin takla hō ai i filvmmi tok ash yummak o haksihinchī hoke.

19. Ilap ai ahni hosh nana ka yvmmvt yvmohma he im ihisa ak inli kia, ilap ak okvto nan ai ashvchi yak o chukvsh okpulo ai yvmohmi yak o i yuka vhleha hoke: yohmi ka kvna hosh hatak a imaiyachi hokma, yummak ash inli hō i yuka toba chatuk oka.

20. Yohmi ka pin Chitokaka, micha pi Okchalinchī Chisvs Klaist oka ithaiyana kak osh yakni ilvppak inli isht a liteha puta ka ai i filvmmi ha ya tuk osh, anonti yummak ash inli hō isht ai apakfovt isht ai imaiya hokmvt, yvmmvt ont im ai ishtaiyopi kvt ik achukmo kvt im ai ishtia vmmona tuk ash i shahli hoke.

21. Yohmi ka yummak okvt nan ai vlhpiesa hina ya ik ithano hatuk mak osh im achukma kvt yumma ithana cha, anumpa vlhpisa holitopa yvt im anohowa ha ya tuk osh i filvmmi kvt, im i shahla he atuk oka.

22. Yohmi kia yummak okvt nan isht vlhpiesa ai ahli hō ai yvmohmishke; yohmi ka, Ofi yvt hoita kash osh falaminchit vpvshke; mikma, Shukha tek vt vlhchifa kash osh, falamvt lukchuk a oka tonolishke, achishke.

### CHAPTA III.

Nan vlhpisa chinta he nitak a Klaist vt vla pulla hi a ahlichit im anoli 1, 10 kaniohmit yakni, micha vba pit a moyuma kvt ont ai okpulo ka he anoli; 14 nan ai okpula hi pit anukfoykvt anumpuli mvt nan ashvchi ikshot holitopvt itanowa chi ka i miha.

1. A HOLITOPA vhleha ma! ilvppvt holisso atukla mak o himonasi ka pit hvchi holissohonchi li kvv, ita tuklo ka nana ka isht hvsh ithaiyana chi hō hvchim anukfila toh-wikeli tok a isht okchvli lishke.

2. Yohmi na hopaii vhleha hokvt tikba kash anumpa puta isht anumpohonli tok; micha Chitokaka, micha Okchalinchī im anumpeshi pia hvv nana e hvchim apihisa tok aiena ka isht hvsh ithaiyana chi hatuk;

3. Ilvppa tikba hvsh ithana, yohmi ka ishit yopula anum-



puli, micha chukvsh nan ahni iakaiya puta kvt ont ai ishtai-yopi nitak puta ka vla hi oke;

4. Mikmvt, Yvmvt vla he anumpohonli tok mvto kati-mak o? hatak tikba vhleha hvv nusi tok takla ha ya, nan okluha hokvto tikba vmmona tok ash osh imomvt mahaya hoka, ahancha hi oke.

5. Yohmi ka ilvppa ithvna ik bvnno hokvt, hopaki pilla kash vba yakni okvt Chihowa im anumpa hak o isht atoba tok, mihma yakni ilvppvt oka akohcha cha, itin takla talaia tok:

6. Yvmmak o yakni yvmmak atuk vt oka yosh isht ompoholmot kvnia ho, isht ai okpulot kvnia tok.

7. Amba vba shutik, micha yakni ilvppa ita tuklo hokvno Chihowa im anumpa yvmmak ash inli hosh Chihowa ik holitoblo hatuk puta kvt ai okpulot kvnia chi nan vlhpisa nitak mak o lua he ai ahni hosh achukmalit ieshi hoke.

8. Amba a holitopa vhleha ma! nana achvfa ilvppa hvch ik ithano ki na, yohmi kvt nitak achvfa kvt Chitokaka yovkno afvmmi tahlepa sipokni achvfa ka im itilau; micha afvmmi tahlepa sipokni kvt nitak achvfa ka im itilau hoke.

9. Chitokaka yokvt nana ka im ihisa tok vt, a svlaha hatak kaniohmi kvt ahni kia, svlaha keyu hoke; amba pi nukhaklo hosh pi svlaha kvt, achvfona kia okpunlot ik kvnio hosh, amba moyuma kvt ile kostininha he, im ai ahni hoke.

10. Yohmi kia Chitokaka i nitak okvt, ninak anukaka yo na hukopa yvt aya chatuk mak o, chiyuhmit vla hi oke; yvmohmikma shutik moma kvt nan ola chinto ho isht ai okpulot ont ai iksho ka he, mikma fochik moma kvt luak lvshpa fehna ho isht a hvvt bihinlakma, yakni, micha nan okluha ai vlhtaiyaha puta tuk vt hvvt taiyaha hi oke.

11. Yvmohmi ka nan okluha ilvppvt ont ai vhlit kvnia chi hoka, hatak kaniohmi hosh nana a kaniohmi puta ka nan ai ashvchi iksho hosh Chihowa holitoblit hvsh ai asha hi atuk o?

12. Michi Chihowa i nitak vt vlakma, vba shutik moma kvt lua hatuk osh ont ai vhlit kvniakma, fochik moyuma kvt

luak lvshpa fehna h<sub>o</sub> isht a luvt bihinla he, yvmmak o ho-  
hoyot tushpvt hvsh mahaya hokvt.

13. Yohmi kia pishno yokvt nana ka pim ihisa tok pulla  
kak o, vba shutik himona, micha yakni himona ita tuklo nan  
ai vlhpiesa ai ahanta yvmmak o e hohoyo hoke.

14. Yvmohmi ka a holitopa vhleha ma! nana ilvppa chi-  
yuhmi puta h<sub>o</sub> hvsh hohoyo hokvt, anumpa isht ai onvtula  
he, micha na liteha aiena ik hvchim iksho hosh hvsh i na-  
naiya h<sub>o</sub>, hvsh im otaiyana hi vt hvsh achunanchashke.

15. Mikmvt pin Chitokaka yvt ilbvshala chi kvt svlalia  
kvt isht pi ai okchaya he atuk, il ai ahnashke; ilvppa chi-  
yuhmi il itibapishi Pal ak kia isht a hopoyuksa ya anukfoki-  
hinch i h<sub>o</sub> hvchi holissohonchi tok:

16. Yohmi kvt holisso ihikbi puta kvt nana ilvppa moma  
ka isht anumpohonli ak inli hatok okvt; yvmmak oka nana  
kaniohmi kvt akostininchi kvll o kvt ai asha, yvmmak oka nan  
ik ithano, micha anukfila apissali iksho aiena hokvt ilap isht  
ai okpula chi kvt anumpa holitopa inla ka yvmihinch i hatuk  
ash osh, chohmichit shanaiyvchi hoke.

17. Yvmohmi ka a holitopa hvchia ma! tikba nana ilvppa  
puta ka hvsh ithana hatuk okvt ahah! hvchik ai ahnokmvt,  
hatak nan vlhpiesa ik holitoblo isht ai yoshuba ya isht ai  
yoshubvt isht a hvchi yimmi kvll o kash i filvmmi chi  
tula ná.

18. Amba isht i kana hvchi anukfokvt hvsh yvmohmi kvt  
i shahlichit mahayvt, pin Chitokaka pi Okchalinch i Chisvs  
Klaist a hvsh ithaiyana kvt i shahlichit hvsh mahayashke.  
Yvmmak oka isht a holitopa yokvt, himonasi, micha himak  
a pilla ka immit biliashke. Amen.

## C H A N

## I HOLISSO YMMONA HOKE.

## CHAPTER I.

Klaist a isht anumpuli, mihmvt yvmma anonti Iki itatuklo ka ibachv-  
fvt nan im anukfila he miha, 1; 5 nan ib achvfa ilvppa yakohmi  
kvt nan isht il aiyukpa hokmvt, atohwekinli ka il ai itanowa he;  
9 mikmvt na pim ai ashvchika puta ka il il anohonlikma, pi ka-  
shofa hinla.

1. AI okchaya anumpa yvmmak osh vmmona ka ahanta  
tok mak o e hahaklot, pi nishkin a isht e pihisvt, il o hopo-  
kohoyo tok, micha pibbak vt pvshohonli tok mih mak oke.

2. Ai okchaya yvmmvt haiaka na e pihisa tuk osh atoko-  
wa anolit, Ai okchaya bilia yvmmvt Iki a takla ahanta cha-  
tuk mak osh, ant pi haiaka tok a e hvchim anoli hoke.

3. Hvchishno mvt hvsh pibai achvfa he mak o, nana ka  
e pihisa tuk, micha e hahaklo tuk aiena kvt e hvchim anoli  
hoke: yohmi kvt pishno vt Iki, micha Uski Chisvs Klaist  
aiena kak o il ibai achvfa mvhli hoke.

4. Mikmvt nana a hvchi yukpvt alotowa he mak o, ya-  
kohmi ka pit e hvchi holissochishke.

5. Yohmi ka Chihowa yvt tohwikelika, micha yvmma  
okhlilika yvt atakali iksho kvmohmi aiena ilvppak o anumpa  
yvmma il ai i haponaklo tuk mak osh e hvchim anolishke.

6. Yvmmak oka pit il ibai achvfa, il achi hosh, anonti ai  
okhlilika yo il itvnowa hokmvt, e holabi; micha nan ai ahli-  
ka mvno a pi yvmohmi keyu hoke.

7. Amba yvmmak okvt atohwikelika yo anta hoka, pish-  
no vt atohwikelika yo il itvnowa hokmvt, iloh it ibai achvfa.



Yohmikma Ushi Chisvs Klaist im issish vt nan ai ashvchika ya mominchit a hvpi kashofi hoke.

8. Nan ai ashvchika yvt ik pim iksho, il achi hokmvt, peh il ile haksichi: micha nan ai ahlika yvt pi anukfoyuka keyu mak oke.

9. Na pim ai ashvchika ya il il im anohonli hokma, yvm-mak okvt ai ahli achukmvt, ai vlhpiesa hatuk osh na pim ai ashvchika ya pi kanvllichi; micha nan ik ai vlhpeso ka mominchit pi kashofa hinla hoke.

10. Nana il ai ashvchika chatuk keyu, il achi hokmvt, yvmmak oka holabi il ikbi; mikma im anumpa hvvt pi anukfoyuka keyu mak oke.

CHAPTA II.

Klaist vt pi a pelvt isht pi anumpuli, 1; 3 ai ahlit Chihowa ya ithana hokvto im anumpa vlhpisa ya holitobli hoke. 9 Pitibapishi ha il oh i hullashke; 15 yohmikmvt yakni imma hokvno keyu kashke; 18 na yoshubli a ahah! il im ahnashke.

1. UM vlla chipunta vhleha ma! hvch ik ashvcho ka chi mak o, ilvppa puta ka pit hvchi holissochi lishke. Michahatak nana hosh ashvchi hokma, isht anumpuli vt Chisvs Klaist achukma yvt Iki a itikba pim anta hoke.

2. Yvmmak osh na pim ai ashvchika ya, vlhtoba kvtpishno pimmi hak bano keyu, amba yakni moma nan ashvchi aiena ka okluha vlhtoba mak oke.

3. Michaim anumpa vlhpisa yak o e holitobli hokmak osh, yvmma il ithaiyana ho mvhli kvtisht il akostininchi hoke.

4. Kvna hosh yvmma ithana li, achi hosh, anonti im anumpa vlhpisa ya holitobli keyu hokvto, holabi; micha nan ai ahlika yvt anukfoyuka keyu mak oke.

5. Amba kvna hosh yvmma im anumpa ha holitobli hokvto, mihi yosh Chihowa ya i hullo ai ahli fehna hoke. Ilvppak o yvmma il ibai achvfa kvtisht il akostininchi hoke.

6. Kvna hosh yvmmak oka ai iba foyuka, miha hokvto, ilap mak kia, yvmmvt kaniohmit aya tok mak o, a chohmit aya he tuk oke.

7. Itibapishi li vhleha ma! anumpa vhlpisa himona nana h<sub>o</sub> pit hvchi holissochi li keyu; amba anumpa vhlpisa sipokni vmmona kash inli h<sub>o</sub> hvchin tonlv<sub>t</sub> isht auehinch<sub>i</sub> tok ash oke. Anumpa vhlpisa sipokni vt anumpa vmmona kash inli h<sub>o</sub> haklot isht hvsh auehinch<sub>i</sub> tok ak oke.

8. Ai okhlilika yvto ant ia ma, himak okvno tohwikel<sub>i</sub> ahli mak osh tom<sub>m</sub>i hoka, anont<sub>i</sub> anumpa vhlpisa himona, yvmmak okvt ilapo, micha hvchishno aiena hokvno ahli mak o pit hvchi holissochi lishke.

9. Kvna hosh atohwikelika y<sub>o</sub> anta li, achi cha, itibapishi ha i nukkilli kv<sub>t</sub>, himonasi ak kia ai okhlilika y<sub>o</sub> aya moma hoke.

10. Kvna hosh itibapishi ha i hullo hokvto, mihi yosh atohwikelika y<sub>o</sub> ahanta; yohmi cha kaniohmit ai ibetvbla hi vt ik im iksho mak oke.

11. Amba kvna hosh itibapishi ha i nukkilli hokvto, ai okhlilika y<sub>o</sub> ahanta cha, ai okhlilika y<sub>o</sub> noh<sub>o</sub>wa; yohmi ma okhlilika kv<sub>t</sub> nishkin a tvmmoli hatuk o, kanima y<sub>o</sub> ia kv<sub>t</sub> ithana keyu hoke.

12. Ulla chipunta hvchia ma! yvmma hohchifo pulla h<sub>o</sub> na hvchim ai ashvchika yvt isht a hvchi kashofa hatuk oka, pit hvchi holissochi lishke.

13. Iki hvchia ma! vmmona makinli h<sub>o</sub> ahanta tok yvm-mak ash hvsh ithaiyana hatuk oka, pit hvchi holissochi lishke. Hatak himita hvchia ma! nan okpulo atukma hvsh imaiyachi hatuk oka, pit hvchi holissochi lishke. Ulla chipunta hvchia ma! Iki a hvsh ithaiyana hatuk oka, pit hvchi holissochi lishke.

14. Iki hvchia ma! vmmona makinli h<sub>o</sub> ahanta tok yvm-mak ash hvsh ithaiyana hatuk oka, pit hvchi holissochi li tuk oke. Hatak himita hvchia ma! hvsh hlampko, yohmi ma Chihowa, im anumpa hv<sub>t</sub> a hvchi anukfoyuka, micha nan okpulo atukma hvsh imaiyachi aiena hatuk oka, pit hvchi holissochi li tuk oke.

15. Yakni a, micha nana kv<sub>t</sub> yakni paknaka asha ka hvch ik i hullo kashke. Hatak nana hosh yakni a i hullo hokma, Iki i hullo kv<sub>t</sub> yvmma anukfoyuka keyu hoke.

16. Yakni asha kvto moma, haknip nan isht anushkunna, micha nishkin nan isht anushkunna, mikmvt yakni pakna nan ai isht ilefehnvchi aiena kv Iki ak o a minti h<sub>o</sub> keyu; amba yakni ak o a minti hoke.

17. Micha yakni vt, mikmvt nan ai isht anushkunna aiena hokvto, ant ayvt kvnihiya hoke; amba Chihowa nan aiahni yak o a yvmohmi hosh ahanta hokvto, antvt bilia hoke.

18. Ulla chipunta ma! ai ishtaiyopi mak oke: yohmi ka Klaist im asanali vt aya hi oka, hvsh haklo tok mak o, himonasi ak kia Klaist im asanali vt lauvt aiasha; yohmi h<sub>o</sub> ont ai ishtaiyopi ka isht il akostininchishke.

19. Yvmmak ash ot a p<sub>i</sub> filvmmmit kocha wiha tok; yohmi kia yvmmtv a hvpi bai achvfa tok o keyu hoke; yvmmtv pishno ak o a hvpi bai achvfa tok okmvt, a hvpi bai afoka na bilia he tuk pulla chishke: amba yvmmtv moma kak osh a hvpi bai achvfa h<sub>o</sub> keyu hatuk vt otvna ch<sub>i</sub> kak osh a hvpi filvmmmit kocha wiha tok oke.

20. Amba hvchishno yokvto Shilombish Holitopa ak o hvsh im ai ahama tuk osh nan okluha ka hvsh ithanvshke.

21. Nan ai ahlika ya hvch ik ithano hatuk o, pit hvch<sub>i</sub> holissochi li h<sub>o</sub> keyu, amba yvmma micha holabi hv achv-fona kia nan ai ahlika ya ahalaia keyu aiena ka hvsh ithana kak atuk oke.

22. Kvta hosh holabi y<sub>o</sub>? amba Chisvs ak osh. Klaist mak atuk a keyu achi kak oke. Iki micha Ushi aiena ka i yimmi keyukmvt, yvmmak osh Klaist im asanali mak oke.

23. Kvna hosh Ushi a i yimmi keyukmvt, yvmmak osh Iki a pit ahalaia keyu mak oke; amba Ushi a i yimmi hokvto Iki a ib ahalaia ak inli hoke.

24. Yohmi hoka nana ka hvsh haklo vmmona tok yvmmtv a hvch<sub>i</sub> anukfoyukashke. Nana ka hvsh haklo vmmona tok yvmmtv a hvch<sub>i</sub> anukfoyuka hokma, hvchishno mvt Ushi, mikmvt Iki aiena ka hvsh ai ibafoyuka hi oke.

25. Micha nana miha kv ai okchaya bilia ilvppak o pim issa tok oke.

26. Na hvch<sub>i</sub> yoshubli vhleha ha ai immvchi kv yakohmi kak o pit hvch<sub>i</sub> holissochi li tuk oke.



27. Amba yvmma nana hvsh ai im ahama tuk amo a hvchi anukfoyuka; yohmi ka hatak osh nana hvchim abvcha he hvsh ahni ka keyu; amba nan ahama yvmmak asl inli kak osh nana moma ka a hvchim abvchi kvt ai ahli, holabi keyu; yohmi ka na hvchim abvchi tuk ash fehna ka yvmma hvsh ai ibafoyuka hi oke.

28. Yohmi ka inta! vlla chipunta ma! yvmmak o hvsh ai iba foyukashke; yohmi tuk o yvmmak ash ot ant haia-kakma, il anukeheto cha, mihintikma itikba ma a ik pi hofahyo kashke.

29. Yvmmak okvt ai vlhpiesa yo hvsh akostininchi hokmvt, ai vlhpiesa ho a yvmohmi hokvto, momvt yvmmak o isht a toba yo hvsh akostininchishke.

### CHAPTA III.

Chihowa yvt ilap ushi yo pihikbi kvt pi hullo fehna, 1; 3 yvmohmi hoka i nan vlhpisa ya e holitobla he tuk; 11 il iti hulla he tuk.

1. CHIHOWA ushi vhleha hvpi hohchifa hi a Piki vt nan i hullo kvt a kaniohmit hvpi i hullo tok a ho pesa: yohmi hatuk o yakni vt pishno a ik hvpi ithano; yvmma ik ithano tok okvt.

2. Holitopa vhleha ma! himak okvno Chihowa ushi hvpia, yohmi kia e kaniohma hi a himonasi kano ik otano kishvshke; amba yvmmak osh ant haiakakma, pishno vt yvmmak o e holba hi vt il ithana, yvmmvt kaniohmi hatuk ma e pisa hi okvt.

3. Yvmma anukchieto hosh si yakohma he ahnit, yvmmak ash ot kashofa achukma yatuk a chiyuhmit momvt ile kashofi hoke.

4. Kvna hosh nana ashvchi kvt anumpa vlhpisa ma kobvffi hoke: nan ai ashvchika yak osh anumpa vlhpisa ya kobvffi hoka.

5. Yohmi ka yvmmak okvt pim ai ashvchika ya isht hvpi kancha chi mak osh ant haiaka tok a hvsh ithana; micha yvmma ai ashvchika nana hosh atakali keyushke.

6. Kvna hosh yvmma ai iba foyuka hokvto ashahanchi chatuk keyu; kvna hosh ashahanchikmvt, yvmma pisa tuk keyukmvt, anonti ithana tuk keyu aiena mak oke.

7. Ulla chipunta ma! hatak nana kia ik hvchi yoshublo kashke: kvna hosh nan ai vlhpiesa ya a yvmohmi hosh ahantakmvt, ai vlhpiesa kv, yvmmvt ai vlhpiesa yatuk a, chohmi mak oke.

8. Kvna hosh ashahanchi kv Setan ak o ibai achvfa mak oke: Setan ak okvt vmmona mak inli ho ashvchit isht auehlinchi tok oka. Setan vt nan ai isht vtta tok puta ka okpvna chi pulla kak osh Chihowa Ushi vt ant haiaka tok.

9. Kvna hosh Chihowa ak o isht a toba hokvto ashahanchi chatuk keyu: yvmma i na nihi vt anukfoyuka hatuk o; micha yvmmak okvt Chihowa ak o isht a toba hatuk okvt, ashahancha he keyu hoke.

10. Ilvppak o Chihowa im vlla vhleha, mikmvt Setan im vlla vhleha aiena kv isht ai otvni hoke: kvna hosh nan ai vlhpiesa ya a yvmohmi keyu, mikmvt itibapishi ha ik i hullo aiena kv, Chihowa ak o ai ibai achvfa ho keyu hoke.

11. Iloh it i hulla he anumpa ilvppak o vmmona mak inli ho hvsh hahaklo tok.

12. Nan okpulo a ai ibai achvfa cha, itibapishi ha vbi tok Ken ak okvno ke chohmo kashke. Michi nanta katiohmi ho yvmma vbi tok o? Ilapo nana a kaniohmi kvto ai vlhpiesa keyu ma, itibapishi hvto ai vlhpiesa kak a tok oke.

13. Itibapishi li vhleha ma! yakni vt hvchi nukkilli hokma, ik hvchi nukhlakancho kashke.

14. Il itibapishi vhleha ha il i hullo hatuk osh, ai illika ya a kohchvt ai okchaya ya il ona kv il ithanvshke. Kvna hosh itibapishi ha i hullo keyu hokvto, ai illika yo anta hoke.

15. Kvna hosh itibapishi ha i nukkilli kv, hatak vbi yoke: yohmi ka hatak vbi nana hak osh okchayvt bilia yvt anukfoyuka keyu ka hvsh ithanvshke.

16. Pishno pulla hatuk mak o ilap im ilhfiopak a isht pi atobbi tok a ilvppa fehna ak o Chihowa vt pi hullo ka, isht

il akostininchishke: yohmi ka pishno vt il itibapishi vhleha ha pim ilhfiopak a isht il atobba he vlhpesa hoke.

17. Amba kvna hosh yakni ilvppa nana isht il ai yvkpa vt im asha; yohmi hosh itibapishi hvt ilbvsha ho pisa kv, yvmmak ash i nukhaklo iksho; yohmikma Chihowa i hullo kvto katiohmit yvmma anukfoyuka hinla cho?

18. Um vlla chipunta ma! anumpa, micha isunlvsh aiena kak bano ho ishit kiloh it i hullo kashke; amba nan isht ahanta, micha ai ahli mak ashke.

19. Micha ilvppak o nan ai ahli ka ya il ibai achvfa kv isht il akostininch; mikmvt pi chukvsh a nukhtalanlit itikba ya il asha hi oke.

20. Pi chukvsh vt isht pi atokoli hokma, Chihowa ho kak heto pi chukvsh a i shahli, micha nana moma ka ithana hoke.

21. Holitopa vhleha ma! pi chukvsh vt isht pi atokoli keyu hokmvt, Chihowa ya il ai nanaiya mak oke.

22. Micha im anumpa vlhpisa ya e holitobli, mikmvt nana ka ilapvt ai ahninch ak o a pi yvmohmi aiena hatuk osh, nana ho il asilhha kv, yvmma il ai i habena chatuk oke.

23. Yohmi kv yvmmak a hi o, anumpa vlhpisa ha pima tok oka, Ushi Chisvs Klaist hohchifo ha pi yimmi cha, it i hulla he aiena ilvppak osh im anumpa vlhpisa mak oke.

24. Micha kvna hosh im anumpa vlhpisa ya holitobli kv, yvmmak o ai ib achvfakma, ilap mvt yvmma ai ibai achvfa hoke: micha yvmmvt a pi nukfoyuka kv, yvmmvt Shilombish pima tok ilvppak o isht il akostininch hoke.

#### CHAPTER IV.

Nan ithvnanchi moma kak o i yimma he keyu amba Chihowa im anumpa ho isht inomaka pisa hi a i miha, 1; 7 nana hosh kaniohmi kak o il it i hulla hi a lauachit nan isht miha.

1. **HOLITOPA** vhleha ma! hopaii ilahobi laurt yakni a atiapa hatuk oka, shilombish a uhvlinchit hvchi yimmi



ná; amba Chihowa yak o a minti hokma, nana tukmá, shilombish puta kash imomakachit hvsh pisashke.

2. Ilvppak o Chihowa im Shilombish a isht hvsh akostininchishke; shilombish vt, Chisvs Klaist vt haknip asha hosh vla tok a atokoli hokvto, Chihowa ak o a minti bano hoke.

3. Mikma shilombish vt, Chisvs Klaist vt haknip asha hosh vla tok a atokoli keyu hokvto, Chihowa ak o a minti keyu bano hoke; micha ilvppak osh shilombish Klaist i sanali, yvmmtv aya hi a hvsh haklo tok a, anonti himonasi kak kia yakni paknaka ya aiasa ka mak oke.

4. Ulla chipunta ma! Chihowa ak o immi hvchia; yohmi hosh yvmmak ash hvsh imaiyachi tok; hvchishno a a hvchi anukfoyuka kak osh yakni paknaka ya anta kvno i shahli hatuk okvt.

5. Yvmmak ash ot yakni ak o ai ibai achvfa; yohmi hatuk osh yakni ak o isht anumpuli ma, yakni vt i haponakloshke.

6. Pishno vt Chihowa ak o immi hvpia hoke; kvna hosh Chihowa ya ithana hokmvt, hvpi haponaklo: kvna hosh Chihowa ya immi keyu hokvto, ik hvpi haponakloshke. Ilvppak o shilombish ai ahli, mikmvt shilombish na yoshubli aiena ka isht il akostininchishke.

7. Holitopa vhleha ma! nan i hullo vt Chihowa ak o a minti hoka, iloh it i hullashke: micha kvna hosh i hullo hokvt moyumvt Chihowa ak o isht a toba; micha Chihowa ya ithana mak oka.

8. Kvna hosh nan ik i hullokmvt, Chihowa ya ik ithano mak oke. Chihowa ak okvto nan i hullo mak oka.

9. Yvmmak atuk mak o pishno vt isht pi okchaya hi a Chihowa yvt Ushi achvfa illa yatuk a yakni a auet kanchi tok oka, ilvppak o Chihowa yvt auet hvpi hullo ka isht ai otvni tok oke.

10. Pishno ak osh Chihowa ya il i hullo tok o keyu, amba ilap ak osh pishno a pi hullo cha, na pim ai ashvchika yvt isht vltoba hi a, Ushi a auet kanchi tok ilvppak osh nan i hullo mak oke.

11. Holitopa vhleha ma! Chihowa yvt pī hullo kv̄t yak-  
ohmi tok okma, pishno ak kia iloh it ī hulla he v̄lhpesa hoke.

12. Hatak achvfa kia nitak nan ash Chihowa ya pisa tok  
keyushke. Pishno vt iloh it ī hullo hokma, Chihowa yvt  
hvp̄i anukfoyuka; yohmikma yv̄mma il ī hullo kv̄t ai āhli  
mak oke.

13. Yv̄mmak okvt imi Shilombish a ai isht pima tok oka,  
pishno vt yv̄mma il ibai achvfakma, anonti ilap mvt pibai  
achvfa ka ilvppak o isht il ai akostininchi hoke.

14. Micha pishno vt e pihisa mak osh yakni a okcha-  
linchi a he Iki vt Ushi a auet kanchi tok a atokowa il  
anohonlishke.

15. Kv̄na hosh Chisvs vt Chihowa ya Ushi yoke, achi  
hoka, Chihowa ak osh yv̄mma anukfoyuka ma, anonti ilap  
mvt Chihowa ya anukfoyuka hoke.

16. Mikmvt pishno a Chihowa vt pī hullo ka il akosti-  
ninchi, micha pī yimmi aiena tok. Chihowa vt nan ī hullo  
hoke: yohmi ka kv̄na hosh nan ī hullot ahanta hokvt,  
Chihowa ak o ai ib anukfoyukakma, anonti Chihowa mvt  
ilap a ai ib anukfoyuka hoke.

17. Nan v̄lhpesa nitak fehnakma pī nukwaya iksho ka he  
vt ilvppak o nan il ī hullo kv̄t isht ai āhli hoke: ilap vt  
kaniohmi ka, pishno mvt yv̄mmak inli hō chohmi hosh yakni  
ilvppa il āsha hokvt.

18. Nan ī hullo ka nukshopa hvt iksho hoke; amba nan  
ī hullo āhlika yvt nukshopa hā kohchit kanchi yoke; na  
nukshopa hvt issikkopali yoka. Kv̄na hosh nukshompa  
hokvto nan ī hullo kv̄t ai āhli hō keyu mak oke.

19. Ilap ak osh tikba pī hullo tok oka, pishno vt yv̄mma  
il ī hulloshke.

20. Hatak vt Chihowa ya ī hullo li, achi hosh anonti  
itibapishi hā ī nukkilli hokmvt, yv̄mmvt holabi yoke. Itiba-  
pishi hā pisa kv̄t ik ī hullo kv̄to, anonti katiohmi hosh Chi-  
howa pisa chatuk keyu kv̄t yv̄mma ī hulla hinla cho?

21. Kv̄na hosh Chihowa ya ī hullo hokvto, itibapishi ma  
ī hullo ak inla he anumpa v̄lhpesa ilvppa yv̄mmak osh pima  
tok oke.

CHAPTA V.

Kvna hosh Chihowa ya i hullo kv̄t i nan v̄lhpisa ma holitobli cha, yv̄mma im v̄lla puta ka i hullo hoke, 1; 7 nan atokowa yv̄t tuchina hosh v̄ba ya aiasha; 8 mikma tuchina makinli hosh aka ya asha; 9 Chihowa ushi Chisvs vt pi okchalíncha hinla kv̄t im v̄lhpiesa.

1. KUNA hosh Chisvs vt Klaist mak atuk a yimmi hokv̄to, Chihowa ak o isht a toba mak oke; micha na toba-chi tok ash i hullo hokv̄to, moma kv̄t yv̄mma isht a toba tok puta ma i hullo ak inli hoke.

2. Chihowa ya il i hullo, micha im anumpa v̄lhpisa aiena ka e holitobli hokm̄vt, ilv̄ppak o Chihowa im v̄lla v̄hleha ha il i hullo kv̄t isht il akostinínchi hoke.

3. Im anumpa v̄lhpisa ya e holitobli ilv̄ppak osh Chihowa i hullo mak oke; micha im anumpa v̄lhpisa yv̄t a palv̄mmi ka keyu hoke.

4. Kvna hosh Chihowa yak o isht a toba tuk okv̄to, yakni a imaiyachi hoke; micha yakni a nan isht imaiyachi kv̄t nana pi yimmi ka ilv̄ppak oke.

5. Kvta hosh yakni a imaiyachi cho? amba Chisvs vt Chihowa ya Ushi a yimmi kak o banoshke.

6. Oka, micha issish aiena kak o isht otv̄nit aya tok vt Chisvs Klaist ilv̄ppak oke: oka yak o illa keyu; amba oka, micha issish aiena tok. Mikma Shilombish ak osh ai ahli ka mak okv̄t, Shilombish ak osh atokowa ka anoli hoke.

7. Tuchina hosh nan atokoli kv̄to v̄ba ya asha, Iki, micha Anumpa, mikm̄vt Shilombish Holitopa aiena kak oke; mikm̄vt tuchina ilv̄ppv̄t achv̄fa hoke.

8. Yohmikma tuchina hosh nan atokoli kv̄t yakni a asha, Shilombish, micha oka, mikm̄vt issish aienv̄shke; mikm̄vt tuchina ilv̄ppv̄t ai it im achv̄fa hoke.

9. Hatak osh nana atokoli ka pi yimmi chatuk ma, Chihowa hosh nana atokoli ho kak heto ai i shahli fehna hoke. Chihowa yv̄t nana ai atokoli Ushi ya isht ai anohonli tok ilv̄ppak oke.



10. Kuna hosh Chihowa Ushi ya i yimmi hokvto, nan isht atokowa kv̄t ilapo inlit anukfoiyuka hoke: kuna hosh Chihowa ya ik i yimmo hokvto, Chihowa yvt Ushi a nan isht ai atokowa ka anoli tok a, ik yimmo hokvt, ymma holabi hoke.

11. Yohmi ka Chihowa yvt ai okchayvt bilia ya pim issa tok ilvppak osh nan atokowa annoa mak oke; mikma ai okchaya ilvppvt Ushi yak o ai in takali hoke.

12. Kuna hosh Ushi vt anukfoiyuka hokvto, ai okchaya ya ishi hoke; mikma kuna hosh Chihowa Ushi yvt ik anukfoiyuko hokvto, aiokchaya yvt ik im ikshoshke.

13. Chihowa Ushi hohchifo ha yimmi vhleha hvchia hv̄t ai okchaya bilia yvt hvchin takanli kv̄t hvsh ithaiyana chi, mikmv̄t Chihowa Ushi hohchifo ha hvchi yimma chi aiena kak o na yakohmi ka pit hvchi holissochi li hatuk oke.

14. Nana ka ilap nan ai ahni ka ya pit ai vlhpesa ho isht ai il im asilhhvchi hokma, pi haponaklo pulla ka ilvppa pi yimmi hoke.

15. Micha nana ho il im asilhha ka, pi haponaklo ka il akostininchi hokmv̄t, anonti nana ho il im asilhha tuk vt, il eshi kv̄t il akostininchi mak inlishke.

16. Hatak nana hosh itibapishi hv̄t nan ashvchi kv̄t isht ai illa he keyu ho isht ai ashvchika pisa hokmv̄t, ymmak ash ot asilhha na isht ai illa he keyu yo isht ai ashvchi tuk vhleha hash ymmv̄t ai okchaya ya ima hi oke. Isht ai illa he ai ashvchika yvt takanlishke; yohmi hokvno vba pit isht anumpula hi a ak mihoshke.

17. Nana ai vlhpesa keyu vt aiashvchika yo banoshke; yohmi ka isht ai illa he keyu nan ai ashvchika yvt takanlishke.

18. Kuna hosh Chihowa yak o isht a toba tuk okvto, asahanchi keyu chatuk a il ithanvshke: amba Chihowa ak o isht a toba tuk okvto achukmalit il apesahanchi chatuk; yohmikma nan okpulo ymmak ash ot ik halelo chatuk oke.

19. Micha pishno vto Chihowa yak o immi pia; mikma yakni moma kv̄to ik ai vlhpeso banot talaia ka iloh ithanvshke.

20. Micha Chihowa Ushi vt vla cha, yvmmak osh nan ai ahli ka mak atuk ash il akostinincha chi ka, nan isht akostininchi a pi anukfoki tuk a iloh ithanvshke ; yohmi ho pishno vt yvmmak osh nan ai ahli ka mak atuk Ushi Chisvs Klaist a il ai ibai achvfa hoke. Ilvppak osh Chihowa ai ahli, micha ai okchayvt bilia mak oke.

21. Ulla chipunta ma! na holbvt toba ya hvch ik ai ahalaio kashke. Amen.

## CH AN

## I HOLISSO A TUKLO HOKE.

Nan isht ai i hullo a kvllot achunancha chi ka ohoyo holitopa, im vlla aiena ka i miha, 1; 10 Klaist im vbanumpa ha isht aya keyu yvt na yoshublichy yoka yvmma hvchik ahalaio kashke.

1. UBANUMPESHI sipokni yokvt ohoyo vlhtoka, micha im vlla vhleha aiena ka pit ai okpvchishke, yvmmak ash o vno vt ai ahli hosh i hullo li chatuk; mikmvt vno ak bano chatuk keyu; amba nan ai ahli ka akostininchi tuk okvto i hullo ak inli chatuk;

2. Nan ai ahli ka yvt a pi nukfoyuka kvv a pi nukfoyukvt bilia chi pulla ho yvmohmi hoke.

3. Hvch i hullo li ai ahli mak osh Iki Chihowa, mikmvt Iki a Ushi, Chitokaka Chisvs Klaist ita tuklo a mihinti nan isht i kana, mikmvt ai i nukhakloka, micha nan isht it i nanaiya aiena kvv hvchi anukfoyuka hi a ahni lishke.

4. Anumpa vlhpisa Piki vt pima tok mak o, chim vlla vhleha hvv nan ai ahli ka mak o ai itvnowa na pisa li kvv, sa yukpa fehna tuk oke.

5. Yvmohmi ka ohoyo ma! anumpa vlhpisa himona nana ho pit chi holissochi li ho keyu: amba vmmona mak inli ho hvpin tonla tok ash iloh it i hulla he yak o chim ai ahni lishke.

6. Mich a im anumpa vlhpisa yak o ai iakaiyvt il itvnowa ilvppak osh nan i hullo mak oke. Ilvppak osh anumpa vlhpisa mak oke; vmmona mak inli ho hvsh hahaklo tok vt, yvmmak o hvsh ai itvnowa he tuk oke.

7. Na yoshubli laua kvv yakni a atiapa cha, Chisvs Klaist



vt haknip asha hosh vla tok a atokowa anoli keyushke. Il-  
vppak osh na yoshubli, micha Klaist i sanali aiena mak oke.

8. Hvsh il apesahanchi pulla na nana ka iloh atahli tuk  
vt ik hvp i knvio hosh, amba ai vlhtoba vlhpiesa ka iloh  
ishashke.

9. Kvna hosh ashahanchi cha, Klaist im anumpa anuk-  
foyukvt aya keyu hokvto, Chihowa ya pit ai ibai achvfa ho  
keyu hoke. Kvna hosh Klaist im anumpa ha afoyukvt aya  
hokvto, mihi yosh Iki, micha Ushi aiena ka pit ai ibai achv-  
fa hoke.

10. Kanima kvv ayvt hvchim vla kvv, anumpa ilvppak o  
isht aya keyukma, hoyot hvchim aboha ya hvch ik chuko-  
wachokmvt, hvch ik ai okpacho kashke.

11. Kvna hosh yvmma ai okpvchi hokvto, nan ik vlhpeso  
a yohmi ya pit ahalaia mak oke.

12. Nana ka pit chi holissochi la hi vt laurt asha; yoh-  
mi kvv holisso tohbi, micha isht holissochi okchi aiena ho  
isht a pit holissochi la he keyushke; amba nashuka bika it  
atokowvt anumpulit a pi yukpa fehna chi ka, vno vt ayvt  
chim ona la chi, vm ahoba hoke.

13. Chitibapishi ohoyo vlhtoka ya im vlla vhleha hvv pit  
chi ai okpvchishke. Amen.

## CHAN

## I HOLISSO ATUCHINA HOKE.

Kaivs vbanumpa anukfoyuka ka im ahninchit miha, 1; 5 i kanvt hiahni ka im aiokpanchi; 9 Tiotifvs nan akaniohmi kvno vllpesa ik im ahno; 12 Temetivs vno ahninchit isht anumpuli.

1. ŪBANUMPESHI sipokni yokvt Kaivs holitopa fehna ymma ai ahli hosh i hullo li chatuk mak o pit ai okpv-chishke.

2. Holitopa ma! chi haknip vt achukmaka cha, i shahlit ia kv, chi shilombish vt isht i shahlit ia kak inli ho chohma hi a ahni li kak osh nana moma ka vm i shahlishke.

3. Il itibapishi vhleha hv ai vla mv, nan ai ahli ka yvt a chi anukfoyuka cha, nan ai ahli ka ai ish ataya ka atokowa anohonli ka a sa yukpa fehna tok.

4. Na sa yukpa kv, vm vlla vhleha hv nan ai ahli ka ya ai itvnowa na haklo li ka vm i shahli kv iksho.

5. Holitopa ma! il itibapishi vhleha, micha hatak itvnowt aya aiena ka nana ho ish ai i kaniohmi kv, ish ai ahli achukma bieka hoke.

6. Yvmmak ash ot, i hullot ish apelahanchi ka, chvch a im a chi atokowvshke; yvmmak oka nowt aya ka Chihowa aiahni vllpiesa ho pit ai ish apelahanchi hokmv ish ai vllpiesa he mak oke:

7. Yvmmak okvt ymma hohchifo pulla hatuk mak o Chentail a nanasi kia ik im ai esho hosh itvnowt aya hatuk oka.

8. Yohmi hoka pishno vt nan ai ahlika ya pit ai im

apelvchi pia ha chi kv̄t, yv̄mma chohmi ka ai okpv̄chit nana il im atahanla he v̄lhpiesa hoke.

9. Chv̄ch a pit i holissochi li tok; yohmi kia yv̄mma ai i shahli bv̄nna hosh Tiotlefes yv̄mmak okv̄t ik pim ai okpacho tok oke.

10. Yohmi hoka v̄la li hokmv̄t, yv̄mmv̄t nana a kaniohmi tuk, anumpa okpulo ka isht a pi achukushpv̄li tuk: mikmv̄t yv̄mma illa hokv̄to ik im ono mv̄t, anonti il itibapishi v̄hleha h̄a ai okpv̄chit nan ik im atahlo mv̄t, anonti kanima kv̄to yohma he tuk a im al̄mmit, yv̄mmak ash chv̄ch a akocha weli tuk a ithaiyana la he mak oke.

11. Holitopa ma! nana kv̄t achukma keyu hokv̄no chik iakaiyo hosh, amba achukma kak ashke. Kv̄na hosh achukma h̄o a yohmi hokv̄to, Chihowa yv̄t anukfoyuka hoke, amba kv̄na hosh nan ik achukmo ȳa yohmi kv̄to, Chihowa ȳa pisa tok keyu mak oke.

12. Hatak moma, micha nana ai āhli ka fehna aiena kash kia Temetivs a annoa achukma ka anolishke; āhli, micha pishno ak kia yv̄mma ai atokoli kv̄t il anoli ak inlishke; yohmi kv̄t pishno nan il atokoli ka ai āhli ka hv̄sh ithaiyanv̄shke.

13. Nana ka holissochi la he vt lauv̄t āsha hatuk: yohmi kia isht holissochi okchi, micha isht holissochi aiena ak okv̄no isht pit ak chi holissocho ka chishke:

14. Yohmi kia chekosikma chi pisv̄t, nashuka ai it atokov̄t isht chim anumpuli la chi ka vm ahoba hoke, Nan isht il ai yukpa yv̄t chi anukfoyukashke. Pi kana v̄hleha hv̄t pit chi ai okpv̄chishke. Il iti kana v̄hleha h̄a hochifocha, pit ish ai okpv̄chashke. Amen.



## CHUTE

I HOLISSO HOKE.

Nan ai yimmika ya a kvllot achunanchit huela he im ahni, 1; 4 nan ithvnanchi ik ai ahlo puta kv̄t ib a chukowa he, yahmi kia yvm-mvt ai ilvr̄sha hi okv̄to im vhl̄taha; 20 Chihowa anukfoyuka yok-v̄to shilombish holitopa apelachi pulla, mikmvt v̄banumpohonli aiena pulla hosh ilap a okchal̄nchi cha, anonti inla na yoshubli isht a yoshuba tuk puta ma hlakoficha hi oke.

1. CHUTE, Chisvs Klaist in tishu, micha Chemis itibap-ishi hokvt, Iki Chihowa ya, i holitopa v̄hleha, micha okchaya he v̄lhtoka tok; micha Chisvs Klaist ak atuk pulla kak o ai ahlit i yimmit mahaya yvmmak o pit i holissochi kv̄t,

2. Isht i nukh̄aklo yvt hv̄chimmi hashke, micha isht iti nanaiya, micha nan i hullo aiena kv̄t hv̄chin lauashke.

3. A holitopa v̄hleha ma! nana ka achunanchi fehna hosh moma isht ai okchaya yak o pit hv̄chi holissochi la chikmvt, hv̄chi holissochi li kv̄t nana ka hv̄chi atohnochi la he vm v̄lhpiesa he tuk: yohmi kv̄t v̄banumpa ai ahli yvt himōna ma v̄banumpuli v̄hleha hoka im anoh̄owa tok ak o i yimmi aiahlit hv̄sh mahaya chi kv̄t yichina fehna hosh hv̄sh hoh̄o-yashke.

4. Yohmi ka hatak kaniohmi hokvt ik i nuktahlo fehna h̄o iba chukowa, yvmmak okvt nitak pilla kash o nan ik achukmo ilv̄ppa ai yvmohma he vt im v̄lhp̄ih̄isa tok: yvm-mvt Chihowa holitobli keyu hokvt, pin Chihowa isht i kana ya haui imma isht ai ih̄ikbi, micha yvmmak illa hosh Chito-

kaka Chihowa, micha pi Okchalinchi Chisvs Klaist ash o ik holitoblo hoke.

5. Yvmohmi ka Chitokaka yokvt kanimihchit Echip yakni a a kohchit okla ha hlakofichi ha yvt na yimma he keyu vhleha hokvno vbit taiyahli tok; ilvppa himonna mahvsh ithana hatuk ak inli kia, hvsh ithaiyana he mak o hvchim ai ahni lishke.

6. Micha enchil vhleha hokvt a toba vmmona tok ash inli ai ahanta keyu hosh, amba ilap ai ahanta kash issa tok puta hokvno, ai okhlilika chinto tvli itatakvli isht talakchit bilia hosh nitak chinto nan ai vlhpisa ka ona he im ai ahni hoke.

7. Yohmi ka Sotom, Komolah, micha tvmaha hochito auet i bilika aiena kash osh yvmmak ash o chiyuhmit, haui ai yvmohmi fehna, micha haknip inla ho asitia aiena tok vt nana ka isht ilbvsha he otaiyani mak osh isht i nukkilli luak bilia yo isht ilbvsha hoke.

8. Yvmmak o chiyuhmi hosh hollhpokunna liteha vhleha ilvppak kia haknip a litehli, nan i shahli ya kvllakshichi, micha hatak nan vlhtoka holitopa he vlhpiesa kia nan isht ik ahobalot anumpuli hoke.

9. Yohmi kia Mikael, enchil miko yvt nan isht ahullo okpulo ya it im anumpuli kv, Moses, haknip imma yo isht it im anumpunli kia, isht a hofahya he anumpa hoka mihachi kv nukshopa mv, amba Chitokaka yak osh chim olvbashke, achi tok.

10. Amba ilvppvto nana yakohmi puta ka akostininchi keyu kv, nan isht ik ahobalot isht anumpulishke; yohmi kv nampoam anukfila iksho yak i chiyuhmit, haknip nan isht ai anushkunna ithana yvmmak puta ho isht il ai okpvnit tahlishe.

11. Yvmmv i palvmmi mak oke; Ken nana a kaniohmi tok ak o chiyuhmit itvnowa hokvt, micha nan isht vlhtoba yak o bvna hosh Belam vt nan ashahanchi tok ak o chiyuhmit, ai yimitvt kvnvt yihlihimpa hatuk osh Koli vt i sanalit anumpohonlit isht illi ha tok a chiyuhmit isht ai okpulo tok.

12. Ilvppak okvt iti hullo impa hvch ibai impakmv, na

liteha vhleha yosh nukshopa kia ik im iksho hosh il impahanchi kv̄t; hoshonti oka iksho yō mahli puta kv̄t kanima isht aya; iti vni bv̄shit, vni iksho puta, hitukla illi, akshish momvt lobahli mak oke:

13. Okhv̄ta chito oka piakv̄chit it ai ihissot, ilap isht ahofahya ya pokpokit kohonchi; fochik yoshuba puta hoka ai okhlilika chinto yak osh yvm̄mak okv̄no immit bilia he im vlhpisa hoke.

14. Mihma Enok, Alvm isht ai unchululi ont isht untuklo kak kia, anumpa ilv̄ppa tikbanli anohonli kv̄t; Yakeh! Chitokaka yokv̄t i holitopa vhleha tahlepa sipokni pokoli ka ai itv̄pehvt vla kv̄t.

15. Moyuma ka nan im apesvt, Chihowa im antia he keyu yvt Chihowa ik holitoblo hosh nan ai vlhpesa keyu puta yvm̄ohmit ai asha chatuk, micha nan ashv̄chi Chihowa ik im antio vhleha hv̄t ilap i sanalit anumpa kv̄llo anumpohonli chatuk aiena moyuma ka na palv̄mmi ka onocha hi oke.

16. Ilv̄ppak okv̄t ik ahninchot lumasit isht anumpuli vhleha hosh ilap chukv̄sh okpulo nan ahni kak o iakaiya yoke; micha isht ilauata fehna anumpa puta ka itih ha isht anumpohonli kv̄t, ilap nan isht im achukma he, ahni kak osh, hatak nashuka puta ka ahninchu yoke.

17. Amba a holitopa vhleha ma! hv̄chishno yv̄to pin Chitokaka Chisvs Klaist im anumpeshi vhleha hv̄t tikba kash anumpa isht hv̄chim anumpohonli tok puta kak o hv̄sh ithaiyanashke:

18. Yohmi kv̄t ont ai ishtaiyopit mahayakma, nan isht ik ahobalo vhleha hv̄t Chihowa ik holitoblo hosh ilap chukv̄sh okpulo nan ahni kak o iakaiya hosh ai asha hi oka, hv̄chim anohonli tok a hv̄sh ithaiyanashke.

19. Ilv̄ppak osh vbanumpuli ik̄sa ai ahli ka il ai i filv̄mmi-chi kv̄t, haknip nan ahni yō iakaiya hosh, Shilombish Holitopa yvt ik im iksho hoke.

20. Amba a holitopa hv̄chishno yv̄to, Shilombish Holitopa yvt hv̄chi anukfoyuka hosh anumpa ilbv̄sha anumpohonlit, na hv̄chi yimmi holitopa fehna kv̄t hv̄sh il ai ahli-chashke;



21. Chihowa ya hvsh i hullo kv̄t hvsh il achunanchi hosh, Chitokaka Chisvs Klaist okv̄t hvchi nukhaklo na aiokchayvt bilia ya hvsh ona chi kv̄t hvsh hohoyashke.

22. Mikmvt yakohmi hoka im ahnit, kaniohmi kvno hvshi nukhaklashke.

23. Michā inla kvno nukshoblit halvllit, luak a a kohchit hvsh hlakofichi kv̄t, na fohka haknip isht aliteha yak heno hvsh i yuwalashke.

24. Yohmi ka yvmmak osh hvchi halanli hō ik hvch ibetvblo ka he, micha ilap ai o binili holitompa itikba ya anumpa ik achukmo hvchi onvtonla iksho nan isht il aiyukpa chinto hō isht hvchi ona hinla,

25. Pi Okchalinchi Chihowa hopoyuksa kak bieka yvmmak o isht a holitopa, isht a chinto, micha isht a miko, micha nan isht ai ahli aiena kv̄t himonasi, micha himak a pilla ka immit biliashke. Amen.

UBANUMPESHI CHAN A

NANA KUT IM OTUNI TOK.

## CAPTA I.

Uba nan im otaiyani tok vt tvli holisso lakna pula ai o hikia untuklo nan isht vllpisa ho Chan vt chvch untuklo Asia a hiohmaya ka pit i holisso chi tok, 1; 7 Klaist vt minta chi; 14 nan isht im ai ahli holitopa chinto aiena ka anoli.

1. CHISVS Klaist nan isht otvninchi yvmmak oka Chihowa hvv ima na in chekosikma nana a kaniohmi pulla chi ka, in tishu vhleha ha im otvnincha hi a tok; atuk o yvmmak ash osh im enchil ak o pit chvffichi hosh in tishu Chan a nan it apesa hosh im anoli tok.

2. Mihi yosh Chihowa im anumpa, mikmvt Chisvs Klaist nan isht im atokowa, micha nana ho pisa tok aiena kvv atokowa anoli tok mak oke.

3. Kvna hosh ilvppa it im anumpohonli, mikma kvna hosh na tikbanli annoa anumpa ilvppa haklo cha, nana hosh a holihiso tuk a holitobli hokvto momvt na yukpvshke; yakohma chi ka ai ona hosi hoka.

4. Chan vt Asia yakni chvch a hiohli untuklo ka pit aiokpvchi; yvmmvv okchayvt ahanta kvv, yvmmak osh okchayvt ahanta tok osh, anonti himak a pilla ka okchayvt ahanta he mak o nan isht i kana, isht it i nanaiya aiena kvv a minti, yvmma im ai o binili holitompa itikba ya a hiel Na shilombish untuklo aiena ka a minti;

5. Micha Nan atokowa anoli ai ahli, mikmvt illi tuk osh

falamvt tani kv̄t illi v̄hleha hak o Uttahpi hosh holitopa i shahli; micha miko yakni pakna ai asha puta I shahli Chisvs Klaist mak o a minti hosh hv̄chi anukfoyakashke. Hvp i hullo cha, na hv̄pim ai ashv̄chika puta hatuk ma ilap im issish ak inli h̄o isht achifvt hv̄p i kashofi cha,

6. Iki Chihowa na holitomp̄a isht im vtta, micha miko ȳo ohminchi hosh pi atokoli tuk mak osh mihi ȳo isht a holitopa, micha nana moma isht imaiya ita tuklo kv̄t immi hosh bilivt biliashke. Amen.

7. Yakeh! hoshonti h̄o il ai eshi hosh minti mak oke; yohmi ka hatak nishkin puta, mikma kv̄na hosh yv̄mma tvi halupa isht bahli tok v̄hleha ash kia moyumvt pisa he; yohmikma oklushi puta yakni pakna ai asha tuk vt moyumvt yv̄mmak atuk pulla kak o komuntvt yahaya hi oke; yakohmi mak inlashke. Amen.

8. Chitokaka nan okluha imaiya yvt himak a okchayvt ahanta kv̄t, yv̄mmak osh okchayvt ahanta tok osh, himak a pilla ka okchayvt ahanta he mak osh, Ūno ak osh Alfa, Omeka, ai isht ia v̄mmona, micha ont ai v̄hli aiena sia mak oke, achishke.

9. Chan sia hv̄ch itibapishi, mikmvt na palv̄mmi ka hv̄ch iba pih̄isa sia, micha Chisvs Klaist avehlichika ibafohka, micha Chisvs vt nuktanlv̄t achunanchi tok a ohmit isht a hv̄ch iba achv̄fa sia hatuk vt, Chihowa im anumpa, micha Chisvs Klaist nan isht im atokowa pulla hatuk mak o yakni tashaiyi Patmos hoehifo h̄o ont anta li tok.

10. Atuk osh Chitokaka i nitak o Shilombish Holitopa yvt si anukfoyuka feh̄v̄t ahanta li h̄o, v̄m asha ka imma ya nan ola chinto isht pufa ola h̄o chohmi kv̄t,

11. Ūno ak osh Alfa, mikmvt Omeka, v̄mmona, mikmvt ont ishtaiyopi aiena sia mak oke; yohmi hoka nana h̄o ish pih̄isa kv̄t holisso ha ish a holissochi cha, Asia yakni chv̄ch a hiohli untuklo Efesvs, micha Smvna, mikmvt Pvkamos, micha Hlaiatila, mikmvt Satis, micha Filatelfia, mikmvt Laotisea aiena ka pit ish pilashke, ahanchi h̄o haklo li tok.

12. Yohmi ma auet v̄m anumpohonli yv̄mmak ash o pisa



la chi hosh pit filema li tok. Yohmi kvt pit filema li mvt, tvli holisso lakna pvla ai o hikia untuklo ka pisa li tok:

13. Yohmi ma pvla ai o hikia untuklo yummak ash ik-lvna ya Hatak Ushi ak o holba hosh, anchi vt iyi pilla ona ho ai anchi hosh, tvli holisso lakna isht vskofvchi o chinuko foka ak o isht takehi hosh hikia tok.

14. Mihma noshkobo, micha pashi aiena kvt tohbi kvt chukfi hishi, micha okti pushi aiena kak o chiyuhmi ma, nishkin vt luak libbi hak o chiyuhmi tok:

15. Yohmi mvt iyi yvt malanta kvt tvli lakna yosh tvli abila yo fohkvt hullokmi tuk mak o chiyuhmi ma, itih ola kvt oka chinto fopa ho chiyuhmi tok.

16. Mihmvt ibbak isht impak imma ya fochik untuklo ho isht ieshi tok; mihma itih ha bvshpo falaia itahlakla halupa yosh a kohcha ma, nashuka yvt shohpakali kvt, hvshi tom-mi ai ahli tommi chatuk mak o chiyuhmi tok.

17. Yohmi ma yummak ash o pisa li mvt, illi yo choh-mit iyi ituma ya ont sa tula tok. Yohmi ma ibbak isht impak imma ya ishit si umbitepa mvt, Uno ak osh vmmona, micha ont ishtaiyopi aiena sia mak oke, ik chi nukshopo kashke.

18. Uno ak osh okchayvt ahanta sia mak osh, svlli tok nana kia, anonti yakeh! okchayvt sa bilia hoke, Amen: yohmi hosh isht ai illa he, micha shilombish aiasha aiena isht-tiwa ya ieshi li hoke.

19. Nana ish pisa tuk, micha nana kvt a kaniohmi, mik-mvt himak a pilla ho nana kvt a kaniohma he puta ka ish holissochashke.

20. Fochik untuklo svbbak isht impak imma alhto ho ish pisa kash, micha tvli holisso lakna pvla ai o hikia puta aiena kash ot nan isht vhpisa kvt ilvppak oke. Fochik untuklo kvt chveh a hiohli untuklo ka nan isht im vta vhleha untuklo kak oke; yohmikma pvla ai o hikia untuklo ish pisa kash ot chveh a hiohli untuklo kak oke, vm achi tok.

CHAPTA II.

Efesvs, 1, 8 Smvna, 12 Pvkamos, 18 Hlaiatila aiena chvch a hiohli ka vbanumpa isht im vtta puta nana hō pit i holissocha chi ka Chan a im apesa kv̄t, nana kv̄t ai v̄lhpiesa, anonti nana ka ik ai onot aiasha kak a tok.

1. CHVCH Efesvs a hikia nan isht im vtta ya pit ish i holissochashke: Ibbak isht impak imma ya fochik untuklo ka isht ieshi cha, tvli holisso lakna p̄vla ai o hikia untuklo hō iklv̄nna a nohowa yak osh ilv̄ppa puta ka achishke.

2. Nana ish a kaniohmi puta, nan isht ahantvt a chi hoyv-bli, nuktanlv̄t ish achunanchi, mikmvt ai v̄lhpiesa keyu v̄hleha hā kaniohmit ish im ahninchī keyu, yohmikmvt kv̄na kia ilap ak osh vbanumpeshi mak o ile miha hatuk kia, keyu hatuk puta ka imomaka pisvt holabi atuk o ish akostininchi:

3. Micha nana kv̄t palv̄m̄mi ka ish p̄hisa kia, nuktanlv̄t ish achunanchi, mikmvt vno sa bohchifo pulla hatuk mak o ish toksahanli mvt, ik chi hoyvblo a puta hatuk a chim ithaiyana lishke.

4. Yohmi nana kia vmmona ka nan i hullo chi anukfōyu-ka tuk vt chik a lauecho hatuk o, nana ka isht ak chim ahnincho kv̄t vm ashvshke.

5. Yohmi hoka kanima yō a hikivt ik a lauwt ish ia tuk vt pit anukfihinlit, ish ile kostininchi cha, nan isht ish ai vtta vmmona tok ak o ish yvmihchashke: yvmmak keyukma chekosi chim aya likmvt, ish ile kostininchi hō keyukma, chi p̄vla ai o hikia ya ishit, a hikia tuk a kanv̄llichī la hi oke.

6. Amba chishno yokvto ilv̄ppak o a chi yakohmi hatuk osh, Nikolaitan okla nana a kaniohmi puta ka chik ahnincho ka, yv̄mma vno ak kia ak ahninchoshke.

7. Kv̄na hosh haksobish vt i hinli hokvto, Shilombish Holitopa yvt chvch v̄hleha hā nan im ok ahanchi puta ka haklashke. Kv̄na hosh nana ka imaiyachit a hlopulli hokvto, mihi yosh ai-okchaya iti Chihowa i Palatais iklv̄nna hikia hatuk ma ai vpa hi a ima la hi oke.

8. Mikmvt chvch Smvna a hikia nan isht im vtta ya pit



ish i holissochashke. Ummona, micha ont ishtaiyopi aiena, yvmak osh illi tok vt, okchayvt ahanta mak osh, ilvppa puta ka achishke.

9. Nana ish a kaniohmi puta, mikmvt na palvmmi ish a pihisa puta, micha ilbvsha chim aiena, (yohmi kia nana kvt chin laua ka ithana li,) mikmvt kanima kvt nana ka ik ahobalot anumpulit mihi yo keyu kvt, amba Setan i sinakak mak okak osh, Chu mak o ile mihvt aiasha ka, ithana li hoke.

10. Nana kvt isht chi ai ilbvsha he puta asha ka chik i komunto kashke. Yakeh! hvsh kanima ka hvch imomaka pisa chi ka, Setan vt aboha kvlllo a hvchi apitta he; yohmikma nitak pokoli ho na palvmmi hvsh pisa chi hoke: ai ahlit mahayvt ont chillashke; yohmikma iachuka okchaya yo chima la he mak oke.

11. Kvna hosh haksobish vt i hinli hokvto, Shilombish Holitopa yvt chvch vhleha ha nan im ok ahanchi puta ka haklashke. Kvna hosh nana ka imaiyachit a hlopulli hokvto, ai illi atukla ka ik im a palvmmo ka he mak oke.

12. Mikmvt chvch Pvkamos a hikia nan isht im vtta ya pit ish i holissochashke: Bvshpo falaia itahlakla halupa ishi mak osh ilvppa puta ka achishke.

13. Nana ish a kaniohmi puta, mikmvt kanima yo Setan vt apehlichy yvmak kia ish ai vtta ka ithana lishke; yohmi kvt sa hohchifo hatuk ma kvlllochit ish ieshi mvt, anonti Antipas yvmak okvt vm antia ai ahlit atokowa otvninchi yosh hvchi takla ahanta tok a Setan ai vtta yak o ai vbi tok nitak foka kak kia, vno a is sai yimmi tuk vt chik kancho tok a ithana lishke.

14. Yohmi kia na holbvt toba puta isht aiokpvchi tuk puta ka vpa chi, mikmvt itin lumaka ma yvmohma chi ka, Israel okla itikba ya isht ai ibetvbli i bohla chi ka Belam vt Balak a im avvchi tok nan vlvvchi ilvppa holitobli vhleha yvmak o ish il a pehlichy hoka, nana ka isht ak chim ahnineho ka achafoa kvt vm ashvshke.

15. Yohmi mvt anonti Nikolaitan okla nana isht ithvnan-



chi yummak oka ak ahnincho chatuk mak o, mihi yo holi-  
tobli vhleha yummakma ish il apelhichi ak inlishke.

16. Ile kostininchí; yummak keyukma chekosi fehna  
chim aya lish, okla yummak oka bvshpo falaia svtih a  
kohcha hatuk ma ont isht itibi la he mak oke.

17. Kuna hosh haksobish vt i hinli hokvto, Shilombish  
Holitopa yvt chrch vhleha ha nan ok im ahanchi puta ka  
haklashke. Kuna hosh nana ka imaiyachit a hlopulli ho-  
kvto, mihi yosh manna lumpoa vpa chi ka ima likmvt,  
anonti tvli tohbi yo yvmma hohchifo himona yosh a ho-  
lisso, yohmi ka yvmma hatak nana hosh ithana he keyu,  
amba ishi tuk ak illa hosh akostininchí mak o ima la hi  
oke.

18. Anonti chrch Hlaiatila a hikia nan isht im vttá ya  
pit ish i holissochashke: Chihowa Ushi yvmmvt nishkin vt  
luak libbi ho chiyuhmi ma, iyi mvt tvli lakna malanta  
achukma ho chiyuhmi mak osh ilvppa puta ka achishke.

19. Nana ish a kaniohmi puta, micha ish i hullo, nan  
isht ish ahanta, na chi yimmi, nuktanlv́t ish achunanchi,  
mikmvt nana ish a kaniohmi puta, yohmi kv́t ont ishtaiyopi  
kak osh tikba ya tok a imaiyachi ka chim ithaiyana lishke.

20. Yohmi nana kia ohoyo Chesebel, yummak okvt ohoyo  
hopaii mak o ile miha hosh, yvmmvt an tishu vhleha ha  
nan im avrchit, yoshubli na itin lumaka yvmohma he, mik-  
mvt nana ka na holbv́t toba yo isht aiokpvchi tuk puta kia  
vpvt ai asha hi a, vhpesa ish im ai ahni hatuk oka, nana ka  
isht ak chim ahnincho ka achafoa kv́t vm ashvshke.

21. Yohmi mvt itin lumakvt ahanta chatuk vto ai ile  
kostininchí chi ka nitak a ima li tok, nana kia ile kostinin-  
chá he keyu ki tok.

22. Yohmi hoka yakeh! yvmma atuk ma topa pakna yo  
pit ai om bohli likmvt, yvmma itin lumaka yatuk ma na  
palvmmi chinto ka onochi la chi hoke; nana a kaniohmi  
yatuk puta kv́t ai ile kostininchí ho keyukma.

23. Mikmvt ohoyo yvmma im vlla vhleha hatuk ma illi  
mak o isht ahambi la chi hoke; yohmikma vno ak osh  
hatak chukvsh-nana ai ahni puta ka afvnalechit ithana sia

hatuk a chvch vhleha puta kv̄t ithaiyana he mak oke: yohmikma hvchishno hvsh a kaniohmi puta kak o isht ai v̄lhpesa aiyyukali mak o hvch ima la hi oke.

24. Yohmi kia hvchishno, micha inla Hlaiatila maya aiena, laua kv̄t kaniohmi hosh nan v̄lv̄vchi ilv̄ppak ash ik ahnincho, micha Setan vt im anukfila ont ai v̄hli mak o, okla miha ka, ik ithano hvchia hokvno na weki inla nana h̄o hvchi onochi la ch̄i h̄o keyu, hvchim achi lishke.

25. Amba nana ka hvsh ieshi mashko hatuk okvto, kv̄llochit hvsh ishi na v̄la li hayashke.

26. Yohmikma kv̄na, hosh nana ka imaiyachit, nana kv̄t yakohma he ahni li ka holitoblit im antivt a h̄lopulli hokvto, mihi yosh oklushi puta hatuk ma i shahla he mak o, vno a Aki vt v̄m apesa tok a, chohmichit im apesa la he mak oke:

27. Yohmikma yvmmak ash ot tv̄li fuli toba h̄o ieshi hosh yvmma nan im apihisa he; mikma yvmmak atuk mvt shuti tv̄na yosh na tv̄na tuk o bushullit tv̄moa chatuk a chiyuhma li oke.

28. Yohmikma yvmmak amo onnahninli fochik a ima la he mak oke.

29. Kv̄na hosh haksobish vt i hinli hokvto, Shilombish Holitopa yvt chvch vhleha h̄a nan im ok ahanchi puta ka haklashke.

### CHAPTA III.

Satis chvch hikia v̄banumpa isht im vtta ya nan i miha, 1: 3 ile nukh̄aklonchit ilekostininha ch̄i ka i miha: Filatelfia chvch hikia ka nan isht im vtta yvto nana ka ah̄lit achunanchit ahanta ka im ahninch̄i; 15 Laotisea chvch nan isht im vtta ya tuk vt libisha keyu, mikmvt kapvsa keyu aiena ha tuk o im alv̄m̄mi; 20 Klaist vt okhissa ya hikivt sokoha.

1. MIKMUT chvch Satis a hikia nan isht im vtta ya pit ish i holissochashke. Chihowa imi shilombish untuklo, micha fochik untuklo aiena il ai eshi mak osh ilv̄ppa puta ka achishke: Nana ish a kaniohmi puta, okchaya mak o chi hohchifo ak inli kia, illi yo chia hoka chim ithaiyana lishke.

2. Nana kvt ai vlhpiesa ahli hō Chihowa itikba ya ish a yvmohmi na pisa li keyu hoka, ahah! ish il ai ahni cha, nana kvt illi mak o mahaya kia asha mōma hatuk okvno ish hlampkohonchashke.

3. Yohmi kvt nana ka ish ishi, micha ish haklo aiena tuk vt, ithaiyanvt kvloochit ish ieshi cha, ish ile kostininchashke. Amba ahah! chik il ai ahno hok mvno, hukopa nowvt aya hō chohmi hosh ant chī kohcha la chī; yohmi ka hvshi kanvlli nana hō ant chī kohcha la chī ka ish ithana hi o keyu hoke.

4. Satis ak okvno holhtina kanomosi kvt, yvmmak okvto im ilefoka ya ik litehlo kvt, chim ashvshke; yohmi hatuk osh yvmmak okvto yvmmak a he im ai vlhpesa hokvt, na fohka tohbi foyuka cha svb ai itvnowa he mak oke.

5. Kvna hosh nana ka imaiyachit a hlopulli hokvto, mihi yosh nafohka tohbi a fohka he; yohmikma yvmma hohchifo hv̄t ai okchaya holisso a takali tuk a kashofi la he keyu, amba hohchifo hā Aki, micha im enchil vhleha aiena itikba ya ai anohonli la he mak oke.

6. Kvna hosh haksobish i hinli hokvto, Shilombish Holitopa yvt chvch vhleha hā nan im ok ahanchi puta ka hakashke.

7. Mikmvt chvch Filatelfia a hikia nan isht im v̄tta ya pit ish i holissochashke: Holitopa, ai ahli mak osh, Lewi im isht tiwa ya ieshi hosh, yvmmt okhishta haya, hatak nana hosh wakvmma he keyu; anonti tiwa haya, hatak nana hosh okhishta he keyu chatuk mak o ilv̄ppa puta ka achishke.

8. Nana ish a kaniohmi puta ka ithana lishke: yakeh! isht hlampko iskv̄tinosi kvt chin takanli cha, vm anumpa hā ish holitobli mvt, sa hohchifo hā chik kanchō hatuk oka, okhissa ya tiwit chi tikba ya hilechi li: yohmi ka hatak nana hosh yvmmak oka okhishta hi o keyu hoke.

9. Kanima kvt mih mak o keyu kvt, Chu mak o ile mihvt holabi vhleha hv̄t Setan i sinakak atuk a atokolit anoli la chī hoke: yakeh! yvmma puta kash ot chiyi ituma ya ai vlv̄t ant aiokpv̄chi hosh, vno vt chī hullo li hatuk a akostinincha hi a im anukfilli la chī hoke.



10. Chishno vt nuktanlv̄t ish achunancha hi chim apesa li tok v̄m anumpa h̄a ish holitobli tuk oka, vno ak kia na palv̄m̄mi yv̄mm̄vt yak̄ni pakna āsha puta ka imomaka pisa chi mak osh yak̄ni pakna onvtuyula hi oka, hv̄shi kanv̄lli yv̄mma fehna ka chi hlakofih̄inchi la he oke.

11. Yakeh! chekosi v̄la la chi mak oke: nana ish īshi yv̄mm̄mak atuk vt kv̄llochit ish īeshi pulla na iachuka h̄a hatak nana kia ik chim esho kashke.

12. Kv̄na hosh nana ka imaiyachit a hlopulli hokv̄no mihi ȳo an Chihowa in tempel in tonik o ikbi la he: yohmikma yv̄mm̄mak atuk m̄vt nitak nana ik kohcho ka he mak oke: yohmikma an Chihowa hohchifo, mikm̄vt an Chihowa in tv̄maha chito hohchifo, yv̄mm̄vt Chelusalem himona, an Chihowa ak o minti hosh v̄ba yak̄ni a a kohchvt v̄la hatuk a yv̄mma isht a holissochi la he, mikm̄vt, sa hohchifo himona ma yv̄mm̄mak ash isht a holissochi la hi oke.

13. Kv̄na hosh haksobish vt ī hinli hokv̄to, Shilombish Holitopa yvt chv̄ch v̄hleha h̄a nan im ok ahanchi puta ka haklashke.

14. Mikm̄vt chv̄ch Laotisea a hikia nan isht im vtta ȳa pit ish ī holissochashke: Amen, Nan atokowa anoli āhli, Chihowa nana ikbi tok a moma in Tikba mak osh ilv̄ppa puta ka achishke.

15. Nana ish a kaniohmi puta ma ithana li ka, chi kapv̄ssa, keyukm̄vt, anonti ik chi lv̄shposhke; yohmi ka chi kapv̄ssa hokm̄a, chi lv̄shpa hokm̄a, nana tuk okbano, ahni lishke.

16. Yohmi kv̄t chi kapv̄ssa keyukm̄vt, anonti ik chi lv̄shpo hosh peh chi libisha v̄mmona hatuk oka, hoitvt sa takha a kohchit chi kanchi la hi oke.

17. Nana kv̄t an laua kv̄t, ī shahlit isht ia hatuk osh nana kia sa bv̄nna keyu, ish āchi; yohmi cha na palv̄m̄mi pih̄isvt chilbv̄sha, micha nana ik chim iksho, chik hoponayo, nipi bano aiena ho kak osh chik ithano hokvt.

18. Nan chin laua chi kv̄t, tv̄li holisso lakna luak isht imomaka pisvt vl̄htaha ȳo vno ak o is san chumpa chi, mikm̄vt na fohka ish fohka cha, nipi banot hofahya kv̄t ik chim

iksho ka chi kvt, vno ak o na fohka tohbi yo is san chumpa chi, micha nishkin ahama ma an chumpvt, chi nishkin a ish ahami cha, ish hoponaya chi ka, chi miha lishke.

19. K<sup>na</sup> ho vno vt i hullo li hok<sup>vt</sup>to, nana ka im olvbbit kostin<sup>in</sup>chi li chatuk: yohmi hoka nana ka amosholi hosh ish ile kostin<sup>in</sup>chashke.

20. Yakeh! okhissa ya hiki<sup>vt</sup> suk<sup>o</sup>h<sup>o</sup>ha lishke: K<sup>na</sup> hosh vm anumpa ha haklo cha, okhissa ya tiwi hokma, iba chukowa lish, ibai impa likma, anonti ilap mvt subai impa chi mak oke.

21. K<sup>na</sup> hosh nana ka imaiyachit a hlopulli hok<sup>vt</sup>to, mihi yosh, vno vt imaiyachit a hlopulli lish, Aki a awant im ai o binili holitomp<sup>a</sup> ya a binili li kvt, yvmmak inli ho chohmit vm ai o binili holitomp<sup>a</sup> ya a binila chi ka, im apesa la he mak oke.

22. K<sup>na</sup> hosh haksobish vt i hinli hok<sup>vt</sup>to, Shilombish Holitopa yvt chvch vhleha ha nan im ok ahanchi puta ka haklashke.

# CHAPTA IV.

Chihowa im aiasha holitopa vba ya Chan vt pisa, 1 ; 4 hatak tikba pokoli tuklo akucha ushta ; 6 nan okchaya kvt itikba, olv<sup>l</sup> aiena ka nishkin<sup>vt</sup> alotowa ; 10 aiasha holitopa o binili kash o hatak tikba vhleha hash ot iachuka holitopa ya aka bohli cha, aiokpahanchi.

1. NANA kvt a yakohmi haya, anonti pit hopokoyo li ma, yakeh! vba shutik a okhissa yvt tiwa tuk atok: yohmi ma auet svt im anumpuli anumpa vmm<sup>o</sup>na haklo li ka, isht pufa yo chiyuhmi hosh, Ilvppak o oiyá, mikma himak a pilla nana a kaniohma he puta ka chim otv<sup>n</sup>inchi lashke, achi tok.

2. Yohmi ma mih-mak inli ho Shilombish Holitopa isht a sa nukfoyuka ma, ai o binili holitomp<sup>a</sup> kvt vba shutik a ai o hikia ma, ai o binili holitomp<sup>a</sup> yvmmak ash achvfa kvt o binili tok.

3. Yohmi ka ai o binili holitomp<sup>a</sup> o binili yvmmak okvt pisa ka t<sup>l</sup>li holitopa chaspa, micha satin aiena kak o holba

tok: mihma pisa ka emelal ak o holba hosh hinak bitepuli hvt ai o binili holitompa yash apakfoyupa tok.

4. Yohmi ma ai o binili holitompa yash ai o binili pokoli tuklo akucha ushta hosh hiohlit folubli tok: yohmi ma hatak tikba pokoli tuklo akucha ushta kvt na fohka tohbi abelkvchi hosh tvli holisso lakna iachuka ho iachukoli hosh ai o binili yash o binohmaya tok.

5. Yohmi ma ai o binili holitompa yash malvtha, hiloha ola aiena hosh a kohoncha tok. Mihma ai o binili holitompa yash itikba ya pula luak untuklo, ymmvt Chihowa imi Shilombish untuklo mak osh hieli tok.

6. Yohmi ma ai o binili holitompa itikba ya okhvta shohkoali hosh klistal ak o chiyuhmi hosh talaia tok; yohmi ma ai o binili holitompa ai iklvna, mikmv auet a bilika fullota aiena ka nan okchaya ushta kvt itikba, micha im ashaka aiena ka nishkin biekv alotowa hosh aiasha tok.

7. Yohmi ka nan okchaya vmmona kash ot koi chito yo holba ma, nan okchaya ont atukla kash ot wakushi yo holba ma, nan okchaya ont atuchina kash ot nashuka asha kvt hatak nashuka yo holba ma, anonti nan okchaya ont ai-ushta kash ot ossi hika ho holba tok.

8. Mihmv nan okchaya ushta hash ot sanahchi vt i han-nali aiyuka ma, nishkin biekv isht alotowa tok: mihmv ymmak ash ot, Holitopa, holitopa, holitopa, Chihowa Chitokaka nana moma imaiya, ymmak osh okchayvt ahanta tok osh himak a okchayvt ahanta kvt, himak a pilla ka okchayvt ahanta hi oke, ahanchi kvt nitak, ninak aiena ka ik ai yokoposhke.

9. Nan okchaya vhleha ymmak ash ot okchayvt ahantvt bilivt bilia yvt ai o binili holitompa o binili kash, yak oke im ai ahnit; holitoblit, aiokpahanchi ma,

10. Hatak tikba pokoli tuklo akucha ushta kash osh okchayvt ahantvt bilivt bilia yvt ai o binili holitompa o binili kash itikba ya ant hlipkvchit, aiokpahanchi mv, im iachuka hash shoelit ai o binili holitopa itikba ya pit ashachi mv,

11. Chishno ak osh nan okluha ka ish ikbi tok: micha



chishno nana ish ai ahni h<sub>o</sub> nana ai asha kv<sub>t</sub> toba tok oka, Chihowa ma! nan isht a holitopa, micha isht ahninch<sub>i</sub>, mikmvt isht chim ai a<sub>h</sub>li puta kv<sub>t</sub> a chimmi ha he vt chim v<sub>h</sub>pesa hoke.

CHAPTA V.

Holisso hv<sub>t</sub> nan isht ashana untuklo h<sub>o</sub> isht ashana h<sub>o</sub> Chan vt p<sub>i</sub>sa, 1; 9 yv<sub>m</sub>ma chukfvlhpoba ushi yvm<sub>m</sub>vt illi tok ak bano hosh wakama hi vt im v<sub>h</sub>pesa, yohmi hoka hatak tikba v<sub>h</sub>leha hashot yvm<sub>m</sub>mak ash o aiokpahanchi; 9 ilap im issish o isht okchalinch<sub>i</sub> tuk a okla anohonli.

1. Y<sub>U</sub>MOHMI ma a holisso yvt anukaka, mikmvt pakna aiena ka holisso hosh, isht ashana untuklo h<sub>o</sub> isht ashana hosh ai o binili holitopa o binili ibbak isht impak imma ya foyuka na pisa li tok.

2. Mihma enchil hlampko fehna kv<sub>t</sub> chitolit anumpohonli mvt, Kv<sub>t</sub>a hak osh isht ashana puta hatuk a mokohlich<sub>i</sub> cha, holisso hash tiwa hi vt im v<sub>h</sub>lpiesa cho? achi h<sub>o</sub> pisa li tok.

3. Yohmi ma vba shutik, micha yakni, mikmvt yakni nutaka aiena ai ahanta kv<sub>t</sub> kv<sub>n</sub>a kia holisso yv<sub>m</sub>ma tiwa he, mikmvt pisa he ai im v<sub>h</sub>lpiesa aiena kv<sub>t</sub> iksho ki tok.

4. Yohmi ma kv<sub>n</sub>a kia holisso hatuk a tiwi cha, it im anumpula he, micha yv<sub>m</sub>ma pisa he ai im v<sub>h</sub>lpiesa kv<sub>t</sub> iksho hatuk o, sa nishkin okchi vt mihinti fehna tok.

5. Mihma hatak tikba v<sub>h</sub>leha hash osh achv<sub>t</sub>, Chi nishkin okchi vt minti ná; yakeh! Koi chito Chuta okla a minti, yvm<sub>m</sub>vt Lewi a minti hakshish filaminchi yak osh isht ashana untuklo kash mokohlich<sub>i</sub> cha, holisso hash tiwa chi kv<sub>t</sub> ont im ai a<sub>h</sub>li hatuk oke, vm achi tok.

6. Yohmi ma yakeh! ai o binili holitopa, micha nan okchaya ushta, mikmvt hatak tikba v<sub>h</sub>leha aiena ka ai itin takla ya Chukfvlhpobushi vt hikia kv<sub>t</sub> illi tuk a ahoba hosh, lapish vt untuklo cha, nishkin mvt untuklo, yvm<sub>m</sub>vt Chihowa imi shilombish untuklo yakni moyuma ai im aya mak o pisa li tok.

7. Mihmvt yummak ash ot minti mvt, ai o binili holi-tompa o binili im ibbak isht impak imma holisso hvt fokatuk ash ant kohchit ishi tok.

8. Mihma yummvt holisso ha ant ishi ma, nan okchaya ushta, micha hatak tikba pokoli tuklo akucha ushta kash ot, hap, micha tvli holisso lakna nan ai vlhto yosh na balama alotowa, yummvt vbanumpuli puta im anumpa ilbvsha mak'osh yohmi ho ishi banot, Chukfvlhpobushi itikba ya okla ont hlipkvchi tok.

9, 10. Micha taloa himona ka okla talohowa kvt, Chishno ak osh chilli hosh oklushi ilaiyuka, im anumpa ilaiyuka puyuta, hatak okla moma a kohchi hosh Chihowa immi e toba chi ka, chishno chim issish ak o isht ish pi chumpa hatuk; yohmi hosh Chihowa ha na holitompa isht im vtta; micha miko vhleha aiena ka ish pikbi tok: atuk o yakni pakna ka a mikot il ai asha chi hoka, Chishno ak osh holisso hash ish ishi cha, isht ashana yash ish tiwa he vt a chim vlhpiesa hoke, ahanchi tok.

11. Yohmi ma pit pisa li ma, ai o binili holitompa bilika fullota ka, enchil vhleha laua, mikmvt nan okchaya, micha hatak tikba vhleha aiena ka itih ola bieka ho haklo li tok; yohmi kvt yummvt holhtena kvt tahlepa sipokni pokoli banot ia kvt tahlepa sipokni pokoli cha, anonti tahlepa sipokni bano hosh tahlepa sipokni achvfa hosh,

12. Chitolit miha hosh, Chukfvlhpobushi illi tok vt nan isht im ai ahla he, micha nan uha in laua, mikmvt isht a hopoyuksa, micha isht hlampko, mikmvt isht ahninchì, micha isht aholitopa, mikmvt isht aiokpanchi aiena ka a chimmi ha he vt chim vlhpesa hoke, ahanchi ho haklo li tok.

13. Yohmi ma vba, micha yakni pakna, mikmvt yakni nutaka, mikmvt okhvta anyakaka, nan okchaya aiasha tuk, mikmvt yumma puta aiasha tuk vt momvt, Ai o binili holi-tompa o binili, micha Chukfvlhpobushi ita tuklo kvt isht ai okpanchi, micha isht ahninchì, mikmvt isht a holitopa, mikmvt isht im ai ahli aiena kvt ai immi kvt bili vt biliashke, ahanchi ho haklo li tok.

14. Yohmi ma nan okchaya ushta kash ot Amen, achi tok: mihma hatak tikba pokoli tuklo akucha ushta kash ot aka hlipkvchi cha, okchayvt ahantvt bilivt bilia yash o aiokpahanchi tok.

CHAPTA VI.

Nan ashana kash it iakaiyachit wakamohli; tiwakma nana hosh kaniohmi; nana kv̄t ont ai v̄lhikma kaniohma he anoli.

1. YOHMI ma pisa li ho, Chukv̄lhpobushi vt holisso isht ashana achvfa kash tiwi tok: mihma hiloha wimimpa ho chiyuhmi hosh nan okchaya ushta kash ot achvft, Minti cha, ant pisa, achi ho haklo li tok.

2. Mihma yakeh! issuba tohbi yo pisa li tok: mihma iti tanampo ishi hosh yvm̄mak ash o o binili; yohmi ma yvm̄mak ash o iachuka ima ma, yvm̄mak ash ot imaiyachit hlopulla chi kv̄t imaiyahanchit ishit mahaya tok.

3. Atuk o anonti holisso isht ashana atukla kash tiwi ma, nan okchaya atukla kash osh, Minti cha, ant pisa, achi ho haklo li tok.

4. Atuk o issuba inla yvm̄mvt humma yosh kohchvt ia tok: yohmi ma yvma o binili kv̄t nanaiya hatuk a yakni pakna ya a mokofit isha chi kv̄t im v̄lhpisa na okla hv̄t ilap bika ya itilicha he mak atok; yohmi ma yvm̄mak ash o bvshpo falaia chinto ho ima tok.

5. Mihma anonti holisso isht ashana ont atuchina kash tiwi ma, nan okchaya atuchina kash osh, Minti cha, ant pisa, achi na haklo li tok; mihma yakeh! issuba lusa yo pisa li tok; mihma yvma o binili kv̄t nan-isht-weki ibbak isht ishi tok.

6. Yohmi ma nan okchaya ushta ai itintakla ya ai anumpa ola kv̄t, Iskvli achv̄fakma onush isht v̄lhpisa achvfa, mikma iskvli achvfa ka bale vt isht v̄lhpisa tuchinashke; yohmi kia ahah! ish ai ahni cha, alif vni, mikmvt oka paki aiena hokvno chik okpano kashke, achi ho haklo li tok.

7. Atuk o anonti holisso isht ashana ont ai ushta kash



tiwi ma, nan okchaya ont ai ushta kash osh miha mvt, Minti cha, ant písá, achi na haklo li tok.

8. Yohmi ma yakeh! issuba hato-lakna yo pisa li tok: mihma Isht-ai-illi hohchifo hosh yvmmak ash o o binili ma, ai okpulo ka ai asha tuk vt pit iakaiya tok. Mihma yvmmak ash ot yakni itakashkoa ont isht ai ushta ka bvshpo falaia, micha na hohchvfo, mikmvt nan-illi, micha nampoa nukshopa puta yakni pakna ai asha aiena kak o isht illicha chi kvt im vlhpisa tok.

9. Atuk o holisso isht ashana ont isht tahlapi kash tiwi ma, Chihowa im anumpa pulla, micha nana atokowa anolit ieshi pullvt isht illi tok vhleha shilombish vt alta nutaka ya ai asha na pisa li tok.

10. Mihma yvmmak ash ot, chitolit anumpulit miha mvt, Chitokaka ai ahli holitopa chia hvt pim issish a tok a atobvchi kvt yakni pakna ai asha ka chik im apeso ho, hopaki kvt katiohmi foka chi cho? ahanchi tok.

11. Yohmi ma yvmmak ash o ilefoka tohbi falaia holi-tompa aiyuka ho ima tok: mihma chekosi takla hokvno nukchintot fohvt maya na itibapishi vhleha tishu ilap ai itilaui puta kak kia, ilap ak atok ak inli ho chohmit illa hi atuk vt, ont ai ahla hi a i miha tok.

12. Mihma holisso isht ashana ont isht hannali kash tiwi ma, yakeh! yakni winakvchi chinto ho pisa li tok: mihma hvshi vt lusa kvt na pashi tvnna yo chiyuhmi ma, hvshininak-aya vvt issish ak o chiyuhmi tok.

13. Yohmi ma vba fochik puta kvt chilofvt akakoha kvt, fik vpi vvt mahli kvlllo fehna ho faiokahanchi na ik ai ono ho vni vt chilofa chatuk ak o chiyuhmi tok.

14. Mihma vba shutik vt ita pahlatvt, a holisso yosh bonuntvt ont taiyahvt kvnia ho chohmit pit kvnia tok: mihma nvnih chaha, micha tashaiyi puta kvt a taloha tuk a a kanullit taha tok.

15. Mihma miko vhleha yakni pakna ai asha tuk, micha hatak hochitokaka vhleha, mikma hatak nan in laua vhleha, kvpitvni hochito, hatak holitompa vhleha, mikmvt hatak yuka, micha hatak yuka keyu puyuta kvt nvnih chaha

puta tvi hochito aiena ka chiluk ai asha tuk a a lumpoa tok.

16. Mihmvt nvni chaha puta, micha tvi hochito aiena kash o, Auet hvsh pi o kinahli cha, ai o binili holitempa o binili ka i nashuka, micha Chukfvlhpobushi nan isht i nuk-killi aiena hatuk ma pisht hvsh i luhmashke.

17. Himak a nan isht i nukkilli nitak chinto kvv vlshke; yohmi ka kvta hak osh hikia hinla cho? achi tok.

CHAPTA VII.

Chihowa in tishu vhleha ibitakla ya enchil osh in chunli, 1; 4 Israel isht ai unchululi laua kanihmi hosh yakohmit nan isht ai in chuwa, 9 Oklushi inla mvt aholhtina iksho hosh in chuwa, ilvppak ashot na tohbi holitopa falaia isht fohkvv aiasha holitopa itikba ya hiohmaya; 14 im anchi vt chukfvlhpobushi im issish o isht ahchifa ha tok.

1. **ATUK** o ai yvmohmi ha ya, enchil ushta kvv, mahli hvv yakni, micha okhvt, mikmvt iti aiena ka ik o mahlo ka chi ka, yakni auet a mahli ushta hatuk ma ieshi hosh, yakni achukbeli ushta ka hiel ho pisa li tok.

2. Mihma anonti enchil inla hosh Chihowa okchaya im isht in chuwa ishi hosh hvshi akochaka imma yo vttvt oiyvt minti ho pisa li tok; mihma yvmmak ash osh enchil ushta yakni, micha okhvt aiena okpva chi im vlhpisa tuk ash o chitoli hosh pit in tahpvlvt,

3. Yakni, mikmvt okhvt, micha iti puta aiena ka hvch ik okpano ho, hvpin Chihowa in tishu vhleha ibitakla ya iloh in chonli hayashke, ahanchi tok.

4. Atuk o in chuwa tok vhleha holhtina ka haklo li tok: yohmi ma Israel okla isht ai unchululi vhleha moma kvv tahlepa sipokni banot tahlepa achvfa cha, tahlepa sipokni pokoli ushta akucha ushta hosh in chuwa tok.

5. Chuta isht ai unchululi hvv tahlepa sipokni auah tuklo hosh in chuwa tok. Luben isht ai unchululi hvv tahlepa sipokni auah tuklo hosh in chuwa tok: Kat isht ai unchululi hvv tahlepa sipokni auah tuklo hosh in chuwa tok.

6. Ase isht ai unchululi hvt tahlepa sipokni auah tuklo hosh in chuwa tok. Neftalim isht ai unchululi hvt tahlepa sipokni auah tuklo hosh in chuwa tok. Manasses isht ai unchululi hvt tahlepa sipokni auah tuklo hosh in chuwa tok.

7. Simeon isht ai unchululi hvt tahlepa sipokni auah tuklo hosh in chuwa tok. Lefai isht ai unchululi hvt tahlepa sipokni auah tuklo hosh in chuwa tok. Issaka isht ai unchululi hvt tahlepa sipokni auah tuklo hosh in chuwa tok.

8. Sabulon isht ai unchululi hvt tahlepa sipokni auah tuklo hosh in chuwa tok. Chosef isht ai unchululi hvt tahlepa sipokni auah tuklo hosh in chuwa tok. Benchamin isht ai unchululi hvt tahlepa sipokni auah tuklo hosh in chuwa tok.

9. Ilvppvt ai yakohmi haya, anonti yakeh! okla chinto felna, hatak nana hosh hotelna kvv tahla he keyu mak o, oklushi ilaiyuka, im anumpa ilaiyuka puta yakni pakna ai asha moma ka a minti hosh, ilefoka tohbi falaia holitompa abehkvchi hosh, pam vt ibbak a foyuka ho ai o binili holitompa, micha Chukfulhpobushi ita tuklo itikba ya hielu ho pisa li tok.

10. Mihma chitolit miha hosh, Hvpin Chihowa ai o binili holitompa o binili kak osh, micha Chukfulhpobushi ita tuklo kak osh pi okchalanchi tuk mak oke.

11. Mihma enchil vhleha ai o binili holitompa, micha hatak tikba vhleha, mikmvt nan okchaya ushta aiena kash a foluplit hielu tuk vt ai o binili holitompa itikba ya okla oka hlipkvchit Chihowa ha aiokpahanchi mvt,

12. Amen, hvpin Chihowa yvt hopoyuksa, hlampko, micha nan okluha imaiya aiena hoka, yak oke im ai ahnit ahninchit, holitoblichit, il aiokpahanchi na bili vt biliashke, Amen, ahanchi tok.

13. Yohmi ma hatak tikba vhleha hash ot achvvt auet anumpuli mvt, Ilefohka tohbi falaia abehkvchi yakohmi kvv kvta ho? micha katima yo okla minti tok oh cho? vm achi tok.

14. Mihma, A shahli ma! yvmmak okvno ish ithanvshke, im achi li tok. Mihma, Ilvppa yakohmi kak osh na palvm-



mi chinto h<sub>o</sub> asht kohchvt aya hosh, im ilefoka yash Chukfulhpobushi issish o isht achifvt tohbichi tok mak oke.

15. Yohmi hatuk osh Chihowa im ai o binili holitompaitikba ya nitak, micha ninak moyuma ka yvmma in tempel anukaka ya aiokpahanchi hoke: yohmi ka ai o binili holitompaitikba kvt yvmma ai itin takla ya ahanta hi oke.

16. Yohmikma himak a pilla ma ik hohchafo ka he, mikmvt ik itukshilo ka he, mikmvt hvshi vt ik onvtulo ka he, mikmvt kocha lvshpa mvt ik towulhkocho ka hi oke.

17. Chukfulhpobushi ai o binili holitompaitikba yvmmak osh impvchit, pehlichit oka kvli okchaya hiohli puta ka isht ohona he: yohmikma Chihowa ak osh nishkin okchi puta ma mominchit i kasholichit tahla he mak oke, vm achi tok.

CHAPTA VIII.

Nan ashana ont isht untuklo kash o wakami, 1; 2 isht pufa untuklo h<sub>o</sub> enchil untuklo ka ima, 6 ushta kvt olachi ma na palvmmi chinto kvt otvni; 3 enchil achvfa kvt vbanumpuli vhleha vba pit anumpohonli taklak ma tvli holisso lakna alta toba ka na balama pit o bohli.

1. ATUK o holisso isht ashana ont isht untuklo kash tiwi ma, hvshi kanvlli isht vhpisa iklvna itintakla ka vba aholitopa yvt chullusvt talaia tok.

2. Mihma enchil untuklo Chihowa itikba hielituk a pisa li tok: yohmi ma yvmmak ash o isht pufa untuklo h<sub>o</sub> ima tok.

3. Mihma enchil inla hosh tvli holisso lakna na-balama ai-vlhto yo sholi kvt, mintit alta ya ant a hikia tok: yohmi kvt vbanumpuli vhleha moyuma kvt vba pit anumpohonlikma ai atakla ma tvli holisso lakna alta toba yvt ai o binili holitompaitikba hikia tuk a ai o hulukma chi ka, na balama laua h<sub>o</sub> ima tok.

4. Atuk o na balama ya a shobulli kvt, vbanumpuli vhleha vba pit anumpohonli ka ai itiba fokvt enchil ibbak a.a kohchvt ia hosh, Chihowa itikba ohona tok.

5. Atuk o enchil ash ot na balama ai vlhto yash ishi cha, alta yak o luak a ai ishit alotuli mvt, aka pit fohobli tok; yohmi ma nan ola, micha hiloha, malvtha, mikmvt yakni winakvchi aiena tok.

6. Mihma enchil untuklo kash ot isht pufa untuklo ka ishi tuk ash, olacha chi kvt il ai atahli tok.

7. Mihma enchil vmmona kash ot olachi ma, hatafo, mikmvt luak, issish it ib vlhto aiena ho yakni a o kanchi tok: mihma iti okchaki moma ka a kashapa ont isht a tuchina kvt luvt taha ma, hvshuk okchaki mvt. momvt luvt taha tok.

8. Mihma anonti enchil ont atukla kash ot olachi ma, nv-nih chito yosh luak o isht luhya chiyuhmi hosh okhvta ha pit okatula tok: mihma okhvta a kashapa ont isht atuchina kvt issish o toba tok.

9. Yohmi ma okhvta anukaka nana toba tok puta im ilh-fiopak asha tuk vt, kashapa ont isht atuchina kvt illi tok; mihma peni hochito yatuk vt kashapa ont isht atuchina kvt okpulot taha tok.

10. Mihma anonti enchil ont atuchina kash ot olachi ma, fochik chito yosh pva ho chiyuhmit luhya hosh, vba shutik a a mintit aka ant itola cha, okhina puta kashapa ont isht atuchina, mihmvt kvli a hiohli kashapa ont isht atuchina aiena ka onvtula tok.

11. Yohmi kvt fochik ymma hochifo kvt wumwut achi hatok; yohmi hatuk o oka moyuma ka kashapa ont isht atuchina kvt wumwut o toba tok: mihma oka ak osh takbvt kvnia hatuk oka, hatak vt oka yash o isht illi kvt laua tok.

12. Mihma anonti enchil ont ai ushta kash ot olachi ma, hvshi, hvshi ninak aya, fochik puta aiena kvt koyufa ont isht atuchina hosh ai okpuloka tok; yohmi hatuk osh koyufa ont isht atuchina kvt im okhlili na nitak koyufa ont isht atuchina kvt ik tommo ma, anonti ninak vt mihinli tok.

13. Mihma anonti pit hopokoyo li mvt, enchil achvfa kvt ossi hika ho chiyuhmit vba shutik iklvna ya hlopullit aya mvt, chitolit tahpvlvt, enchil tuchina kash ot himak pilla isht pufa ola inla ka olacha chi kvt asha ka, yummak osh

ohonla hokvno, hatak yakni pakna asha hatuk vt i Palvmmi, palvmmi, palvmmi chinta chi mak oke, ahanchi ho haklo li tok.

CHAPTA IX.

Enchil ont isht tahlapi kash ot olachi ma, fochik vt aka auet itula ma, yvmmak ash chittuk hofobi ont ataha he iksho isht tiwa ya ima, 1 : 2 chiluk ash o tiwi ma hawa puta halambia ho choh mi hosh auet kocho wiha tok; 13 isht pufa isht hannali kash ot ola; 15 mihma enchil ushta talakchi atuk vt i holhtofa.

1. YUMOHMI ma enchil ont isht tahlapi kash ot olachi ma, fochik vt vba shutik ak o a mintit yakni a ant onvtula ho pisa li tok; mihma yvmmak ash o chiluk hofobi ont ai vhli iksho isht tiwa ya ima tok.

2. Mihma yvmmak ash ot chiluk hofobi ont ai vhli iksho yash tiwi ma, tvi a bileli chito yo shobullit a kohcha ka, chiyuhmit chiluk hofobi a a shobullit kohoncha tok; mihma chiluk hofobi a a shobullit kohoncha kak o hvshi, micha shutik takla aiena kvv isht okhlilit kvnia tok.

3. Yohmi ma hawa puta mvt shobohli ka asht kohchvt, yakni a ai itvnova tok; yohmi ka yvmmak atuk mvt nan okpvna he im vllhpisa kvv, halambia yakni pakna ai asha kvv nan okpvna he im vllhpisa tok ak inli ho chiyuhmi tok.

4. Yohmi mvt yakni pakna hvshuk ai asha ka, micha nan okchaki puyuta, mikmvt iti aiena hokvno ik okpano ka chi, amba hatak kaniohmi hosh Chihowa im isht in chuwa yvt in lapanli keyu hatuk ak illa chi ho im vllhpisa tok.

5. Yohmi kia yvmmak oka ik illichu ka chi, amba ilvp-pak ash ot nan i palvmmi kvv hvshi tahlapi ka ona chi ho im vllhpisa tok; yohmikma hawa vt yvmmak ash o i palvm-michi kvv halambia hosh hatak a nvhlikmvt i palvmmichi chatuk a chiyuhmi tok.

6. Mikmvt nitak yvmma foyuka hokvno hatak vt illa hi a hohoyo kia, ik ahayucho ka he; micha illi ka ik bvna kia, nan illichu vt i kvnihya hi oke.

7. Yohmi ma hawa yash osh issuba hosh tenvp ia chi hosh im vllhtahvt kvnia chatuk a chiyuhmi tok: mihmvt tvi



holisso lakna holba ho iachuka iachukoli ma, nashuka yvt hatak nashuka yo chiyuhmi tok.

8. Mihmvt pashi vt ohoyo pashi ak o chiyuhmi ma, noti vt koi chito noti yo chiyuhmi tok.

9. Yohmi mvt ikkishi alata puta kvt tvli ikkishi alata holba ho okla ishi tok: mihmvt i sanahchi fopa kvt itichanvli issuba laua shali ho tenvp itibit ia hosh yihleptv aya na winihvchi ho chiyuhmi tok.

10. Mihmvt hasimbish vt halambia hasimbish o holba hosh asha ho, nan isht nvhli mvt asha tok; yohmi hosh nan im vlpisa kvt hvshi tahlapi ho hatak a ilbvshala chi hatok.

11. Mihmvt i miko vt binili tok: yvmmtv chiluk hofobi ont ai vhli iksho a im enchil mak a tok: yvmmtv Heblu anumpa hokma Abatton hohchifo ma, amba Klik anumpa hokvno hohchifo kvt Apolyon oke.

12. Nana palvmmi achvfa kash ot ant ivt kvnia ma, anonti na palvmmi tuklo hosh himmakma mihinta chi oke.

13. Atuk o enchil ont isht hannali kash ot olachi ma, tvli holisso lakna alta Chihowa itikba hikia tuk lapish ushta ka, anumpa ola hvt a kohcha mvt, enchil ont isht hannali kash ot isht pufa ishi hosh hikia kash o,

14. Enchil ushta talakchi yosh okhina chito Euflates a oka asha ka ont ish i hotofashke, im achi ho haklo li tok.

15. Mihma enchil ushta kash ot i holhtofa mvt, hatak puta kashapa ont isht atuchina ka vba chi kvt, hvshi kanvli achvfa, nitak achvfa, hvshi achvfa, afvmmi achvfa aiena ka im vlhtaha tok.

16. Mihma issuba o binilit tenvp aya holhtina kvt tahlepa sipokni tahlepa tuklo bat tahlepa sipokni achvfa tok: mihma holhtina ka haklo li tok.

17. Mihma nan isht atokowa kvt yakohmi ho pisa li tok; issuba o binili vhleha ilvppak ash ot ikkishi alata yvmmtv humma, micha okchamali, micha lakna ai itaiyoma aiena ho ieshi tok; mihma issuba noshkobo hvt koi chito noshkobo ho chiyuhmi ma, itakha ya luak shobohli, mikmvt hituk lakna aiena hosh a kohoncha tok.

18. Luak shobohli, mikmvt hituk lakna aiena kvt itakha

ya a kohoncha tuchina ilvppa pulla kak o, hatak moma ka kashapa ont isht atuchina kv̄t isht illi tok.

19. Itakha, mikmvt hasimbish aiena ka nan isht i palvm-micha hi vt im vlhpisa hoke; mihmvt i hasimbish vt nosh-kobo asha kv̄t sinti chilita yo holba hatuk o, ilvppak o nana ka isht okpani yoke.

20. Yohmi kia nan isht ahullo okpulo puta, micha tvli holisso lakna, tvli hvta, mikmvt tvli lakna, tvli, iti aiena naholbvt toba puta, yummvt pisa keyu, micha haklo kia haklo keyu, mikmvt nowa kia nowa keyu aiena ilap ibbak vt ikbi tuk okvno ik aiokpacho ka chi kv̄t, hatak kanimi na palvmmi ilvppa isht ik illo ke tuk okvto yvmma i filvmmi ik ile kostinincho kish;

21. Hatak vbi, il isht ahullochi, nan itin lumaka, micha na hukopa aiena ka i filvmmi ik ile kostinincho ki tok oke.

CHAPTER X.

Enchil hlampko kv̄t holisso tiwa yvt ibbak a foyuka ho haiaka, 1, 6 okchaya bilia yvmmak atuk mak o himak ma nitak vt atakala chi keyu, achi tok: 9 holisso hosh ishi cha vpa chi kv̄t, Chan vt im vlhpisa.

1. YOHMI ma enchil chinto inla yosh hoshonti ho iba-foyuka hosh vba shutik a mintit aka vla na pisa li tok; mihma hinak-bitepuli hosh noshkobo ha apakfoyupa ma, nashuka yvt hvshi yo chiyuhmi ma, anonti iyi yvt luak tonik o chiyuhmi tok.

2. Mihmvt holisso iskv̄tinosi kv̄t wakama yo ibbak a isht ieshi tok; mihmvt iyi isht impak imma ya okhvta ha o hilechi mvt, anonti iyi isht im afvbekimma yano yakni ya o hilechi cha,

3. Koi chito woha chatuk a chohmit chitolit tahpvlvt miha tok; atukmvt yvmmak ash ot tahpula ma, hiloha untuklo kv̄t hilohoha tok.

4. Atuk o hiloha untuklo kash ot hilohoha haya, holissochi la chi hatok; atuk ak o vba aholitopa ya auct anumpa na, Nana yakohmi ka hiloha untuklo kash ot anumpuli tuk

a chik holissocho hosh ishi ashanichashke, um achi na haklo li tok.

5. Yohmi ma enchil yummvt okhvta, micha yakni ita tuklo ka o hikia na pisa li kash, yummak ash ot ibbak a vba shutik pit weli tok.

6. Mihmvt okchayvt ahantvt bilivt bilia, yummak osh vba, micha yumma nana kv̄t aiasha puta, mikmvt yakni, micha yumma nana kv̄t aiasha puta, mikmvt okhvta, micha yumma nana kv̄t aiasha puta aiena ka ikbi tok mih mak o isht a mihvt anumpa kv̄llo isht il onochi kv̄t, nana kv̄t a yohma he tuk ont ia he keyu ka hi atok;

7. Amba enchil ont isht untuklo im anumpa chi nitak okvno yummak ash ot olachit isht iakma, Chihowa nana ai ahi tuk vt in tishu hopaii v̄hleha nan im otv̄nichi tok mak osh ont v̄lhtaha chi mak oke.

8. Yohmi ma anumpa yumma vba aholitopa pit a haklo li tok ash ot anonti auet um anumpuli tok: mihmvt, Ia cha, holisso iskv̄tinosi yummvt tiwa yash enchil, yummvt okhvta, micha yakni ita tuklo ka o hikia ka ibbak foka ka ont ishi, um achi tok.

9. Mihma enchil ash im ona lish, Holisso iskv̄tinosi yash et v̄má, im achi li tok: mihma, Ishi cha, v̄pvt tahlí; yohmikma chikfoka ya takbacha chi hoke, amba chitakha anyakaka yano champuli kv̄t foi bila yo chohma chi hoke, um achi tok.

10. Yohmi ma enchil ibbak a a kohchit holisso iskv̄tinosi yash ishi lish, v̄pvt tahli li tok; mihma satakha anyakaka yokvno champuli kv̄t foi bila yo chohmi tok: yohmi kia isht nanv̄bli li mak inli ho, sakfoka yash ot takv̄t kv̄nia tok.

11. Mihma yummak ash ot, Hatak oklushi, mikmvt im anumpa ilaiyuka, miko v̄hleha puta lava ka itikba ya nana ka tikbanli ish ai otv̄nihincha chi pulla hoke, um achi tok.

## CHAPTA XI.

V̄lhtokowa anoli tuklo hosh nan anohonli, 1; 5 ik umbo ka chi ka vba shutik akamala hi vt im v̄lhpisa; 7 nampoia nukshopa yvt i sanalit



itihibit yvmmak ash vbi; 8 ik hollopo hosh kaha na, 4 nitak ont atuchina cha iklvnvt aiena ma tanit okla; 15 isht pufa isht untuklo kashot oia.

1. YŪMOHMI ma kushak osh fuli yo holba ho vma tok; mihmvt, Wakaya cha, Chihowa in tempel, micha alta, mikmvt kva hosh yvmma ai ashvt aiokpahanchi vhleha aiena ma ish apesashke.

2. Yohmi kia apishia, yvmvt tempel a ai ibachvfa keyu hoka, yvmmak okno Chentail okla ho immi hoka, chik apeso kashke; yohmi ka hvshi pokoli ushta cha tuklot aiena ka tmaha chito holitopa ya iyi pvtha okla isht a hvhlihinchā chī hoke.

3. Mikma nan isht ai ahli ka nana vm atokowa ishi tuklo ka imā la chī; mikma mihi yosh pashi tvnna na fohka yo foyuka hosh nitak tahlepa sipokni achvfa cha, tahlepa tuklo pokoli hannali aiena ka nana ka tikbanli otvnihincha chī hoke.

4. Ilvppak osh Alif iti tuklo, mikmvt pva ai o hikia tuklo aiena kv̄t yakni pakna in Chihowa itikba hielī mak oke.

5. Yohmi ka hatak nana hosh ilvppa ilbvshali hokma, ilvppak ash itakha ya luak osh a kohcha hosh in tvnvp puta hatuk ma isht vpa hoke; yohmi ka hatak nana hosh yvmma ilbvshali hokmvt, nana ai yakohmi mak o illashke.

6. Ilvppak ash osh nan ai atokowa anohonli kv̄t isht ahanta takla nitak a ik umbo ka chī ka, vba shutik a okshita hi vt ilvppak osh ai im vlhpesa mak oke; mikmvt oka puta ma imaiyvt yvmmak ash o issish o ikba hi vt ai im vlhpesa; mikmvt yvmvt nana ka ik yohmi ahni hokmvt, na palvm-mi puta ma yakni ya isht ihissa hinla hoke.

7. Yohmi tok kia ilvppak ash ot nana atokowa ishi kash ot ont taiyahli tuk mak o, nampoā nukshopa chiluk hofobi ont ai vhli iksho a kohcha mak osh in tanampit, yvmmak ash imaiyachit vba hi oke.

8. Mihma tmaha chito yvmmak o hvpin Chitokaka yak kia ititaiyukhvna a honahla tok, nan isht it apesa kv̄t Sotom, micha Echīp achi ka hina yvmma illi haknip vt a kaha chī hoke.

9. Mikma okla ilaiyuka im anumpa ilaiyuka, oklushi puta mvt nitak tuchina cha iklvnna aiena ka, illi haknip ash·pihi-sa kia, ahollopi ya ik a hollopi, okla ik ai ahno ka hi oke.

10. Yvmiohmikma yakni paknaka ai asha tok puta ka hopaii tuklo ilvppak ash osh i palvmmihinchii tuk oka, yakni paknaka ai asha ak inli kv̄t nan isht il im ai yukpvt, na yukpa ikbit mayakmvt, ilap bika nana iti habenvchit ai asha hi oke.

11. Yohmi na nitak tuchina cha iklvnna aienakma shilombish okchaya Chihowa ak o a minti hosh yvmmak ash chukowa ma, yvmmak ash ot ilap iyi yosh isht o hinli tok: mihma ilvppa pisa puta tok okvno na nukshopa chinto kv̄t onvtuyula tok.

12. Yohmi ma vba aholitopa a minti anumpa chito ka haklot okla ma, Oiyvt ho minti, auet im ahaya tok. Mihma vba aholitopa ya ia kv̄t hoshonti anukaka mahaya ma, in tenvp puta tuk vt pihisa tok.

13. Mihma hvshi kanvlli yvmmak inli ho yakni vt winakvchi chito tok; mihma tmaha chito kashapa ont isht pokoli kv̄t kinafa tok; yohmi ma hatak tahlepa sipokni untuklo hosh yakni winakvchi ka ai illi tok; mihma hlakofi tok okvto nukhlakancha mvt, vba aholitopa in Chihowa ya holi-toblichii tok, achi tok.

14. Na palvmmi atukla kash ot ant a yohmi ka, anonti yakeh! na palvmmi atuchina kash ot chekosikma minta chi hoke.

15. Atuk o enchil isht untuklo kash ot olachi tok: mihma anumpa ola chinto kv̄t vba aholitopa ya auet takali kv̄t, Yakni ilvppa avehlichika puta kv̄t hvpin Chitokaka, mikmvt Ushi Klaist ita tuklo im avehlichika yo tobvshke; yohmi hatuk o mihi yosh mikot ahanta na bilivt bilia hi oke.

16. Yohmi ma hatak tikba pokoli tuklo akucha ushta, yvmvt Chihowa itikba ya ilap im ai o binili o binohlit maya kash osh aka hlipkvchi cha, Chihowa ha aiokpahan-chi mvt,

17. Chitokaka Chihowa nana moma imaiya ma! okchayvt ahanta tok osh, okchayvt ahanta, anonti himak a pillā

ma okchayvt ahanta he chia, yohmi kvt chishno nan isht chim ai ahli chinto ma il ai ishit, mikot ish ahanta hoka, yak oke e chim ai ahnishke, ahanchi tok.

18. Yohmi ka oklushi puta chukvsh vt nukhobela tok: mikma nan isht ish i nukkilli yvt vlvshke: mikma illi puta kvt nan im ai vlhpisa chi, mikmvt chin tishu hopaii vhlaha, mikmvt vbanumpuli ahli puta, mikmvt kvna hosh chi hohchifo ha i nukshohompa aiena hokvno nan isht vlhtoba ma ish ai ima chi, mikmvt kvna hosh yakni ya okpuni hokma, yvmma ish ai okpvna chi nitak vt vlvshke.

19. Yohmi ma Chihowa in tempel vt vba aholitopa ya a tiwa tok; mihma in tempel anukaka ya nan it im vlhpisa itombi holitopa kvt otvni tok; mihma malvlha, anumpa ola, hiloha, micha yakni winakvchi, mihmvt hatafo chito aienā kvt a takali tok.

CHAPTA XII.

Ohoyo hvt hvshi yo isht foyukvt vlla isha chi nan i palvmmi, 1; 4 sinti chilita humma yosh yvmmak ash itikba hikia kvt im vlla ya isht vpa chi kvt im vlhtaiyaha; 6 vlla yvt in tola mvt, ohoyo hash ot yakni haiaka yo pit maleli; 7 Mikael, mcha im enchil aiena kvt nan okpulo sinti chilita yash itihibit imaiyachi; 13 sinti chilita yash ot vba mintit aka itola cha, ohoyo hash i tvnahampi tok.

1. YOHMI ma na fehna chinto kvt vba shutik a ai otaiyani kvt, ohoyo hosh hvshi yo foyuka ma, hvshi-ninakaya yvt iyi nuta yo takali tok, yohmi ma fochik auah tuklo iachuka toba ho iachukoli tok.

2. Mihmvt yvmmak ash ot chakali hatuk osh, vlla itola he nan isht i palvmmi na hotopa tuk vt itola hokbano ahnit, tahpahanla tok.

3. Mihma na fehna inla kvt vba shutik a ai otvni kvt, yakeh! sinti chilita humma chinto hosh, noshkobo hvt im untuklo mvt, anonti in lapish vt pokoli ma, iachuka untuklo kvt noshkobo ha afoyua tok.

4. Mihma i hasimbish vt vba fochik a kashapa ont isht atuchina ka halanlit aka auet fohopli tok; yohmi ma vlla yvt



in tola he ai ona hatuk o, vlla yvt itola mak inli hō isht im vpa chī kv̄t, ohoyo hash itikba sinti chilita yash ot hikia tok.

5. Atuk o yvmmak osh tv̄li fuli yō ieshi hosh okla moma ka imaiyachit nan im apesa chī mak o, ohoyo hash ot vlla nakni yō sholi tok; atuk o im vlla yash o Chihowa, mikmvt im ai o binili holitompa pilla a maya tok.

6. Yohmi ma yakni haiaka kanima yō ai v̄tta hi o Chihowa yvt ai im atahli tok mak o, ohoyo hash ot pit maleli tok: yvmmak o nitak tahlepa sipokni achvfa tahlepa tuklo cha pokoli hannahit aiena ka yvmmak oka okla nan ai im atahanla chī hatok.

7. Mihma vba yā ai it in tanampit ai asha tok: Mikael vt im enchil v̄hleha aiena kv̄t sinti chilita yash itihimbi ma, anonti sinti chilita yash ot yvmmak ash, mikmvt im enchil aiena ka itihimbi kia,

8. Imaiyaichi keyu ki tok; mihmvt ai v̄tta he nana kia vba yā iksho ki tok.

9. Mihma sinti chilita chinto, sinti sipokni, nan isht ahullo okpulo, micha Setan achi chatuk, yvmmak osh yakni moma ka yoshubli chatuk mak o yvmma a kohchi tok, atuk o aka pilla hō yvmmak ash ot pit itola tok; mihma im enchil v̄hleha hash ot apehvt pit kaha tok.

10. Mihma vba aholitopa yā anumpa ola chinto ka pit a haklo li ma, Himak ano isht ai okchaya, isht hlampko, mikmvt hv̄pin Chihowa im apehlichika, micha Ushi Klaist nan isht im ai ahli aiena hash ot vlvshke; hv̄p itibapishi v̄hleha i nukkillit na-mihachi yvmmak osh nitak, ninak aiena ka hv̄pin Chihowa itikba yā ai i nukkillit na-mihachi yatuk ash osh aka pit itolvshke, ahanchi tok.

11. Mihmvt Chukfvlhpobushi im issish, mikmvt ilap im anumpa isht atokowa puta hō yvmmak ash okla isht imaiyachi tok; yohmi kia isht ai illa he kia, ilap im ilhfiopak a i hullo tok keyu.

12. Yvmohmi hoka vba aholitopa puta, micha yvmma ai asha puta hv̄chia ma! ho yukpá, nan isht ahullo okpulo, yvmmvt chekosi itintakla hō anta chī kv̄t ithana hosh, nan isht i nukkilli chinto ka il āi eshit hv̄chim v̄la hoka, yakni

pakna, miĉha okhvta aiena ka ai asha tuk vt nana i palvmmi mak oke.

13. Yohmi ma sinti chilita yash ot aka ya pit itola kv̄t il ithana mvt, ohoyo yvmmak osh vlla nakni ishi kash, ilbv-shahli tok.

14. Mikma ilap ai v̄tta yakni haiaka hikv̄t ia chi ka, ohoyo hash ossi chito sanahchi tuklo h̄o ima tok; yohmi ma yvmmak o afvmmi tuchina iklvnnvt aiena ka sinti chilita yash o itikba ai i filvmm̄it ai ilhpihintashke.

15. Mihma sinti chilita yash ot oka falama ohmi kv̄t oka yo ohoyo hash iakaiyachit ilap itakha a kohchi kv̄t, yvmmvt oka chito yosh yvmmak ash shalit kanima isht ia hi a ahni hatok.

16. Yohmi tok kia yakni vt ohoyo hash apela tok; mih-mvt yakni ash ot ilap itakha ya wakvmmi cha, oka chito yvmma sinti chilita yvt ilap itakha ya a kohchi kash isht nanvpli tok.

17. Yohmi ma sinti chilita yash ot ohoyo hash i nukkilli fehna mvt, ivt ohoyo hash isht ai unchululi kaniohmi maya, yvmmvt Chihowa im anumpa v̄lhpisa puta ka holitobli, mik-mvt Chisvs Klaist nan isht im atokowa aiena ka ieshi v̄hleha hash o in tanampi tok.

# CHAPTA XIII.

Nampoā nukshopa yvt noshkobo hv̄t untuklo, lapish mvt pokoli hosh okhvta h̄a akohcha tok; mihma yvmmak o sinti chilita yash ot nan ai ahli ima tok, 1; 11 nampoā nukshopa inla yosh yakni a akohcha; 14 nampoā nukshopa tikba ya tuk toba chi ka na holbvt toba ya im ahni; 15 yohmi na yvmmak ash o hatak puta kv̄t aiok pabancha chi; 16 mikmvt isht ai in chywa chi ha tok.

1. YUMOHMI ma okhvta shinuk pakna ya ai o hikia li mvt, nampoā nukshopa achvfa kv̄t okhvta h̄a a koyucha h̄o pisa li ma, noshkobo hv̄t untuklo mvt, lapish vt pokoli, mihma in lapish pakna ya iachuka pokoli ma, anonti Chihowa isht ik ahobalo holchifo hosh noshkobo h̄a ai o holisso tok.

2. Mihma nampoa nukshopa yvmma pisa li kash o koi chikchiki ho holba ma, iyi yvt nita iyi yo chiyuhmi ma, anonti itakha mvt koi chito itakha yo chohmi tok: mihma sinti chilita yash ot nan isht hlampko, micha miko ai o binili, mikmvt nan isht im ai ahli aiena ka yvmmak ash o ima tok.

3. Yohmi ma yvmma noshkobo achvfa kamo nvhlvt isht illa hi o chiyuhmi tok; atuk ak osh nvhlvt isht illa he kash ot hlakofi tok; mihma nampoa nukshopa hash o yakni moma kv, okokko! ai ahnit iakaiya tok.

4. Yvmohmi mvt sinti chilita yvmmak osh nampoa nukshopa ya nan isht ai ahli ima hatok oka, okla aiokpahanchi mvt; anonti nampoa nukshopa hash o okla aiokpahanchit, Kvta hosh nampoa nukshopa holba cho? kvta hosh yvmma in tanampit ahanta hinla cho?

5. Yohmi ma na chinto fehna, micha nana ka ik ahobalo puta isht anumpula chi ka yvmmak ash o itakha ima tok; yohmi ka hvshi pokoli ushta akucha tuklo ka a moyumvt isht ahanta chi mak osh im vlhpisa tok.

6. Yohmi ma yvmmak ash ot itakha ya wakvmmmit, Chihowa ya ik ahobalot isht anumpulit, i hohchifo, micha im vlhtipo, mikmvt vba aholitopa aiasha puta ma ik ahobalot na mihachi tok.

7. Yohmi kv vbanumpuli ahli vhleha in tanampit yvmmak ash o imaiyacha chi kv nan im vlhpisa tok; micha hatak oklushi ilaiyuka, mikmvt im anumpa ilaiyuka puta ka imaiyacha chi ka yvmmak ash o nan isht im ai-ahli ima tok.

8. Mikma kvna hosh hohchifo hv yakni tobt a minti tok ai vhli ka vlhtobvt illi tok Chukfulhpobushi i holisso ai-okchaya a holisso tok keyu kv, yakni pakna ai asha moma kv yvmmak ash o aiokpahancha chi hoke.

9. Hatak nana hoh kia haksobish vt i hikiakmvt, ik haklo.

10. Kvna hoh kia inla ya yuka ikbit isht aya hokvto, ilap mvt yuka tobt aya hi oke; kvna hoh kia inla ya bvshpo falaia yo isht vbi hokvto, ilap mvt bvshpo falaia yo isht



illa hi oke. Ilvppak o vbanumpuli vhleha hvt nuktanlv  
achunanchit na yimmi ka isht otaiyani hoke.

11. Yakohmi ma nampoa nukshopa inla kvt yakni a auet  
a kohcha na pisa li tok; yohmi ka yvmmak ash ot in lapish  
vt asha kvt Chukfvlhpobushi ak o holba mvt, anonti sinti  
chilita yak o chiyuhmit anumpuli tok.

12. Mikmvt yvmmak ash ot nampoa nukshopa vmmona  
isht im ai ahli ash yvmma itikba yo isht ahanta hoke; mik-  
mvt yakni, micha yvmma ai asha pit aiena kvt nampoa  
vmmona, yvmmvt bahvt illit hlakofi tok ash aiokpahancha  
chi ka im ahni hoke.

13. Mikmvt yvmmak ash ot na fehna chinto ka yvmihchi;  
yohmi hatuk osh yvmmak ash ot luak vt vba mintit hatak  
puta itikba yakni a ant onvtuyula chi ka ahni hoke.

14. Yohmi hatuk osh yvmmak ash ot nan im ai ahlit  
nampoa nukshopa itikba ya na fehna puta ka a yvmihchi  
kak osh yakni pakna ai asha puta ka yoshublihinchu mvt;  
bvshpo falaia isht baha tok kia, anonti okchaya tok nampoa  
nukshopa yvmma na-holbachit okla im ikba chi ka, yakni  
pakna ai asha vhleha ha im ahanchi hoke.

15. Mihmvt nampoa nukshopa holba yash ot anumpuli,  
mikmvt laua kvt kanihmi hosh nampoa nukshopa holba  
yash aiokpvcha hi o keyukmvt, illa hi a aiena ka im ahna hi  
oka nampoa nukshopa holba yash ilhfopak ima hi vt im  
vlhpisa hoke.

16. Yohmi kvt hochitoka, mikmvt ik a lauwo, nan in  
laua, mikmvt ilbvsha, yuka keyu, mikmvt yuka a moyuma  
kvt ibbak isht impak imma, keyukmvt ibitakla ya in chuwa  
hi a yvmmak ash ot im apesa yoke.

17. Yohmikma hatak nana kia nanasi kia chumpa, keyuk-  
mvt kancha he keyu mak a tok: amba kvna hosh nampoa  
nukshopa isht in chuwa, yvmmak keyukmvt i hohchifo, yv-  
mak keyukmvt i hohchifo ha isht a holhtina kvt isht ai in  
chuwa ak a hi oke.

18. Ilvppak o nan isht ithana yoke. Kvna kia im anuk-  
fila isht akostininchu im ashakmvt, nampoa nukshopa isht  
im a holhtina ka ik hotehna, yvmma hatak vt a hotehna

yoka: yohmi ka yvmma isht im a holhtena kv̄t tahlepa hannali cha pokoli hannali akucha hannali hoke.

## CHAPTA XIV.

Chukfvlhpobushi vt ilap ai itapeha itapehvt Saion nv̄nih a hiohmaya,

1. 6 Enchil osh vbanumpa isht anumpuli; 8 Babulon vt akama; 15 yakni pakna nawaya hoiyo; 20 Chihowa nan isht i nukkilli oka paki toba ya itahobi:

1. YAKOHMI ma hopokoyo li ma, anonti yakeh! Chukfvlhpobushi ash osh Saion nv̄nih ha o hikia ma, tahlepa sipokni bat tahlepa achvfa cha pokoli ushta akucha ushta kv̄t, yvmma Iki i hohechifo hv̄t ibitakla ai o holisso hosh yvmmak ash o apeha tok:

2. Yohmi ma vba aholitopa ya auet anumpuli ka oka laua fopa, mikmvt hiloha chinto ola chiyuhmi ho haklo li tok: mikma hap olachi vhleha hv̄t ilap i hap ai olahanchi na ola ka haklo li tok.

3. Yohmi ma ai o binili holitompa itikba, mikmvt nan okchaya ushta, micha hatak tikba vhleha aiena itikba taloa himona yo okla a talohowa tok; yohmi ka taloa yvmma hatak nana hosh ithvna he keyu ma, amba tahlepa sipokni bat tahlepa achvfa cha pokoli ushta akucha ushta yvmmak o yakni a a kohchit chumpa ak illa tok.

4. Ilvppak ash osh ohoyo nana kia isht a liteha tok keyu, vhleha hoke; ohoyo himithoa hatak haleli keyu ho chiyuhmi vhleha hoke. Ilvppak ash osh Chukfvlhpobushi, yvmmvt kanima yo ia hoh kia, iakaiya vhleha mak oke. Ilvppak o hatak puta ai itintakla a kohchit chumpa tok o, Chihowa, micha Chukfvlhpobushi ita tuklo ka immi nawaya vmona vhleha hoke.

5. Yohmi ka yvmma itakha ya na holabi kia ai otvni cha-tuk o keyu; Chihowa ai o binili holitompa itikba ya na liteha nana kia ik im iksho vhleha hoka.

6. Yakohmi ma anonti okla, oklushi ilaiyuka, mikmvt hatak im anumpa ilaiyuka moma yakni pakna ai asha tok a

im anumpula chi hosh, enchil inla yvt vbanumpa ai ahli bilia il ai eshi hosh vba shutik iklnna ya hikvt aya mvt,

7. Chitoli hosh mihvt, Chihowa hvt nan ai apesa chi hvshi kanvlli vt vla hoka; yvmmak o i nukshumpvt ho holitobli; micha yvmmak osh vba shutik, yakni, okhuta, mikmvt kvli hiohli puta aiena ka ikbi tok oka, oh aiokpahanchi, ahanchi na pisa li tok.

8. Yohmi ma anonti enchil inla kvv iakaiya mvt, Ilap nan itin lumaka nan isht haksichi oka paki chiyuhmi ho okla moma ka ishkocho tok okvt, Babulon tmaha chito yvmmak ash ot aiokpulokushke, aiokpuloka mak oke, ahanchi tok.

9. Anonti enchil ont isht atuchina kvv yvmmak ash o pit iakaiya mvt, chitoli hosh mihvt, Hatak nana kia nampoa nukshopa, micha yvma holvvt toba yash aiokpvchi cha, anonti isht in chuwa ma ibitakla, keyukmvt ibbak isht impak imma okma, nana ka isht ai in chuwa hok mak osh,

10. Mihi yosh Chihowa nan isht i nukkilli oka paki yvm-mvt nan itaiyoma keyu hosh, yvmvvt nan isht i nukhobela isht ishko ya a toshowa mak o ai ishka chi hoke; yohmik-mvt yvmmak ash ot enchil holitopa vhleha itikba, mikmvt Chukfvlhpobushi itikba aiena ka luak, micha hituk lakna aiena ho isht ai ilbvsha hi oke, ahanchi tok.

11. Atuk o yvma isht ai ilbvsha shobohli hvt vba ai ihiya kvv bilvvt bilia hoke; yohmi ka kvna hosh nampoa nukshopa, micha yvma holvvt toba yash aiokpahanchi, mikma kvna hosh yvma i hohchifo isht in chuwa ya isht ai in chuwa hokvto nitak, ninak aiena ka a foha he ik im iksho vhleha hoke.

12. Ilvppak o vbanumpuli vhleha hvt nuktanlvvt achu-nanchi ka isht otaiyani hoke; ilvppak o Chihowa im anumpa vlvpisa puta holitobli, micha Chisvs i yimmi aiena ka isht otaiyani hoke.

13. Yakohmi ma vba aholitopa ya auct anumpa na haklo li ma, Ish holissochashke, Kvna hoh kia himak a pilla ka Chitokaka ya ibai achvvt illi hokvto na yukpa hoke; ahli yvmmak okvt nana ka isht ahantvt isht hoyvbli tok puta ka a mokovvt a foha chi hatok, Shilombish Holitopa yvt



achishke; mikma nan-toksvli puta kash ot ilap a iakaiya hoke, vm achi tok.

14. Atuk o anonti yakeh! hoshonti tohbi ka pisa li ma, hoshonti pakna ya hatak Ushi ak o holba hosh o binili cha, tvli holisso lakna iachuka iachukoli mvt, anonti nan isht vlmo halupa fehna ka ibbak isht ieshi tok.

15. Mihma enchil inla yvt tempel a a kohchvt minti mvt, hoshonti o binili yvmmak ash chitolit in tahpvlvt, Nan isht chim vlmo ya fahvmmi na-waya ya vmó; nan ish ma he vhpesa ka ai ona hoka; micha yakni pakna nan a waya kvv a laknvt tahvshke, im achi tok.

16. Mihma hoshonti o binili yvmmak ash ot nan isht im vlmo ya ishit yakni pakna moma o fahvmmi tok: mihma yakni vt vlmot taha tok.

17. Anonti enchil inla yosh yvmmak kia nan isht vlmo halupa ka ishi hosh, tempel vba aholitopa talaia ka auet a kohchvt minti tok.

18. Mihma enchil inla yvmvvt luak o imaiya hosh alta ya ai vttvt kohchvt minti tok: mihmvt nan isht vlmo halupa ishi yvmmak ash o chitoli hosh in tahpvlvt, Nan isht chim vlmo halupa yash ishi cha, yakni pakna pakvpi ai vnit pokospoa ka tvptulit itahobi; paki vt nuna fehvt taha hoka, im achi tok.

19. Mihma enchil ash ot nan isht im vlmo yash yakni pit o fahvmmi mvt, yakni pakna pakvpi a ai vmot itahobi cha, Chihowa nan isht i nukkilli ya oka paki atoba chito ya pit fohopli tok.

20. Yohmi ma tvmaha chito kochanli ak o oka paki atoba yash o a hvhlichu tok: mihma issish osh oka paki atoba yash a kohoncha kvv, kowi tahlepa tuklo a taiyakla ka chaha kvv issuba tvli kapali itih ha kapanli ona hosh talaia tok.

## CHAPTER XV.

Enchil untuklo kvv na pavmmi untuklo ishtaiyopi ka il ai ishi, 1; 3 nampoa nukshopa yash im aiyachi tok vhleha in taloa; 7 koto-bushi untuklo kvv Chihowa nan isht i nukkilli alota.

1. **MIHMA** nan isht atokowa inla yvt isht anukhlakancha he a chinto hō vba aholitopa yō a pisa li ma, enchil untuklo kvt na-palvmmi untuklo ishtaiyopi yvmmak o Chihowa nan isht i nukkilli yvt isht ai ahli mak o ieshi tok.

2. Yohmi ma okhvta shohkoali hosh luak it ieshit talaia chiyuhmi na pisa li tok; mihma nampoa nukshopa, micha yvmma holbvt toba, mikmvt isht in chuwa, yvmohmikmvt yvmma hohchifo isht aholhtina aiena ka imaiyachi tok vhleha a moyuma hokvto Chihowa i hap ieshi hosh, okhvta shohkoali yash o hiohli tok.

3. Mihmvt Chihowa in tishu Moses im vlhtaloak, micha Chukfvlhpobushi im vlhtaloak aiena ka okla talohowa kvt, Chitokaka Chihowa nana moma imaiya, vbanumpuli vhleha i Miko chia ma! nana ish a toksahanli puta ka isht a nukhlakancha he a chinto hoke: yohmi kvt ai vlhpiesa ai ahli yak osh a chim anukfila yoke.

4. Chitokaka ma! Chishno ak bano hosh chi holitopa hoka, kvta hosh ik chi nukshohompot, chi hohchifo ha ik holitoblecho ka chi cho? ai vlhpiesa na palvmmi ish onochi hatuk a otvni hoka, oklushi moma kvt chi tikba ya ai vltv chi aiokpahancha hi oke, ahanchi tok.

5. Yakohmi ha ya anonti hopokoyo li tok; mihma yakeh! nan isht atokowa vlhtipo in tempel vt vba aholitopa ya a tiwa tok.

6. Yohmi ma enchil untuklo kvt na palvmmi untuklo kash ieshi hosh, linen kashofa tohbi yō foyuka mvt, anonti tvli holisso lakna isht vskofvchi toba hō chunuko ya isht vskofaiyachi hosh, tempel ash auet a kohcha tok.

7. Yohmi ma nan okchaya ushta kash ot achvvt Chihowa, yvmmvt okchayvt anta kvt bilivt bilia nan isht i nukkilli ya tvli holisso lakna kotobushi untuklo alotowa hō enchil untuklo kash ima tok.

8. Yohmi ma Chihowa nan isht im aholitopa, mikmvt nan isht im ai ahli a minti shobohli hō tempel ash osh isht alotowa tok; yohmi ka enchil untuklo nan isht im a palvmmi untuklo kash ot ont ik ai ahlo kisha hokvno hatak nana kia tempel ash a chukowa he keyu hatok.

## CHAPTER XVI.

Nan isht i nukkilli kotabushi alota kash o enchil vt fohopli, 1; 6 mih ma na palvmmi hosh aya; 15 hukopa yo chohmit Klaist vt vla chi; mikma kvna hosh okchvt hohoyo tuk okvto na yukpa he.

1. YUMOHMI ma anumpa ola chinto kvv tempel a auet a kohcha kvv, Oh ia cha, Chihowa nan isht i nukkilli kotobushi ai vlhto kash yakni pakna oh ai o fohopli, enchil untuklo kash im ahanchi na haklo li tok.

2. Mihma vmmoma kash ot ia mvt, ilap i kotobushi vlhto kash yakni ont o fohopli tok; mihma kvna hosh nampoa nukshopa isht in chuwa ya isht ai in chuwa tok, mikmvt kvna hosh yvmmma holvvt toba ya aiokpahanchi tok hatak puta kash o hichi okchushba nan okpunlo kvv onvtuyula tok.

3. Anonti enchil atukla kash ot ilap i kotobushi vlhto kash okhvta ont o fohopli tok; mihma hatak illi im issish o chohmit toba na nan okchaya okhvta ai asha tuk vt moyu-mvt illit taha tok.

4. Anonti enchil atuchina kash ot ilap i kotobushi vlhto kash okhina, mikmvt kvli puta ka o fohopli tok; mihma yvmmak ash ot issish o toba tok.

5. Yohmi ma oka puta ka im enchil osh okchayvt ish ahanta kvv, okchayvt ish ahanta tok osh, anonti okchayvt ish ahanta hi osh nana ka yakohmichit ish apesa hoka, Chitokaka ma! nan ai vlhpiesa chia hoke.

6. Yvmmak okvt vbanumpuli vhleha, mikmvt hopaii vhleha aiena im issish a hlatahambli tok okvt, ilap mvt, ai i yvmohma he vlhpesa mak o, ishka chi ka issish o ish ihimvshke, achi ho haklo li tok.

7. Anonti inla kvv alta ya auet a kohcha kvv, Ik yvmohmi mvhli, Chitokaka Chihowa nana moma imaiya ma! nan ai ahli ai vlhpesa kak o ish apesa yoke, achi ho haklo li tok.

8. Anonti enchil ont ai ushta kash ot ilap i kotobushi vlhto kash hvshi yo o fohopli tok: mihma hatak puta ka



luak o isht towulhkocho chi ka yvmmak ash o nan isht ai ahli yosh im vlhpisa tok.

9. Atuk o hatak puta kash ot na lvshpa chinto ka isht towulhko mvt, Chihowa, yvmmak osh na palvmmi ilvppa puta ka i shahli yatuk a i hohchifo ha ik ahobalot na miha-chi tok; mihmvt yvmmak ash o holitoblicha hi atok vt okla ik ile kostinincho ki tok.

10. Yohmi ma enchil ont isht tahlapi kash ot ilap i kotobushi vlhto kash nampoa nukshopa yash im ai o binili o fohopli tok; mihma yvmma im apelihchika ya ai okhlili kvtkvnia ma, nan anukhahvmi hokvt, isunlvsh atuk a okla ahampa tok.

11. Mihmvt hichi okchushbvt hotohompa hokvt, ilap nana a kaniohmi tok puta ka okla ai ile kostininchi keyu mvt, vba aholitopa in Chihowa yak o ik ahobalot na miha-hanchi tok.

12. Anonti enchil ont isht hannali kash ot ilap i kotobushi vlhto kash okhina chito Euflates a o fohopli tok; mihma hvshi a kochaka miko vhleha im ataya yvt vlhtaha chi mak o, oka yvmma foyuka tuk vt shilvt taha tok.

13. Yvmohmi ma shilombish ik kashofo tuchina kvtkhatonlvbi ho holba hosh sinti chilita itakha, mikmvt nampoa nukshopa itakha, micha hopaii ilahobi itakha aiena kash akohcha na pisa li tok.

14. Yvmmak okvt nan isht ahullo okpulo imi shilombish vhleha hatuk osh, nafehna puta ka yvmihinchi mvt, Chihowa nana moma imaiya i nitak a chintokma ai itiba chi mak o itvnala chi hosh, miko vhleha yakni moma ai asha ka ivt im ohonvshke.

15. Yakeh! hukopa yo chiyuhmit vla lishke; isht a hofahya ka okla pisa hinla ka, nipi banot ik ayo ka chi kvtkvna hosh okchvt ahah! ahnit ilap imi nafohka puta ka ilatomba hokvto nayukpvshke.

16. Yohmi ma Heblu anumpa hvtk Amaketton achi yvmmak o ai itahobit tahli tok.

17. Yvmohmi ma enchil ont isht untuklo kash ot ilap i kotobushi vlhto kash vba shutik takla yak o a fohopli tok;

mihma anumpa ola chinto kvt ai o binili holitompa yak o a minti hosh vba aholitopa in tempel a auet a kohcha mvt, Ulhtaiyahvshke, achi tok.

18. Yohmi ma nan ola, hiloha, mikmvt malvtha puta aiena kvt yummak ash o a takali tok: yohmi ma yakni winnakvchi chinto atampa, yumma chohmi kvt hatak vt yakni pakna ai vta tok taiyakla ka iksho chatuk vt, yakni winnakvchi chinto kvt ituyula tok.

19. Yohmi ma tmaha chito yash ot itakvshkovt kashapa tuchina ma, anonti oklushi in tmaha puta hatuk vt aiokpu-loka tok; yohmi ma Chihowa hvt ilap nan isht i nukkilli kvlllo chinto oka paki isht ishko vlhto ka ima chi kvt Babulon chito ash ithahana tok.

20. Mihma tishaiyi yvt momvt atoshowa tok osh iksho ma, anonti nvni hoshito puta hatuk mvt ik otaiyano ki tok.

21. Yvmohmi ma hatafo chinto kvt vba shutik a minti hosh, weki kvt talent achvfa foka aiyuka hosh hatak puta ka onvtuyula tok; yohmi ma hatafo nan isht palvmmi pulla hatuk mak o, hatak puta kvt Chihowa ha ik ahobalot namihahanchi tok, yumma nan isht palvmmi kvt chinto hoka.

## CHAPTA XVII.

Ohoyo hvt natishipa humma lapushki yo foyuka mvt, tvli hvta lakna isht ishko toba ho ieshi hosh nampo a nukshopa yash pakna, yvm mvt Babulon mak o o binili, 1; 5 noshkobo untuklo kvt nana ka anoli: 12 mikmvt lapish pokoli kvt nana hatuk aiena kvt annoa, ohoyo havi yashot nan i palvmmi; 14 chukfvlhpobushi vt nan im aiyachi.

1. YUMOHMI ma enchil untuklo, yvm mvt kotobushi untuklo ieshi tok vhleha hash achvft ant vm anumpuli mvt, olehma minti; havi chinto yvm mvt oka lava pakna o binili;

2. Yummak o miko puta yakni pakna ai asha kvt isht itin lumaka tok; yohmi ma ilap nan itin lumaka oka paki a yakni pakna ai asha vhleha hvt ishkot ik haksí im ahni tok,

yvmmt nan isht i palvmmi im vlhpisa ka chim otvninchi la chi hoke, vm achi tok.

3. Yohmi ma shilombish si anukfoka ho yvmmak ash ot ishit yakni haiaka vsst ona tok: mihma nampoa nukshopa humma hosh nana ka ik ahobalot miha hohchifo ho isht alotowa mvt, noshkobo untuklo cha, anonti lapish mvt pokoli ho ohoyo hosh o binili ho pisa li tok.

4. Yvmohmi ma ohoyo hash ot na hummakbi mikmt na tishepa na fohka hosh tvli holisso lakna, tvli holitopa puta, mikmt pul aiena ka isht a shema ho foyuka mvt, ilap itir lumaka isht a liteha na yuwalvchi puta kvv tvli holisso lakna isht ishko yo alotowa hosh ibbak a foyuka tok.

5. Yvmohmi ma, NAN IK OTANO, NA CHINTO BABULON, HAVI PUTA, MIKMT YAKNI PAKNA A YUWALVCHI PUTA ISHKL, hohchifo hosh yvmma ibitakla ya a holisso hatok.

6. Yohmi ma ohoyo hash ot vbanumpuli vhleha im issish, mikmt Chisvs isht im atokowa kak o isht illi tok vhleha im issish aiena ka ishkot haksi na pisa li tok; mikmt pisa li mvt, sa nukhlakancha mvt, okokko! ai ahni li fehna tok.

7. Atuk o enchil ash ot, Nanta katiohmi ho chi nukhlakancha tuk oh cho? ohoyo hash, micha nampoa nukshopa yash ot, yvmmt ohoyo ha isht aya kvv, noshkobo hvv untuklo mvt, anonti lapish mvt pokoli ka nan isht ik im otano ka chim anoli lashke.

8. Nampoa nukshopa yash, yvmma ish pisa tuk a anta tuk osh, anonti ikshoshke; yohmi kia yvmmt chiluk hofobi ai vhli iksho a auet a kohcha chi hoke; mikmt aiokpuloka ont chukowa chi hoke: mikma yakni pakna ai asha puta kvv, kvna hosh i hohchifo hvv yakni toba tok taiyakla ka holisso ai okchaya ya a holisso tok keyukmt, nampoa nukshopa, yvmmt anta tok osh, anonti iksho kia, anonti anta ak inli ka okla pisakmt, nukhlakancha chi hoke.

9. Yohmi ka ilvppak o nan ithana anukfoka kak osh akostininchishke. Noshkobo untuklo kvv nvni hohchito untuklo mak o yvmma pakna ya ohoyo hash ot o binili hoke.

10. Mikma miko untuklo kvv ai asha ka, tahlapi hosh ik-



sho ma, achvfa kvto anta, mikma achvfa kvto ik lo kisha hoke; mikmvt kaniohmi hō yummvt vla hokmvt, chekosi ai itin takla hō anta chī hoke.

11. Anonti nampoa nukshopa yash ot, yummvt anta tok osh, anonti iksho kv̄t, yummak ash kia isht untuchina kv̄t, isht untuklo kak o ibai achvfa hosh aiokpuloka ya pit a chukowa mak oke.

12. Mihma lapish pokoli hō ish pīsa tuk ash mīko pokoli hoke; yummvt apēhlichika ik im iksho kisha hoke; yohmi kia mīko v̄hleha chohmit hvshi kanvlli achvfa ka nampoa nukshopa yash ibai achvfv̄t nan isht ai ahli yvt im v̄lh̄pisa hoke.

13. Ilvppak ash ot, im anukfila hv̄t achvfa cha, anonti ilap nan isht im ai ahli, mikmvt im ile hlampko ita tuklo ka nampoa nukshopa yash ima chī mak oke.

14. Mikmvt ilvppak ash ot Chukfv̄lh̄pobushi ya itinta-nampa chī, mikma yummak okvt chitokaka v̄hleha in Chitokaka, micha mīko v̄hleha i Mīko yokvt Chukfv̄lh̄pobushi yash ot yummak ash o imaiyacha chī hoke; yohmi ka kv̄na hosh ymma ai ibachvfa hokvto v̄lhtoka, mikmvt ai ahli, micha holitopa mak oke, v̄m achi tok.

15. Mihmvt oka puta ymma ish pīsa tuk a, havi yash osh ymma o binili ka, hatak okla chinto, oklushi puta im anumpa ilaiyuka mak oke.

16. Mikmvt lapish pokoli, yummvt nampoa nukshopa on talohmaya na ish pīsa tuk, ilvppak okvto na havi yash i nukkillit, a chukillissv̄chit nipi banochi cha, nipi a v̄pa cha, anonti luak a isht hukma hi oke.

17. Chihowa yvt yummak ash chukvsh anukfohki na ilap nan ai ahni hō ai ahlich̄a chī ka im anukfila achvfa hosh ilap im apēhlichika yatuk ma nampoa nukshopa yash ih̄ima na Chihowa im anumpa puta kv̄t ont ai ahlik mak a hi oke.

18. Yohmi ka ohoyo ymma ish pīsa tuk vt tv̄maha chito mak oke, yummak osh mīko v̄hleha yakni pakna ai asha ka ai i shahli mak oke, v̄m achi tok.

CHAPTA XVIII.

Babulon vt akama 1; 4 Chihowa im okla hvt yvmma akocha chi kvt im vlhpisa; 11 yakni pakna a miko vhleha, mikmvt na chumpa, okhvta aya vlheha aiena kvt isht yahaya; 20 Chihowa nan im vlhpisa na palvmmi kvt onvtula hoka, vbanumpuli puta kvt na yukpa.

1. AIYAKOHMI ha ya, anonti enchil inla yvt nan isht ai ahli chinto ieshi hosh, vba a mintit aka vla na pisa li tok: mihma yvmma i shohpakali yo yakni vt isht a tohwikeli tok.

2. Mihma yvmmak ash ot anumpa ola chinto ka isht chitoli fehnvt tahpula mvt, Babulon na-chinto yash ot aiokpulo-kvshke, aiokpuloka mak oke: yohmi mvt nan isht ahullo okpulo puta im aboha kvllo, micha shilombish ik kashofo, mikmvt hushi okpulo ik kashofo moma ka in chuka yo toba mak oke.

3. Yvmmvt nan itin lumaka nan isht haksichi oka paki yo okla momvt ishko tok, mihma miko vhleha yakni pakna ai ashia kvt yvmma ai itinlumaka tok; mihma na chumpa vhleha yakni pakna ai asha kvt, nan ilimpa hochukma in laua kak o nan in laua toba tok oka, ahanchi tok.

4. Anonti anumpa ola inla yvt vba aholitopa ya a minti mvt, Um okla hvchia mvt, yvmma nan im ai ashvchi puta ka, mikmvt na-palvmmi im vlhpisa puta ka hvch ik ibai esho ka chi kvt, yvmma a kohchvt ho minti.

5. Yvmma nan im ai ashvchika puta kvt vba shutik a ont a bikeli hatuk o, Chihowa hvt, yvmmvt nan ik ai vlhpeso puta ka ithaiyana tok oke.

6. Nana ka hvchi yvmihchi tok mak o chohmichit oh i yvmihchi; mikmvt nana ka a yvmihchi tok a vlbita ho apestv oh im vlbitelichi; isht ishko yvmma alotoli ka, ilap ma vlbitelit oh im alotoli.

7. Ilap inli ile holitoblichy kvt, mihma nan ilimpa champuli isht il ai atahlit, impvt anta kvt kaniohmi hatuk okma, yvmma chohmichit na palvmmi, na-nukhaklo aiena ka oh

imá; I hatak illi sia keyu, yohmi kv̄t na-nukh̄aklo pisa la chi keyu, ohoyo m̄iko sia hosh binili li, ilap chukvsh anu-kaka achi hoka.

8. Yohmi hoka na palvmmi puta, nan illi, yaiya, mikmvt hohchvfo aiena kv̄t nitak achvfa ka im aya chi; mikmvt yvmmak ash ot luak o isht hullukmit taiyaha chi hoke; Chitokaka Chihowa hv̄t hlampko hokvt, yvmmak ash nan im apesvt i palvmmichishke.

9. Yohmikma m̄iko vhleha yakni pakna ai asha kv̄t yvmma ai itin lumakvt, nan ilimpa champuli ai it atahlit impvt ai asha tuk vt, yvmmv̄t luhv̄wt shobulli ka okla pisa cha isht yahavvt, nishkin okchi mihinti mv̄t,

10. Yvmmv̄t nan isht i palvmmi ka nukshopa hatuk osh, auct i mishema ho hiohmayvt Ikikkeh! ikikkeh! tumaha chito, Babulon tumaha chinto kv̄llo atampa, yvmmv̄t hv̄shi kanvlli achvfa mak inli ho nan isht palvmmi chim vlhpisa kv̄t chim av̄tshke.

11. Nan itatoba yakni paknaka ai asha kv̄t yvmmak ash o nan isht nukhaklot nishkin okchi mihinti tok; ilap im vlhpoyak a himak a pilla ma kv̄na kia ik in chumpo hoka;

12. Tvli holisso lakna, micha tvli hv̄ta, micha tvli holitopa, pvl, linen lapushki, nahummakbi, silk, na-tishepa, mikmvt iti sitlon moma, mikmvt aifoli, nan ai vlhto ilaiyuka moma, mikmvt iti holitopa fehna nan ai vlhto ilaiyuka moma, micha tvli lakna, tvli, mabv̄l aiena nan ai vlhto ilaiyuka moma atoba;

13. Mikmvt sinnamon, na balama, nan ahama, micha filakinsen, oka paki, na bila, bota tohbi achukma, onush, mikmvt nampoa puta chukv̄vlhpoba, issuba, micha itichanvli, yuka, hatak shilombish puta aiena kash o kv̄na kia ik in chumposhke.

14. Nan vnit waya puta yvmmak o chi chukvsh vt anushkunna tuk ash a chim afilvmmi; mihma nana moma na champonli, micha na shohvalvshli aiena tuk ash ot a chim okpulo; yohmi kv̄t himak a pilla ma yvmmak ash ish ahayucha chi keyu kamohmi hoke.

15. Nana ilvppa puta kash nan itatoba, yvmmak okvt



yummak o nan isht ai in laua tok vt, yummvt i palvmmi ka nukshopa hatuk osh, auet i mishemanchit hiohmayat isht nukhaklot nishkin okchi mihintit,

16. Ikikkeh! ikikkeh! tvmaha chito yummak amo! yummak okvt linen lapushki, micha na-hummakbi, micha na ti-shepa aiena ka isht ai im ai vlhtaha, yohmi kvv tvli holisso lakna, micha tvli holitopa puta pvl aiena ho isht a shema tok amo!

17. Nan laua chinto yakohmi kash ot hvshi kanvlli achvfa ho ont aiokpulokvt kvnia hoka, ahanchi tok. Yohmi ma peni chito isht aya apesvchi aiyuka, micha peni chito ai asha yatuk moma, micha a toksvli aiena, mikmvt okhvta nan ai itatoba yatuk vt momvt auet i mishemanchit hiohmayvt,

18. Yummvt luhvwt shobulli ka okla pisa mvt, tahpvlvt, Nanta hosh tvmaha chito ilvppa chiyuhmi cho? ahanchi tok.

19. Mihmvt hituk chubbi okla ishit noshkobo il o fohopli mvt, tahpvlvt, nishkin okchi mihintit yahaya hosh Ikikkeh! ikikkeh! tvmaha chito yummak amo! yummvt nan isht il ahayuchit, nan isht shema ai vlli hochito puta ka chumpa hatuk mak o, okhvta pakna peni im a takohli maya moma kvv nan in laua yo toba kvmo! hvshi kanvlli achvfa ma yummak ash ot a chukillissvt kvnvishke, ahanchi tok.

20. Vba a holitopa chia ma! vbanumpeshi holitopa, micha hopaii holitopa hvchia ma! Chihowa yvt yummak ash nan im apesvt i palvminchi hokvt hvchi atobvchi hoka, nan isht il oh aiyukpa.

21. Yohmi ma enchil chinto yvt tvli na-botoli tvli chito yo chohmi ka ishit, okhvta pit pila ma, yumma chiyuhmi hosh tvmaha chito Babulon vt ai oklvht kinahla chi hoke; mikmvt himak a pilla ma otaiyana he keyu kamohmi hoke.

22. Yvmohmikma hap olachi, micha nan taloa, micha oskula olachi, micha isht pufa olachi aiena nan im ola ka himak a pilla ma a chi a haiyakla he keyu kamohmi; mikma hatak nan imponna nana ho isht ai imponna yatuk kia himak a pilla ma a chi otaiyana he keyu; mikma tvli na botoli kia himak a pilla ma a chi a haiyakla he keyu kamohmi hoke.

23. Mikma pva tohwikeli mvt himak a pilla ma a chi on

tohwikela he keyu ; mikma hatak himona nan itauwaya, micha ohoyo nan auwaya im anumpa ola himak a pilla ka a chi a haiyakla he keyu kamohmi hoke : na chin chumpa vhleha hvt yakni paknaka a hochito kvt maya tok oka ; ikhish isht yushpakvmmi isht ish ahanta hatuk mak o, oklushi moma kvt isht yushpakama hatok, ahanchi tok.

24. Yohmi ma hopaii vhleha, micha vbanumpuli ahli vhleha, mikmvt yakni paknaka ya ai vbi tok moma im issish vt yvmma ai otaiyani tok.

## CHAPTA XIX.

Ilap im antia puta im issish hlatahampli tuk isht vltoba mak o havi chinto yash na palvmmi ka im apesa hoka, vba a holitopa ai asha yvt Chihowa ya aiokpahanchi, 1 ; 7 Chukvhlhpobushi nan im itauwaya : 16 ilap okvno aiokprcha hi a enchil vt ik im ahno ; 17 nan illi lawa ai asha ka ai vla chi kvt hushi puta kvt im annoa.

1. NANA ilvppvvt ai yakohmi ha ya, hatak laua im anum-pa ola chinto ka vba aholitopa pit a haklo li ma, Alleluia, isht ai okchaya, isht a holitopa, isht ahninchí, nan isht ai ahli aiena kvt Chitokaka hvpin Chihowa ya ai immi hoke.

2. Nan apesa kvt ai ahli, micha ai vhlpiesa hoke ; yohmi kvt havi chinto yash, yvmmvt itin lumaka kak o yakni ya isht okpaiyani hatuk a, yvmmak ash ot nan im apesvt i palvmmichi tuk : mihmvt in tishu vhleha im issish yvmma ibbak vt hlatahampli tok a ai isht im atobbi tok, ahanchi tok.

3. Atuk o anonti, Alleluia okla achi tok. Mihma yvmma i shobohli hvt vba ya ihiya na bilivt bilia hoke.

4. Mihma hatak tikba pokoli tuklo akucha ushta, micha nan okchaya ushta aiena kash ot aka hlipkvchi mvt, Chihowa, yvmmvt ai o binili holitomp a o binili tuk ash aiokpvchit, Amen ; Alleluia, ahanchi tok.

5. Mihma anumpa ola hvt ai o binili holitomp a ya auet a kohevvt takali kvt, Pin Chihowa ya in tishu vhleha hvchia, micha kvna hosh yvmma i nukshohomp a aiena kvt ik alauwo, i shahli, a moyuma kvt oh aiokpahanchi, ahanchi tok.

6. Yohmi ma okla chinto im anumpa ola ho chiyuhmi,

mihmvt oka lawa fopa hō chiyuhmi, mihmvt hiloha chinto ola hō chiyuhmi hō haiyaklo li ma, Alleluia; Chitokaka Chihowa nana moma imaiya hvt miko yoka.

7. Chukfvlhpobushi vt itauwaya chī nitak vt vla, yohmi ma tekchi ya chī mvt, il ai atahli tuk oka, nan ik hvpi yukpa cha, keho tullī, ahānchi tok.

8. Yohmi ma linen lapushki vt vbanumpuli ahli isht im ai vlhpiesa mak o, linen lapushki kashofa tohbi ka isht il ashemvcha chī kvt, tekchi vt im vlhpisa tok.

9. Yohmi ma, Holissochī, Chukfvlhpobushi im ai itauwaya opiaka impa aya chī kvt kvna hosh im annoa tuk mvt, mihi yosh na yukpa hoke, vm achishke. Mikmvt ilvppak osh Chihowa im anumpa ahli mak oke, vm achishke.\*

10. Mihma aiokpuchi la chī hosh iyi ya a hlipia li tok. Atuk ak o yvmmak ash ot, Ahah! ahnit chik yohmo kashke; tishu chitilauī, chitibapishī, Chisvs nan isht im atokowa ieszī vhleha ibai achufa sia hoke; Chihowa hak o aiokpuchi; Shilombish Holitopa yvt hopaii anukfoyukvt Chisvs nan isht atokowa ka anumpohonli yoke, vm achi tok.

11. Yohmi ma vba aholitopa yvt tiwa ma, yakeh! issuba tohbi hō pisa li tok; mihma yvmma o binili kvt, Ai ahli, mi-cha Na miha tuk vt ai ahlichī mak o hohchifo hosh, yvmvmt nan ai vlhpiesa bano hō nan apesvt, tvnvp ikbi yoke.

12. Nishkin vt luak libbi hō chiyuhmi ma, anonti iachuka lawa kvt noshkobo ha afoyua hatok; mihma i hohchifo holisso kvt lapali kia, kvna kia ik ithano hō, ilap ak bano tok.

13. Yohmi mvt issish isht humma anchi o ai anchi tok; mihmvt i hohchifo hvt, Chihowa im Anumpa, achi tok.

14. Yohmi ma vba aholitopa ai asha tuk vt issuba tohbi o binili hosh yvmmak ash okla iakaiya kvt, linen lapushki tohbi kashofa hō ai anchi tok.

15. Yohmi ma im itakha ya bvshpo falaia halupa hosh a kohcha na yvmmak o oklushi puta ka isht ahamba hi yatok; yohmi kvt tvli fuli yo yvmmak ash nan isht im apihisa hi oke; yohmi kvt oka paki atoba yo chohmit Chihowa Chitokaka nan okluha imaiya nan isht i nukkilli chinto ka isht a hvhlihinchī hoke.



16. Yohmi kvt miko puta i Miko, mikmvt chitokaka puta in chitokaka hohchifo hosh yvmma im anchi, mikmvt iyubi ita tuklo ka ai o holisso hoke.

17. Yvmohmi ma enchil vt hvshi a ai o hikia na pisa li tok: mihma yvmmak ash ot chitolit talpula mvt, hushi puyuta; yvmmvt vba a helit itvnowa moma kvt, Hvehishno inli hosh mintit Chihowa chinto im opiaka ai impa oh ai itvnahá.

18. Yohmi kvt miko vhleha nipi, micha kvpitvni vhleha nipi, hatak ishtokaka nipi, issuba puyuta, mikmvt kvna hosh yvmma o binili tuk puyuta nipi, hatak moyuma, yuka keyu, micha yuka, yohmikmvt ik alauwo, i shahli aiena ka nipi ya hvsh pa chi hoke, im ahanchi tok.

19. Anonti nampoa nukshopa yash ot, mikmvt yakni paknaka a miko vhleha, mikmvt in tvshka chipota vhleha aiena kvt itahobvt taiyaha cha, issuba o binili, micha in tvshka chipota aiena yvmmak ash in tanahampi na pisa li tok.

20. Yohmi ma nampoa nukshopa yash ot yuka tok; mihma hopaii ilahobi yash yvmmvt na fehna puta ka yvmma itikba ai yvmihinechi kvt, yvmmak o yvmihinechi kak osh nampoa nukshopa isht in chuwa ieshi tuk vhleha, mikmvt yvmma holbvt toba ya kvna hosh aiokprvchi yatuk puta ka yoshuhumbli tok. Ilvppak ash ot ita tuklot okchaya na okhvta hituk lakna isht ita luhuwa ka pit a kanchi tok.

21. Yohmi ma inlaka yatuk vto issuba o binili yvmma i bvshpo falaia, yvmmak osh im itakha ya a koheha tuk mak o isht ihinli tok; mihma hushi puyuta kash ot yvmma nipi yo isht a kaiya tok oke.

## CHAPTA XX.

Setan vt talakchi na afvmmi tahlepa sipokni achvfa chi, 1; 6 illi yvt tani vmona yvmma ai ib abalaia hokvto na yukpa he; 7 chekosi takla ka Setan ashot i holhtofa he. 8 Kok micha Makok imma ho isht anumpuli. 10 Okhvta hituk lakna isht aluhuwa ho Setan amo pit itakanchi; 12 nan vllhpisa chinto isht aiyopi.

1. YOHMI ma enchil vt chiluk hofobi ont ai vhli iksho ash isht tiwa ieshi mvt, tvli itatakvoli chito yosh ibbak a foyuka hosh vba ya a minti ho pisa li tok.

2. Mihma yvmmak ash ot sinti chilita chito yash, sinti sipokni, yvmmt nan isht ahullo, micha Setan mak o afvmmi tahlepa sipokni achvfa ka ona chi ho ishit yukachi tok.

3. Mihmvt yvmmt himmakma oklushi puta ik yoshublo ho afvmmi tahlepa sipokni achvfa he tuk vt ont ai ahli ha yo, misha pilla ho chekosi itintakla ka i hlitofa hi o, yvmmak ash chiluk hofobi ont ai vhli iksho ash pit pilvt im okshita mvt, isht in chuwa on lapalichi tok.

4. Mihma ai o binili holitompa puta ka pisa li tok, mihma yvmma o binohmaya kvv nan ai apihisa he im vlhpisa tok: yohmi ma nampo a nukshopa, mikmvt i holbvt toba aiena ka ik aiokpacho, mikmvt isht in chuwa yvt ilap ibitakla, ibbak aiena ka ik a lapalo hosh; Chisvs nan isht im atokowa, micha Chihowa im anumpa pulla ho noshobo hvt tahampa tok vhleha imi shilombish a pisa li ma, yvmmak ash ot okchaya cha afvmmi tahlepa sipokni achvfa ka, miko yo chohmit Klaist a ibai ahanta tok.

5. Amba illi inla maya tok okvto ik okchayo ho afvmmi tahlepa sipokni achvfa kvv tahak mak a hi atok. Ilvppak osh illit falamvt tani vmmona mak oke.

6. Illit falamvt tani vmmona ka kvna hosh ibahalaia hokvto, mihi yosh na yukvvt holitopa: yohmi hokvno atukla illi vt nan isht i shahla he ik im iksho hoke; Chihowa, micha Klaist na holitompa isht im vttta vhleha ha chi, mikmvt miko yo chohmit ibai ahanta na afvmmi tahlepa sipokni achvfa chi hoke.

7. Yvmohmi tuk ma afvmmi tahlepa sipokni achvfa kash ot ont ataiyahakma, Setan ash ot aboha kvllo a ik akohcha, im ai ahna hi oke.

8. Yohmikmak o oklushi puta, yvmmak okvt yakni pakna akvshkova ushta ka ai asha Kok, micha Makok okla yvmmt holhtina kvv okhvta alaka shinuk ai asha kak o chiyuhmi ho yoshublihinchit itahobi cha, tanahampa chi hosh akohcha hi oke.

9. Mihmvt yummak ash ot, yakni pakna a mominehit ilhkoli mvt, yummvt vbanumpuli ahli vhleha i bina, mikmvt tmaha chito holitopa aiena ka okla ai apakfokahanchi; mihma luak osh Chihowa a mintit vba akohchvt vlt, yummak ash ishit vpa tok.

10. Yohmikma yemma yoshublichī tuk nan isht ahullo yvt okhvta hituk lakna isht ita luhuwa, yemma nampoa nukshopa, micha hopaii ilahobi aiena kash ot pit itvtula tok: yohmi kv̄t nitak, ninak aiena ka ai ilbahasha na bilia hosh bilia hi oke.

11. Yohmi ma ai o binili holitompā tohbi chinto, micha yemma o binili ita tuklo ka pisa li ma; yemma nashuka ya i filvmm̄it yakni, mikmvt vba shutik ita tuklo kv̄t tamoa kv̄t, kanima yo a taloha he kia ik im iksho ki tok.

12. Yohmi ma illi, ik alauwo, micha i shahli pit aiena kv̄t ai o binili holitopa itikba hiohmaya ka pisa li tok; yohmi ma holisso puta kv̄t wakama tok; anonti holisso inla, yummak osh holisso ai okchaya mak osh wakama tok: mihma illi yash ot ilap nana a kaniohmi tuk puta, yummvt holisso ha a holihiso tok ilvppa puta ho isht ai im vlv̄pihisa tok.

13. Yohmi ma okhvta hv̄t illi puta, yummvt im aiasha tuk vt il ai a kocha welikma, anonti nan-illichī, micha illi ai asha mvt illi puta, yummvt im ai asha tuk vt il ai a kohcha weli na yummak ash ot ilap nana a kaniohmi puyulla tuk mak o hatak moma kash ot nan isht im vlv̄pihisa tok.

14. Mihma nan-illichī, micha illi ai ashā yamo okhvta luak o pit itokaha tok. Ilvppak osh atukla illi mak oke.

15. Yohmi ka holisso ai okchaya ya a holisso tuk osh otr̄ni keyu hokv̄to okhvta luak mak o pit a kv̄nia tok.

## CHAPTA XXI.

Vba vmmona micha yakni vmmona ita tuklo ka Chan vt pisa, 1; 10 Chelusalem vba isht annoa ahli moma; 23 yummak oka hv̄shi vt a tomma he ahna he keyu, Chihowa im atohwikeli yak osh a tom̄mi; 24 yakni pakna ai i miko puta kv̄t yummak o im aholitopa ya isht im ohona.



1. ŪBA vmmona, micha yakni vmmona ita tuklo kash ot ont ik ai iksho ma, anonti himak a pilla ma okhvta mvt iksho ka chī hō vba himona, micha yakni himona ita tuklo hō pisa li tok.

2. Mihma Chan sia hvt tvmaha chito holitopa Chelusalem himona Chihowa yā a mintit vba yā auet a kohcha kv̄t, ohoyo himita hatak auwaya chī hosh isht il a shema chatuk ak ō chiyuhmi tok.

3. Yohmi ma anumpa ola chinto kv̄t vba aholitopa yā a kohcha na haklo li ma, yakeh! Chihowa hvt im vltipo yvt hatak puta ka ibafoyuka hatuk ō, yvmmak ō ibai ahanta chī, mikma im okla tobakma, anonti Chihowa ilap mvt yvma in Chihowa hosh ibafoyukvt ahanta chī hoke.

4. Mikmvt Chihowa yvt yvma i nishkin okchi puyuta ma im a kasholichit kaiyancha chī; mikma nana tikba-tuk vt ont taiyaha hoka, himak a pilla ma isht ai illi, micha nanukhaklo, micha yahaya aiena kv̄t ik ai iksho ka he, mikmvt na-hotopa mvt ik ai iksho ka hi oke, ahanchi tok.

5. Yohmi ma ai ō binili holitempa ō binili yvmmak ash ot, Yakeh! nana moma kv̄t himona hō ikbi lishke, achi mvt, yvmmak ash ot, Anumpa ilvppvt aiahli, micha na miha ka ont ai ahla chī hoka holissochi, v̄m achi tok.

6. Atuk osh yvmmak ash ot, Ūlhtaiyahvshke; Alfa, micha Omeka, ai isht ia vmmona, micha ont ai v̄hli sia hosh, kv̄na hosh itukshila hokma, oka ai okchaya kv̄li hak ō pilla ai ima la chī mak oke.

7. Kv̄na hosh nana ka imaiyachi tuk mak osh nana moma ka ai immi ha chī im ai v̄lhpiesa; mikma in Chihowa sia hokma, anonti ilap vt sv̄so ha chī hoke.

8. Amba na nukshopa, micha nan ik yimmo, i yuwala he v̄lhpesa kia yv̄mihchi, mikmvt hatak bika v̄bi v̄hleha, havi v̄hleha, mikmvt ikhish isht yushpakv̄m̄mi v̄hleha, na holbvt toba aiokpv̄chi v̄hleha, holabi puta a moyuma hokv̄to atukla illi mak osh okhvta yvmmak okvt hituk lakna isht ita luhv̄wa hō isht ai i palv̄mma chī hosh im v̄lh̄pisa he mak oke, v̄m achi tok.

9. Yvm̄ohmi ma enchil untuklo kash ai ibai achv̄fa, yv̄m-

mak okvt kotobushi untuklo nan isht palvmmi ishtaiyopi untuklo kash isht alotowa ho ieshi hosh, vltv svt im anumpuli mvt, Minti, himona nan auwaya Chukfulhpobushi tekchi chi haiakvchi la chi hoke, achi tok.

10. Mihma shilombish o si anukfoyuka ho vsisht ia ma, nvni chinto chaha yo vsisht ona cha, tmaha chito, Chelusalem holitopa yvt Chihowa isht im aholitopa ai ishit Chihowa a mintit, vba aholitopa auet a kohcha mak o a haiakvchi tok :

11. Mihma in tohwikeli hvv tvli holitopa fehna, tvli chaspa chohmi kak o hoyulba hosh, bvlancha kvv klistal o chiyuhmi tok ;

12. Mihmvt tvli yosh isht a holihta kvv chito, micha cha ha ma, anonti okhissa yvt im auah tuklo ma, enchil mvt okhissa ya vllpivt auah tuklo kvv a hielitok ; mihma yvma ai o holisso hohchifo kvv Israel okla it a kvshkova auah tuklo i hohchifo hatok.

13. I hvshi akochak-imma ya okhissa tuchina ma, i falvmmi imma ya okhissa tuchina ma, im oka-mahli imma ya okhissa tuchina ma, anonti i hvshi ai okvtulik-imma ya okhissa tuchina tok.

14. Yohmi ma tmaha chito a holihta ka in tolahpi auah tuklo tok ; mihma Chukfulhpobushi im anumpeshi auah tuklo hohchifo hosh a lapanli tok.

15. Yohmi ma svt im anumpuli tuk yvmmak ash ot tmaha chito, micha okhissa, mikmvt a holihta aiena ka isht apesa chi kvv tvli holisso lakna nan isht vllhpisa yo ieshi tok.

16. Yohmi ma tmaha chito yvt a itilauia bat fullotvt bolukta ma, afalaiaka yvt chito kvv okhowataka ya itilauitok ; mihma tmaha chito yash yvmmak ash ot nan isht vllhpisa yash isht apesa ma, kowi tahlepa auah tahlapi tok. Afalaiaka pilla, micha okhowataka pilla, mikmvt chaha aiena kvv ai itilaui bano tok.

17. Mihmvt aholihta kash o hatak i nan isht vllhpisa yo yvma enchil ash ot isht apesa ma, kubit tahlepa achufa pokoli ushta akucha ushta tok.

18. Yohmi ma a holihta kvv chaspa tvli yosh toba hatok ;

yohmi hoka tumaha chito yvt tvli holisso lakna bieka ho  
chohmi kvt apisa kashofa achukma ka chohmi tok.

19. Yohmi ka tumaha chito aholihtaka in tolahpi vt tvli  
holitopa ilaiyuka puta ho isht a shema hatok; in tolahpi  
ymmona kvt chaspa yatok; atukla kvt saffaia yatok; atu-  
china kvt kalsetoni yatok; ai ushta kvt emelal atok;

20. Isht tahlapi kvt salonik atok; isht hannali kvt sativs  
atok; isht untuklo kvt klisolait atok; isht untuchina kvt  
belil atok; isht chakkali kvt topas atok; isht pokoli kvt  
klisofasvs atok; isht auah achvfa kvt chasinlh atok; isht  
auah tuklo kvt amehlist atok.

21. Yohmi ma okhissa isht vlhkuma auah tuklo kvt pvl  
auah tuklo tok; okhissa isht vlhkuma achvfakma, pvl achv-  
fvt ia tok; yohmi ma tumaha chito anukaka ya ai itvnowa  
yvt tvli holisso lakna bieka ho chohmit apisa shohkoali kak  
o chiyuhmi tok.

22. Yohmi ma ymma anukaka ya tempel a ak peso ki  
tok: Chitokaka Chihowa nana moma imaiya, micha Chuk-  
fulhpobushi ita tuklo hosh in tempel oka.

23. Mihma Chihowa im aholitopaka yosh a tohwikeli ma,  
anonti ymma ai i pvla hvt Chukfulhpobushi yak atuk o,  
hvshi, mikmvt hvshi-ninak-aya kia im a tomma hi a tumaha  
chito yash ot ik bunno ki tok.

24. Yohmi ka oklushi puta ymmak okvt okchaya mak  
osh a tohwikeli ka ya ai itvnohwa he; mikma yakni pakna  
a miko vhleha atukmvt ilap im aholitopaka isht aiokpuchi  
hosh ai vlshke.

25. Ymmak oka ninak vt iksho ka chi hoka, nitak moma  
ka okhissa puta mvt ik okshilito kamolma hi oke.

26. Yohmikma oklushi puta im aholitopa, nan isht il ah-  
ninchī aiena ma ymma anukaka ya isht ai vlt chukowa hi  
oke.

27. Mikma ymmak oka nana kvt liteha, micha ai yuwala  
he kia ai yohmi, micha na holabichi a moyuma hokvto ka-  
niohmi kia a chukowa himma keyu hoke; amba Chukfulh-  
pobushi i holisso ai okchaya kvna hosh a holisso tok ak ba-  
na hi oke.



## CHAPTER XXII.

Oka ai okchaya okhina, 1; 2 ai okchaya iti. 5 Tvmaha chito i pula hvrt Chihowa ilap fehna kak inli: 9 ilap a aiokpvcha hi a enchil vt ik im ahno. 14 Tvmaha chito ash anukaka ai anta hokvto holitopa, amba kocha yo asha tuk okvto nan i palvmmi vtltakshi: 16 anumpa ai okchaya ya nana ho isht achakvla he keyu, mikmvvt kanimihchit ai ishit anumpa ha ishit kancha he keyu.

1. ANONTI ai okchaya okhina kashofa achukma, shohkoali klistal ak o chiyuhmi hosh Chihowa, micha Chukfvlhpobushi ita tuklo im ai o binili holitompa ak o akohoncha mak o, yvmmak ash ot a haiakvchi tok.

2. Okhina itahlakla ai itvnowa, okhina ititakla, iti ai okchaya yvt a hiohli kvrt, auah tuklo ha nan-vnit waya beka kvrt, hvshi achvfa aiyyukakma vnit wahaya hoke; yohmi ka iti yvmma hishi puta hokvto oklushi moma isht a hlakofi mak oke.

3. Yohmi ka yvmmak oka himak a pilla ma na palvmmi kvrt ik ai iksho ka he; amba Chihowa, micha Chukfvlhpobushi ita tuklo im ai o binili holitompa yosh a hikia na yvmma in tishu vhleha hosh aiokpahancha hi oke.

4. Yvmohmikmvvt yvmma nashuka ya okla pihisa he; mikma yvmma i hohchifo hosh ibitakla puta ma a lapanla hi oke.

5. Mikma ninak vt yvmmak oka iksho ka he; Chitokaka Chihowa yosh in tohwikeli hoka, pula, mikmvvt hvshi tomni aienā ka okla ik hvnno hosh, miko yo chohmit okla ahanta na bilivt bilia hi oke.

6. Yohmi ka anumpa puta ilvppvt ai ahli, micha nana miha ka ont ai ahla hi oke; yohmi hoka hopaii holitopa vhleha in Chihowa Chitokaka yvt, nana kvrt chekosi ont ai yvmohma chi yvmma in tishu vhleha im otvnihincha chi ka im enchil a auct chvffichi tok.

7. Yakeh! chekosikma vla lishke; holisso ilvppa tikbanli nan ai anohowa anumpa puta tuk a kvna hosh holitobli kak osh na yukpvshke, yvmmak ash ot vm achi tok.

8. Yohmi ma Chan sia mak osh nana ilvppa puta ka pisvt haiyaklo li tok: yohmi mvt pisvt haiyaklo li mvt, nana lvppa puta ka vm otvnninchi tuk, enchil a aiokpvchi la chi hosh iyi itikba ya hlipia li tok.

9. Yohmi ma, Ahah! ahnit chik yohmo kashke; tishu chitilaui, micha chitibapishi hopaii vhleha, micha holisso lvppa ai anuhumpa tuk a holitobli vhleha ai ibachvfa sia hoke; Chihowa ak o ish aiokpvchashke, yummak ash ot vm achi tok.

20. Mihmvt nitak vt ai ona hosi hoka, holisso ilvppa tikbanli ai anohowa tuk anumpa puta ka chik ashvniccho kashke.

11. Kvna hosh nan ik ai vlhpieso hokvto, mihi yosh ik ai vlhpieso kvt ik imoyumá; mikma kvna hosh liteha hokvto, mihi yosh liteha kvt ik imoyumá; mikma kvna hosh ai vlhpieso hokvto, mihi yosh ai vlhpieso kvt ik imoyumá; mikma kvna hosh nan ai ashvchika ik im iksho hokvto, mihi yosh nan ai ashvchika ik im iksho kvt ik imoyumá, vm achi tok.

12. Atuk osh yakeh! chekosikma vla lishke: yohmi kv hatak moma kv ilap nana a kaniohmi yvt kaniohmi aiyukali ho nana ka isht im atobbi la chi kv il ai ishi lishke.

13. Alfa, Omeka, ai isht ia vmmona, ont ai vhl, vmmona, ont ishtaiyopi sia mak oke.

14. Kvna hosh im anumpa vlhpisa puta ka holitobli hokvto na yukpvshke: yohmi hok mak osh iti ai okchaya isht im ai vlhpieso hosh okhissa ont a hlopullit tvnaha chito yash chukowa chi hoke.

15. Akochanli yak okvno ofi, ikhish isht yushpakvmmi, haui, hatak bika vbi, na holvvt toba aiokpvchi; mikmvt kvna kia il imi holabichi kv isht im achukma a moyuma kak osh ai asha yoke.

16. Ilvppa puyuta ka atokolit chvch a hiohli puta ka a hvchim anohonla chi hoka, Chisvs sia mak osh vm enchil a chvffichi li tuk oke. Vno ak osh Lewi a minti hakshish filaminchi yosh anonti unchululi, mikmvt sholpakali onnahinli fochik sia mak oke, ahanchi tok.

17. Yohmi ma Shilombish Holitopa, micha Klaist himona

nan im auwaya ita tuklo kash ot, Mintí, achishke. Yohmi ka kva hosh haiyaklokmt, mihi yosh, Mintí, ik achí. Mikma kva hosh itukshila hokmt, mihi yosh ik mintí. Yohmi ka kva hoh kia bvnakmt, mihi yosh pilla oka ai okchaya ya ik eshí.

18. Holisso ilvppak oka tikbanli nan ai anohowa tuk anumpa puta ka hatak vt haiyaklo tuk mōma im atokowa lishke: nana yakohmi tuk a hatak vt nana kia ibafohkit achakalikma, na palvmmi yvmmvt holisso ilvppa a holihiso tuk a yvmmak ash o Chihowa hvt isht im achakala hi oke.

19. Mikma hatak nana hosh tikbanli nan ai anohowa tuk holisso ilvppa anumpa puta hatuk a kaniohmichit isht a kanchi hokma, ilap vt holisso ai okchaya, micha tvmaha chito holitopa yash, mikmt nana kvv holisso ilvppa yvma isht a holisso tuk puyuta ka ahalaia hatuk a yvmmak ash Chihowa hvt isht kancha hi oke.

20. Ilvppa puyuta ka atokowvt otvnnichi mak osh, Chikosikma vla lishke, achishke. Amen. Chitokaka Chisv ma! ik yvmohmí, ish lashke.

21. Pin Chitokaka Chisv Klaist nan isht i kana yvt hush moyuma ka hvchi anukfoyukashke. Amen.

THE END.



SMITHSONIAN INSTITUTION LIBRARIES



3 9088 00578 5530